


四川大學古籍整理研究所編

儒藏

史部
第四十冊

四川大學出版社



儒藏



四川大學古籍整理研究所 編

儒藏·史部

儒林碑傳

第四冊

四川大學出版社 二〇〇五年



儒藏

目錄

目錄

宋儒碑傳集

三（卷六四至卷九七）

李勇先校點

吳洪澤尹波審稿

.....

—

宋儒碑傳集卷六十四

蘇軾 潘鯁

亡兄子瞻端明墓誌銘

予兄子瞻謫居海南。四年春正月、今天子即位、推恩海內、澤及鳥獸。夏六月、公被命渡海北歸。明年、舟至淮浙。秋七月、被病、卒於毘陵。吳越之民相與哭於市、其君子相弔於家。訃聞四方、無賢愚皆咨嗟出涕。太學之士數百人、相率飯僧慧林佛舍。嗚呼、斯文墜矣、後生安所復仰。公始病、以書屬轍曰、即死、葬我嵩山下、子爲我銘。轍執書哭曰、小子忍銘吾兄。公諱軾、姓蘇、字子瞻、一字和仲、世家眉山。曾大父諱杲、贈太子太保。妣宋氏、追封昌國太夫人。大父諱序、贈太子太傅。妣史氏、追封嘉國太夫人。考諱洵、贈太子太師。妣程氏、追封成國太夫人。公生十年、而先君宦學四方、太夫人親授以書。聞古今成敗、輒能語其要。太夫人嘗讀東漢史、至范

滂傳、慨然太息。公侍側曰、軾若爲滂、夫人亦許之否乎。太夫人曰、汝能爲滂、吾固不能爲滂母耶。公亦奮厲有當世志。太夫人喜曰、吾有子矣。比冠、學通經史、屬文日數千言。嘉祐二年、歐陽文忠公考試禮部進士、疾時文之詭異、思有以救之。梅聖俞時與其事、得公論、刑賞以示文忠。文忠驚喜、以爲異人、欲以冠多士。疑曾子固所爲、子固、文忠門下士也、乃寘公第二。復以春秋對義居第一、殿試中乙科、以書謝諸公。文忠見之、以書語聖俞曰、老夫當避此人、放出一頭地。士聞者始譁不厭。久乃信服。丁太夫人憂、終喪。五年、授河南福昌主簿。文忠以直言薦之。祕閣試六論、舊不起草、以故文多不工。公始具草、文義粲然。時以爲難。比答制策、復入三等。除大理評事、簽書鳳翔府判官。長吏意公文人不以吏事責之。公盡心其職。老吏畏伏。關中自元昊叛命、人貧役重、岐下歲以南山木、棧自渭入



藏

河經底柱之險、衙前以破產者相繼也。公徧問老校曰：木棧之害、本不至此。若河、渭未漲、操棧者以時進止、可無重費也。患其乘河、渭之暴、多方害之耳。公即修衙規、使衙前得自擇水工、棧行無虞。仍言於府、使得係籍、自是衙前之害減半。治平二年、罷還、判登聞鼓院。英宗在藩、聞公名、欲以唐故事召入翰林。宰相限以近例、欲召試祕閣。上曰：未知其能否、故試。如蘇軾有不能耶？宰相猶不可及。試二論、皆入三等、得直史館。丁先君憂、服除、時熙寧二年也。王介甫用事、多所建立、公與介甫議論素異。既還朝、寘之官告院。四年、介甫欲變更科舉、上疑焉、使兩制三館議之。公議上、上悟曰：吾固疑此。得蘇軾議、意釋然矣。即日召見、問何以助朕。公辭避久之、乃曰：臣竊意陛下求治太急、聽言太廣、進人太銳、願陛下安靜以待物之來、然後應之。上竦然聽受。曰：卿三言、朕當詳思之。介甫之黨皆不悅。

命攝開封推官、意以多事困之。公決斷精敏、聲問益遠。會上元、有旨市浙燈、公密疏、舊例無有、不宜以玩好示人、即有旨罷。殿前初策進士、舉子希合、爭言祖宗法制非是、公爲考官、退擬答以進、深中其病。自是論事愈力、介甫愈恨。御史知雜事者爲誣奏公過失、窮治無所得。公未嘗以一言自辨、乞外任避之、通判杭州。是時、四方行青苗、免役、市易、浙西兼行水利、鹽法。公於其間、常因法以便民、民賴以少安。高麗入貢、使者凌蔑州郡、押伴使臣皆本路管庫、乘勢驕橫、至與鈐轄亢禮。公使人謂之曰：遠夷慕化而來、理必恭順。今乃爾暴恣、非汝導之、不至是也。不悛當奏之。押伴者懼、爲之小戢。使者發幣於官吏、書稱甲子。公卻之曰：高麗於本朝稱臣、而不稟正朔、吾安敢受。使者亟易書稱熙寧、然後受之。時以爲得體。吏民畏愛、及罷去、猶謂之學士、而不言姓。自杭徙知密州、時方行手實法、使



民自疏財產以定戶等。又使人得告其不實。司農寺又下諸路。不時施行者。以違制論。公謂提舉常平官曰。違制之坐。若自朝廷。誰敢不從。今出於司農。是擅造律也。若何。使者驚曰。公姑徐之。未幾。朝廷亦知手實之害。罷之。密人私以爲幸。郡嘗有盜竊發而未獲。安撫轉運司憂之。遣一三班使臣。領悍卒數十人。入境捕之。卒凶暴恣行。以禁物誣民。入其家爭鬪至殺人。畏罪驚散。欲爲亂。民訴之。公投其書不視。曰。必不至此。潰卒聞之。少安。徐使人招出戮之。自密徙徐。是時河決曹村。泛於梁山泊。溢於南清河。城南兩山環繞。呂梁百步扼之。匯於城下。漲不時洩。城將敗。富民爭出避水。公曰。富民若出。民心動搖。吾誰與守。吾在。是水決不能敗城。驅使復入。公履屨杖策。親入武衛營。呼其卒長。謂之曰。河將害城。事急矣。雖禁軍。宜爲我盡力。卒長呼曰。太守猶不避塗潦。吾儕小人效命之秋也。執

挺入火伍中。率其徒短衣徒跣。持畚鍤以出。築東南長隄。首起戲馬臺。尾屬於城。隄成。水至隄下。害不及城。民心乃安。然雨日夜不止。河勢益暴。城不沉者三板。公廬於城上。過家不入。使官吏分堵而守。卒完城以聞。復請調來歲夫。增築故城爲木岸。以虞水之再至。朝廷從之。訖事。詔褒之。徐人至今思焉。徙知湖州。以表謝上。言事者擿其語以爲謗。遣官逮赴御史獄。初。公既補外。見事有不便於民者。不敢言。亦不敢默視也。緣詩人之義。託事以諷。庶幾有補於國。言者從而媒蘖之。上初薄其過。而浸潤不止。是以不得已從其請。既付獄吏。必欲寘之死。鍛鍊久之。不決。上終憐之。促具獄。以黃州團練副使安置。公幅巾芒屨。與田父野老相從溪谷之間。築室於東坡。自號東坡居士。五年。上有意復用。而言者沮之。上手札徙汝州。略曰。蘇軾黜居思咎。閱歲滋深。人材實難。不忍終棄。未至。上書自言

有饑寒之憂、有田在常、願得居之。書朝入、夕報可。士大夫知上之卒喜公也。會晏駕、不果復用。至常、以哲宗即位、復朝奉郎、知登州。至登、召爲禮部郎中。公舊善門下侍郎司馬君實、及知樞密院章子厚、二人冰炭不相入。子厚每以謔侮困君實、君實苦之、求助於公。公見子厚曰、司馬君實時望甚重、昔許靖以虛名無實、見鄙於蜀先主、法正曰、靖之浮譽播流四海、若不加禮、必以賤賢爲累。先主納之、乃以靖爲司徒。許靖且不可慢、況君實乎。子厚以爲然。君實賴以少安。既而朝廷緣先帝意欲用公、除起居舍人。公起於憂患、不欲驟履要地、力辭之。見宰相蔡持正自言、持正曰、公徊翔久矣、朝中無出公右者。公固辭。持正曰、今日誰當在公前者。公曰、昔林希同在館中、年且長。持正曰、希固當先公耶。卒不許。然希亦由此繼補記注。元祐元年、公以七品服入侍延和、即改賜銀緋。二年、遷中書舍

人。時君實方議改免役爲差役。差役行於祖宗之世、法久多弊。編戶充役不習、官府吏虐使之、多以破產而狹鄉之民、或有不得休息者。先帝知其然、故爲免役、使民以戶高下出錢、而無執役之苦。行法者不循上意、於雇役實費之外、取錢過多、民遂以病。若量出爲入、毋多取於民、則足矣。君實爲人、忠信有餘、而才智不足、知免役之害、而不知其利、欲一切以差役代之。方差官置局、公亦與其選、獨以實告、而君實始不悅矣。嘗見之政事堂、條陳不可。君實忿然、公曰、昔韓魏公刺陝西義勇、公爲諫官、爭之甚力、魏公不樂、公亦不顧。軾昔聞公道其詳、豈今日作相、不許軾盡言耶。君實笑而止。公知言不用、乞補外、不許。君實始怒、有逐公意矣。會其病卒乃已。時臺諫官多君實之人、皆希合以求進。惡公以直形己、爭求公瑕疵。既不可得、則因緣熙寧謗訕之說、以病公。公自是不安於朝矣。尋除翰



林學士。二年復除侍讀。每進讀至治亂盛衰邪正得失之際、未嘗不反覆開導、覲上有所覺悟。上雖恭默不言、聞公所論說、輒首肯喜之。三年、權知禮部貢舉。會大雪苦寒、士坐庭中、噤不能言。公寬其禁約、使得盡其技。而巡鋪內臣伺其坐起、過爲凌辱。公以其傷動士心、虧損國體、奏之。有旨送內侍省撻而逐之。士皆悅服。嘗侍上讀祖宗寶訓、因及時事、公歷言今賞罰不明、善惡無所勸沮。又黃河勢方西流、而強之使東。夏人寇鎮戎、殺掠幾萬人。帥臣掩蔽不以聞。朝廷亦不問。事每如此、恐浸成衰亂之漸。當軸者恨之。公知不見容、乞外任。四年、以龍圖閣學士知杭州。時諫官言前宰相蔡持正知安州、作詩借郝處俊事以譏刺時事、大臣議逐之。嶺南公密疏言、朝廷若薄確之罪、則於皇帝孝治爲不足。若深罪確、則於太皇太后仁政爲小累。謂宜皇帝降敕置獄逮治、而太皇太后內出手詔

赦之、則仁孝兩得矣。宣仁后心善公言而不能用。公出郊未發、遣內侍賜龍茶、銀合、用前執政恩例、所以慰勞甚厚。及至杭、吏民習公舊政、不勞而治。歲適大旱、饑疫並作。公請於朝、免本路上供米三之一、故米不翔貴、復得賜度僧牒百、易米以救饑者。明年方春、即減價糶常平米、民遂免大旱之苦。公又多作饘粥、藥劑、遣吏挾醫分坊治病、活者甚衆。公曰、杭水陸之會、因疫病死比他處常多。乃裒羨緡得二千、復發私橐得黃金五十兩、以作病坊、稍畜錢糧以待之。至於今不廢。是秋復大雨、太湖泛溢害稼。公度來歲必饑、復請於朝、乞免上供米半、又多乞度牒以糶常平米、并義倉所有、皆以備來歲出糶。朝廷多從之。由是吳越之民復免流散。杭本江海之地、水泉鹹苦、居民稀少。唐刺史李泌始引西湖水作六井、民足於水、故井邑日富。及白居易復浚西湖、放水入運河、自河入田、所溉至千

頃。然湖水多葑、自唐及錢氏、歲輒開治、故湖水足用。近歲廢而不理、至是、湖中葑田積二十五萬餘丈、而水無幾矣。運河失湖水之利、則取給於江潮、潮渾濁多淤、河行闐闐中、三年一淘、爲市井大患、而六井亦幾廢。公始至、浚茅山、鹽橋二河、以茅山一河專受江潮、以鹽橋一河專受湖水、復造堰閘、以爲湖水畜洩之限、然後潮不入市、且以餘力復完六井、民稍獲其利矣。公間至湖上、周視良久、曰、今欲去葑田、葑田如雲、將安所寘之。湖南北三十里、環湖往來、終日不達、若取葑田積之湖中、爲長堤以通南北、則葑田去而行者便矣。吳人種菱、春輒芟除、不遺寸草、葑田若去、募人種菱、收其利以備修湖、則湖當不復堙塞。乃取救荒之餘、得錢糧以貫石數者萬、復請於朝、得百僧度牒以募役者。堤成、植芙蓉楊柳其上、望之如圖畫、杭人名之蘇公堤。杭僧有淨源者、舊居海濱、與舶客交通牟利、

舶至高麗、交譽之。元豐末、其王子義天來朝、因往拜焉。至是源死、其徒竊持其畫像附舶往告、義天亦使其徒附舶來祭。祭訖、乃言國母使以金塔二祝皇帝、太皇太后壽。公不納、而奏之曰、高麗久不入貢、失賜予厚利、意欲來朝矣、未測朝廷所以待之、薄厚、故因祭亡僧而行祝壽之禮、禮意薄、蓋可見矣。若受而不答、則遠夷或以怨怒、因而厚賜之、正墮其計。臣謂朝廷宜勿與知、而使州郡以理卻之。然庸僧猾商、敢擅招誘外夷、邀求厚利、爲國生事、其漸不可長、宜痛加懲創。朝廷皆從之。未幾、高麗貢使果至。公按舊例、使之所至、吳越七州、實費二萬四千餘緡、而民間之費不在、乃令諸郡量事裁損。比至、民獲交易之利、而無侵撓之害。浙江潮自海門東來、勢如雷霆、而浮山峙於江中、與漁浦諸山犬牙相錯、洄洑激射、歲敗公私船不可勝計。公議自浙江上流地名石門、並山而東、鑿爲運河、



引浙江及谿谷諸水二十餘里以達于江、又並山爲岸、不能十里以達於龍山之大慈浦、自浦北折抵小嶺、鑿嶺六十五丈、以達于嶺東古河、浚古河數里、以達于龍山運河、以避浮山之險、人皆以爲便。奏聞、有惡公成功者、會公罷歸、使代者盡力排之、功以不成。公復言、三吳之水、潴爲太湖、太湖之水、溢爲松江以入海。海日兩潮、潮濁而江清、潮水嘗欲淤塞江路、而江水清駛、隨輒滌去、海口嘗通、則吳中少水患。昔蘇州以東、公私船皆以篙行、無陸挽者。自慶曆以來、松江大築挽路、建長橋以扼塞江路、故今三吳多水、欲鑿挽路爲千橋以迅江勢、亦不果用、人皆恨之。公二十年間再莅此州、有德於其人、家有畫像、飲食必祝、又作生祠以報。六年召入爲翰林承旨、復侍邇英。當軸者不樂、風御史攻公。公之自汝移常也、授命於宋、會神考晏駕、哭於宋、而南至揚州。常人爲公買田、書至、公喜作

詩、有聞好語之句。言者妄謂公聞諱而喜、乞加深譴。然詩刻石有時日、朝廷知言者之妄、皆逐之。公懼、請外補、乃以龍圖閣學士守潁。先是、開封諸縣多水患、吏不究本末、決其陂澤、注之惠民河、河不能勝、則陳亦多水。至是、又將鑿鄧艾溝、與潁河並。且鑿黃堆、注之於淮、議者多欲從之。公適至、遣吏以水平準之。淮之漲水高於新溝幾一丈、若鑿黃堆、淮水顧流浸州境、決不可爲。朝廷從之。郡有宿賊尹遇等數人、羣黨驚劫、殺變主及捕盜吏兵者非一。朝廷以名捕不獲、被殺者噤不敢言。公召汝陰尉李直方、謂之曰、君能擒此、當力言於朝、乞行優賞、不獲亦以不職奏免君矣。直方退、緝知羣盜所在、分命弓手往捕其黨、而躬往捕遇。直方有母年九十、母子泣別而行、手戟刺而獲之。然小不應格、推賞不及。公爲言於朝、請以年勞改朝散郎、階爲直方賞。朝廷不從。其後吏部以公當遷、以符會

公考、公自謂已許直方、卒不報。七年、徙揚州。發運司舊主東南漕法、聽操舟者私載物貨、征商不得留難。故操舟者富厚、以官舟爲家、補其弊漏、而周船夫之乏困、故其所載、率無虞而速達。近歲不忍征商之小失、一切不許、故舟弊人困、多盜所載、以濟饑寒、公私皆病。公奏乞復故、朝廷從之。未閱歲、以兵部尙書召還、兼侍讀。是歲、親祀南郊、爲鹵簿使、導駕入太廟、有貴戚以其車從爭道、不避仗衛、公於車中劾奏之。明日、中使傳命申敕有司、嚴整仗衛。尋遷禮部、復兼端明殿翰林侍讀二學士。高麗遣使請書於朝、朝廷以故事盡許之。公曰、漢東平王請諸子及太史公書、猶不肯與、今高麗所請、有甚於此、其可予之乎。不聽。公臨事必以正、不能俯仰隨俗、乞守郡自劾。八年、以二學士知定州。定久不治、軍政尤弛、武衛卒驕惰不教、軍校蠶食其廩賜、故不敢呵。問、公取其貪汙甚者、配隸遠惡、然

後繕修營房、禁止飲博、軍中衣食稍足、乃部勒以戰法、衆皆畏伏。然諸校多不自安者、有卒史復以贓訴其長、公曰、此事吾自治則可、汝若得告、軍中亂矣。亦決配之、衆乃定。會春大閱、軍禮久廢、將吏不識上下之分、公命舉舊典、元帥常服坐帳中、將吏戎服奔走執事。副總管王光祖自謂老將、耻之、稱疾不出。公召書吏作奏、將上、光祖震恐而出、訖事、無敢慢者。定人言、自韓魏公去、不見此禮至今矣。北戎久和、邊兵不試、臨事有不可用之憂、惟沿邊弓箭社兵與寇爲鄰、以戰射自衛、猶號精銳。故相龐公守邊、因其故俗、立隊伍將校、出入賞罰、緩急可使。歲久法弛、復爲保甲所撓、漸不爲用。公奏爲免保甲及兩稅折變科配、長吏以時訓勞、不報。議者惜之。時方例廢舊人、公坐爲中書舍人、日草責降官制、直書其罪、誣以謗訕。紹聖元年、遂以本官知英州。尋復降一官、未至、復以寧遠軍節度副



使安置惠州。公以待從齒嶺南編戶、獨以少子過自隨、瘴癘所侵、蠻蜚所侮、胸中泊然無所蒂芥。人無賢愚、皆得其歡心、疾苦者畀之藥、殞斃者納之窆。又率衆爲二橋以濟病涉者、惠人愛敬之。居三年、大臣以流竄者爲未足也、四年復以瓊州別駕安置昌化。昌化非人所居、食飲不具、藥石無有、初僦官屋以庇風雨、有司猶謂不可、則買地築室、昌化士人畚土運甓以助之、爲屋三間。人不堪其憂、公食芋飲水、著書以爲樂、時從其父老遊、亦無間也。元符三年大赦、北還。初徙廉、再徙永、已乃復朝奉郎、提舉成都玉局觀、居從其便。公自元祐以來、未嘗以歲課乞遷、故官止於此。勳上輕車都尉、封武功縣開國伯、食邑九百戶。將居許、病暑、暴下、中止於常。建中靖國元年六月、請老、以本官致仕、遂以不起。未終旬日、獨以諸子侍側、曰、吾生無惡、死必不墜。慎無哭泣以怛化。問以後事、不答、湛然而

逝。實七月丁亥也。公娶王氏、追封通義郡君。繼室以其女弟、封同安郡君。亦先公而卒。子三人、長曰邁、雄州防禦推官、知河間縣事。次曰迨、次曰過、皆承務郎。孫男六人、簞、符、箕、籥、筌、籌。明年閏六月癸酉、葬於汝州郟城縣釣臺鄉上瑞里。公之於文、得之於天。少與轍皆師先君、初好賈誼、陸贄書、論古今治亂、不爲空言。旣而讀莊子、喟然歎息曰、吾昔有見於中、口未能言、今見莊子、得吾心矣。乃出中庸論、其言微妙、皆古人所未喻。嘗謂轍曰、吾視今世學者、獨子可與我上下耳。旣而謫居於黃、杜門深居、馳騁翰墨、其文一變如川之方至、而轍瞠然不能及矣。後讀釋氏書、深悟實相、參之孔老、博辯無礙、浩然不見其涯也。先君晚歲讀易、玩其爻象、得其剛柔遠近喜怒逆順之情、以觀其詞、皆迎刃而解。作易傳未完、疾革、命公述其志。公泣受命、卒以成書、然後千載之微言、煥然可知也。復作論語

說時發孔氏之祕。最後居海南、作書傳、推明上古之絕學、多先儒所未達。既成三書、撫之嘆曰、今世要未能信、後有君子、當知我矣。至其遇事所爲詩、騷銘記書檄論議、率皆過人。有東坡集四十卷、後集二十卷、奏議十五卷、內制十卷、外制三卷。公詩本似李杜、晚喜陶淵明、追和之者幾遍、凡四卷。幼而好書、老而不倦、自言不及晉人、至唐褚、薛、顏、柳、髣髴近之。平生篤於孝友、輕財好施。伯父太白早亡、子孫未立、杜氏姑卒未葬。先君沒、有遺言。公既除喪、即以禮葬姑。及官可蔭補、復以奏伯父之曾孫彭。其於人、見善稱之如恐不及、見不善斥之如恐不盡。見義勇於敢爲、而不顧其害。用此數困於世、然終不以爲恨。孔子謂伯夷、叔齊古之賢人、曰、求仁而得仁、又何怨。公實有焉。銘曰、

蘇自欒城、西宅于眉。世有潛德、而人莫知。猗歟先君、名施四方。公幼師焉、其學以光。出而從君、道直

言忠、行險如夷、不謀其躬。英祖擢之、神考試之、亦既知矣、而未克施。晚侍哲皇、進以詩書。誰實問之、一斥而疏。公心如玉、焚而不灰。不變生死、孰爲去來。古有微言、衆說所蒙。手發其樞、恃此以終。心之所涵、遇物則見。聲融金石、光溢雲漢。耳目同是、舉世畢知。欲造其淵、或眩以疑。絕學不繼、如已斷弦。百世之後、豈其無賢。我初從公、賴以有知。撫我則兄、誨我則師。皆遷於南、而不同歸。天實爲之、莫知我哀。

蘇轍撰 《欒城後集》卷二二

潘奉議墓誌銘

齊安有君子曰潘昌言、其學也正、其言也文、其家居篤于孝悌、其爲吏清介刻苦、而爲政本于惠下愛民。至大吏勢力能寒熱人者、必與之較義理、一毫不爲屈。其爲人務內而簡外、信己而不求人知、而人之知者、必皆誠心愧服焉。嗚呼、君子哉。蓋紹



聖丁丑歲某得罪謫官于齊安、自幸得從君遊、既至而君病矣、無幾何而卒、實元符元年十月某日也。齊安之君子皆相弔、已而又曰潘君之墓宜有銘矣、咸以銘事屬某。某既素高君之義、用不復辭、走其家哭之、求其世家歷官行事于其子大臨、而次叙之曰、潘氏在唐爲滎陽人、當僖宗時、有名季荀者、仕爲太僕卿、官于福州、避亂因家焉。季荀之弟曰季韜、爲太子司議郎。季韜後二世生吉甫、事吳越、入朝終國子博士、累贈工部侍郎。侍郎生衢、爲屯田郎中。屯田嘗官于黃、遂居之。屯田生處士革、隱德不仕。君諱鯁、字昌言、處士長子也。生而俊警、絕人、爲兒時、賦詩已有奇語。聞有周希孟者、博學篤行之士也。君從之學、希孟以爲盡己之道。君居鄉里、以經教授、聚徒常百餘人、後進皆師尊之。登元豐己未進士第。初調蘄水縣尉、遷和州防禦推官、知江州瑞昌縣、監楚州都鹽倉、遷吉州軍事

推官、改宣德郎、監漢陽軍酒稅、遂以奉議郎致仕。卒年六十三。蘄水民有以花爲獻者、君一嗅而還之、曰、受賜多矣。其廉潔類是。江州賦屬縣鬻建茶、太守問君、瑞昌歲可售若干。公曰、四斤耳。守驚詰其說、君曰、縣小民貧、米鹽猶不足、而暇及茶乎。獨縣僚四人、人一斤可矣。守悟、以故諸縣皆得無多售、而旁郡有賣千斤者。後七年、君以事過瑞昌、有兩民拜馬前。其一曰、異時君爲縣、我訟得直。其一曰、異時君刑我當罪、我心服、是以偕來。君之爲吏、得民舉如是也。元祐赦民負官錢無姦者悉免之、吉州通判攝守事、乃悉下負者于獄、將鞫其姦。君曰、赦欲寬之、而君故獄之耶。執不可、民乃得免。龍泉令捕得私酒三十家、將上府、君謂令曰、是法皆當徒。龍泉小邑、一日徒三十人、君爲令安乎。令乃頗減出之。嗚呼、其歷官微而見于行事者寡矣、然其修身治人、立心操術、亦可概見矣。向使之得富

貴立朝廷、據位操柄、以行其義、達其道、其不貪利、苟得如還蘄水之花、其忤上愛下如鬻瑞昌之茶、民甘其罰如瑞昌之拜者、則雖古之君子、無以加分寸于此矣。有集三十卷、曰春秋斷義者十二卷、講義者十五卷、易要義者三卷。致仕時家無一金、骨肉衣食僅給、而君蕭然病卧一榻、口不及俗事、時與其子清言而已。娶何氏、有賢行。男二人、長大臨、次某、皆力學有文。一女、嫁進士羅啓宗。四孫、其一男也、曰懃。以某年某月某日葬某縣某原、銘曰、白壁芳蘭、包以九襲、長于外者、千萬而一。莫爲出之、卒殞無施。嗚呼昌言、不幸類茲。致美在裏、不耀于肌。豈人是謀、謂天實知。黃岡之原、松柏其猗。我相後人、將穫其菑。

張耒撰 《柯山集》卷五〇

校記

①言：原作「矣」，據四部叢刊影印明嘉靖蜀藩活字本《樂城集》改。

②呵：原作「何」，據右引改。

宋儒碑傳集卷六十五

杜紘 楊恕 孔文仲 朱光庭

刑部侍郎杜公墓誌銘

公杜氏、諱紘、字君章、京兆萬年人、後徙濮州鄆城。曾祖尚書司封郎中兼侍御史知雜事、贈刑部侍郎諱堯臣、妣永安縣太君馬氏、繼萬年縣太君馬氏。祖尚書吏部郎中、直史館、贈吏部尚書諱曾、妣彭城縣太君劉氏。考尚書虞部郎中、贈特進諱彭壽、妣太寧郡夫人朱氏。公少穎邁、知自彊於學問、一上中進士第、調深州司法參軍。丁朱夫人憂、服除、爲永年縣令、歲飢、民將徙、公悉召父老語曰、令不能使汝必無行、若留、能使汝無飢。民喜曰、如令言、尙何行。乃悉與印券、使貸於兼并家、約歲豐償。即不貸、若償不如約、令能治之。於是民咸得食、無徙者。會明年稔、民德公、皆先期償。時熙寧二年也。神宗方側席異才、即召爲大理寺詳斷官、兼刪定

編勅、改大理丞、權樞密院宣旨庫檢用官。未幾、擢權判尚書刑部。丁特進憂、服除、遷太子中允、檢詳樞密院刑房文字、兼修武經要略、詳定將官敕、又提舉晉、汾州義勇保甲。嘗從容對上曰、陛下寓兵於農、臣愚不足以知、然臣有不能默者。因條十餘事上。初未俞、後卒知公。兼判尚書兵部、兼提舉樞密院宣旨庫、遷太常丞、復以職事對。翊日上語宰相曰、杜紘論事明白、朕甚嘉之。然未果用也。鄉人前貴溪丞馬隨來調京師、病逆旅、且死、公聞往視、即載與歸、召醫冀全之。隨病卒、公哭之哀、爲治喪第中、或以爲嫌、不卹也。擢檢正中書刑房公事、提舉中書制敕庫、兼修群牧司、騏驎院勅、復權判刑部。奏事、面賜服銀緋。每議獄、必傳經以決。先是、民間女幼、許嫁未行、而養諸婿氏者、曰養婦、會有殺養婦以誣人者、吏議如婚法。公曰、禮、婦三月而廟見、未廟見而死、歸葬于女氏之黨、示未成婦也。故



儒藏

律謂定婚、夫犯同凡人。養婦雖非禮律、其未成婦則禮律之所有也。議乃定。又論天下囚應死、吏儒不行法、輒以疑讞。且非殺人則可、殺人而以疑讞是縱民爲殺之道也。昔羊舌職曰、善人在上、則國無幸民。荀卿陳王道之本、亦曰、民無幸生。夫爲政而下數幸、欲盜之奔秦、難矣。請治妄讞者、不從。差接送伴北朝正旦使、改奉議郎、除刑部郎中。乘輿幸省、遷承議郎。哲宗即位、遷朝奉郎、又遷朝散郎。爲夏國母梁氏祭奠使。時戎初修貢、入其國、禮猶倨、迓者衣毛裘、邀王人以朝服覲、設王人座、蒙以黶、且不跪受詔。公持不可、戎猶自若。公曰、天王以國母喪、遣赴甚厚、今不可以不如禮。戎懼、悉從公言、差詳定元豐敕令格式、又差按成都等路茶事、以修書不行。會夏國以汎使來請復土疆、又差公押伴。而使者欲入見、自有所陳、公遽止之。使者語頗不遜、公念初不之制、且生事、即謂曰、國主奏乞、

具在表章、回詔必自有旨揮。況此大事也、朝廷豈因使人口語便爲可否乎。隨語隨折之、意小屈、畢見不復敢言。擢右司郎中、俄遷大理卿。又論元祐德音、赦文鬪殺情輕減等、今寺議一切以減等法從事、雖朝廷不以爲然、吏猶守此。古者大司寇以獄之成告於王、王三宥之、然後制刑焉、德在上也。今使朝廷持殺、有司主德、君臣之職於是乎紊。疏上不報。時邊臣襲鬼章、青宜結、生致闕下、詔公鞫問。公習知戎情、雖黠不能隱、故其國中詭計悉得上。甚說、遷朝請郎。丐外官、除直祕閣、知齊州。治尙寬厚、不設鈎距町畦、崇善良、別材能、人親附之。然遇事濬發、故小人亦嚴憚。凡訟者必呼使前、爲一二別白。欺者輒按牒語之曰、汝情若是、吾知之矣。不願竟者亟去、太守恕亦不汝窮也。欺者即以手加額、拜而走、人以爲神。徙知鄧州、兼京西南路安撫司公事、治如齊、人尤愛之。復召爲大理卿、因言、



唐鄧土曠可積穀。陝西常窘兵食。若養兵唐鄧間。以備西戎。徑商於距邊。略與陝西內州軍道里等。平土易運。用以飛輓。利甚博。事下本道。議者不達。遂寢。擢權刑部侍郎。賜服金紫。復丐外官。除集賢殿修撰。充江淮荆浙等路發運使。先是。歲轉東南粟給京師。蓋七百萬石。吏習於無事。弊日積。公盡條上之。事頗施行。又言。京東河北飢。即轉淮南米賑之。清河歲涸。輸常後。不惟名惠實費。又并受其弊。可別爲淺腳船。隸京東轉運司。而俾發運司歲以諸路上供錢和糴。無問豐歉。以淺腳綱輸京東。沿流倉積之。并待河北緩急之須。豐則使兩路償如直。不行。改知鄆州。兼京東西路安撫司公事。汶號難治。繫囚至三百人。或歲餘未決者。公下車旬日。剖判立盡。屬令趨府。持其縣之疑事請。即書尾曰。如是如是。情法皆當。一歲中。獄常空者四五。吏伏聽命。取充員而已。再召爲刑部侍郎。或言公守

齊時。嘗坐有司失入人死罪。命遽寢。復知鄆州。一夕。有揭幟城隅。著妖言其上。且爲變者。城中大恐。俄而草場白晝火。幟中一事也。衆益洶。或請大索。公笑曰。賊計正在此。冀因吾洶乃發爾。奈何墮其計中。諸公第默。吾知其無能爲也。久之。獲盜殺防送卒者。驗之。姦民馬安上等爲此。遂伏誅。因急治境中盜。盡得其囊橐。姓名榜購之。盜不得容。皆遁去。復徙知鄧州。老稚扶攜迎於道。相語曰。我舊使君也。請爲公立生祠。不行。改差知應天府。兼南京留守司公事。感疾卒。元符元年八月十二日也。以二年四月二十二日葬于開封府祥符縣臨黃村之原。前夫人耿氏。永年縣君。後夫人朱氏。長安縣君。子欽益。前襄邑縣主簿。欽晏尙幼。女長適前澶州司理參軍韓璉。次適新單州錄事參軍王檻。次適承事郎知韓城縣事張秩。秩妻蚤卒。公性至孝。親喪。毀瘠過禮。與伯兄修撰公俱知名。謂之二杜。

閨門主恩而嚴、事修撰公加於人數等。修撰公訃至、時在汶上、哭曰、兄教我成我、今亡不得臨、死不瞑矣。會以貳卿召、而其孤開適奉柩歸葬祥符、迎于國門、哀動路人。既事之明日、會復還汶、人或^①以爲善兄弟所感云。開奉寡嫂寄潁昌、公悉俸錢給之、三當任子、再以與其兄之子欽舜、及兄之孫君溥、而君溥者欽舜之孤也。或謂公自有子若孫、奈何。公曰、君恩當以長幼爲序。故逮公沒、而次子一孫俱未命焉。公爲人清慎、而中曠達、不真纖毫、與人傾倒無不可、而至發於事、則毅然不可干以私。好酒、不能劇飲、而客至、欣然與同醉醒。喜山水、爲州有勝處、必造。行遇蟠木巨石、必下、取酒使客自酌、悠然遐想、無復軒冕意。好讀書、雖老不倦、尤長于禮經、好檀弓文、常倣其語法。顧喜論兵、而未嘗試也。詩辭瞻麗、尙氣格、至表章述事與書記、尤翩翩也。有文集二十卷、奏議十卷、易說數十篇。既屢

修敕令、嘗言配隸與編管太密、祥符中、其科四十有六、後稍益至三百四十有餘科、人得自新者寡、因悉裁其法、蓋省四百二十有餘科。初、公請治讞減者、論有司主德非是、人皆以爲深、至是人更以爲恕云。銘曰、

於昭神考、文王之文亦不已。思皇熙寧、秉文之德此多士。如川之增、則不可既遺其嗣。展也杜侯、奮熙寧初爲已試。宜卿常伯、時周士貴惟其似。下猶于、張龔、黃愛人漢循吏。其身不競、以篤斯祉、其在世。

晁補之撰 《雞肋集》卷六七

楊寬之墓誌銘

公諱恕、字寬之、本河東人。遠祖某、唐末見中原亂、甚將數子官于蜀、因求便利、田宅居之。一人家于普州、一人家于梓州、一人家于資州、三族皆以衣冠傳其舊業。有諱某者、以儒學有聞于蜀、王氏欲



官之不可、遂隱約銀山間、當時以爲處士之秀。處士生繼安、繼安生仲明、仲明生翺翔、君之父也。君爲童兒、日誦千言、師以爲不煩我、同舍生皆爲不及。稍長、酷愛春秋左氏、暇則繞楹誦之、同舍生試取本窗間按之、自初至終、不繆一字。有王由先生者、砥礪名節、以教鄉閭之子弟、來學者必考其素、至君來、欣然受之、曰、此諸生之表也。君於書無所不觀、聞人間所未見書、必購取之。論學取友、是是非非、終不以寒微貴勢奪其名實。其與人言行有操、治家理財皆有繩墨。耆艾趨庭、親年已^②八十餘、奉養能致其樂。紹聖四^③年春正月、不幸以疾卒於牖下、享年六十有一。疾革矣、親友問焉、則曰、死生之說、我自知、顧大人春秋高、人子棄寢門而去、此爲無窮之恨。娶黃氏、有子曰中師。中師之子曰綰、綰以曾大父之命來告曰、寬之克家子、不幸而死、中師有疾、不能將命、敢使綰以進士馮儀狀乞銘。

重言十九、使此子不隨世磨滅、實有望於門下。問其親黨曰、寬之誠善士、馮君之言不妄。則許銘之。綰大父卜以元符元年冬十二月壬午、葬於內江縣安養鄉西南山之下、從曾大母黃夫人之兆。日迫矣、銘不可緩、則叙而銘之。銘曰、

我行三巴、林谷籌深。僵卧絕壑、梗枿十尋。匠人營國、一購百金。獨閱歲月、異材陸沈。用君之能、渠不富貴。以遠不收、可笑而喟。樗櫟犧象、又何足賴。內江東流、其山頽頽。其柏其松、其檉其楨。從母安宅、以慰孝思。

黃庭堅撰 《山谷全書》正集卷三一

中書舍人孔公墓誌銘

中書舍人新淦孔公諱文仲、字經父。其先出魯曲阜苗裔、宣聖之後。襲王公封者逮今四十八世、皆居曲阜。其支屬散處四方、多有聞於時者。而公之六世祖曰績、仕唐爲吉州衙推、卒官不復北歸、因

家新淦。新淦今升爲軍號臨江。其子孫遂爲臨江軍新淦人。衙推之曾孫處士君諱文質。公之曾祖也。皇贈光祿少卿諱中正。公之祖也。尙書兵部郎中。贈正議大夫諱延之。公之父也。公世儒者。少稟義訓。知自刻苦。經史傳注。百氏子集外。至於天文。律曆。算數之書。無不識於心而誦於口。其議論浹洽。講解精辨。諸宿儒老生往往不能出其右。嘉祐六年。隨鄉貢至禮部。奏名爲天下第一。廷試擢進士丙科。初。正議公出白屋。起江表。登慶曆二年乙第。至是公又以文名振場屋。二季武仲。平仲相繼舉太學。試南宮。皆取甲等。故當時語文學高第者。以公家爲甲族焉。一命試秘書省校書郎。杭州餘杭尉。再調南康軍司理參軍。以正議使湖北。請解官侍養。滿歲。用薦舉升台州軍事推官。熙寧三年。詔舉賢良方正之士。龍圖閣學士元公絳。天章閣待制吳公中復。以公應詔。召試秘閣。論在第一。對

制策入三等上。是時朝廷方大有爲。輔臣建議。以謂祖宗法度至此已敝。當悉更改。用事之人。爭言理財。訓兵。以合其說。而言事者不以爲便。繼被譴斥。而公之策亦不以爲便。故執政疑相與表裏。奏黜不收。趣還本任。既歸。值監司旁午。商度利事。皆公策言不便者。相持甚久。未幾。公丁內艱。去職。遂止。服除。除充國子監直講。時學者方用王荊公經義進取。以公不習是學。換三班院主簿。武選日。受牒訴不下數百。求官者至有相詬競於庭。主判悉以諉公。公爲剖析曲直。得與不得。一語而決。人人莫不釋然。改著作佐郎。通判保德軍。軍城依山居。人常苦井飲不足。時有泉出城東山腹。挈瓶者又難於出郭。公奏展城圍。其泉郭內。城人以爲非止便於用汲。亦可以爲守禦之備也。官制行。由宣德郎遷奉議郎。還朝。法當得便官。屬火山軍闕通判。格用進士。有不悅公者。因以命之。二壘相距才數



舍俱號窮僻。公適自彼至、未旬月、復被遣、亦不辭而往。至則修舉廢墜、督責吏胥、案邊瑣、輯民務、武守賴以成績。元豐八年夏、覃恩轉承議郎。今上初纂嗣、太皇太后同聽政、相司馬文正公稍復故事、擢用舊人、以毗初政。元祐元年、召公爲秘書省校書郎、近臣薦諫官者八人、以儀曹方講廟朝之制、擢公爲禮部員外郎。神宗廟配享功臣、衆意多在王荊公、公曰、精忠貫天地、功利及社稷、贈太師鄭國公富弼乃其人也。衆不能奪、卒用鄭公配享。有言皇族稱謂、惟楊王、荊王得曰皇叔、餘疎屬當各係其祖、若唐人稱諸王孫比。公曰、主上新即位、宜廣敦睦之義、不當疎間骨肉。前議遂寢。二年、自朝奉郎起居舍人拜左諫議大夫。公素懷致君及物之志、旣在言責、益思自效。每朝廷政令之出、無不深求其得失之迹、以告於上。前後陳數十事、或用或不用、義之所在、亦不爲時之譽誹而回。未幾、遷

中書舍人。偶寒疾、未拜命、猶謂所言未盡、惓惓不已。一夕草奏三千餘言、首論前代英哲之君容受直諫、其始勤終怠、或致危亂。願陛下鑑此、聽納讜言、常若元祐之初、則天下幸甚。明年春、同知貢舉。嘗謂士之挾藝以干進、升黜當否、繫有司之勤墮。於是晝則據案以稽參程衡、夜則篝燈以點定朱墨。前日之病猶未間、而治事不廢。同僚覺其剝瘵、因語以法有疾許先出、不爾且就枕。毋宜自苦如此。公曰、居其官則任其責、豈敢以疾自便。其勤如此。卒至於大病。及事畢、奏勝歸第。未旬朔、是年三月二十一日以不起聞。嗚呼、竭力奉公、以躬徇職、如公者、幾何人哉。古所謂以死勤事者、其行雖異、而其徇一也。兩宮覽奏惻然、下詔厚卹其家。及喪歸、又命其季弟集賢校理平仲爲江南東路轉運判官、俾得以撫孤弱而視窀穸也。士大夫識與不識、聞之皆失聲嗟悼、以爲朝廷喪一直臣。而翰林

蘇公子瞻往撫其柩曰、世方嘉軟熟而惡崢嶸、相師成俗。求勁直如吾經父者、今無有也。予與正議公同年進士、從游有素、熟昆仲之才美久矣。熙寧初、予方謫官居京師、杜門不接外事。一日龍圖宋公次道惠然見訪、曰、被命初考制科、得孔君策九千餘言、當世利病盡於此矣。雖仲舒之博、劉蕡之直、無以過也。然時議以爲書等過優、國朝故事無有此比、考官行得罪矣。予駭曰、方朝廷求賢如飢渴、有人如此而不見錄、豈其論太高而難合耶。抑言太激而取怨耶。然聖明在上、斯人豈終抑不用者乎。它日聞吳丞相欲置之臺閣、才得學官、而人已忌之。連蹇十餘年、今上遂擢用之。士論以爲聖賢相值、乃志士可行之時、天下亦翹足以待其設施。然而未閱再歲、而天不畀壽、使不得竟其素志。惟見於言者、可以紀述以示後觀、則知其所存也。元豐四年、王師問罪夏臺、兵夫數十萬皆出保德

境上。軍須百用、通判專任其責。雖趣辦應猝措置無乏。然兵久不解、邊人厭苦。公上疏論其不便有三、曰、大兵未出而人夫預集、一也。河東僱夫、勞民而損費、二也。諸路出兵、首尾不相應、三也。蓋虞夏商周未嘗無外患、而懷柔制禦之要不在彼而在此。去歲議役法者、有以雇爲是而差爲非。公曰、諸言此者、敗法亂俗之本、不可不察也。議科舉者或以經義詩賦策論爲四場、或以經義詩賦爲兩科。公曰、四場是也。又謂內降除官出唐之衰政、聖朝不宜有此。後因日食七月朔旦、上封陳五事曰、邪說亂正道、小人乘君子、外患陵^④中國、斜封奪公論、人臣輕國命。察此所以消厭災異^⑤也。凡所言多切直拂時、人爲危懼、而上常察其誠意、多爲容納。又言朝廷起處士、侍經筵、所以崇進道義也。而希附者衆、致興黨論、使人不安其分、浸不可長。又執政罷不以大故、宜全進退之體。以散官領州、恩禮非



稱王氏經義今格不用而其親黨有專守其說者不宜置之朝右以蔽惑後進熙寧用事之臣有主新法而撓民事者謫逐日淺未宜內徙有權鹽利而酷刑罰者請命案實以正其罪上皆施行如其言由是論之居位雖不久而其志得行固不爲少於士望雖未厭而於公志亦無慊然也公爲人恬介自守持重寡言笑尤不事請謁尉餘杭日轉運使召與議事事已馳歸不復趨府人問其故對曰於府無事也在朝非公事不見執政法許同謁亦不往與人交不爲苟合久乃見其情至前年予忝秋官之命因上奏曰智識明敏操守專固臣不如孔某請以代臣公知亦不謝及公再遷近職薦今彭紫微汝礪暨黃左司廉自代呂丞相稱之曰孔君能舉類矣二公相繼進擢公不以爲德其接物以誠無外飾多此類也性喜飲酒飲益多而色益莊其中皞皞然若有所得平居未嘗問家之有無

內外灑掃之際家人諮所以處畫後事惟答以無事此豈其信道篤而知命至者耶享年五十六死之日家無餘貯惟有書五千卷皆手自校輯者遺文若干篇某人集爲五十卷公舉進士時故紫微呂夏卿爲南省點檢官得公卷曰詞賦贍麗策論深博其文似荀卿子雲主司以爲知言推此言而可以知其他述作之體制也夫人清江縣君蕭氏同郡處士淇之女一子曰元方用公遺恩補承務郎三女曰保姐曰館姐皆幼曰榮姐早亡初公熙寧中遭正議公憂未幾母夫人仁和縣君楊祖母仁壽縣君劉相繼棄養值歲之不易并舉三大喪而祖塋無可葬者遂謀去新淦而宅九江卜德化縣某鄉某里之某穴吉躬冒山谷涉歷寒暑不數月而塚宅成未終喪而室堂具鄉人見其區處咸以爲得禮之實及公之喪歸集賢君挈其孤相地之宜卜某山某穴又吉於是元祐六年某月日時

克襄大事去正議塋相望數里而近凡域兆堂舍亦如其制此又得孝子善繼之義也前期二季以德銘見屬又得建康張舉狀公履行甚詳姑摭其大槩及嘗所聞見者以爲之銘銘曰

遠矣孔氏四十八世曲阜舊封褒成是繼旁支屢遷或越或冀新淦之族源同流異是生紫微鳳舉鴻儀父子昆弟出逢聖時高文大策陳當世之宜嘉謨讜議爲天子所知元祐初載乾坤交泰公爲諍臣朝夕納誨言無隱情病不辭憊耳目之寄方宣股肱之虧已逮公生貢章有墓潯陽先君之側又爲公藏上思遺直厚恤其喪爰命介弟出使江鄉言瞻廬岫幽堂斯構蠡澤出其南岷漢流其右慮岸谷之或遷勒銘詩而示後是爲有宋之名臣宣尼之遐胄

蘇頌撰 《蘇魏公文集》卷五九

集賢院學士知潞州朱公墓誌銘

公諱光庭字公揆河南偃師人曾祖琪贈衛尉少卿妣甯氏安陵縣太君祖文郁尚書主客郎中贈工部尚書妣孔氏河南郡太君高氏許昌郡太君考景光祿卿贈太尉妣宗氏崇國太夫人李氏會昌縣太君公太尉長子幼好學十歲能屬文賦詩有警句尚書拊其背曰大吾門者汝也得任子恩辭以與其弟尚書益奇之嘉祐二年登進士第調萬年主簿數假邑事邑人謂之明鏡時程伯淳主鄆縣簿張山甫主武功簿與公皆以才名稱關中號爲三傑遷臨晉令以太尉疾解官侍養太師文潞公舉公應制科會仁宗登遐罷試丁李夫人憂服除爲虢略令又丁太尉憂終喪爲修武令邑有牧地民久侵冒轉易皆爲稅籍朝廷遣使案畝加租總四萬餘石公爭之得減萬餘石修武廢爲鎮民以爲不便公力爭不能得察訪官欲奏留公鎮事公辭之改垣曲令他邑斂青苗錢類以嚴督



取辦公不答一人而輸以時足。代還改著作佐郎。今范丞相帥慶州辟簽書判官。樞臣薦公得召對。神宗問所治何經。公對以少從孫復受春秋。又問中外有所聞乎。公對曰。陛下即位以來更張法度。臣下行之或非聖意。故有便有不便。誠能去其不便。則天下均被福矣。用上殿恩得簽事河陽判官。今呂丞相守長安。辟簽書判官。朝廷伐西夏五路出師。雍爲都會。事多倚公以辦。調發有非朝廷意而急於期會者。公每執白不從。部使者怒。宣言將加以乏軍興罪。公請督治獄祠以避之。亦賴呂公力護獲免。官制行。改奉議郎。代還簽書湖州判官。遷承議郎。今上即位。遷朝奉郎。賜五品服。神宗山陵。韓獻肅公守洛。奏公勾當山陵事。事以時集。洛人不知有大役。用司馬文正公薦。召爲左正言。首以辨大臣忠邪爲言。又請天子燕閒與儒臣講習。罷提舉常平司官。不散青苗錢。廣儲蓄。備水旱。太

學置明師以養人材。論奏無虛日。多所薦達。人無知者。太皇太后嘉公正直。問公。民已蘇息未。愛民當如赤子。朝廷自非臺諫公正。執政得人。一人耳。曰。何由盡天下事。又諭公。薦賢不當避親。避親則有遺賢。朝政闕失。當安心言之。忽畏避。公自以遇二聖之知。夙夜竭力。知無不言。時進退大臣。損益政事。公密勿啓沃。多見施行。遷左司諫。請罷遣使高麗。褒崇先聖。增錫土田。別異世襲。論急務十事。一議官制。二罷保甲。三糾合宗室。四省浮費。五罷京師倉法。六汰冗官。七議河患。八慎數易吏。以省送迎。九懲獄官慘酷。十禁淫祠。河北饑。遣公賑濟。大發倉廩。所全活甚衆。改左司員外郎。遷太常少卿。除侍御史。議明堂。請天神悉從祀。諸陵薦新。復祖宗之舊。西戎疆場不可許以城寨。拜右諫議大夫。賜三品服。請召講官。便殿訪以治道。是歲旱。論救災十事。遷給事中。有詔幸後苑賞花釣魚。燕群

臣會春寒、公請罷燕、以祇天戒。其夏日食、上疏論修德應變、乞戒諸州讞獄、毋得爲疑似之言。以論事求補外、除集賢殿修撰、知亳州。數月、復召爲給事中。劉丞相罷政、守鄆、公封還麻制、坐落職、復知亳州。歲餘、復修撰、知潞州、遷集賢院學士。紹聖元年三月辛丑晦、以疾終于官、年五十有八。公天性純孝、居太尉喪、廬墓側三年。事叔父盡其道、教諸弟以友愛、上下惇睦、靡有間言。爲人端厚方重、望之可畏、即之謙恭、虛己常若不足。修身治家、居官立朝、與朋友交、一以至誠。再守亳、亳人懷其德、爲之立祠。亳大饑、公開倉賑濟、量口給粟、五月而止。民無菜色。在潞、以鄰境荒歉、流民至者相踵、公勞來安定、日爲食以食之。一日食饑者、至暮不暇食、遂感疾、猶強視事。未終前二日、親禱雨、拜不能興。憂民之心、瞑而後已。初、受學於安定胡先生、告以爲學之本、主於忠信、公終身力行之。後又從程伯

淳正叔二先生於洛陽、其所聞以致知格物爲進道之門、正心誠意爲入德之方、公服行之、造次不忘。見善勇若賁育、唯恐不及。見不善如避水火。嘗謂百世以俟聖人而不惑者、唯孔孟爲然。故力排異端、以扶聖道。家資素厚、所取甚薄。仕至朝列、猶糲食不足。後歷清顯、其自奉如故時。娶王氏、衛尉寺丞恕之女、封壽仁縣君。子男三人、純之、假承務郎。二早夭。四女、長適洛陽尉范鎬、次適三班奉職時操、先公卒。次適河中府教授程穎、次許嫁假承務郎王康民。孫男二人、完、假承務郎。宏、幼。有諫疏文集若干卷。其年五月壬寅、葬河南偃師祁村北原先塋之次。弟左朝奉大夫光逢與孤純之請銘。余昔友公于洛、又爲僚于左省、公余之所畏也。銘其可辭。銘曰、

嗚呼公揆、誠明篤實、行直而方。居則慎獨、靡有作輟。道學之強、正色於朝。見義能勇、志氣之剛。我思

古人庶見來者、今也則亡。其名在人、其事在史、愈久而光。祁村之原、前洛後邨、永固其藏。

范祖禹撰《范太史集》卷四三

校記

①或：涵芬樓藏明抄本《雞肋集》作「咸」。

②已：原作「以」，據四部叢刊影印宋刻本《豫章黃先生文集》改。

③「四」字原脫，據右引補。

④外患陵：四庫本《蘇魏公文集》作「遠服侮」。

⑤災異：右引作「兆祥」。

⑥「館姐」及下文「榮姐」，右引「姐」俱作「娘」。

⑦元祐：原無，據右引補。

⑧壽仁縣君：按宋無此縣，疑有誤。



藏書

宋儒碑傳集卷六十六

李敏之 吳天常 韓忠彥 朱長文

李寺丞墓誌銘

予友李君仲通諱敏之世居北燕高祖避亂南徙今爲濮人丞相文定公迪乃其世父也曾祖令珣祖護皆以丞相故贈太師尚書令考遜用子貴贈吏部尚書仲通生而有賢資端厚仁恕見於孩提之時舉動齊整不妄言笑燕居終日泊然而無惰容望之者皆知其君子人矣與人言無隱情惟聞人之過則未嘗復出於口安靖寡欲居貧守約裕如也好古力學博觀群書尤精於春秋詩易其後所得殊爲高深方勇厲自進不幸短命惜夫未見其止也死之年纔三十矣仲通之德蓋完於天成孝友之性尤爲絕異侍太夫人疾衣不解帶者累月及居喪哀毀過甚中外數百口上愛下信人無閒言群從聚居臧獲使令者衆雖馭之過嚴不能

使之無犯惟偶爲仲通所責則其人必慚悵累日痛自飭勵及仲通之亡濮之人無賢不肖皆失聲痛惜或爲隕涕非至誠及物其能有是乎仲通外甚和易遇物如恐傷之雖家人未始見其喜怒及其出辭氣當事爲則莊厲果斷不可以非義回屈始用蔭補郊社齋郎調虔州瑞金縣主簿會劇賊戴小八攻害數邑朝廷患之命御史督視仲通時承尉乏與其令謀曰劉右鵠石門羅姓者皆健賊詔捕之累年矣小八不能連二盜以自張吾知其無能爲也當說使自效則賊爲不足破矣乃遣人諭二盜皆曰我服李君仁信久矣願爲之死然召我亦有以爲信乎仲通即以其符誥與之且約曰某日當以甲二百來見我於邑中衆皆恐懼仲通曰彼欲爲惡雖不召將至且吾信於邑人彼亦吾人也何憚乎乃將二盜與之周旋卒得其死力遂斬小八盡平其黨朝廷嘉之遷衛尉寺丞仍升一



任。御史用間者言、將誅劉、羅二黨。仲通以爲失信、不義、抗論甚力、久始見從。仲通又自言於朝、請因其立功、縻以冗職、可絕後患。書奏不報。其羅姓者、果復爲害。仲通宰江寧之上元、有古循吏之風。邑之舊田稅不均、貧弱受其弊。仲通爲法以平之。豪猾惡其害己、共爲謗語、借勢於上官以搖其事。人皆爲仲通危。仲通堅處不變、未滿歲而所均者萬七千室。事業雖百未一施、概是二節、則高明之見、剛勇之氣、發於事者、亦可知己。嗚呼、人非有古今之殊、特患夫忽近而慕遠耳。如吾仲通之材之美、古獨可以多乎哉。向若天假之年、成就其所學、自當無愧於古人、況使得與古之人并、而親炙於聖人之時乎。則吾知其果不後曾、閔之列矣。仲通以治平三年五月終於家。熙寧七年二月庚寅葬於濮州鄆城縣遺直鄉之先塋。夫人王氏祔焉。夫人太子中舍杲之女、賢慧靖淑、雅有法度。及寡居、益

自晦重、素衣一食以終身焉。蓋後仲通六年而亡。仲通嘗生二女、皆夭、卒無子、以兄之子孝和爲嗣。仲通平生相知之深者莫如予、故將葬、其家以誌文來屬、其可辭乎。銘曰、

二氣交運兮、五行順施。剛柔雜揉兮、美惡不齊。稟生之類兮、偏駁其宜。有鍾粹美兮、會元之期。聖雖可學兮、所貴者資。便儼皎厲兮、去道遠而。展矣仲通兮、賦材特奇。進復甚勇兮、其造可知。德何完兮、命何虧。秀而不實、聖所悲。孰能使我無愧辭、後欲有考觀銘詩。

程顥撰 《河南程氏文集》卷四

吳天常墓誌銘

公諱天常、字希全、河南府洛陽人。惟吳氏之先、與周同姓、至越入吳、子孫散居四方、以國爲氏。公自祖考始占籍河南之洛陽。公少貧、不治生產、以氣節自許、力學問。河南大府、號多士、而公自少已知

名里中、而舅建寧軍節度使王正倫深器之。以正倫死事、恩爲郊社齋郎、調濮陽縣主簿、又調舒州司法參軍。郡大猾章氏數犯法繫獄、其勢能得于有司、公論正其罪、流之一郡、畏伏。遷泗州盱眙縣令、守筭病人死、公當覆驗、而前驗官言死者不病、公將直之、守以利啗公、欲得如前驗、公謝守曰、我受公恩固善、如死者恨何。卒直之、守爲得罪。知洪州奉新縣、奉新號難治、訟者或先以釘貫其足、以脅有司。公畫巨釘于市、令之曰、釘必如此、則受訟乃稍變俗。知彭州永昌縣、轉運使范公純仁深知公。是時方變差科爲免役錢、公原究蜀役法利害、講之至精。後以書見王荊公、荊公召公議于司農寺。時欲舉江西役法行于蜀、公曰、蜀不足于地、江西不足于民、利害異宜、恐不可行。主者是公議。久之、公所陳浸忤、遂罷歸。審官調院、簽書鎮南軍節度判官。丁母憂、服除、以便親、調蘄州蘄口鎮都大

監轄。俄丁父憂、服除、通判無爲軍。公諷軍守興庠序、勉士以學。部有鑿池、官專利、民多冒禁、公爲立法、公私便之、而犯者鮮。改通判鼎州、以朝命按知誠州周世隆。帥司部使者皆欲致世隆于罪、公言世隆習蠻事、且未嘗有罪、論執甚堅、卒免世隆。人以爲難。辰州有軍事、以公攝守。公之官、見屬縣吏部夫千餘、挽木山間、公曰、方春役民、妨農耕。悉罷之。公至郡、蠻酋繫獄者、公諭以朝廷德意、盡遣之。皆感泣而去。公因言自誠州抵融州道新通、請每三十里建一佛寺、擇僧知蠻情者居之。諸蠻信佛、平時可使入蠻與之習熟、有警可用以間諜、而佛舍可因以儲糧、其利邊甚大。朝廷許之。後爲諫官、言不當廢誠州爲軍、頃蠻所以數叛者、蓋雖輸款而未嘗去巢穴、一失撫循則亂、稍內徙則定矣。雖不致州尙可、安事廢州乎。是時方議役法、有訪公者、公陳三事、謂州縣之役莫重于衙前、今雖易雇



爲差、衙前數之多寡與役之優重、請守熙寧、元豐之舊、毋輒改。又言鄉差于官類不知書計、勢必雇人代者必要厚價、請官爲立直。又言縣所積免役錢、請皆納州或輸旁郡。戶部皆奏行之。用薦者除知宿州。時荆門新復軍、擇守、乃以公爲知軍。宰相召公、諭以擇才之意。軍久廢、百事圯毀、公至、爲興起弊敗、必使完好可持久、不爲苟且計。人至今頌之。俄知沅州、其去荆門、人爲立祠。歲時父老率子弟拜之。公既習知蠻情、其治沅務安靜、嚴守備、撫溪獠。久之、奏請出巡邊防、軍行、有告帳下謀變者、公獨保其不然、罪告者、卒如公言。又檄諸縣寨、使察游民與蠻交易爲嚮導者捕之。俄復知辰州、公去沅如去荆門、而辰之吏民與蠻酋皆相賀曰、我公復來矣。蠻相約無犯邊、郡爲無警。辰民春夏多疫、公飭醫工親視藥物、人賴以全甚衆。乃立學校、勸以讀書、人皆服從、風俗爲變。朝廷既知公有功

南邊、將用之矣。以病求告、卜居蘄州金沙溪上。家藏書萬卷、有以自樂、泰然也。公喜讀書、于書無所不觀、自少至老、未嘗一日廢卷。至其閒居、好之尤篤。有詩集三卷、奏議三卷。紹聖四年八月六日以疾卒、預治終事、至屬續精爽不亂。享年六十有一。公會祖諱延慶、祖諱澤、皆不仕。考諱英、以公登朝恩、授大理評事、累贈朝議大夫。三男子、長忱、太廟齋郎。仲惇、未官。季悟、假承務郎、皆以進士知名。三女、長嫁萬載縣令黃公孺、次嫁進士胡世南、季嫁寧州錄事參軍譚康世。公自濮陽縣主簿積官至朝奉大夫、積勳至柱國。公爲人厚重寬博、達于爲吏、官無大小、所臨必有績、當其有所建立、必得所欲而後已、或以利害怵之、不顧也。其仕宦多往來南邊、故深知溪洞諸蠻所以治亂、有所措置、後不能易。然考其大體、本于安靜寬簡、不爲苛擾、而頗立堤防、明條教、期無亂而已、不徼有功也。君子韙

之。公少嘗從丁寶臣學。寶臣異其才。薦于歐陽文忠。文忠稱焉。既仕。則不苟取知于人。而一時賢公卿咸知之。獨吳正憲知之尤深。而公自重。不輕就人。故雖知之。不絕出力。而公才見于世者。如此而已也。其孤將以元符元年八月二十有一日。葬公于蘄春縣安平鄉黎企里。啓先夫人之兆而合焉。夫人程氏。有賢行。封文安縣君。前公二年卒云。銘曰、

其直非以爲訐。其和非以爲悅也。獨盡力于爲吏。無劇易必達也。其至民以爲賜。其去民以爲奪也。既或知之矣。乃揜而不發也。進嗇而退果。而後知公之節也。安平之丘。公藏惟列。尙語後人。洛陽之吳也。

張耒撰 《柯山集》卷五〇

丞相儀國韓公行狀

元符三年十月。詔以通議大夫。守門下侍郎。南陽

開國韓公爲右正議大夫。尙書右僕射兼中書侍郎。公故侍中魏國忠獻公子也。忠獻之子六人。而公居長。爲人外和內剛。美鬚髯。姿貌辭氣大抵類忠獻。而仁厚平恕。無所矯飾。自忠獻在時。已有人望。識與不識曰。是魏公之子。而如魏公。宜其復爲相也。及爲相制下。都城傳布除目。行道之間鼓舞相告。先是。公在仁宗皇帝朝。嘗以太常少卿充大遼正旦國信使。燕于遼帳。遼主問左右。孰嘗使南朝。識所謂韓侍中否。或言國信少卿貌類其父。果類否。對者曰。實類。遂使工人圖之。至神宗皇帝時。公復以給事中使遼。持禮詳重。姿貌益奇偉。凡在北廷之人。皆拭目觀之。及公爲相後。遼人賀正使蕭喜。張從約來。語行人李某曰。比持禮回。北主問韓忠彥今安在。從約對曰。在大名。北主曰。何爲未相而在大名耶。居兩月。聞爲相制下。北主大喜。不覺大聲起曰。此真宰相矣。然則忠獻魏公事仁宗



英宗、神宗爲宰相九年，定冊安宗廟，隱然爲時宗臣。而公亦歷事四朝，出入內外，所至可紀。卒亦至宰相，公之行可得而言矣。公諱忠彥，字師樸，魏公而上七世家于安陽，故公爲安陽人。以魏公任子^④，恩守將作監主簿，力學爲文章，登進士第，改郊社局令，勾當府司檢校庫。丁母魏國夫人崔氏憂，服除，改秘書省著作郎。神宗皇帝即位，遷秘書丞。魏公辭位去國，以故事召試，除秘閣校理、同知太常禮院。宗室秦楚王後無嫡子，嫡孫同母弟又無庶子，傳至庶孫，疑所襲，議者欲舍庶孫而使曾孫襲封。公奏言：「甲令所載以古禮，嫡長孫之外皆爲庶孫。旣在庶孫之列，則雖非見襲之子，期服兄弟亦皆庶孫矣。今庶孫在也而舍之，使曾孫襲封，若有大功庶孫而無曾孫，則將誰使襲乎？抑遂除其國乎？今秦楚之後無嫡子，嫡孫同母弟又無庶子，則凡在庶孫之列而長者，當襲之人也。」詔用公議。會

召故荆公介甫爲翰林學士，與學士呂公著同侍講。邇英二人奏言：「故事，講者坐而侍者立。自乾興以來，講者立而侍者坐。請復故事。」下禮官、公議。以謂故事侍臣與講者皆坐，或侍者坐而講者立，或講與進讀者立而侍臣皆坐。此人主之恩出一時者也。顧皆無所輕重。即人主不命而自請之，則非禮。孔子之時，人臣或拜君于上，孔子曰：「拜下，禮也。」雖違衆，吾從下。今侍臣講于上前而立五十年矣，以孔子拜下之義觀之，姑用乾興以來故事可也。何必改？詔是公議。除兼本寺丞事，遷太常博士、判吏部南曹、權開封府推官、遷判官，以太常少卿爲大遼正旦國信使。還，丁秦國太夫人憂，解所居官。終制，除三司鹽鐵判官。三司火^⑤，出通判永寧軍事。召還，爲三司戶部判官。丁魏公憂，服除，貼直龍圖閣、知審官西院、三司戶部副使，改鹽鐵副使。超授右正言、寶文閣待制、高陽關路安撫使、馬步軍都

總管兼知瀛州。是歲元豐四年也。朝廷以夏人囚殺其長秉^⑥。常用兵四萬。下米脂數十城。夏人陰使遼求救。遼人爲移書至闕下。朝廷報以兵端。而虜書復來。詞意悖慢。會永樂用兵不利。而當遣人使遼賀生辰。上難其人。二府以安燾爲對。上不可。又以李承之、李定爲對。上又不可。上曰：韓忠彥嘗使遼。遼信愛之。而知其父琦^⑧有勳勞德望。加重其子。今日使遼。忠彥其人也。乃以給事中召公充北朝賀生辰國信使。公至上前。辭曰：臣嘗使遼。而今復往。無乃使遼人妄意中國爲乏人也。上曰：卿無言行矣。西事未定。無以易卿者。公遂行。遼人使趙資睦迓公境上。行且問西事。公一切以閒暇對之。且曰：西事小小役爾。何足問。及至其庭中。縱觀者如堵。皆咨嗟嘆息。乃使其國參知政事王言敷燕公問。夏國何大罪。而中國用兵不解也。公曰：夏人之罪。中國嘗移文矣。觀所移之文。則罪可知也。言敷

曰：聞已還兵塞上。信乎。如此而南北大國之好可保也。公曰：問罪西夏。乃細故爾。南北大國之好。豈相奸乎。言敷更有他語。公連以言挫之。及還。資睦詘服。返曰：先正侍中之制。西事有攻策。今取城若砦數十。使先正侍中而至今。快可知也。公歸。神宗皇帝勞之曰：使乎。使乎。後大遼使至。上復使公館客。西北之釁遂解。官制之行也。章惇爲門下侍郎。而給事中爲之屬。乃奏言：給事中。東省之屬。凡所封駁。宜先稟而後上。詔從之。公曰：嘻。是執政之意也。給事中^⑨失其職矣。乃復奏言：今日丁亥。詔門下封駁。視中書舍人封還之制。庚寅復奉詔。門下封駁。從執政官議。議不同。乃上之。竊以給事中與中書舍人任遇均也。一則不稟議而聽封還。一則聽封駁而先稟議。且所駁正之事。執政所行也。事當封駁。則與執政固已異矣。異而取決于上。乃其職爾。而更從執政稟議。是爲失職。願從丁亥詔爲正。

從之。^⑩左僕射王珪爲南郊大禮使、事之當下者皆畫旨直下、類不由中書。公以官制劾之曰、南郊大禮^⑪所下之書不從中書、畫旨出一時、又不從中書奏審、皆非官制也。官制之行、將爲萬世不易之典。今行未期月、而南郊大禮所行已不用官制、後將若之何。神宗皇帝詔如官制、于是中外之事必由三省而下。法官郝京爲大理司直、有比例而無法、吏部患之、乃稟于都省而具鈔、公曰、官制有令必用法也、今援比例而廢法、是無官制也。駁之。神宗皇帝嘉公之守、于是自吏部侍郎、郎官、都司官吏皆差次受罰、而丞相與同列謝于殿。上乃以公爲禮部尙書、俄遷樞密直學士、定州路安撫使、知定州。州貢文綾、文絕有常數、詔增貢文綾百疋、絕百疋、公上言、唐李德裕爲浙西觀察使、詔貢繚綾千疋、德裕奏言、若將匪頒臣下、則千匹豈足于用。若止上躬自服、何至多用千疋。奏至、遂停之。臣幸遇

聖朝、則德裕前日之言亦臣今日所當言者、惟陛下察許。詔從、罷之。凡江東西、二浙屬郡增貢之數亦罷。遂召還爲戶部尙書。而元祐會計錄成、其大較一歲所入不足以供天下一歲之用、公深憂之。因上言、今天下乃祖宗之天下也、祖宗之時、歲入之數多于所出、故國計有餘。祖宗之天下乃今之天下也、今歲出之數多于所入、故國計不足。臣竊計之、凡文武百官宗室之費加倍于皇祐、而四倍于景德、三班常選胥吏之數則又過之。而天下二稅、榷酤、征商、山澤之利、較之皇祐、景德之前無以大相過也、則國計盈絀正今日所當議者。上遂詔議裁省中外冗費、置局于戶部。公復上言、上自宗室貴近、下至官曹胥吏、旁及宮室器械、皆可得而議。惟宮掖之費有司不得而見、雖見、不可盡也。按寶元中嘗詔入內內侍省裁節禁中之費、報詳定所慶曆中又詔入內內侍省以章聖時簿帳較近



年禁省之費以聞。願陛下上法寶元、慶曆祖宗已試之效，亦詔入內侍省，付裁禁省之費，報于有司，使天下曉然知陛下節用裕民，自宮禁始，天下幸甚。當時所裁，雖不盡如公意，而歲省縣官之費已數十萬計。上倚公以爲執政者久矣，會尙書左丞某甫去位，即以公爲中大夫守尙書左丞。趙瞻薨，復以公爲同知樞密院事，進拜太中大夫、知樞密院。是時夏人已得所賜地方，事分畫，丞相呂大防、關右人也，喜用兵，故西師尙未解嚴。而公意在偃兵息民，以安邊境，嘗曰：「兵在平日，猶爲危事，今主上富于春秋，太皇太后垂簾共政，是豈用兵時也。」故訖公在西府七年，非甚不得已，兵未嘗窺于境外。會宣仁聖烈皇后崩，哲宗親政，更用大臣數人，其下觀望，爭取垂簾時事爲言。公見上奏言：「古者君薨三年，聽于冢宰，不言。古今異宜，故有母后垂簾之制。乃遭會時變，補天之隙，權宜之大者，豈

得已哉。昔仁宗皇帝初年，莊獻明肅太后垂簾共政。及仁宗親攬政事，言者亦爭取垂簾時事言之。仁宗曰：「是持情近薄，不可聽也。」乃下詔戒飭中外，不得言垂簾時事。遂出仁宗之詔爲上讀之。哲宗皇帝嘉納久之，謂公曰：「知人實難，然自先正侍中以來，閱人必多矣。今侍從之間，率自引去，誰可以爲侍從者？」公薦彭汝礪、曾肇、并亮采、張舜民、韓宗師、范純禮、韓宗道七人，且曰：「汝礪、肇有詞學，而以名節自許；亮采端亮不倚，舜民質且有文。宗師安恬久次，臨事不苟，純禮、宗道立朝守正，無所阿循。皆今日尙書侍郎給舍之選也。」哲宗皇帝亦嘉納用之。然公自章申公爲相，即求去位。至紹聖三年正月，始以觀文殿學士知真定府，改定州路安撫使，知定州。章申公幸公去，且憚公復來，乃使言者言公在西府時嘗棄滄、鄴之地，降資政殿學士，知成都府。不行，復知定州，改知大名府，兼北京留守。



司事大名府路安撫使。先是魏公嘗以武康軍節帥鎮及定武。熙寧中又以侍中判大名府。有德于趙魏之邦。故定武大名皆爲廟以祀魏公。而公相去三十年。亦爲鎮定帥而知大名。仍有惠政見稱于二邦。故定人魏人亦爲像于魏公之廟而祀之。章申公慊公未已。又使言者言公嘗同尙書左丞王存聯奏請刊除謝景初過名非是。降中大夫。會哲宗皇帝晏駕。羣臣朝晡臨。道路相傳曰。召公矣。又曰。公今來矣。及上即位。以吏部尙書召公。都下相告語。欣欣然如召其父兄。至則除門下侍郎。進封南陽郡開國公。見上陳四事以裨新政。一曰廣仁恩。二曰開言路。三曰去疑似。四曰息用兵。其廣仁恩之說曰。孟子曰。湯武之所以得天下者。得其民也。得其民者。得其心也。而唐封德彝教太宗用刑罰以治天下。太宗曰。是欲我失人心也。本朝自祖宗以來。推廣仁恩德澤以固結人心。故方內大

寧如泰山之安。近年執政大臣驚于功利。而以苛察相高。政太急。刑太峻。其失人心多矣。社稷之憂也。願陛下遠鑑湯武太宗之治。近摹列聖之用心。罪疑惟輕。寬以御衆。益推廣仁恩德澤以固結天下之人。則人心安。人心安。天下不足治也。其闢言路之說曰。竊以中丞御史諫省之官。自昔以爲人主之耳目。耳目之官。人主豈可不自擇哉。近年執政大臣慮臺諫之爲己蠹也。乃布腹心于言路。外雖不事請謁。而中實相通。以蔽欺人主耳目。人主何利焉。其間有論及時事與執政意少忤。衆人曰。其必以罪去。而果以罪去矣。願陛下旁采忠直重厚之士。親加識擢。布在言路。如其敢言有補。惟陛下容納主張。特加旌勸。行其言而用其人。則言路闢。言路闢。則天下之事始可議矣。其去疑似之說曰。法無舊新。便民則爲利。人無彼此。當材則可用。自紹聖以來。六七臣者。凡曰元祐之事。不問其所

從來一皆以爲非是不行。凡元祐除用之人、大則投竄、小則退斥、枉損人材、無補于事。且元祐者、先帝在位、宣仁權同聽斷之年也、何負于天下而逆施如此。願陛下用人之際、無分熙豐、元祐惟是之從、惟材之用、則萬務畢舉、天下安寧、自無事矣。其慎用兵之說曰、臣自先朝蒙恩守土于外、聞朝廷熙、秦、延、慶、涇、原、河東六路進築、五七年間、建置城砦壘數十、得地雖廣而不可耕、皆由永興等路州軍轉餉以饋之、欲實外而外終不可實。自陝以西、民力大困、斬獲之數則增一爲百、失亡之數則減千爲一。願陛下試令有司攷其用兵以來之費出于府庫及將吏官軍散亡之實幾千萬數、而所建置城壘可耕之地收入以爲用者其數幾何、而邊城父子肝腦塗地、與官軍逃散瘡痍物故者其數又幾何、則進築利害較然可見矣。今日邊事惟亟罷進築之兵、以休息中外、惠養萬民、則天下

幸甚。上皆嘉納之。公自召還爲吏部尙書、未拜而爲門下侍郎、自門下侍郎踰月遂爲相。命既下、公上免表、其詞曰、今蠹萌未消、國是難一、事無可否、必分年號而後行。臣無忠邪、槩指朋黨而皆廢。西方師老而財匱、斗米至于千錢。北道河潰而民流、十室幾于九去。大需更新、而猶多禁錮。宿逋雖減、而尙困追償。方當大有爲之時、宜得不世出之主。識者見而喜曰、上醫醫國。醫者識病、則病可治也。公旣識今日之病、天下其有瘳乎。上旣聽用公、遂數下赦令、蠲天下逋責、盡還嶺外流人、甄叙士大夫之遷謫者、而內外之臣可任使及嘗爲御史諫官、忠直可言與天下知名士、率見收用。公嘗與上從容論天下事、上問政令之行、猶有當先急者乎。公因建言、哲宗皇帝即位、嘗詔天下實封言事、由此能言之士獻言于朝者千萬數、今中書所編類章疏^①是也。自章惇爲政以來、與上書言事者爲讎



敵乃置局編類、摘取語言近似者以爲謗訕、故上書者率皆得罪、大傷求言之體。今臣聞編類之餘、猶有五百餘疏、繼從編類。近日陛下又詔中外、許直言朝政闕失。然編類之令未除、則能言之士必懷疑懼。疑者疑求言之意非誠、懼者懼如前日之獲罪、則今日求言之詔、豈不妨哉。臣願陛下亟詔有司、盡將已類未類之章、與省中所行編類前後文書納之禁中、罷其所置局、則中外之士無所疑懼、而所求忠直之言始可來也。上即詔罷編類局、事章疏文書盡納之禁中、仍詔公曰、已焚之矣。當是時、中外欣欣然以爲嘉祐治平之事可復見乎。今日也。是歲郊天、爲南郊大禮使、進右光祿大夫、尙書左僕射兼門下侍郎、儀國公。而曾布子宣爲右相、子宣數至上前留身、務破壞公所爲、以中傷公所引重者。或勸公亦留身上前、與之辨、公曰、宰相自有體、如是又一曾子宣也、其相去幾何。道之

不行、我知之矣。乃上章乞罷相補外。上封還所上章、使中貴人趣公至都堂視事、而諫臣吳材、王能甫數奏疏、言公以嚮子宣意所便。公聞之、復上章請外。章凡三上、乃以公爲觀文殿大學士、知大名府。而材與能甫言不已、乃罷大學士、猶知大名。初、欽聖皇太后垂簾共政、而故相章申公惇猶未去位、公與申公簾對。皇太后曰、登極之恩博矣、無所不被。廢后孟氏可復也。公退謂申公曰、有故事乎。事體之間無所傷乎。曰、無傷。及以事對、上曰、復孟氏則可、而皇太后欲復孟氏而廢劉氏、奈何。復一廢一、則上累永泰、豈小哉。公等執政也、其執之。公曰、陛下之言乃謨訓也、其敢不執。退見皇太后、皇太后盛以廢復爲言、不可易。公援引古今、具道其所以然、以死爭之。皇太后之議遂格。故復后之詔曰、元符之號定矣。而永泰上賓、無並后之嫌者、公之意也。而言者不知。又曰、是嘗動搖中宮。乃降右

正議大夫、提舉西京崇福宮。公自罷相守大名、凡三黜、怡然無所辨。及言者誣公以中宮事、公曰：「是不可不辨也。」乃具言其始末上之、而言者抵公尤力、遂降太中大夫、提舉崇福宮、居于懷。言者未厭、乃曰：「公在位嘗棄滎州、非是。」遂復謫崇信軍節度副使、居于濟。及復滎、鄴、又謫磁州團練副使。是歲崇寧三年十一月也。明年九鼎成、大赦、公得歸相。又一年、復太中大夫、提舉西京崇福宮如故。俄復通議大夫。請老、遂還公故官、以宣奉大夫致仕。踰年薨于安陽之里第。實大觀三年八月二十日也。享年七十二。惟公系出博陸、自高祖而上載于顧命之碑、與龍圖閣直學士潁川陳薦所撰次魏公之誌、不備言也。曾祖諱某、太子中允、贈太師、中書令兼尚書令、燕國公。祖諱國華、諫議大夫、贈太師、中書令兼尚書令、魏國公。及公在位、申贈燕、魏二祖皆太師、開府儀同三司。而忠獻魏公以故韓王

趙普故事、贈不加。娶兩夫人、皆故太尉惠穆呂公弼之女、嫡曰韓國夫人、繼室曰冀國夫人。四女、五子、十一孫、三曾孫。子治、中奉大夫、澡、朝散郎、浩、奉議郎、澄、宣德郎。女嫁蔡承、馮詢、王傳約、王朋約、有既嫁而卒者。孫曰肖胄、肯胄、膚胄、完胄、宏胄、安胄、寶胄、應胄、昌胄、莊胄、昭胄。曾孫曰龢、協、彬。或問公之所行孰爲大、曰：「公有大焉、而人未之思也。爲其父爲宰相、而身又爲相乎。曰：「漢、唐、本朝父子爲宰相者、可問亦可記也。美則美矣、奚其大。曰：「爲其逮事五朝、出將入相、兄弟聯榮、子孫衆多、門下之士誦美無窮乎。曰：「顯則顯矣、奚其大。然則公之所以爲大者、何也。曰：「公質剛氣和、居家不妄語笑、內無機心、外不事矯飾、天下之士不待被公之恩、承公之力、皆咏公賢而期公貴、非天爵之高、不至于此。此則似大矣、然猶未也。蓋嘗聞士處窮困、甘藜藿、褐衣蓬戶、出入爲常。及其遭時遇合、都廊廟、位



卿相得志之事日日在前、而能不忘宿昔窮困未遇之心者、以爲賢矣。一旦失倚離權、身折勢奪、宜其追惟夙昔窮困未遇而等之、有以自處。然猶憔悴枯槁、或慍懟而自失、故屈平懷石、亞父疽殞、賈誼忌鵬、張昭塞戶、漢唐以來、公卿大臣以廢放不用而顛沛若無以樂其生者、比比是。而公生于魏公之世、長于宰相之家、少有聞望、食飲服用、居處行乎富貴者四五十年、卒亦自爲宰相、豈嘗知閒放之事、窮居之樂哉。而崇寧、大觀之間、遭吳材、王能甫之毀、身被五黜、僅夷庶土。去都邑廟堂之重、而寓異鄉下里之居。辭公卿寮采之奉、而接野夫鄉老之陋。謝旌麾徒御之衆、而甘輿臺僮使之約。富貴之事、物物不同、而公中懷漠然、不異平昔。門下之士間得請謁于前者、辭氣顏色了不見其欣戚。惟以上恩保全、先衆人還鄉里叙感而已、則良爲大也。蓋能用而不能舍、能顯而不能晦、能處安

樂而不能處患難、皆非成德也。能用能舍、能顯能晦、能處安樂且能處患難、然後爲成德。成德始可言大矣。故曰公有大焉者、此也。公所著文章集爲三十卷、奏議二十卷、魏公行事一卷、家傳十卷、藏于家未出。謹狀。

畢仲游撰 《西臺集》卷一五

朱長文墓誌銘

樂圃先生朱伯原卒於京師、識與不識者皆歎之。先生故人、白玉堂青瑣與夫一時賢士大夫、多挽之以詩。先生妙齡登乙科、以疾求閑、學且養踰三十年、特起爲蘇州教授。歷五考、召爲太學博士、改宣德郎、除秘書省正字兼樞密院編修文字。先生文章、前宰相范公、今宰相章公嘗薦其典麗可備著述矣。先生行義、中書侍郎許公嘗薦其純固可爲師表矣。先生博聞強識、篤學力行、樞密林公先除禮部侍郎及寶文閣直學士、嘗薦自代矣。前後

薦者、蓋不可殫數、謂宜得名公鉅儒誌其墓、而諸孤乃以其季父、明州象山縣尉仲方之狀屬予銘、予豈足以知先生耶。按先生家譜、昔高辛氏有才子曰朱虎、先生其後也。先生諱長文、伯原、字也。其先爲越州剡人、自其祖居蘇者三世。曾祖諱瓊、仕錢氏。祖諱億、始入朝。太宗皇帝召對便殿、命以官、數有功、遷內殿崇班、閤門祗候、知邕州、累贈刑部尙書。考諱公綽、光祿卿、知舒州、爲時名儒。妣蔡氏、封宣城郡君。所生周夫人方娠、夢覆錦衾、或謂光祿公曰、生子能文必矣。先生果幼而不群、光祿器之。十歲、善屬文、讀書輒終夜。光祿公命徹燭、先生侍其寢、不徹也。泰山孫明復講春秋于太學、往從之、明復遽焉。先生書無所不知、尤深于春秋。擢嘉祐四年進士第、吏部限年、未即用。時光祿公守彭、先生不俟宴歸、州人榮之。旣冠、除秘書省校書郎、守許州司戶參軍、誥有美辭。先生無他疾、第傷足、

不果仕、非行怪而固隱也。郊禋、光祿公欲以任子恩丐先生幕官、先生推與其季弟、光祿公拊之曰、兄以官畀汝、因名之曰從悌。先生逮光祿公捐館、左右凡二十年、以孝稱、居喪如禮。服除、人勸以仕、無意也。撫弟妹、畢婚嫁、安貧樂道、因舊圃葺臺榭、池沼、竹石花木、有幽人之趣。州侯貴客、山翁野叟、或觴或詠、去則醉卧便腹、不知身世之在城郭也。太守章公伯望表其所居爲樂園坊、鄉人相與尊之、稱樂園先生。當是時也、使東南者以不薦先生爲恥。游吳郡者以不見先生爲恨。左丞鄧公先在翰林、與給事胡公、孫公、中書舍人范公、蘇公、列薦先生于朝、先生不得已、起典鄉校。州有兩教授、以先生故也。同時徐積舉于楚、陳烈舉于福、世號三先生。先生之教人、先經術而後華藻。曩歲、作東都賦、自視不減班、張、太沖輩。前宰相蘇公嘗薦先生曰、稱述歷代京邑之盛、莫如國家汴都之美、深有



藏

可觀焉。客有使之獻者、先生曰、此吾少時也、今老矣、尙何賦爲哉。講春秋、洪範、中庸、學者無慮數百。蘇學、范文正公建也、歲久隳甚、其子侍郎公時領大漕、得請修葺、先生有力焉。吳中水災、先生陳五浦之利、郡不克行。逮右丞公之守是邦、先生作救荒議四篇以獻、黃公從之、民賴以安、其仁心類如此。晚游辟雍、著釋問以見意。後罷春秋博士、亦頗有歸志、想聞猿鶴、數請還鄉、內相蔣公詩曰、玉盃舊學無施設、空有新詩滿錦囊。蓋歎之也。暨登芸省、有喜色、嘗曰、天下奇書、在吾目中矣。明年、樞密曾公、林公薦兼尙書局、末期月以疾終于家、命夫。實元符元年二月十七日丙申也、享年六十。家徒四壁、大臣以聞、賜縑百。喪歸、吳人迎于境上、行路爲之流涕。先生天資忠樸、有致君澤民之志、不少見于用。中年仕宦、先疇悉委諸弟、所同者一圃、藏書二萬卷、且曰、以此遺子孫、不賢于多財者乎。遺

以財、是教之爲利也、遺以書、是教之爲學也、可不慎歟。著書三百卷、六經皆有辯說。樂圃有集、琴臺有志、吳郡圖經有續紀。作詩雅馴、得古風。及類古今章句爲吳門總集、以備史官采錄。善書、有顏魯公體。藏碑刻、自周穆王始、至于本朝諸名公帖、皆有之。作墨池、閱古二編。嘗謂書畫事、昔人猶多編述、而琴獨未備、元豐中作琴史、其叙曰、方當朝廷制禮作樂、比隆商周、則是書也、豈虛文哉。今太常少卿曾孫爲之後序、亦曰、琴史之作、固有志乎。明道而待時之用者也。元符己卯、果詔太常按協雅樂、命前信州司法參軍吳良輔政造琴瑟、教習登歌、惜乎先生不及見斯時也。娶張氏、三子、耜、前婺州東陽縣主簿。耦、改名發。耕、舉進士、皆有文行。一女、未嫁。孫男曰愈。以元符元年六月乙酉葬先生于吳縣至德鄉南峰山之西、從先塋也。銘曰、先生之樂、非玉非金。室則有書、几則有琴。出而不

返猿哀鶴吟。璧水師筵、蘭臺儒館。末如命何、丹旄云遠。吳山迎喪、學者大半。有丘有園、有子有孫。清白傳家、孝友盈門。我銘永久、南峰之原。

張景修撰 《樂圃餘稿》附錄

樂圃先生墓表

樂圃先生、吳郡朱氏、名長文、字伯原、光祿公之子。十九歲登乙科。病足、不肯從吏趨、築室居郡樂圃坊、有山林趣。著書閱古、樂堯舜道。久之、名稱藹然。一郡嚮服。郡守監司、莫不造請、謀政所急。士大夫過者、必奔走樂圃、以後爲耻。名動京師。公卿薦以自代者甚衆。天子賢之、起爲本郡教授、以爲未廣也。起爲太學。先生以道授多士、未幾、擢東觀、仍兼樞府屬。元符元年二月丙申、遘疾不祿、享年六十。子耜、杭州鹽官尉。耦耕舉進士。以六月葬至德鄉。從光祿之塋。先生道廣、不疵短人、人亦樂趨。先生勢不在人上、而人不敢議、蓋見之如麟鳳焉。方擢

欲使大施設、而命不假、朝野惜之。著書三百卷。六經有辯說、樂圃有集、琴臺有志、吳郡有續記。又著琴史、其序略曰、方朝廷成太平之功、制禮作樂、以比隆商周、則是書也、豈虛文哉。此先生志也。至於詩書藝文之學、莫不騷雅造古。死之日、家徒藏書二萬卷。天子知其清、特贈縑百匹。嗚呼、先生可謂清賢矣。余昔居郡、與先生遊、知先生者也。表曰、窮達有命、出處有時。司出處者、非命而誰。時與命違、士能不出。出而無命、熟稔於時。升公之堂、理公朱絲。清音不改、樂圃松悲。嗚呼哀哉。

米芾撰 《寶晉英光集》卷七

校記

①「頃蠻」上原有「公言」二字，據四部叢刊影印舊鈔本

《張右史文集》刪。

②內剛：原無，據《名臣碑傳琬琰集》中集卷五〇補。

③未：原無，據右引補。

④子：原無，據右引補。

⑤火：原作「使」，據右引改。

⑥秉：原無，據右引補。

⑦詞意悖慢：原無，據右引補。

⑧「琦」下原衍「賞」字，據右引刪。

⑨「乃奏言」至「給事中」：原無，據右引補。

⑩「左」上原有「公又言」三字，據右引刪。

⑪「事之當下者」至「南郊大禮」：原無，據右引補。

⑫方：原無，據右引補。

⑬帥：原作「師」，據右引改。

⑭疏：原作「數」，據右引改。下「章疏文書盡納之禁中」

亦同此。

⑮「故復后之詔」至「公之意也」：原無，據右引補。

⑯嗚呼哀哉：原闕，據清勞權抄校本《寶晉英光集》補。



藏儒

宋儒碑傳集卷六十七

葉芳 蘇轍

葉君墓誌銘

葉生漸從予遊、刻勤有志向。父死且葬、屬予銘。嗚呼、夫人有子、擇術業儒、義方孰大于是。葉君名芳也、居溫州永嘉也、業吏也、娶韓^①也、子洙與漸也。生寶元己卯十月乙酉也、死崇寧壬午五月癸亥也、葬其居會昌湖也、死之明年十二月庚申也。銘曰、人而弗儒、懵懵其趨。儒而弗居、懵也如初。而充而儒、君子儒乎。

周行己撰《浮沚集》卷七

穎濱遺老傳上

穎濱遺老姓蘇氏、名轍、字子由。父曰眉山先生、隱居不出、老而以文名天下、天下所謂老蘇者也。歐陽文忠公以文章獨步當世、見先生而嘆曰、予閱文士多矣、獨喜尹師魯、石守道、然意常有所未足。

今見君之文、予意足矣。先生既不用於世、有子軾、轍、以所學授之曰、是庶幾能明吾學者。母成國太夫人程氏、亦好讀書、明識過人、志節凜然。每語其家人、二子必不負吾志。轍年十九舉進士、釋褐。二十三舉直言、仁宗親策之於廷。時上春秋高、始倦於勤。轍因所問、極言得失曰、陛下即位三十餘年矣、平居靜慮、亦嘗有憂於此乎。無憂於此乎。臣伏讀制策、陛下既有憂懼之言矣、然臣愚不敏、竊意陛下有其言矣、未有其實也。往者寶元、慶曆之間、西羌作難、陛下晝不安坐、夜不安席。天下皆謂陛下憂懼、小心如周文王。然自西方解兵、陛下棄置憂懼之心二十年矣。古之聖人無事則深憂、有事則不懼。夫無事而深憂者、所以爲有事之不懼也。今陛下無事則不憂、有事則大懼。臣以爲憂樂之節易矣。臣疏遠小臣、聞之道路、不知信否。近歲以來、宮中貴姬至以千^②數、歌舞飲酒、優笑無度。坐朝



不聞咨謨、便殿無所顧問。三代之衰、漢唐之季、女寵之害、陛下亦知之矣。久而不止、百蠹將由之而出。內則蠱惑之所汙、以傷和伐性。外則私謁之所亂、以敗政害事。陛下無謂好色於內不害外事也。今海內窮困、生民愁苦、而宮中好賜不爲限極。所欲則給、不問有無。司會不敢爭、大臣不敢諫、執契持^③、敕迅若兵火。國家內有養士、養兵之費、外有北狄、西戎之奉。陛下又自爲一阱、以耗其遺餘。臣恐陛下以此得謗、而民心不歸也。策入、轍自謂必見黜。然考官司馬君實第以三等。范景仁難之、蔡君謨曰、吾三司使也、司會之言、吾愧之而不敢怨。惟胡武平以爲不遜、力請黜之。上不許、曰、以直言召入、而以直棄之、天下謂我何。宰相不得已、寘之下第、除商州軍事推官。知制誥王介甫意其右宰相專攻人主、比之谷永、不肯撰詞。宰相韓魏公哂曰、此人策語、謂宰相不足用、欲得婁師德、郝處俊而

用之、尙以谷永疑之乎。知制誥沈文通亦考官也、知其不然、故文通當制、有愛君之言。諫官楊樂道見上曰、蘇轍、臣所薦也。陛下赦其狂直而收之、盛德之事也、乞宣付史館。上悅從之。是時先君被命修禮書、而兄子瞻出簽書鳳翔判官、傍無侍子、轍乃奏乞養親三年。子瞻解還、轍始求爲大名推官。逾年、先君捐館舍。及除喪、神宗嗣位、既三^④年矣、求治甚急。轍以書言事、即日召對延和殿。時王介甫新得幸、以執政領三司條例、上以轍爲之屬、不敢辭。介甫急於財利而不知本、呂惠卿爲之謀主、轍議事多牾。一日、介甫出一卷書、曰、此青苗法也、諸君熟議之、有不便以告、勿疑。他日、轍告之曰、以錢貸民、使出息二分、本以救民之^⑤困、非爲利也。然出納之際、吏緣爲姦、雖有法不能禁。錢入民手、雖良民不免非理費用、及其納錢、富民不免違限。如此則鞭箠必用、州縣事不勝煩矣。唐劉晏掌國計、未

嘗有所假貸。有尤之者。晏曰。使民僥倖得錢。非國之福。使吏倚法督責。非民之便。吾雖未嘗假貸。而四方豐凶貴賤。知之未嘗逾時。有賤必糴。有貴必糶。以此四方無甚貴甚賤之病。安用貸爲。晏之所言。則漢常平法耳。今此法見在。而患不修。公誠有意於民。舉而行之。劉晏之功可立俟也。介甫曰。君言有理。當徐議行之。後有異論。幸勿相外也。自此逾月。不言青苗。會河北轉運判官王廣廉召議事。廣廉嘗奏乞度僧牒數千道爲本錢。行陝西漕司。私行青苗法。春散秋斂。與介甫意合。即請而施之河北。自此青苗法遂行於四方。初。陳陽叔以樞密副使與介甫共事。二人操術不同。介甫所唱。陽叔不深和也。既召謝卿材。侯叔獻。陳知儉。王廣廉。王子韶。程顥。廬秉。王汝翼等八人。欲遣之四方。搜訪遺利。中外傳笑。知所遣必生事迎合。然莫敢言者。轍求見陽叔。陽叔逆問。君獨來見。何也。對曰。有疑。

欲問公耳。近日召八人者。欲遣往諸路。不審公既知利害所在。事有名件。而使往案實之耶。其亦未知其實。漫遣出外。網捕諸事也。陽叔曰。君意謂如何。對曰。昔嘉祐末。遣使寬卹諸路。事無所指。行者各務生事。既還奏。例多難行。爲天下笑。今何以異此。陽叔曰。吾昔奉敕看詳寬卹等事。如范堯夫輩所請多中理。對曰。今所遣如堯夫者有幾。陽叔曰。所遣果賢。將不肯行。君無過憂。對曰。公誠知遣使之不便。而恃遣者之不行。何如。陽叔曰。君姑退。得徐思之。後數日。陽叔召屬官於密院。言曰。上即位之初。命天下監司具本路利害以聞。至今未上。今當遣使。宜得此以議。可草一劄子。乞催之。惠卿覺非其黨中意。不樂。漫具草。無益也。轍知力不能救。以書抵介甫。陽叔指陳其決不可者。且請補外。介甫大怒。將見加以罪。陽叔止之。奏除河南推官。會張文定知淮陽。以學官見辟。從之。三年。授齊州掌



書記復三年、改著作佐郎、復從文定簽書南京判官。居二年、子瞻以詩得罪、輒從坐、謫監筠州鹽酒稅。五年不得調。平生好讀詩、春秋、病先儒多失其旨、欲更爲之傳。老子書與佛法大類、而世不知、亦欲爲之注。司馬遷作史記、記五帝三代、不務推本詩書、春秋、而以世俗雜說亂之、記戰國事多斷缺不完、欲更爲古史。功未及究、移知歙績溪、始至而奉神宗遺制。居半年、除祕書省校書郎。明年、至京師、除右司諫。宣仁后臨朝、用司馬君實、呂晦叔等、欲革弊事。舊相蔡確、韓縝、樞密使章惇皆在位、窺伺得失、中外憂之。轍言曰、先帝臨御僅二十年、厲精政事、變更法度、將以力致太平、追復三代。是以擢任臣庶、多自小臣致位公相。用人之速、近世無與比者。究觀聖意、本欲求賢自助、以利安生民、爲社稷長久之計。豈欲使左右大臣媮合苟容、出入唯唯、危而不持、顛而不扶、竊取利祿以養妻子而

已哉。然自法行以來、民力凋弊、海內愁怨。先帝晚年寢疾彌留、照知前事之失、親發德音、將洗心自新、以合天意、而此志不遂、奄棄萬國。天下聞之、知前日弊事、皆先帝之所欲改、思慕聖德、繼之以泣。是以皇帝踐祚、聖母臨政、奉承遺旨、罷導洛、廢市易、損青苗、止助役、寬保甲、免買馬、放修城池之役、復茶鹽鐵之舊、黜吳居厚、呂孝廉、宋用臣、賈青、王子京、張誠一、呂嘉問、蹇周輔等。命令所至、細民鼓舞相賀。臣愚不知朝廷以爲凡此誰之罪也。上則大臣蔽塞聰明、逢君之惡、下則小臣貪冒榮利、奔競無耻。二者均皆有罪、則大臣以任重責重、小臣以任輕責輕、雖三尺童子所共知也。今朝廷旣已罷黜小臣、至於大臣、則因而任之、將復使燮和陰陽、陶冶民物、臣竊惑矣。竊惟朝廷之意、將以體貌大臣、待其愧耻自去、以全國體。今確等自山陵以後、猶偃然在職、不肯引咎辭位以謝天下。謹案確

等受恩最深、任事最久、據位最尊、獲罪最重、而有
覷面目、曾不知愧。確等誠以昔之所行爲是耶、則
今日安得不爭。以昔之所行爲非耶、則昔日安得
不言。窮究其心、所以安而不去者、蓋以爲是皆先
帝所爲、而非吾過也。夫爲大臣、忘君徇己、不以身
任罪戾、而歸咎先帝、不忠不孝、寧有過此。臣竊不
忍千載之後、書之簡策。大臣旣自處無過之地、則
先帝獨被惡名、此臣所以痛心疾首、當食不飽、至
於涕泗之橫流也。陛下何不正其罪名、上以爲先
帝分謗、下以慰臣子之意。今獨以法繩治小臣、而
置確等、大則無以顯揚聖考之遺意、小則無以安
反側之心。故臣竊謂大臣誠退、則小臣非建議造
事之人、可一切不治、使得革面從君、竭力自效、以
洗前惡。伏乞出臣此章、宣示確等、使自處進退之
分、臣雖萬死不恨也。三人竟皆逐去、然卒不以其
前後反覆歸咎先帝罪之、世以爲恨。呂惠卿始詔

事介甫、倡行虐政、以害天下。其後勢鈞力抗、則傾
陷介甫、甚於仇讎。世尤惡之。時惠卿自知罪大、乞
宮觀自便、不預貶竄。輒具疏其姦、請加深譴。乃以
散官安置建州、天下韙之。司馬君實旣以清德雅
望專任朝政、然其爲人不達吏事。知雇役之害、欲
復行差役、不知差雇之弊其實相半。講之未詳、而
欲一旦復之。民始聞而喜、徐而疑懼、君實不信也。
王介甫以其私說爲詩、書新義、以考試天下士、學
者病之。君實改爲新格、而勢亦難行。方議未定、輒
言、自罷差役、至今僅二十年、吏民皆未習慣。況役
法關涉衆事、根牙磐錯、行之徐緩、乃得審詳。若不
窮究首尾、忽遽便行、恐旣行之後、別生諸弊。今州
縣役錢、例有積年寬剩、大約足支數年。若且依舊
雇役、盡今年而止、催督有司審議差役、趁今冬成
法、來年役使鄉戶。但使旣行之後、無復人言、則進
退皆便。又言、進士來年秋試、日月無幾、而議不時



決傳聞四方、不免惶惑。詩賦雖號小技、而比次聲律、用功不淺。至於治經、誦讀講解、尤不可輕易。要之來年皆未可施行。欲乞先降指揮、來年科場一切如舊。惟經義兼取注疏及諸家議論、或出己見、不專用王氏學、仍罷律義。令天下舉人知有定論、一意爲學、以待選試。然後徐議元祐五年以後科舉格式、未爲晚也。衆皆以爲便、而君實始不悅矣。是歲上將親饗明堂、輟言曰、三代常祀一歲九祭天、再祭地、皆天子親之。故於其祭也、或祭昊天、或祭五天、或獨祭一天、或祭皇地祇、或祭神州地祇、要於一歲而親祀必遍。降及近世、歲之常祀、皆有司攝事、三歲而後一親祀。親祀之疏數、古今之變相遠如此。然則其禮之不同、蓋亦其勢然也。謹按國朝舊典、冬至圓丘、必兼饗天地、從祀百神。若其有故、不祀圓丘、別行他禮、或大雩於南郊、或大饗於明堂、或恭謝於大慶、皆用圓丘禮樂神位、其意

以爲皇帝不可以三年而不親祀天地百神故也。臣竊見皇祐明堂遵用此法、最爲得禮。自皇祐以後、凡祀明堂、或用鄭氏說、獨祀五天帝、或用王氏說、獨祀昊天上帝。雖於古學各有援據、而考之國朝之舊、則爲失當。蓋儒者泥古而不知今、以天子每歲遍祀之儀、而議皇帝三年親祀之禮、是以若此其疏也。今者皇帝陛下對越天命、逾年即位、將以九月有事於明堂、義當並見天地、遍禮百神、躬薦誠心、以格靈貺。臣恐有司不達禮意、以古非今、執王、鄭偏說以亂本朝大典。夫禮沿人情、人情所安、天意必順。今皇帝陛下始親祠事、而天地百神無不咸秩、豈不俯合人情、仰符天意。臣愚欲乞明詔禮官、今秋明堂用皇祐明堂典禮、庶幾精誠陟降、溥及上下。時大臣多牽於舊學、不達時變。奏入、不報。然輟以爲周禮一歲遍祭天地、皆人主親行、故郊丘有南北、禮樂有同異。自漢、唐以來、禮文曰

盛費用日廣、事與古異、故一歲遍祀不可復行。唐明皇天寶初、始定三歲一親郊、於致齋之日、先享太清宮、次享太廟、然後合祭天地、從祀百神。所以然者、蓋謂三年一次大禮、若又不遍、則於人情有所不安。至於遍祭之禮、已自差官攝事、未嘗少廢。此近世變禮、非復三代之舊、而議者欲以三代遺文參亂其間、失之遠矣。至七年、上將親郊、輒備位政府、乃與諸公共伸前議、合祭天地、識者以爲當。初、神宗以夏國內亂、用兵攻討、於熙河路增置蘭州、於延安路增置安疆、米脂等五寨。至此、夏國雖屢遣使、而未修職貢。二年、夏始來賀登極、使還未出境、又遣使入界。朝廷知其有請地之意、然大臣議棄守未決。輒言曰、頃者、西人雖至、而疆場之事初不自言。度其狡心、蓋知朝廷厭兵、確然不請、欲使此議發自朝廷、得以爲重。朝廷深覺其意、忍而不予、情得勢窮、始來請命。今若又不許、使其來使

徒手而歸、一失此機、必爲後悔。彼若點集兵馬、屯聚境上、許之則畏兵而予、不復爲恩、不予則邊釁一開、禍難無已。間不容髮、正在此時、不可失也。今議者不深究利害、妄立堅守之議、苟避棄地之名、不度民力、不爲國計、其意止欲私己自便、非社稷之計也。臣又聞議者或謂棄守皆不免用兵、棄則用兵必遲、守則用兵必速、遲速之間、利害不遠、若遂以地予之、恐非得計。臣聞聖人應變之機、正在遲速之際、但使事變稍緩、則吾得算已多。昔漢文、景之世、吳王濞內懷不軌、稱病不朝、積財養兵、謀亂天下。文帝專務含養、置而不問、加賜几杖、恩禮日隆。濞雖包藏禍心、而仁澤浸漬、終不能發。及景帝用晁錯之謀、欲因其有罪、削其郡縣、以爲削之亦反、不削亦反、削之則反疾而禍小、不削則反遲而禍大。削書一下、七國盡反。至使景帝發天下兵、遣三十六將、僅而破之。議者若不計利害之淺深、



較禍福之輕重、則文帝隱忍不決、近於柔仁。景帝剛斷必行、近於強毅。然而如文帝之計、禍發既遲、可以徐爲備禦。稍經歲月、變故自生。以漸制之、勢無不可。如景帝之計、禍發既速、未及旋踵、已至交兵。鋒刃既接、勝負難保。社稷之命、決於一日。雖食晁錯之肉、何益於事。今者欲棄之策、與文帝同。而欲守之計、與景帝類。臣乞宣喻執政、欲棄者理直而禍緩、欲守者理曲而禍速。曲直遲速、孰爲利害。況今日之事、主上妙年、母后聽斷、將帥吏士、恩情未接、兵交之日、誰使效命。若其羽書沓至、勝負紛然、臨機決斷、誰任其責。惟乞聖心、以此反覆思慮、早賜裁斷、無使西戎別致猖狂、棄守之議、皆不得其便。於是朝廷許還五寨、夏人遂服。轍尋遷起居郎、爲中書舍人。時朝廷起文潞公於既老、以太師平章軍國重事。初、元豐中、河決大吳、先帝知故道不可復還、因導之北流。水性已順、惟河道未深、隄

防未立、歲有決隘之患、本非深害也。至此、諸公皆未究悉河事、而潞公欲以河爲重事。中書侍郎呂微仲、樞密副使安厚卿從而和之。始謂河西北流入汴、淀、久必淤淺、異日或從北界入海、則河朔無以禦狄。故三人力主回河之計。諸公莫能奪。呂晦叔時爲中書相、轍間見問曰、公自視智勇孰與先帝。勢力隆重、能鼓舞天下、孰與先帝。晦叔驚曰、君何言歟。對曰、河決而北、自先帝不能回、而諸公欲回之、是自謂智勇勢力過先帝也。且河決自元豐導之北流、亦自元豐、是非得失、今日無所預。諸公不因其舊而修其未完、乃欲取而回之、其爲力也難、而其爲責也重矣。晦叔唯唯曰、當與諸公籌之。既而回河之議紛紛而起、晦叔亦以病沒。轍遷戶部侍郎、嘗因轉對、言曰、財賦之原、出於四方、而委於中都。故善爲國者、藏之於民、其次藏之州郡。州郡有餘、則轉運司常足。轉運司既足、則戶部不困。

唐制天下賦稅其一上供其一送使其一留州。比之於今上供之數可謂少矣。然每有緩急王命一出舟車相銜大事以濟。祖宗以來法制雖殊而諸道畜藏之計猶極豐厚。是以斂散及時縱捨由己利柄所在所爲必成。自熙寧以來言利之臣不知本末之術欲求富國而先困轉運司。轉運司旣困則上供不繼上供不繼而戶部亦憊矣。兩司旣困故內帑別藏雖積如丘山而委爲朽壤無益於算。故臣願舉近歲朝廷無名封樁之物歸之轉運司。蓋禁軍闕額與差出衣糧清汴水腳與外江綱船之類一經擘畫例皆封樁。夫闕額禁軍尋當以例物招置而出軍衣糧罷此給彼初無封樁之理。至於清汴水腳雖減於舊而洛口費用實倍於前。外江綱船雖不打造而雇船運糧其費特甚。重復剝何以能堪。故臣謂諸如此比當一切罷去。況祖宗故事未嘗有此。但有司固執近事不肯除去。惟

陛下斷而與之則轉運司利柄稍復而戶部亦有賴矣。朝廷重違近制卒不能改。尋又言臣謹以祖宗故事考今日本部所行體例不同利害相遠恐合隨事措置以塞弊原。謹昧死具三弊以聞。其一曰分河渠案以爲都水監其二曰分胄案以爲軍器監其三曰分修造案以爲將作監。三監皆隸工部則本部所專其餘無幾。出納損益制在他司。頃者司馬光秉政知其爲害嘗使本部收攬諸司利權。當時所收不得其要。至今三案猶爲他司所擅。深可惜也。祖宗參酌古今之宜建立三司所領天下事幾至大半。權任之重非他司比。推原其意非以私三司也。事權分則財利散。雖欲求富其道無由。蓋國之有財猶人之有飲食。飲食之道當使口司出納而腹制多寡。然後分布氣血以養百骸。耳目得之以爲明手足賴之以爲力。若不專任口腹而使手足耳目得分治之則雖欲求一飽不可得。



矣而況於安且壽乎。今戶部之在朝廷猶口腹也、而使他司分治其事、何以異此。自數十年以來、羣臣不明祖宗之意、每因一事不舉、輒以三司舊職分建他司。利權一分、用財無藝。他司以辦事爲效、則不卹財之有無。戶部以給財爲功、則不問事之當否。彼此各營一職、其勢不復相知。雖使戶部得才智之臣、終亦無益。能否同病、府庫卒空。今不早救、後患必甚。昔嘉祐中、京師頻歲大水、大臣始取河渠案置都水監。置監以來、比之舊案、所補何事。而大不便者、河北有外監丞侵奪轉運司職事。轉運司之領河事也、郡之諸埽、埽之吏兵、儲蓄、無事則分、有事則合。水之所向、諸埽趨之、吏兵得以併功、儲蓄得以併用。故事作之日、無暴斂傷財之患。事定之後、徐補其闕、兩無所妨。自有監丞、據法責成、緩急之際、諸埽不相爲用、而轉運司不勝其弊矣。此工部都水監爲戶部之害一也。先帝一新官

制、並建六曹、隨曹付事。故三司故事、多隸工曹、名雖近正、而實非利。昔冑案所掌、今內爲軍器監、而上^⑥隸工部、外爲都作院而上隸提刑司。欲有興作、戶部不得與議。訪聞河北道近歲爲羊渾脫動以千計。渾脫之用、必軍行乏^⑦。水過渡無船、然後須之。而其爲物、稍經歲月、必至蠹敗。朝廷無出兵之計、而有司營職、不顧利害、至使公私應副、虧財害物。若專在轉運司、必不至此。此工部都作院爲戶部之害二也。昔修造案掌百工之事、事有緩急、物有利害、皆得專之。今工部以辦職爲事、則緩急利害誰當議之。朝廷近以箔場竹箔積久損爛、創令出賣、上下皆以爲當。指揮未幾、復以諸處營造歲有料^⑧。制遂令般運堆積、以破出賣之計。臣不知將作見工幾何、一歲所用幾何、取此積彼、未用之間、有無損敗、而遂爲此計。本部雖知不便、而以工部之事不敢復言。此工部將作監爲戶部之害三也。凡

事之類此者多矣。臣不能遍舉也。故願明詔有司、罷外水監丞、舉河北河事及諸路都作院皆歸轉運司。至於都水軍器將作三監皆兼隸戶部、使定其事之可否、裁其費之多少。而工部任其功之良苦、程其作之遲速。苟可否多少在戶部、則傷財害民、戶部無所逃其責矣。苟良苦遲速在工部、則敗事乏用、工部無所辭其譴矣。利出於一、而後天下貧富可責之戶部矣。朝廷以爲然、從之。惟都水監仍舊。轍自爲中書舍人、與范子功、劉貢父同詳定六曹條例。子功領吏部。元豐所定吏額、主者苟悅羣吏、比舊額幾數倍。朝廷患之、命量事裁減、已再上再卻矣。子功奉使、轍兼領其事。吏有白中孚者、進曰、吏額不難定也。昔之流內銓、今侍郎左選也。事之煩劇、莫過此矣。昔銓吏止十數、而今左選吏至數十。事不加舊、而用吏至數倍、何也。昔無重法重祿、吏通賂賂、則不欲人多以分所得。今行重法

給重祿、賂賂比舊爲少、則不忍人多、而幸於少事。此吏額多少之大情也。舊法、日生事以難易分七等、重者至一分、輕者至一釐以下、積若干分而爲一人。今若取逐司兩月事、定其分數、則吏額多少之限無所逃矣。轍以其言遍問屬官、皆莫應。獨李之儀對曰、是誠可爲也。即與之儀議之曰、此羣吏身計所繫也。若以分數爲人數、必大有所損、將大致紛訴。雖朝廷亦將不能守。乃具以白宰執、請據實立額。俟吏之年滿轉出、或事故死亡者勿補、及額而止、不過十年、羨額當盡。功雖稍緩、而見吏知非身患、不復怨矣。諸公以爲然、遂申尙書省、取諸司兩月生事。諸司吏皆疑懼、莫肯供。再申、乞榜諸司、使知所立額。俟它日見闕不補、非法行之日、即有減損也。榜出、文字即具。至是成書、以申三省。左僕射呂微仲大喜、欲攘以爲己功。以問三省吏、皆莫曉。有諸司吏任永壽者、頗知其意。微仲悅之、於



尙書省創吏額房、使永壽與三省吏數人典之。小人無遠慮而急於功利、即背前約、以立額日裁損吏員、復以好惡改易諸吏局次。凡近下吏人、惡爲上名所壓者、即爲撥出上名於他司。閑慢司分欲入要地者、即自寺監撥入省曹之類是也。凡奏上行下、皆微仲專之、不復經三省。法出、中外洶洶、微仲旣爲御史所攻、永壽亦以恣橫贓汙、以徒罪刺配。久之、微仲知衆不伏、乃使左右司再加詳定、略依本議行下。時子瞻自翰林學士出知餘杭、朝廷即命轍代爲學士。尋又兼權吏部尙書。未幾奉使契丹。虜以其侍讀學士王師儒館伴。師儒稍讀書、能道先君及子瞻所爲文、曰、恨未見公全集。然亦能誦服伏苓賦等、虜中類相愛敬者。

蘇轍撰 《樂城後集》卷一二

穎濱遺老傳下

還朝、爲御史中丞。命由中出、宰相以下多不悅。所

薦御史率以近格不用。自元祐初革新庶政、至是五年矣、一時人心已定。惟元豐舊黨分布中外、多起邪說、以搖撼在位。呂微仲與中書侍郎劉莘老二人尤畏之、皆持兩端爲自全計。遂建言欲引用其黨、以平舊怨、謂之調亭。宣仁后疑不決。轍於延和面論其非、退復再以劄子論之。其一曰、臣近面論君子小人不可並處朝廷、竊觀聖意、似不以臣言爲非者。然天威咫尺、言詞迫遽、有所不盡。退伏思念、若使邪正並進、皆得預聞國事、此治亂之幾、而朝廷所以安危者也。臣誤蒙聖恩、典司邦憲、臣而不言、誰當救其失者。謹復稽之古今、考之聖賢之格言、莫不謂親近君子、斥遠小人、則人主尊榮、國家安樂。疏外君子、進任小人、則人主憂辱、國家危殆。此理之必然、非一人之私言也。其於周易所論尤詳。皆以君子在內、小人在外爲天地之常理、小人在內、君子在外爲陰陽之逆節。故一陽在下、

其卦爲復。二陽在下、其卦爲臨。陽雖未盛、而居中得地、聖人知其有可進之道。一陰在下、其卦爲姤。二陰在下、其卦爲遯。陰雖未壯、而聖人知其有可畏之漸。若夫居天地之正、得陰陽之和者、惟泰而已。泰之爲象、三陽在內、三陰在外。君子既得其位、可以有爲、小人奠居於外、安而無怨。故聖人名之曰泰。泰之言安也、言惟此可以久安也。方泰之時、若君子能保其位、外安小人、使無失其所、則天之安未有艾也。惟恐君子得位、因勢陵暴小人、使之在外而不安、則勢將必至於反覆。故泰之九三曰、無平不陂、無往不復。竊惟聖人之戒深切詳盡、所以誨人者至矣。獨未聞以小人在外、憂其不悅而引之於內、以自遺患者也。故臣前所上劄子、亦以謂小人雖決不可任、以腹心、至於牧守四方、奔走庶務、各隨所長、無所偏廢。寵祿恩賜、彼此如一、無一可指如此而已。若遂引而寘之於內、是猶畏盜

賊之欲得財而導之於寢室、知虎豹之欲食肉而開之以垆牧、天下無此理也。且君子小人、勢同冰炭、同處必爭。一爭之後、小人必勝、君子必敗。何者、小人貪利忍耻、擊之難去。君子潔身重義、知道之不行、必先引退。故古語曰、一薰一蕕、十年尚猶有臭。蓋謂此矣。先帝以聰明聖智之資、疾頹靡之俗、將以綱紀四方、追迹三代。今觀其設意、本非漢唐之君所能髣髴也。而一時臣佐不能將順聖德、造作諸法、率皆民所不悅。及二聖臨御、因民所願、取而更之、上下忻慰。當此之際、先朝用事之臣皆布列於朝、自知上逆天意、下失民心、徬徨踖踖、若無所措。朝廷雖不加斥逐、其勢亦自不能復留矣。尙賴二聖慈仁、不加譴責、而宥之於外、蓋已厚矣。今者政令已孚、事勢大定、而議者惑於浮說、乃欲招而納之、與之共事、欲以此調停其黨。臣謂此人若返、豈肯徒然而已哉。必將戕害正人、漸復舊事、以



快私忿。人臣被禍蓋不足言。臣所惜者。祖宗朝廷也。蓋自熙寧以來。小人執柄二十年矣。建立黨與。布滿中外。一旦失勢。晞覬者多。是以創造語言。動搖貴近。脅之以禍。誘之以利。何所不至。臣雖未聞其言。而概可料矣。聞者若又不加審察。遽以爲然。豈不過甚矣哉。臣聞管仲治齊。奪伯氏駢邑三百。飯蔬食。沒齒無怨言。諸葛亮治蜀。廢廖立。李嚴爲民。徙之邊遠。久而不召。及亮死。二人皆垂泣思亮。夫駢立。嚴三人者。皆齊。蜀之貴臣也。管葛之所以能戮其貴臣。而使之無怨者。非有他也。賞罰必公。舉措必當。國人皆知所與之。非私而所奪之。非怨。故雖仇讎。莫不歸心耳。今臣竊觀朝廷用舍施設之間。其不合人心者。尙不爲少。彼旣中懷不悅。則其不服固宜。今乃直欲招而納之。以平其隙。臣未見其可也。詩曰。無競維人。四方其訓之。陛下誠以異同反覆爲憂。惟當久任才性忠良。識慮明審之。

士。但得四五人常在要地。雖未及臯陶伊尹。而不仁之人。知自遠矣。惟陛下斷自聖心。不爲流言所惑。毋使小人一進。後有噬臍之悔。則天下幸甚。臣旣待罪執法。若見用人之失。理無不言。言之不從。理不徒止。如此。則異同之迹。益復著明。不若陛下早發英斷。使彼此泯然無迹。可見之爲善也。奏入。宣仁后命宰執於簾前讀之。仍諭之曰。蘇轍疑吾君臣遂兼用邪正。其言極中理。諸公相從和之。自此參用邪正之說衰矣。轍復奏曰。聖人之德。莫如至誠。至誠之功。存於不息。有能推至誠之心。而加以不息之久。則天地可動。金石可移。況於斯人。誰則不服。臣伏見太皇太后陛下。皇帝陛下。隨時弛張。改革弊事。因民所惡。屏去小人。天下本無異心。羣黨自作浮議。近者德音一發。衆心渙然。正直有依。人知所嚮。惟二聖不移此意。則天下誰敢不然。衛多君子而亂不生。漢用汲黯而叛者寢。苟存

至誠不息之意。自是太平可久之功。此實社稷之福。天下之幸也。然臣以謂昔所柄任。其徒實繁。布列中外。豈免窺伺。若朝廷施設必當。則此輩覬望自消。昔田蚡爲相。所爲貪鄙。則竇嬰灌夫睥睨宮禁。諸葛亮治蜀。行法廉平。則廖立李嚴雖流徙邊郡。終身無怨。此則保國寧人之要術。自古聖賢之所共由者也。臣竊見方今天下雖未大治。而祖宗綱紀具在。州郡民物粗安。若大臣正己平心。無生事要功之意。因弊修法。爲安民靖國之術。則人心自定。雖有異黨。誰不歸心。向者異同反覆之心。蓋亦不足慮矣。但患朝廷舉事類不審詳。曩者黃河北流。正得水性。而水官穿鑿。欲導之使東。移下就高。汨五行之理。及陛下遣官按視。知不可爲。猶或固執不從。經今累歲。回河雖罷。減水尙存。遂使河朔生靈財力俱困。今者西夏青唐外皆臣順。朝廷招來之厚。惟恐失之。而熙河將吏創築二堡。以侵

其膏腴。議納醇忠。以奪其節鉞。功未可覬爭。已先形。朝廷雖知其非。終不明白處置。若遂養成邊釁。關陝豈復安居。如此二事。則臣所謂宜正己平心。無生事要功之意者也。昔嘉祐以前。鄉差衙前。民間常有破產之患。熙寧以後。出賣坊場。以雇衙前。民間不復知有衙前之苦。及元祐之初。務於復舊。一例復差。官收坊場之錢。民出衙前之費。四方驚顧。衆議沸騰。尋知不可。旋又復雇。雇法有所未盡。但當隨事修完。而去年之秋。復行差法。雖存雇法。先許得差。州縣官吏利在起動人戶。以差爲便。差法一行。即時差足。雇法雖在。誰復肯行。臣頃奉使契丹。河北官吏皆爲臣言。豈朝廷欲將賣坊場錢。別作支費耶。不然何故惜此錢而不用。竭民力以供官。此聲四馳。爲損非細。又熙寧雇役之法。三等入戶並出役錢。上戶以家產高強。出錢無藝。下戶昔不充役。亦遣出錢。故此二等人戶不免恣怨。至



於中等、昔既已自差役、今又出錢不多、雇法之行、最爲其便。及元祐罷行雇法、上下二等忻躍可知、唯是中等、則反爲害。臣請且借畿內爲比、則其餘可知矣。畿縣中等之家、例出役錢三貫、若經十年、爲錢三十貫而已。今差法既行、諸縣手力、最爲輕役。農民在官、日使百錢、最爲輕費。然一歲之用、已爲三十六貫。二年役滿、爲費七十餘貫。罷役而歸、寬鄉得閑三年、狹鄉不及一歲。以此較之、則差役五年之費、倍於雇役十年。賦役所出、多在中等。如此、安得民間不以今法爲害、而熙寧爲利乎。然朝廷之法、官戶等六色役錢、只得支雇役人、不及三年、處州役而不及縣役、寬剩役錢、只得通融鄰路、鄰州、而不及鄰縣。人戶願出錢雇人充役者、只得自雇、而官不爲雇。如此之類、條目不便者非一。故天下皆思雇役而厭差役、今五年矣。如此二事、則臣所謂宜因弊修法、爲安民靖國之術者也。臣以

聞見淺狹、不能盡知當今得失。然四事不去、如臣等輩猶知其非、而況於心懷異同、志在反覆、幸國之失有^①以藉口者乎。臣恐如此四事、彼已默識於心、多造謗議、待時而發、以搖撼衆聽矣。伏乞宣諭宰執、事有失當、改之勿疑。法或未完、修之無倦。苟民心既得、則異議自消。陛下端拱以享承平、大臣逡巡以安富貴。海內蒙福、上下所同、豈不休哉。然大臣怙權耻過、終莫肯改。比轍爲執政、三省又奏除李清臣爲吏部尙書、給事中范祖禹封還詔書、進呈不允。祖禹執奏如初。左正言姚勔亦言不當。三省復除蒲宗孟兵部尙書、轍謂諸公、且候邦直命下、然後議此、如何。皆不應。及簾前、微仲奏、諸部久闕尙書、見在人皆資淺、未可用。又不可闕官、須至用前執政。上有黽俛從之之意。轍奏、前日除李清臣、給諫紛然爭之未定。今又用宗孟、恐不便。宣仁后曰、奈闕官何。轍曰、尙書闕官已數年、何嘗闕

事。今日用此二人，正與去年用鄧溫伯無異。此三人者，非有大惡。但昔與王珪、蔡確輩並進，意思與今日聖政不合。見今尙書共闕四人，若並用似此四人，使互進黨類，氣勢一合，非獨臣等耐何不得。亦恐朝廷難耐何矣。且朝廷只貴安靜，如此用人，臺諫安得不言。臣恐自此鬧矣。宣仁后曰：信然。不如且靜。諸公遂卷除目持下。轍又奏：臣去年初作中丞，首論此事，聖意似以臣言爲然。今未及一年，備位於此，若遂不言，實恐陛下怪臣前後異同。上曰：然。乃退。六年春，詔除尙書右丞。轍上言：臣幼與兄軾同受業先臣，薄祐早孤，凡臣之宦學皆兄所成就。今臣蒙恩與聞國政，而兄適亦召還，本除吏部尙書，復以臣故，改翰林承旨。臣之私意尤不遑安。況兄軾文學政事皆出臣上，臣不敢遠慕古人，舉不避親，只乞寢臣新命，得與兄同備從官，竭力圖報，亦未必無補也。不聽。踰年，遷門下侍郎。時呂

微仲與劉莘老爲左右相。微仲直而闇，莘老曲意事之。大事皆決於微仲，惟進退士大夫，莘老陰竊其柄。微仲不悟也。轍居其間，迹危甚。莘老昔爲中司，臺中舊僚多爲之用，前後非意見攻，宣仁后覺之。莘老旣以罪去，微仲知轍無他，有相安之意。然其爲人則如故。天下事卒不能大有所正。至今愧之。蓋是時所爭議，大者有二：其一西邊事，其二黃河事。初夏人來賀登極，相繼求和，且議地界。朝廷許之。本約地界已定，然後付以歲賜。久之，議不決。明年人多保忠，以兵襲涇原，殺掠弓箭手數千人而去。朝廷隱忍不問，即遣使往賜策命。夏人受禮倨慢，以地界爲詞，不復入謝，且再犯涇原。四年，乃復來賀坤成，且議地界。朝廷急於招納，疆議未定，先以歲賜予之。尋覺不便，乃於疆事多方侵求，不守定約。而熙河將佐范育、种誼等又背約侵築質孤、勝如二堡。夏人隨即平盪。育等又欲以兵納趙



醇忠、又擅招蕃部千餘人、朝廷卻而不受、西邊騷然。轍力言其非、乞罷育、誼更擇老將以守熙河。宣仁后深以爲是、而大臣主之。轍面奏、此輩皆大臣親舊、不忍壞其資任、雖其同列、亦不敢異議。陛下獨不見黃河事乎。當時德音宣諭、至深至切、然非大臣意、至今不了。人君與人臣事體不同、人臣雖明見是非、而力所不加、須至且止。人主於事、不知則已、知而不得行、則事權去矣。臣今言此、蓋欲陛下收攬威柄、以正君臣之分而已。若專聽其所爲、不以漸制之、及其太甚、必加之罪、只如韓維專恣太甚、范純仁阿私太甚、皆不免逐去。事至如此、豈朝廷美事。故臣之意、蓋欲保全大臣、非欲害之也。宣仁后極以爲然、而不能用。六年六月、熙河奏夏人十萬騎壓通遠軍境上、挑掘所爭崖巘、殺人三日而退。乞因其退軍、未能復出、急移近裏堡寨於界上修築、乘利而往、不須復守誠信。諸公會議都

堂、轍謂微仲、今欲議此事、當先定議、欲用兵耶、不用兵耶。微仲曰、如合用兵、亦不得不用。轍曰、凡欲用兵、先論理之曲直。我若不直、則兵決不當用。朝廷頃與夏人商量地界、欲用慶曆舊例、以漢蕃見今住坐處當中爲界、此理最爲簡直。夏人不從、朝廷遂不固執。蓋朝廷臨事常患先易後難、此所謂先易者也。旣而許於所賜城寨、依綏州例以二十里爲界、十里爲堡鋪、十里爲草地。非所賜城寨、指謂延州塞門、義合、石州、吳堡、蘭州諸城寨、通遠軍定西城。要約纔定、朝廷又要於兩寨界首相望、侵係蕃地、一抹取直。夏人詎俛見從。要約未定、朝廷又要蕃界更留草地十里、通前三十里。夏人亦又見許。凡此所謂後難者也。今者又欲於定西城與隴諾堡相望、一抹取直、所侵蕃地、凡百數十里。隴諾、祖宗舊疆、豈所謂非所賜城寨耶。此則不直、致寇之大者也。今須欲不顧曲直、一面用兵、不知二聖謂何。莘老曰、持不

用兵之說雖美、然事有須用兵者、亦不可固執。轍曰、相公必欲用兵、須道理十全、敵人橫來相加、勢不得已、然後可耳。今吾不直如此、兵起之後、兵連禍結、三五年不得休、將奈何。諸公乃許、不從熙河之計。明日、面奏之。轍曰、夏人引兵十萬、直壓熙河境上、不於他處作過、專於所爭處殺人掘崖巉、此意可見此非西人之罪、皆朝廷不直之故。微仲曰、朝廷指揮亦不至大段不直。轍曰、熙河帥臣輒敢生事奏乞、不守誠信、乘夏人抽兵之際移築堡寨。臣以爲方今堡寨雖或可築、至秋深馬肥、夏人能復引大兵來爭此否。諸人皆言、今已不許之矣。轍曰、臣欲詰責帥臣耳、若不加詰責、或再有陳乞。諸人皆曰、俟其再乞、詰責未晚。宣仁后曰、邊防忌生事、早與約束。諸人乃聽。已而蘭州又以遠探爲名、深入西界、殺十餘人。轍曰、邊臣貪功生事、不足以示威、徒足以敗壞疆議、理須戒敕。不聽。旣又以防

護打草爲名、殺六七人、生擒九人。微仲知不便、欲送還生口、因奏其事。轍曰、邊臣貪冒小勝、不顧大計、極害事。今送還九人甚善、可遂戒敕邊臣。微仲不欲曰、近日延安將副李儀等深入陷沒、已責降一行人、足以爲戒。轍曰、李儀深入以敗事、被責。蘭州深入得功、若不戒敕、將謂朝廷責其敗事而喜其得功也。宣仁后曰、然。乃加戒敕。然七年夏人竟大入河東。朝廷乃議絕歲賜、禁和市、使沿邊諸路爲淺攻計、命熙河進築定遠城。夏人不能爭。未幾、復大入環慶。復議使熙河進築汝遮。中書侍郎范子功獨不可。轍度其意、昔延安帥臣趙鼎、范氏姻家也。方議地界、以綏州二十里爲例、議出於鼎。熙河斥其不可、議久不決、而鼎死、故子功持之。轍謂之曰、綏州舊例、施於延安可耳。熙河遠者或至七十八里、其不從宜矣。方論國事、親舊得失不宜置胸中也。衆皆稱善、而子功倖然不服。會西人乞和、



議遂不成。未幾、右相蘇子容以事去位、子功以同省待罪。因遂其請、實以汝遮故也。轍自爲諫官、論黃河東流之害、及爲執法、最後論三事、其一存東岸清豐口、其二存西岸披灘水口、其三除去西岸激水鋸牙。朝廷以付河北監司、惟以鋸牙爲不可去。轍於殿廬中與微仲論之、微仲曰、無鋸牙則水不東、水不東則北流、必有患。轍曰、然北京百萬生靈、歲有決溺之憂、何以救之。且分水東入故道、見今淤合者多矣、分水之利亦自不復能久。若淤漲水已過、盡力修完北流隄防、使足勝漲水之暴、然後徹去鋸牙、免北京危急、此實利也。莘老曰、河北監司不如此言、奈何。轍曰、公豈不知外官多所觀望耶。微仲曰、河事至大、難以臆斷。轍曰、彼此皆非目見、當以公議參之耳。及至上前、二相皆以分水爲便。轍具奏前語、且曰、必欲重慎、候漲水過、故道增淤、即併力修完北隄、然後徹去鋸牙、庶幾可也。

近至都堂、二相遽批聖語曰、依都水監所定。轍語堂吏、適所奏不然。莘老失措、微仲知不可、乃曰、明日別議。卒改批不得添展乃已。八年正月、都水吳安持乞於北流作軟堰、定河流、以免淤填。時微仲在告、轍奏曰、先帝因河決大吳、導之北流、已得水性。惟隄防未完、每歲不免決溢、此本黃河常事耳。是時北京之南、黃河西岸有鬬村、樊村等三斗門、遇河水泛溢、即開此三門、分水北行於無人之地、至北京北、合入大河、故北京生聚無大危急。自數年來、大臣創議回河、水官王孝先、吳安持等即塞此三門、貼築西隄、又作鋸牙馬頭、約水向東、直過北京之上、故北京連年告急。然約水既久、東流遂多於往歲。蓋分流有利有害、秋水泛漲、分入兩流、暫時且免決溢、此分水之利也。河水重濁、緩則生淤、既分爲二、不得不緩、故今日北流淤塞、此分水之害也。然將來漲水之後、河流東北、蓋未可知。臣

等昨於都堂問吳安持、安持亦言、去年河水自東、今年安知河水不自北。宣仁后笑曰、水官尙作此言、況他人乎。轍又奏曰、臣今但欲徐觀夏秋河勢所向、水若東流、則北流不塞、自當淤斷。水若北流、則北河如舊、自可容納。似此處置、安多危少、行之無疑。若行嶮徼倖萬一成功、如水官之意、臣不敢從也。乞令安持等結罪、保明河流所向、及軟堰既成、有無填塞河道、致將來之患、然後遣使按行、具可否利害。后復笑曰、若令結罪、必謂執政脅持之。且水官猶不保河東、北、況使者暫往乎。姑別議之可也。二月、微仲乃朝、轍具以前語諭之。微仲口雖不伏、而意甚屈。曰、軟堰且令具功料申上、朝廷更行相度。轍曰、如此終非究竟、必欲且爾、亦可。八日、轍方在式假、三省得旨、批曰、依水監所奏。下手日、具功料取旨。轍以非商量本意、以劄子論之。微仲即日在告。十二日、轍入對奏曰、自去年十一月後

來、至今百日間耳、水官凡四次妄造事端、搖撼朝廷。第一次安持十一月出行河、先乞一面措置河事。舊法馬頭不得增損。臣知安持意在添進馬頭。即指揮除兩河門外、許一面措置。安持姦意既露。第二次乞於東流北添進五七埽緡。臣知安持意欲因此多進埽緡、約令北流入東、即令轉運司同監視、不得過所乞緡數。安持姦意復露。第三次即乞留河門百五十步。臣知安持意在回河、改進馬頭之名爲留河門、即不許。安持計窮。第四次即乞作軟堰。凡安持四次擘畫、皆回河意耳。臣昨已令中書工房間水監兩事、其一、勘會北流元祐二年河門原闊幾里。逐年開排、直至去年、只闊三百二十步、有何緣故。其二、勘會東流河門見闊幾步。每年漲水東出、水面南北闊幾里。南面有無隄岸。北京順水隄不沒者幾尺。將來北流若果淤斷、漲水東行、係合併北流多少分數。有無包畜不定。今兩



問猶未答、便即施行、實太草草。后嗟歎久之、深以所言爲然。二十四日、與微仲同進呈、微仲曰、蘇轍所議河事、今軟堰已不可作、無可施行。轍曰、軟堰本自不可作。然臣本論吳安持百日之間四次妄造事端、動搖朝聽。若令依舊供職、病根不去、河朔被害無已。微仲曰、水官弄泥弄水、別用好人不得。所以且用安持。轍曰、水官職事不輕、奈何以小人主之。易曰、開國承家、小人勿用。未聞小人有可用之地也。此後是非終不能決。會宣仁晏駕。九年正月、安持奏乞塞梁村口、縷張包口、開清豐口以東、鷄爪河。八日、轍以祈穀宿齋三省、即令安持與北京留守司相度施行。時微仲爲山陵使、行有日矣。轍見之待漏、語及河事。微仲直視曰、此大事、不可不慎。轍曰、誠然、公亦宜慎之。時范堯夫爲右相、舊不直東流。轍告之曰、當與微仲議定、乃令西去。堯夫曰、命已下、奈何。轍曰、事有理、誰敢不從。議於皇

儀門外、再降指揮、使都水與本路安撫提轉同議、可即施行、有異議亟以聞。堯夫自外來、始意轍與微仲比、及此大相信服。既而安撫許冲元乞候過漲水、因河所向、閉所不行口。堯夫奏乞令許將與吳安持同議、一面施行。轍曰、河勢難定、恐須令諸司共議、乃得其實。上以爲然。既行、上特宣喻曰、河事不小、可遣兩制以上二人、按行相度。堯夫曰、河役已起、方議遣官、恐稽留役事。上曰、但使議論得實、雖遲一年何損。乃遣中書舍人呂希純、殿中侍御史井亮采往視之。二人歸、極以北流爲便。方施行、樞密簽書劉仲馮援舊例、乞與河議。仲馮本文潞公、吳冲卿門下士也、其言紛然。呂、井之議遂格。而轍亦以罪見逐。於是河流遂東。凡七年、而後北流復通。微仲之在陵下也、堯夫奏乞除執政、上即用李邦直爲中書侍郎、鄧聖求爲尙書右丞。三人久在外、不得志、遂以元豐事激怒上意。邦直尤力。

舊法、母后之家、十年一奏門客。時皇太妃之兄朱伯材以門客奏徐州富人竇氏、堯夫無以裁之一日、中、請轍於都堂與邦直議之。轍曰、上始親政、皇太妃閣中事、當遍議之。車服儀制已付禮部矣。皇太后月費、尙書省已奏乞依太皇太后矣。皇太妃宜付戶部議定。至於奏薦、亦當議。有所予、付吏部可也。凡事付有司、必以法裁處。朝廷又酌其可否而後行、於體爲便。明日、奏之。上曰、月費、竇氏內中批出。奏薦、皇太后家減二年、皇太妃十年。議已定。邦直獨曰、此可爲後法。今姑予之可也。上從之。邦直之附會類如此。會廷策進士、邦直撰策題、即爲邪說以扇惑羣聽。轍論之曰、伏見御試策題歷詆近歲行事、有欲復熙寧、元豐故事之意。臣備位執政、不敢不言。然臣竊料陛下本無此心、其必有人妄意陛下、牽於父子之恩、不復深究是非、遠慮安危、故勸陛下復行此事。此所謂小人之愛君、取快

於一時、非忠臣之愛君、以安社稷爲悅者也。臣竊觀神宗皇帝以天縱之才、行大有爲之志、其所施設、度越前古、蓋有百世而不可改者也。臣請爲陛下指陳其略。先帝在位近二十年、而終身不受尊號。裁損宗室、恩止袒免、減朝廷無窮之費。出賣坊場、雇募衙前、免民間破家之患。罷黜諸科誦數之學、訓練諸將、備墮之兵。置寄祿之官、復六曹之舊。嚴重祿之法、禁交謁之私。行淺攻之策、以制西戎。收六色之錢、以寬雜役。凡如此類、皆先帝之睿算、有利無害、而元祐以來、上下奉行、未嘗失墜者也。至於其他、事有失當、何世無之。父作之於前、子救之於後、前後相濟、此則聖人之孝也。漢武帝外事四夷、內興宮室、財用匱竭。於是修鹽鐵、榷酤、均輸之政。民不堪命、幾至大亂。昭帝委任霍光、罷去煩苛。漢室乃定。光武、顯宗、以察爲明、以識決事。天下恐懼、人懷不安。章帝即位、深鑑其失、代之以寬。愷



弟之政、後世稱焉。及我本朝眞宗皇帝、右文偃革、號稱太平、羣臣因其極盛爲天書之說。及章獻明肅太后臨御、覽大臣之議、藏書梓宮、以泯其迹。仁宗聽政、亦絕口不言、天下至今韙之。英宗皇帝自藩邸入繼、大臣過計、創濮廟之議、朝廷爲之洶洶者數年。及先帝嗣位、或請復舉其事、寢而不答、遂以安靜。夫以漢昭、章之賢、與吾仁宗、神宗之聖、豈其薄於孝敬而輕事變易也哉。蓋有不可不以廟社爲重故也。是以子孫旣獲孝敬之實、而父祖不失聖明之稱。此眞明君之所務、不可與流俗議也。臣不勝區區、願陛下反覆臣言、慎勿輕事改易。若輕變九年已行之事、擢任累歲不用之人、人懷私忿、而以先帝爲詞、則大事去矣。奏入不報、再以劄子面論之、上不悅。李、鄧從而媒孽之、乃以本官出知汝州。居數月、元豐諸人皆會於朝、再謫知袁州。未至、降授朝議大夫、分司南京、筠州居住。居三年、

責授化州別駕、雷州安置。未期年、或言方南行、兄弟相遇中途、至雷、賃富民屋以居、復移循州。今上即位、大臣猶不悅、徙居永州。皇子生、後徙岳州、已乃復舊官、提舉鳳翔上清太平宮。有田在潁川、乃即居焉。居二年、朝廷易相、復降授朝請大夫、罷祠宮。凡居筠、雷、循七年、居許六年。杜門復理舊學、於是詩、春秋傳、老子解、古史四書皆成。嘗撫卷而歎、自謂得聖賢之遺意、繕書而藏之。顧謂諸子、今世已矣、後有達者、必有取焉耳。家本眉山、貧不能歸、遂築室於許。先君之葬在眉山之東、昔嘗約祔於其廋、雖遠不忍負也。以是累諸子矣。予居潁川六年、歲在丙戌秋九月、閱篋中舊書、得平生所爲、惜其久而忘之也。乃作潁濱遺老傳、凡萬餘言。已而自笑曰、此世間得失耳、何足以語達人哉。昔予年四十有二、始居高安、有一二衲僧游、聽其言、知萬法皆空、惟有此心不生不滅。以此居富貴、處貧賤、

二十餘年而心未嘗動，然猶未睹夫實相也。及讀楞嚴以六求一，以一除六，至於一六兼忘，雖踐諸相，皆無所礙。乃油然而笑曰：此豈實相也哉！夫一猶可忘，而況遺老傳乎？雖取而焚之，可也。

蘇轍撰 《樂城後集》卷一二

校記

- ①韓：願作「諱」，據武英殿聚珍版叢書本《浮沚集》改。
- ②千：原作「十」，據《樂城應詔集》卷一二《御試制策》改。
- ③持：四部叢刊本《樂城集》作「恃」。
- ④三：宋刻《蘇文定公文集》作「二」，按周歲算，亦可。
- ⑤之：右引作「乏」。
- ⑥上：原作「止」，據右引改。
- ⑦乏：原作「之」，據右引改。
- ⑧料：原作「科」，據右引改。
- ⑨三：原無，據右引補。
- ⑩能：原作「既」，據右引改。
- ⑪冰：原作「水」，據右引改。
- ⑫有：原作「自」，據右引改。
- ⑬踰年遷門下侍郎：原無，據右引補。
- ⑭之：原作「大」，據右引改。



藏 儒

⑮ 幸：原作「宰」，據右引改。

⑯ 千：原作「十」，據右引改。

⑰ 待：原作「得」，據右引改。

⑱ 遣：原無，據右引補。

⑲ 流：原作「海」，據右引改。

宋儒碑傳集卷六十八

歐陽發 李修 彭汝礪 王罔 傅楫

李撰

歐陽伯和墓誌銘

君歐陽氏諱發字伯和廬陵人太子少師文忠公諱修之長子也爲人純實不欺內外如一淡薄無嗜好而篤志好禮刻苦于學安定胡瑗掌太學號大儒以法度檢束士其徒少能從之是時文忠公已貴君年十有五師事瑗恂恂惟謹又盡能傳授古樂鍾律之說既長益學問不治科舉文詞獨探古始立論議自書契以來至今君臣世系制度文物旁至天文地理無所不學其學不務爲抄掠應目前必刮剖根本見終始論次使族分部列考之必得得之必可用也嗚呼其志亦大矣然其與人不苟合論事是是非非遇權貴不少屈下要必申其意用是亦不肯輕試其所有而人亦罕能知君

者而君之死也今眉山蘇公子瞻哭之以爲君得文忠之學漢伯喈晉茂先之徒也初以文忠公恩補將作監主簿三遷爲大理寺丞賜進士出身勾當箔場遷光祿寺丞賜五品服勾當京西排岸司又遷殿中丞官制改爲奉議郎監粳米中第七界俄權少府監丞遷承議郎某年月日卒享年四十有六積勳至輕車都尉君爲殿中丞時曹太后崩詔定皇曾孫服制禮官陳公襄疑未決方赴臨召君問其制君從容爲言事在杜佑通典甚詳襄即奏用之是時方下司天監討論古占書是否同異折中爲天文書久未就而襄方總監事即薦君刊修君爲推考是非取舍比次書成詔藏太史局襄因奏言舊渾儀壞不可用而後所造新儀考之又不合願付君詳定詔從之本朝自至道中用韓顯符渾儀其後司天官周琮于淵加黃道熙寧中舊器壞詔沈公括更造括以其意增損之器成數年



未能定、與浮漏景表不應。君較三家、考古注、又自因事立制、先爲定儀奏之。神宗召君問曰、浮漏以玉筒下水者、當堅久也。君對曰、玉不如銅。沈括長用玉、今下水比初加速矣。上以爲然、遂以君法鑄新儀漏表、集其說號法要。其後有附括議者、訟于朝、詔再定、卒行君說、訟者亦服焉。君治官無大小、不苟簡、所創立、後人不能更。其著書有古今系譜圖、國朝二府年表、年號錄、其未成者尙數十篇。夫人吳氏、故丞相正憲公充之女、封壽安縣君。男一人曰憲、滑州韋城縣主簿。女七人、其四人皆蚤卒。一嫁權武安軍節度判官蘇京、次嫁承務郎王景文、亦卒。次尙幼。孫一人、延世。曾祖諱某、贈金紫光祿大夫、太師、中書令兼尙書令。曾祖妣李氏、封吳國太夫人。祖諱某、贈金紫光祿大夫、太師、中書令兼尙書令、追封鄭國公。祖妣鄭氏、封韓國太夫人。初、文忠公以觀文殿學士、太子少師致仕、累贈太

師、追封兗國公。妣薛氏、累封安康郡太夫人。元祐四年十一月甲子、葬君鄭州新鄭縣旌賢鄉劉村文忠公之兆、而憲來求銘。銘曰、
嗚呼伯和父、學不欺其志、而不以爲利、非不售之畏、而不知之愧、豈與世爲懟、其將有所耻。云誰之似、惟文忠之子。

張耒撰 《柯山集》卷四九

登封縣李君墓誌銘

某曩以事留東州、得拜右司李公而與其二子偁、伉游。元豐八年十月、偁自東州來、語某曰、吾有兄好學而文、嘗事先生姜潛。先生以進士不足累吾兄弟、勸學賢良方正。吾兄亦以其文自負。昔鎮戎失守、吾祖尙書坐貶官。先君年三十、乃詣闕上書、訟尙書之冤、以爲失守之罪在帥不在裨將。而帥韓魏公也、得正其罪、人以爲孝。及吾先君爲廣南西路提點刑獄、四年不得代、而魏公適爲丞相、吾

兄乃以書見魏公、魏公曰、非敢忘代也、蓋難其人也。吾兄曰、知公者以公爲難其人、不知公者以公爲復私怨也。魏公深納之、而先君始北遷矣。人以吾兄有先君之風、方先君之守扶風也、吾兄疾病且不起。及使河東、召見神宗皇帝、知而問焉、先君以實對。神宗皇帝蓋亦憫之、使吾兄而至于今、可易量耶。今將以某年某月某日葬吾兄于某州某縣某鄉某原、從先君之墓次、敢屬子爲銘。曰、不敢辭。按、君名脩、字適道、趙郡人也。曾祖克明、任虞部員外郎、贈戶部尚書。祖緯、任西上閣門使、榮州刺史、贈戶部尚書。父師中、任尚書右司郎中。而君右司之長子也、以祖任試將作監主簿、嘗任河南府登封縣尉。熙寧元年卒于官、享年二十九。娶王氏、生子一人、曰暉、爲太廟齋郎、早卒。女三人、長適承議郎江敏、次適進士范某、一未嫁。而君行事爲人、凡如其弟偁之說。銘曰、

學美矣而未終乎志、志美矣而未加乎民。惟其生也、仁人之孫、惟其游也、君子之門。世勇于孝、少而有聞、宜千萬年、與銘皆存。

畢仲游撰 《西臺集》卷一四

彭待制汝礪墓誌銘

紹聖二年正月、召彭公于江州、以爲樞密都承旨。命下、識者相慶曰、正人進矣。越翌日、公以訃聞、識者復相吊曰、朝廷失一正人、奈何。旣而遺表至、其略以謂、土地已有餘、願拊以仁。財用非不饒、願節以禮。佞人初若可悅、而其患在後。忠言初若可惡、而其利甚溥。以至恤河北移流、察江南水旱、凡數百言。識者復相告曰、忠哉若人、死不忘其君。於是。有詔、加等賻卹、以都承旨告賜其家、授其弟汝霖江淮發運司勾當公事、使辦喪事。明年正月某甲子、葬公于饒州某縣某鄉某原。前期、其家以公故人縉雲龔原所爲事狀屬予銘。予曰、嗚呼、其忍銘



吾友也哉。其忍銘吾友也哉。按彭氏世家金陵、後徙饒州、今爲鄱陽人。公諱汝礪、字器資、自讀書爲文、已有志於其大者。言動取舍、必度於義、朋友畏之。治平二年、以進士試禮部、擢第一。故事、進士第一人無入吏部選者。公釋褐、歷保信軍節度推官、武安軍節度掌書記。丁外艱、服除、復授潭州軍事推官。在選十年、人以爲淹、而公處之澹如也。丞相王文公得公詩義、善之、留爲國子監直講、改大理寺丞。御史中丞鄧綰欲舉公御史、召公不往。後雖薦之、而爲小人所誅、復自陳失舉、且薦他官代之。神宗察其姦、怒甚。王文公亦以爲言、即日黜綰、除公太子中允、監察御史裏行。時熙寧九年冬也。公在言職、非唐虞三代不論。初對、上十事、一正本、二任人、三守令、四理財、五養民、六賑救、七興事、八變法、九青苗、免役、十鹽事。指陳得失、利病、多人所難言者。又言呂嘉問領市易司、專事聚斂、非法意、當

罷黜。俞充諂事中人王中正、至使妻出拜之、不當除檢正中書五房公事。神宗爲寢充命、而究語所從、公言、如此、非所以廣聰明。不肯奉詔。宗室賣婚、至女娼家子、行有日矣。公奏罷之。因言、皇族雖服屬已疏、然皆宗廟子孫、不可使閭閻下賤、得以貨取、願爲更著婚姻法。王中正^②、李憲用兵陝西、公言不當以兵付中人、因及漢唐禍亂之事。神宗初^③、不憚出語詰公、公拱立不動。伺間復言、帝卒爲之改容。是日、殿廷觀者、始皆爲公懼、已而皆歎服。以母老請外、神宗固留之、而請不已。元豐元年春、罷爲館閣校勘、江南西路轉運判官。辭曰、復上疏論時事、且言、今不患無將順之臣、患無諫爭之臣。不患無敢爲之臣、患無敢言之臣。神宗察其忠、慰諭久之。在江西三年、代還、復出提點京西南路刑獄。丁內艱、去職。元祐二年、服除、以起居舍人召。旣去、執政有問新舊之政者、公曰、政無彼此之辨、一於是

而已。今所更大者、取士及差役法、行之而士民皆病、未見其可。執政不能屈。踰年、拜中書舍人、賜服金紫。詞命雅正、人以爲有古風。遇事不苟、多所建白。其論詩賦、回河事尤力。主議者皆不說。公亦數請去。是時、大臣有持平者、頗與公相佐佑、而一時進取者病之、欲排去其類、未有以發。會知漢陽軍吳處厚得蔡丞相確安州詩上之、傳會解釋、以爲怨謗。諫官交章請治、又構爲危言、以激怒太皇太后、必欲寘之極法。公曰、此羅織之漸也。數以白執政、不能救、則上疏論列甚切、又不聽、則居家待罪。時中書舍人止公一人、旣而、蔡丞相有謫命、公曰、我不出、誰任其責者。即入省、封還除目、辨論愈切。御史臺自中丞而下五人、坐是同日出、臺中一空。公復力爭、以爲不可。諫官指公爲朋黨。太皇太后曰、彭某豈黨確者、亦爲朝廷論事爾。已而蔡丞相貶新州、用起居舍人草詞行下、而公亦落職知徐

州。一二大臣相繼去位、自是正人道壅、而進取者得志矣。公在臺、旣嘗論呂嘉問事、且與蔡丞相異趣、使外十年、蔡爲有力。後治嘉問獄、不肯阿執政意、擠之、坐奪一^④官。至是、又辨蔡丞相不當謫、至得罪乃已。人以此益賢之。在徐一年、加集賢殿修撰、召權兵部侍郎、徙禮部、又徙刑部。會有具獄執政以爲可殺、公以爲當貸、而執政以特旨殺人、公執不下。執政怒、舍公而罰其屬。公言、奉制書而有不便、許論奏、法也。且非屬罪。自劾請去。章四上、不聽。御史亦助之言、遂并其屬免罰。公猶未出、再徙禮部、賜告其家。使契丹還、徙吏部。滿歲爲眞、復言、今人材空乏、宜稍責吏部薦校淹滯、或賜對、或試以事、苟非其人、必罰無赦。朝廷頗爲更法。紹聖元年、今上初專聽斷、召二三大臣修舉熙寧、元豐政事、人人爭獻所聞。公居之、如不能言者。或問之曰、在前日則無言之者、於今則人人^⑤而能之。未幾、除權



吏部尙書。又月餘、以寶文閣直學士出知成都府。命下、衆愕然、公亦以私計辭行。章數上、或以爲慢、當責。上不許、乃以寶文閣待制知江州。入辭、上勞問甚寵、曰、與卿非久別也。問所欲言者、公曰、陛下今所議者、其政不能無是非、其人不能無賢不肖。政惟其是、則政無不善。人惟其賢、則人無不得矣。至郡數月、得疾、草遺表。家人怪之、公笑曰、此何可免。作詩貽其子。十二月某甲子、有星隕于郡衙、是日公終于正寢、享年五十有四、累官左朝散郎、勳上護軍、爵開國男、食邑三百戶。公立朝大節如此。其在外爲監司、務大體、不事細苛、而於議獄、必傳經典、故在京西多所全宥、爲州所至有惠愛。尤以興學養士、賑乏恤孤爲急。居家孝友、事寡嫂謹甚。兄無子、爲立後、官之。又官其弟汝方、而後其子。汝方聞公喪、即棄所居官歸、論者多之。族人貧者、分俸錢賙給、或爲置義莊。與人交、盡誠敬。少時師事

桐廬倪天隱、天隱亦奇之。及官保信、迎天隱置于學、執弟子禮事之。天隱死無子、公爲并其母葬之、又葬其妻、又割俸資其女。同年進士宋渙未官而死、公經理其後、不啻其家人。蓋其篤行如此。公所著有易義若干卷、章疏若干卷、詩若干卷、雜文若干卷。曾大父某、大父某、父某、世有潛德。父以公貴、累贈朝請大夫、嘗曰、天下事可人意者、其爲教子起家乎。故四子悉使就學、果大其門。母張氏、京兆郡太君。前夫人寧氏、蓬萊縣君。今夫人宋氏、靜樂縣君。長子侗、秀拔有文、未冠而卒。次子脩、承務郎、襲善承教、庶幾能世其家者。二女、長適宿州州學教授吳材、卒、以季繼室。蓋公平生好學喜問、樂聞其過、自任以聖賢之重、而於貧富貴賤、利害得喪、一不以累其心。至於愛國愛君、推賢揭善、則拳拳孜孜、常若不及。故自處顯於朝廷、事知無不言、言不行必爭、爭而不得必求去。人始而駭、中而疑、卒

而信、則曰名節之士也。忌之者則以爲好異、或以爲近名。最爲今范丞相純仁所知。范公再相、人謂公必用。既對、太皇太后首曰、姑徐進彭某。蓋已有間之者。及出江州、未數月、上命召還、或曰須改歲。不幸而公死矣。公之學之守、若將大有爲者、而天奪其年、中道而殞、宜其識與不識、皆爲之悲。而有志於天下者、哭之或至於慟也。孔子稱大臣者、以道事君、不可則止、若公所自立、其近是歟。予與公遊二十餘年、朋友之分深矣。今公亡矣、予無以爲質矣。悲夫。銘曰、

乘時射利、小人之常。中行獨立、君子之方。并驅一時、則有通室。要之萬古、孰爲得失。有卓維公、既明且剛。弗茹于弱、弗吐于強。二十年間、世道三變。我無磷緇、終始一貫。何以貫之。唯義之踐。人所競逐。公則無求。衆皆患失。公則無憂。笑言待終。不變聲色。拳拳愛君、以至易簣。問胡以然。維學之力。人誰

無死、公也不亡。體魄言歸、兆此新崗。更千萬年、樵牧辟路。是曰有宋忠賢之墓。

曾肇撰 《名臣碑傳琬琰之集》中集卷三二

王容季墓誌銘

容季王氏、諱問。其先太原人、中徙河南、其後自光州之固始徙福州之候官、徙候官者五世矣。曾大父諱廷銘、仕閩王爲安遠軍使。大父諱居政、贈秘書丞。考諱平、爲侍御史、葬潁州之汝陰、故今爲汝陰人。容季嘉祐六年進士及第、主蔡州之新蔡簿。治平某年某月某甲子卒於家、年三十有二。熙寧某年某月某甲子、葬汝陰旌義鄉衆父營侍御府君之兆。母曾氏、金華縣君、尙書刑部郎中、集賢殿修撰、贈太師、中書令兼尙書令、某國公某之女。妻賈氏、尙書司門郎中昌期之女。男女二人、男曰某、始若干歲。容季孝悌純篤、尤能刻意學問、自少已能爲文章、尤長於敘事、其所爲文、出輒驚人。爲人



自重、不馳騁銜鬻、亦不子子爲名。日與其兄講唐

虞孔子之道、以求其內、言行出處、常擇義而動。其

磨礱涵養而不止者、吾未能量其所至也。不幸其

志未就、其材未試、而短命死矣。初、容季之伯兄回

深甫、以道義文學退而家居、學者所崇。而仲兄向

子直亦以文學器識名聞當世。容季又所立如此。

學士大夫以謂此三人者皆世不常有、藉令有之、

或出於燕、或出於越、又不可以得之一鄉一國也、

未有同時并出、出於一家。如此之盛、若將使之有

爲也、而不幸輒死、皆不得至於壽考、以盡其材、是

有命矣。而命之至於如此、何也。初、子直之遺文、深

甫屬予序之。數年、又叙深甫之文。復數年耳、而容

季葬有日、其仲兄固子堅又屬予銘其墓、而且將

叙其文。嗚呼、非其可哀也夫。銘曰、

學足以求其內、辭足以達其外。守之用剛、養之用

晦。如泉之進、如木之升。奄焉以止、不究其成。維友

作詩、以永厥聲。

曾鞏撰 《元豐類稿》卷四二

朝請郎龍圖閣待制知亳州贈少師傅公

墓誌銘

崇寧間、鈞黨之論起、元祐以來士大夫爲世指名者、悉墮黨中。故一時盛德精忠之人、往往齎志以沒。既沒矣、子孫懼及、率秘其閥閱不敢傳。逮靖康黨禁除、人人爭言嘉祐、治平以前事、于是昔之悼不幸土中者、咸振耀于時。公雖沒于崇寧之初、爲不預其禍、然用事者猶指公爲黨人。至紹興九年、公之卒葬也、三十八年矣、而墓碑未立。公之子七人、惟詒度在。詒度以書來乞銘、藻少仰公名、以不獲拜公爲恨、今乃得執筆次公之行事、幸矣。然藻去公幾四十年、更士大夫以言爲諱之時、公之行治、其詳不可得而聞也。謹掇其灼然在人耳目者、序而銘之。公諱楫、字元通、姓傅氏。傅氏系出北地、

自祇亮世仕江南、子孫因散處江淮間。有居光州者、遭廣明之亂、從王潮奔閩。數世而至公高祖仁瑞、又徙居興化軍仙遊縣。故公今爲仙遊人。曾大父獻、大父偁、皇考滋、皆以地遠京師、不求仕。而皇考尤有信義、爲里人所宗、以公故贈朝奉郎。公少莊重如成人、甫七歲、從鄉先生學、已能痛自刻厲。他兒戲旁譁笑、如不聞、反并取其書誦讀。未冠、試廣文館第一、其文天下傳誦之。既不第而歸、有貴人欲留公使子弟學焉者、公曰、吾方求師友、資身未暇也。聞孫覺、陳襄有學行、樞衣從之。襄門人有許安世、江衍之流、皆嘗以文藝冠多士、襄不之取。獨稱公曰、傳元通金石人也。以其女妻之。擢治平四年進士第、調揚州司戶參軍。守遇僚屬暴甚、屢以難集事、諉公而促其期。公裁決如流、未嘗希意苟合。至捕其從者、實諸法。守雖彊聽而不能平、乃欲以繁劇困之。會天長令缺、檄公攝承。公發伏擿

姦如神、猾吏惡少年皆屏迹、褫氣。天長大治、更以最聞。丁外艱、歸里中。里中事有不能決者、悉從公折衷。或望公門罷訟而歸。調福州福清丞、帥曾鞏負材倨視天下士、獨與公鈞禮。改蘇州錄事參軍。復丁內艱、免喪授太原府太谷令。白誅徙鄉而還。爲民害者一人。于是公之仕也二十年矣。猶在吏部選處之怡然、未嘗以窮達介懷。會曾布帥太原、謁入、大驚曰、是福清傅丞、爲吾兄所知者耶。率部使者交薦、且以書言之。朝廷公卿間改宣德郎、知吉州龍泉縣。時孫覺爲御史中丞、謂公曰、朝廷欲用公、幸少留、除書且下矣。公曰、仕所以樂居中者、免外臺督責之辱。今頻首權門、與外臺奚擇。且外官我所當得也。徑出國門不顧。道除太學博士、所至學者闐門。官太學四年、足未嘗及宰相執政之門。秩滿、即日詣曹。曾布知樞密院、與其副林希共薦之。宰相亦雅知公名、除太常博士。公長禮學、自



神宗時議祠北郊至是有詔復議議者多持兩可公獨援經據古損其車服儀衛賞賚之類使悉得其中上之後卒施行如公議紹聖二年徽宗由遂寧邸就資善堂學詔大臣擇德行老成人爲傅宰相以公名聞除諸王府說書舊制諸玉課學書屬文而不及經公言王當以德義爲先區區翰墨非所急請先講經史以懋王德從之明年徽宗封端王就除記室參軍又明年爲侍講又明年爲翊善中人執事王府者例與宮僚昵公獨正色不與親雖一府以爲介而悉嚴憚之王亦爲之加禮閱五年移官者四而不出王府同僚或歲中屢遷公未嘗一語及之會諫臣鄒浩以言事譴公厚贐其行坐是免所居官裁兩月徽宗即位首問公安在即除直秘閣進尙書司封員外郎擢監察御史權殿中侍御史論內侍都知劉瑗恃寵專恣不報移國子司業遷起居郎召試中書舍人徽宗面稱訓詞

有西漢風于是曾布當國以兄弟于公有汲引恩冀其助己公巋然守正凡朝廷命令有可疑進退人材有不厭衆望如救王古范純禮之類皆人所難言者必極論之雖屢卻不爲之回奪布每以爲言不合者因是中傷公公不恤也徽宗顧公潛邸舊見必咨訪公每以遵祖宗法度安靜自然爲獻語宰相亦諄諄及之歸則削藁雖至親莫得而聞一日李清臣勸上清心省事徽宗曰近臣惟傅楫爲朕言此甚詳然後人始知公所以啓迪上心者其卓至皆此類也建中靖國秋見時事浸更張竊歎曰禍其始此乎不去楚人將鉗我于市聞者莫不甚其言公笑曰後當以吾言爲信遂求補外詔不許懇祈不已最後中書舍人鄒浩爲請迺聽除龍圖閣待制知亳州到郡數月屬疾易衣跌坐而卒年六十一寔崇寧元年二月五日也公于孔孟之學精思而力探之不臻其極不止又天資簡淡

于世事無一可關心者、專用經史自娛、聚書至萬卷、平居正衣冠、如對大賓、否則瞑目燕坐、不妄出一語。雖在閤室、無秋毫之欺。故能死生禍福不入胸中、視進退窮通若夢幻然。雖當是之時、直道立朝、不爲無人、若夫先見如龜蓍、卓然引去者、惟公一人而已。大觀中、大臣屢欲以公入黨籍、徽宗念公舊學之臣而止。後每因事必及公姓名、而卒不爲大臣所右。故公之沒、恤典不加焉。公之葬在今常州宜興縣善拳山之原、累以諸子恩贈少師。妻陳氏、亦贈越國夫人。子諒、友、誼、夫、皆擢進士第。諒友仕至奉議郎、尙書膳部員外郎。誼、夫、朝請郎、尙書兵部侍郎。謙受、朝奉大夫、夔州路轉運判官、與詒微、去病、譽處、皆相繼前卒。詒度、今爲朝請大夫、主管台州崇道觀。有文集三十五卷、藏于家、簡古而精深、世以爲法。銘曰、

道有所寄、千年一儒。世得而用、一人萬夫。公承丘

軻、知學元本。匪惟知之、亦踐其壺。用此玉立、直哉惟清。世無可娛、以道死生。晚登王門、帝實知我。擢躋近臣、初不求可。正色凜凜、傾忠上前。寧非大剛、吾道則然。帝知雖深、時不我與。奉身而行、世莫能禦。竟脫黨禍、歸安九原。世評旣公、盛德乃尊。聞風而興、百世之下。我爲銘詩、以詔來者。

汪藻撰 《浮溪集》卷二六

李子約墓誌銘

公諱撰、字子約、姓李氏。本唐諸王苗裔、其先恭王明、以太宗子國於曹。有子五人、俊、傑、侖、備、偲、遭武氏之禍、屢更封、傳五王而絕。侖生濟國公臻、無嗣。獨其季偲、官止左武衛大將軍、子孫蕃延、與唐始終、迄今班班可紀。世居陳留、至公之七世祖澄爲溫州永嘉令、始遷福州之連江。國初三從祖亞筍、以進士高第起家、至三司鹽鐵判官任。公之祖爲應天府法曹掾、稍遷至縣令、郡守、所至有能稱、最



後以國子博士守毗陵卒于位。柩將行，州人不忍其去，共挽留之。葬橫山，泣送者填道。又圖其像，歲時祠之。至今人有疾，取墳土服之，輒愈。其威惠在人，久而不忘。蓋如此。國博君生五子，公之皇考，其冢嗣也。娶范氏，司封員外郎亢之女。國博之喪，諸孤無所歸，范爲營室于蘇，故今爲蘇人。公九歲而孤，執喪奉親如禮。既冠，丁母夫人憂，甚。家徒四壁，惟閉門自守，雖廩食不繼，澹如也。親故高之，爭持薪米以餉。服除，游太學，聞南豐曾公鞏以文名天下，公往受業其門。刻意勵行，務多識以畜德，不爲進取計。南豐器其材，謂當爲世用。會熙寧五年，詔郡國貢士，乃作湖水碧詩以勉其行。六年，遂登進士第，調越州餘姚縣主簿。用舉者監揚州高郵縣酒稅，移江州彭澤縣令，遷鎮安軍節度推官，知河南密縣事，除澶州州學教授。考滿，薦書應格，改左宣德郎。曾魯公布帥青社，辟置公幕府。公少從

南豐游，南豐兄弟三人皆登顯仕，有重望，而公尤爲翰林公所知。及從青社辟，其兄弟至以書相賀，謂幕府得忠信之士。礙吏部格不行。青社移河間，再辟公州學教授。歲滿，除太僕寺主簿，轉奉議郎。坐乘騎誤過欽聖太后儀衛，貶饒州德興縣監酒稅。上即位，覃恩，轉承議郎，加武騎尉，賜緋衣銀魚。通判莫州，轉朝奉郎，加雲騎尉。堂除人例不赴吏部選，公罷選，即自陳歸部，授通判永靜軍，轉朝散郎。未赴，以堂除人銜罷，改授簽書泰寧軍節度判官廳公事。八寶赦，轉朝請郎，用年勞，轉朝奉大夫，加驍騎尉。任滿，以恩例就差通判袁州。自永靜改授及罷泰寧任，或勸公詣朝廷申理，公曰：「吾每以士人老不知退爲鑑，今固躬蹈之耶。」竟不往。執政大臣賢公行，就除通判保州，將引用，遽以疾終。于正寢，實大觀三年七月二十日也。享年六十有七。公初在餘姚時，有茶商夜行，遇海舶鉦鼓偕鳴，更

相疑爲盜、持短兵格鬪、殺傷十餘人。繫蕭山獄、吏求正名不得、連年不能決。清獻趙公守越、聞公名、檄公攝縣事。公至、吏前負案盈積、公一視之、即得其情、曰：「犯時不知、在律勿論。」具聞于州、杖遣之。餘悉迎刃族解、無留。未幾、邑大治。清獻益知公能、薦公可任縣令。彭澤縣頻江、俗窮陋、喜訟、尙鬼而信巫。公一以信義道之、晨興視事、親爲決曲直、吏簪筆立庭下、屏氣惕息、受成命行文、無敢出一語者。久而民化服、訟日益稀。使者按行、見之、疑公不事。事旣而勾稽帳簿、皆精緻、無毫髮疵戾可指摘。引囚詰吏、吏以素不深與、不能對。公徐進、具道所以曲折詳盡、卒大喜出。朝廷下括田令、轉運使倚法務苛擾、欲多得匿戶羨田爲功。公爭以爲不可、使者怒、欲劾公留令、又沮格無得申復。翌旦且行、公抱牘徑造卧內、使者驚問、公曰：「彭澤令以公事白、願起視之。」面抗論移時、且請就劾、并解印綬去。使

者度不可屈、卒從之、然怒猶不置。是時王公安禮爲部刺史、使者還金陵、盛言公抗對狀、陰激怒之、覬共置公罪。刺史反壯公所爲、曰：「縣令乃敢與部使者爭衡、此必介特有守士也。」亟呼書吏對使前草奏薦公、使者意沮、猶數陰伺短失、卒無一事可得。巫覡有前期唱言某日某所災者、已而果然。暴桀因緣爲姦、轉以相恐。公召羣巫于庭、問以火將起狀、期曰：「處所、令將詣伺、有不信、抵罪。」又卜于城隍神祠、如所問巫言、有不然者、毀廟、皆曰無有。乃下令、敢有復假鬼神造言惑衆者、坐之、人心悉安。朔方士鮮知學、公爲二州教授、始得名儒爲師、士向風、翕然一變。將門子弟至褫跣注、衣縫掖爲諸生者、不可勝計。澶淵瀕大河、自元豐初決、小吳河流不復由故道。元祐三年、始議遣使修復。公作復河賦二篇、贊明禹功、究當時利害甚悉。上之不報。大抵言河不可復、後卒如公言。又廣孟子說、著養



氣論三篇傳學者、其言深切著明、皆可考而行也。莫當北使道、公至、謂宜先示以文教、乃增闢學舍、益市書、日親爲講說、士皆誦其言、化其德。初歲才五、六人、末期至十倍。崇寧詔天下興學、莫遂爲邊郡第一。其在泰寧、事無小大、悉賴公爲理。雖守將屢易、幕府號爲省事。歲水災、首議賑救、民不知有饑、公之力也。公性剛直、不泊於私欲。居家友順、遇妻子以禮、閨門之內雍如也。收養孀稚、均其所有、中外無間言。不事生產、約於自奉、而周人之急、惟恐不及。交朋友尤篤於信義。蒞官臨事、以理自將、澹乎若無意於仕者。至其遇事立斷、有不便於民、雖要權必爭、不少回屈。率意盡誠、亦不爲矯激之行、微名於世。雖仕筦庫、必盡力、故所至人安之。旣去、而久益思。流落州縣三十年、位不稱德、士論惜之。而公與家人言、未嘗有滯淹之歎、其視得喪、無足介其胸中者。故天下識與不識、皆知其爲鉅人。

長者。及其亡、亦莫不咨嗟歎惜。公晚尤深佛學、前數月尙無恙、居靜室、燕坐終日、對家人未嘗輒語。屏絕情累、若預有知者、間惟焚香誦佛書而已。家人私竊怪之、莫敢問。手書寒山詩一首、意若示諸子者。大抵以攻人之惡、伐己之善爲戒。疾革、猶怡怡自若、卒無一言及後事。公於死生之際、安之若此、則其素所養可知矣。曾祖諱慕玠、故任祕書省著作佐郎、贈尙書二部員外郎。國博君諱餘慶、贈屯田郎中。考諱處常、故任忠武軍節度推官、贈朝請大夫。公娶柳氏、括蒼人。朝散郎珣之女、有賢行。生子男六人、彌性、彌倫、彌大、彌遜、彌中、彌正。女二人。彌倫以公遺奏、補假將仕郎。彌大、彌遜、崇寧大觀間連舉登進士第。彌大登仕郎、興仁府宛亭縣主簿。彌遜單州司戶。參軍、餘皆舉進士。長女適進士張延之、次適從仕郎廬州舒城縣尉陳溫舒。孫男一人、女一人、皆幼。公喜著述、文辭簡古、有理趣。

作毛詩訓解二十卷、孟子講義十四卷、文集五十卷、史贊論五卷、藏于家。其孤將以政和元年二月二十四日葬公于橫山祖塋之西。狀公之行與其族系世次來請銘。予雖未嘗知公、而與其子彌大游、考公之行與其歷官行事始終之大節、皆足以垂世傳後、是宜銘。乃叙而銘之。銘曰、

李本嬴姓、爰自高陽。天祚神堯、興于有唐。本支十三、明國于曹。或絕或封、惟時之遭。偲實其季、爲衛將軍。位雖不充、蕃蕃子孫。世載其德、著于毘陵。疾誰與瘳。邦君之靈。公蘊大器、增光于前。匪斲匪雕。矩方規圓。問學有原、左右之逢。士得其師、靡然向風。有社有民、庇之以身。義在必爭、力回千鈞。畜大不施、其行則躋。寄之去來、視猶一蛻。善無不報、不于其躬。力穡之勤、後穫必豐。矧公多子、惟公是似。責報于天、如執右契。橫山之陰、有墳其墟。公則無憾、永安此居。

楊時撰 《楊龜山先生集》卷三一

校記

①銘：原脫，據明小草齋鈔本《宛丘先生文集》補。

②王中正：原作「正中王」，據《宋史》卷三四六《彭汝礪傳》改。

③「初」下原有「君」字，據文意刪。

④一：《宋史》卷三四六《彭汝礪傳》作「二」。

⑤人人：原作「夫人」，據右引改。

⑥司戶：原缺，據四庫本《龜山集》補。



儒藏

宋儒碑傳集卷六十九

張商英 王肱 孫覽 莊徽 楊節之

范祖禹

張少保商英傳

宣和三年十一月壬午、觀文殿大學士、通奉大夫、提舉西京嵩山崇福宮張商英卒。商英字天覺、蜀州新津人。少警敏、強記。中治平二年進士第、調達州通川縣主簿。章惇出措置溪洞、嘉其才、歸朝薦之。召對、進草茅夏國書、以光祿丞權檢正中書禮房公事、兼編修中書條例。熙寧五年、加太子中允、監察御史裏行。時神宗勵精政事、商英言、陛下即位以來、更張數十百事、而最大者有三、曰免役、曰保甲、曰市易。三者得其人、緩之即爲利、非其人、急之即爲害。陛下與大臣宜安靜休息、擇人而行之、則太平可以立致。會臺勘劫盜李則從輕典、有詔糾察司鞠治。商英言、此出大臣私忿、願陛下收還

主柄、自持威福、使臺諫爲陛下耳目、無使爲近臣脅遷、則天下幸甚。神宗爲停其獄。商英乃言樞密使文彥博、副使吳充、蔡挺^①、黨庇博州親戚、失入死罪、與縱吏等事。彥博等以商英意附王安石排己、俱求去。神宗難之、降授光祿丞、監荆南鹽麴商稅。就移節度判官、改鎮南軍。元豐二年、復太子中允、提舉京西南路常平、召除館閣校勘、檢正中書刑房兼詳定編修刑房斷例。舒亶知諫院、商英以壻王爲之所業示之、亶繳奏、以爲事涉干請、坐監鄂州漢川鎮酒稅、改荆南江陵縣赤舞市鹽茶稅。八年、以太常丞召。哲宗嗣位、除開封府推官。時朝廷稍更新法之不便民者、商英上書、謂三年不改於父之道。今先帝陵土未乾、奈何議更變乎。除河東提點刑獄。元祐四年、移河北西路。五年、改江南西路轉運副使。八年、徙淮南路。紹聖元年、以右正言召、遷左司諫。言蘇軾論合祭天地非是、乞加罪。又



言呂大防、梁燾、范祖禹、吳安詩、劉唐老、孫升、韓川、皆坐貶。言司馬光、文彥博負國，呂公著不當諡正獻。時來之邵爲子娶蓋氏，以蓋漸爲蓋氏義男，規其財產。商英疏論之，之邵出知蔡州。二年，遷左侍郎中。會知開封府王震言商英遣人與蓋漸謀害之邵，坐謫監襄州酒稅，改監江寧府稅。三年，知洪州。四年，除江淮荆浙等路發運副使，入覲，除直龍圖閣。未幾，以太常少卿召。未見，除集賢殿修撰，江淮荆浙等路發運使。元符二年，召爲尙書工部侍郎。徽宗即位，除中書舍人。時大河決，除水官非其人，商英繳詞頭，且言築隄塞河，是塞兒口而止啼也。宰相因奏觀商英言，必能治河，宜委之。遂除龍圖閣待制、河北路轉運使。以言者論列，落職知隨州。謝表不自引咎，降一官。建中靖國元年，以戶部侍郎召，改吏部、刑部，爲翰林學士。崇寧初，除尙書右丞，遷左丞。時蔡京爲相，商英在神廟與京同爲

檢正，雅相好。及是議多不合，乃言京身爲輔相，志在逢君，臺臣以爲非所宜言，謫知亳州、蘄州，提舉舒州靈仙觀，入元祐黨籍。京罷，起知鄂州。大觀元年，京復相，提舉西京嵩山崇福宮，散官，安置歸州，量移峽州。復通議大夫，提舉成都府玉局觀。四年，蔡京罷政，除商英龍圖閣學士，知杭州。過闕，賜對，奏曰：「神宗修建法度，務以去大害，興大利而已。今誠一一舉行，則盡紹述之美。法若有弊，不可不變，但不失其意足矣。」除資政殿學士，中太一宮使，尋除中書侍郎，拜右僕射。時久旱，彗出天心。是夕大雨，彗不見，上喜，親書商霖一尺字賜之。商英爲相，務更蔡京所行事，省六路上供錢鈔，改當十錢爲當三。罷內藏，出剩鹽鈔歸之有司。天下翕然推重。時內侍楊戩提舉後苑作有勞，除節度使。商英不可，奏曰：「祖宗法，內侍皆寄資，無至團練使者。有大勳勞，則別立昭宣，宣政、宣慶等使以寵之，未聞建

節鉞也。戢銜之。會御史中丞張克公劾商英狼傲弗恭等罪。給事中蔡嶷助之。政和元年。除觀文殿大學士。知河南府。俄落職。知鄧州。再謫汝州團練副使。衡州安置。太學生有訟商英冤者。上以語京。京遂言。商英與臣同時遭遇。乞放逐便。詔從之。商英歸居荆南。五年。立皇太子。赦。復通奉大夫。提舉西京嵩山崇福宮。六年。上昊天徽號。復觀文殿學士。七年。手詔。商英先帝擢爲御史。嘗任宰司。今明堂嚴配。恩逮海宇。可特復觀文殿大學士。卒。年七十九。贈少保。商英慷慨敢言事。然詭譎不常。在元祐時。獻嘉禾頌。以文彥博。呂公著比周公。至紹聖間。乃極言其短。嘗作祭司馬光文。已乃追論其罪。始也排擊有言諸人甚力。迨爲相。則從而引用之。蔡京置之黨籍中。其實繇熙豐進也。大觀之政。矯革時弊。天下稱之。平生學浮屠法。自號無盡居士。有文集百卷。子茂。

《實錄》本傳 《名臣碑傳琬琰之集》下集卷一六

王力道墓誌銘

吾友力道。諱肱。王氏。蓋瑯琊臨沂諸王。在齊不遠遷者。其世家序列。史官文獻相望。有諱某者。於其鄉有德。沒而其配崔夫人與門人子弟誅其行曰。恭睦先生。是爲君考。庭堅童子時。與力道游。是時恭睦先生尙無恙。得入拜崔夫人於堂。以兩孺子同學。問相愛。故兩家親亦相愛。力道長予二歲。而少成獨立。無兒子氣。食飲卧起。與書史筆墨俱。後七年。比歲以鄉舉士。俱集京師。甲辰。丁未。歲相從也。力道此時律身甚嚴。而與人極愷悌。於書無不觀。而尤喜易。春秋。文章初不經意。睥睨左右。下筆娓娓不休。熙寧癸酉。邂逅夜語於西平客舍。謹厚而文。甄叙人物有理致。予知其在困而不揜也。又二年。客自齊來。乃言力道與往時大異。沈浮閭井間。得酒不擇處所。遇屠販如衣冠。愛之者以爲似



畢茂世、光孟祖之爲人、而力道自言與二子異、人亦無以命之。或謂力道窮不偶、故自放於酒中。吾以爲力道智及此、殆不爾。如是三年、終以酒死、得年三十有五。無子、有遺文未輯。夫人張氏、猶尸其祭、旣祥、張氏又卒。於是崔夫人七十餘歲矣、哭之甚哀。力道之兄撫州軍事推官、將舉恭睦之喪、兆於臨朐之龍泉、而葬力道於其域。謀曰、知吾弟者、莫若吾友臨川晏叔原、幾道、豫章黃魯直、庭堅、將請叔原叙其文、而屬魯直銘其墓。則以狀來、庭堅其可不銘。銘曰、

嗚呼力道、壯長如其初。慈孝弟友、材則多有。培德以自厚、不昌其後。壯士溺於酒、萬世同流。今也何咎。我圖作銘、或慰其母兄、維金石之壽。

黃庭堅撰 《山谷全書》正集卷三十一

朝請大夫孫公墓誌銘

故朝請大夫、寶文閣待制、提舉江寧府崇禧觀、上

柱國、華亭縣開國伯、食邑七百戶、賜紫金魚袋孫公、以建中靖國元年十一月二十日卒于高郵之私第。公江都人也、徙家高郵。諱覽、字傳師。治平中舉進士、爲河南縣主簿。稍遷至秘書省著作郎、知開封府尉氏縣。縣多兵屯、而將官與其副以刻治遇之無狀、軍士多欲反者、謀因大閱殺二將潰去。及期、二將微知之、不敢往。民多避之、郭外洶洶。公聞即驚起、家人挽止之不可、遂前者謂曰、將官以刻治若等固有所負、而若等所爲乃負縣官。且若世衣食縣官、而殺其將以逃去、將安之。若等一死固不足惜、獨不念父母妻子從若而死耶。在前者感悟、率其衆再拜就列。二將始至、猶衷甲、公召二將前面數之、顧吏爲奏按治。遂大閱、無敢喧嘩。是日微公徑折其謀、因譙責二將、示以無事。尉氏軍幾叛。神宗皇帝聞之、乃召見、爲司農寺屬官、使利州、湖南、京西路爲監司。官制行、爲尙書左司員外

郎使荆湖南北路。自荆公介甫爲政始治五溪而蠻徭介荆湘桂管之間官兵鎮守勢不能相屬數困擄掠公相視要害增築障塞道荆湘桂管溪峒使相通達兵不留行蠻費大省而患亦息會諫者欲招徠誠州西道胡耳等而辰沅又欲籍蔣波六州徭人爲民公即奏罷之及還見上因極言徽誠內屬當時從事者官過其望雖趣走給使之賤皆欲資蠻以爲官未有已期蠻徭散漫山谷勢不能羣聚說諭招來宜無難者然地不可賦人不可使廣無賦之地籍不使之民而大農之費累百巨萬願界上之郡縣羈縻之不以累中國後有言者惟陛下察之上納用之哲宗皇帝即位累遷爲邊帥以直龍圖閣帥桂管進寶文閣待制帥太原入爲戶部侍郎遂以龍圖閣直學士帥太原太原總四路而嵐石麟府爲邊州麟府又孤居河外寇至輒傳城下自離石絕河而西與秦地延州相望而夏

人據有橫山距河爲塞不得與秦合元豐中嘗攻得葭蘆元祐中棄之及公來議復取葭蘆而其地峻絕澗谷重阻兵不得前夏人聞之以兵數萬屯境上公乃下令須兵滿五萬乃行夏人益遣丁壯就屯而公兵終不出夏人屯旣久涉冬月饑寒輒疾公益修戰備猶不出兵或告敵騎數萬攻嵐石之屯垂敗乞濟師軍吏夜請計事公卧不起及明乃復曰官軍已據便地寇未嘗來也公曰吾固知之矣幕府問公何以知之曰離石塞外無敵帳就欲爲寇非一月不集豈能遽至而不聞乎殆諸將以吾未出兵恐不見寇軍賞輕矣幕府退乃下令具糗糧嚴兵械曰寇將至矣居數日夏人兵十餘萬寇至神堂公厚集其陣以待之兵方接斬數百級獲其酋長數人夏師度不能支遂遁去公曰可矣乃遣王慤折克行將兵出麟府張某王舜臣出嵐石遂城故葭蘆未就寇數萬猝至公按兵不動

而使張世永將輕騎由麟州道出其後擊之。敵前不能進，而後爲世永所擊，遂大敗。卒城葭蘆而還。既退，乃使折克行于津，慶州斬二千級，驅馬牛羊數十萬。使張世永與克行復出龍橫川，斬千級，城寧川。王文振、張某城榆木，而榆木無水泉。有蛇出于南隅，人至蛇所視之，泉如漢湧，遂城榆木。而折可大以兵三千四百踰河入，斬千四百級，寇兵不敢出。乃使世永克行城端正平，文振城烏龍川。烏龍距延安之泉山二十五里，而榆木與米脂直。于是秦晉始合，而寇不得至麟府矣。是時章惇子厚爲宰相，曾布子宣知樞密院，欲遂合兵以取靈武。公曰：「靈武未可取也。」及移書二府，具言靈武非餘力可下。且曰：「靈武之事，曩嘗聞餘議于相君矣，要使陝西不知用兵，而以歲月下之。今返欲速，何也？」二府不聽。公乃上疏論其事。子宣怒，乃曰：「葭蘆之役，嘗使支郡市馬餼畜，是擾也。即以功進樞密直

學士，而以擾奪二職爲寶文閣待制，猶守太原。公上表謝。又曰：「謝語不虔，可謫也。」復褫待制，提舉江寧府崇禧觀。自是數復數奪數年，最後以龍圖閣直學士知渭州，涇原路經略安撫使。時上益厭兵，諸帥稍內徙。子宣欲先事制人，使不言。即爲詔約束諸路固守，慎無以私見撓前功。且令畫知以聞。公方趣州在道，因奏言：「臣去渭久，願至渭徐度所宜。即所建築城堡居要害地，屯戍糧餉可以久矣。則臣固無私見。屯戍糧餉不可以久而建築之城非其要，則臣不敢同衆人而敗國事。」子宣怒，徙公知永興軍，又徙成都。辭不行，奪學士，以待制仍知永興軍。遂謝病請宮觀，得崇禧歸高郵，以疾卒，年五十九。公有兄莘老，仕至龍圖閣直學士，以文學行義爲時儒宗。而公亦以文行進，通達世務，長于吏治，與兄莘老並。莘老平生仕宦，多推所得之恩于族中，而公亦以任子恩官。其從父兄弟三人及



姨之子吳觀。故歷仁、英、神、哲四朝，皆至大官，得名于天下。天下稱賢弟兄者，必曰莘老、傅師焉。然公少以功名自器，遇事輒前，無所凝滯，至辨是非，明當否，可進而退，不可以功名屈。神宗皇帝時，書凡五六上，皆指切事情，究極利害。其言直而不忤，婉而不同，懇至而不迫，直有味之言也。如胡耳、蔣波之議，靈武之疏，涇原在道之奏，雅不爲好事者所喜，而子宣病公。時子宣在右府，邊事悉從中制，人莫敢校，公獨與之辨。嘗移書子宣曰：「二府之居，大臣之傳舍爾，去來其常也，而公欲不去可乎？雖丞相子厚與公稍厚善，至是亦不善焉。爲戶部侍郎，以事至丞相府，謂子厚曰：『公之行事，公乎私乎？子厚作色曰：『何謂也？』公曰：『好惡出于他人，而公爲刑賞以循之，是人嫁怨于公而又賣公也，獨何利乎？子厚不懌。及公駁靈武之議，疏書交上，由是子厚子宣皆以公爲病，此其所以謫而終廢也。曾祖諱

公誠，祖諱再忻。父諱億，太常寺奉禮郎，贈銀青光祿大夫。母元氏，贈河東郡太君。李氏，贈眞寧縣君。王氏，封齊安郡君。子族，潁昌府觀察判官。族以崇寧元年正月十七日葬公于揚州某縣某原，實世墓之次。公之去太原也，端明殿學士林希繼之，以公所取之葭蘆建之爲晉寧軍，而榆木之泉以蛇異，賜名神泉，因使榆木之號，置廟祠于其上。將吏嘗刻石于廟以頌公之烈云。銘曰：

智及之，勇能行之，其行不遲，故人以尉氏之事爲奇。智及之，力能舉之，其舉也時，故人以晉寧之功爲希。謂公不武，晉寧以城，謂公尙武，靈州不行，誠豈爲同？秦晉以通，不行豈異？兵家之貴，以是而庸，以是而廢，以是而功，以是而罪，終焉而無愧。嗚呼，吾傅師之不可不銘也，亦以是。

畢仲游撰 《西臺集》卷一三

徽猷閣待制致仕贈少師諡僖簡莊公墓

誌銘

宣和二年九月壬寅、通奉大夫、徽猷閣待制致仕莊公卒于常州宜興縣之里第。訃聞、天子嗟悼、詔贈光祿大夫、賻之加等。越明年八月某甲子、諸孤奉公葬其縣西南三十里厚山之原。既葬、太常上其狀、尚書諡曰僖簡。又十餘年、其子左朝請大夫安常有秩于朝、累贈公爲少師。于是安常與其宗老謀曰、惟我公以經術起家、顯于朝廷、尊爲士大夫、壽與祉並、官至二品、歿而墓碑未刻、其何以飭來裔。盍求能言者、顯書之、以垂無窮、而寵綏莊氏之祧。乃使來請、藻辭不獲命、則叙公族出官爵、與夫平生之行治而銘之。君諱徽、字君猷、世家揚州之江都。曾祖餘慶、祖允明、皆居鄉稱善人長者。父詢始南渡、徙居于宜興、以公貴、贈通議大夫。通議卒時、有子四人。夫人某氏、賢躬門戶、而縱諸子于學。由是公兄弟三人同時薦于有司、至禮部、獨第

公文爲高等。中元豐二年進士乙科、解褐調主江寧之上元簿。王文公居金陵、四方英雋闐門、公一與之交、而非其人未嘗往、繇是名聲日聞。授安州安陸縣令、縣多彊宗大姓、以侵漁閭里爲能、令不之從、則持其短長以逞。公至、一切以法裁之、諸豪皆怒、合爲飛語撼公、公不爲變。既久、知其不可幸而肆也、皆靡然而服。蔡公確以故相守安、遇僚屬簡嚴、無許可者、獨期公遠大而首薦之。改宣德郎、知單州碭山縣。碭山在窮谷中、地偏民野、公憐其陋而以靜治之、至閱旬無一人訟于庭者。與諸生終日談經義而已。蔣公之奇尹京、辟右軍巡判官、以非其官不就。無何、章丞相惇薦公于上、召對、擢提舉秦鳳路常平。遭成夫人憂、免喪除提舉廣南西路。象山令鄭子淵、妄人也、姍常平新法、連以書抵公、有言及宗廟者、公不敢隱而以聞。上曰、遠方使者能然、茲得人矣。命中書記其名、擢尚書司封



員外郎尋移金部。上以承平久，曹多諉吏，吏緣爲姦，詔左右司取諸郎勤惰各一人殿最之。于是司金號爲冗劇，公課居優，進官一等。力求補外，得提點河北西路刑獄。眞定府判官劉曾錄人陰私爲不法，至郡守監司無敢按之，公悉條具姦贓上之。曾令其子白冤，詔遣臺臣就鞫，無一不如公言者，即抵曾罪。一路聞之，慄然或望風投劾而去。入爲尙書度支員外郎。未幾，除司農少卿。復求補外，除江南西路轉運副使。未行，移兩浙路。公領漕事四年，餽餉爲東南之最，褒賞沓至，賜紫衣金魚，進官者再。明年，除直秘閣。又明年，除太府卿，遂除徽猷閣待制，知興仁府。興仁爲輔郡，四方之戍雜居而屯，頗悍驕難制，前爲守者惴惴然常有意外之憂。公以拊摩彈壓之術，時其緩急而兼用之，會偏裨刻其軍，聲言將爲亂，闔城兇懼。公鈎得其情，取爲首者二人治之，餘置不問，談笑而定。徙知平江府。

郡豪朱勔挾寵張甚，視州縣蔑如。且中貴人緣勔而使者，冠蓋相望，皆能禍福人于牙頰間，官吏無不傾身事之。至郡守亦有出其門者，獨公不少貶。勔輩雖憚公之正，不敢譏，而訖公去，賞亦不及。方勔盛時，造乘輿服御之珍，設官于浙西諸郡。一日，上知其姦利，詔守臣悉罷之。令下，郡人謹呼，而旁郡方遷延幸其必復。公曰：「此天子盛德事也，人臣當奉承之不暇，乃顧望乎？」即日結罷如詔旨。識者皆歎以爲不可及。留平江六年，丐閒，優詔不許。久之，除提舉杭州洞霄宮。公雖七十餘，而彊健敷腴，如五六十許人。人謂公且復起，副明天子所以委任之意。而公已翛然忘世，敕諸子勿以家事相關，築大第荆谿之上，時從賓客徜徉谿山之間而已。以通奉大夫、徽猷閣待制致仕，得年七十八而終。娶吳氏，京口大族，有賢行，封越國夫人。先公十一年卒，祔公而葬。三男：伯曰志行，季曰安上，皆以公



任爲從事郎、亦先後公數年而卒。仲曰安常、擢進士第、爲太常博士、歷持節分符之選、今爲左朝請大夫、主管台州崇道觀。三女、長適左朝散大夫、尙書左司員外郎王岡、次適右承議郎、通判太原府方笈、次適左朝奉大夫、尙書吏部員外郎董將孫男女合十四人。公敦厚高明、遇人無親疏貴賤賢不肖、一本于誠、委曲周旋、惟恐其不至。及于義當爲、則其守確然、雖禍福在前、莫能爲之搖奪。其使秦鳳也、成夫人以遠不能行、公朝夕慕懷、至忘食事。泊執喪、癯瘁骨立、築室冢旁、終喪而後歸。晚年得君、褒擢無虛歲、然居中則請外、居外則請閒、淹速未嘗置于胸中。平生無嗜好、所至左右圖史、簾閣蕭然、故歷官四十餘年、無秋毫之累、以令名始終。少喜釋氏書、晚而彌篤。疾革、呼子孫甥姪至前、人與之訣、無一語之亂、非有得于中者、能如是乎。嗚呼、其賢于人遠矣。藻、公姪婿也、得公之詳、固無

如藻者。銘曰、

在元豐世、英材畢臻。數十年間、國爲有人。以經術進、公當是時。聖考遺我、帝其用之。用公伊何。維德敦厚。學爲人師。材則多有。出入四紀。績皆可書。儒雅飾吏。蓋公之餘。遂升邇聯。出殿藩服。惟皇懋功。非我求福。終始一意。誠于事君。視富與貴。乃如浮雲。浩然而歸。說此眉壽。蟬聯未央。公且有後。松檟岑蔚。與家相望。尙千萬年。記公之藏。

汪藻撰 《浮溪集》卷二六

右通直郎楊君墓誌銘

元祐八年二月戊辰、右通直郎、新通判河中府事、楊君卒于家。其孤若、狀君行、以抵其外兄晁補之而哭曰、若不天、我君志義宜承吾祖後、光大我家、以垂裕我不肖孤。而位與年止此、若念此痛於心。我君嘗言、吾所與游衆、而吾甥知吾志。然則非外兄誰銘。尙慰我不肖孤。補之哭曰、自我爲兒時、從

壽光夫人於外氏舅愛我厚導我於學甚恩竊不自少謂舅才業可任重而迄不偶其敢嫌於戚以沒舅美謹按楊氏系出弘農華陰漢興有喜爲郎騎追項羽初封赤泉侯喜後有寶王莽時不應聘蓋救黃雀山中而夜有童子致白環四云後當出三公如此者寶生震震有令德亦致三鱣之異震生秉秉生賜賜生彪皆忠孝竟四世爲三公如童子言雖其後分裂猶世多大人顯士非他姓比而君諱某字節之世家單州成武自曾祖諱超以上遭五代之亂遁逃不仕祖諱善基始徙濟州任城以學術行義教授其鄉生二子爲郎累贈尙書刑部侍郎而尙書比部郎中贈右朝議大夫諱早君考也幼彊學事親孝慷慨有大志聲聞山東旣冠以經明起家歷畿令州守數決大事疑獄不侮鰥寡不畏彊禦有古循吏風顧喜言兵挽弓至一石平居論議慕班超之爲人近臣亦屢以此言不果

試前夫人鄭氏先沒繼夫人向氏封福昌縣太君而君向出也故以其外祖父龍圖閣直學士傳式恩任郊社齋郎生警悟異甚年十六舉進士以高等薦即知名尤爲吳申江淵諸生進名士所稱文采瞻逸造端立語則破的驚人初調密州諸城主簿再舉進士又首薦不第遂盡屏其少所學益治經考古去華而居實矣諸城劇邑令以病不勝事去君承令乏吏少君君爲晦圭角調聊不遽吏稍縱因微得其宿姦狀盡置諸理一邑大駭時清獻趙公抃方安撫青州亟言君才於朝又以吏事稱再調開封府襄邑縣尉初教保甲君行法不擾而辦歲終以其伍見庭下旂旗弓矢甚整坐作甚習神宗喜又嘗有獲盜功應併賞即擢大理評事諭執政與畿內大邑以觀其能而用他事忤當塗得知眞州六合縣又左遷監荆南府酒轉運使趙鼎提點刑獄事周尹爭薦辟各欲爲己辦事者移監



鄂州都作院、改承事郎。守朱壽昌數移疾、輒以郡政屬君、而幕府熟君名、亦不以爲嫌也。丁福昌憂、免喪、知廬州慎縣。江南俗喜訟、而慎多豪右、率以財陵其里人而屈之、少忤、則使其黨毆藉、或適其陰事于官、無不至。君發其尤無良者一人以徇、訖其去、無復以此至庭者。有吏犯賕、覺而當法、輕君繩之急、吏反賄民、往誣君以事於戶部。君爲不知者、而民詞窮自歸。君諭以誠、釋之。巡檢王軫嬖其親卒、而御其下慘、衆洶洶欲爲亂。軫懼、求解其官去。君曰：「我在、君無恐。」即召軫所嬖、懲之、而諭安其衆。衆不敢動、軫用以全。父老以謂、自皇祐逮元豐、四十年纔兩令、前李處厚、後君也。再知鄆州陽穀縣、政如慎而滋有聲。民以小忿、夜與奴殺田客、獄未竟。會君暫出、其人賂吏求去、奴絕口、因以奴病聞。君已知之、衛奴甚謹、計不得逞。卒伏辜。有殺其鄰之子者、尉視之、類刀傷、而得斧尸旁、不可詰。君

獨陰使人探其簣、得刀而藏之。因語囚、悉上汝家刀。囚數其狀、悉而諱簣中者。君出刀示之曰：「此誰物也而不數？」即叩頭請死。轉運使范鍔每行部至境、輒反其旆曰：「此故慎縣才令、必刃有餘地也。」京東多盜、而陽穀接河朔。君勸民以衣食之本、盜爲衰、囹圄屢空。吏無所措其手、民相與謠曰：「吾邑有難遇事十、今令自爲令一也。」蓋歷數其能、皆聞見所無者。吏雖初不便、君旣束君法、人人幸無過、一反自慶、以謂令保我至此。擢通判河中府、未行、一日會其昆弟族人、飲甚歡、將休、忽坐帷後、瞑不語。家人就呼之、逝矣。享年五十一。歷官宣義郎、宣德郎、右通直郎、勳武騎尉、服五品。娶錢氏、丞相文僖公惟演之孫、而殿中丞曄之女、封樂壽縣君。有淑德、善於舅姑、宜其家。二子、若鄉貢進士、彊記而文、能幹其蠱者也。革少卒。一女未娉。將以某年月日、葬於任城縣千秋鄉千秋里、從朝議公之兆也。君

忠信和裕、孝於親、生事死葬無愧者。敬伯兄猶父、而鞠其嫠妹恩。爲人風儀修整、書畫妍楷、談議脩然。晉王夷甫、衛叔寶之流也。至其居官有守、遇事

剛果、所至人受其惠、則又人不可及者。好書、多所觀覽、而尤善易。於文喜韓愈。嘗道黃州、以所爲詩賦贄眉山蘇公、公歎息爲文美之。上即位之初、上書言時事、大概欲久監司守令之任、考百司課均坊市易、捐牧地租、略已施行。初、補之先君以文詞德義、寬厚愛人有美名、州閭人慕學之。舅以童稚從先君、先君固言舅少成、矧補之壯長、聞見如是、懼不肖、述事不能白、矧曰敢以其昵私舅。詩曰、言念君子、溫其如玉。桃李人且猶蹊其下、如舅玉也、不繚藉以奠諸廟而毀於櫝中、是可以爲求者惜。銘曰、

天固不愛物、不然何以鍾其美而與之、不爲用以屈。物固不自愛、不然何以輕吾寶而喪之、易所徇

於外。爰有至理、是不自期。繫厥所遭、孰知妍媸。彼玉而美、而未始以爲美。珉珞佩爾、而玉亦不自謂其如桃李。嗚呼舅氏。

晁補之撰 《雞肋集》卷六八

范直講祖禹傳

元符元年十月甲午、責授昭州別駕、化州安置范祖禹卒。祖禹字淳甫、成都華陽人。父百之、太常博士。中嘉祐八年進士第、授試校書郎、知資州龍水縣。司馬光辟同編修資治通鑑、授承奉郎、試大理評事。坐考別試所文卷犯仁宗藩邸諱、降遠小差遣。編修君臣事迹、所奏留、遷著作佐郎。官制行、易宣德郎。光得請宮祠居洛、詔以其屬自隨。七年書成、光因上章稱薦、除秘書省正字。哲宗即位、轉承議郎、賜五品服。上疏論喪服之制曰、先王制禮、以君服同於父、皆斬衰三年。蓋恐爲人臣者不以父事其君、以此管乎人情也。自漢以來、不惟人臣無



服而人君遂亦不爲三年之喪。唯國朝自祖宗以來外廷雖用易月之制而宮中寔行三年之喪。且易月之制後世所以難改者以人君自不爲服也。今君上之服已如右典而臣下之禮猶依漢制是以百官有司皆已復其故常容貌衣服無異於行路之人豈人之性如此其薄哉。由上不爲之制禮也。今群臣雖易月而人主實行喪故十二日而小祥期而又小祥二十四日而大祥再期而又大祥。夫練祥不可以有二也。旣以日爲之又以月爲之此理之無據者也。古者再期而大祥中月而禫二者祭之名也非服之色也。今乃爲之慘服三日而後禫此禮之不經者也。旣除服至葬而又服之蓋不可以無服也。祔廟後即吉纔八月耳而遽純吉無所不佩此又禮之無漸者也。易月之制因襲故事已行之禮不可追也。臣愚以爲宜令群臣朝服止如今日而未除衰至期而服之漸除其重者再

期而又服之乃釋衰其餘則君服斯服可也至於禫不必爲之服惟未純吉以至於祥然後無所不佩則三年之制略如古矣。擢右正言時呂公著爲左丞祖禹引嫌力辭改著作佐郎充修神宗皇帝實錄檢討官遂遷著作郎兼侍講上疏太皇太后言今祥禫將終即吉方始服御器用內外一新奢儉之端皆由此始。臣以謂珠璣金玉之飾錦繡纂組之工凡可以蕩心悅目者不宜有加于舊增多于前也。皇帝方嚮儒術親學問睿質日長聖性未定睹奢則奢睹儉則儉凡所以訓導聖德者宜動皆有法不可不慎。若崇儉朴以輔養皇帝之德使目不視靡曼之色耳不聽淫哇之音非禮不言非禮不動則學問日益聖德日隆此宗社無疆之福也。神宗服除故事開樂置宴祖禹上又言君子之於喪服以爲至痛之極不得已而除之若以開樂故特設宴則似除服而慶賀非君子不得已而除

之之意也。請罷開樂宴。唯因事則聽樂。庶合先王禮意。上從之。擢起居舍人。辭不拜。時以夏暑罷講。祖禹又上疏曰。當今之務。莫如學問之爲急。陛下今日學與不學。係天下它日之治亂。臣不敢不盡言也。陛下如好學。則天下之君子皆慕之。願立於朝。以直道事陛下。輔助德業而致太平矣。陛下如不好學。則天下之小人皆動其心。以立於朝。以邪諂事陛下。竊取富貴而專權利矣。君子之得位。欲行其所學也。小人之得位。將濟其所欲也。用君子則治。用小人則亂。君子與小人。皆在陛下心之所召。臣竊爲陛下惜此日月。願以學爲急。召試中書舍人。又辭不拜。遷右諫議大夫。兼寔錄修撰。宰臣蔡確得罪。分司南京。祖禹上言。聖人之道。不過得中。天下之事。不可極意。一時極意。後必有悔。夫用刑。寧失於寬。不可失之於急。寧失之於略。不可失之於詳。自乾興貶丁謂以來。不竄逐大臣六十餘

年。且丁謂現在相位。故朝廷有黨。不可不出。今確已罷相數年。陛下所用多非確黨。其有素懷姦心。爲衆所知者。固不逃於聖鑑。自餘偏見異論者。若皆以爲黨確而逐之。臣恐刑罰之失中。人情之不安也。又因登對。勸上以辨邪正。曰。比年以來。大臣以兼容小人爲寬。好惡不明。邪正不分。所引進者。不盡得人。宰相以退賢進不肖爲職。而邪正不分。豈不負國。伏望戒飭大臣。各以公心求賢。多引鯁正之人。以重朝廷。無使小人得位。爲他日之患。諫官言宰相范純仁營救蔡確。乞行罷免。祖禹上言。議者責純仁政事之失。固宜罷免。當確爲相時。純仁流落在外。不聞受確私恩。純仁之進。本不由確。朝廷有大誅賞。亦容大臣各出所見。議論難以責其盡同也。復除中書舍人。又力辭。朝廷遣戶部郎中往京西會計轉運司財用出入之數。祖禹上言。自來諸路每告乏。朝廷詳酌應副。其餘則責辦于



外計。且既委轉運使副以一路財計、而不信其所言虛寔、必遣郎官、然後可信、是使諸路使者人有不自信之心、每遇闕少、則倚望朝廷遣官會計、愈不自安。欲乞自諸路凡有告乏、專委轉運司會計、保明聞奏。如有不寔、即重行黜責、其誰敢妄。今諸路經費所以不足者、由提刑封樁闕額禁軍請受錢帛斛斗萬數不少。此乃戶部轉運司本分財計、先帝特令封樁以待邊用。今朝廷方務安邊息民、則封樁之法宜悉蠲除。欲乞自熙寧十年初封樁已來、已起發上京及今日已前未起發上京數目、盡以賜尙書戶部、諸路轉運司、以佐經費。疏奏不報。時方遣都水監李偉分導大河入孫邨口歸故道、以解下流之急。偉因欲塞宗城決口、及移深州之費回大河、使歸故道。左相呂大防主其議。祖禹又上疏、極言河無可塞之理、士大夫亦以爲不可塞者十有八九。而偉希合執政、敢肆大言、欺罔朝

廷、不博謀於衆。即依偉奏、水夫欲官興河役、猶邊臣欲生邊事、監官利于功賞俸給、胥吏利于官物、得以爲姦、豪民利于貴售稍草、瀕河之民利於聚衆營爲。凡言回河之利者、率此輩、非爲國家計也。既而遷給事中、猶力言之。及就職、又言、臣所領工房、今河役不息、工費漸大、臣竊謂功必不可成、恐枉費國財民力。朝廷卒從其議。俄聞禁中覓乳媼事、祖禹上疏、力勸上進德愛身。又上疏勸太皇太后保護上躬、言甚切直。既而太皇太后命宰臣呂大防諭祖禹以外議皆虛傳耳。祖禹復上疏、臣所言皇帝進德愛身、宜常以爲戒。太皇太后保護皇帝、安身正心、久遠之慮、亦願因而勿忘。今外議雖虛、亦足爲先事之戒。臣侍從左右、而有聞於道路、實懷私憂。是以不存形迹、不知忌諱、發于誠心愛上、不敢避妄言之罪。凡言事于未然、則誠爲過慮。及其已然、則又無所及。雖言無益。陛下寧受未然

之言、勿使臣等有無及之悔、因聞虛語、以爲寔戒、則四海生靈動植之類、永被其福矣。寔錄書成、轉一官、充國史院修撰、改禮部侍郎。遂進翰林侍講學士、兼知國史院事。又爲翰林學士、兼侍講、充官制所編修官。太皇太后登遐、上親覽庶政、祖禹上言、此乃宋室隆替之本、社稷安危之基、天下治亂之端、生民休戚之始、君子小人消長進退之際、天命人心去就離合之時也。有敢以姦言惑聖聽者、宜明正其罪。旣而外議洶洶、在位者多自引去。祖禹力陳治道之要、古今成敗與夫小人之情狀、反覆激切、冀以感動上意。章累上、不報。因請外、遂以龍圖閣直學士出知陝州。紹聖初、言者論祖禹所修寔錄、詆斥先帝、又附會司馬光變更熙豐法、及妄論乳媪、離間兩宮事、初提舉亳州明道宮、繼責授武安軍節度副使、永州安置。再貶昭州別駕、賀州安置。移賓州、再移化州。卒、年五十八。崇寧間、列

名黨籍。宣和八年、追復徽猷閣待制。建炎二年、追復龍圖閣學士。子冲溫。

《實錄》本傳 《名臣碑傳琬琰之集》下集卷一九

校記

①挺：原作「提」，據《東都事略》卷一〇二改。

②甚：原作「是」，據《宋宰輔編年錄》卷一二改。

③愛：原闕，據《東都事略》卷七七補。



藏 儒

宋儒碑傳集卷七十

陳次升 黃庭堅 尹構 晁端稟 楊所

待制陳公行實

公諱次升、字當時、行第三十、乃十四朝議之次孫、正議大夫之次子。母王氏、二十九娘、東陂人、贈碩人。族處于仙谿龜峰之下。公少小時、庭前有荔枝樹、少熟、公登其上。正議公晝寢、夢有祥龍蜿蜒其上、起而視之、乃公也。正議公心甚喜之、而不自負。方發蒙時、讀書一過、即成誦。及卅角、喜操觚弄墨、出一二語、以爲時輩所印可。長遊鄉校、屢先諸子鳴。嘗月試夜歸、境有神堂祠者、爲一鄉之靈迹。公至其所、忽聞呵聲、曰避待制。公窺之、寂無人迹、乃知神物之顯異也。熙寧六年癸丑、余中榜、賜同進士及第。是時公之伯仲如知縣公次顏、教授公次寵、士曹公次宗、皆力學起家、閭里稱耀。公初調虔之獄掾、虔爲江西劇郡、齊民天性豪悍、動相爭擊、

淹繫囹圄。自公視事、剖決精明、庭無留獄。前此有猾吏鍾四者、盜發官帑、按驗不服。公至、擿其奸狀、即日伏辜。郡將以此喜公、力薦於朝、除和州防禦推官。秩滿、改宣德郎、宰密之安丘。安丘號爲難治、前宰以失職去官、時州從事攝政。及公下車、從事道告公、以此邦獄訟最繁、當斥大獄宇。公曰、子何不教我以無刑、乃教我廣獄耶。卒不聽。公一綰縣章、以忠和愷悌爲政、民訟于庭者、案牘相銜、公以理開曉之、皆心服而去。踰月、從事行縣而囹圄空、於是歎服。元豐七年甲子、移英州簽判、適神祖末年、深厭新法之爲民病、寤寐英才、未赴。上間有旨促公到闕、召對便殿、上首問公以卿自外來、知朝廷青苗、免役等法、民安之否。公條疏其利病、且曰、聞陛下既然悔悟之意、遠方之民日有生氣。上首肯之。得旨與監察御史。公一入臺、糾察庶務、振刷宏綱、風采凜然、權貴禡氣。上嘗以諸路監司責任不



輕朝廷當考其煩急培克與弛慢者議遣使按察會上晏駕不果元豐八年二聖臨御體先帝遺意四月遣公按察江南西路公即駕輶車一入其境百姓遮道陳訴官司抑配買鹽之弊公遂檄州縣即爲那移均減回奏漕臣蹇序辰父子虛張鹽額勒令承買煩勞州縣欺罔朝廷時正言王公覲亦論列之蹇序辰父子鐫降有差五月遣公按察提舉荆湖元祐更化公乃還朝供職二月司馬文正公當軸登用正人一時名流如劉摯蘇轍范純仁王岩叟等並居言路公之挺直不減諸公而和平溫雅過之公以幸遭明時言事無隱初保甲之行貧民苦於冬校元豐末詔府界三路或家止有一丁病患未該破丁者及第五等以下土地不及二十畝者並免至是有衝改其法公上疏力爭乞依元豐八年旨揮以安存貧下老弱之民王文公用事之日獻利之臣惟務培克上供之外別置封樁

錢皆溢數以取於民公皆乞罷之又乞張官置局許之訴理庶用法過當事涉冤抑者皆得伸雪無非切中時病未幾九月文正公即世諸賢已有相攻之隙公乃力丐外補十月得誥提點淮南刑獄公去國未踰月而朋黨之事起矣公雖自中補外處之泰然有部吏者初公微時宰邑僊遊嘗與公有隙及公之來負慙求去公曰吾不以私廢公子盡心民事可也既而薦以剡章其人益感愧且服公之德量用及一年易節詳刑淮東時諸道監司奏課惟公爲最到闕除兵部員外郎就職甫月餘丁內外艱公自中都扶櫬歸里雖寒月而扉屨不輒免服之日不肯赴闕有旨促公至則除刑部員外郎公明練典章雖老吏莫肆其姦巧律令格式爲之一正八月遣公提點荆湖荆獄公元豐間司按察日已熟識一方之利病至則首舉行之吏民相安惟恐其去紹聖二年再除監察御史時參用

熙豐舊黨、善類繼引去。公處群小之中、挺然特立、每朝廷有政事、輒慷慨力爭。上嘗欲幸金明池、所造龍船極工巧、言千金之子不垂堂、百金之子不倚衡。聖主不乘危、不徼幸。又言陛下勤儉過於夏禹、有司不能宣明德意、所造之舟其費不貲、游幸之日、天乃大風、豈非愛佑陛下而使覺悟乎。上嘉納焉。閱月、除殿中侍御史、勸上收威福之柄、反覆數百言。仍奏臺諫官當出聖選、如近日監察御史三人闕、命翰林學士、御史中丞共薦三人、所召者二人而已、未審出於陛下之意、或出於宰相之私。若出執政近臣、豈能免天下之議。此源若開、臣恐異日臺諫阿輔權臣、而負陛下矣。今後若近臣薦舉、並須召對、視其人才去取、出於聖斷。又言爲治之道、莫先乎用人。用人之要、莫大乎辨邪正。何謂正、知君父爲尊、而不麗於權要、所謂正人也。何謂邪、執政之所惡、則從而擠之、執政之所喜、則從而

譽之、不顧公議、惟執私恩、所謂邪也。故古之聖王、以治道爲本、在於進退人材。進退人材、乃人主作福作盛者也。故邪必去之、而天下所共棄、賢必任之、而天下所共喜。今朝廷除命一下、縉紳必相謂曰、若非權貴之親、則門下之士。或一年之間、屢進論其人、則無可稱之善。或陛下之所黜、而擢用愈速。姦佞貪污、因人所論、其進益銳。如此則豈足以盡天下之公議哉。望聖慈收還威福之柄。進賢在於必果、無爲奸人所移。黜邪在於勿疑、無爲朋黨所庇。時禁中失火、公言災異之來必有所因、自古聖王德雖甚盛、世雖甚治、必恐懼修省、祇肅天戒。故祖宗以來、聖德可謂盛矣、治具可謂修矣、每遇變異、常恐其不逮、內則小心以求諸己、外則下詔以求直言、伏望聖慈追而行之、上答天變、下達民情。儻愚者之言、或有一得、庶幾聖政有補萬分。又因星變上疏曰、自古有道德之君、天必愛佑之、時



出變異、以警戒之。竊聞陛下謙冲退讓、下詔損常膳、避正殿、罷秋宴、求直言、此盛德之舉、社稷之福也。然考之故事、先朝有星變、必須頒赦恩、以滌幽枉。臣欲乞斷自聖衷施行、庶使變異自消、福祥自至。時大臣摺摭舊事、增過元祐臣僚。適汪洙、李仲等送吏部、與合入差遣。錄黃行下、以元祐間所獻文字得罪。公言紹聖元年責降呂大防等、節文有其餘、一切不問之語。今汪洙等以上書得罪、則前者勅榜殆成虛文、豈不有傷國體。繼又差官置局、編排元祐章疏。公言臣近奏乞宣諭大臣遵守、勅榜未施行間、今欲以人言之失、致之有過之地、則初年詔令嘗許自新、適所以悞天下。疏入不報。三年十月、侍講官常立上殿、公奏謂立嘗以父秩行狀申國史院、盛譽安石、詆誣先帝、驚庸肆爲無狀。以大臣親昵、私相薦引、特乞黜責、以警官邪。秘書省周穉除著作佐郎。公奏謂館閣所待天下之英

才、人才之所先者、莫先於履行。穉之履行無取、朝廷進用甚速、豈能厭服人心。凡十上章、乃罷穉職。初、蘇頌罷相、來之邵言、鄒浩交結頌之子弟、躡遷博士、朝廷以浩教授襄州。公言浩學問該博、行義修明、言者附會、權臣妄有彈擊。命下之日、縉紳咸以爲冤。今朝廷公明、宜在昭雪、特乞改正、以副輿論。左正言孫諤以爭役法不合、左遷軍壘。公言免役之法、實欲便民、諫官以言爲職、既有見聞、必須上達。其言儻是、則當聽納。其言或失、亦在曲全、以示朝廷之容德也。三年十二月、擢左司諫。時章蔡以公乃神廟親擢、元祐間多持節在外、未嘗顯用、謂公必怨望。紹聖初、特除言官、欲其出力排元祐舊人、以爲己助。公至、則首論勅榜反覆、繼論周穉、常立等、自此章、蔡始不悅。嘗令太府卿林顏致誠、惴於公曰、昨自湖外來、復登憲府、皆己之力。苟相助、何患不得美官。公曰、某知守官而已、不知其他。

公爲卿監、乃爲宰執傳風旨耶。顏愧而去。章、蔡益卿公、屢於上前媒孽其短、賴上知公朴忠、計卒不行。會朔方河潰、民移、大臣欲乘間出公總漕計、進呈謂非陳某不可。上顧徐曰、一轉運之才何難得、陳某敢言、不當令去左右。數日、公乞罷臺職。章上御筆親擢、可除左司諫、公力辭不就。適曾布奏事上前、上因語之曰、朕除陳某諫官、廷議何如。布奏皆謂陛下得人。上曰、尙未肯就職。公知眷注之隆、遂受命登對。方造膝、上遽曰、久不聞卿讜論。公再乞避言路。上曰、朕親擢卿、復何辭。公益感厲自奮。時姦人擠陷忠良、肆行謗毀、欲盡寘元祐臣僚於死地、朝論藉藉、上亦疑之。因公奏對、上顧問近日朝廷有何議論。公遂奏曰、臣聞小人橫議搖動宣仁徽號、如臣所聞、宣仁保佑聖躬、終始無間。若姦臣疵毀、輒有議論、不惟有虧聖孝、且失人心。上竦然曰、卿何從得。公曰、臣職許風聞、苟有所聞、當以

忠告、陛下不當詰臣所從來、願勿聽銷骨之謗。上首領之者再。元符改元、京等興同文館獄、竟不得其要領、乃更遣呂升卿、董必使嶺外、欲盡殺元祐黨人。公聞之、亟見上、奏曰、陛下初欲保全元祐臣僚、今乃欲殺之、何耶。上曰、無之無之、卿何爲出此語。公曰、以升卿爲廣南按察、豈非殺之耶。升卿乃惠卿之弟、元祐間負罪家居、其人資性慘刻、善求人過。今使擁使節、元祐臣僚遷謫之地、理無全者。上翻然大悟、即日罷升卿按察職。元城劉公安世聞之、曰、陳當時有功於元祐、人居多。瑤華獄起、一時諫官皆規避不敢言、如王山子客問之作、田承君墨子之詩、皆諷有言責者之默默也。公獨氣槩挺挺、鼎鑊不避。上疏乞寬掖廷、廷獄寢。華陽之封、二疏之入、人皆危之、而公獨凜然辨、果不勝。而中宮將以有建立、適濟陰郡王宗景以侍姬楊氏爲正室、公上疏力爭、言多激烈、蓋陰諷焉。上雖采公



之言、罷宗景、黜楊氏、而建立之意已不可回。會一日奏大理觀望、多致濫獄、蓋詆章、蔡之苛刻也。上問大臣曰、陳某言觀望者何。卞奏謂觀望陛下以激怒耳。上默然。又以嘗劾章惇、奏入不報。一日陛對、上謂公曰、章惇文字勿令絕了。公唯唯而退。出告王鞏、鞏謂公曰、胡不曰上云臣任耳目之官、帝王猶心也。心所不知、故耳目爲之傳達。心若自知、何用耳目。陛下既知惇、胡不罷斥、更須臣等文字。公後數日再對、上語及惇、公如鞏所言對。上曰、未有代惇者。於是惇等抵戲求罅、無所不至、而掖廷愈欲公去。二年五月、貶全州酒稅、制詔有陳某元祐中所上章疏、詆毀先政、朕嘗含容其過、庶使自新、復敢狃習故態、觀望言事之語。上以湖南地遠、當遷江南、章、蔡遂移公南安軍。南安地鄰梅嶺、瘴癘之鄉、上初不知。及謝表至、上始悟焉。將舉移、而上已大慚矣。徽廟入繼大統、登用正人、詔起公知

廣德軍。四月、降制書曰、勅知廣德軍陳某、朕收集忠良、布在言路、而臺端處位、未稱朕意。爲國司直、爾惟其人。惟爾敦厚清明、屢膺耳目之寄。有聞必告、處人所難。朕惟汝嘉起自謫籍、處以橫楊、使參中司、推爾平日之心、爲予初政之助。事有不當於理、臣有不協于極、悉竟抗論、副予虛懷、可侍御史。公既至、上以公歸自嶺海、問勞再三。公退而上六事、凡數千言。一曰法天、二曰稽古、三曰修身、四曰仁民、五曰崇儉、六曰用人。上俞允之。元祐中、詔修神宗實錄。至紹聖中、曾布、阿章、惇、蔡之旨、上言謂神廟實錄司馬光等記事不實、乞用王安石手自編寫奏對日錄、進入重修。左司諫陳瓘爲尊堯集、以獻、力辨其非、不賜施行。至是、公上疏爭之、且言神考一朝大典、儻容史官任其私意、紊亂事實、何以彰聖孝之至。凡四上章。時陳瓘、鄒浩、龔夬等同在言路、天下拭目新政。公等尤以指斥姦臣、薦引

善類爲任。九月、公言章惇自登揆政、任私言公奉使山陵、措置乖謬。於是惇乞罷政。公又率同僚陳師錫、陳瓘等言惇包藏陰謀、助尊私史、擅興軍旅、妄詆宗廟數事。惇逐有潭州之命。公又言貶竄太輕、未快輿論。又上疏論列之。惇由是遠謫雷州。先是諫官言京卞兄弟同惡相濟、迷朝誤國、宜正典刑。於是謫居太平。京出守江寧。公至是又言蔡卞備位政府、肆行姦謀、竊弄賞罰、私報恩讎。時人曰：爲笑面夜叉。今又分務、仍居善地、何以懲奸。尋移卞池州。公言池與太平乃是鄰壤、罪大罰輕、未愜衆議。又言奸邪凶險、陰害善良、呼吸群小、交通內外。今寵以端殿、委之帥府、委是失刑。尋罷京職名。又言京親昵閹宦、漏泄宮禁、原情麗辟、宜即投荒。京由是提舉洞霄宮。河北轉運使張商英不候朝旨、開臨河界沙河、虛費人力、三十村之民不可復耕。公乞罷役、且正其罪。商英落職、知隨州。錢遹除

殿中侍御史、公言錢遹假曾肇之名、爲一豪戶撰墓誌。又假肇書、受豪戶金、有無未白。肇今爲翰林學士、可問而知。若果有之、盜詐之人、豈可以任天子耳目之官。及親聞德音、謂其假肇名爲父撰墓誌銘。撰銘若無利害、尙爾欺詐。若論列朝政利害、有大於此者、能保其勿欺乎。後章再上、適竟罷臺職。蹇序辰以龍圖閣待制知揚州、公言序辰紹聖初以蔡卞引援寔在都司、日游章惇之門、肆爲蠱毒。時安燾爲門下侍郎、持論端正、惇甚惡之。序辰陰蓄奸謀、乃令王厚造爲謗言、惇則乞起大獄、名爲取問、更不審錄。安燾遂罷執政、王震亦以罪逐。兼序辰又以元祐理訴爲非、毀入劄、乞看詳責降。乃令安惇請其事、自後緣訴理被禍者七八百人、衣冠塗炭、莫此爲甚。今尙居從班、承流藩府、伏望特行黜責。序辰由是除名、放歸田里。賈種民除直龍圖閣、陝西轉運使、公言種民自領清汴職事、所



辟官十餘員、所役兵夫至百萬、增築狹水堰、月河、但爲舟船之害、並無分毫所利。朝廷灼見實狹水堰、遂行毀拆、月河存而不用。今聞不住移文修築、及造天漢等橋、費用不貲、輒行下州縣。自清汴以來、沿路稅務收到稅錢、並令撥還清河司、州縣苦之。兼所領在京茶場所收之息、未見實數、而洛口沿汴河兵士任意差使、恣橫違法、略無忌憚。乞罷種民職事、仍付有司、根磨洛口及清汴司茶場處財物、務要的確以公言。竊惟陛下紹天明命、入繼大統、發謀定策、盡出皇太后獨斷。國勢已定、章惇猶肆異論、曾布許將當日皆在簾下、不聞一言、先斷大義。今命於布則曰與參顧命、於將則曰獲參顧命。若不改正、傳之萬世、布等掠定策之美名、掩太母之盛德、其累非細。宦者梁從政當議立之初、與章惇異論、至是已落省職、降官宮觀。公奏謂國家宗廟至重、方其危疑之際、輒敢交通宰執、肆行

姦謀、將不利於聖躬。念其嘗於神宗有攀附之故、猶當貶竄。御藥閤守懃奏事上前、內侍裴彥臣以手敲守懃幞頭、高聲道曰、莫錯斬人、莫錯斬人。公奏彥臣敢於御前肆爲不敬、無人臣之禮、罪不容赦。凡四言之。彥臣遂斥荒外。以至張琳、郝隨之姦狡、李侁、劉瑗之凌侮、公皆極力彈擊之。建中靖國改元、擢司大諫。時章、蔡雖已去國、而韓忠彥之弱不足以勝曾布之姦、薦引除授、多任己意。司諫陳謩言皇太后已復辟、而猶預政、出守泰州。公言謩以風聞論事、偶有失實、祇緣京等肆其奸詐、僥倖進用、唱爲此言、脅嚇臺諫。謩既聞之、遂具論奏。言雖過當、本實爲國。今大奸既逐、罪人斯得、謩之功也、宜在可賞。伏望特賜召還、獎進言路。續又上皇太后書、且言謩之言、乃得於傳播之妄、烏可爲盛德之累。欲望不以謩之言爲念、而以來忠讜、安社稷爲心。秘書少監鄧洵武同修國史、公言昨以洵

武爲史院檢討、朝廷謂之不可、遂行寢罷。今又有此差除、命令反覆如此、何以明是非別賢否。況洵武父綰、昔爲御史中丞、爲王安石求賜第、薦其子雱及婿蔡卞館職。神宗察見底裏、親批聖語云、持心頗僻、賦性回邪、論事薦人、不循分守。今洵武豈能公心直筆、以發揮神考之盛德。梁子美除京西轉運使、公言子美天資險刻、善於交結。頃緣章惇故擢使湖外。紹聖間、責官在所部者均被凌虐。陛下親政之初、是時與子美同惡之人如張景溫、董必等皆蒙罷黜、子美幸免。又除府界提點、士論扼腕。近除省郎、中舍人鄒浩激駁、特行寢罷、人以爲當。曾未踰月、又有此差除。朝廷除授如此、何以信服天下。人言右僕射曾布性稟姦邪、心懷凶險、自登宰席、獨擅國權、如移臺諫一事、可爲寒心。欲特乞正布之典刑、以謝天下。章凡十上、而布巧於固位。八月、公出使契丹、及境、接伴使來、公設席用蒼

株、使人不受、公而不撤、沿路多不遵故事。但曰、今新主也、公一切卞正之。及就館、以李儼立卞用蒼之禮、且曰、南朝亦在亮陰中。公曰、本朝故曰虞主、祔廟。後百官吉服、惟不聽樂。儼曰、花、樂相須。旣不聽樂、何故用花。公曰、嘗聞三載、四海遏密八音、未嘗禁花。虜詞屈、就席如禮。仍告公曰、道宗皇帝廷試進士賦、嘗以南北永敦信誓爲題、如聞近日求爲釁端、是否。公曰、祖宗盟好、誠貫白日、兩朝赤子之福也。崇寧元年、還國。公出使之十一月、曾布進紹述之說、於是上決意用京。使還之日、京之黨與布滿津要、公雖得旨試給事中、而力莫回天矣。四月、以寶文閣待制出知潁昌府。京等姦言治至、降公充集賢院修撰、而吳材、王能甫尙肆醜詆、言公元祐初、擅欲取先朝約束紛更之。於是遣使四方、而適當江西首唱異議、以致惑流俗、依憑群枉、幸其時變、附會姦臣、幾竊名位。遂落公集賢殿修撰、



知萊州。是時京等報復私怨、紛紛不已。十月、論欲廢元符后罪、以公嘗上書之故。任伯雨、張廷堅等並罷黜、而公罷居濠州。十一月、論元符末變更法度爲元祐者罪、周常等二十八人並責罰、而公自濠州移臨江軍。十二月、論棄湟州罪、以公嘗論可棄可守之策、蔣之奇等十人並鑄降、而公復除名、建昌軍居住。二年正月、中書省檢會前諫官陳謩、鄒浩等十三人、曾入章疏詆毀先朝者、並編管廣南諸州、而公貶循州。先蘇公子由亦貶其所、公繼之、頗能淡而無愧、暇日則幅巾藜杖、詩酒自娛、雖居瘴雨蠻烟之地、而草石溫劑、未嘗過而問焉。二公旣去、邦人即其嘗遊玩之地爲堂祠之、名曰蘇陳堂、又有台隱堂、至今循民崇奉之惟謹。四年、京等藉元祐黨人司馬光、蘇軾、秦觀等姓名、立碑於文德殿之東。後上因天變、彗星出西方、長竟天、慨然悔悟、特加英斷、命毀石刻碑、應元祐、元符間黨

人以次序復。公朝奉大夫、知漳州。京等復用力詆毀、以知江南府、徐勣知虔州、郭知章知福州。朱紱與公皆元祐姦朋、詆誣宗廟、今任牧守、豈能奉行法令、體朝廷紹述之意、遂差公提舉明道宮。大觀四年十一月、蔡京罷相。十二月、復公集賢殿修撰。政和八年、復寶文閣待制。宣和元年、上章告老。續上遺表、終于私第。訃聞、特贈太中大夫。公有行狀一集、讜論一集、見傳於世。公甲申九月癸酉日甲寅時生、己亥三月十五日卒、享年七十有六。娶朝請大夫郭師愈之女、吉州人、封令人。再娶李氏、十娘、開封人。七男一女。男曰文伯、曰安仁、早世。曰安義、湖州長興縣尉。曰安禮、承奉郎。曰安強、承事郎。次二人、早亡。女一人、適通直郎、邵武軍判官林顏、姪一人、曰安國、朝奉郎致仕、乃公郊奏補。孫三人、曰永年、迪功郎、初任越州簿尉、再任楚州司理、兵曹長子。曰永世、宣教郎、知臨江軍清江縣、兵曹

次子。曰永思、迪功郎、吉州廬陵縣尉、兵曹第三子。姪孫三人。曰永言、廉州石廉縣尉、十三提幹是也。曰大年、初任監泉州石井鎮、後任福州永福知縣、十四知縣是也。曰利賓、修職郎、德慶府瀧水縣丞、十九通直是也。公生穎悟、雅有大志。方爲兒時、已嶄然見頭角、衆皆知陳氏。右待制、諫議大夫陳公奏議二百七篇、總二十卷、取哲廟聖語、標曰讜論。其出處大致、公猶子南安丞安國序于編端、爲甚詳。僕竊悲公之直道不得行、而當時國事可爲流涕而長太息也。公受知裕陵、自外僚召對闕庭、遂除臺察。泰陵初政、繇荆湖持節歸、復官如初。其前後論列、凜有風采。屬諸賢相攻、力丐補外。紹元間、旣入復出、柄國者嘗遣所密諭意、而公執論不渝。迨徽廟繼統、超公謫藉中、再登大坡、遂彈曾布、劾章惇、攻二蔡、章各數十上、是以狙輩切齒、譁然而攻者不少緩。夫何公遭遇三聖之厚、而獨不爲群

小所容、蓋一士之謬謬、不能勝衆口之狺狺、至使一墮瘴鄉、終不復入修門、豈非公之直道不得行而大可悲也歟。雖然、元祐之初、使司馬丞相未即死、章蔡未至大用、未必局面一變而爲紹聖。建中之後、使元長終於奉祠、不復召還、公與瑩中志完、二三正人在朝、亦未必局面再變而爲宣和。繇是言之、豈非當時國事可爲流涕而長太息也歟。嗚呼、小人之得志於一時、靡所不至、其詆誣諸君子、皆指爲姦黨。及公論旣定、向之流落嶺海者皆名香史籍、回視前日之小人爲世唾罵、曾狗彘之不如。又孰榮孰悴、孰得孰失哉。昔蘇文忠公序田表聖奏議、以古遺直許之。公與文忠皆元祐黨人、氣節大略相似。使文忠及見是編、不獨稱之曰遺直、當爲擊節三嘆云。時泰定甲子新元夏五、紫蓋山逸民陳士壯則中再拜手敬書于泌山希點精舍。

豫章先生傳附史贊①

豫章先生諱庭堅、字魯直、姓黃氏。其先婺之金華人。六世祖瞻、以策干江南、用爲著作佐郎、知洪州分寧縣。瞻生玘、玘生元吉、元吉始卜築修水上、葬兩世於山中、遂占數焉。元吉生中理、贈光祿卿。中理生湜、贈朝散大夫。湜生庶、嘗攝康州、贈中大夫、公之皇考也。公幼警悟、讀書五行俱下、數過輒憶、康州奇之。旣孤、從舅尙書李公公擇學。公擇嘗過家塾、見其書帙紛錯、因亂抽架上書問之、無不通、大驚、以爲一日千里也。治平中、兩首鄉薦、遂登四年第、調汝州葉縣尉。熙寧中、詔舉四京學官、有司考其文章優等、遂除大名府國子監教授。留守太師文公才之、留再任。用薦者改著作佐郎。先是眉山蘇公子瞻見公詩於孫公莘老家、絕嘆、以爲世久無此作矣、因以詩往來。會蘇公以詩抵罪、公亦罰金、直委知吉州太和縣、改授宣德郎。太和號難

治、公以平易近民、民亦不忍欺。會頒鹽策、諸邑爭授多數、獨公平平耳。大吏不悅、而民安之。到官年餘、移監德州德平鎮。公奉佛最謹、過泗州僧伽塔、遂作發願文、痛戒酒色與肉食、但朝粥午飯、如浮屠法。時元豐七年三月也。序遷奉議郎。哲宗即位、轉承議郎、賜五品服、乃以秘書省校書郎召入館。未幾、除修神宗實錄院檢討官、集賢校理。逾年、除秘書省著作佐郎。朝廷數議除美官、爲言事者所梗、不果。又遷朝奉郎。遇郊當任子、舍其子而官其兄之子。實錄書成、當進一官、丐回授母夫人李朝廷從之。遂君安康郡。公事母孝、有曾、閔之行。安康卧疾彌年、公晝夜視顏色、手湯劑、衣不解帶、時其疾痛痾痒、而敬抑搔之、至親滌廁牕、浣中裙云。遭母喪、哀毀過人、得疾幾殆。旣還葬、因廬墓側終喪。先是、蘇公嘗薦公自代、其略曰、瑰瑋之文、妙絕當世。孝友之行、追配古人。世以爲實錄云。服除、除秘



書丞集賢校理同修國史。辭疾乞守太平。除宣。又改鄂。未幾管勾亳州明道宮。紹聖初議者言神宗實錄多誣失實召至陳留問狀三問皆以實對。謫授涪州別駕黔州安置。命下左右或泣公色自若。投牀大鼾。即日上道。君子是以知公不以得喪休戚芥蒂其中也。至黔寓開元寺摩圍閣以登覽文墨自娛。若無遷謫意。俄以外兄作本路常平官避嫌移戎州公一不以介意。與後生講學孜孜不怠。兩川人士爭從之游。經公指授下筆皆有可觀。今上登極復宣德郎監鄂州在城鹽稅。改奉議郎。簽書寧國軍節度判官。改朝奉郎。知舒州。又召以爲吏部員外郎。辭疾不拜。上章乞郡。得知太平州。到官九日而罷。管勾洪州玉隆觀。寓居江夏。公風韻洒落胸中恢疏初無怨恩談笑諧謔或以忤物。蓋嘗忤趙丞相正夫而公不屑也。公往嘗作荊州承天院塔記轉運判官陳舉承風旨採摘其間數語。

以爲幸災謗國遂除名編隸宜州。雖被橫逆未嘗一語尤之。浩然自得也。崇寧四年九月三十日卒於宜州寓居年六十有一。大觀三年十一月歸葬雙井祖塋之西。元配孫氏莘老之女封蘭溪縣君。後配謝氏師厚之女封介休縣君。一男曰相一女曰睦嫁將仕郎舒城李文伯。公學問文章天然成性落筆妙天下。元祐中眉山蘇公號文章伯當是時公與高郵秦少游宛丘張文潛濟源晁无咎皆游其門以文相高號四學士。一文一詩出人爭傳誦之紙價爲高。而公之文尤絕出高妙追古冠今燭後輝前。晚節位益黜名益高世以配眉山蘇公謂之蘇黃。公嘗游潯皖樂山谷寺石牛洞之林泉因自號山谷老人天下皆稱曰山谷而不名字之以配東坡云。公楷法妍媚自成一家游荊州得石本蘭亭愛翫之不去手因悟古人用筆意作小楷日進曰他日當有知我者。草書尤奇偉。公沒後人

爭購其字一紙千金云。

史贊曰、自李杜沒而詩律衰、唐末以及五季雖有以比興自名者、然格下氣弱、么麼骯髒、無以議爲也。宋興、楊文公始以文章蒞盟、然至爲詩、專以李義山爲宗、以漁獵掇拾爲博、以儷花鬪果爲工、號稱崑崙體、嫣然華靡、而氣骨不存。嘉祐以來、歐公稱太白爲絕倡、王文公推少陵爲高作、而詩格大變。高風之所扇、作者間出、班班可述矣。元祐間、蘇黃並出、以碩學宏才、鼓行士林、引筆行墨、追古人而與之俱。世謂李杜歌詩高妙、而文章不稱。李翱皇甫湜古文典雅、而詩獨不傳。惟二公不然、可謂兼之矣。然世之論文者、必宗東坡、言詩者必右山谷、其然、豈其然乎。山谷自黔州以後、句法尤高、筆勢放縱、實天下之奇作。宋興以來、一人而已。

《文獻通考·經籍》六三《黃魯直豫章集》條

尹判官墓誌銘

君姓尹氏、諱構^②、字嗣復、師魯第三子也。師魯諱洙、師魯其字也、以道德文章、名重天下、天下之人識與不識、皆稱曰師魯。自大父以上、官諱族系、韓魏公表師魯之墓書之詳矣。慶曆七年、先君文正公守南陽、時予侍行、師魯自鄖鄉輿疾而來、託先公以後事、予得省疾於卧內。見嬰兒扶牀、方二三歲、眉宇秀爽、師魯指謂予曰、此吾兒也。予始識君、而愛其神俊異常。又念師魯之積善、必謂其遠大不可量也。後十二年、方見於許昌、方十五歲、舉止談論、已如成人。予自謂所期、果不妄矣。又十六年、忽聞君之訃、驚歎自失、迺知天理人事之難必、而心深痛大賢之失其後也。君初以翰林諸公薦名、臣之後、特恩補太廟齋郎。年未應調、魏公奏爲相州安陽縣主簿、黠吏易君少而爲姦、君得其情、皆按以法、一邑驚服。魏公鎮大名、復辟監倉草場、秩滿調泗州觀察判官。未行、以熙寧八年六月十四日



儒藏

卒於許昌之長葛縣。享年三十有一。君天資英爽，讀書一覽輒不忘，未冠已與老成長者游。爲文章，下筆即成，不加點竄。善談論，有時揚摧古今，一坐皆傾聽。英宗初即位，魏公以顧命元勳，求解機務，上不之許。魏公未敢堅去。君上書於魏公曰：「功成身退，乃天之道。公今眷眷君臣之契，不忍訣去，而久持大權，讒嫉者衆，將有媒孽之巧，伺隙而進，一旦禍機潛發，令名不終，則公將噬臍，悔何及也。」魏公嗟賞之，曰：「真有父風。」後魏公得請外鎮，蓋用其言。性至孝，十歲持母喪，哀棘如禮，見者嗟歎。爲人眞率，不事矯飾。於財利爵祿，未嘗屑意。待人無城府，受朋友規切，竦然聽從。朋友之過，亦必忠告。人有厄窮，務竭力拯救，以是人樂與之游。當官論事，直伸其理，未嘗少屈。相守尙威嚴，事有不便，他吏不敢白。君曰：「苟容畏事，以遂上官之失，豈士人之行耶？」獨往辯正其事，守亦納之，更爲薦舉。公卿大

夫薦其才者，凡十餘人。娶李氏，予舅氏司農少卿諱禹卿之女，生一子照，尙幼。其猶子煥奉君之喪，以元豐七年正月二十一日，葬於河南府壽安縣甘泉鄉龕澗里先營之次，而求銘於予。爲之銘曰：「騏驥爲駒，骨相不群。豫章發地，勢凌青雲。嗣復在幼，星眸貝齒。爽如秋隼，一翥千里。未冠能文，擺落塵腐。大節可觀，不屑細故。才長命短，器遠位踟。欲奮而萎，壯年就木。秀而不實，聖人有言。積善餘慶，經豈徒云。君躬弗蒙，宜在後昆。勒辭於石，終古其存。」

范純仁撰 《范忠宣公集》卷一五

寂默居士晁君墓表

寂默居士晁氏諱端稟，字大受，居開封之昭德坊。太子少保文元公曾祖也。給事中參知政事文莊公祖也。其世家爵里，謚諱詳於國史。文莊生祠部員外郎秘閣校理諱仲衍，校理生居士。居士世胄



蟬聯、非少長山林人、且有盛名場屋間、嘗爲參佐州郡、令大縣矣、卒不用以沒。寂默云者、蓋嘗以此自名、而未嘗以此語人。補之曰、道隱於小成、言隱於榮華。道之不明也、言之不行也、以夫小成榮華者、隱之也。寂默而道與言顯矣。無成與虧、故昭氏之不鼓琴也。居士曰、吾琴故未嘗鼓、吾何虧。其族人之知居士、與其交游而厚者、則皆相勸、號之以寂默、以實居士嘗有志於時、不遭而爲此也。居士七歲、奇警過常兒、絕遠見而名聞、而識二十歲而盡授六經百家說、又雜取他類書小說叢脞、人不勝覽者、皆成誦於口、用以自娛。爲文詞捷敏、如水就下、駭耳行遠、干將立斷、無肯綮者。旁睨其同學兒、方濡墨蹙頰、如拾瀋、如憶昨夢、不可得、而居士已四顧滿意、寫紙腹背欲盡矣。用此蚤有名譽。熙寧中、與補之同試開封、嘗暫出謁客。客壁間石刻合序千言、蓋手詔賜史臣者。居士曰、能一再過誦

乎。則俱默讀。居士曰、誦矣。某曰、亦誦矣。偕誦偕止、而居士盡習、補之遺二字焉。無幾何、居士舉詞賦爲開封第一。主司駭其策豪贍異、聞難字非他時舉子比、展其卷堂上、自屏及陞、紙窮、顧相詫曰、盡識此、可以爲三千士先登矣。然是歲屈於禮部。又三年、始以經術第進士。意不自得、欲從制舉。曰、此吾漢大夫之世科也。時王湖州石父亦制舉、喜根持論氣豪、老師宿儒少所屈、然獨厚居士。居士數從石父道往古、石父通洽、猶自爲不及居士博也。石父因以直言舉勸之、而居士故倦遊、不復萌意、亦會其科廢云。爲人和裕明白、不作畛域藏覆、言辯濬發、有所作、意必先人。外視之類欲速者、而中平夷、實與事闊也。又事母潁川夫人孝、重去左右。兩從伯兄使淮、浙、居閑不調者十年。愛西湖、琅邪山水、曰、是可以忘老。有詩數十百首、至今傳杭、滌間。善爲長歌、怪處似玉川子、平處似香山居士。至

雜文數千言、叙事極古今得失之辯、則唐人獨以詩名如郊、島者、不能逮也。文莊齊安夫人、宰相王祁公之姑。初、王公之自舒來、貢於禮部也、猶少、出入姑氏如家、後貴爲宰相。居士以布衣年少往游、如平時、不怵於其貴、或飲醉其堂上、劇譚大笑、傾一座。退而與里閭賤者游、亦傾竭無吝情。初不見其異、人皆曰、如居士蚤有名譽、使能稍自矯拂、逶迤以蘄合、必獲。然居士不志於其獲、而樂於不矯拂、視不合如其躬之遂。其知者、則以爲氣完而守全、其不知者、方且以世禮睢盱一二諍詠之。嗚呼、此其所以窮也哉。然居士自以少孤、依潁川夫人辛苦學問、欲嗣其家聲、甚力。旣失夫人養、已得疾鬱鬱、又官不偶、抱所長莫試、滋與世闊、不復自金玉、類李將軍旣困、負其才能、數與虜角、忘意於無益者。常人不知愛惜、恐一失不可得、必其誠心好士、知才爲難者、方復悼其窮也。晚尤自放於酒。一

日過故人、飲甚樂、忽悲歌起舞、泣數行下、顧補之曰、吾若是乎已矣。人暫見之、不知其爲開封晁大受也、或竊語以爲狂。居士笑曰、琴張輩所謂狂、狂者進取、吾進取乎哉。補之輒從旁讚曰、魯漆室女獨處、趯然不寐而悲嘯、亦狂者邪。鄰人疑其欲嫁、鄰人則淺矣。然數月而居士卒。異哉。補之嘗論聖人有中道、若伯夷、柳下惠俱非中者。故從伯夷之清、則和爲不恭。從柳下惠之和、則清爲隘。然二子蓋百世師、不有聖人知之、則揚雄所謂餓夫詘臣、非過言也。然人豈可以皆至於夷、惠。如陳遵、張竦、長短不能相效、雖未足與論中不中之際、要曰外輕者差獨樂、至所遭薄厚、學者不道也。居士嘗主簿博野、又爲保德軍掾、洺州推官、知堯山縣事。其爲令、與邑子講習經藝、有惠愛於人。然居士終無意於爲吏。昔魯肅論龐士元非百里才、其治不治、後人固不當求之耒陽之間、至其言克涪作樂非



仁者之兵、豈惟異於魯肅所期治中事、雖孔明猶當自恨前所以待士元者未也。故韓愈謂千里馬常有、而伯樂不常遇。居士卒以元祐五年四月丙午、葬以其年五月戊寅、地則鄭州新鄭縣之旌賢鄉也。配王氏、潁川夫人之姪。潁川夫人爲晁氏婦、矜式王氏恭儉似姑。居士二子覺之、貫之、皆文學善士。貫之已得科名、爲新鄉令。後十七年、而貫之始以書來曰、頃先君不幸、葬日迫、太僕林旦嘗銘之、痛其遺也。知先君之深者孰與兄。願爲文表旌賢阡上。抑先君不至要官職四十六年而沒、施爲者少。然孔北海志不就、士議處以豪傑。陶淵明一縣令、後仰其高。窮達成敗、信不足論。論其人物如何耳。補之曰、孝哉。是足以大吾族、父爲不朽。系曰、天之高明、地之無疆、中不知歲之幾何長。人不七尺、當物之一、乃若傳說、以其事業沒、而上比於列星之光。何必傳說。有陵客星、有白長庚、彼微者也、

而動其芒。豈皆如說富貴、有功德于商、乃如是其昌。嗚呼居士、世人以爲狂、自謂我非狂、旣隕于霜、亦揚其芳。此如陵與白也、身雖沒、其才氣俊偉、猶耀而不亡也。

晁補之撰 《雞肋集》卷六三

楊判官墓誌銘

無爲楊氏、自傑次公以文學行義有聞于時、外至殊方異國亦知之、而以字行、以故遂爲東南望族。其論議激昂、舉止淹雅、不問可知爲其家子弟、或席下諸生也。當次公時、各以其得之者互出頭角、卓卓相見。後于今有抑揚頓挫、自爲一宗、而士論歸之無異辭。君次公叔弟、諱所、字次文、與其仲兄伋次思、能羽翼所學、差池上下、冉冉雲霄間、若不可得而親、而愈久愈可愛。君時恢廓無停滯、重然諾、從次公遊宦、爲一時知名士所欽嚮。隨所至、較藝多占高等。晚登舒王門、益信其所傳爲不昧、鄉

校推爲前輩。場屋以經術取士。君首中其選。再試復在第一。竟不第。遂無復進取意。久之。近日有以十科交薦者。于是相與勉君出仕。君謝曰。用之則行。舍之則藏。渠敢以退爲進。而固自背馳邪。後舉經明行修。起家調吉州廬陵主簿。或謂君儒者。非剽劇之所長。君謹簿書。肅期會。剖析是非。無一毫髮不及。上官以爲能。邂逅永豐闕令。仍歲大歉。獄訟充斥。即以君攝其事。凡振貸招集。悉能舉其要。乃審所繫。因得其乏食而自陷于強盜。君愀然曰。命在俄頃。而苟免罪之。法意不如是。皆使之更新。旣得出。歡呼涕淚曰。微吾令君。可復爲良民邪。比君去。率遮道挽留。幾不得行。再調池州司理參^③軍。未到輒感慨自歎。以謂時非不我與。而我自不勉。因上書自薦曰。麒麟也老。致遠尙能。鴻雁失群。不鳴爲恥。得是語者壯之。辟西安州天都定戎寨主簿。管勾安撫司機宜文字。方時拓復境土。經理疆

場。有志之士。輻輳砥礪。而新造之區。風俗異宜。君能以文采學術緣飾。以相其事。人物細穉。莫不師事之。興鹽池之利。肅重關之役。資其規畫爲多。第其最積階^④。至儒林郎。攝開封府考城令。益有治聲。達官要人。引導惟恐後。而君以去墳墓久。思得並家一官。以便洒掃。調和州防禦判官。受八寶恩^⑤。加承直郎。未幾得疾。以大觀三年二月十四日卒于官。享年六十五。即以其年三月二十八日葬^⑥。君于無爲鄉東歷村先塋之次。君曾祖諱果。祖諱明。具以文名。官雖不顯。爲當世推重。父諱復。左朝散大夫。母長壽縣太君趙氏。娶鄱陽姜氏。再娶同郡侯氏。三男子。洵。蚤卒。汴。漆。舉進士。四女子。抱全。適從事李敦頤。抱真。適戴圯。皆進士。抱素。適□。上舍出身。□經。抱玉。適從事郎俞長源。君和而不苟。無所不盡誠。處己嚴而恕于接物。于內典蓋家習也。而亦天資所超悟。嘗結彌陀社。著決定住往生西方



儒藏

宋儒碑傳集 卷七〇

論、勸人修行。疾且革、語家人曰、生死本空、無甚悲惱。誦西方佛名不絕口、端坐而逝。自號白雲子、有錦溪集二十卷。嗚呼、古人謂松柏之下、其草不殖、又曰部婁無松柏、信乎、造化所鍾、各有其本、非咫尺可得而論也。次公之學既行于人、而君又能資藉紬繹、以足于用、可謂盛矣。而設施之地、猶未能飽足人意、豈有所待而然耶。待之者、亦有所以也、積流厚遠、當知必有所在。銘曰、
得自是行靡他。而止此、如命何。弗稼穡、胡取禾。後且顯、銘不磨。

李之儀撰 《姑溪居士文集》卷四九

校記

①按此傳乾隆本、光緒本《山谷全書》均題作《宋史》本傳、然其文實非今本《宋史》卷四四四之《黃庭堅傳》。《山谷老人刀筆》亦有之、題作《山谷老人傳》。弘治、嘉靖本《山谷全書》則題作《豫章先生傳》。按《文獻通考·經籍考》卷六三《黃魯直豫章集》條下節引此傳之文、題爲「《家傳》曰」、則此傳實爲黃氏家傳。文中有「今上登極復宣德郎」之語、可知寫于徽宗之時、距黃庭堅之卒不久。其所述黃庭堅生平亦較《宋史》本傳爲詳實、是其文獻價值實在《宋史》本傳之上。今據嘉靖本錄出。其中頗有訛字、徑據光緒本校正。嘉靖至光緒各本此傳之後又有史贊、亦見於《文獻通考》、蓋爲宋朝國史黃庭堅傳之史臣贊。今仍據《文獻通考》登錄。

②構：原注「高廟諱」、據四庫本《范忠宣集》改。

③參：原作「泰」、據四庫本《姑溪居士前集》改。

④階：原作「偕」，據文意改。

⑤加：原作「如」，據四庫本《姑溪居士前集》改。

⑥葬：原作「卒」，據右引改。

⑦名：原作「明」，據文意改。

宋儒碑傳集卷七十一

范純粹 畢仲衍 畢仲游

宋朝散大夫戶部侍郎龍圖閣直學士鄜

延路經略安撫使贈宣奉大夫德孺公

傳

公諱純粹字德孺文正公第四子也以文正公蔭遷至贊善大夫檢正中書刑房與同列有爭出知滕縣遷提舉成都諸路茶場元豐中爲陝西轉運判官時五路出師伐西夏高遵裕出環慶劉昌祚出涇原李憲出熙河种鏐出鄜延王中正出河東遵裕怒昌祚後期欲按誅之昌祚憂恚病卧其麾下皆憤焉公恐兩軍不協致生他變勸遵裕往問昌祚疾其難遂解神宗責諸將無功謀欲再舉公奏關陝事力單竭公私大困若復加騷動根本可憂異日言者必職臣是咎臣寧受盡言之罪於今日不忍默默以貽後悔神宗納之進爲副使吳居

厚爲京東轉運使數獻羨賦神宗將以徐州大錢二十萬緡助陝西公語其僚曰吾部雖急忍復取此膏血之餘即奏本路得錢誠爲利自徐至邊勞費甚矣懇辭弗受入爲右司郎中哲宗立居厚敗命公以直龍圖閣往代之盡革其苛政時蘇軾自登州召還公與軾同建募役之議軾謂公講此事尤爲精詳復代兄忠宣知慶州時與夏議分疆界公請棄所取夏地曰爭地未棄則邊隙無時可除如河東之葭蘆吳堡鄜延之米脂義合浮圖環慶之安疆深在夏境於漢界地利形勢略無所益而蘭會之地耗蠹尤深不可不棄請以所陷官吏丁夫歸朝廷以所削之地給賜之所言皆略施行公又言諸路策應舊制也自徐禧罷策應若夏兵大舉一路攻圍力有不勝而鄰路拱手坐觀其不拔者幸爾今宜脩明戰守救援之法朝廷是之及夏侵涇原公遣將曲珍救之曰本道首建應援牽制



之策、臣子之義、忘軀徇國、無謂鄰路被寇、非我職也。珍即日疾馳三百里、破之於曲律、擣橫山、夏衆遁去。元祐中、除寶文閣待制、再任、召爲戶部侍郎、又出知延州。紹聖初、哲宗親政、用事者欲開邊釁、御史郭知章遂論元祐棄地事、以爲棄四寨之地、實啓戎心。於時司馬光、文彥博等主之於內、公等行之於外、乃降公直龍圖閣。明年、復以寶文閣待制知熙州。章惇、蔡卞經略西夏、疑公不與共事、改知鄧州。歷河南府、滑州、旋以元祐黨人奪職、知均州。徽宗立、知信州。復故職、知太原。初、斷殺牛未得、令牛死者、官以數百買瘞之、殺牛遂絕。每支官吏及軍士餼糧、同出一廩、雖有濕惡、衆亦不以致怨。建中靖國元年、加龍圖閣直學士、再臨延州。奏言、昨帥河東日、聞晉州守臣所得職田、因李君卿爲州、諭意屬邑、增廣租入、比舊數倍。後襄陵縣令周汲力陳其弊、郡守時彥歲減所入十七八、佃戶始

脫苛歛之苦。而晉、絳、陝三州圭腴、素號優厚、多由違法所致、或改易種色、或遣子弟公皂監穫、貪污猥賤、無所不有。乞下河東、陝西監司、悉令改正。從之。改知永興軍、尋以言者落職、知金州、提舉鴻慶宮。又責常州別駕、鄂州安置。錮子弟不得擅入都會。赦復、領祠久之、以右文殿修撰提舉太清宮。黨禁解、復徽猷閣待制致仕。卒年七十有二。公沈毅有幹略、才應時須、嘗論賣官之濫、以爲國法固許進納取官、然未嘗聽其理選。今西北三路許納三千二百緡買齋郎、四千六百緡買供奉職、竝免試注官。夫天下士大夫服勤至於垂死、不沾世恩、其富民猾商捐錢數千萬、則可任三子、切爲朝廷惜之。疏上、不聽。凡論事剴切類此。紹興中、追復原官、贈宣奉大夫。所著詩文若干卷、皆亡於兵。獨存奏議十七卷。五子、正夫、正國、正暮、正興、正需。

史臣論曰、純仁位過其父、而幾有父風。元祐建議

攻熙豐太急、純仁救蔡確一事、所謂謀國甚遠。當世若從其言、元祐黨錮之禍不至若是烈也。仲淹謂諸子、純仁得其忠、純禮得其靜、純粹得其略、知子孰與父哉。

無名氏撰 《范忠宣公集補編》

起居郎畢公夷仲行狀

昔文王之子高封于畢、以國爲氏。後漢兗州別駕謚居東平、畢氏始爲東平人。而謚之五世孫曰衆慶、爲宋大中正。衆慶之五世孫曰憬、仕唐至司衛少卿、許州刺史。憬生構、與栩、構爲戶部尙書、謚景公。栩爲鄆王府司馬。栩之曾孫誠、懿宗朝爲宰相。而構之五世孫楨、爲振武天德營田判官。楨之四世孫諱士安、仕本朝宰相、眞宗皇帝贈太師、中書令、兼尙書令、謚文簡、即君之曾祖也。文簡之子諱世長、爲衛尉卿、年九十、與故相杜衍、兵部侍郎王煥、郎中馮平、朱貫居、所謂南京五老是也。衛尉之

子諱從古、爲駕部郎中、以衛尉老、不敢專仕宦、便衛尉即仕、弗便衛尉即去、至或十五年不終一任、贈正議大夫。正議生君字夷仲、以衛尉恩補太廟齋郎、調許州陽翟主簿。而故相張昇、陽翟人也、由樞密使出判許州、欲爲陽翟興學、旣請于朝、乃勅縣計工具材、縣人欲以其力輸者從之。而故太子中舍馬某之子宏、嘗持吏短長、居邑中橫甚、謂諸豪曰、丞相之爲縣學、非令也、今子以力輸之、不足則又將使子輸矣。由十百而至千萬、未可知也。子如以百金授我、我爲君費、使丞相自止之。諸豪信其能、因以百金遺宏。宏得金、得游許州、宣言丞相之爲學甚善、而民力之輸官者、縣吏皆私之、而又將賦于民。丞相果疑之、即復勅縣須後、令具言縣吏無狀、榜于道上。是時君代令部夫居外、弗預。及歸、令不知所爲、謂君曰、吾欲上府辨于丞相、如何。君曰、無益也。不如取宏治之、則不辨而自明。會令



儒藏

之汝州錄問、君攝縣事、即使人逮捕宏案驗、且得其姦利、五日獄成。因上府白丞相、丞相皆如君請、奏其事于朝、不以父蔭、杖宏流鄧州。宏素爲鄉里所患苦、常輕視縣官。而君年纔二十餘、宏尤少之、嘗舉其手而出、幼指曰、縣官于我猶是也。及爲君捕繫、猶曰、無害。恃其能數以詞辨自解。而竟抵罪。陽翟人大喜。是時故給事中張問居陽翟、謂君曰、鄙語曰、鋤一惡、長十善。君之謂也。舉進士就中第、補潁州沈丘縣令。而故少師歐陽修以觀文殿學士知蔡州、故太師申國公呂公著以翰林侍讀學士知潁州、皆知君、交薦之、遷著作佐郎、知蔡州、遂平縣事。未至、改簽書大名^②府節度判官廳公事、入爲司農寺主簿、遷丞。以事至中書、丞相吳充素不識君、一見大喜、即以君爲中書刑房檢正官。俄遷戶房。先是、提舉市易司歲榷民糯米爲贏、凡商賈之至者、官盡榷買之、而益其價以售酒戶。酒戶售

米多陳且貴、酤益不行、遂廢其坊。而三司歲課大耗、惟市易得私其贏以爲功。戶房欲弛其禁、而提舉市易司弗便、數與戶房論難不決。其人方用事、甚寵、會遷戶房、人爲君憂之。君取紙半尺許、疏問市易未榷糯米之前、京師酒戶爲坊者幾何。歲停幾何。已榷之後、京師酒戶爲坊者幾何。歲停幾何。蓋未榷之前、酒戶爲坊者多、而停者少。旣榷之後、酒戶爲坊者少、而停者多。利害明甚。市易徒與戶房以言語返復相詰。及得所疏問、無他一詞、遂不知所答。卒服非是而罷榷事。改太常丞、充北朝賀正旦國信使、與虜人^③習射、一發中的、以爲偶然、再發又中。虜人以爲神。而君天資白皙、髭眉如畫、辭令溫雅、虜人喜之。其主陰使人取君衣以爲度、製服以賜君。君預其元會、盡記其儀與登降節奏、歸爲圖以進、賜五品服。其後數年、今龍圖閣待制錢勰使契丹、契丹主猶問曰、畢少卿何官。今安在。是



時故岐公王珪與吳正憲在中書議論不合、以君爲正憲之所用、遂深嫉君、數求罪過欲中傷之。而爲人詳慎精密、卒無纖芥可乘、然亦四年不遷。及置局定官制、遂以君爲檢討官。君乞罷戶房檢正事、即除秘閣校理、同知太常禮院。君在官制局、所領戶部事也。戶部文書千萬計、君區別分類、損益刪補曲當、雖戶部老郎吏不能窺也。官制之事、遂以君爲主、凡從中問某事、必須君然後報。他人不知也。嘗以君爲進士發解考官、上問官制事、不知、或曰、畢某爲考官、故不知。上即詔君罷考事、還局、遂以官制專屬任君、雖他局事時兼付君矣。人多嫉之者。久之、高麗入貢、上自選君館伴高麗使人。上元觀燈、君與使人宴東闕下、因作詩道盛德。上見、俯同君韻、和而賜焉。諸公畢和、當時以爲寵。及官制行、君以秘閣校理換遷朝奉郎。上又自除君起居郎兼詳定官制。是時吳正憲已薨、他宰相

素不右君、即留除命不使受、而爭于上前曰、畢某以秘閣校理換遷官、而又爲起居郎。起居郎即修起居注也、前日修注者未嘗不帶職。即是畢某以職換遷一官、復帶職、而又爲修注也、優甚。上知君不爲宰相所右、因笑曰、是當得爾、是當得爾。君以力辭而後受命。蓋官制起于後周、備于隋唐。其後盜起兵興、漸失其序。更歷五代至本朝、純以他官兼領、無復舊制。先帝慨然欲加釐正、而文書浩繁、沿革制度本末希有知者。惟君討尋論次、以夜繼日、抉剔搜補、曲盡其當。及推行、羣有司以疑問于君者、日以百數。君指畫應對、人人得所問而去。官制遂定、而君亦勞矣。會大暑、君坐宣徽院與他官論錄黃、語未竟、疾作、久之、殆、不知人。上聞驚、即詔君肩輿歸私第、遣侍醫治療。是夕卒、年四十三。上悼惜久之、翼日遣中使劉援撫問其家、賜錢五十萬。遺恩當補子一人爲官、而宰相猶以平昔芥蒂、

不肯行者五年。及司馬文正入朝，舊相或死或罷去，始得補其子完爲太廟齋郎，則君之進退可知矣。君爲人溫厚儒雅，事其母壽昌太君至孝，自幼寢處不離其親側。及長，既娶，亦稀至其私室，寢處猶在親側，蓋終身焉。正議公捐館，君年纔十八九，家餘一馬，賣以爲棺殯君。徒手養親，教養諸弟妹，嫁娶仕宦不失時，而君亦自不廢學。蓋治家之管仲也。當景德中，文簡公以德行相，眞宗皇帝人想見其風采，而君略似之。治隆殿成，繪文簡之像于其壁，先帝識焉。及臨軒策進士，君方爲檢正官，立廷下，先帝望見，使人問君爲誰。及知，因歎曰：祖孫固有相類如是者乎。及君在官制，待遇日厚，如定學制帳法，爲北朝信使，館伴高麗使人，皆先帝自選者。嘗受詔撰中書備對三十卷，天下之事盡在其中。及奏篇，先帝歎息稱善。而今士大夫家爭相傳錄，以爲不可無之書也。娶張氏，故職方郎中公

度之子，封瑞昌縣君。子二人，曰完、太廟齋郎。曰采，尙幼。女二人，長適承務郎蘇如晦，次在室。將以元祐五年七月葬于鄭州管城縣廬村南原文簡公之墓次。君之事應銘，故敢書其大略以告銘者。

畢仲游撰 《西臺集》卷一六

西臺畢仲游墓誌銘 并序

公諱仲游，字公叔。其先代郡人，後徙鄭之管城。維畢氏世序綿遠，代有顯人。至公之曾大父文簡公，以清德雅望相眞宗皇帝，致天下於太平，勲在王室，書于史官，議于太常，與李文靖公、王文正公同朝，俱號賢宰相。天下至今思焉。大父諱世長，故任衛尉卿，贈尙書工部侍郎。考諱從古，尙書駕部郎中，贈金紫光祿大夫。皆以德業世其家。公始以父任補太廟齋郎，少孤力學，以求自致，與兄仲衍俱試南廟，中高等，遂俱登進士第，聲名籍甚。調壽州霍丘主簿，南京拓城主簿，權京都提刑司檢法官，



移信陽軍羅山令、改宣德郎、知河南府長水縣。辟環慶路轉運司屬官、以軍功轉奉議郎。又遷承議郎、丐監在京粳米第八界。哲宗登極恩、遷朝奉郎、除軍器監丞、改衛尉寺丞。召試學士院、除集賢校理、權太常博士。出爲河北西路提點刑獄公事、除開封府推官、賜五品服。以太夫人疾、請罷府官、判登聞鼓院、丁內艱、服除、提點河東路刑獄。召還、爲尙書職方員外郎。奏對稱上旨、遷司勳員外郎、權禮部郎中。出爲秦鳳路提點刑獄。又移永興軍路、改祕閣校理、知虢州、未行。改耀州、坐黨與、落祕閣校理、調知閬州。今上踐阼恩、遷朝散郎、提點利州路刑獄。改知鄭州、遷京東計度轉運副使、權知鄆州。除尙書吏部郎中、召對崇政殿。久之、爲淮南路轉運副使。置元祐籍、知海州。改管江寧府崇禧觀、降監西京嵩山中嶽廟。已而出籍、管勾崇福宮。用八寶恩、遷朝請郎、轉朝奉大夫、得請再任。遷朝散

大夫、賜服三品、管勾西京留司御史臺、提舉南京鴻慶宮、遂請致仕。宣和三年七月二十八日、以疾卒于西京、享年七十五。始司馬溫公、呂申公最爲知公、皆不及用公而薨。范丞相平生期公可大用、比登庸、公持太夫人喪歸鄭、服除、范公已出牧。故公於元祐間不極其用、又不當言路、於國之大政無所預。公於文章升堂覩奧、風格同漢魏、爲古文奇而法、序事簡而悉、詩篇遒壯、牘表麗密、雖片言隻字、皆有根蒂、而切於事理、不爲浮誇詭誕、與夫戲弄不莊之文。行於鄉里、必可施之廊廟。用之當世、必可垂法將來。雖古作者、不能過也。議論引據古今、出入經傳百家、折衷歷代之沿襲、不爲嘗試之說、一槩之論。凡所建述、必可博利天下、稽考後世、雖前輩鴻博該洽之士、無不仰公之奇論也。公嘗謁見歐陽文忠公、潁州、公奇其才、使子弟來謁。少師張文定公亦以爲才、褒薦公甚美。哲宗皇帝

即位、召天下文學之士九人策試、乃就文館、翰林學士蘇公子瞻覽公文、驚異、擢公爲一。自黃庭堅、張來、晁補之之徒皆居下列、由是天下想聞公之風采。蘇公則表公自代、謂公學貫經史、才通世務、文章精麗、議論有餘、主上由是知公矣。范丞相之作大皇太后哀冊文、公實代焉。攝太尉、蘇公子由跪讀之、歸以告其兄、內相曰、不意公叔文章一至於此。內相曰、豈惟品藻、抑又實錄矣。丞相蘇公子容號爲博學、通知古今、每以公爲直諒多聞之益友。公之在太常也、會太皇太后將受寶冊、宰相申公召公及禮部侍郎、郎中、員外郎、太常卿、丞、博士至政事堂諭告、且訂其論。公心知宰相欲遵用章獻明肅皇后故事受冊文德殿也、堂吏持其目示座人、次至公、果然。公曰、願與同列更議。宰相曰、此先帝遺制、且故事也、柰何。是時群禮官無一人敢置議者、公懼其事遽上、即抗聲白曰、外朝者、天子

之明堂、非母后所宜居之。今於此受冊、遂將垂簾聽政、一失其位、無以示萬世。且先帝遺制、豈不曰舊章闕失、更在討論耶。宰執默喻其意、群禮官猶守舊不變。公退、獨表請正之。宰相以聞、大皇太后乃下詔曰、以吾不德、豈可以充入舊貫之居、其受冊宮中而已。於是摺紳大夫皆懼然、偉公之建明。有詔定皇太妃儀制、當是時、朝臣希世銳進者、則欲卑其禮以避東朝之尊、求寵於歸政之後者、則欲極尊崇以盡天子之孝。而公獨不然、援引經傳及先代典禮、務稽古、不爲偏私以遷就其說。於是摺紳大夫又服公之純正。會朝廷方重外、而有文學者必試以吏事、故遣公使河北、改佐開封。已而復刺諸路、又屢典藩、故公居外之日多、其宣力四方彌勤。公爲政、剛明有斷、而應卒遇變、從容詳悉。雖文案山積、獄犴糾紛、而下車裁剴、劃然一空。其在軍旅、星駟交馳、輻湊羽書、重跡狎至、而排難解



紛、倏無留蹟。其從太師高遵裕討西夏、號令期日、皆從中出、嚴甚無敢違者。前軍行三日、衆縣之夫畢至以餽軍者乃三十萬。一旦期集、有司度受其賦而給之糧、必曠日持久乃可、自計臺諸公及僚屬相對惶惑、不知所爲計、未有以處。公獨曰、此甚易耳。轉運使范公純粹及李察曰、願以此諉公、惟公圖之。公乃召八十縣官吏與其州倅至前、悉受所賦金銀錢帛、令無啓緘、膝局鐫、召群吏簿其要、一以付衆、令使爲質、一以備計籍、而以其副質有司。群吏筆不停綴、俄頃賦畢集、拉衆縣官吏之半、行詣所次驗遣之。衆皆曰善。公則已飭有司具畚鍤、鍤及斗斛以數千矣。衆駭曰、將焉用之。公輒下令、盡撤去倉廩之牆壁、乃徇其衆、令促詣群庾人、自姝粟六斗持其半自給、挾其半供軍。芻秣傳焉。於是數十萬之夫、颺至雲合、鱗萃鳥散、已而使視、群庾空無遺粒。庾吏初尙爭之、公曰、必無少取、

以就贏、多持以自困也。翌日、大軍遂行。范公及李察諸寮吏皆歎伏、且謝曰、非公幾敗乃事。軍旣行、而陝州夏縣夫爭遁去。諸公曰、他縣相視盡逃、柰何。公請身往救之、至則尙有存者、而縣令已將白劉公遽止之、喻以無恐、又慰勉其留者、而走白諸公、請荷令使追逃者、他縣乃止。耀州大旱、野無青草、公謂郡縣拯濟多後時、力愈勞而民不救、故先民之未饑也、多揭榜示之、曰、郡將賑施、且平糶若干萬石、實大張其數、勸喻以無出境、民歡然皆按堵。已而果漸艱食、乃出粟以賑、且平糶以給之、視鄰境之民流散殆盡、而耀民之當徙就食者乃十七萬九千口、顧所發粟不及萬石、以民粟繼之而給人、足無一人逃者。監司乃故搜於長安、得二人焉、曰、此耀之流民也、送還郡。公驗問、皆中民之逐利者、所資持自厚、非流民也。監司乃沮。有故吏以譴逐輒詣闕下、唱言公救災傾困、倒廩、軍無見糧、

朝廷聞之、遣使按視、公上言自効、且願赦屬縣。朝廷察其誣也、而公治行益顯。公爲監司、所至一路老奸宿臟皆怖駭、曰畢公至矣。及事叢至、公一寓目、必曰某事有弊、某人有欺、若鑒見而繩度者。其在京東、行郡至曹南、公一視其牘、曰吏狃故態耶、是欲嘗試我也。召吏會之、果得藏粟十萬石。公曰、非州縣吏與吾計吏交通不及此。其漸益長、調度縱橫將不勝其弊。吏又當麥秋、上半歲和糴數、公不應、檄州縣悉具出入多寡、道里遼密、盈虧登降之數聚爲圖式、歲省和糴百萬石。淮南歲計常窘、公至、乃更優裕。有老吏白公、前負發運司僦直三十六萬緡、有詔期三年畢償。今三年矣、且得罪。公曰、烏有是哉。吏以此迫公甚急。公則發某籍視之、乃往三十年以前、計司兼主漕鹽、故有僦直。後移之矣、而其目尙存不去也。老吏非不知、第以此劘上。公覈得其實、皆叩頭伏罪、以公爲神明、雖同列

號爲彊明精練者皆驚焉。公爲政未嘗撓於大吏、錢內相勰、故嘗薦公、後辟公京東憲司屬官。及尹開封、公適爲其佐、事有悖戾、必力爭不置。有殺人者、吏受賕獻、用犯時不知給尹、賴公辨正。錢公尹京、吏不得欺、且赫赫顯名者多公所救正也。相知益深。韓丞相玉汝、以故元宰牧太原、公按視等列郡。韓公家奴朝童、自陳有卒剽劫其衣服黃堂之側、韓公怒、下卒吏將黥配之。公曰、小童衣服尠薄、而剽劫於大帥故相宇下、非人情。易吏治之、有卒母自言八十餘矣、所恃唯一子、而丞相遣戍河外、公命召還。其小者如此、大節可知。河東吏益畏恐、而韓丞相獨善益厚。公比鎮潁昌、以書抵公洛中、曰、我思公不忘、願公一來臨。我欲與公從容。公之威名動四方、然所至未嘗發謫官吏、馭胥史箠楚、幾廢不用、他人學者終莫能及。鄆之故俗、喜群聚譏詆大吏、一經品目、輒傳笑四方、先帝患之、喻守



臣使禁止。而牧守踵至、搜挾治之、終不戢、乃益肆。公至、獨晏然處之、勸善獎義、久之人人自重、恥爲不長厚也。其曹長乃來獻頌德詩五百言、且修贄見禮。自公以來、鄆風大格矣。公還朝、因面對、論孔子廟自顏淵以降、皆爵命於朝、肖法服冠冕以居位。而鯉承訓詩禮、伋以聖道傳孟軻、非不肖也。今皆野服幅巾以祭、號二代三代者、未有爵命。上嘉納之。封鯉泗水侯、伋沂水侯。太原銅器精巧名天下、吏多糴載以歸、公獨不市一物。懼人之謂矯也。市二茶匕而去。韓丞相曰、如公叔可謂真清者。公篤於孝悌、若天性然、非勉強者。太夫人丞相文忠公之孫、莊重謹嚴、先帝嘗聞其風。公事親孝謹、莫逆其意。公侍食於太夫人、視太夫人食之多寡而食不敢過、退不敢更食於私室。公之兄起居有孤完未仕、太夫人念之、公爲謝四方辟請、獨丐爲倉官。居京五年、置匭以論、且言於公卿萬方、必官兄

之孤、以慰母心乃已。公有女將嫁、會兄之女至、奪女資以嫁焉。爲府官、俸尙薄、兄弟群從百口、至鬻衣質旃以給。後官登聞、俸益薄、群從益衆、比待喪歸鄭、資用乏絕、然猶舉遠近喪數十從葬、故塋無遺者、皆稱貸鬻田以致之。自小官以半俸給親族、終其身。公平生不自言有司求增秩者三十年、晚仍上一官、請封老悌、朝廷嘉之、封其悌蓬萊縣君。先正文簡公葬且百年、神道碑未立、迨公建焉。此皆人之所難能者。而度量恢廓、不思小怨。高遵裕之征西、與計司屢失期會、師老財費、公密疏論其事、有詔詰問、遵裕銜之次骨。軍行、人爲公危之、卒不能害公。公歸朝、與遵裕子士充同考進士。士充暴病、公手和藥以救、人曰故有隙不便。公曰、吾知起其死、何暇念舊。士充病愈歸、與父相持泣、德公、公更薦士充京局使、便養。有董嗣之者、治耀州、救災獄甚力、非朝廷詔止之、公幾不免。後嗣之與其

妻及子併卒。衆以其狡戕害善類，皆幸之，無收葬者。公爲致其喪千里葬之，又賙卹其家焉。公平居遇親友故舊甚厚，憂人之憂，急人之急，至區處其家事，拯救其危難，甚於其家。私者所居，氣蓋一方。任諤以大夫致仕，妻死，貧無以葬，公致具厚葬之。比諤卒，子弟皆遠官，公親治其喪事，不知者謂爲公之親戚骨肉也。鄰居有書生，與母俱病，公日夜調護，爲遠致醫者，給使卒病，及友人之老卒病，調護如書生。故無貴賤，德公者衆。公年逾七十，益康寧精悍，與士大夫持論，至終日不倦。爲具致仕大夫，從容言宴無輟閱。蘇內相嘗曰：「吾聽公叔辯論，傾寫語音如鍾，坐覺衆士無精神矣。」公平生薦士多至公卿者，後進如晁補之、李格非、李昭薦，皆公薦慰士也。出入門下久之，與公俱爲同舍郎，館中三人者皆文事，公唯謹，不敢抗行，由是世以公爲知人。嗚呼！士有文章者，未必有學問；有學問者，未

必能政事。能政事者，未必敦德義。敦德義者，未必有文學。若公者，可謂兼之矣。公少時，有士爲公推命者，多驗。故公晚節益務閑退，以安其命。嗚呼！若公者，然後可以言命矣。公有文集七十卷，總集古今醫方甚衆。娶張氏，封太和縣君，改宜人，光祿卿鑄之女。前公二十年卒。子男四人：曰大純，宣教郎、永安軍使、陵臺令；曰大亮，登仕郎、均州司理參軍；曰大能，迪功郎、鹽南嶽廟；曰大拯，將仕郎。而大亮大能皆好學，早世。大純、大拯俱有才名，承公之世而大之者，將在茲乎？女三人：長適承議郎蘇處厚，次適通直郎郭體仁，次適進士范淑而卒。孫男六人：曰少章，將仕郎，卒；曰少雅，將仕郎，少膺舉進士；曰少儀，將仕郎；曰少城，曰少虎，尙幼。孫女四人：長適迪功郎薛居安，次適承奉郎安自強，以卒。餘未嫁。初，文簡公葬管城先卿先大夫祔焉，至公地盡，乃改卜。以宣和三年九月乙酉葬公於新鄭縣西。

顏村林禽原。公之先太夫人恬先祖父親妹也。及是大純。大拯以公治命來請銘。且曰。吾父知之深。愛之厚。莫如吾子。以親又甚戚。其不可以辭。然則非恬誰宜爲公銘者。銘曰。

皇矣眞祖。茂躋群倫。有相文簡。維皇寶臣。孰濟厥美。實惟曾孫。繫公生厚。祖德是循。剛健篤實。養之彌醇。震發恭耀。蔚爲英文。闢去浮華。上規皇墳。濟以雄辯。磅礴大鈞。浩無津涯。懷山吞雲。欲遡從之。發源崑崙。較藝王堂。忠讜上聞。策冠群彥。晁董公孫。誦詩三百。於事懵焉。雖多奚爲。孔聖有云。公當大事。其氣益振。太母踐朝。公預討論。卒避正位。萬世不刊。大妃彝章。議者紛綸。公無側頗。典訓是援。帝麾天戈。雷動星奔。歛至侍哺。命縣炊晨。吏懼失色。莫知所存。公爲籌策。指撝若神。呼吸之間。億萬具殫。有績京兆。有勞天官。帝嘉其能。式屢典藩。民憚民懷。去久弗諼。先饑哺飼。忽如豐年。鄰境盡逃。

我無一奔。刺彼諸道。攸詢攸宣。左繩右規。小物必勤。曰故丞相。我則不聞。退居汝洛。益與道遵。詩稱老成。易尊丈人。自以無愧。歸于九原。公德不泯。公文有傳。尙茲垂聲。達于壤泉。

陳恬撰 《永樂大典》卷二二五



儒藏

校記

①從：原作「徙」，據《永樂大典》卷二〇二〇四所引本文改。

②名：原作「明」，據右引改。

③虜人：原作「北人」，下二「虜人」，原作「敵人」，乃四庫館臣所改，據右引回改。

④後：原作「從」，據右引改。

⑤以：原作「而」，據右引改。

⑥職：原作「識」，據右引改。

宋儒碑傳集卷七十二

曾肇 歐陽棐 李夔

曾文昭公行述

公諱肇字子開建昌軍南豐縣人曾氏系出於鄒少康之子曲列之始封也。更夏商周千有餘歲微不見於經傳。春秋之際爲莒所滅其太子巫仕魯乃去邑爲曾氏。巫生阜阜生皙皙生參參生元西父子俱爲孔門高弟曾氏遂有聞於世。自是復晦而不顯又千有餘歲至宋興公之皇祖密公始以文學仕太宗真宗爲名臣於時薦登膺仕者代不乏人。至公又以文學登進士第調台州黃巖縣主簿邵安簡公聞其賢請爲州學教授四方之士蓋有聞風重道接踵至者。躋門授經無虛席。是時上方嚮用儒臣欲以經術造士近臣言公經行宜居首善之地不宜淹留一郡有旨延和殿賜對公所陳皆上所欲聞者酬問久之殆將更僕矣除崇文

校書兼國子直講。未幾遷館閣校勘刪定九域志改大理寺丞同知太常禮院權判太僕寺殿中省。元豐元年除集賢校理轉殿中丞久之上讀公所撰曾魯公行狀稱善會修仁宗英宗兩朝正史乃以公爲國史院編修官中書公鞏入判太常以親嫌罷禮官判登聞鼓自秦以來禮文殘缺先儒各以臆說無所稽據公在職多所釐正親祠皇地祇於北郊蓋自公發之雖衆議不同而公獨引經辨析詞旨精慤故異論莫能奪其議。明堂配享徧及五帝初雖不合後亦卒見施用。官制行除吏部郎中每便殿引選人上常目送之出殿門乃已。再遷朝奉郎與修兩朝寶訓國史成錫宴故事非侍從官不坐殿上特命進公其眷遇之厚蓋示將用公也。未幾丁太夫人憂居喪哀毀瘠甚年未四十髭髮盡變服除入爲戶部郎中復還吏部遷右司郎中覃恩賜緋衣銀魚哲宗嗣位宣仁太后垂簾聽



政用司馬溫公、呂申公爲宰相。士多傳時自效。公獨挺然不爲世變所移。由是諸公益賢之。知其有常德也。以公先帝史官。故命公充神宗實錄檢討官。擢起居舍人兼權中書舍人。數月。召試即眞。遷實錄脩撰。賜三品服。初除。未拜書命。會除葉康直直龍圖閣知秦州。公即上疏論康直素不聞有可用之材。昨在陝西。隨軍失亡爲多。先帝常命械繫欲誅之。康直諂事李憲。卒賴以免。其人可知矣。正當黜退。以章先帝之明。豈可更加獎擢。執政訝不先白。言者承望協力攻之。范公純仁在樞府。語人曰。善人不見容。則純仁輩不可居此矣。諸公知公議所與。咸爲之言。章請外。五上不聽。乃出視事。門下侍郎韓公維面奏。范百祿所爲不正。及有非理事十餘件。簾中怒甚。以爲輔臣奏劾臣僚。當公行具章疏。明論曲直。旣無明文。何異讒毀。黜知鄧州。公不草制。兩上章論之。曰。維執政爲朝廷別白邪。

正是非眞得大臣體。雖案牘不具。出於口奏。豈可便謂之欺君。大臣參與國論。臧否人物。不必一切須形文字。顧所言當與不當。行之人心服與不服耳。今陛下責維徒口奏而已。遂謂有欺君之意。臣恐命下之日。人心眩惑。謂陛下以疑似之罪逐大臣。恐於陛下盛德不爲無損。執政大臣自此以維爲戒。無敢開口論議臧否人物。君臣上下更爲形迹。恐非陛下推赤心待大臣之誼。亦非大臣展布四體。以事陛下之道也。竟以他舍人行下。事雖不從。士論譴之。諫官王覲言執政忤旨。落職知潤州。公封還詞頭。言。覲之一身出入內外。不足爲重輕。而陛下寄腹心於大臣。寄耳目於臺諫。二者相須。不可闕一。今覲一言論及執政。即日去之。是何異愛腹心。塗耳目。豈不殆哉。上悟。加覲直龍圖閣。三省議更科舉。公獨建議。以謂。三代兩漢人材之盛。風俗之美。後世莫能及者。取士以行。不專以言故。



也。今雖詔內外官舉經明行脩之士、中第之日優其恩典、不獨取之以言、又本其行、庶乎近古。然徒使舉之、而不由鄉里之選、又無考察之實。與斯舉者隨衆牒試於有司、糊名謄錄、校一日之長、不惟士失自重之義、且於課試之際、無以別異於衆人。則所謂本其行者、亦徒虛文而已。謂宜別立一科、稍倣三代兩漢取士官人之法、因今之宜、斟酌損益、要之無失古意而已。至於投牒乞試、糊名謄錄之數、非古制者、一切罷之。待遇恩數、盡居詞賦經義等科之上、庶使學者尊經術、惇行義、人人篤於自修、則人材不盛、風俗不美、未之有也。太皇太后受冊、有司檢用章獻明肅太后故事、當御文德殿、奏疏曰、伏見太皇太后聽政以來、止於延和殿垂簾視事、受契丹人使朝見、亦止御崇政殿、未嘗出踐外朝。蓋外朝天子之正寧、太皇太后崇執謙德、不欲臨御、以爲天下後世法。推此言之、受冊外朝、

殆非太皇太后之意、特以故事當然耳。竊詳故事、天聖二年兩制定皇太后受冊於崇仁殿、仁宗自出聖意、特詔有司改文德殿、此蓋人主一時之制、非典法也。願下明詔、屈從天聖二年兩制之議、受冊於崇政殿、仰稱太皇太后克己復禮、謙恭抑損之盛德。中批令學士院降詔、如公所請。是歲坤成節、禮官建議於崇政殿上壽、其升殿賜酒并文武百官拜表班次、并用天聖三年故事。三省樞密院時降朝旨、不全用天聖三年故事、及有司之議、乃引九年會慶殿上壽如乾元節之儀。公奏疏曰、太皇太后昨降詔書、以謂不敢自同章獻太后、今此舉似與前後本末不相稱、殆非太皇太后之意、特執政大臣出於不思耳。疏入從之。公之畫規、太母之聽言、前古靡儷焉。非主聖臣直、寧有是夫。皇太妃親屬有韋城縣民侯偁者、負官錢、內批特與寬展納錢年限。公言、此在縣官事至微末、恐不足以

上煩詔旨、以啓倖門。又言、近日頗有干求內降、特與差遣者、此雖未足仰累二聖大公至正之德、竊恐僥倖之人、轉相扳援、煩瀆聖聽。杜漸防微、宜自今日。仍錄仁宗戒敕內降入條以進、乞置之座右、少助省覽。奉使契丹回、道過雄、瀛二州、百姓各經國信使副陳述役法不便事、公言、臣於役法本不詳知、乞明詔有司、更加考察、不憚增改、歸於便民而後已。昔在熙寧中、更定役法、臣兄布實與其事、臣今言之、不爲無嫌。但承乏從官、將出使、親見二州之民有所陳述、不敢顧避、隱默爲自全計也。又言、臣以使事還至河北、聞朝廷命王孝先開孫村口、回河東流、復故道。及見運使謝卿材言、河流稍入地中、無可回之理、但當閉塞支流、縱之北去、正是行其所無事。卿材嘗畫八事聞於朝、簡易明白、似有可採。乞下水官及河北監司公共講求、及卿材所陳利害、孰爲得失、具奏朝廷、擇其善者斷而

行之、庶使論議早定。繼聞召都水使者王孝先、河北轉運使謝卿材、判官張景先赴三省詢究利害、而三人所論不同、朝廷未敢臆決、遣官行視、然詔書但令相度孫村口有無未及利害、如孫村口不可修、即於不近界河踏逐一處、則是雖曰遣官行視、而必欲回河之意已先定於廟堂之上矣。然則遣二近臣、從數十官吏銜命而出、不知果何爲也。及二近臣還奏、如卿材說、遂出孝先知曹州、徙景先陝西路、公力疏其罪、執政不得已爲之改命。至紹聖初、時論益主東流、而河回輒決、公私受弊、卒如公言。秦王後止襲公爵、詔有司議所當立。公言、諸侯有國、子孫以嫡相承、禮也。況承亮先朝所立、傳國再世、可復議移奪乎。四年春、旱甚、中丞李公常請罷春宴、執政難之。公率彭公汝礪上疏曰、天災方作、民食未充、正君臣側身畏懼憂恤百姓之時、乃相與飲食燕樂、恐無以消復天變、導迎和氣。

翼日有旨罷宴。二公在朝論事數與時忤。至是浸不容矣。當是時丞相范公純仁、左丞王公存論議多是與二公合。異意者欲盡去之。會有以蔡丞相確安州詩上者。諫官交章以爲謗訕。謫新州。范、王二公爭之不能得。同時罷去。先是公與彭公約。當制者必極論之。會公除給事中。未拜。彭公當制言甚力。諫官多前日與公論異者。言彭公實公使之。誣以賣友。公不自辨。固辭新命。請外。章四上。除寶文閣待制。知潁州。明年徙齊州。未至。改陳州。在潁。濬清河百餘里。以通東南物貨。人至今賴之。部使者議開八丈溝。疏陳蔡積水。潁人素以爲患。公拒其議。使者以語誑公。公復移書折之。及徙陳。執論益堅。人於是知公非私於一州也。越明年。移知應天府兼南京留守司。守當東南孔道。士大夫舟車銜尾。結轍而至。平時宴勞無虛日。公曰。飾廚傳以邀往來之譽。吾不爲也。乃積公帑之餘。大興學校。

親加訓導。養成人材爲多。居數月。除中書舍人。命格不下。七年秋還朝。守尙書禮部侍郎。是歲哲宗初祀南郊。有詔合祭天地。如祖宗故事。公守前議。論之語甚厲。不報。乃拜章自劾。徙刑部。不拜。請去不已。降知徐州。在徐數月。徙知江寧府兼江南東路兵馬鈐轄。紹聖初。徙知瀛州。充高陽關路安撫使。哲宗既親政。追用舊臣。盡復熙豐之法。數稱公議禮有守。及公入對。口不及垂簾事。所陳皆國家大體。嘗謂人主雖有自然之聖質。必賴左右前後皆得其人。以爲立政之本。唐太宗平定四方。有志治道。時引虞世南等聚于禁中。號十八學士。退朝之暇。從容燕見。咨詢無倦。或至夜分。是以後世言治獨稱貞觀。臣謂宜於此時。慎選忠信端良博古多聞之士。置諸左右。以參謀議。以備顧問。與夫深處法宮之中。親近褻狎之徒。其損益相去萬萬矣。忤貴近意。故不得留。是時元祐諸公皆流竄嶺表。



最後謫前史官范祖禹等、以實錄譏訕爲罪。初、實錄成、公與陸佃、林希以嘗在屬例、轉一官、公奏臣不逮成書、不可因人之功、以叨賞典、累辭不許。至是、希爲中書舍人、納所遷官、在職。公耻自陳、以覬幸免、遂與佃俱奪一官、降小郡、以公知滁州。御史言希不當與公異、佃與奏書、不當與公同、仍削佃職、除公集賢殿修撰、守滁。歲滿、除知泰州。又二年、徙海州。元符三年、上皇即位、欽聖太后權同聽斷。一日、二府奏事、簾中宣諭曰、先帝在宮中、嘗稱曾某可用。魯公爲樞密、實與聞之。先帝謂神宗也。召還、除中書舍人。即日請對、言治道在廣言路而已。祖宗以來、數詔百官、使以次對。神宗舉而行之、於熙寧之初、以興起事功、爲後世法。願陛下迹神考之故事、修轉對之制、下不諱之令、明詔百官、下及民庶、得極言時政、無有所隱。然後擇其善者而行之、且報之以賞、大則加以爵秩、小則錫之金帛。其

言不足採、若狂妄牴牾者、一切置之、不以爲罪。庶以鼓動天下敢言之氣。會日蝕四月朔、故事當降詔求直言、特命公草詔、因具著所以言於上者、敷告中外。於是投匭者日以千數、故上得盡聞天下事。大臣有欲害公者、未有以發、乃改公所撰孔平仲復官制詞、著平仲譏訕先烈之罪、激之使自辨、因以擠之。公錄二詞白上、言陛下旣赦其罪、俱當明著聖恩、叙復之意、不必更載前來貶謫之罪。萬一可用、用之、如不可用、則臣爲不稱職、即乞罷中書舍人職事、以允公議。上察其非罪、促令赴省供職。及對、慰諭久之。元祐士大夫再以赦甄叙、或復舊職、典方面。公奏、生者蒙恩已厚矣、唯是游魂枯眦、未蒙聖澤、死而有知、豈得無望。請如寇準、曹利用故事、檢會臣寮、昨已死被追貶、或貶死未經叙復者、還其所奪官職及本蒙恩澤。又乞如祖宗朝、每大赦後、置看詳編配罪人一司、命官典領、使流

竄廢^③。錮之人均被恩施。皆見納用。由是上恩溥及存沒矣。累遷朝請大夫、擢翰林學士、知制誥。又數月、兼侍讀。上嘗從容謂公曰、卿學術在廷無過之者、非玉堂之上不可以處卿。公頓首謝。因言、近世帝王善爲治者、莫如唐太宗。善言治者莫如唐陸贄。太宗貞觀之治、論者謂庶幾成康。史官掇其大者、別爲一書、謂之貞觀政要。陸贄事唐德宗、知無不言、言無不盡、要其歸必本於帝王之道、必稽於六藝之文。此二書、一代之文章、實百王之龜鑑。伏願陛下退朝之暇、紬繹經史之餘、取此二書置之坐右、留神省覽。發言行事、以此爲準。庶於盛德有補萬一。又言、伏睹詔書、知州軍辭見與文臣帶一路兵鈐及監司職任者、并須上殿指揮、皆罷而不見、愚竊所未諭也。今陛下初即尊位、方當厲精爲治、日接羣臣、以廣聰明、以通衆志之時。而遽有此變更、竊恐四方聞之、或意陛下倦於諮詢、或意陛

下略於待士。而爲一監司長吏者、亦將苟且因循、無自勵之志、非所以崇德美、興治功也。給事中二人相繼封駁除目。^④三省進呈、令中書舍人書讀行下、公言、三省各有職守、不相侵踰。門下所以駁正中書違失、故中書舍人不兼給事中職事。恐因此隳壞官制、有損治體。諫官陳瓘以言及東朝與政事被謫、公適館伴虜使、事畢還家、即奏書兩宮曰、瓘昨日所論、臣雖不知其詳、以詔旨觀之、瓘言雖狂、其意則忠。何則。瓘以疏遠小臣、妄意宮闈之事、披寫腹心、無所顧避、此臣所謂狂也。皇太后有援立明聖不世之大功、有前期歸政過人之盛德、萬一有纖毫可以指議、則於清躬不爲無累。瓘以愛君之誠、陳預防之戒、欲以開悟聖心、保全盛美、忘身爲國、臣子所難、此臣所謂忠也。昔東漢明德馬皇后常謂章帝曰、吾但含飴弄孫、不復關政。章帝亦能不顧所生、極其尊事之禮。故一時母子之賢、



著之史冊、爲後世法。本朝慈聖光獻皇后歸政之後、游心物外、歷英宗、神宗兩朝、功隆德盛、稱美至今。公所以處上母子之間、委曲詳盡、有人所難言者、不可縷載也。初、瓘得罪、左右無敢言者、公獨盡言、請復瓘舊職、其犯顏嬰鋒率此類也。先是、禮部議哲宗升祔、宜於太廟殿增一室、公獻議稱書禮記皆云七廟、國朝自僖祖而下至仁宗、始備七世。故英宗祔廟則遷順祖、神宗祔廟則遷翼祖、三昭三穆、合於典禮。今大行皇帝祔廟、當與神宗爲昭穆、上遷宣祖、以合禮文七世三昭三穆之誼。時爲禮部者方執政、故公議見紕。時議者又言上當爲哲宗服期從兄弟之服、公在邇英讀史記、至堯崩、三年之喪畢、因言堯舜同出黃帝、舜且爲堯喪三年者、舜嘗臣堯故也。侍讀溫益進言曰、史記世次不足信、若堯舜同出、則舜娶堯女爲娶從祖姑。公以史記世次、禮記祭法、大傳之說質於上前、益語

塞。時有陳大中至正之論者、以元祐紹聖均爲有失。魯公稱上命、命公推此意爲詔、明諭天下。公見上言、陛下欲建皇極、以消弭朋黨、須先分君子小人、賞善罰惡、不可偏廢。開說甚至。已而詔自中出、上命魯公適視草禁中、因舉數事爲戒、所謂休息百姓、總核庶工、甄叙材良、敦獎正直、澄清風俗、振肅紀綱。退與魯公言、未嘗不丁寧反復以此也。本朝學士弟草兄制、惟韓氏與公無他比也。士論榮之。而公獨以滿盈爲懼、力祈補外。章三上、三請對、引祖宗朝學士許避親嫌故事、期於必得。上面諭曰、朕初即位、首召用卿、豈可遽求出也。除龍圖閣學士、提舉中太一宮、兼集禧觀公事、修撰哲宗實錄。仍侍讀如故。懇辭逾月、不受命。請郡益確。上封還乞外奏、乃出稱謝。然猶申前請。上固彊之、故退而奏。詔朝廷更茶法、內侍閤守勲主之、公謂與民爭利、不可爲。是時守勲方用事、勢傾中外、非守義



弗渝、無敢忤其意也。元年、太史復奏、四月朔、太陽當蝕、公請對、言、今連年日蝕、皆在正月歲旦之夕、赤氣亘天、變不虛生、必有所自。因陳天人精祲之說、至誠懇激、言發涕下。退、力請外、得知陳州、徙知太原府、充河東路經略安撫使。公奏、西事素非所習、且臣兄布嘗與措置、議論之際、不無妨嫌。力辭不赴、改知南京。公前自陳徙宋、遺愛未遠、是行、稚耄送迎、交於境上。宋人聞公再來、歡動城邑。徙知揚州、兼淮南東路兵馬鈐轄。到官一日、徙知定州、路安撫使。會元祐士大夫再被降黜、公義不獨全、請與俱貶。言者繼之、落龍圖閣學士、謫知和州。道除舒州靈仙觀。時崇寧元年七月也。魯公已罷政、言路率公素所不合者、未敢誦言排公、乃言元符末有外臣上書議及宮禁、因疏大臣數人、嘗有是議、而竄公名其間、坐奪兩官、徙居岳州。明年秋、治上封事異趣者千餘人、因追咎公草求言詔、貶濮

州團練副使、汀州安置。在汀二年、杜門不與人接、日閱書數卷而已。室內僅容一榻、坐卧其中、若將終身焉。人不堪其憂、而公處之裕如也。手詔左遷官例、許內徙、移公台州。魯公亦自衡徙舒、會于途中。未及徙所、又例還爵秩、授公散郎。與魯公還居潤州里第、戴白相從、人所歆慕。歲餘、二公同時寢疾、公遽命諸子以生不及養、太師歿必返葬其墓下。自是旬日、語不及家事。魯公薨、翼日公亦不起。實大觀元年八月丙辰、享年六十一。累勳上護軍、封曲阜縣開國子、食邑五百戶。八寶恩追復朝請郎。後再以恩復朝請大夫、集賢殿修撰。公天資仁厚、而剛大之氣、粹然見於顏面、望之若不可犯、而即之則溫然可親、不問知其爲盛德君子也。與人交、無遠近疏戚之間、不爲虛詞飾貌、一以誠意。引掖後進、惟恐不及。一經品目、人人自好。自少力學、於六經百氏之書、無所不究、含英茹實、以畜其德。

非如世儒徒摭其華、雕繪組織、爲辭章而已。經綸之業、蓋其素所蘊積也。故其在朝、則以論思之責爲己任。出藩于外、則所至有成績。瀛州救荒之政、全活者不可以數計。至其受代、則民挽留之、圮道闔門而不得去。更十一州、若此類不可悉數。然在公爲不足道、故略而不載。平居於物無所嗜、惟藏書萬餘卷、手自讎校、終老不倦。窮探博取、無所遺忘。雖外國山川道里遠近夷險、無不洞悉。與遼使語、道其委曲、皆大驚服。及自朐山還朝、某官某送伴遼使、使者語某曰、昨朝會日執某事者、非曾舍人耶。吾聞其名久矣。其爲夷狄欽慕如此。家素貧、未嘗屑意有無、而以字孤振乏爲急。由布衣以至處顯、視其居處被服飲食無少異。歿之日、陳無新衣、薦無完衾帷、器用敝惡、闔門千指無所歸。聞其風者、雖庸夫賤隸、皆嘆息爲之泣下。諸孤卜以二年十一月葬公于南豐縣世賢鄉梅潭之原、遵治

命也。曾祖諱仁旺、累贈太師、沂國公。曾祖妣陳氏、楚國太夫人。祖諱致堯、尙書戶部郎中、直史館、贈太師、密國公。祖妣黃氏、趙國太夫人。考諱易占、太常博士、贈太師、魯國公。妣周氏、周國太夫人。吳氏、吳國太夫人。朱氏、魯國太夫人。娶強氏、累封和義郡君、尙書祠部郎中、二司戶部判官諱至之女也。有賢行、能宜家。有子八人、長曰緄、通直郎、知揚州天長縣丞事。次曰縱、承事郎、監太平州蕪湖縣酒稅務。絢、宣義郎、監兗州東嶽廟。統、將仕郎、監應天府柘城縣稅務。絨、將仕郎、監睦州酒稅務。緯、承務郎、權知泗州招信縣丞事。續、纁、舉進士。女四人、長適宣德郎王律、次適宣義郎劉侔、二尙幼。孫男二十人、悰、恪、慥、悅、懷、悟、悖、悌、恂、慤、怡、恢、惇、懷、忱、愔、懍、懌、懔。孫女六人。公以文學擅名、自結主知、朝廷每脩一書、必以公爲選首。自仁宗至哲宗四朝大典、公悉與焉。有曲阜集四十卷、外集十卷、奏議十

二卷、邇英殿故事一卷、元祐外制集十二卷、庚辰外制集三卷、內制集五卷、尙書講議八卷、曾氏譜圖一卷。公歿逾二十年、今天子即位、盡還元祐貶死人官職、復公龍圖閣學士。紹興二年、賜諡文昭。公久在論思之職、參訂國論、獻替爲多。兵火之餘、朝廷載籍焚滅殆盡、雖至言顯行著在天下、然日月逝矣、恐浸久或失其傳、故掇其大節而詳著之、以備異日史氏採錄焉。

楊時撰《楊龜山先生集》卷二九

曾舍人肇傳

大觀元年六月丙辰、朝散郎曾肇卒。肇字子開、布弟也。中治平四年第、調台州黃岳主簿、鄭州教授。用近臣薦、賜對、爲崇文院校書、兼國子監直講。遷館閣校勘、刪定九域志、改大理寺丞、同知太常禮院、權判太僕寺、殿中省、除集賢校理。脩仁宗、英宗兩朝正史、以肇爲國史院編脩官、判登聞鼓院。六

曹建、除尙書吏部郎中、與脩兩朝寶訓。母喪服除、爲尙書戶部郎中。復爲吏部兼著作郎、遷右司郎中、接伴送契丹賀正旦使。元祐初、爲神宗寔錄檢討。擢起居舍人、中書舍人、實錄脩撰。太皇太后受冊、有旨遵章獻太后故事、御文德殿。肇言、天聖二年、兩制定議、皇太后受冊於崇政殿。仁宗特詔有司、改文德殿。蓋人主一時之制。今皇帝述仁宗故事、以極崇奉之禮、孝敬之誠、可謂至矣。臣竊謂太皇太后儻於此時、特下明詔、發揚皇帝孝敬之誠、而固執謙德、屈從天聖兩制之議、止於崇政殿受冊、則皇帝之孝愈顯、太皇太后之德愈尊、兩誼俱得、顧不美歟。詔如肇請。又論內降之弊、始自細微、漸無紀極、不可不戒。諫官王覲謫知潤州、肇言、覲以論及執政罷去、臣恐在廷以覲爲戒。異時執政有罪、陛下不得聞矣。哲宗悟、加覲直龍圖閣。使契丹回、奏、臣道雄、瀛民訴差役不便、願更具未便民



儒藏

者。河決而北踰十年。二三大臣力欲回復故道。俾都水使者王孝先主之。肇屢陳不可。蔡確責新州中書舍人彭汝礪當草制。不奉詔。而諫官言汝礪寔肇使之。時肇新除給事。固辭請外。以寶文閣待制知潁州。明年徙知齊州。及至。改陳州。又明年徙知應天府。七年。入爲尙書吏部侍郎。論南郊旣去。皇地祇位。議者欲夏至遣冢宰攝事。則不復有親祭地祇之時。於事天則躬行。事地則遣官。非王者父天母地之義。又議明堂配學。請復設五帝。與昊天上帝並祀。徙刑部。知徐州。數月徙江寧府。紹聖初。知瀛州。降集賢殿修撰。知滁州。歲滿。知秦州。又徙海州。徽宗即位。復爲中書舍人。上疏曰。治道在廣言路。以言賞人。猶或畏縮不進。以言罪人。人將鉗口去矣。會日食四月朔。故事當降詔求直言。上命肇草詔。能具述意。詔下。投匭者日千百人。元祐士大夫以赦恩甄叙。或復舊職。典方面。肇奏。生者

蒙恩固已厚矣。唯是游魂枯骸。尙未被聖恩。死而有知。豈得無望。請如寇準。曹利用故事。檢會臣僚貶死未經叙復者。還其所奪官職恩澤。又乞如祖宗朝每大赦後。置看詳編配罪人一司。命官典領。使流竄廢錮之人。均被恩澤。遷翰林學士。知制誥。兼侍讀。請上觀唐貞觀政要。陸贄奏議。諫官陳瓘以言東朝尙典政事被謫。肇即上書兩宮。乞復瓘職。且明瓘意在於愛君。執政倡言。上當爲哲宗期從兄之服。肇在邇英。讀史記至堯崩。三年之喪畢。因言堯舜同出黃帝。然數世已遠。舜且爲堯喪三年者。舜嘗臣堯故也。侍讀溫益進曰。史記世次不足信。若堯舜同出。則舜娶堯女。爲娶從祖姑。肇以史記世次。禮記祭法。大傳之說。與益質於上前。益語塞。布相肇避親嫌。除龍圖學士。提舉中太一宮。兼集禧觀公事。修撰哲宗寔錄。修神宗寶訓。國朝會要。出知陳州。徙太原府。南京。揚州。又徙知定州。

落龍圖閣學士、謫知和州。道除舒州靈仙觀、徙知岳州、貶濮州團練副使、汀州安置、移台州。未至、復朝散郎。卒年六十一。

《實錄》本傳 《名臣碑傳琬琰之集》下集卷二〇

歐陽叔弼傳

昔司馬談爲太史、其子遷繼之、而司馬氏書行于世。司徒掾班彪著漢史、不成、其子固繼之、而前漢書行于世。中壘校尉劉向博物洽聞、善文章、其子歆繼之、而向、歆父子之書亦傳而不朽。自漢魏以來、父子之文顯者多矣。至于名天下而傳後世、則未有如三家之盛也。本朝廬陵歐陽文忠公起于天聖、明道之間、主天下文章之盟者三十年。當時言文章者至歐陽文忠公然後以爲極而不可加、謂之文師。而位居三府、身輔三朝、有大功于社稷。而其子叔弼甫復以文學登第、能世其家、爲人廣覽、強記、博通經籍、史氏諸子百家之言。文忠公之

文須人代者、多出叔弼甫之手。而東坡蘇子瞻在翰林、亦多以內表章屬叔弼甫代之、人莫能辨。嘗稱曰、文不可以不學古而後爲也、要能以古人語而道己意、則可與言文矣。文忠公薨後、叔弼甫代爲遺表。神宗皇帝見而愛之、意文忠公自作其表。傳于天下、天下之人亦以爲文忠公自作也。使在金馬玉堂、應制代言爲詞臣、當復有文章行天下、庶幾談、遷、彪、固、向、歆三家之盛、而老死不能用、以一朝請大夫終于穎上。然叔弼甫在、則文忠公之遺風猶有存者。叔弼甫亡、則文忠公之遺風益遠焉。今叔弼甫亡矣、是可哀已、是可恨已。叔弼甫字也名棐。其先廬陵永豐人也、初以文忠公蔭守祕書省正字。年十二三、文忠公意已賢之、嘗著鳴蟬賦、叔弼甫猶侍不去。文忠公曰、兒異時必能爲吾此賦矣。因書以遺之。及稍長、文忠公益器其爲人、嘗書以教叔弼甫曰、孺子記之、藏精于晦、則明、養



儒藏

神以靜則安。晦所以蓄用、靜所以應物。善蓄者不竭、善應者無窮。雖學則可至、然性近者得之易也。孺子記之。及舉進士、中乙科。文忠公在位而老、叔弼甫不言出仕、文忠公強之。及調陳州節度推官、亦竟不之任也。及文忠公薨、終喪、始以大理寺丞爲審官東院主簿、入官制局爲檢詳官、同知大宗正丞事。三遷爲朝奉郎、守太常博士、尙書主客員外郎、改考功、攝領吏部侍郎左選。是時九品以上注籍左選者數千員、法年二十即仕于州縣爲吏、謂之入仕。議者曰、此官所以冗者歟。乃建言、故事、年二十五歲乃試于銓、守選三年然後入仕。今官冗、請復二十五歲守選之法。且使進士特奏名者減其舉數以示恩、亟與之官而不使仕、則左選清矣。叔弼甫曰、嘻、非朝廷所以議冗官之意也。乃著議曰、左選之冗、士人之病爾。朝廷憫而議之、欲利之爾。今加五年使守選、是反害之也。所謂特奏名

者非他、儒生而老于場屋無成者也。憫其無成而老、故與微官、使之霑祿而後歸。今亟與之而不使仕、所謂官者、乃虛名爾、豈爲恩哉。是終窮也。議者之言遂格。哲宗即位、爲祕書省著作郎、充修實錄檢討。叔弼甫曰、古雖不諱嫌名、而今日爲官稱、則不可以不諱也。乃辭不就職、而更爲集賢校理、判登聞鼓院、後入省爲職方、禮部二員外郎。會詔議南北郊祭、或曰分祭禮也、或曰合祭禮也。而主合祭者方用事、諸儒多折而從之。叔弼甫獨曰、分祭、合祭、唐志有之矣、吾先君子之所論也。吾雖欲合議者而排分祭、如違先志何。如異禮經何。及議皇太妃典禮、哲宗皇帝詔使爲差降、謂于太皇太后之禮爲差降也。而議者以謂詔語所及之事則爲差降、詔語所不及之事則不爲差降、大略于母后之禮無差降矣。叔弼甫曰、太皇太后與皇太妃位號不同、禮亦異數。差降之詔、何可違也。議者猶持



不決。叔弼甫曰：上詔所謂差降者，請物物而爲差降也，豈有及不及之事哉？議者不能勝叔弼甫之說，遂如詔。會章公子厚入相，叔弼甫數請外，乃以朝散郎、祕閣校理知襄州。有魏泰者，曾公子宣衛國夫人之兄也。居襄二十年，倚子宣之重，以傳食于漢南，雖爲布衣，州郡以倖貳之禮接之，猶慊不懌。多規占公私田園，強市買與民爭利，前後無復誰何者。于是以州門之東偏樓店官廢址爲天荒，而請之。上下彌縫爲成書，然後示叔弼甫。叔弼甫曰：孰謂州門之東偏而有天荒可請乎？卻之。州官上下更謂叔弼甫曰：泰橫于漢南日久，未易裁也。彼請地而遲與之，且不可，況終卻之乎？叔弼甫曰：天荒地野，泰請之州門之左，以門左之地爲天荒，售人非政也。憚泰而誣天荒之令，非法也。泰聞之，怒訴于轉運司，下其訴于州。叔弼甫終持不與，泰由是訴叔弼甫于子宣矣。襄罷，以朝請郎知潞州。

潞罷，乃禡所帖校理，還吏選，繼降官二等。元符三年，始復以朝散郎還朝，爲尙書吏部郎中，遷右司郎中。請外，遂以朝奉大夫、直祕閣知蔡州。蔡地薄賦重，而轉運司爲覆折之令，以多取于民，民不堪命。會有手詔申勅科折之令，禁其覆折，而官吏憚轉運司，不敢以詔旨從事，請于叔弼甫。叔弼甫曰：詔旨如是，亟行而已矣。何請爲？衆曰：覆折雖非令，而轉運司賴以爲經費，所從來矣。罷之，則將以他事中傷州郡，不可爲也。叔弼甫曰：州郡之于民，詔令苟有未便，猶將請之。今天子德意深厚，知覆折之病民，手詔止之，而憚轉運司不行，仍覆折以病民，獲罪于朝廷，州郡豈可爲也？遂行如詔。民持覆折之輸至州而還者半道矣。嗚呼！文忠公以道德文章爲三朝天子之輔，學士大夫皆師尊之，出文忠之門者，得其片言隻辭，見于文字，爲稱道，已足自負而名天下。況于叔弼甫者，親爲其子，又文忠

公之所賢。父子之間、非他人親炙之所可及、而竟不得以文章少自見于世。故余紀次叔弼甫在吏部考功、禮部時議、襄蔡二州政事、以見叔弼甫終不得以文章用而暴于人者、乃議論與吏事爾。然非好學守道、識大體而又有仁民愛物之心、則其議論與行事孰能爾也。叔弼甫常著堯歷三卷、合朔圖一卷、歷代年表十卷、三十國年紀七卷、九朝史略三卷、食貨策五卷、集古總目二十卷、襄錄二卷。叔弼甫亡後、其家集所自爲之文亦二十卷。蓋雖不表見于當世、而猶足以遺後人也。叔弼自去蔡後、係元祐籍、復鑄職降官、守以宮廟、居潁州里第、間游吳中。俄出籍、乃以兩恩當任子孫者、力請于朝三四、以官其兄子之子、曰先公之長曾孫、不可以無官、吾子之子無官可也。政和三年卒于潁州、年六十七。一子曰愿、宣義郎。三孫、其二官、一無官。贊曰、

歐陽氏出于伯禹之後、爲越王句踐、句踐之裔孫多受封于楚、有封于烏程歐陽亭者、遂爲歐陽氏。漢有博士和伯、以治尙書顯名、世謂之歐陽尙書。而率更令詢、事唐太宗亦顯名于世。至文忠公遂大顯、爲本朝宗臣。生四子、叔弼甫其第三子也。雖不用于世、亦爲顯人。余自治平以來、從叔弼甫游如兄弟。今同游者喪亡殆盡、惟余尙存。故勉爲叔弼甫作傳、紀其大節云。

畢仲游撰 《西臺集》卷六

李修撰墓誌銘

宣和三年閏五月二十有七日、中大夫、右文殿修撰、隴西縣開國男、食邑三百戶李公、以疾終于家。歲八月二十有八日、葬于常州無錫縣開元鄉湛峴之原、與其夫人吳氏同穴。越明年、其孤以晉陵鄒柄狀來請銘。余與公俱閩人、又嘗同爲諸生、肄業于上庠、挾策考疑、時相從也。俯仰四十餘年、一

時朋游凋喪略盡與公有平生之舊而知公之詳蓋無遺矣宜其有請於余也余雖不能銘其何可辭公諱夔字斯和其先江南人唐末避亂徙家邵武故今爲邵武人曾祖諱待仕閩以武力顯閩亡退處田野祖諱僧護考諱賡皆隱德不仕考以公貴累贈正議大夫妣黃氏資政殿大學士履之姊累贈高平郡太君繼妣饒氏累贈廣平郡太君皆改贈太碩人公幼孤鞠于外家成童猶未知書而穎悟絕人舅氏大資政黃公擢第歸一見器之使賦詩有驚人語因授以書凡耳濡目染過即成誦至日數千言自是於六經諸子百氏之書下至毛鄭箋傳期年之間無所不窺學日進文日益有名從黃公游者咸推先焉是時朝廷方以經術造士公聲聞籍甚所至學者景從羸糧重趂越百舍而至者常相躡也逮居上庠所交皆一時知名士初補監生泊選內舍皆第一龔公原得其文讀之嘆

曰此必山林幽棲篤學之士所爲今之學者莫能爲也其後預天府薦及試南省皆第二遂中元豐三年進士第釋褐調秀州華亭尉邑令所爲多不法公每規正之部使者欲有所按治聲言行邑公迓之境上則以溫言慰薦且詢令所爲公力庇之不以言部使者不悅正色復詢之丞簿丞簿與令素不協則互訐所短而令初不知公庇之也亦言公嘗以私故不過廳於是部使者以公爲長者已而考覈之三人者皆以罪去而公獨無累人以是知公之器度爲未易量也丁繼母饒氏太碩人憂服除調建州松溪縣尉兼主簿秩滿移池州軍事推官太守羅公彥輔性彊愎行事或失中公必面折之初雖不悅而後卒相知也民有乙與甲爭塘水而毆甲至死者獄具刑官欲寘之極典公當書斷建議以爲事有所因法不至死爭之得減等公猶不已太守怒甚至以語詆公公不爲屈爭之愈



力於是命他官書斷。其後大理詳讞以甲準盜論。乙乃止當杖。審刑書斷官以失入抵罪。衆始愧服。然公猶坐嘗簽書及用薦者改官。降次等。授宣義郎。人多勸公直其事。公卒不自明也。差知無爲軍廬江縣。改福州懷安縣。未赴。從故龍圖閣直學士陳公軒辟知杭州錢塘縣事。有兄弟爭財而訟者。累政不能決。公至。取案牘焚之。諭以同氣至情。財不足言。兄弟感泣。拜於庭而去。異日公復過錢塘。二人猶求見公以謝。故觀文殿大學士呂公惠卿帥鄜延。辟充經略安撫司勾當公事。初公之尉松溪。呂公謫居建州。得公之文奇之。一見如故。以是首辟公置幕下。至延安未逾月。適夏人傾國入寇。號百萬。人心危慄。公徐爲呂公陳方略。一路賴以完。及米脂之役。工未畢。諜言賊兵十餘萬且至。諸將棄城而遁。公曰。彼衆我寡。去將安之。是速死爾。不若按兵勿動。城雖未完。冒以樓櫓。彼將以我爲

有備。必不敢進。兵法所以使敵人疑者。正謂此也。諸將然之。卒如所料。凡築殄羌威羌等十餘城。未嘗不在其間。其後奉進築圖至闕下。因上五議。欲使諸路乘虛互出。以伐其併兵之謀。進取橫山。斷其右臂。參用漢唐實邊轉輸之術。申命州郡。廣招置之法。爲足食足兵之計。懲二寇輔車相依之勢。以備不虞。識者以爲切中邊事之要。累賞轉奉議郎。除江淮荆浙等路制置發運司勾當公事。未赴。改授簽書平江軍節度判官廳公事。嘗攝郡事。適當累政因循之後。獄繫甚衆。公命數吏分條其所犯。不日皆決遣之。遂以無事。今上即位。覃恩轉承議郎。勳武騎尉。賜五品服。以太學博士召。道除太常博士。轉朝奉郎。遷知大宗正丞事。因職事奏疏上四事。大略以謂總麻親宜有蔭孫之法。非袒免以下小宗。有未食祿者。宜廣流澤。特官之。宗室雖得以科舉進。尙宜許之入學。以養成其材。且罷刺



史以上公使、以恤非袒免無官之孤。皆當時所宜行者。有旨送講議司。除屯田員外郎、以論鄜延進築功、特遷兩官、轉朝請郎、勳雲騎尉。久之遷禮部員外郎、天子視學、公以爲盛德事、獻視學頌、有旨第其文高等、遷朝奉大夫、勳飛騎尉。時朝廷議禮考文、禮官視他部爲重、非通知古今之學不足以當其任。公傳經稽史、無留事。兩以考課被賞、改司封員外郎、長貳相與舉留之、復還禮部、轉朝散大夫、勳驍騎尉。然公雅意欲就閒曠、力請外補、除知蔡州、朝廷惜其去、留爲宗正少卿。訓辭有曰、非清德老儒、曷任茲選。士論榮之。轉朝請大夫。天子受八^八寶、覃恩特遷左朝議大夫、兼學制局參詳官。移太常少卿。時故相劉公正夫在政府、劉公大資政黃公婿也、以公聯姻婭、亟請避嫌。上曰、此真太常也。因批其奏曰、公議所在、何嫌之有。公遂就職。官制行、換中奉大夫。未幾、復慨然語所親曰、吾平生

爲禮學、方布衣時已預修衣冠制度。今備位卿寺、得司天子禮文、於吾足矣。士當知止、豈可冒進不已。遂堅求退。或者勉公曰、奉常清切、於禁從纔一間、盍少留乎。公笑謝之。朝廷度其不可復挽、則除公集賢殿修撰、知鄧州、兼西南路安撫使。陛辭、天子勞問優渥。公建言、先帝常命官修中書備對錄、以知官吏流品、戶口錢穀之數、以知禮法文爲、軍兵名額之數、以知刑罰赦宥、工事夫役之數。蓋體周官歲終受會之意、而所以周知天下之務也。方今內外事物之要、盈虛繁簡之實、欲有所稽考、盍命左右司略倣前制、爲一書上之、以資觀覽。天子深然之。有旨如公所請。公之意、蓋非苟然而已也。南陽大藩、爲帥者多務大體、不親事、吏得舞文爲姦。公下車盡革前弊、綱紀大整。與部使者議事、有所不合、公獨請于朝、事卒見聽。當路滋不悅、公弗顧也。然自是若有不釋然者、遂以疾請宮祠。朝廷

意公憚安撫一路之勞、除知潁州。章再上、祈懇愈力、除提舉杭州洞霄宮、勳騎都尉、賜爵隴西縣開國男、食邑三百戶。公東歸、居於梁溪錫山之傍、日以文字爲娛、澹如也。子綱爲鎮江教官、就養子舍。與賓客過從、盡登臨之適、優游自得、不復以世事介意。嘗有貴公素知公者、被召與公相遇於途、詢以所欲、公從容誦少陵江漢垂綸之句以答之。貴公咨美。還朝、每稱於諸公間、以爲不可及也。及綱爲尙書郎、丐迎養京師、除公提舉醴泉、轉中大夫、改右文殿修撰。頃之、以足疾不任朝謁、請復洞霄、凡爲宮祠者逾十年。綱自左史論事得罪、方遠謫、公誨之曰、進退出處、士夫之常、汝勉自愛、毋以吾老爲念也。父子之懿、聞者仰之。及歸、公喜見顏間、曰、汝罪大謫輕、謫未久而歸、上恩厚矣、何以論報。時公方避寇海陵、盛夏遽促歸、旣還、以微疾上章告老。命未及下、而公疾已革、顧諸子曰、汝等皆在

吾左右、吾何憂。因不復語、怡然而逝、享年七十有五。公天資純孝、繼母饒氏性嚴肅、公事之盡子道、得其歡心。於兄弟間、友愛尤篤。旣除饒氏喪、盡以資產推與之、獨與季弟曼出居浙右、廩入之餘、一以付之、置不問。其後禋祀、許及期親、即以與其子緯。其教子以孝弟忠信爲本、聞人一善、於父子兄弟間、譽之不容口。退而未嘗不以訓諸子也。自爲小官、喜周人之急、祿雖微、不爲有無計。親族之貧不能家者、均養之。妹姪甥女無資以遣者、必擇配歸之。故鄉里語風義、以公爲稱首。其交朋友盡信義、與人接洞然無城府。尤喜提獎後進、孜孜不倦。門人之躋膺仕者相望也。其在朝廷、每有貢舉、公未嘗不爲考官、其所取多一時名士、人服其鑑裁。平生唯嗜書、無他好。幼學嘗苦無書、旣仕、節衣貶食、而積書之富、至與巨室名家埒。初、黃公以名儒有重望、自熙寧以來、累踐大官、被遇泰陵、進位承



轄士之出其門者衆矣。公爲兒童時，甥舅自爲知己，而退然官州縣垂二十年。逮今上纂極，黃公已均逸于外，乃始以學官召擢。蓋黃公所以期公者遠，而公亦安於義命，不汲汲於進也。晚位通顯，而恬於進取。又率常數考一遷，至一日有歸意，則慨然決去，不可留。其難進勇退如此。公貌怡而氣和，爆順而中勁。少有大志，而深自韞養，不以所長自見。至其謇然持議，無所回隱，不爲世變所移，則有人所不能者。建中靖國初，丞相范忠宣公薨，太常議行易名，公爲博士，定其議曰：「公任臺諫，當朝廷清明，民物阜安之時，而公正色立朝，力陳安危治亂之幾。至於法度之廢興，典章之施設，大臣之去留，人材之用舍，一有不當其心，則抗章論列，無所顧避，至有不得其言而去。其列侍從，居宥密，位臺輔，益行所知，從容進見，有責難之恭。朝廷有大利害，與同列辨論上前，各以理勝，如罷大河東注之

議，寢鬼章欵塞之質，下寬大之詔，以安羣心，釋朋黨之疑，以全善類，皆自公發之。然公處心積慮，務在體國，持論平允，不以好憎易情，不以同異介意，惟其是之從也。故鄧綰移揚，公置綰前日論己之憾，而言今日指摘綰事之非。元祐紛更，公置熙寧論議不同之念，而言今日法度盡變之失。非公誠心慷慨，不爲利回，不爲義疚，孰能然哉？若夫救蔡確新州之貶，而忘高位厚祿之爲可懷；論呂大防等宜從寬宥之叙，而不知疏遠嫌疑之爲可避；此人之所尤難，而公優爲之。蓋公以謂大臣之於國，有股肱心膂之托，而乃心王室，曾無內外之間，安往而不任其責耶？方是時，范公名在罪籍，雖門生故吏往往諱言之，而公之議挺挺不撓如此。嗚呼！斯可以觀公之心矣。故余備載其辭，以是銘之。庶其流風猶足以立懦敦薄云。公娶吳氏，奉議郎桓之女。初封仁和縣君，先公二十一年卒，累贈濮陽

郡君改贈令人。子男四人。曰綱。起居郎兼國史編修官。以論事謫監南劍州沙縣稅務。得旨復本等差遣。曰維。承事郎。前監在京諸司糧料院。曰經。通仕郎。試補太學上舍生。未赴殿試。曰綸。通仕郎。女三人。長蚤卒。次適奉議郎。杭州司儀曹事張端禮。次適迪功郎。衢州司工曹事周琳。孫男六人。儀之宗之。集之。琳之。文之。麟之。女三人。有文集二十卷。禮記義十卷。藏于家。銘曰。

日無全牛。奏刀砉然。不逢其族。孰知其難。亡故屢更。鮮不畔援。秉義弗渝。其節乃見。公於建中。土方紛如。不倚不流。介然中居。哲人之萎。讒波稽天。鯁議直辭。如防在川。羣言不孚。咸底于罪。皇明燭幽。公獨無悔。易名之美。自公發之。世濟之榮。公與有之。我作銘詩。以示萬世。庶其流風。聞者興起。

楊時撰 《楊龜山先生集》卷三二

校記

①嘗：原作「當」，據文意改。

②災：原作「蕃」，據四庫本《龜山集》改。

③廢：原作「發」，據右引改。

④除目：原作「除月」，據文意改。除目，除官之名單也。

⑤奏：疑當作「奉」。

⑥弼：原無，據山右叢書初編本《西臺集》補。

⑦八：原作「公」，據四庫本《西臺集》改。按徽宗受八

寶乃大觀二年事，見《宋史》本紀。

宋儒碑傳集卷七十三

唐旣 傳常 劉安世 張咸 劉民覺

王箴

眞淡先生唐公墓誌銘

唐氏遠矣世不乏人惟晉昌太原京兆秦州北海五族最顯天復中建威軍推官名希顏者避地錢塘生仁恭爲鹽鐵判官贈太子太保太保生謂爲通儒院學士從忠懿歸本朝出守秭歸因家江陵終職方郎中贈太子太傅今江陵錢塘之族皆出自北海太傅生極才氣爽拔與孫何齊名弱冠登甲科又與寇萊公爲忘年交丁晉公爲布衣舊略不爲之屈以故仕不脫州縣棄官去其後謝公絳判流內銓疏其節以聞特轉大理寺丞遷殿中丞致仕生一子是爲處士愈處士尙幼慨貧無以養乃捐書力穡亟成其家以適親意先生處士第四子也母某氏先生諱旣字潛亨又取水一火二號

眞淡翁先生始生殿中君仰觀而占曰水躔翼軫楚分也法主文明吾孫骨相異其有以亢吾宗乎初學即與其兄子思寢食自勵子思亦先生流亞也鄉人以此慶處士有子稍長遊太學同舍老生對之歛容不敢惰伯父質肅公介方參大政愛歎以爲類己奏試主簿于將作監鑠其廳中別試異等聲動場屋丁處士憂服除不復赴禮部山林獨往之意於是萌矣親友勉之調渝州巴縣尉非其好也未幾謝去築室於漢水之南居且完顧書籍猶假於人遂走吳粵悉售以歸掩關卻掃凡二十年始也日有所爲以若干爲準雖寒暑風雨不廢以爲積小致高大當如此故於書無所不讀於事無所不能而終也自守其約於象數之外不藥不卧不筮不續草衣藿食往往辟穀日誦易老子黃庭一過而已嘗曰在易之泰后以財成天地之道輔相天地之宜以左右民君子體之則亦財成輔



儒藏

相以左右身。吾非悅生而惡死，所以尊生者，上以報生我之施，下以善吾死耳。人有疑其不置像設者，曰：覆載俯仰，皆神明也，豈像設所能盡耶？吾事之以道，自謂勤香火者無以過也。其所養蓋如此。吏部尚書彭公汝勵按刑京西，時就見之，自以爲弗及。左司諫孫公諤爲淮安守，聞且過郡，迎謁歸心焉。至闔城扉留之，畫其像以慰其別。自餘名人豪士有獲際者，睹其貌，龐眉頰頰，天庭骨隱起如徑寸珠，聽其言，縱橫無滯，較若決積水於千仞之谿，靡不罔然自失也。以故通經者服其得先儒未決之秘，博古者服其實，方冊所載之詳，修真者服其造一氣未形之先，善書者服其妙八角垂芒之體，下至百工衆技，亦皆服其巧出意表。然先生初不以此自多也。遇人有所不及，人自服之耳。或曰：此特往而不能返者，奚爲哉？及觀其語學者，則曰：古之人身包形器物，來則任以形器之所宜，固有

歷聘以觀其可，不可與有行者。若合不合，則歸於道之興廢焉。或運天下如反掌，或準天下以言行，其致一也。又嘗因詔求言，欲令其子條列復井田、修廢官之說以獻。彼以爲往而不能返者，果知先生也邪？門人魏倚取孔子所謂隱居以求其志，行義以達其道者，概之幾矣。教子務充其德性，且曰：良能富於己，何得爲貧？識者皆貴之，何得爲賤？此天下真富貴也。汝能自立足矣。餘聽命可也。惇叙姻族，尤有恩義。貧不給者衣食之，婚嫁之，死則哭之，寢門以盡其禮。將逝之年，玩易不去手，每有所得，必肅衣冠，北向稽首，以爲目中了然。見六十四卦定位於天地之間，庶幾不爲仁智所域，與昔日以意致之有間矣。但神機不可輕以告人。一日，忽屏人，獨居家人，意其不快，呼醫，遽止之，曰：吾無苦。然諄諄贊易，以爲道之至數。孔子言之，妙不違則。天且有則，況其凡乎？老子言道，大體而已。默推此



語殆於數之至神者先受之也。後十日命汎掃道室、聽醫診脈、平不異他日。俄而正坐、妻子環侍、了無一語、儼若假寐然逝矣。自啓手足至大歛、體溫如平生。實元符三年九月二十日也。前此晝有白星隕道室前、乃先生生日八月八日也。越月而逝、異矣夫。享年五十四。娶陳氏、左中散大夫習之女。知書、有賢德、能佐先生立其家而成其子。子男長曰愁、次日慙、習舉進士、修身慎行、似先生者也。先生流澤、其由此而光乎。幼男節與二女皆早卒。文稿十五卷、邦典二卷、易論三卷、門人集所聞爲說約十卷。其家卜以崇寧元年三月甲申葬先生於襄陽縣隆山之東原。前期愁持魏倚狀走京師屬銘。嗚呼、先生於浩厚矣。嘗謂知其心者、天下一人而已。前年九月、浩以諫官論事狂妄竄新州、先生留荆門待焉、誨告纖悉、無所不及。旣別、明日又追路語曰、我昨夕深念尙有某事未竟。浩竊疑之、

先生寶練神氣、面有孺子色、而浩方且窮處瘴氛、必死之地、不復相見決矣。孰謂未一年、浩偶蒙恩生還、而先生奄忽與化俱耶。浩教授襄陽時、見先生本周官以釋春秋、謂之邦典、因勸盡釋諸經、以發吾覆。先生約五十五歲成之、又孰謂五十四而先生逝耶。莊子曰、死生無變於己、而況利害之端乎。先生平日齊家與檢身等、教子與正心等、固未嘗頃刻置也。而將逝之際、乃獨不留一語、蓋不知所以忘而忘焉。至矣乎、非死生無變於己而能若是乎。使其家不以銘見屬、獨當自以文字發潛德之幽光、矧其子不遠千里、匍匐踵門、哀訴如此、其勤乎。於是掇其遺事、論次而爲之銘。銘曰、其傳有書、其似有子。其不可得而泯者、無所終窮。其五十有四者、數而已矣。光莫隆乎日月、大莫外乎天地。萬物各正性命於其間、孰能妙無己以爲己。嗚呼、亘千古而常今、先生其在此。

鄒浩撰 《道鄉集》卷三五

傅府君墓誌

高郵傅明孺諱常攝揚州助教瓊之第二子嘉祐治平間與予同硯席共敝衣服無憾也是時明孺尙未冠予亦年少耳淮之南學士大夫宗安定先生之學予獨疑焉及得荆公淮南雜說與其洪範傳心獨謂然於是願掃臨川先生之門後余見公亦驟見稱獎語器言道朝虛而往暮實而歸覺平日就師十年不如從公之一日也既歸明孺驚曰自今事兄矣豈曰友之云乎然予亦不自讓也憩其館累月食客以予故日嘗數十人助教禮數益隆無倦容厭色逮予遭遇神考既躋侍從而明孺喪親生事日窘急不復積精問學矣雖有良質美意不能充也元豐中過我京師予勉之曰夫青出於藍而青於藍故學而能過其師者有矣昔子質美於予今更弗如是不學之過也明孺嘆曰老矣

不能復進於此願教子如公教且傅氏多隱德若陰報不昧後當有興者請名子興祖興宗興嗣曰此其所以志也居久之予守金陵過其家明孺既卒矣弔其孤而哭焉見其卒時自爲偈有風掃落花之語是亦達者也享年四十六歲娶王氏早卒其姊沈氏生三男六女女四人已嫁其長壻進士章忱明孺自擇也家事賴其經理頗有緒云興祖能自樹立蓋傅氏父子積功累善其鍾將在於此明孺以元祐七年四月甲子卒以紹聖三年四月甲子葬墓在揚州天長縣亭午鄉助教之兆云

陸佃撰 《陶山集》卷一五

劉諫議安世傳

宣和七年六月戊午承議郎直龍圖閣劉安世卒安世字器之父航神宗朝爲太僕卿國史有傳安世熙寧六年登進士第調洛州司法就辟高陽帥幕父喪服除爲河南府左軍巡判官哲宗初劉摯



爲御史中丞薦之、除右正言、首論祖宗以來執政大臣親戚子弟未嘗居內外華要之職、自王安石秉政以後、盡廢累聖之制、專用親黨、務快私意、二十年間、廉耻掃地、今廟堂猶習故態、太師文彥博、司空呂公著、左僕射呂大防、右僕射范純仁、門下侍郎孫固、左丞王存、右丞胡忠愈、堂除子弟親戚几十人、且曰、惟中書侍郎劉摯未見所引私親、而依違其間、雷同循默、豈得無罪、願出臣章、徧示三省、俾自此以往、厲精更始、又論胡宗愈除右丞、不協公議、臺諫交章、已而諫議大夫王觀坐是罷斥、中丞孫覺、御史楊康國相繼辭去、安世與左司諫韓川復申言之、尋亦乞補外、時兩省諫官惟安世獨員、章二十上、宗愈乃罷、章惇強買崑山縣民田、吳處厚繳進蔡確知安州日詩、安世皆極言、且謂惇確與黃履、邢恕自言聖上嗣統有定策功、眩惑中外、若不早賜辨正、恐歲月浸久、邪說得行、離間

兩宮、有傷慈孝、乞斥惇確等屏之遠方、先是、御史臺見安世論惇確罪、初無一言及王汾、迨汾除諫議大夫、則全臺上章、又中丞李常、侍御史盛陶累以復行新法爲請、安世言常、陶皆安石黨、安石殘民蠹國、向之云凶人皆稱賀、汾時無言責、乃獨上言、乞賜惡諡、以憤世疾邪之意、常等惡傷王氏、因汾之除、相率醜詆、于是常、陶與御史趙挺之、王彭年同日皆出、臺爲一空、方確之未貶、范純仁、王存密爲申理、乞從寬貸、及彭汝礪、曾肇同爲中書舍人、皆營救之、暨確有分司之命、汝礪封還詞頭、安世又劾奏之、由是純仁與存俱罷、汝礪、肇亦補外、尋除起居舍人、兼右司諫、遷左諫議大夫、時有詔權罷講筵、安世上疏、願爲宗社大計、清閑之燕、頻御經帷、以助聖學、哲宗嘉納、初、鄧溫伯爲翰林學士、草王珪制、有預定議于禁塗之語、及爲確制、則曰、尤嘉定策之功、至是溫伯爲承旨、安世言溫伯

陰受邪說、稍紂王珪而溢美于確。確寔何力、敢貪天功。凡六上疏不報。請祠、除中書舍人、辭不就。除集賢殿脩撰、提舉嵩山崇福宮。明年、以寶文閣待制爲樞密都承旨。時呂惠卿以光祿卿分司南京、安世復應詔言事、謂惠卿國之巨蠹、四海所疾、宜永投荒裔。考之常法、猶未應叙、不識何名、遽復卿列。若惠卿之命遂行、則將藉以及確。確復用、則章惇之徒如蝟毛而起。爲國家計、其得安乎。願使中外群小不能動搖正道。紹聖初、章惇入相、降官落職、知南安軍。未至、提舉洪州玉隆觀、尋責少府少監、分司南京。三年、貶新州別駕、英州安置。時蔡確子渭數上言訟呂大防、劉摯及安世等、朝廷委翰林學士蔡京等究治。京親爲奏劄、請誅滅摯。安世等家族乃移安世梅州。旣而究治無驗、而惇尙乞遣呂升卿、董必使嶺外置獄、欲盡誅之。賴哲宗仁聖、其請不行。徽宗即位、移衡州、尋以濮州團練副

使、鼎州居住。繼復承議郎、集英殿脩撰、知鄆州。崇寧元年、復待制、知真定府潞州。二年、落職、知沂州。改提舉西京崇福宮、貶信陽軍。三年、除名勒停、峽州羈管。五年、叙承事郎。大觀二年、叙宣德郎、奉議郎。四年、復承議郎。政和八年、提舉南京鴻慶宮。宣和六年、復直龍圖閣。卒、年七十八。安世少師事司馬光、初仕、請於光曰、願一言終身行之。光曰、其誠乎。吾平生力行之、故立朝行己、俯仰無愧。安世問其目、光曰、自不妄語始。旣擢言路、入白其母、將以辭親、母告之曰、不可以閨門之私辭君命。勉之、力言當世之務。幸而開納、利澤足以及物。或有非意、吾不以遠近、誓與汝偕。及將南遷、母怡然曰、茲事固知如此、特有遲速耳。且戒毋以得喪爲意。有文集二十卷、盡言集十三卷、資治通鑑音義十卷。子伯英、伯廉、伯和。

奉議郎張君說墓誌銘

予大觀元年以維揚執事被出、廢處於家。越明年、故人君說之子澥狀君說之行來求予銘。惟嚴君說之才、每與士大夫談之、無不敬愛。考其平生、固有可銘者、夫何辭。君說、張氏姓、名咸、字君說、本長安人。七世祖遭晚唐衰亂、辟地於蜀、寓居成都。淳化中、曾祖徙於廣漢之綿竹、故君說爲綿竹人。曾祖諱庭堅、祖諱文矩、贈大理評事。父諱統、以殿中丞致仕。君說陞朝、贈奉議郎。母趙氏、贈靈壽縣太君。王氏、封華陽縣太君。未及拜命、先君三年卒。朝奉君捐館、諸兄相繼以亡。君說年未冠、家徒四壁、伯兄之子濩、淮與其女弟、煢煢無依。君說力學、一舉登元豐二年進士第、遂攜諸孤之官、撫養教育、訖於婚嫁、視之猶君說子也。初釋褐、除蜀州新津簿、繼遷仁壽令、再遷雅州百丈令、改華州學教授。元祐初、詔復六科。君說慨然曰、吾先君嘗應是詔、

可不終成其志邪。於是晨夕探討披閱、寒暑饑渴、未嘗釋卷。故六藝百家、歷代文史、無不該貫。一旦再預閣試、遂對大廷、哲宗皇帝擢居第一。改宣德郎、僉書成都節度判官公廳事、轉奉議郎。昔我宗祖分設六科、以籠絡天下雄俊、故士有策名於此者、不淹歲月、遂躋華要。名卿巨相由此途出、十常三四、得人之盛、度越前世。逮神考有爲、超然遠覽、既患道德之不一、又憫士夫弊於雕蟲之習也、故一以經書造之、而詞賦與六科俱罷。及其中復、吾蜀與選者中三人、而君說與什邡君普、王君與君說亦相隨淪沒。嗚呼、科舉廢舉與夫人物盛衰偶相值耶。抑人事天理故有前定也。嗟乎、以君說疏敏之才、宏瞻之學、與其經世之志、假之以年、則功名富貴視前人何歉。君說長於序事、稽參古今、披文相質、歷歷可取。年方齠齔、一睹弈碁、妙盡其數。士大夫罕能及之。其天資穎悟若此。凡三娶、任氏



贈仙源[○]趙氏贈仙居、計氏封仁和、並縣君。生五子、曰澥、曰漢、曰潞、曰滉、曰浚。女二人、長適進士陳侂、次適進士王恂。孫男三人、杓、樞、樺[○]。元符二年五月初四日、以疾終於成都普福僧舍、享年五十二。大觀二年三月初十日、葬於浦閬鄉柔遠里之新水澥。編類所爲雜文二十卷、藏之於家。銘曰、

挺妙質、馳駿聲、大廷發策超羣英。胸中素蘊蟠滄溟、文采燁燁垂天星。哀哉造物不我營、胡不假以天之齡。奄忽順化人所驚、幸聽雛鳳高岡鳴。慰我感慨遺芳馨。

碑久漫滅。淳熙十三年、孫朝散郎、權尙書兵部侍郎、兼知臨安軍府事、兩浙西路安撫使杓[○]、得遺本于故度中、重新謄寫。曾孫通直郎、新差知潼川府飛鳥縣兼來調官、俾石立於墓下。

無名氏撰 明萬曆四十七年刻本《全蜀藝文志》卷四七

處士劉公墓表

劉公居建之潭溪九世、餘二百年矣。其初京兆萬年縣人、唐僖宗時有爲將軍者、歲久名逸。五季亂、子諱庸者南遊、獵較於此、愛其形勝、因家焉。今推爲始祖、以其近而可攷也。皇考忠顯公曩使關中、嘗訪京兆劉氏、僅有存者某、雜著譜牒諸書。劉氏、陶唐系也、自元王交封楚居彭城、支派最衍、今九大族并出元王之後。唐史譏言劉悉出彭城、非也。京兆劉氏乃九族之一、周有石州刺史懿、隋有上柱國韶、唐史有民部尙書文靜。自文靜子樹義而下、未詳其繼。惟我始祖之居潭溪也、蕩拓焚拂、以啓山林、二世而廬室完、三世而田疇闢。庸生光位、光位生玉、玉生文廣、文廣生朝議公太素。於是崇禮文、篤經術、謹遊從、厚風化、是載是循、久而弗怠。識者知其後之必大也。公諱民覺、字莘材、朝議次子也、恪紹前脩、濃薰泛挹、早自知名。正奉遊學、時普寧暨夫人老矣、公常留侍、以故不遑科舉之事。



夫人年九十六而卒。公始終孝養，敬不弛顏。既葬，結茅罄哀，鄉評尚之。耄老聚而請曰：非公孰爲吾黨指南？公據師席二十餘年，毓英導秀，多所成就。忠顯之守會稽長樂也，嘗迎公就養。二郡江山，大有佳處，公從羽流衲子逍遙物外。時忠顯公欲請於朝官之，公曰：衰朽那復有此意？若欲亢宗，則夫二子在。蓋其恬曠自適，世網莫之能撓也。公爲人淳樸謙厚，溫溫然常以和畀人，人皆樂親之。內蘊雖深，若不叩擊，似不能言者。紹興改元，寇作，里中騷動，公時已卧疾，扶輿適上饒慈氏寺，以其年十一月十五日卒，享年八十四。公娶吳氏，司業著之妹也。二子曰：輿曰輒，皆將仕郎，忠顯公貤爵，遵前志也。一女適進士吳敏脩。孫男子翬、子翌。以紹興三年八月乙巳歸葬於壽口之原。吳氏後公十二年卒，享年八十一。又三年乙丑十一月乙酉合葬焉。壽口、潭溪皆在崇安縣開耀鄉云。畢事，叔

父命某爲文表墓，姑紀其實以曉方來，非敢私親而侈也。辭曰：

谷變陵遷，山摧石泐。死而不朽兮，潭溪老人居此室。

劉子翬撰 《屏山集》卷九

王元直墓碑

西蜀有隱君子王元直者，吾母同安君之弟也。過生二十年，不識外家。侍二親錢塘，舅氏自蜀來見。吾先君子相與論契闊，談仁義。先君所與遊，皆天下士。於舅氏有布衣交，竦然見於色。留卒歲而歸。時四方門人爭挾所能以進，句一言爲終身榮，或因之以顯於世。而舅氏家無甌石，口未嘗言貧。窮居十年，口未嘗言仕。往返萬里，無一毫屈於人者。旣不可得而親，亦不可得而疏。於是門下士皆悵然自失。過於是時，始得見舅氏眉目，聆其音聲，真有德君子也。嗚呼，豈可以世俗議哉？舅氏之歸，先

君作六言詩餞之、而使諸甥皆賦其後。名公卿和者甚衆、蜀人爭傳之。舅氏閉門不出、陳義益高、世故卒不能累其心。先君之遷於南也、平昔親舊屏迹、不敢問安否者七年。舅氏慨然奮不顧身、曰、公盛時在朝廷、典方面、則往見之。今厄窮瘴癘之地、吾等乃畏避形迹、非夫也。率同往者無一人、遂獨浮江而下、將自洞庭、桂嶺而南。會先君有詔北還、而舅氏遇疾於塗以卒。嗚呼、過謂吾舅氏能行古人之事、而志不達。犯患難、違衆說、而竟爲俗子所快、是重不幸也。苟不書、將何以伸於後而善風俗耶。公諱箴、元直字也。眉之眉山人。祖徙居青神、諱惟德者、其曾大父也。諱文化者、其大父也。諱介者、父也。皆隱居不仕。母某氏。公九歲通經、曉解句義。父好賑施而患貧、無以繼、乃使治息錢、取其贏以周所乏。公從容其旁曰、放於利而行多怨、恐所及者鮮而取怨者多、曷若師孟子所謂仁義而已乎。

父大驚、取券焚之。弱冠、以所屬文見先君子、愛之、稱於賢良。侯元叔時爲成都學官、見而奇之。每與論古人、退即書數百言、如史、漢贊論者、元叔嘆其有史筆。居喪、以哀毀見稱。免喪、元叔復召置門下。舉進士、不調。元叔閱其程文、曰、尺度同於人、而中否異、是命也。以詩勉之。公遂不復事科舉、專心讀書、學古文。里中諸父耆儒皆降意與之游、爲忘年交。自錢塘歸、得先君詩文滿篋、以付其子、曰、吾家不貧矣。由是士大夫接迹於門。又以詫於里人、曰、海內士、吾得交於黃魯直、秦少游、王定國、劉景文之流、足矣。元祐間、詔舉經明行修、或以公名聞於部使者、薦書將上矣、力辭而免。蜀人尤稱之。建中靖國元年春二月二十有八日、以病卒於夔州之傳舍、享年五十三。喪歸、蜀人哀之。宣和二年十月二十八日、葬於青神縣之玉臺鄉仁慎里鑪頭山之塢。公娶某氏、子男三人、遇早卒。次曰先、曰光、皆

舉進士。女二人、長適楊元龜、次適楊顥縣。孫男四人、伯遠、仲适、叔達、季逢。公天資仁孝、遇物以誠、與人子言必以孝、與兄弟言必以睦。縉紳間嘗有不能於季孟間者、公作詩感悟之、遂相歡如初。季父慶源、官於洪雅、以論事不合、取長官怒、憂以罪去。謀於公、公笑曰、古人不肯束帶見督郵、彼何人哉。慶源服其語、即謝病去、爲兩蜀高人、公實相之。其聞人之善若己出、有不善者如將浼焉。人由此多改過徙義、不敢使公知。此其行已大略也。嗚呼、吾母與公同氣也、離蜀之年、公尙幼。先君官於南北、不得歸、吾母同安君、每念外家、涕零如雨、曰、是子有立、吾門戶無憂矣。然白首無相見期、奈何。公之來錢塘也、先妣方食、驚喜失匕筯、起從諸甥逆公、餘杭門外、相持而泣、感傷行路、悲其孤而喜其至也。後四年先妣即世、而公之沒相去無十年。渭陽之悲傷、無以報罔極。又二十年、先與光以書來告

曰、先君隱德、未有以表而出之者、子其毋辭。過矧然有感於心、泣而書之。先光皆修身有立、能爲詩文、公有子哉。銘曰、

古人有言、惟仁則榮。豈皆軒冕、貴爲公卿。禮義以載、詩書以耕。藏於其身、瓊弁玉纓。人孰無死、死而不朽。五福有一、可傳於後。曰攸好德、百行稱首。富與貴者、泯沒何有。我觀舅氏、古之逸民。躬耕樂道、以全吾真。化其鄉閭、訓敕子孫。華門圭竇、吾不曰貧。惟士也貴、無慚於古。視其與遊、戶外之屨。青神之原、有墳其墓。讀我銘詞、以考其素。

蘇過撰 《斜川集》卷五



宋儒碑傳集

卷七三

校記

①易：原作「一」，據四庫本《道鄉集》改。

②惟嚴：疑有誤。

③張氏姓：疑當作「姓張氏」。

④紃：按此字張栻《南軒集》卷四〇《張君墓表》、朱熹《晦庵先生文集》宋浙本卷九五《張公行狀》等作「紃」，亦有作「紃」者，當以「紃」爲是。

⑤「縣」字原無，據清嘉慶二年朱雲煥刻本《全蜀藝文志》補。

⑥朝奉君：按上文云「贈奉議郎」，「朝奉」、「奉議」當有一誤。

⑦二年：原作「三年」，據清嘉慶二年朱雲煥刻本《全蜀藝文志》及朱熹《張公行狀》改。按元豐三年非開科之年。

⑧雅州：原作「睢州」，據清嘉慶二年朱雲煥刻本《全蜀藝文志》改。按《宋史·地理志》五，百丈爲雅州屬縣。

⑨宗祖：似當作「祖宗」。

⑩以上二句似有脫誤。

⑪仙源：原作「仙原」，據清嘉慶二年朱雲煥刻本《全蜀藝文志》改。按《宋史·地理志》一，仙源爲襲慶府屬縣。

⑫杓：清嘉慶二年朱雲煥刻本《全蜀藝文志》作「杓」。譚校：「杓，此當作杓、淳熙中知臨安府者，魏公次子杓定叟也。按洪容齋《五筆》：魏公次子名杓，音進。今《宋史》作杓，刊本之誤也。」四庫本正作「杓」。按譚校大謬。此墓誌作于大觀二年，張杓乃張浚次子、張栻之弟，此年張浚僅十二歲，張栻、張杓尙未出生，此「杓」或「杓」乃栻、杓堂兄，不得作「杓」字明甚。惟「杓」與「杓」未知孰是。

⑬杓：原作「杓」，據此時知臨安府者爲張杓，見《咸淳臨安志》卷四八，據改。

⑭「二子」至「志也」：原無，據明正德七年刊本《屏山



藏 儒

集補。

⑮縣：原脫，據道光間眉山三蘇祠刻本《斜川集》補。

⑯母：原作「母」，據備要本《斜川集》改。

宋儒碑傳集卷七十四

司馬康 詹抃 劉公彥 季復 孫覿

賀鑄 游復 游酢

直集賢院提舉西京嵩山崇福宮司馬君

墓誌銘

元祐五年六月丁酉、詔以秘書省著作佐郎兼侍講司馬康爲左司諫。時已屬疾、五辭不許、就賜告。君奏曰、臣不敢拜君命于家、疾間當亟起受。乃留告閣門以俟。詔以君久疾、不給俸、其自止日續給之。君辭不受。七月小間、將受命、疾作、不能造朝。即奏、臣不可以備言職矣、願卒辭新命。詔遣內侍挾御醫三人診視治療、以君清貧、命醫毋得受饋。俟疾損取旨。八月、君奏曰、臣之力憊矣、言職不宜久虛、願領宮觀養疾西都。二聖不得已許之、除直集賢院、提舉西山崇福宮。詔曰、勿藥有聞、即膺吾用。遣內侍諭旨、俾留京師就醫藥、賜錢三十萬。九月

丙寅、以不起聞。明日、輔臣對延和殿、未及奏事、二聖嗟悼不已、命優恤其家、特贈右諫議大夫。遣將作監丞張淳督運木就護殯葬、官給錢百萬。遣中使弔問妻子、賜錢五十萬、又賻錢三十萬、布帛有加。既又遣內侍問行日、賜白金五百兩助襄事。十一月甲申、葬陝州夏縣太師溫國文正公墓次。君字公休、文正公諱光之子也。其先出於晉安平獻王孚、歷後魏、隋唐以及本朝、子孫未嘗去鄉里。積厚流遠、是生大賢。曾祖諱炫、試秘書省校書郎、知耀州富平縣、贈太子太傅。祖諱池、以清直事仁宗、爲天章閣待制、贈太師、追封溫國公。曾祖妣皇甫氏、祖妣聶氏、妣張氏、皆封溫國太夫人。文正公以道德事四朝、進退以天下、起相二聖、勤勞帝室、慰答民望、爲元祐宗臣。君幼端謹、不妄言笑、事父母至孝、出於天性。文正公與夫人皆器愛之、或當遠出、夫人必自挾以往。既長入官、或數日不返家、夫



人輒憂思形于寐厭。或踰月而後歸。則相顧慘然。喜欲泣。敏學過人。博通群書。熙寧三年。以明經擢上第。釋褐試秘書省校書郎。耀州富平縣主簿。時文正公爲翰林學士。奏留國子監聽讀。四年。奏授守正字。五年。監西京糧料院。遷大理評事。文正公以端明殿學士提舉嵩山崇福宮。修資治通鑑。奏君檢閱文字。官制易階承事郎。丁母夫人憂。勺飲不入口者三日。杖而後能起。毀幾滅性。見者哀之。文正公居洛十五年。往來陝洛間。士之從學於公者。退與君語。未嘗不有得。塗之人見其容止。雖不識。皆知其爲司馬公之子也。服除。授簽書山南東道節度判官公事。元豐八年。以韓獻肅公薦。擢秘書正字。轉奉議郎。元祐元年。爲校書郎。文正公爲左僕射。力疾入對。詔君扶掖上殿。賜緋章服。公薨。執喪如喪夫人。哀毀有加焉。治喪皆用禮經家法。不爲世俗事。得遺恩。悉以予族人。其啓夫人之喪。

而合祔也。號慕如初。喪旣葬。廬于墓。凡文正公終事。竭誠盡力。無一不致其極者。三年服除。召爲著作佐郎兼侍講。進講詳明。傳經義。勸上以進德。上必虛己聽之。四年。爲修神宗實錄檢討官。上疏言。王者以民爲天。民以食爲天。自古禍亂之興。皆由饑饉。爲國必有九年之畜。乃可以備水旱。比年以來。旱暵爲虐。民必艱食。若今秋不稔。則公私困竭。盜賊可虞。昔魏李悝爲平糴之法。國以富彊。東漢永初以後。水旱十年。和熹鄧太后臨朝。用征和故事。徙置饑民於豐熟諸郡。躬自減撤。以救災戾。故天下復平。唐太宗貞觀初。天下連歲災害。太宗勤而撫之。民雖東西就食。未嘗嗟怨。至四年。天下大稔。流散者咸歸鄉里。米斗不過三四錢。自古賢聖之君。非無水旱之災。惟有以待之。則不爲甚害。如漢唐之策。已非處處皆有畜積。故令民東西就食。此策之下者也。魏文侯舉國四境。悉令平糴。所在

有儲此策之中者也。三代而上國有九年之畜此策之上者也。今臣願陛下先爲漢唐之下策以濟目前之艱。俟及豐穰乃爲魏文侯之中策。積以歲月漸及三代之上策。乘今秋熟令州縣廣糴民食所餘悉歸於官。今冬來春令饑民就食俟鄉土豐穰乃還本土。夫國家積貯惟以安國。民安則國安。故凡爲國者一絲一毫皆當愛惜。惟於濟民則不當吝。陛下誠能捐數十萬金帛以爲天下大本則四海幸甚。夫實倉廩使百姓足食非獨可以消患太平之化由是而興。措刑之本無先於此矣。初文正公在相位與呂正獻公及同列共議稍修官制以就簡便。令門下中書二省通職事亦先帝詔書本意也。草具未上而文正公薨。至是君復上舊藁降付三省而朝廷未遑有所行也。十月除右正言以執政親嫌辭不就職。五年春上疏歷陳前世治少而亂多祖宗創業之艱難積累之勤勞以勸上

及時嚮學守天下大器。曰德曰才曰識三者皆由於學。又勸太皇太后每於禁中訓導其言切至。四月詔講讀官奏對邇英閣。君初對勸上自強於學以孝德爲治道之先。再對又言孟子爲書最醇正陳王道尤明白所宜觀覽。上曰方讀孟子。尋詔講筵官編修孟子節解爲十四卷以進。君自文正公喪居廬蔬食寢於地遂得腹疾。親戚勉以肉食終不肯。及免喪毀瘠纍然治療不愈。至是益侵。累奏乞留臺宮觀詔不許。遣內侍賜御膳勞問。後乃予優告猶力疾解孟子一卷。自是疾有加。除諫職未受。條具諸所當言以待。曰得一對極言而死無所恨。疾病召醫李積於亮。積居野年七十矣。鄉民聞之告積曰百姓受司馬公恩深今其子病願速往也。來告者日夕不絕。積遂行。至則疾不可爲也。沒語妻子以不報國恩爲恨。享年四十一。公卿嗟痛於朝士大夫相弔於家處士相弔於野市井之民



無不哀之。君篤行、內外淳備、必欲如古人。燕居如對大賓、動靜有矩法、望之色莊氣和而言厲。嚴於祭祀。爲人潔廉、未嘗言財。文正公既葬、二聖遣使賜白金二千兩、立神道碑。君以文正公葬皆官給、碑已具、固辭不許、遣家吏如京師納之。其事君務責難、非堯舜仁義之道不陳於上前。待族人委曲周旋、唯恐不得其所欲。與朋友忠信、久而益親。有文集十卷。初娶張氏、朝散郎保孫之女、追封真寧縣君。再娶張氏、大理寺丞淮之女、封安仁縣君。二子、曰植、曰桓、皆承奉郎。桓早夭。三女、長適假承務郎楊克觀、先君卒、其二皆幼。祖禹與君同修資治通鑑、同爲正字、著作、同修實錄、同侍經筵、相與猶一體也。君初疾、屬以後事、其孤請銘。嗚呼、其可勝哀也夫。銘曰、

烈烈溫公、迪我祖宗。卒相二聖、以成天功。公休之賢、是學是似。民曰幸哉、溫公有子。溫公有子、天子

有臣。世其休風、澤我下民。執經帝前、日勸帝德。帝曰良哉、補予衰職。惟其所有、訖未一施。中道而止、天實奪之。惟人之生、惟德可久。沒而民思、是謂不朽。

范祖禹撰 《范太史集》卷四一

詹抃墓誌銘

政和某年、鑿三山、回大河、復禹故道、倚山爲梁。調京東西、河北之民、三路騷動、役至再三、而功未就、數百縣病之。毗陵詹公成老知廣濟軍之定陶、下車未幾、適是役再舉也、乃慨然嘆曰、吾邑小而貧、力竭而役未已、厲民以苟祿、非吾志也。遂拂衣而去焉。於時儉人欺君幸寵、爭立新奇之功以取勝、至斷千載不可力制之大河、使由山徑之蹊。以人勝天、逆理拂衆、群小靡靡和附、并爲一談。公獨以病民至於謝事、嗚呼、賢矣夫。公諱抃、成老其字也。詹氏、周桓王屬大夫家父之後。曰強者仕吳爲會

稽太守、曰俊者唐武德中爲雲陽令、子孫家金陵。至公會祖避亂、始居於常、遂爲常州人。曾祖儀、祖泌、考誼、皆潛德不仕、考以公贈朝奉郎。始朝奉饒於貲、築館延客、縱其子從賢士大夫游、以至於貧不悔。公幼警悟、與兄揚俱稱鄉里、號二詹。王補之、王平甫相繼主鄉校、皆賞異之。甫冠、舉於開封、俊譽曄然。試禮部不中、再舉復報罷。繼丁從母內外艱、不獲試於有司者十年。益刻意問學、以功名自期。卒於五試禮部、策於庭、授某府助教、主饒之樂平簿、黃州司理。用薦者陞從事郎、泛恩進文林郎、就移衢之西安丞、復用薦者改宣教郎、知定陶、以勞轉通直郎。遂以奉議郎致仕。時方年六十有六。後五年而卒。實某年七月二十九日也。公純孝、天至、每言平生惟飲酒貽吾母憂、終喪因不復飲。伯仲謀分異、公曰、先人之敝廬在、其忍裂之。西園有小亭、先人所游憩也、幸而獲居、敢以湫隘爲病。伯

氏許之。凡別業他貲一不取。由是益貧、晏如也。敏而強記、讀書纔一過目、尤邃於易。方未仕也、賢守令多以禮致公主學、而士大夫率遣子弟從之。其收科第、登禁從者甚衆、最賢有聲如鄒公浩。交游亦多名公卿、陳公瓘、俞公偉尤厚善。嘗欲同薦公於朝、會二公罷黜乃已。公卒流落不偶以死、有識所深悲也。公吏事強敏、案牘經目、則宿姦積弊無復隱情、而卒處以平恕。其在樂平郡、守曹宣符延致郡下、事多諮決。時學法峻急、公權獄官、有胡潤色者以傳授就逮、特未嘗受賕。公訊所傳義、則伸紙疾書、所自爲爲人者凡十篇、不少留思、無一字牴牾。公異之、遂緩其獄。卒會恩免。其全護士類如此。曾彥和守饒、益器公、遇以賓客。終更、率郡僚宴餞於郊門外、州人榮之。凡當塗賢部使者、一見必改容加禮。雖在州縣、不知塵埃趨走之勞也。其調定陶、故人在要路、欲稍薦用之、公曰、定陶事簡而



俸優、老而貧者幸也。徑歸待次。權鹽官令、縣瀕海、獄多鹽盜、公稍寬其禁、囹圄遂虛、而課亦辦、邑人德之。既至定陶、以三山之役、歸意決矣。復會使者以度牒糴米數十萬、公謂使者曰、山東樸魯、非江浙比、俗不爲僧道、故寺觀絕少。而廣濟小壘、止定陶一邑、天寧一寺、而糴數與諸州等。且僧牒數百、將安用之。使者怒、語頗侵公、公辯詰不少阻、退又歎曰、是趣吾行。章即上。郡官挽留、公不可、曰、某仕不如志、祿不及養老、通朝籍、恩亦及泉壤矣、而貧者吾所安也、又將何求。遂歸、稍葺故居、開軒名曰友陶、自爲記、大要謂與淵明之出處無愧云。對親舊置酒盡歡、不問家有無。公雖不飲、客必徑醉、賦詩奕棋無虛日。客退、觀書不置。家人勞苦之、則曰、吾對書史、如見故人道舊耳。不以爲病也。寢疾且革、處後事不亂、命筆留語如釋氏偈而絕。娶邵氏、封孺人、賢能相其夫、後公十一月亦卒。子一、必明。

性資孝謹、承顏不違、克盡子職、故公居貧而樂。女二、長適具雲、雲早卒、女不復再適。次適張宏、皆舉進士。孫男二、惠迪、允迪。孫女二、皆適仕族。公氣韻高雅、商略古今、言辯而理暢、音吐清越、聽者忘倦。詩文敏贍、有思致、談笑立成、若借書于手、至尺牘亦燦然可觀。文集五十卷、易書二卷、語說十卷、藏於家。必明以宣和三年九月二十四日乙酉葬公於晉陵縣定安鄉求仲村下城之原。既葬十一年、求志於某、念從公游且久、而公次婿某兄也、知公爲詳、敢辭銘。銘曰、

三山之役、違天罔君、吏規功利、蠹國病民。公獨有云、吾職撫字、忍毒斯民、趣辦吾事、掛冠神武、如棄涕唾、里居再閏、郢唱絕和、才豪氣剛、噤不獲施、老於下僚、摺紳所悲、有蔚其文、有赫其名、陵谷儻夷、其考我銘。

劉君俞墓誌銘

士莫不知有學矣、然求之未明、得之亦莫之行、非學之難也、士亦有罪焉。予之蒙慳狃俗、居常求不陷于罪、其有資于予友焉。予友諱公彥、字君俞、姓劉氏、高密諸城人也。少從學于橫渠子張子、刻勵修潔、篤于孝友、恭謹恂恂、不妄言動。其於學也、務明辨深造而力行之、常曰、善無待于外也、明于己而已。道未能行于遠也、施于家而已。苟誠立于中、必有形于外。拳拳焉、雖造次顛沛、未嘗少違。其器高茂而心期嗜進、又不止于如此也。人但見其溫醇深厚、猶良玉出璞而圭角未露、心率愛之、有道者加以雕琢、光輝不可掩、將以禮天地神祇而致特達之用焉。居貧欲仕、續食四上、卒無所就。或勸其文章與時異、則曰、文不可以畔道也、命不可以不俟也、安能言不由中、戾吾素學以輕悅于人哉。竟不少易。始予見其顛連窮困、以爲天之于善人

陰必相之、將欲張之者必先翕之也、今遂窮以死、吁、可哀也已。元豐二年七月二十三日、以疾終、享年三十。曾祖大理寺丞、祖國子博士、父未仕。娶杜氏、一男曰文孫、一女曰安孫。其年九月二十八日、葬于長安縣善政鄉中臺村。趙郡李復誌而銘其墓曰、

李復撰 《潘水集》卷八

故朝奉大夫渠州使君季公行狀

公諱復、字晞顏、姓季氏。魯三桓公子友之後也。文子行父、武子宿、平子如意、康子肥、皆秉政于魯。布心兄弟、有聲于漢、布以諾聞梁楚、心以勇聞關中。廣陵太守廣琛、太學生償、皆著籍于唐。其後或居江左、或居浙右、處之龍泉、荆之江陵、皆其族也。曾



祖諱光、祖諱肅、考諱眞、累贈奉議郎。其先自金陵旋居臨川、遂爲臨川人。始季氏以資財雄里中、至奉議時生事猶裕。嘗有負數緡欲遁者、奉議公焚其券而厚贖之、其人愧謝而去。君子曰、季氏其有後乎。奉議公既捐館、壽安太君潛夫人在堂、兄弟拙于生事、家無甌石之儲。公于是肄業鄉校、折節讀書、窮日之力而繼之以夜、膏不足而續之以薪。既而文章學問暴耀一時、其弟中復亦有場屋聲、號爲二季。自是從其學者屢溢戶外、故潛夫人甘旨之養無闕焉。未幾貢于禮部、元豐八年進士第、釋褐、調歙州司戶參軍、攝休寧縣。大抵歙之六縣事皆煩劇、士大夫畏之如沸鼎之湯、不可嚮邇、而休寧尤甚。公以掾曹攝縣事、又少年初宦、老胥皆易之。至則據案聽事、神觀靜深、剖析是非、有條不紊、四境大服、狴犴爲之一空。詞人有作詩以聲其美者、至今父老能誦之。每日未晡、胥吏休于舍、訟

庭寂無履聲、往往與文人勝士賦詩飲酒、未嘗怵迫于吏事也。歲餘、又攝黟縣、鋤治強梗、嚴而不苛。奸民有不便者、訴之部使者、誣罔甚危、休寧之民相率數千人、間道遮部使者、號泣于馬前、曰、願還我舊治。賴提點刑獄高官復辨其誣罔、又按郡入境、見其邑事整肅、乃歎曰、民言可謂無私矣。用薦者六人、改興國軍通山縣令。時楊翰林繪謫于是邦、翰林以前輩自居、視僚佐無可人意者、獨與公開懷握手、爲忘年之契。每稱其忠厚愛民、有古循吏之風。未閱歲、丁潛夫人憂、服除調達州巴渠令。蜀中阻遠、而巴渠尤窮僻、前爲令者例以爲不足治、而民事一切滅裂。公不鄙夷其民、而化以禮義、風俗大變。改節度推官、知南康軍建昌縣丞。時自夏五月至于秋八月不雨、大田之稼穡槁死殆盡、民皆號泣以待餒死。公惻然憫之、盡心竭力、推行賑濟之法。雖窮冬洄寒、風饕雪虐、驅馳村落、未嘗

暫憩、以至歲時享祀、不暇還舍。其孤兒棄于野者、俾耆保大姓收養之。公每行村落、纍纍然迎于道旁者數百人、蓋老幼賴公而活者、僅萬人也。時江左諸縣皆旱、有司或不躬親賑濟、而強壯者得之、老弱者不及也。公先籍民以什伍之法、計口而給粟、故老幼無不均之患。江西部使者聞其經畫有理、密遣人錄其條目、頒之所屬、不知所活又幾人也。改宣德郎、知鄂州崇陽縣事。崇陽民悍吏姦、素號難治、凡爲令者多以罪去。惟張尙書詠在任六年、善政可紀、民繪其像而祠之。其後爲民之所稱者、唯應通與公而已。民于是以二公配張尙書之祀焉。太守性褊急、御下如束溼、民非辜得罪者、噤不敢訴、公力爲營救、多獲全宥。每上府計事、必禱曰、寧得罪于太守、不可得罪于皇天。其至誠不欺多此類也。有客死崇陽而寄旅櫬于佛寺者、親戚不聞問十餘年矣、公爲出力、營葬于寺之西偏、揭

其姓氏于冢上、以俟他日有攷焉。今上即位、遷奉議郎、賜緋衣銀魚。用磨勘法轉承議郎、差通判南劍州事。待次鄉邦、凡三年、營構地宅、高明爽塏、殆甲一鄉。親舊或獻疑曰、公年甫五十、自此登禁從、鎮巨藩、未可量也。何遽爲家居計耶。公笑曰、吾郭外有田、可以供饘粥、又有宅一區、以御風雨、盈吾志矣。嵇叔夜有言、今但欲守陋巷、教養子孫、時與親故叙離闊、陳說平生、濁酒一杯、彈琴一曲、志意畢矣。萬一倦游不仕、興盡而歸、不失爲嵇叔夜。若必待暮年、血氣旣衰、不得已而引退、然後求田問舍、吾不爲也。旣通守延平、凡佐二守。前守責大指而失于闊略、後守嚴篤責而失於煩苛、公贊協郡事、各因其弊而救之。吏民皆以爲便、而二守亦獲助焉。會有以從官遷謫閩中、而子弟以不謹賈謗者、部使者摭摭細故、傳致于法、興大獄于延平、命公治之。文移逮捕、急于星火。公盡誠推究、無所觀



望遂平其獄。轉朝奉郎、加雲騎尉、以寶璽赦轉朝散郎。受代赴部、以勞併轉朝奉大夫、加飛騎尉。差知渠州軍州事、借紫。自京師來歸、優游里閭。久之、遂有拂衣之興。一日謂其親族曰、吾仕宦三十年、世味厚薄斷可知矣。因作詩以見志、其略曰、靜中有高志、難與俗人言。願收朝市興、歸此一畝安。乃上章乞以本官致仕。俄以疾卒于家。大觀四年八月某日也。享年六十。以其年十月某日葬于某鄉某原。先娶揚迴之女、累贈金華縣君。繼室張氏、故朝奉大夫維之女、累贈長安縣君。男女四人、端卿以目疾廢、清卿奏補將仕郎、一男、一女尚幼。孫男二人、天惠、天叙。孫女三人、長嫁陳之永、次嫁謝邁、皆應進士舉。一未嫁。公平生豈弟風流、所至有惠愛、天資鯁介、嫉惡而好善、故悅公者少、而不悅公者多。公亦自負其志、不妄與人交游。晚得左司都公貺、給事謝公文瓘、一見傾蓋如故、待以國士。每

論及前朝偉人鉅公、如韓忠獻、范文正、富文忠、未嘗不抵掌慨慕、想見其爲人。至于始終出處之際、又參究而詳考之、訂其行事以爲楷式。建中靖國初、詔內外官言事、公歷陳十事上之、皆當時利病、不報。門下侍郎吳公居厚與公同鄉里、尤愛公之才、欲引用之。初發運江淮、以京狀^①薦公、及爲戶部尚書、辟公監榷貨務、不就。後參大政、公未嘗輒通書。既而吳公罷政、領宮祠、公乃遣使一伸鄉曲之好而已。公之恬于進取、大抵如此。初居約時、士人蔡承昭導公遊鄉校、又同舍顏具微與公同硯席。其後承昭貧窶、無以糊其口、乃挈家依公于通山。公爲料理生事、具微鰥居窮巷、父子以疫病相繼而死。公爲買棺瘞之、又育其二女、備禮擇婿而嫁之。平生篤于學問、六經、子史、百家小說、醫藥、卜筮之書、無所不窺。自幼至老、未嘗一日捨書不讀。雖王事鞅掌、昏暮而歸、必秉燭觀書、夜分乃寐。或與

子弟商論古今、吟諷歌詩、了無倦色。每對賓客、清談亶亶、一座盡傾。詢以歷代人物、本朝典故者、必探其本末、窮其端緒、論議鋒起、聽者不知其膝之前也。其爲文章、則學西漢之法、而步驟規摹、以韓退之、歐陽永叔爲師、尤酷愛永叔所作爲臣難論、把玩不釋手、讀之成誦。每嘆曰、吾恨不一瞻清光、搢笏跪誦於上前。其愛君忠切、亦天性然也。其爲詩、略備諸家之體、而尤愛杜子美、以謂唐之治亂、備見于此。嘗訓釋其義、未絕筆而公已沒矣。家藏書數千卷、皆手自讎校、亦有親錄者。有文集十卷、藏于家。公恢宏疏達、不爲齷齪細謹。每用度施予、不計家之有無。故月俸所入、隨手而盡。雖親戚朋友、不知其貧也。既歿之後、橐無剩金。識者以謂清而畏人知、不愧古人矣。嗚呼、人才之難、自古然矣。士固有博聞強記、貫穿墳典、文章學問、爲一世所宗者、然迂緩堅僻、不達世務、不過爲腐儒而止耳。

其有商財較利、洞見毫髮、煩劇之務、賴之以濟矣。然不學無術、昧于大體、不過爲一俗吏而止耳。故蘇威嘗謂隋文帝曰、江南人士、有學術者多不習世務、習世務者又無學業、能兼之者、不過柳莊。蓋嘆人才之難也。公雖生於江南、篤於學問、而通當世之務、敏于政事、而明古人之大體、其賢於柳莊遠矣。余從公游甚久、知公最詳。姑叙其平生大節、以爲行狀、而小者皆略而不書、惟執事裁擇焉。謹狀。

謝逸撰 《溪堂集》卷一〇

孫志康墓銘

熙寧初、先君通守錢塘、孫君介夫使其子志康贅所業、以見、願留授經於門下。時年未弱冠也。先君嘉之、使與余長兄遊。既卒業歸、自是走四方、爲文章士。元祐間、先君知禮部貢舉、志康以薦書來京師。先君得其程文於黜籍中、擢實第六人、廷試復



居第六、天下然後知取之者嚴、而得之者固、自可必也。志康居官不碌碌、議論勁正、有不可犯之色。終身不敢畔所學。以宣和二年九月十二日卒於淮寧之私第。其子虬泣血以告曰：虬先人寡所合、仕纔至尙書郎。自少至老、受國士知者、莫如東坡公。不得公銘其墓、得公子銘之、亦庶幾矣。敢以外祖黃才叔所狀行事來請。過惟志康父子於余家爲世契、自齟齬辱與之遊、曩又同宦於并門、知之最詳。其敢以辭力不能爲解、乃爲泣而書之。公諱勰、志康其字也。世爲虔州感化人。曾大父長孺、故任太子中舍、知潯州。大父師房、故不仕。父立節、即介夫也。終於桂州節度判官、贈朝散郎。公賜進士第、授奉寧軍節度推官、歷冀州幕、鄆州州學教授。用薦者、改宣德郎、知舒州太和縣。八寶恩及、累遷至朝散郎、賜五品服。自湖外官滿、從辟高陽、太原兩路安撫司機宜文字。除知岳州。請宮祠、除提點

崇福宮、歸於陳。公有田在陳、遂爲終焉計。明年請老。又明年、乃以疾不起。享年七十一。公弱不戲弄、巍然有父風。讀書無所不貫穿、尤長於左氏春秋。文詞典嚴、有西漢風。援古證今、而折衷之以己。居官守正不撓、以仁厚爲急。故所至輒有去思。南陽張公幾仲之帥高陽也、精選幕府士。薦紳間請行者不一。幾仲獨曰：吾嘗見師是黃公之婿曰孫郎者、不好面諛。師是有所議論、孫郎從旁輒可否之、未嘗依違也。吾今守邊、賓客中不患吾唱而無和也。特安用之。若得斯人、則吾知過。遂辟與俱。在高陽八年、賓主無間言。幾仲移并門、又與之同往。過嘗見其端笏以遊其庭、軍府之政、必可而後有所唯諾。毅然見乎色。幾仲爲改容更張之。所輔益不可勝紀。公以文章名世、而循循然如不出諸口。未嘗恃己以凌物、賢愚少長、待之如一。稱其善而掩其過。在邊之久、雖武夫悍卒、皆心服其誠、而爲之

盡最。後守岳陽，政亦可觀。是時湖北開新邊，調發他郡文檄旁午於道，公私惴恐。公呼豪右百姓與計議於庭，曰：「君父之命不可違，吾與汝曹皆任其責。」出檄於懷，賦之曰：「吾不以付吏，不汝追逮，特寬爲期。期而不至者，罰皆倍之。」千里之間，民不知勞而軍需告辦。岳陽嘗經火災，譙門兩觀鞠爲灰燼。公至之數月，登城嘆曰：「昔岳陽樓觀以偉麗聞天下，今乃沒於丘墟草棘間，不能復前人之跡。」守臣罪也。父老聞之，欣然有請曰：「岳人懷此久矣，非我賢守誰當任之？有無惟所命。」公得朝廷所賜度牒，與虞人所獻山林巨植，鳩工庀徒而鼎新之。不踰年，壯峙如昔。州人扶老攜幼來觀，有自數百里至者。皆嘆曰：「孫公不擾吾民，不鞭一人，而所立如斯。」召父之甘棠不在是耶？故去郡之日，人挽留之，不得出郊，又維其舟，使不得去者累日。公治郡專用教化，視民如家人，有爭訟者，公爲辯析其理，俾自

屈服而去，古之循吏不是過也。平生無嗜好，老不廢書，如飢渴然。善作古篆，秦漢而下不取也。娶黃氏，初，東坡公奇其才，以語師，是乃以其子妻之。公晚得痺疾，黃夫人躬治藥石，相其飲食卧起，經紀家事，不以毫髮累其胸中者二年。公沒，窀穸之事，皆夫人自任之，有古烈婦之風。公文集若干卷，傳於世。嗚呼，風俗之不振也久矣。自義不勝利，天下之士以容悅爲工，端方爲拙，有終身爲縣吏，妻子至於寒餓，而天下指以爲嘆，又私相以爲戒，風俗安得不媿乎？而士氣安得不卑也？此賢人君子所甚懼者。先君常作剛說一篇，爲介夫而發，嘆天下無其人也。介夫流落不遇，至死不悔。志康又不偶於世，抱才無所施，介夫真有子哉！以某年月日葬於某地。子一人，曰虬，事親有立，能克其家。銘曰：崆峒之山，章貢之水，山川秀奇，鍾於孫氏。世儒一經教子，至於志康，命世之士，師以道授，父以

剛遺。處其有聞。出則或梃。晚遊諸侯。遇其所知。翔而後集。夫誰敢羈。抱其經術。卒不少施。世無王良。驥將安之。周士也貴。秦士也賤。義利之分。賢愚斯判。斯人云亡。後生不見。我銘其藏。惟以永嘆。

蘇過撰 《斜川集》卷五

賀方回墓誌銘

公諱鑄。字方回。其先吳公子慶忌。避公子光亂。奔衛。妻子散走。越人與之湖澤之田。表其族曰慶氏。漢避安帝諱。改氏賀。至唐。有爲陽穀令。名知止者。于方回爲十五代祖。其後北徙。終止開封。孝惠皇后克配昌陵。家世仍以才武顯。曾祖維能。左侍禁。祖維慶。東頭供奉官。閣門祗候。贈左千牛衛將軍。父安世。內殿崇班。閣門祗候。贈右監門衛大將軍。母秦氏。贈令人。方回幼孤立。不群。濟良恪公克彰。擇妻以女。授右班殿直。貧迫於養。非其好也。監軍器庫門。臨城某酒稅。磁州都作院。徐州寶豐監。

和州管界巡檢。辭所當遷。東頭供奉官。封其母永年縣太君。元祐七年。學士清臣。百祿。軾薦于朝。改承事郎。請監北嶽廟。監鄂州寶泉監。丁母憂。服除。以宣德郎。通判泗州。遷宣德郎。通判太平州。管勾亳州明道宮。再遷至奉議郎。遂請老。以承議郎致仕。時年五十八。二年。從臣薦起之。以故官管勾杭州洞霄宮。遷承議郎。賜五品服。以后族恩。遷朝奉郎。明年。復致仕。又六年。年七十四。以宣和七年二月甲寅卒于常州之僧舍。夫人趙氏。前葬宜興縣清泉鄉東篠嶺之原。至是。以九月甲申葬公同六穴。方回豪爽精悍。書無所不讀。哆口。疏眉目。面鐵色。與人語。不少降色詞。喜面刺人短。遇貴執不肯爲從諛。然爲吏極謹細。在筦庫。常手自會計。其于窒罅漏。逆姦欺。無遺察。治戎器堅利。爲諸路第一。爲巡檢。日夜行所部。歲裁一再過家。盜不得發。攝臨城令三日。決滯訟數百。邑人駭歎。監兩郡。狡吏



藏

不得指其私。蓋仕無小大不苟、要使人不能欺。而用不極其才、以老自右、選易文階。時薦者皆有文名、且當路、顧願爲嶽祠吏、退居海上三年、乃復就筦庫。元符靖國間、除太府光祿寺主簿、辭不赴。卒請補外。自去姑熟及告老、再仕、凡十五年、不離宮祠吏。觀其骯髒仕氣、若無所顧忌者、然臨仕進之會、常如臨不測淵、覷覷視不敢前、竟疾走不顧。其慮患乃如此、與蹈污險徼幸、不爲明日計者殊科。有鑑湖遺老前後集二十卷、予爲序、尙可考樂府辭五百首、他文數十百篇。方回姓氏聞天下、其詩詞雅麗、有古樂府之風。讎書至萬卷、無一字一畫譌闕。老且病、猶搢搢不置云。二子曰房、承節郎監保州酒稅。曰廩、將仕郎。二女皆嫁士族。孫男女五人。政和間、予居吳、方回病、要予曰、死以銘委公矣。今年春病甚、見予毘陵、復理前約、且曰、平生果於退、懼危辱耳、今知免矣。將葬其子、又以治命來求

銘。銘曰、

其進踏跖、若將越于谷。其退若逝、惟危辱是畏。依隱傲世、世亦莫吾厲。卒安其所、是以無悔。

程俱撰 四庫全書本《慶湖遺老詩集》卷末

賀鑄傳

賀方回、名鑄、衛州人。自言唐諫議大夫知章後、故號鑑湖遺老。長七尺、眉目聳拔、面鐵色。喜劇談、當世事可否、不略少假借。雖貴要權傾一時、小不中意、極口詆無遺辭。故人以爲近俠。然博學彊記、工語言、深婉麗密、如次組繡。尤長於度曲、掇拾人所棄遺、少加櫟括、皆爲新奇。嘗言、吾筆端驅使李商隱、溫庭筠、當奔命不暇。諸公貴人多客致之、方回有從有不從、其所不欲見、終不貶也。初仕監太原工作、有貴人子適同事、驕倨不相下。方回微廉得其盜工作物若干、一日屏侍史、閉之密室、以杖數曰、來。若某時盜某物爲某用、某時盜某物入於家、



然乎。貴人子惶駭謝有之。方回曰：能從吾治，免白發。即起，自袒其膚，杖數十下。貴人子叩頭祈哀，即大笑釋去。自是諸挾氣力頡頏者，皆側目不敢仰視。是時江淮間有米芾、元章，以魁岸奇譎知名，而方回以氣俠雄爽適先後。二人每相遇，瞋目抵掌，論辯蠡起，終日各不能屈。談者爭傳爲口實。方回所爲詞章既多，往往傳播在人口。建中靖國間，黃魯直庭堅自黔中還，得其江南梅子之句，以爲似謝元暉。然以尙氣使酒，終不得美官。初娶宗女，隸籍右選。李中書清臣執政，奏換通直郎，爲泗州通判。悒悒不得志。食宮祠祿，退居吳下。浮沈俗間，稍務引遠世故，亦無復軒輊如平日。家藏書萬餘卷，手自校讎，無一字脫誤。以是杜門，將遂老。家貧甚，貸子錢自給，有負者輒折券與之，秋毫不以丐人。其所與交，終始厚者，惟信安程俱致道。方回旣自哀其平生所爲歌詞，名東山樂府，致道爲之序，略

道其爲人大概矣。而予與方回往來亦極款，乃復爲之傳，使後世與致道序參見云。

葉夢得撰 《石林居士建康集》卷八

游執中墓誌銘

昔吾爲太學生，吾友定夫嘗爲余言其族父執中先生之賢。余聞而心識之，願見而未之得。蓋三十年餘矣。建中之初，余被檄貳令於其鄉邑，始獲從之游，聽其言，稽其行，參之於其所學，信乎定夫之所稱無一辭溢也。於是相與爲忘年之交，而恨相得之晚。先生旣沒，逾數年，而吾友定夫復狀其行，致其子處道之意，請銘於余。余何可辭。先生諱復，字執中，姓游氏，世爲建州建陽人。曾祖諱惟真，祖諱耿，父諱仲孫，皆隱德不耀。先生資孝愛，總角已知彊學砥礪，竭力以養其親。家乏無經月之儲，而親意未嘗一日不怡。族父元聰明有精識，於子弟中尤器之，見謂有特操。旣壯，學益富，行益修，鄉里

旁郡見者悚服、聞者悅而信之、多遣子弟從之游、遠近相屬也。其學以中庸爲宗、以誠意爲主、以閑邪寡慾爲入德之途。常以晝驗之妻子、以觀其行之篤與否也。夜考之夢寐、以卜其志之定與未也。其與人謀、委曲周盡、不啻如在己。其教人、禁切其不善而開其善、鑄諭之詳、不少回隱、不啻如其父兄。故聽其言者、初若難入、然終察其爲愛己也。亦或以忠誨成懟憾、先生終不改、曰、寧人負我、我無負人。蓋直道不苟、其自信然也。以故鄉曲之士、嘗受經其門者、往往率德自好。讀書亦求心到自得、以善其身、其成就人才、蓋非碌碌口耳之習也。少不事舉業、晚徇親意、一舉於有司、不第而止。以某年某月某日終於家、享年六十有五。夫人江氏、宣德郎汝舟之女。配於君子、能致婦順、以得舅姑之歡心。先先生十年卒。子男三人、處道舉進士、亦遵遺訓、不敢失墜。處仁、處厚、早卒。女一人、既嫁、未兩

年而嫠、守義不改適、皆其醞籍然也。處道以某年某月某日葬先生於歷衝之原。先生貌溫而氣和、望之如枯木槁灰、而堅挺之姿、睟然可見、不問知其爲常德君子也。道廢千有餘年、謬悠荒唐之辭、盈天下、學者師其言、尊其道、而侈大之、非徒雕龍炙輅而已。夷考其所知、未有能躡其樊者也。冥行之徒、猶摘埴於康莊之衢、眩然莫知其止。故物我異觀、天人殊歸、而高明中庸之學、析爲二致。士於斯時、欲肄業考疑、則無其師、資以輔仁、則無其友、而枝辭蔓說、亂經矣。先生德足以私淑諸人、學足以垂世傳後、而士之欲求師友者、宜莫如先生也。不幸老死於窮閭陋屋之間、而不大顯於時、可哀也。銘曰、

於戲先生、珪璋之珍、韞質不耀、器藏于身。多文之富、曷云其癯。學無欲滯、惟道之腴。以此易彼、孰云不臧。人難弗堪、潛德愈光。歷衝之原、望之繹如。遺

風若存百世不渝。

楊時撰 《楊龜山先生集》卷三〇

御史游公墓誌銘

吾友定夫既沒之明年其子某自歷陽涉大江詣予而告曰先君之友惟公爲最厚今既葬而幽堂之銘無辭以刻恐遂堙沒無傳焉敢以是請予告之曰知先公之名德皎如日星雖奴隸之賤皆知之其流風餘韻足以師世範俗豈待予言而傳乎然昔在元豐中俱受業於明道先生兄弟之門有友二人焉謝良佐顯道公其一也三年之間二公相繼淪亡存者獨予而已追念平生觸事無一不可悲者今吾子以銘見屬舍予其奚之公諱酢定夫其字也建州建陽人初與其兄醇俱以文行知名於時所交皆天下豪英公雖少而一時老師宿儒咸推先之伊川先生以事至京師一見謂其資可與適道是時明道先生兄弟方以倡明道學爲

己任設庠序聚邑人子弟教之召公來職學事公欣然往從之得其微言於是盡棄其學而學焉其後得邑清河予往見之伊川謂予曰游君德氣粹然問學日進政事亦絕人遠甚其在師門見稱如此則所造可知矣公於元豐六年登進士第調越州蕭山尉用侍臣薦召爲太學錄改宣德郎除博士公以食貧待次奉親不便就擬知河南府清河縣忠宣范公判河南待以國士事有疑議必與之參訂移守潁昌辟公自隨爲府學教授未幾還朝復秉國政即除公太學博士已而忠宣罷政公亦請外矣除齊州簽書判官廳公事用年勞改奉議郎丁太中公憂服除再調泉州簽判上皇即位覃恩改承議郎賜緋衣銀魚袋還召爲監察御史磨勘轉朝奉郎出知和州歲餘管勾南京鴻慶宮居太平州兩乞再任以八寶恩轉朝散郎磨勘轉朝請郎知漢陽軍磨勘轉朝奉大夫以親老再乞宮



藏

祠除提點成都府長生觀。丁太碩人憂服除。除知舒州。移知濠州。不數月。會從官謫守衝。罷歸。寓歷陽。因家焉。宣和五年五月乙亥。以疾終于正寢。享年七十有一。是年十二月丙午。與夫人合葬于和州含山縣昇城鄉車轅嶺之原。用治命也。公自幼不羣。讀書一過目輒成誦。比壯。益自力。心傳目到。不爲世儒之習。誠於中。形諸外。儀容辭令粲然有文。望之知其爲成德君子也。其事親無僞。交朋友有信。蒞官遇僚吏有恩意。雖人樂於自盡而無敢慢其令者。惠政在民。戴之如父母。故去則見思。愈久。而不忘。筮仕之初。未更事。縣有疑獄。餘年不能決。公攝邑事。一問得其情而釋之。精練如素官者。人服其明。比年以來。編民困於征斂。而脩奉祠館。市材調夫無虛月。所至騷然。公歷守四郡。處之裕如。雖時有興造。民初不知而事集。此在公特其糝糠耳。無足道者。故不復縷載。若其道學足以覺斯

人。餘潤足以澤天下。遭時清明。不及用而死。此士論共惜之。非予一己之私言也。曾祖尙。祖禮之。不仕。父潛。贈太中大夫。娶呂氏。封宜人。有賢行。事舅姑以孝聞。友姊妹。睦姻族。人無間言。公素貧。不治生產。夫人攻苦食淡。能宜其家。其內助多矣。先公三年卒。享年六十有六。子男七。人。撫。文林郎。洪州司兵曹事。卒于官。擬。掾。握。皆蚤世。損。迪。功郎。前授歸州司兵曹事。挾。將仕郎。拂。未仕。皆業儒世其家。女一人。歸時之子。適。孫男三人。女五人。有中庸義一卷。詩二南義一卷。論語孟子雜解各一卷。文集十卷。藏于家。銘曰。嗚呼天乎。故不憖遺。方時清明。哲人其萎。道雖不行。斯文未亡。百世而下。其傳有光。

楊時撰 《楊龜山先生集》卷三五

校記

①狀：豫章叢書本《溪堂集》作「秩」。

②感：據《宋史·地理志》，疑當作「虔」。

③和：據右引，疑當作「湖」。

④請：原作「清」，據四庫本《龜山集》改。

⑤衝：右引改作「遂」。

⑥久：原作「多」，據右引改。

⑦七：原作「六」，按以下實有七人，據改。



藏 儒

宋儒碑傳集卷七十五

楊時 晁補之 莫表深 楊迪 劉拱

譚章 蕭服

楊時行狀略

虔守楚潛、議法平允、而通判楊增多刻深。先生每從潛議、增以先生爲附太守輕己。及潛去、後守林某議不持平、先生力與之爭、方知先生能有守也。知潭州瀏陽縣、安撫使張公舜民、雅敬重先生、每見必設拜席與均禮。知杭州餘杭縣、簡易不爲煩苛、遠近悅服。蔡京方相、貴盛、母前葬餘杭、用日者之言、欲浚湖瀦水爲形勢便利、託言欲以便民。事下餘杭縣、先生詢問父老、人人以爲不便、即條上其事、得不行。知越州蕭山縣、蕭山之人聞先生名、不治自化、人人圖畫先生形像、就家祠焉。或說當世貴人、以爲事至此必敗、宜力引耆德老成、置上左右、開導上意、庶幾猶可及也。會路允迪、傳墨卿

使高麗、高麗王問兩人、龜山先生今在何處。兩人對方召赴闕矣。及還、遂以名聞。因勸政府宜及此時力引先生、政府然之、遂以祕書郎召。及對、陳儆戒之言、上嘉納焉。太原被圍、朝廷遣姚古救援、古逗留不進。先生上言、乞誅古以肅軍政。又率同列上疏、論蔡京、王黼、童貫等罪惡、或死或貶、乞罷宦者典修京城事、且錄五代史傳以進。朝廷置詳議司、議天下利病、先生以爲三省政事所出、六曹分治、各有攸司。今乃別辟官屬、新進小生、未必賢於六曹長貳也。朝廷從其議。又乞褒復元祐名臣、凡在黨籍者、力辨宣仁誣謗、乞復元祐皇后位號。凡所論皆切當時要務。大學諸生詣闕上書、議者疑其生事、微亂。先生即見上、言諸生欲忠於朝廷耳、本無他意。但擇老成有行義者爲之長貳、即自定矣。淵聖喜曰、此無逾卿者矣。即命先生兼國子祭酒。今上即位、本中之先君子初在政府、首爲上言



先生之賢、於是除工部侍郎。先生天資仁厚、寬大能容物、又不見涯涘、不爲崖異絕俗之行、以求世俗名譽。與人交、終始如一。性至孝、幼喪母、哀毀如成人、事繼母尤謹。熙寧中、既舉進士得官、聞河南兩程先生之道、即往從之學。是時從兩先生學者甚衆、而先生獨歸、閒居桑年、沈浸經書、推廣師說、窮探力索、務極其趣、涵蓄廣大、而不敢輕自肆也。

本中嘗聞於前輩長者、以爲明道先生溫然純粹、終身無疾言遽色、先生實似之。

呂本中撰《伊洛淵源錄》卷一〇

楊文靖公墓誌銘

自孟子沒、遺經僅在、而聖學不傳。所謂見而知之、與聞而知之者、世無其人。則有西方之傑、窺見間隙、遂入中國、舉世傾動、靡然從之。於是人皆失其本心、莫知所止、而天理滅矣。宋嘉祐中、有河南二程先生、得孟子不傳之學於遺經、以倡天下。而升

堂睹奧、號稱高第。在南方則廣平游定夫、上蔡謝顯道、與公三人是也。公諱時、字中立、姓楊氏。既沒踰年、諸孤以右史呂本中所次行狀來請銘。謹案楊氏出於弘農、爲望姓。五世祖唐末避地閩中、寓南劍州之將樂縣、因家焉。公資稟異甚、八歲能屬文。熙寧九年中進士第、調汀州司戶參軍、不赴。杜門績學、淳涵涵浸、人莫能測者幾十年。久之乃調徐州司法。丁繼母憂、服闋、授虔州司法。公燭□精深、曉習律令、有疑獄衆所不決者、皆立斷。與郡將議事、守正不傾。罹外艱、除喪、遷瀛州防禦推官。知潭州瀏陽縣、安撫使張公舜民以客禮待之。漕使胡師文惡公之與張善也、歲饑、方賑濟、劾以不催積欠、坐衝替。張公入長諫垣、薦之、除荆南教授。改宜德郎、知杭州餘杭縣。遷南京宗子博士、會省員、知越州蕭山縣、提點均州明道觀、成都府國寧觀、後例罷、差監常州市易務。公年幾七十矣。是時天

下多故、或說當世貴人、以爲事至此必敗、宜力引耆德老成、置諸左右、開導上意、庶幾猶可及也。則以祕書郎召、到闕遷著作郎、及對、陳儆戒之言、除邇英殿說書。公知時勢將變、遂陳論政事、其略曰、近日蠲除租稅、而廣濟軍以放稅降官、是詔令爲虛文耳。安土之民不被惠澤、而流亡爲盜者獨免租賦、百姓何憚不爲盜。夫信不可去、急於食也。宜從前詔、嘉祐通商榷茶之法、公私兩便。今茶租錢如故、而榷法愈急、宜少寬之。諸犯榷貨、不得根究來歷。今茶法獨許根究、追呼蔓延、犴狴充斥、宜即革之。東南州縣均敷鹽鈔、迫於殿最、計口而授、人何以堪。宜酌中立額、使州縣易辦、發運司宜給羅本以復轉般之舊。和預買、宜損其數而實支所買之直。燕雲之軍、宜退守內郡、以省運輸之勞。燕雲之地、宜募邊民爲弓箭手、使習騎射、以殺常勝軍之勢。衛士天子爪牙、而分爲二三、宜循其舊、不可

增損。凡十餘事、執政不能用。而虜騎已入寇、則又言、今日所急者、莫大於收人心。邊事之興、免夫之役、毒被海內、誤國之罪、宜有所歸。西城聚斂、東南花石、其害尤甚。宿姦巨猾、借應奉之名、豪奪民財、不可數計。天下積憤鬱而不得發、幾二十年。欲致人和、去此三者。會淵聖嗣位、公乞對、曰、君臣一體、上皇痛自引咎、至託以倦勤避位、而宰執叙遷、安受不辭、此何理也。城下之盟、辱亦甚矣。主辱臣死、大臣宜任其責、而皆首爲竄亡自全之計、陛下孤立何賴焉。乞正典刑、爲臣子不忠之戒。童貫爲三路總帥、虜人侵疆、棄軍而歸、置而不問、故梁方平、何灌相繼逃去。大河天險、棄而不守、虜人奄至城下、而朝廷不知、帥臣失職、無甚於此。宜以軍法從事。防城所仍用閹人提舉、授以兵柄、此覆車之轍、不可復蹈。淵聖大喜、擢右諫議大夫。虜人厚取金帛、又遂賂以三鎮、遂講和而去。公上疏曰、河朔朝



廷重地、三鎮又河朔要藩。今一旦棄之虜廷、以二十州之地、貫吾腹中、距京城無藩籬之固、戎馬疾驅、不數日而至、此非經遠之謀。四方勤王之師、逾月而後集、使之無功而去、厚賜之則無名、不與則生怨、不可不慮也。如聞三鎮之民欲以死拒守、今若以兵攝之、使腹背受敵、宜可爲也。朝廷欲專守和議、以契丹百年之好、猶不能保、寧能保此狂虜乎。夫要盟神不信、宜審處之、無至噬臍。於是淵聖乃詔出師、而議者多持兩端、屢進屢卻。公又言、聞虜人駐兵磁相、劫掠無算、誓書之墨未乾、而叛不旋踵。肅王初約及河而反、今挾之以往、此叛盟之大者。吾雖欲專守和議、不可得也。今三鎮之民以死拒之於前、吾以重兵擁其後、此萬全之計。望斷自宸衷、無惑浮言。而議者不一、故終失此機會。於是太原諸郡皆告急矣。大學生伏闕、乞留李綱、種師道、軍民從之者數萬人。執政慮其生亂、引高歡

事揭榜於衢、且請以禮起邦彥。公言、士民伏闕、詬罵大臣、發其隱慝、無所不至、出於一時忠憤、非有作亂之心、無足深罪。李邦彥首畫遁逃之策、捐金割地、質親王以主和議、罷李綱而納誓書。李鄴奉使失辭、惟虜言是聽。此二人者、國人之所同棄也。今敷告中外、乃推平賊和議之功歸此二人、非先王憲天自民之意。宜收還榜示、以慰人心。邦彥等既罷、趙野尙存。公復言、野昔嘗建言、請禁士庶以天王君聖爲名者。上皇後以爲諂諛之論、廢格不行。而野猶泰然不以爲耻、乞賜罷黜。上皆從之。或意太學生又將伏闕鼓亂、乃以公兼國子祭酒。遂言、蔡京以繼述神宗皇帝爲名、實挾王安石以圖身利。故推尊安石、加以王爵、配享孔子廟廷。然致今日之禍者、實安石有以啓之也。謹按安石昔爲邪說、以塗學者耳目、敗壞其心術者、不可縷數。姑即一二事明之。昔神宗皇帝稱美漢文、罷露臺之

費安石乃言、陛下若能以堯舜之道治天下、雖竭天下以自奉、不爲過也。夫堯舜茅茨土階、其稱禹曰克儉于家、則竭天下者、必非堯舜之道。彼王黼以三公領應奉司、號爲享上、實安石自奉之說、有以倡之也。其釋鳧鷖之末章、則曰、以道守成者、役使群衆、泰而不爲驕、宰制萬物、費而不爲侈。按此章止謂能持盈則神祇祖考安樂之、無後艱耳。而安石獨爲此說。後蔡京輩爭以奢僭相高、輕費妄用、窮極淫侈、實安石此說有以倡之也。其害豈不甚哉。乞正其學術之繆、追奪王爵、明詔中外、毀去配享之像。遂降安石從祀之列。諫官馮澥力主王氏上疏、詆公、又會學官紛爭、有旨皆罷。即上章乞出。除給事中。章又四上、請去益堅、以徽猷閣直學士提舉西京崇福宮。又懇辭職名不當得。有旨、楊某學行醇固、諫諍有聲、請閑除職、累月懇辭。宜從其志、以勵廉退。改徽猷閣待制。上即位、除工部侍

郎。論自古賢聖之君、未有不以典學爲務者。以君德在是故也。上然之。除兼侍^③講。二年、以老疾乞出、除龍圖閣直學士、提舉杭州洞霄宮。四年、上章告老、從之。紹興五年四月二十四日終于正寢。享年八十有三。葬本邑西山之原。近臣朱震奏、公嘗排邪說、以正天下學術之謬。辯誣謗、以明宣仁聖烈之功。雪冤抑、以復昭慈聖獻之位。據經論事、不愧古人。所著三經義辯、有益學者。乞下本州抄錄、仍優恤其家。有旨、贈官、賻以金帛。娶余氏、贈碩人。先卒。子五人、迪早卒。迥、邁、適、造已仕。女四人、長適陳淵、次陸棠、次李郁、次未嫁。孫男七人、孫女五人、曾孫一人。公天資夷曠、濟以問學、充養有道、德器早成。積於中者、純粹而閎深。見於外者、簡易而平淡。閒居和樂、色笑可親。臨事裁處、不動聲氣。與之遊者、雖群居終日、嗒然不語。飲人以和、而鄙薄之態自不形也。推本孟子性善之說、發明中庸大學之



道。有欲知方者、爲指其攸趣、無所隱也。當時公卿大夫之賢者、莫不尊信之。崇寧初、代余典教渚宮、始獲從公遊。三十年間、出處險夷、亦嘗覲之熟矣。視公一飯、雖蔬食脆甘、若皆可於口、未嘗有所嗜也。每加一衣、雖狐貉縕袍、皆適於體、未嘗有所擇也。平生居處、雖弊廬廈屋、若皆可以託宿、未嘗有所羨而求安也。故山之田園、皆先世所遺、守其世業、亦無所營、增豆區之入也。老之將至、沉伏下僚、厄窮遺佚、若將終身焉。子孫滿前、每食不飽、亦不改其樂也。然則公於斯世、所欲不存、果何求哉。心則遠矣。凡訓釋論辯、以闢邪說、存於今者、其傳浸廣。故特載宣和末年及靖康之初諸所建白、以表其深切著明。而公之學於河南小嘗試之、其用已如此。所謂援而止之而止、必有以也。進不隱賢、必以其道、豈不信乎。世或以不屑去疑公、蓋淺之爲丈夫也。銘曰、

天不喪道、文其在茲。維天之命、尸者其誰。孰能識車中之狀、意欲施之兄弟、而遽並爲世師。偉茲三賢、闊步共馳。有學術業、顏其餒而。公名最顯、垂範有詞。豈不見庸。孔艱厥時、狂瀾奔潰、砥柱不欹。邪說害正、倚門則揮。嗟彼姦罔、讒言詆欺。我扶有極、人用不迷。奚必來世、判其是非。有援則止、直道何疵。不勉而和、展也可夷。河流在北、伊水之湄。誰其似者、訂此銘詩。

胡安國撰、《伊洛淵源錄》卷一〇

晁无咎墓誌銘

惟晁氏自漢御史大夫錯而後、不能譜其世。國初爲清豐人。眞宗皇帝時、有諱迴者爲翰林學士承旨、諡文元、始徙居開封、或居鉅野。迴之子諱宗慤、爲參知政事、諡文莊。又三世而生公。其諱宗簡、贈特進吏部尙書者、爲皇曾祖。諱仲偃、尙書庫部員外郎者、爲皇祖考。諱端友、贈左朝散大夫者、爲皇

考。公諱補之、字无咎。幼豪邁英爽不群。七歲能屬文、日誦千言。年十三、從王安國于常州學官。安國名重天下、于後進少許可、一見公、大奇之。公從皇考于杭之新城、公覽觀錢塘人物之盛麗、山川之秀異、爲之作文以志之、名曰七述。今端明蘇公軾通判杭州、蘇公蜀人、悅杭之美而思有賦焉。公謁見蘇公、出七述、公讀之、歎曰、吾可以閣筆矣。蘇公以文章名一時、士爭歸之、得一言足以自重、而延譽公如不及。自屈輩行與公交。由此公名藉甚于士大夫間。舉進士、禮部別試第一、而考官謂其文辭近世未有、遂以進御。神宗見之曰、是深于經、可革浮薄。于是名重一時。遂中第、調澶州司戶參軍。召試學官、時試者累百、而所取五人、公中其選。除北京國子監教授、又爲衛州教授、未行、除太學正。哲宗即位、右丞李清臣舉公館職。召試學士院、除秘書省正字、俄遷校書郎。以親老求補外、除秘閣

校理、通判揚州。有逃卒用貨得戶部判至淮南理逋負、公辨其姦、事既決、一府不敢欺。召爲著作佐郎、又遷秘書丞、又遷著作郎、官制檢討官。于是公爲秘書省官十五年矣。而怡靜樂道、未嘗近權要、士論高之。遂知齊州。境有群盜、白晝掠塗人、公默得其姓名、囊橐皆審。一日、因宴客、召捕吏以方略授之、酒行未終、悉擒而還。一府大驚、郡爲無警。歲飢、河北民流、道齊境不絕。公請粟于朝、得萬斛、乃爲流者治舍次、具器用。人既集、則又爲具糜粥藥、物、公皆躬臨治之、凡活數千人。又擇高原以葬死者、男女異墟。使者頗媚其功、欲有以撓之。既至境、按^⑤視、乃更歎服。紹聖元年、朝廷治黨^⑥、公亦坐累、降通判應天府。以親嫌、通判亳州。復落職監處州酒務。中途丁母憂、毀瘠幾不勝喪服。除監信州酒、公治職事甚力、了無遷謫意。今上即位、移簽書武寧軍節度判官、賜緋衣銀魚。尋復通判河中府、未



行、召爲著作佐郎。俄遷尙書吏部員外郎、除哲宗實錄院檢討官、改禮部郎中、又改神宗國史編修官。公皆以非才辭避再三、不允。又力請外官、復留以爲吏部郎中。異日、事有留滯、無究治者、吏緣爲姦。嘗有嶺外尉、捕獲盜八人、法當改官、而考功謂獲盜不同處、曲沮欲壞其賞、吏持之不決。尉客京師久、窘甚、詣公訴之。公憫然曰、當奏。即爲上之。七日而得遷官。于是吏畏服、部無留事。俄除知河中府、郡當大河、扼三門、有浮梁、久且壞。公視事、亟欲營繕、有司難之。公乃預爲鳩材、旣集、則爲規畫、一日而成。城中歡呼、民爲畫像立祠。徙知湖州、其治如河中。又徙知密州、猶用前。累送吏部、授知果州。不行、因得管勾江州太平觀、又改管勾西京嵩山崇福宮、又管勾南京鴻慶宮。居鄉閭、以學行爲鄉人所敬、而尤好晉陶淵明之爲人。其居室廬園圃、悉取淵明歸去來詞以名之、其講學至老不廢。大

觀四年、由近制詣部、授知達州、未行、擢知泗州。到官無幾何、以疾卒、年五十八。公于文章、蓋其天性、讀書不過一再、終身不忘、自少爲文、即能追考左氏、戰國策、太史公、班固、揚雄、劉向、屈原、宋玉、韓愈、柳宗元之作、促駕而力鞭之、務與之。□齊而後已。其凌麗奇卓出于天才、非醞釀而成者、自韓愈已還、蓋不足道也。性剛直。果敢、勇于爲義、其事親、友、兄弟、睦姻族、有人所不能爲者。家素貧、先大夫沒時、有女未嫁者五人、公力貧營辦、皆以時嫁、爲士人妻。與人交無隱情、見事有不當于義者、必直告之、而受人之盡言、亦未嘗愠也。公旣于書內外無所不觀、下至于陰陽術數、皆研極其妙、其禍福往來先言之。卒之夕、有大星殞于州廨之燕寢、人驚視之、公已奄然矣。公少好讀莊、老書、通其說、旣自以爲未至、學于佛而求之、其心泰然若有得也、及屬纊、精爽不亂。娶戶部侍郎杜純之女、治家教子

皆有法、封永嘉縣君。男二人、公爲公汝。女二人、長適梁頤吉、次尙幼。有文集及著作若干卷。其孤以某年月日葬公任城縣呂村之原、從先大夫之兆。未與公兄弟交、故其孤來乞銘。銘曰、

矯矯家令、以身殉國。文元雍雍、爲時峻德。凜凜无咎、繼起有赫。束髮墳史、白首翰墨。追古作者、蹈藉凌躒。氣戛星斗、聲韻金石。不施于邦、祇自藻澤。人一之難、公易百千。我原其文、惟質之淳。孝愛忠信、施及鄉人。是獨何虧、一仆莫振。車堅馬良、不得出門。策駑駕朽、道上紛紛。將昌其聲、而嗇其身。嗚呼无咎、萬世之間。

張耒撰 《柯山集拾遺》卷二二

莫中奉墓誌銘

公諱表深、字智行、邵武人也。曾祖辰、仕爲三班奉職。祖及、不仕。父說、當景祐、寶元間、土方以聲律決科、而君獨以窮經爲務、自閩陬數千里外、羸糧跣

足至京師、從泰山孫明復、徂徠石守道先生游、講明道術。還家杜門、不復求仕進、以公恩累贈至通議大夫。公自幼聞過庭之訓、問學有家法。是時安定先生居嘗上、爲世儒宗、公往師焉。一見奇之、謂公有器識、異日所至、未易量也。自是浸以名聞於時。元豐二年登進士第、調洪州豐城尉。未赴、丁通議公憂、服除、再調建州建陽縣主簿。秩滿、用薦者移撫州宜黃令。適丁母碩人憂、不赴。終喪、授鳳翔府好時縣令。好時在隴右爲劇邑、號難治。公至、明約信令、而人化服。終三年無一人犯重辟者。仇齊路險絕、車輿不通、邑人病之久矣。公諭父老鳩徒計工、治爲坦途、往來便之。侍郎張公舜民領漕事、見而謂人曰、莫侯可謂知爲政矣。其爲利非濟人溱洧之比也。率同列交薦之。改宣德郎、知泗州昭信縣事。憲司有繫囚、事聯省曹、吏以枝辭蔓其獄、六更推治不能決。命公往治之、一問而情得人服。



其明。民有持牒棄妻屏子者、公詰其所由、曰、以病而貧、力不足以相收、故及此、非得已也。公惻然憫之、曰、吾爲長民之吏、使人父子夫婦不相保、當任其咎者、其誰歟。於是出私錢賑之。里巷編氓感公之義、皆協力以周其匱急、故其室家復安如初。比公之行、是人與其妻孥攀號於道、見者咸嗟嘆之。公惠政及人、有以厚風俗、多此類也。上皇即位、覃恩遷奉議郎、賜緋衣銀魚、除眞定府路都總管司勾當公事。會中山^①之安撫朱公紱以公兼領帥事、賴公頗多。秩滿、通判新安、除御史臺主行、用中司不召、赴都堂審察、除光祿寺丞、未上、遷開封府司工曹事。朝廷更錢法、命夜下、公適直宿、陰爲處畫、人無知者。黎明揭示、大悉詳下^②。吏不得搖手爲姦。尹陞對被獎諭、遂以公之名聞于上、睿旨親除左司錄事。中都不治、吏習以爲常、黠胥舞知玩上、文移鉗紙尾以進、官署唯唯惟謹。公察其尤無良者

治其一二、一府屏息、無敢習故爲傲慢者。并僚侍權倖、雖沒一悉趨之^③。公爲折其短、獨未嘗少屈、乃諷言章、政和三年出公爲廣濟軍司錄事。士論惜之、而公處之恬如也。久之、朝廷察其非辜、起知睦州。公曰、文正范公、清獻趙公嘗守是邦、其遺範未遠也、循而守之、則無餘事矣。已而郡大治、民至今思之。過朝除知饒州、東歸待次毘陵、愛其土風、欲營菟裘、爲歸休計。於是力請宮祠、除提舉西京嵩山崇福宮。未幾告老。宣和五年六月丁未、以疾終于常州私第之正寢、享年七十有一。是年十一月壬申葬于宜興縣清泉鄉之梅林原。公爲人端勁有守、孝于親、友于兄弟、人不間其言。畜幼孤如己子。蒞官臨政、嚴而不苟、寬而有制、故吏畏其威、民懷其德。決滯訟、去民瘼、洞然幽隱、雖逢其族、迎刃立解、世之名能吏者、皆自以爲莫及也。公自奉議郎或以年勞、或以恩典、九遷至中奉大夫、賜三品

服封文安縣開國男、食邑三百戶。娶方氏、太常少卿贈金紫光祿大夫諱嶠之女、有賢行、能宜其家、累封至令人。男二人、曰多聞、通直郎、監鎮江府排岸司。曰多見、迪功郎、明州慈溪縣尉。女二人、長適宣教郎、知襲慶府鄒縣事朱缶、次適迪功郎、信州州學教授江文中。孫男三人、曰革、曰萃、皆登仕郎。曰蒙、將仕郎。孫女二人、尚幼。晚自號如如居士、有文集十五卷、曰如如集。既葬、其孤請銘於予。予與公有平生之舊、知公爲詳、義不得辭。乃爲之銘曰、

獵德之勤、積之在身。府寺踐更、蔚乎有聞。出蕃于外、惠施於民。去思不忘、久而彌新。百世之傳、視此銘文。

楊時撰 《楊龜山先生集》卷三五

楊遵道墓誌銘

公姓楊氏、諱迪、字遵道、南劍州將樂人。今徽猷閣待制、提點西京嵩山崇福宮某之長子也。曾祖某、

不仕。祖某、累贈朝議大夫。公爲髫兒、已能力學、指物卽賦、凜然如成人。既冠、益貫穿古今。孝友和易、中外無間言。平居無喜慍色、至急人乏困而樂其爲善、則矯然敢爲、必極其意而後已。與人辨論、綱振條析、發微詣極、冰解的破、聞者歛聳。退而察其私言、若不能出諸口。故無賢不肖愛敬之、蓋度不身踐、不苟言也。里有貨訟不決者、連年、公一言而兩家爲之平。其誠信於人如此。崇寧三年、侍徽猷官荆南、歸展先塋。八月甲子、次于邵武之傳舍、以疾卒。年若干。初、熙寧中、河南二程先生紹絕學於孟氏、不傳之餘、四方學者顧俗學而自悼、遊其門者惟恐後。獨徽猷與二三公號入室。公方遊太學、聲出等夷、一旦棄不顧、抱經遊于伊川之門、以邈然少年周旋群公之間、同門之士咸斂手以推先。伊川少然可、雅器許公。公於易、春秋尤爲精詣、嘗曰、人之不可無學、猶飢渴之於飲食。苟不知其方、



則常患乎異端之溺。人人孰不知此。而卒蹈之者。習俗昏之也。又嘗謂世論莊周怪誕。喜訛聖人。此正自淺陋。何足以議周也。大要周於聖人之道。略見圭角。遽欲廣己造大而不能自持。至分遊方之。內外以爲二。豈知夫聖人精義入神者。乃所以致用。利用安身者。乃所以崇德乎。凡著其所得及商略古今。爲文數百篇。今有十一二藏于家。二程先生既沒。天下師尊其道者。推楊氏。謂徽猷公龜山先生。不敢名。而公負超詣絕人之資。克世其學。雖世之望公也。則亦然。乃不幸而蚤世。豈非命也耶。公沒。孤尙幼。後若干年。始克葬公于某州某縣某鄉某山之原。娶葉氏。朝議大夫致仕祖武之女。配公。無遺德。以喪母致疾。先公三年卒。子男三人。雲。舉進士。二早夭。雲與予相好。學業志操能世其家者。以舅氏。撫州司馬曹事儋年之狀來請銘。予不及識公。自來閩中。多從龜山門下士游。間論近世

學者。至公。皆曰。吾不及也。謹爲之銘。銘曰。

斯文盛衰。天實命之。有嗜其徑。異端乘之。道堙不治。以與聖違。有志於得。俗學昏之。以見自私。乖戾莫施。孰爲毅然。莫乘莫愆。天蓋祐之。使與斯文。屹屹龜山。淵源伊洛。如星之斗。以表後學。公爲之子。妙質夙成。目濡心淳。食息訓經。不躐不陵。師訓是程。軌道以趨。不畔墨繩。行滿鄉黨。世孰知之。遺文蔚然。不可瑕疵。胡不百年。以究其業。齋志莫陳。方壯而折。天其或者。尙相公子。我銘幽竈。以告來世。

朱松撰 《韋齋集》卷二二

叔父朝請墓誌銘

劉氏出自祁姓。陶唐氏之子孫曰劉累者。以擾龍事夏孔甲爲御龍氏。自商歷周爲豕韋。爲唐杜。在晉爲士。在秦爲劉。後徙魏徙豐。曰豐公者。名仁。漢高帝祖也。漢子孫多受封。曰彭城。曰中山。曰京兆。曰丹陽。與高平。東海。長沙。平原。廣陵。南康。范陽。宣

城等郡皆所封之地。子孫家焉。惟彭城由高祖六世孫宣帝之子曰楚孝王囂者實始受封。後漢司空愷囂之四世孫也。晉司隸校尉訥愷之六世孫也。其裔孫德威爲唐刑部尙書、生審禮、封彭城公。子孫以文學政事名於時。如知章、知幾輩不可殫舉。公之先實自彭城。五代時避亂徙吳興。迹晦不傳。其名稱有聞與墳墓存焉者。諱權、諱潤、諱泰、諱昉、諱逢。至公爲六世云。公諱拱、字持道、實爲郡之歸安人。祖以伯父雜端諱述累贈至尙書刑部侍郎。祖妣吳氏、濮陽郡太君。父任、太子中允、以兄朝議諱損及公前後累贈至光祿大夫。母吳氏、新安郡夫人。前母吳氏、信安郡夫人。公生五歲而孤。雜端公爲擇師教焉。嗜學自立、不類兒童。弱冠、薦名鄉書。鄉先生秘丞朱公臨見而異之。諫大夫陳公瓘幼爲郡從事教授諸生、時郡學肄業數百人、一小較藝、以公爲第一、且相器重、俾領袖學者。凡與

計偕者三、試於禮部者六、卒不得一第。崇寧五年春、以特奏名授汀州文學。時年五十八。大觀二年冬、調漢陽軍漢陽縣尉。任滿、以捕寇賞改承務郎。轉承事郎、授密州高密縣丞。未幾、就除通判饒州。終更造朝、除監明州船場。未赴、改授通判嚴州。閱歲乞閑、除主管亳州明道宮、江州太平觀。紹興五年、公第三子寧止任權尙書戶部侍郎。公自以再世服官、率不過刺史郡守。今子爲侍從、分當知足、遂告老於朝。自承事郎以年老致仕。及遇淵聖皇帝、今皇帝即位、霈澤序遷、明堂禮成、寧止初除徽猷閣直學士恩封。凡八轉至右朝請郎、賜五品服。在漢陽時、太守游公酢雅聞公名、禮遇甚厚。且薦之於朝、不果召。高密令黷貨紊法、公數與爭、民賴以不擾。其後令以貪敗、辭連僚佐、公獨無所與。鄱陽歲潦、穀貴流亡相望、公攝郡事、營屋廬、發廩粟居養之、全活以萬計。朝廷得民謠、下使者問狀。公



數以職事忤使者、匿勿以聞、公未嘗有愠色。時興崇老氏教、其徒頗肆、郡僧有得廢觀爲寺者、繕葺殆數十年、至是奪之、既又欲并得後所薤^①產。使者以朝命屬公、有顧望意、公曰、我不敢私。卒沮止之。後人更定、無能易公議者。其守道不回類此。紹興九年二月某甲子、終於嘉禾郡舍、壽八十有五。以其年九月丙午葬於烏程縣澄靜鄉郎村某山之原。配眞氏、贈安人。男四人、恭止、早亡、勤止、右從政郎、江淮荆浙閩廣路經制發運司主管文字。寧止、徽猷閣直學士、左奉議郎、提舉江州太平觀。爰止、右迪功郎、監潭州南嶽廟。女一人、適右迪功郎、監通州支鹽倉江寓。孫男九人、巖、嶷、嶢、嶠、峻、峒、昭、嶸。孫女八人、長適右迪功郎、臨安府臨安縣主簿范壽卿。次適進士陳如雪。餘尙幼。公惟質直、不爲表暴、樂道人之善、若己出。於書無所不讀、自始學至老且病、未嘗一日廢卷。所論著多、尤工於詩。後

進經公指教者、無慮數十輩、皆能有聲。政和間、公三子賓於太學、悉以文稱。寧止射策廷中、極論時政闕失、無所諱避。天子嘉之、擢居甲科、名聞天下。由天祿閣尙書郎爲監司郡守、入居法從。率迎公之官、安輿往來、左右就養、頤指無闕、遠近歆艷、以爲教忠之報、宜有此也。晚歲康寧、視聽言動如中年時。一日語家人曰、吾大數垂盡、自此不過兩旬浹耳。寧止^②方守嘉禾、怪其語無從、亟上疏乞奉祠以歸。比得請、則公疾革矣。眞氏楚之山陽人、贈金紫光祿大夫、鐸之曾孫、贈通議大夫、晃之孫、故進士元矩之女。以賢行聞於鄉閭、奉祭祀、教子孫、率有規則、相其夫以義。先公十四年卒、蓋靖康改元三月某甲子也。享年六十有九。公葬、乃從安人之兆。至是合祔云。公於某爲叔父。某從叔父學、粵自少時、負笈游京師、與居里間、自念其孤、侍叔父之日爲最多。歲時舉酒壽叔父、喜溢於色、已而感焉。

則仰視悵悵、惟恐泣之緣睫而墮也。今叔父復棄諸孤、某老矣、苟生奚爲哉。勤止等見屬以銘、所不敢辭。銘曰、

嗚呼公乎、學無愧於古之人、自視曰不足、任弗克償其志、自分爲有餘。至於享報之豐、雖當世所謂富貴利達者、曾莫及其髣佛。則夫身之遇、與有子之禍、孰少孰多、吾不知爲何如也。

劉一止撰 《荅溪集》卷四九

譚章墓誌銘

長沙有隱君子、行義如古人、生子爲國忠臣、饗耆齡而終。曰右朝奉大夫致仕譚君、諱章、字煥之、其先衡陽人。四世祖徙家洞庭、過長沙昭潭而愛之、因家焉。曾祖裕、祖暎、父盛、三世居鄉、稱善人長者。盛用子恩、贈朝議大夫。君隱居昭潭六十餘年、專以求志爲事、孝于親、誠于物、視聽起居、必依于禮。故修之身而家齊、家齊而人化其德。平居讀書、大

而六經、小而諸子百家、與夫天文、地理、星曆、山經、釋老氏之學、無不周覽而求其義之所歸、不爲諸生循誦習傳而已。故歷代治亂興衰之所由、人材善惡忠邪之所判、祖宗以來因革罷行之所紀、悉貫穿商榷、亶亶牙頰間。稠人廣衆、縱談極辯、聽者忘倦、傾其坐人。發爲詩文、高古精深、根于義理、無補于世者、未嘗落筆。于是方數百里間、有識者君敎之使學、有材者君養之使成、不能仰事俯育者、君振之使給。所施之博、至不可勝計。鄰里之訟、有不能決者、不之官府而之君、人尊仰之、甚于父兄。有老人黃升、貸君錢百萬、行而遇盜、盡亡之、歸謝于君。君曰、幾累吾故人、今生還幸矣、尙何言。升感之、爲文紀其事。君少時倣敏、人莫能及。爲文立成、視取科第若摘髭拾芥。然一旦以親老不可遠游、盡以所得之學付其子弟。由是弟申、子世勣、皆擢進士第、顯于時。中遭靖康之變、君慟哭、一日爲喪



明時世勣爲尙書禮部侍郎數以書勉其忠義故世勣當僭僞時力起之不從至不食幽憤而死朝廷嘉之贈延康殿學士訃聞君歎曰吾子得死所矣不勝父子之情者一己之私也爲國盡節死者天下之公也吾安得捨此取彼哉昔藺相如廉頗死向千載凜凜然尙有生氣曹琰李志雖無恙奄奄如九原下人重輕知所處矣吾何恨哉乃雪涕欣然自慶不復戚戚于懷後延康之歿十有八年壽八十六無疾而終寔紹興十四年四月某甲子也君以世勣恩累封至右朝奉大夫賜緋衣銀魚妻龔氏亦儒家女有賢行封宜人前君卒子二人曰世勣延康君也曰世南未冠而夭女一人適進士胡擴孫二人曰知古右承事郎荆湖南路安撫司幹辦公事早卒曰知默右宣義郎守太府寺丞曾孫四人曰式祖曰述祖曰企祖曰昭祖式祖將仕郎君卒之若干日得十月甲申合葬君于其縣

潭子岡龔宜人之墓銘曰

衡山峻極連瀟湘中有君子潛德光閉關求志聞四方群書萬卷胸次藏上談羲農下漢唐諸儒結舌莫敢當遭時天地紛低昂有子夙在人主旁浩然之氣大且剛節義凜凜明秋霜殺身成仁聖所臧慶門萬古傳芬芳天相吉人宜壽康龐眉歲舉春酒觴歸安窰窰川之陽潭流要與茲川長

汪藻撰《浮溪集》卷二八

監察御史蕭公墓誌銘

崇寧間大臣有疑故宰相章氏家私鑄者獄姑蘇逮數十百族繫更冬不決死者填狴戶大觀改元制改監察御史服往正於理引對便坐戒以勿撓公拜手受訓陞辭或風以用事者意旨違且及禍作而言曰阿宰相富貴可指取吾獨忍盲予心當是時人情危駭重足一迹往往咎繇爲吏不得盡其直公至一日得冤狀以聞既獄以情而得章氏

幸不死、流海上。公坐鞫案故出罪、除名竄遠惡。公笑曰、緣此譴斥、死且不朽。故公沒至今凡許時、猶凜然有生氣。嗚呼、豈不真能有守大丈夫哉。公姓蕭氏、字昭甫、故長沙人。上世遭五季亂、家廬陵。曾大父良輔、贈尙書工部員外郎。大父定基、故任侍御史、贈刑部侍郎。考汝爽、故任通直郎致仕。公始冠入太學、凡六年、聲振一時。中元豐五年進士第、主越州淮陰簿、移舒州望江令。改宣義郎、知筠州高安縣。久之、覃恩賜五品服、知康州。未行、充燕越楚、昭成四宮教授、就差撥發江西歲貢、累遷承議郎、提舉淮南西路常平等事。召爲將作少監、赴闕下、以使事對、極諫巧言讒說之害。是時人方以言爲諱、公發其端、天子大感悟、即日拜監察御史、謇然有直聲。臺僚常缺不補、自是三院而上凡十人皆備。奉詔作崇寧備官記碑於臺、以紀得人之盛。被放踰年自便。又二年召還復籍、參軍開封府戶

曹。再閱月、除吏部副郎。六曹歲鈎校三人爲上等、公居高第。會北使正旦來賀、以少奉常館伴至磁。移疾請老、疾已、朝廷復以郎起公。公以通直君春秋高、力外以便養、遂刺蘄州。頃之、貶秩爲宣德郎。公典選也、曹吏或過差、不究切之。及是、當國者尙銜前敢異己、發公見知故縱、故貶秩。年五十有六、政和四年二月甲子以其官終。其年十月己酉、擇取葬於郡之吉水縣石牛潭之原。娶何氏、贈蓬萊縣君。再娶王氏、封孺人。四男子、宏、宥、宇、寅、皆力學。女一、嫁陳氏、婿曰達行、鄉貢進士。公葬時、墓不敢碑。上即位、詔追錄他日以忠獲罪者。其孤泣曰、先君齎恨九京三十年矣、今可以逞。紹興戊午、以門人左中大夫辛炳狀走行在、謁予乞銘。某辭不獲、則刪取其辭、俾刻之。銘曰、

執法之官、權重主相。咎繇亭刑、堯無以枉。腐夫撓權、於世蹇產。咸宣阿弘、殺主父偃。允義蕭公、國之



儒藏

宋儒碑傳集 卷七五

司直。淑問不猗。寧我竄殛。姑成吾所得仁捐軀篆
此銘詩以愧非夫。

胡銓撰 《胡澹庵先生文集》卷二九

校記

- ①効：原作「效」，據文意改。
- ②巨：原作「臣」，據文意改。
- ③侍：原作「待」，據文意改。
- ④譜其世：原作「講其出」，據《名臣碑傳琬琰集》中集卷三四改。
- ⑤按：原空字，據右引補。
- ⑥「黨」下右引有「人」字。
- ⑦果州：原作「果川」，據右引改。
- ⑧「之」下右引無空字。
- ⑨直：原作「且」，據右引改。
- ⑩策驚駕朽，道上紛紛：原脫，據張表臣《珊瑚鉤詩話》（《歷代詩話》本）卷二所引補。
- ⑪山：原作「宜」，據四庫本《龜山集》改。
- ⑫大悉詳下：右引改作「大命遽下」。
- ⑬雖沒一悉趨之：右引作「雖役令悉趨之」。

⑭爲唐杜：原作「唐爲杜」。按《新唐書·宰相世系表》一上：劉氏「在周封爲杜伯，亦稱唐杜氏。」據乙。

⑮丹陽：原作「母陽」，按古地無母陽，查《新唐書·宰相世系表》一上，劉氏有「丹陽劉氏」一支，「母」當是「丹」之誤，形近也。

⑯「幼」字當誤。陳瓘嘗爲湖州掌書記，即此所稱郡從事。

⑰凡：原作「幾」，不可通，按文意當是「凡」，蓋「凡」訛作「几」，又訛作「幾」。

⑱鄱陽：原作「鄱陽」，按宋代郡縣無名鄱陽者。上文云劉拱爲饒州通判，饒州又稱鄱陽郡，治鄱陽縣，則「鄱」定爲「鄱」之誤，今改。

⑲薤：疑是「殖」之誤。

⑳文字：原作「文宗」。按宋代轉運使屬官有主管文字，據改。

㉑寧止：原作「守止」，據上文改。

㉒陞：原作「陞」，據四庫本《澹庵文集》改。

㉓父：原作「夫」，據右引改。

㉔令：原作「公」，據右引及《宋史》卷三四八《蕭服傳》改。

㉕四年二月：右引作「二年四月」，誤，政和二年四月無甲子日。

㉖弘：原作「洪」。按此指西漢丞相公孫弘，言御史中丞咸宣阿附公孫弘之意殺主父偃也，事見《漢書·主父偃傳》及《咸宣傳》。宋人避諱，改弘爲洪，今回改。

宋儒碑傳集卷七十六

胡淵 陸愷 鄒浩 王渙之 江端禮

翁彥約 張根

宣義胡公墓誌銘

公諱淵字澤之姓胡氏其先江南人唐末避地於建州崇安之籍溪曾祖敏祖容皆率德不耀父罕負氣節重然諾鄉鄰有競者不決於有司而聽其一言環左右數百家終歲無訟資產本饒給群從數數稱貸無所償以故致空匱怡然終不恨公生而聰敏蚤歲能綴文及冠試於有司不與選而益務強識下至陰陽卜筮之書無不精究親老家貧於是往來授學江浙間歲終度父母所須力能致者盡市歸以獻退無私焉丁外艱母有末疾不復遠遊里閭教生徒晨夕歸省祈寒暑雨不移晷每諸生饋食有鮮肥悉持歸以佐母膳母憐其誠爲之強進而疏食飲水躬自安之既永感晚寓江湖

間而家焉歲時追慕常欲歸省墳壠子孫以年高力諫止之公曰吾少不能致祿養一恨也晚以貧故不能處先廬終灑埽二恨也今雖七十筋力猶健得一歸上塚死且瞑目矣既歸表識阡原補植松檟徘徊顧瞻一慟而去行道爲之惻楚以子通籍再封宣義郎宣和元年十一月壬子卒於所居之正寢子男五人二蚤卒安國朝奉郎新差權發遣提舉江南東路學事安止安老皆幼女二人長適宿州教授范舜舉次在室孫男女四人完貢入太學方慶曆皇祐間書籍多未刊皆手傳公爲兒童時父所傳書於同鄉仙洲吳居士之家居士閱其所寫論語字體謹慎終二十篇文無誤又視瞻凝審重歎賞之有女未嫁聰睿少倫讀書能探微旨爲擇對不輕許察公端慤特以妻之公既資純孝又得賢配相與竭力以事其親雖厄窮貧窶而閨門之內雍如也初安國典教荊州數與守忤公



知其性峻、促使求田問舍、而夫人又每誡其子曰、人患無德義耳、汝慎無得以生事累其心。公乃自爲葺廬舍、買田數頃、語妻孥曰、古者人有恆產、故士不仰祿。今之宦遊者、率低徊餽廩以自負於義。一招^②廢斥、置父母妻子於飢寒、愀然無念、可乎。居無何、其子使湖外、論薦隱士、屬吏訴之、以爲所薦者黨人鄒公浩所囑、而故相范公之門人也。坐是除名、歸而託於所葺之田廬、安處無外營。親舊乃知公識微而慮遠也。後朝廷復其子官、總益部而涉遠道、歷險塗、恐難以奉安輿、將歸誠控聞、又恐不知者隨而媒孽之、以貽親憂、躊躇未決。公察其意、乃曰、世間禍福、非人謀所及、汝自擇於義可也。卒聽其子棄官就養、處約雖久、訖無悔辭。自其子入官、盡斥其俸餘以贍兄弟之子、又取其子而教之、激其惰而揚其能、必欲成就而後已。臨終語安國曰、儒者特立獨行、不加少以爲多、汝當以古人

自期。言訖而逝。次年庚子三月辛酉、其子遵治命、以公入夫人之兆、將葬、來請銘。銘曰、

孰不爲事、事莫嚴於親。孰不爲守、守莫先於身。惟此兩者、公得之於己、而又以成其子之仁。少也文、詞發策上第、壯也學行望隆、縉紳而且惕然內省、力久不息、以要於古人。則公之子也、公誰與倫。

游酢撰 《游定夫先生集》卷六

陸少卿墓誌銘

公諱愷、字疆仲、姓陸氏、其先吳郡人。六世祖權、唐末爲建安縣丞、值中原亂、不克歸、因家福州之侯官、故今爲侯官人。曾祖中和、贈職方員外郎。祖廩仕左侍禁。父長賓、任大理寺丞、累贈通議大夫。母吳氏、贈太碩人。公自幼穎拔不羣、博覽強記。元豐初、未冠、游太學、標望絕人、一時名儒往往忘輩行、躋門願交。元祐更新學校、祭酒孔公武仲得其文、奇之、稱譽不離口、學者益歆慕之。元符三年登進



士第調廬州司法參軍。太守龔公原一見待以殊禮。侍御史彭公汝霖祭酒。今丞相白公時中俱薦試學官。召檄至。公曰。吾困科舉二十餘年。晚得一官。朝廷不吾知。欲使之裹飯復入場屋。吾不能也。卒辭不就。崇寧大興學校。郡以公兼掌錢穀。士不之教官之廬。而公之戶外屨常滿矣。執經考疑。虛往實歸。秩滿。用薦者遷通仕郎。丞相劉公正夫以給事中兼領外諸司。辟公管勾文字。閱半歲。改宣教郎。外諸司罷。公之子調官濟南。憐其少。求與之近。乞監密州板橋鎮。鎮瀕海。舶至多異國珍貨。吏習爲奸欺以漁取。公以身先之。一毫不少黷。海商便之。以外諸司賞典轉奉議郎。又以八寶恩轉承議郎。逾年。御史中丞石公公弼辟爲檢法官。已而石公以罪去。坐是二歲不遷。吳公執中復以儒學薦。召至政事堂。除太府寺丞。明年遷司農寺丞。磨勘轉朝奉郎。上方搜訪人才。劉公以中書侍郎有

異眷。薦士三人。以公爲稱首。賜對稱旨。擢司勳員外郎。車駕幸尙書省。轉朝散郎。遷光祿少卿。劉公旣相。除宗正少卿。方將力薦。引以自助。劉公遽以病去。故弗克。時修玉牒。公纂緝上臨御以來政事之大者。十年爲一書。上之。轉朝請郎。磨勘轉朝奉大夫。太常少卿缺員。有旨遴柬。丞相鄭公居中。余公深以公啓擬。命下之數日。侍御史張樸進對。論事畢。上忽謂樸曰。朕用陸某奉常。識其人否。樸對陸某老於儒學。有士望。上深然之。崇寧置議禮局。至是并歸禮寺。公於擬議參訂爲多。又修因革禮一百卷。上覽嘉之。轉朝散大夫。磨勘轉朝請大夫。補外。乃以直徽猷閣知均州。關決庶務。無鉅細劇易皆親之。吏斂手不敢爲非。先是。人情農不知灌溉之利。公出郊爲之勸相。人始盡力。歲大稔。父老勒石道傍。爲耕者之勸。公之愛民。出於誠心。因旱禱龍祠。三日不雨。公對神自咎曰。守土之不職。宜

蓄其身、民何辜、將不粒食矣。因泫然、左右爲感動、未旋車、大雨。鄰郡飛蝗蔽地千里、過境弗下、父老候公出、迎拜、以手加額曰、微公德化所感、民其餓殍矣。襄鄧大饑、仰粟于我郡、人請閉糴、公曰、今天下一家、非秦晉比、奚此疆彼界之異。晉之不義、春秋猶譏焉、吾不忍爲也。於是轉輸相屬于道、饑民賴之以濟、其爲德厚矣。三舍之法罷、士不知所歸、公至、聚生徒、擇屬吏之有學行者爲之師、講肄課試、悉視成均。郡人爭遣子弟、獻腴田以資其費、唯恐後。士風復振。於暇日、又時往臨之、申之以孝弟之義。郡大治、士民詠歌之、爲均陽樂十篇以頌其德。未幾受代到闕、除知泉州。未行得疾、終于京師。實宣和六年四月辛酉也。享年六十有五。娶黃氏、有賢行、配公無違德。子男五人、曰震、承議郎、太學博士、以學行知名於時。曰渙、宣教郎、開封府刑曹掾。曰鼎、以疾廢不仕。曰巽、曰需、皆將仕郎。諸子俱

好學有立。女適從政郎汀州司儀曹事薛銳。孫男六人、女二人。公少孤、事母以孝聞。其爲人敦厚篤實、一言之出、終身可復。遇人以禮、無貴賤賢愚之間。平居恂恂、似不能言者、徐而叩之、亶亶無倦。其文純深、析理論事、足見其志。其爲詩平淡清遠、有晉人之風。雖應用辭章、咸有典則。踐更省事殆十年、同進者袞袞登禁從、公回翔不出故列、無滯淹之嘆。嘗謂人曰、吾學古入官、期以報國利民、顧天下事非輔^④相大臣不得行、非諫官御史不得言、非侍從之臣不得與國論。今久處朝行、無一毫補、殆非素志。吾老矣、得一郡爲朝廷布宣德意、牧養小民、其可也。遂抗章力請。既得郡、治有成績、如其言、士論韙之。公在均陽、歲薦豐、築亭臨漢上、時從僚吏往游焉、與民同樂。又賦詩以廣其意、郡人悉播之樂章。至是聞公之亡、登是亭者皆爲之感涕。諸孤將以七年十二月辛酉葬公于懷安縣之馬鞍

山、以毘陵守何公袞之狀來請銘、余未暇作也。葬有期、又不遠千里、走僕致書、速余銘。昔余在熙寧中、與其兄忱相友善。是時公尙少、頡頏諸兄間、眉宇秀發、意其必爲令器。以詩見貽、有成人風度。已而學益進、行益修、挺然爲時聞人。則余之知公、蓋在諸公之先也。雖位不稱德、而見於事業者、亦足以垂世傳後矣。乃爲之銘曰、

昔公兄弟、聯車至止。公方妙齡、鸞鵠停峙。問學日滋、浸以文鳴。旋登于朝、爲時名卿。出藩于外、蔚有成績。飛蝗不下、神監其德。邦人之思、形於詠歌。勒銘幽宮、百世不磨。

楊時撰 《楊龜山先生集》卷三四

鄒司諫浩傳

政和元年三月、宣德郎直龍圖閣鄒浩卒。浩字至完、常州晉陵人。大中元豐五年進士第、調蘇州吳縣主簿、揚州教授、雒州防禦推官、知安州、孝感縣、

潁昌府教授。除太學博士、以言者論列、爲襄州教授。父喪、服闋、改宣德郎。哲宗召對、除右正言。時章惇用事、皇后孟氏廢。浩上疏曰、臣聞禮曰、天子之與后、猶日之與月、陰之與陽、相須而成者也。天子理陽道、后治陰德。天子聽外治、后聽內職。然則立后以配天子、安得不慎。今陛下爲天下擇母、而所立賢妃劉氏、一時公議莫不疑惑。誠以國家自有仁祖故事、不可不遵用之爾。蓋皇后郭氏與美人尙氏爭寵致罪、仁祖旣廢后、不旋踵并斥美人、所以示公。至立后、則不選於妃嬪、而選於貴族、而立慈聖光獻、所以遠嫌也。所以爲天下萬世法也。陛下廢孟氏、與廢郭后、寔無以異。然孟氏之罪、未嘗付外雜治、果與賢妃爭寵而致罪乎、世固不得而知也。果不與賢妃爭寵而致罪乎、世亦不得而知也。若與賢妃爭寵而致罪、則并斥美人、以示至公、固有仁祖故事存焉。若不與賢妃爭寵而致罪、則



儒藏

不立妃嬪以遠嫌、亦有仁祖故事存焉。二者必居一於此、不可得而逃也。況孟氏罪廢之初、天下孰不疑賢妃必爲后。及讀詔書有別選賢族之語、又聞陛下臨朝慨嘆、以廢后爲國家不幸、又見宗景有立妾之請、陛下怒其輕亂名分而重賜譴責、於是天下始釋然不疑陛下立后之意在賢妃也。今果立之、則天下所期陛下者皆莫信之矣。載在史策、傳示萬世、不免上累聖德、可不惜哉。乞賜開納、不以一時改命爲甚難、而以萬世公議爲足畏、追停冊禮、別選賢族、如初詔施行、庶幾上答天意、下慰人心、爲祖宗社稷無疆之計、不勝幸甚。惇等覆奏、浩除名勒停、新州編管。徽宗即位、復宣德郎、添監袁州酒稅。除右正言、遷左正言、左司諫、起居舍人、中書舍人、同修國史。遷吏部、兵部侍郎、乞補外。除寶文閣待制、知江寧府、改杭州。崇寧元年閏六月、手詔、朕仰惟哲宗皇帝嚴恭寅畏、克勤祗德。元

符之末、是生越王、姦人造言、謂非后出。比閱臣僚舊疏、適見椒房訴章、載加考詳、咸有顯證。是時兩宮親臨撫視、嬪御執事在傍、何緣外人得入宮禁、殺母取子、寔爲不根。朕爲人之弟、繼體承祧、詆誣之臣、其可逃罪。鄒浩可重行黜責、以稱朕昭顯前人之意。於是浩責授衡州別駕、永州安置。後半年除名勒停、昭州居住。崇寧四年、移漢陽軍。五年、復承奉郎、歸常州。大觀元年、復宣義郎、宣德郎、直龍圖閣。浩自嶺表還親側、凡六年卒、年五十二。自號道鄉、有文集三十卷。初、浩除諫省、欲終辭母、張問其故、浩曰、有言責者不可默、恐或以是貽親憂。母曰、兒能報國、無媿於公議、則我何憂乎。勿辭。及兩被竄謫、母不易初意、人稱其賢。

《實錄》本傳 《名臣碑傳琬琰之集》下集卷一九

寶文閣直學士中大夫致仕太原郡開國侯食邑一千四百戶食實封一百戶贈

正議大夫王公墓誌銘

宣和六年夏、寶文閣直學士、中奉大夫、提舉亳州明道宮太原侯以病告老、詔遷中大夫、以舊職致仕。七月四日、公疾不起。鎮江府以聞、詔贈正議大夫、下二浙轉運司助襄事。越十一月十日、葬公于丹徒縣長樂鄉馬鞍山之原、合諸碩人滕氏之窆、禮也。明年、其孤樅以狀請銘於俱、俱以公名德之重、侍從之老、當得道藝爵齒相先後者銘、辭不稱。樅沮且言、惟公先公所器重、知先公之志業又詳、否則無以慰九原。俱於是不敢辭。公諱渙之、字彥舟、姓王氏、衢州常山人。曾大父敏、曾祖母璩氏。大父言、高郵軍判官、贈光祿大夫。祖母徐氏、贈長安郡太君。父介、以直氣讜言聞天下、官至尙書祠部郎中、秘閣校理、贈少師。母蔣氏、贈越國太夫人。公以元豐二年一舉登進士甲科、有司疑年未及銓、格公即日出都。已而有旨、特除武勝軍節度推官。

是時太學生上書論太學教養無術、三舍取士不實、興大獄。於是新法度、更置師儒、親自上選、首除敦厚通經術者數人充內外學官、以公爲杭州州學教授。元豐八年、遷宣義郎、知潁州潁上縣事。改越州教授、再移杭州教授。元祐三年、以太學博士召、遷宣德郎。七年、校對秘書省黃本書籍、遷奉議郎、武騎尉。九年、丁越國夫人憂、服除、朝廷且用之、公力請外、通判衛州。紹聖五年、續編兩朝魯衛信錄、置局樞密院、延英豪以待用、公首被其選。元符三年、遷承議郎、雲騎尉。聖上登極、大臣交薦、召對。時方以日食正陽之月、下詔求直言、公因言、求言非難、聽之難。聽言非難、察而用之難。求而不能聽、聽而不能用、非所謂應天以實者也。堯舜設敢諫之鼓、三王立誹謗之木、自公卿大夫至百工商賈咸得因事獻言。是無時不求、無言不聽、無聽而不用也。由漢而下、正風浸微、言路堙塞。然每有天變、



輒下直言之詔其畏天愛人如此而下之報上乃或不然以指陳闕失爲訕上以阿諛詔佞爲尊君以論議趣時爲國是以可否相濟爲邪說其於大臣權要則觀望附會相戒以默志士仁人知言之無益也不復有言而小人懷姦僥倖肆爲詭譎可駭之論以爲偷合苟容之計此尤不可不察者也願陛下虛心公聽言無逆遜唯是之從事無今昔唯當爲貴人無同異唯正是用如此則人心說治道正天心得矣上延納久之且命以諫官御史公固辭曰臣以執政大臣薦而任諫官御史恐無以示公乃命除尙書吏部員外郎充國史院編修官以霈恩遷朝奉郎賜五品服尋兼哲宗實錄檢討官修元符敕令參詳官遷尙書左司員外郎建中靖國元年遷起居舍人一日賜對上面諭以詞臣之選難其稱今大禮甫近正須得人卿可當其任者公頓首辭即日召試除中書舍人充實錄修撰

賜三品服晨趨省省吏送詞頭自尙書中執法與外召還者凡三十三制當直者已書曆輒以病告公不辭蓋屬辭如流無難色崇寧元年遷給事中加飛騎尉封丹陽縣開國男食邑三百戶尋遷尙書吏部侍郎明年以寶文閣待制知廣州道削職知舒州時淮右饑流徙猥至公命附城茭舍以次振廩之所活幾萬人三年初立黨籍罷提舉南京鴻慶宮是年秋上公以與同時數公姓名付三省尋以公知福州道移廣州廣南東路經略安撫崇寧四年遷朝散郎加驍騎尉就復集賢殿修撰五年復顯謨閣待制廣爲嶺南都會番夷雜處吏事繁猥公政理詳明恬若無事有番豪殺其奴舶司援舊例送番長杖笞公不可送有司論如法自是諸番知畏戢海舶以祖宗舊數爲之制給官印以驗實乃得行棹楫不應法皆沒入分配巡捕官姦盜無所容在政三年一路之廣周環萬里歲豐人



和盜賊衰熄。大觀元年召赴闕。且以爲吏部侍郎。論者言公與陳瓘、龔夬、張庭堅厚善。元符末有害初政者。黜知洪州。論者不已。移知滁州。至滁未踰時。起知潭州。充荆湖南路安撫使。遷朝請郎。仍加騎都尉。進封開國子。加食邑二百戶。前此。僭賊間出。病居人。公命謹斥侯。嚴紀律。諭以利害。各毋侵擾。邊境以寧。大觀二年。遷朝奉大夫。移知杭州。兼兩浙西路馬步軍總管。時新建帥府。修城壁。完守具。事集而人不知。居一年。差提舉洞霄宮。公罷。部使者行府事。亟榜賓次曰。造作局官。雖故皂史。然官有品。承前不接坐。非是。自今接見如賓禮。凡公所施置。多見廢格。公無愠言。久之。起知河南府兼西京留守司公事。充京西北路安撫使。道移知揚州。充淮南東路馬步軍總管。四年。召赴闕。以給事中兼實錄修撰。同修國史。編修神宗寶訓。遷吏部侍郎。加上騎都尉。進封開國伯。加食邑二百戶。遷

朝散大夫。政和元年。以顯謨閣待制出知壽州。言者以故相商英黨。不宜守郡。削職。提舉舒州萬壽宮。五年。復寶文閣待制。提舉江州太平觀。遷朝請大夫。六年。起知滁州。七年。遷朝議大夫。進封太原郡開國侯。加食邑四百戶。重和元年。移知潭州。兼荆湖南路安撫使。居數月。移中山府路安撫使。兼知定武軍。過闕。上賜對勞問。時公未疾。雖平。進趨猶小異。留賜御府藥。且面授湯劑之宜。遷寶文閣直學士。以寵行。公至中山。一以鎮靜爲務。明年。朝廷方議北伐。差提舉亳州明道宮。三年。遷中奉大夫。加食邑三百戶。食實封一百戶。公之卒。享年六十有五。子二人。曰樅。朝奉郎。新差河北路轉運司管勾文字。曰楹。承務郎。孫一人。曰光遠。登仕郎。女四人。早卒。公天性端厚。自爲兒時。不妄戲笑。見者不敢慢。期以遠器。年十五。居少師喪。哀毀骨立。未冠。一旦以諸生奉大對。褒然文采動一時。多士無

出其右者。然公方泊然無仕進意。教授州學六年。書博士考五。時人莫測也。嘗從容語人曰。乘車常以顛墜處之。乘舟常以覆溺處之。仕宦常以不遇處之。無事矣。紹聖間。公免喪還朝。見宰執政事堂。即請外。既得通判衛州。曾丞相布時知樞密院。聞公賢而未識也。亟使人召公。公辭以事。即日行。未幾。曾公辟置修書局。一面益加重。公論事正平。不爲峻厲不可奪之言。而其從容諷議。卒歸於正。人亦莫能奪也。及進從班。公望益孚。其風度器業。人以宰輔期之。而上實器遇。公後雖流落藩郡。見貌類公者。上曰。是似王某。蓋念之不衰。及召自湖南。顧睽甚渥。使公不病。必且留。留必用。公之志或有見焉。公更六鎮二郡。皆以清淨不察察爲治。在後省。其命詞書讀。不視時爲出納重輕也。在銓部。舉大綱而已。惟公簡而和。靜而敏。端迄而有容。觀其雍容醞藉。進趨語默。知其爲德人也。平居寡言。出

言成文。必詣理而中會。及論古今治道。亶亶而不煩。見公者。勢利俚俗之言不能出口。俱常以謂公有叔度之宏雅。而無東漢之沽激。有獻之之風流。而又無晉人之狂放。識者以謂知言。昔周公作立政。亟稱克用常人。箕子陳洪範。以無作好惡偏黨反側爲王道。公初以小官見上。其言明白深純。有合乎大中正直之道者。蓋自燕間所稱更世之故。以至艾耆。而志未嘗不一於斯也。若公可謂有常德者。非耶。使公進不當机隄變更之時。留侍帝前。日以所學備顧問。朝夕獻納。契上心。適幾務福被天下。豈少哉。不然。天下治安。使公端委廟堂。經體論道。俾百僚各得其職。循理守成。以阜康元元。且必爲名宰相。公有文集三十卷。而公初賜對所以告上之言。俱獨盡載。而又論之詳焉。亦以見公之志爾。銘曰。

惟皇建極。福茲黎元。無反無側。無陂無偏。無作好

惡其爲如天。公初召見、揚于帝前。美哉洋洋、大臣之言。政無故新、惟是之從。人無異同、惟正之庸。由初入朝、獻納諷議、壯老行藏、一志于是。公在朝廷、將美贊猷、不亢不隨、惟德之休。出臨一邦、爰制閫外。綏之拊之、不約而治。有匪君子、性與道侔、何以求公。盍視其流。如彼麟鳳、來下來游。不驚不馳、莫與之儔。公言不亡、公志莫施。尙考公德、視此銘詩。

程俱撰 《北山小集》卷三〇

江子和墓誌銘

君諱端禮、字子和、一字季恭。始江氏自漢轅陽侯德爲陳留圉城人。祖諱休復、仁宗時修起居注、有重名。考諱懋相、朝散郎。子和生而沈粹、年十七遊太學、爲同輩敬憚、獨裕然不肯就公試。或試則居上列。常歎曰、是不足學也。令人慙耳。方是時、東坡謫居黃州、子和特傾慕之、以書講學焉。子和於一世德名人皆願從之遊、聞人毫髮之善、汲汲稱道。

惟恐不及。蓋自其舍人之風流爲然。子和學詩律於黃魯直、論經行於徐仲車、爲尤謹。二公俱以子和爲賢。此二公者、他人或不能並善其家法也。方舉世不爲春秋之學時、有六合崔子方伯直者、世莫知其爲人。子和一見而定交、曰、此吾之所學也。願與子共之。伯直遂因子和得名於諸公間。子和之志行遠矣哉。其事親孝、能色養、教二弟必欲與己同善。然諾謹於僕妾、不侮乎童稚。終日在閭室、無惰容。如天使而壽且仕宦、得時爲祭酒、爲御史大夫、勸講金華則優矣。不幸年三十有八、以紹聖四年七月二十三日疫不起。娶王氏、能爲子和躬勞苦。先子和卒。再娶張氏。子男三人、女二人。其二弟端友、端本、今俱以文行稱。二弟哀子和之遺藁、爲集若干卷。子和嘗病、柳子厚作非國語、乃作非非國語。東坡見之曰、久有意爲此書、不謂君先之也。魯直則曰、子和文辭簡理、似尹師魯。以崇寧五



年五月十五日從葬于陽夏先墓之次。崔六合爲行狀。黃州潘邠老欲銘之。而邠老卒。宛丘張文潛又欲爲銘。會文潛病。不果。說之六弟微之光道與子和早相善。因得子和在兄弟間。乃爲之銘曰。天何爲哉。嘻。善士植植方茂。忽以逝。不使究極能厥世。或如好之聊嬉戲。彼頑兇狠天亦畏。一旣生之莫敢斃。又且富貴如其志。子和九原何所遺。漢轅陽侯百世嗣。

晁說之撰 《嵩山文集》卷一九

翁行簡墓誌銘

公諱彥約。字行簡。其先京兆人。唐末避地。子孫散居七閩。公之六世祖徙家建州之崇安白水鄉。故今爲崇安人。曾祖伯珍。不仕。祖元方。以其子恩賜朝奉郎。父仲通。以文行爲東南儒宗。學者咸師尊之。仕至朝奉郎。累贈銀青光祿大夫。有子三人。公其長也。公天資穎悟絕人。自幼學已能屬文。旣冠。

博總經傳。尤深於禮學。元豐末游上庠。聲聞籍甚。一時知名士皆慕與之交。元祐二年與國學薦以祖母壽昌君之喪未赴禮部試。銀青外除造朝。欲侯公策名而後告老。公以謂用是緩吾親歸休計。非便也。請以世祿之恩授中第。銀青不許。力請而後從。已而兄弟更相推遜。聞于朝。事雖不行。縉紳義之。公旣不第。益自奮勵。術業益加進。建之舉進士者。無慮五六十輩。公再舉皆中首選。從而受業者常數十百人。元符三年上即位。以日食下詔求言。時公與計偕。奏格言二十篇。上篇自祇命。原化典學。崇儉以至審治。言所以立德。下篇自擇術。因任兼聽。務和以至審勢。言所以立政。皆陳古義。以砭今非。言近而不迫。直而不忤。識者重焉。政和三年擢進士第。調汝州龍興尉。丞相何公素知公。謂所親曰。翁生縱未能用。不宜辱之捶楚間也。改常州司刑曹事。公蒞事精敏。郡治賴之爲多。惡吏屏



息有遁逃、訖公在幕府不敢出者。居二年、江淮荆浙制置發運使以奏計對、上問所部人材、使者與公初無雅故、以清議所在、首以公對、驛召爲詳定九域圖誌編修官。政和七年改宣敎郎、除太常博士。以與修因革禮、遷奉議郎。歲餘乞補外、除提舉河北西路學事。及陞對、建言、朝廷更八行法、使俱試于有司、以革奔競浮濫之弊、固善矣。然八行初非以文辭選也、今限以等第、有中程而不官者、與初立法異甚。謂凡入等無問高下、俱與廷對、以示詳行實、略文華之意。時浙寇犯衢、處公之弟中丞公由御史府得請鄉郡、公亟以書屬之曰、賊方熾、勢必侵軼吾郡。自衢信抵浦城、崇安、險阨易守、不可犯。惟處之龍泉至松溪、浦城皆蕩野無捍蔽、龍泉破則建危矣。龍泉之士有葉植者、其人邁往有智略、因之使拒守、宜可倚辦。中丞公然之。比至鎮、植已率衆拒賊、即出兵益給糧械助之。卒如公所

料。朔方士大夫聞之、謂公料賊於數千里外如指諸掌、非智慮精審過人、能如是乎。公在朔部尤以人材爲意、有所薦拔、必擇行能卓然者先之、如解習之徒是也。學政於民事、初無與焉。公所至必諏訪民間利病、與夫實邊制勝之術。日與將士講畫、意謂異時以使事歸報面陳之、爲朝廷經遠之慮。既罷使事、不復對、除權發遣。黃州轉承議郎。宣和四年夏之官、道改高郵軍。高郵當江淮孔道、商旅所出入類多以貿易茶鹽爲業。姦民計圭撮銖兩之私、連逮抵罪者不可勝計。公下車有告言者、隨決之無留。吏猶習故常白於公、欲以枝辭蔓其獄。公曰、兩獄充斥、若等尙恨其少耶。吏愕眙失對。於是一郡相慶、知公以民爲念、吏不得倚法爲奸也。歲大旱、公以禱祠疲甚、既而公得疾、所親以是尤公。公曰、民蘇而吾病、無憾矣。病浸亟、遂乞致仕。章未報、以八月丁亥卒于軍治之正寢。享年六十有

二。公性孝友、事親盡子道、於兄弟怡怡如也。敦睦
婣族、人無間言。遇人無賢否、一以誠意、人人自以
爲親厚、而與之同趣、蓋鮮矣。延平陳公晚居淮南、
見公喜、語人曰、翁奉常靜恪有謀、使得志、殆能濟
務。其爲名流推重如此。公爲高郵、視事纔數日、屬
疾、民或未識公面。及公之喪、行道之人皆出涕曰、
失吾賢守也。蓋誠之感人、未有不動者。娶吳氏、奉
議郎桓之女、封孺人。子男二人、曰挺、迪、功郎。充兩
浙轉運司管勾文字。抗未仕。女一人、適承事郎李
維。內外孫男女十人。有文集十卷、其文精緻潤縹、
得作者之體、尤長於詩、藏于家。昔公在太常、二弟
俱持節還朝、列侍從、居要官、公復出使于外、建雖
多士爲東南最、而兄弟俱被榮寵、未有前比。意公
晚仕、積厚而源深、其發必遠、遽爾淪喪、士論惜之。
其孤將以明年六月丁酉葬公于白水之源、屬余
銘。余於公有朋友之義、不得辭。銘曰、

獵德之勤、名則隨之。名實既孚、君子之歸。湫深有
源、渭流未施。百世之傳、視此銘詩。

楊時撰 《楊龜山先生集》卷三二

朝散大夫直龍圖閣張公行狀

公諱根、字知常、姓張氏、唐宰相文瓘之後。五季時、
有徙居江淮者、故今爲饒州德興人。大理通直父
子、以氣節言行爲鄉人所宗、一時豪傑、皆拜其家
如子姓。至中奉公始舉進士。公幼莊重、方髻稚已
凜然有成人風。性嗜學、掃一室獨居、人不堪其憂、
澹如也。饒士盛東南、應書常數千人、所取裁百一。
公以童子在選中、時年十四。入京師、補太學生、群
數千人、試于有司、復中第二。自是以文居諸生右、
而行獨修飭、出入皆可從迹、祭酒博士欲召見之、
不能也。連三試禮部、以元豐五年擢進士第、年二
十有一。禮部尙書黃公履聞其名、以女妻之、歸拜
大父母、父母于堂、人以爲榮。調臨江軍司理參軍、



遷瀛州防禦推官、知處州遂昌縣事、有政績。代去、民挽留之不可、碑其事以懷之。用薦者于法、應遷以大父母年高致其仕、則恩及之、遂以通直郎致仕、時年三十有一。丁令人憂、有絕人之行。葬之日、鶴翔于墓。上嗣服、問輔臣人材可用者、曾丞相布以公對、而翰林學士曾肇及部使者亦奏公節行。于是落致仕、召對。力辭不報、則面陳人主能不以功業之敏自矜、盈成之易自佚、守之以中、求天下無治不可得也。因言東南災傷、賑給有限、願廣求所以寬恤之術、而杭州置造局可罷。臣嘗謂人主一日萬幾、所恃者方寸之地耳。一累于物、以失其正、則聰明志慮且耗怠、而賢不肖混淆、至于紀綱不振矣。願陛下清心省慾、以窒禍之原、天下幸甚。上嘉納、將用公、而小人不利、以爲昧朝廷大體、授公親賢宅教授。未幾、除通判杭州、以親老、乞監西京東嶽廟。丁中奉公憂、服除、提舉江南西路常平

等事。洎終任、田疇之墾、桑柘之植、溝防之修者、以千萬計。時居養安濟法行久、有司頗以浮冗侵常平本錢、或取給于民。公約爲數條上之、所節過半、大臣不悅。歲旱饑、盡發常平米及遮留上供米賑濟、已舊責、蠲新賦、凡可以弭災、無不爲者。手疏力請于朝、凡八十餘上、纖悉有法。躬徧所部、閱半歲、暑行數萬里、雖瘴疫冒之而前、官吏爲惶恐盡力。于是方數千里、流冗悉歸、施及鄰壤、其全活者不可勝數。會中貴人爲走馬者怙力挾私、以官吏散軍衣給錢、非是舉一路帥臣監司守貳而下、劾罷之。公曰、散軍衣半錢例也、況其數加舊乎。祖宗置東南軍伍與西北異、上下相安百五十年矣。今一旦以給散坐帥臣監司、恐軍浸驕不可制。且帥臣監司、朝廷與之分憂顧者也。政使有罪、猶當待報、直以體量尺紙罷之、可乎。今茲振貸、奉行尤藉官吏、乃空十郡、僅有存者、非徒無檢視蹂踐之患、慮

別啓姦倖爲朝廷憂。于是詔悉還之、官吏相慶。自崇寧行鹽鈔法、和買民帛、率不得償。雖朝廷令借封椿錢、而錢特空名。公乃大發常平米、計直予民、猶不能半。會星變大赦、則奏、自祖宗以來、歲給蠶鹽以取民輸。今民既輸五年、而一縣至有負民五十萬緡者、將何所控告。謂宜因霈恩、盡給今歲租百四十萬斛、給中都百二十萬、而官兵度五十萬、使歲入如數、猶缺四十萬。舊以鹽利三十餘萬緡、和糴、故雖凶歲不乏。自更法以來、州縣重取百姓耗米以給、民既不堪其苛、而和買四十萬緡、復以無所從出之錢給之、民心易搖、不可不慮。議者徒謂虧榷貨務額、此豈知社稷至計哉。未報。間會詔書許諸路監司實封言事、公言、本路去歲詔蠲租四十萬、而戶部責發如數。祖宗立東南上供額六百萬斛、賜發運司本錢數百萬緡、使歲廣糴以備非常、隨補隨取、此萬世良法也。自希恩者以爲羨

餘獻之、故朝廷不足則下諸路補發、勢必敷于民、爲無窮之害。緣此漕計窘乏、無名之斂百出、臣以爲補發不當復催、盡以鹽額還漕司、糴本錢還發運司便。已而運鹽復元豐法、稍以鹽還民、公之力爲多。洪州官沒錫數萬斤、繫兵吏七百人于獄、株連且千計。公曰、十年失于譏察、有司之過也。今羅取無罪之人苦之、追償必不可得之物。方歲凶之餘、冤濫如此、何以召和氣乎。朝廷爲罷獄、興國民郭友餘習妖教、郡以屢赦聞。公言、友餘、張角術也。異時李逢嘗以此惑民、請論如法。大觀四年、領廣鹽入議、時上躬政事、隆寬盡下、公欲遂成之。洎對上勞苦良渥、首以江西賑濟爲言。公奏、救荒、臣職也。惟本路闕乏、所請輒從、民力以紓、爲大利。若行此數年、公私自然充實。上深然之、賜緋衣銀魚以遣。且曰、推行法度、要在得人、不擾于民、方爲利國。公奏、訓辭深厚、乞頒之天下、付之史官。從之。敕歸



本路有所見、奏陳。公頓首謝、因言、臣幸因于寧節、隨班上壽、不勝封人之祝。昔管仲祝桓公以無忘在莒時、臣亦願陛下無忘答天戒時。上大悅。即日趣議鹽事、得內侍省牒、事聽關白。公即奏、陛下幸蠲煩苛、破朋黨、而士大夫以大臣不和、議論不一、觀望苟且、莫肯自盡。陛下毀石刻、除黨籍、與天下更始、而有司以大臣仇怨、廢錮自如。爲治之害、莫大于此。願思所以協和之且、申嚴戒敕。又請限豐歲廣糴之數、以毋奪民食、精縣令銓補之法、以毋失民平。勿妄支移常平封樁錢、以志滅二敵。使中國競、百姓富、朝廷正、群臣和、以示人主尊強隆盛之勢。反復數千言。時執政近臣方大爲矛盾、故公言屢及之、以感悟上意。遷轉運使、人謂公德行文學、宜在朝廷、處之非其地、而公不屑。會歲饑疫、朝廷責補發不已、又促輸納紬絹之期、追遠年無名之責、鬻官田者大虧上供之數。公歷陳利害、奏罷

之。且言鹽法旣更、其封樁鹽可盡給和買、還之民。力陳、見聽。以廣鹽數額、賜三品服。以直達有勞、進兩官。公于漕計、能權其贏、爲轉輸之本、故屢辦而民不知。尋徙淮南。先是漕臣承拋降、慮不及事、則以浮數調民、州縣遞增、所取無藝、吏緣爲姦。或州郡以非所產、至漫數年不一輸者、公令民必實、且爲納直通融之法、民歡趨之。有出非其時、地非所出者、復曲折爲陳、或紓或免、其事非一、當時稱便。被旨赴闕、大臣以有親嫌言者、令再任、除直龍圖閣。歲水災甚、民流滿道、而錢法遽更、農末皆病。公乞蠲租賦、盡散洛口米、常平、青苗斛斗賑貸、且通一路有無、應辦公私爲之兩濟。詔書褒諭。尋以江淮諸司使臣游蠹諸郡、命公按之。公悉條其狀、并所自以聞。詔各驅還所役、違者從公械治。于是大失權倖意。徙兩浙。公聞蘇杭局每物必十倍其費、以其一供奉、餘悉餉權倖爲己私、窮之則火其籍、

如蘇州一日焚官物八十萬是也。于是因辭免。慙慨力陳，命以之寢。復以表謝，其略曰：雖以天下奉一人，不爲過也。然得丘民爲天子，顧不重哉！搢紳誦之。小人由是得以間公。會盜劉五暴廬，壽公走助憲臣破之，除秘閣修撰，以渠魁未擒，不拜。方欲條上討賊之方，而中遣貴人董捕，欲自以爲功，乃奏罷憲臣，而公亦坐降兩官。自淮賊擾，軍興頗乏，公以爲縣官空匱，未有甚于此時，而當路恬不警省，萬一有緩急，何以待之？因手詔取會漕司財用，乃言：東南諸路闕乏之由，除撥賜贍學、宗室等財用田產，添置官兵及朝廷非汎拋買外，一項茶鹽錢並入榷貨務，應和買鹽並支見錢，而民卒不得。乃至軍儲，亦月爲之計。稍有水旱，即干叩朝廷。此大弊也，其原自榷貨務。朝廷縱未能盡還歲額，若止分其半以助漕司，歲會天下合得和買茶蠶鹽價賜之，許折兌上供錢，以示大信于民，諸路當亦

少寬。茶鹽法行十餘年，尙未立租額，歲務增羨，民窮困不聊生，可爲流涕。今糴本之外，復須五百萬緡。屬者趙霽宣御筆，令于額外計置斛米，歲終殿最正用。漕司方以經入不足爲憂，不知錢何所出，恐迫之即不能無騷擾之患。今民和買旣不得錢，而斛斗又非倍輸不可，其間官戶以倖免，豪猾以賂移，所苦者特畏法貧弱之民，可謂無名無數。高下不均之甚矣。而有司方以用度不繼，率取給于此，雖人知其非，苟避誅罰，莫肯爲陛下言者。況復使之額外計置哉？因進三說：一曰常平止納息以抑兼并，二曰下戶均出役錢以絕姦僞，三曰市易取淨利以役商賈。雖名非正，然與敷和買而不售其直，什一而使之倍輸，額外無名無數之斂有間矣。願陛下儲此錢以馭四夷。若夫理財，尤在節用。而節用以修造爲先，修造雖于國體有不可廢者，比類以此固寵市恩，不可不察。其次如人臣賜第，



賜帶、予金帛、給田屋之類、尤爲泛濫。佐命如趙普、不聞官爲造第也、定策如韓琦、不聞彫牆峻宇、僭擬宮省也。今乃人得居而有之、奈何掠民膚髓爲廨役之奉乎。書奏、自禁中撙節用之說、付有司看詳。而大臣及議者不察、謂公言利搖成法、章交上。上察其誠、不之罪也。會御前人船所占留直達綱船、公以上供期迫、乞還之。且因起發竹石、上言、本路一竹之費、無慮五十緡、他路猶不止此。今不以充苑囿而入諸臣之家、民力之奉將安所涯。願示休息之期、以厚天下。書奏、權貴積怒未發間、御筆以直達促限、令漕臣較州郡賞罰。公貼黃親書、力陳人情有大不可者、乞展限、其辭激烈。奉御筆落職監信州酒稅、有輕躁妄言、不循分義之說。外廷方莫測、而臺臣復論前奏常平事、責授濠州團練副使、郴州安置。尋以討賊功、許自便。更宣和改元、赦復朝奉大夫、夏祭赦、復朝散大夫。宣和二年六

月十七日、以疾終于家、享年六十。公誠孝、甫六歲、已知母疾、療之。通直曰、是必爲孝子矣。既罷臨江、時中奉公客熙河未歸、步馳省者再。冒寒暑、往返萬餘里、卒御之以歸。自是專以奉親爲樂、舉天下無以易其志者。時四親在堂、隨其意奉之、日躬僕妾之勞、有古人所難者。令人疾病、一夕鬚髮爲變、扶持彌月、癯然骨立。既卒、勺飲不入口者七日、屢絕復蘇。方哀毀甚、而奉飲食起居、無一不如生者。啜粥寢苦、不盥不櫛、不易衣、不嘗味、不飲藥、泣不絕聲、終喪三年。及侍祖妣疾、執父喪、亦如之。終其身孺慕不已、言及輒聲與涕俱。初、公之請老也、年方壯、人惜其遽。公曰、養及四親人之至幸也。萬一有不及、爲終身憂、其可緩乎。是年以父母之恩及其祖妣、而以妻封及其母、鄉人彭汝礪爲文頌歎之。未幾、復以已得之服爲祖榮、于是聞者莫不聳動、而天下人知公名矣。公居山林久、一旦爲天

子所知、起之召對、士大夫想聞其風。及對、首陳讜論、卓然以名節當上意、于出處皆合、天下益賢之。自此三賜對。洎奉使十餘年、其面陳者不計、章疏凡數百上、悉天下大計、觸當時之諱、詆方行之令、與大臣權倖爲敵而無所阿附。反覆窮盡、不度可否、以身任之。有宰執臺諫所不敢言、人爲股栗而公不恤也。上亦知公精忠、每排衆議用之、數加器使、獎賚于開陳多見聽納。而小人權倖日以讒公、雖卒坐言譴死、而天下拱手推爲正人鉅德。卒之日、識與不識、皆爲實涕。公之學不守章句、居閒十有六年、專覃思經史、務欲明聖人之道而見之行事。故發爲議論、辨博閎深、援引古今、深知治體。在元祐則言詆新法、置理訴司者、在建中則言不當棄地、在大觀政和則言糴本和買、茶鹽法。其大者欲人主正心術、去朋黨、斥玩好、而于論邊事尤詳。其至自熙河、深以中國受屈爲恥、得其曲折、歸以

告彭汝礪、使并王瞻薦用之。其說以爲二邊之患、近而且遽者、惟熙河、青唐。以其與夏人相爲掎角、而國家懲寶元、元豐之失、以兵爲諱、非也。夫維大舟者必屢折其勢、制猛獸者必先困其力。彼夏賊叢爾、政當徐以術制之、不當急與之較。乃陳攻禦備守策上之。以棄熙河爲持右臂授羌、將爲隴蜀之害、而守熙河非滅青唐、取河南不可。其後朝廷卒不棄熙河、王瞻取青唐、悉如公言。元符間、夏人窮蹙、藉契丹請平。公以爲自祖宗以來、每敵犯塞、爲害益深、所侵益大、所須益多。不取、後稍振必復爲害。不若厚禮其使、使乾順身入朝、否則歸我河南、質其大臣愛子。皆不從、則曲在彼、而我師有名矣。彼固已失其咽喉、若由蘭會浮槎以進、一夕可至、所謂迅雷不及掩耳者。會命已行、不果從。後朝廷每有事西方、未嘗不言。至論常平、則又言之、欲必取二敵。自陳東南無事、欲行死邊塞、求人可用



者。用人當如李愬縛元濟之奇、不當如樊噲行匈奴之誕、人皆偉之。公于吏治不爲文具、凡勞險煩劇人所不堪者、未嘗辭。臨事強明、人不能欺、尤汲汲于恤民。與客論利病、常至夜分。有所得立陳、推見本末、能使朝廷必從己。其馭吏嚴而不傷、升黜以核實、不以偏辭。故自爲州縣吏至爲部使者、人皆取法、畏而服之。于施財樂善如嗜慾、然至寵利則低回畏避、甚于機穽。居太學時、得家問輒舉篋授同舍之貧者。所至坐客常滿、親友游士館于公家者、常數十人。葬死字孤、皆得其所求而去。士之落南繇江西以出者、多賴公以生。大臣臺諫以忠斥者、率數千里追贖之。退視其奉養陋甚、死之日、餘銅唾壺、書數簞而已。聞人小善、必演而成之、雖昧平生、亦拳拳慰薦。或斥非其罪者、雖自敵以上、非職所及、亦冒爲之言。然平生未嘗以私于人。其遷官十、悉以勞以恩而不磨勩。淮南之僚有攘公

之功、取優遷、而賞不及公者、人皆憤之。公未嘗言及。坐淮賊例鑄官、則乞併降己官、以除其負。得主田、又損己而均之。其與人不校、反調護之類如此。然朝廷亦雅高其節、始以服推其祖、晚以子之官官其叔父、皆非故事、特旨從之。平居謙厚不伐、胸中洞然、一言之出、終身可復。喜面折人過、然退無異言。于人委曲成就、無所不從。及忠義激烈、萬牛莫能回其心也。居鄉里、于親疏長幼、大小厚薄、無不用其至。蓋人有一善、可以名其終身者、在公皆不足道也。夫人黃氏、南華縣君、改封宜人、知書、有賢行。先公四十日卒。子四人。熹、太學博士。熹將仕郎。輝、煥、未官。女七人。適秘書郎黃伯思、起居郎李綱、太學博士李富國、大府寺丞薛良顯、杭州監稅范涓、寶應縣丞虞澹、一人尙幼。至老未嘗釋書不觀。故下至天文、地理、卜筮、圖緯、歷數、無不精通、而尤深釋氏。其文溫潤純粹、仁義之言藹如也。詩平

澹簡古似其人鄉人師之。隨其材、或文或行、皆有可稱、而其弟相樸、遂以文學躋臺省、躋侍從、爲名臣。其子燾、亦以任子力學、廷中第三人。有釋周禮、易、春秋等書三百六十卷。公早樹立、隱然有公輔望。自親亡、力思所以報國、故身雖不在朝廷、而未嘗一日忘君。嘗患風俗上下相蒙以取利、每因職事所及、災異所詢、于愛君恤民之際、諄諄言之、又以告大臣親舊者。嘗曰、苟有以天下爲度者、吾從矣、亦何常之有哉。而妻父黃履尤器公、以爲可屬大事。雖相去千里、公有言必告、有大事亦以咨公。如救鄒浩之類、皆自公發之。其裨益之功、陰及天下非一。而讒者疾公不置、以天子聰明大度、知公如此、而曾不得一日立于朝廷之上。或以時未可言、謂公少貶者、公曰、吾以委蛇事君、雖出沒風波萬變之中、隨宜救世、而無功名富貴之累。爲得聖人用心、顧世人未知之耳。使遂其志、施設何如哉。

聞貶郴陽、獨挈其所著書以行。及返、猶疏時事數千言、須上悟而陳之、且屬弟侍御史樸誦言于朝。疾已革、其語不倫矣、而所道亦時事也。嗚呼、可謂忠義出于天性、古之全德君子。諸孤將以某年某月某甲子、合葬公夫人于其里鑄印墩、謹錄其行事如右、謹狀。

汪藻撰 《浮溪集》卷二四

校記

①事：原作「士」，據文意改。

②招：疑當作「朝」或「遭」。

③濟南：原作「齊南」，據四庫本《龜山集》改。

④輔：原作「轉」，據右引改。

⑤詩：原作「時」，據右引改。

⑥徙：原作「徒」，據四庫本《北山集》改。

⑦夫：原作「史」，據《宋史·龔夫傳》改。

⑧大觀：原作「崇寧」，按此前已叙及大觀元年事，後又有「四年」、「政和元年」字樣，則此必爲「大觀」之誤，徑改。

⑨遣：原作「追」，據四庫本《龜山集》改。



藏書

宋儒碑傳集卷七十七

胡登臣 祝奕 蔣璿 蕭楚 呂好問

胡嶧

十九叔墓誌銘

廬陵號天下士區、言著姓者實與胡氏。君諱登臣、字正平、長厚人也。曾祖湜、祖副、名隱君子、父諒、任將仕郎。自上世皆累仁積善、勤儉保家。君幼警敏、書經日成誦。弱冠從諸兄遊賢關、講學祭酒皆賢之。親且老、丐歸覲、未幾復游宦鍾陵。時著作劉公、弇官尚席、門甚高、獨進洪氏弟兄。君後至、大見獎許、遂與齊名。然數奇、年三十七方舉進士。偶遘疾、又連丁怙恃憂。服除、應試禮部、親交強之行、則曰、學以干祿爲親屈。今雖得祿、不泊矣。一丘一壑、吾將老焉。人莫不健其決。初卜葬親、或謂伯仲季有利不利、宜賂陰陽家者。君曰、顧親安宅兆不爾、餘視兄便、吾何計私。久之、二兄以門戶事夥、議析業、

君一切弗違、至膏腴便近、則悉歸之兄、無難色。是足羞庇焉而尋斧者。君既脫世網、益觀書、勵子姓如束濕、使必趨孝弟繩檢、以故悉力學自勉。至同時賓貢者三。而其子份周游兩學、藝屢占優等、遂解褐上舍。自是族里益勸、接踵與計偕、不十稔、胡氏連三人中第。君家業儒者五六從、及是始大振。君義訓功爲多。初所居里頗殷實、寇窺覬、至建炎庚戌春、乘罇倍道進。君發鄉黨家屬亟行、己獨後。賊要之塗、君正色叱之、將加害、旁有走者曰、天乎、善人亦不免耶。賊追詰走者、知爲公也、因解去。且速君行、毋死他寇。後數有遮列警。君避地者再期、忽喟然曰、吾老矣、先人敝廬僅存、倘先蒲柳、得易簣牖下爲幸。其遂歸也。時已七十、尙強健如許。偶失仲兄、且平時長老行無一存者、居卒卒不樂、得瘡痢疾。一日、顧謂份、吾生平自視少無愧、今瞑目何憾、第恨不及復見太平官府耳。言訖而逝。實紹



興壬子十二月壬寅也。君性至孝、事長嚴饌、親極豐旨、而自奉約、鄉里慶弔必先。操履剛正、常以己望人、然止責賢者備、喜善嫉惡、至銘肺肝。學雖博、不閱佛書、曰、西來大語、要教人善耳。吾心與佛契、何至著文字相。雅好客、把酒賦詩、間談及圖史、琅然疾讀、一字不差。寒士以書篇贄謁、援、或非是、即從容訓告、去則厚資之、人義利兩得、莫不意滿。比歲兵革蜂午、穀貴艱食、君勇於市義、族姻朋舊不自存者、必我也。始克衣食嫁娶喪葬。至寡弱困於魚斂、又經理其家。及君亡、識不識皆出涕、嘗德君者至縗臨甚哀。嗚呼、春秋書澶淵之會、大救災也、而寵名皆棄、惡其爲惠不終、君固宜褒矣。兩娶歐陽文忠公族前室朝散郎粲之女、歸六年而亡。繼室儒林郎延壽之女、亦先一紀亡矣。皆靜順、得婦道。男一人、份也、今左從政郎、新差衡州州學教授。先是人謂君恬養、貴必以子、然份亦廉於進、嘗

官臨江、宜春、皆奉引以便養。父令子恭洗手就職、爲大吏所知。雖委領諸曹、不妄干薦、甘困選調、致君弗獲生享褒封、可歎也。女二人、長適進士羅端中、次適右迪功郎、權袁州分宜縣李尙仁、先卒。孫男四人、昌朝、昌時、皆早世、昌時嘗被鄉薦。昌言、昌明、咸善讀書。孫女一人、適將仕郎張瓘。曾孫男一人、女四人、俱幼。份卜以次年三月甲申葬於吉水縣中鵠鄉白蓮塘之原祖塋之左、以從弟銓狀來乞銘。予嘗第進士策、以直言□銓寘鼎甲、是當不妄、遂銘之。銘曰、

仕而不淑、官也實汙。處而不窒、隱也何迂。彼爵彼榮、我詩我書。學殖肥家、贏金蔑如。德厚流光、根膏實腴。非此其身、尙其後之須。

胡銓假徽猷閣待制知吉州李正民名銜撰 《胡澹庵先生

文集》卷三〇

處士祝君墓表

惟我皇祖宣奉公以道術爲東南儒宗、著錄之士、悉皆名流。君嘗受業焉、蓋挹學海之波瀾、潤詞林之枝葉者也。時皇考忠顯公在膝下、與同研席者甚衆、雅奇君、因定交焉。君業成、遊上庠。久之、會親疾、慨然嘆曰、竭力爲養、是亦孝也、何必三釜耶。拂衣而歸。自是克勤幹蠱、祈寒燠暑、無巨細必親、人以爲難。君安而行之。君天資孝友、遇人以誠、內和而外剛、士無賢否皆樂親之、而有所憚。或有缺行、惟恐聞於君、君聞而愧切之、必改也。君隱耕餘數十稔、攻苦食淡、家貲遂豐、然於貧窶時亦賙貸、有足大者。至於拓險徑、造飛梁、稍便於人、傾橐不吝。晚歲即遊岸鄉、造別宇、幅巾杖藜、將終世焉。俄以疾終。時建炎三年秋^②八月五日也。君平^③生喜學、己雖不達、訓子弟益勤、厚禮館置名儒、故祝氏爲學者、皆有師承、而子卣稱最。卣屢擢薦、翱翔國學、識者謂將大君門、必自卣、則^④君猶不亡也。君諱奕、

字彥思、姓祝氏、信州鉛山人。曾大父虞、大父仁霸、父世昌。初娶余氏、終娶周氏。四子、曰中正^⑤、曰天與、皆早亡。曰卣、曰鹵。一女、適進士傅袞。孫男女八人。君享年六十有七。三年十月二十二日葬於邑之芭蕉塢。卣來請文。某視君爲丈人行、雖遊宦契闊、猶及識君也、然安能窺君之所存哉。以宣奉公道術之奧、忠顯公名德之重、而君從之遊、且款密焉、是必有大過人者。因攷君行實、涕泣而表於其墓曰、嗚呼、君之賢可稱也哉、又可悲也。猶幸其有以少慰也。君之平生顯然可知者、固可書也、書之人、故信之、其賢已可稱而未盡也。以君之才未盡見於設施、驟而書之、無所攷焉、人誰信之。懼人之不信而不書、則君之所蘊、終無得而聞焉。此又可悲也。古之士抱才埋沒、而後世知其賢者、是或論其師友、或觀其所以許與者、或跡其爲之傳記者、因得以信之也。後之覽斯文者、由是而求君之所蘊

焉則其賢可盡知、猶足少慰也。嗚呼、君之賢可稱也哉、又可悲也、猶幸其有以少慰也夫。

劉子翬撰 《屏山集》卷九

徽猷閣待制致仕蔣公墓誌銘

紹興八年正月癸卯、左大中大夫、徽猷閣待制致仕蔣公卒于家。其孤及祖以公治命、用其年三月丁酉、葬公宜興縣篠嶺之原。既葬、議不可無銘、乃以丹陽邵彪之狀來請曰、蔣氏出周公之子伯齡、封于蔣、而子孫因以爲氏。後其地并于楚、遷齊之樂安。漢光武時、有以功封丘亭侯者。丘亭在今陽羨、隔湖西、故蔣氏世爲常州宜興人。公諱堦、字夢錫。以贈太傅諱九皋者爲曾祖、贈太師諱滂者爲祖、而觀文殿學士、贈太師、魏國公諱之奇之季子也。公少穎悟、方總角時、魏公與群從讀釋氏書、論淤泥蓮華之義、公從旁請曰、非孟子所謂孤臣孽子、操心危、慮患深、故達者耶。魏公大驚、問疇復類

此曰、生于憂患、死于安樂是也。魏公繇此愛異之。元豐初、太學成、四方之士來集。公甫冠、提所著書入焉。有司試其文、爲諸生第一、遂知名于世。魏公欲任以官、以非其志、固辭。魏公莫能奪也。擢元祐三年進士第、調壽州司戶參軍。魏公帥熙河、奏爲書寫機宜文字。夏人來議疆事、命公館之。敵以重兵屯、並塞山谷間、使者援例期必得。公陳禍福與相撐距、敵爲詘服、不敢言。魏公召、罷爲保寧鎮南兩軍節度推官、不以秩卑故于事有所怠忽。當路交薦、改宣德郎。大臣言經術通明、除太學錄。魏公請外、出爲發運司管勾文字官。丐閒、便親、得監兗州東嶽廟。魏公薨、服竟、乞提點西京嵩山崇福宮、尋通判廬州。召爲秘書省校書郎、未至、改著作佐郎。言曰、曆爲信史根本、今時政起居注先送兩省、官恐不時頒、因循放逸、乞徑付館分撰、責其成功。詔特從之、人以爲知體。逾年、召對問魏公事甚詳。



公歷叙始終、占奏華敏、有言動聽。即日除尙書主客員外郎、徙兵部、升郎中。坐曹四載、怡然無留滯之歎。遷鴻臚少卿。丁內艱、終制除光祿卿。居亡何、擢大司樂。時用魏漢津樂、以中貴人梁師成兼領。師成挾恩怙權、人莫敢忤。會欲增舞佾而三倍之、公顯斥其非、且樂工募市人、猥冗、非所以奉天地宗廟、請一切沙汰。從之。師成怒、不主己、語有侵公者。公曰、一代禮文、當質之經。師成曰、僕不讀書、愚抵此。公不爲動、而深銜之。日求所以傷公、久之無所得。于是宰相之權、熏灼中外、公未嘗一至其門。他日擬官、以公名進、或問其故、曰、人望也、用之得人。然亦不果遷。繼此當國者數欲挽公爲助、公毅然不與之合、人以爲難。會收復燕雲、群臣上尊號、或謂庶官之長、當爲群臣先。公曰、裕陵嘗卻徽稱、爲萬世法、上躬行之是也、奈何縱諛以虧盛德乎。卒報罷如公言。一旦如有不樂者、力祈補外、得徽

猷閣待制、知宣州。未陞辭間、改興仁府。府有戍卒、其將鄒迪不能制、軍卒王靖以衆殺迪于庭、官吏駭散。公聞、即出慰撫、號令詳明、徐遣親兵躡之、悉擒無所脫。即手檄開示大信、以靖其餘。是日、興仁微公幾大亂。初、興仁俗儻忤難治、公不忍威制而寬撫之、時以爲仁。至是變起倉卒、人皆褫氣、公獨坐閣決事如平時、而得群兇于談笑間、人更服其勇。歲終求罷、除提舉南京鴻慶宮。奉祠數年、遂抗章請老。旣得請、淡然與世相忘。遭金渡江、生涯焚剽、乃退居無錫西山之麓、結廬終焉。杖履婆娑泉石間、如是者七年不厭。卒年七十六。手書遺奏、使其子上之。書無一字欹傾、亦無一語及私者、人歎其忠。階自宣德郎十一遷爲大中大夫。爵宜興縣子、食邑五百戶。妻沈氏、有賢操、封令人。先卒十五年。子五人。康祖、承務郎、知饒州永平監。寧祖、左朝奉大夫致仕。益祖、文林郎、東平府刑曹掾。及祖、左



奉議郎、主管台州崇道觀、慶祖、承務郎、而康祖、寧祖亦前卒、慶祖陷敵中、孫七人、曰華、曰繁、曰芾、登仕郎、曰荀、曰著、曰莊、將仕郎、曰芹、公莊重清修而資長者、治官居家、皆有法度、與人交、終始如一、趨人之急、甚于關身、魏公釋位而歸、日娛侍膝下、不忍須臾去側、洎服喪、以孝聞、太夫人春秋高、飲食起居湯熨必躬調護、逮卒、幾不勝喪、性嗜書、每挾之與俱、雖耄老疾病流離、未嘗一日廢、遭喪亂、失故居、并其本業亡之、未嘗介意、獨以書復完爲喜、文典雅、而尤長于詩、所賦幾千篇、有梁溪集百卷、讀之知得于聖人之學深也、嘗謂周衰數千載、士大夫無慮數百家、鮮有不失其傳與其始之所以氏者、獨蔣氏班班可譜、無世無人、宋興、太尉堂始用儒術、致身華近、爲嘉祐名臣、魏公以從子繼之、歷四朝四十餘載、遂秉機政、功業文章、碩大光明、載于國史、公復躬清厚之德、完節而終、公子五人、

又俱力學登進士第、膺館閣師儒之選者接踵于時、皆申申孝謹、篤于名教、如漢萬石君之家而文采過之、言東南家法之盛、未有能先之者也、是宜爲銘、銘曰、

魯別子六、蔣爲始分、太尉旣顯、樂安乃聞、惟時魏公、以道事君、出入四紀、有勞有勳、誰其似之、公則有文、惟始秀發、蔚如興雲、躋于禁嚴、以屏輔軍、遂返丘壑、超然莫群、天胡已之、帝閔厥勤、坐訖眉壽、初無戚欣、詩書傳家、旣久益芬、刻此玄石、寘之幽垠、萬古勿毀、德人之墳、

汪藻撰 《浮溪集》卷二七

清節先生墓誌銘

江左有隱君子曰蕭子荆、諱楚、號三顧隱客、父仲舒死、以甥從羅公括學、攻苦二十年、不汲汲仕意、紹聖間、以母夫人命預螺川賢書、不中禮部程、留太學、時方校聲律、己獨窮經、於春秋尤深、淮海孫

氏、伊川程氏皆以三傳聞、授業者常千人。先生往質疑、歸嘆曰、政未免著文字相。作經辯衆高之、謂是將名家、乃更北面。會母老、且蔡氏方君圖、遂慨然引還、入林下。移其從游馮澥書、謂蔡氏敗國、將爲宋王莽、誓不復仕。澥得之驚、今始證其不狂。嘗游巴峽、甌、粵、氣愈豪放。其寓於詩文者、鉤章棘句、反閑澹清古、然種種譏切、不苟作。自漢唐迄今、家春秋者且千、概癖於傳、而先生斷以經。弟子百餘人、傳春秋六藝者財三四、如賢良方正趙暘與澥、其人也。澥尤骨硬名天下。初王氏出新學、廢麟書、士媚進無大略。靖康改元、澥驟見任、亟與丞相吳公敏白上、詔可之、復置學官、議蓋先生出。晚以其餘授銓幾十稔、偶登甲第、爲春秋第一。歸拜牀下、先生曰、學者非但拾一第止耳、身可殺、學不可辱、無禍吾春秋乃佳。異時有友坐誣、繫大庾獄、先生冒盛暑往救、終得不冤、人皆道其義。先生性嫉惡、

至抗聲縷數不少恤、及見善、則談不釋口。暮年、依明德江陳公、及與先君伯仲爲方外友、以累免應得官、不屑就。大臣約薦之朝、度不可強、亦已。建炎四年十月二十四日、以疾卒、清風滿床、文字橫斜而已。享年六十七。卜十一月庚申葬於永樂鄉赤岡之原。門人哀臨且挽、因以清節易先生名。嗚呼、士窮見節義、不幸不生孔子前、與叔肸同卒、可歎也。初、先生壯未有室、或以無後爲勸、先生曰、咄、舜雖聖、不能掩父之惡、顏孟無嗣、而祭典百世益肅。若司馬遷、班孟堅、揚雄輩、豈以有後故顯耶。卒不娶。先生文集百餘卷、多發明易、春秋與陰陽、卜筮、占相、醫方、氏族、星經、地志、字書、圖畫、九流百家、及駁王氏遠至浮圖老子外國之說、後宜大行。先生前不諱曰、謂所親江君預凶事、曰、銓以吾銘。僕敢以不佞辭。遂泣銘曰、
繫古立言、不以子傳。過者肅之、將千萬年。

胡銓撰 《胡澹庵先生文集》卷二九

東萊公家傳

呂氏系出神農、受氏虞夏之間、更商周、秦漢、魏晉、下逮隋唐、或封或絕。五代之際、始號其族爲三院。言河南者、本後唐戶部侍郎夢奇。言幽州者、本晉兵部侍郎琦。言汲郡者、本周戶部侍郎咸休。其昭穆疏戚、世遠軼其譜、而河南者祖爲最盛。河南之呂、入國朝有爲起居郎知泗州者曰龜圖、生蒙正、相太宗、眞宗、諡文穆。起居之弟曰龜祥、嘗爲殿中丞、知壽州。壽州生蒙亨、終大理寺丞。寺丞生夷簡、三相仁宗、與文穆仍以公開號於許、冊拜太尉、就第、薨、諡文靖、配享仁宗廟廷。文靖公有子五、而二至相輔。公弼、事英宗、神宗、爲樞密使、諡惠穆。公著事神宗、哲宗、歷樞密副使、門下侍郎、尙書左僕射、司空、平章軍國事、申國公、諡正獻。蓋其自獻公而上、勲德行治皆在太史氏。正獻公三子、伯曰希哲、

以經入侍、哲宗崇政殿、封滎陽子、是實生公、用公貴、贈太子太保。公諱好問、字舜徒、滎陽公之冢子也。生數年、以門功守將作監主簿。委已於學、髫髻童習、不屏而絕。范蜀公鎮與正獻公兄弟交、公幼拜蜀公於堂、唯諾進趨、無違禮。蜀公慰納甚備、待之如成人。吳侍講安詩至、伉簡、少許可、每見公輒自失、歎曰、呂氏有子矣。稍長、學益成、行益修。諸公長者皆折輩行從公游。初監在京雜賣場、正獻公當國、在事者以公親宰相孫、闊其條約、不以簿領累公。公愈益自厲、日夜治文書、若有程督之者。哲宗皇帝同宣仁聖烈皇后聽政、以樸素先天下、四方貢獻一歸之、有司斥賣、以佐經費。吏或下其估以自私、公獨漠然如不見。終秩未嘗售一物。正獻公薨、天子加恩諸孫、將擢公寺監丞。公固辭、推以與從父兄。徙監金耀門文書庫、職閒無事、公所樂也。始得大肆力於經術、忘晦明寒暑之變。當是時、



正獻公賓客半朝廷、爭欲致公。稍自降屈、出一語則躋臺躋省、唯自擇。公深自晦匿、日與碩師鴻生講道窮巷中、未嘗掛謁刺於權門之籍。時論歸其靖退。調真州春料船場。黨事起、滎陽公謫和州、公自免歸。徽宗皇帝即位、號召耆艾皆集闕下、滎陽公入爲秘書少監、公以便親監在京綾錦院。崇寧初、權臣修元祐之怨、治黨錮甚急、羣譴輩黜、廷中爲空。於是滎陽公廢居宿州、公亦以元祐子弟例不得至京師、兩監東嶽廟、客於宿者七年。自正獻公時、悉廩賜以振宗族、無留貲、其後再更黨禍、家愈窶、或曰盱竈薪不屬。公上奉二親、下任數百指之責、從容養志、奏甘毳、虞顏色、米鹽之間、不至寢門、而家人亦化公德、怡怡然忘其貧。復調真州春料船場、司揚州儀曹事。揚據南北衝、賢士大夫、舟車上下、必過公而拜滎陽公於堂。如楊侍郎時中立、陳右司瓘瑩中、每過揚與公語、連日夜不厭所

言、皆經世大略。揚帥蔡卞自知不爲公論所右、欲扳善類自解、待公特異、拜疏薦公於朝。公以禮自持、卞終不得而親。久之、卞自揚得政、同府掾屬拔擢略盡、獨公滯於故官。卞遣其黨誑公以利、曰、子少答我公、即坐階顯列矣。公笑不應。遭內外艱、終制、無復仕進意。客潁昌之陽翟者又十二年。卷道環堵、閔光韜華、嗒焉與世忘、然譽望日尊。賢臨一時。宣和之季、故老踵相躡下世、獨公與楊公中立無恙。諸儒爲之語曰、南有楊中立、北有呂舜徒。蓋天下倚以任此道者、唯二公云。未幾、女真犯邊、徽祖傳位皇太子、是爲欽宗皇帝。靖康元年正月、虜騎薄都城、乞盟而歸。天子銳欲更置天下事、寤寐峻良、近臣交口薦公。欽宗雅聞公名、趣召公、驛書道相及、未至、除左司諫、諫議大夫、賜進士出身。間兩月、擢御史中丞。始徽宗前內禪之二日、下哀痛詔、解散黨禁、削除新法、盡復祖宗之故。郡國宣布



詔書、聽者至感泣。然蔡京持權餘二十年、黨戚根據內外、皆害其事、莫肯行。欽宗雖屢敕有司、亟如詔、陽應而陰不隨。毛^①舉一二事以塞責、名更張而大抵猶蔡氏之舊。公首爲上言、太上皇之詔、時之利害、政之闕失、無不備載、縱使直言之士伸紙執筆、得盡其言、亦無以過於此矣。今陛下雖有奉詔之名、而未有行詔之實、願陛下書太上皇之詔置於几間、一行之、所以安宗廟、定中國、卻夷狄之策、在此而已。又言、陛下宵衣旰食、有求治之意、發號施令、有求治之言、逮今半年、所謂意者終未能行、所謂言者終未能副、蓋左右前後之人不能推廣盛德、而陛下失於容養、不能成之以剛也。臣將見陛下淳厚之德、變爲頹靡之風矣。又言、陛下自即位以來、欲復祖宗之法、然左右前後率多陰謀沮格、必欲不行。名爲罷蔡京之法度、而今所行者實蔡京之法度也。名爲去童貫之軍政、而今所用

者實童貫之軍政也。何以言之。祖宗之法既未復、而所改所罷者何事。斯民何以至今不被陛下之德澤也。陛下若不革京、貫等所爲、銷京、貫等所引、恐無由可致太平。欽宗甚鄉納。公新從下土來、以孤身徧犯衆怨、深探用事者包藏蒙蔽顧望之情、披抉囊橐、爲上索言之。小人自知情得、皆異日視公。公勇不自恤、奮筆益力。累疏蔡京之惡、投之海外。且請摘朋附之尤者、黜以厲其餘。建白收王安石王爵、以定名分。正神宗配享、以判忠邪。褒表江公望、張庭堅、任伯雨、龔夬、以開諫爭。刊青苗、斂散之令、以紓民力。湔元符上書之譴、以起士氣。章前後數十上、欽宗數對輔臣稱公論事有體。嘗奏事、直尙食進膳、時公請退、欽宗固留、公畢其說、漏下數刻乃罷。其命公爲中執法、諭曰、朕夜閱班簿、廷臣無出卿右者、且以卿元祐子孫、使天下知朕好惡。眷矚日隆、恩意禮秩、羣臣莫敢望、媚忌者浸多。

女真釋都城之圍也。大臣意其不能再舉。武備益弛。軍書邊遽。猶襲承平故態。旬稽月留。不得決語。公拜言職之六日。即言。昨虜在闕。要盟劫質。志滿氣盈而歸。益有輕中國心。秋冬之間。草枯馬肥。能保其不傾國再來乎。然則禦敵之備。在今三數月之間而已。日月如此之迫。寇敵如此之大。當速講求。以備不虞。又言。邊事經畫。晷刻可辦者。率皆旬月不見設施。臣僚奏請皆不行下。今胡虜復有深入之意。而區處未有大異於前日。此臣之所深懼也。及秋。虜騎駸駸南下。大臣不知所出。遣使講解。冠蓋屬路不絕。虜外相應答。而攻城略地自如。告急者日三四至。諸將以和議。皆閉壁不敢前。公進言。所謂講和不進兵者。彼當頓兵境上。不敢相侵。然後朝廷亦勿進兵可也。彼既欲和而攻我不已。今日破一城。明日破一縣。朝廷猶執議和之說。不謀進兵遣將。臣恐比至得和。河北諸城徧被其害。

矣。今日之計。和與不和。皆當爲備。有備無患。條守禦之策甚悉。如論防河。非選將練卒。倉猝必不可倚。厚集滄滑邢相之戍。以遏奔衝。列勤王之師於畿邑。以衛京城。皆見抑厭不省。居無何。虜陷眞定。攻中山。上下震駭。大臣狐疑。相杖以議和爲解。不爲出師。公率臺屬請對爭之。劾大臣異懦誤國。詞指痛切。大臣怒。請出公知袁州。上內嘉公忠。而不得已於大臣。下遷公吏部侍郎。既而虜騎臨河。並河諸屯。聞鼓聲鳥獸散。無北向發一矢者。虜徑渡。遂壘都城下。欽宗悔不用公言。進公兵部尙書。閏十一月丙辰。都城失守。欽宗召公入禁中。公晝夜不去上側。軍民數萬謹譟。斧左掖門求見上。公從上御樓諭遣。乃散。衛士長蔣宣帥其徒數百。露刃升祥曦殿。邀乘輿犯圍西出。左右奔竄。獨公與孫公傳梅公執禮侍上。蔣宣大聲曰。前日宰相信任。姦臣不用直言。致國家如此。孫公訶止之。宣以語



侵孫公。公徐曉之曰、汝數百人忘家族、冒重圍、衛上以出、可謂忠義。然乘輿將駕、當相與物道途、載糗糧、具罪履、無闕而後動。宣詘服曰、尙書眞知軍情。麾其徒退。然衛士桀驚怙亂、至坎宮垣、盜禁帑珠玉無所忌。公議以禁衛單寡爲名、召陝西將渠造以西兵五百補其闕。造以兵入、衛士皆迎自戢、潛棄珠玉溝瀆、或墜牆陰、殿中復肅。辛酉、欽宗幸虜營、公實從。十二月癸亥、欽宗至自虜營。靖康二年正月庚子、欽宗再幸虜營、公復從。旣駐驛、命公還都城尉拊。旣旬日、聞北狩之議、公悲憤廢寢食、移有司請老。孫公及簽書樞密院張公叔夜交止公曰、此尙書求退時耶。傳輩與聞大政、國家至此、義當前死、公闔門不出、興復之責將誰屬。語未卒、公泣數行下曰、某家世輔相、非愛死而後國家、恐能薄祇取辱耳。二公命我以義、我敢不聽。苟利社稷、死生以之。二月丁卯、徽宗皇帝幸虜營。壬申、張

公、孫公將之虜營、與公訣別南薰門、慟哭握手、相勉以忠義、哀動行路、觀者莫能仰視。是時二聖旣幸虜營、太子諸王皆扈從無留者、獨太上皇帝以大元帥康王總戎朔方、內外隔絕、莫知元帥府所向、人心危懼。公遣客蔡安中、省吏張思聰潛求康邸姻戚、得韋淵、蔣帥愈、又得給使孫卞、郭貴於民間、潛詢行府次舍以俟虜間。元祐皇后自崇寧中復降居瑤華宮、公在諫省、具道本根所以誣罔狀、請還位號。欽宗竦然曰、當即出制耶。公曰、欽聖后臨朝、旣命位號、以姑復婦、名正體順。崇寧詔書非道君雅意、徒迫於蔡京輩耳。陛下視元祐皇后、伯母也。今欲尊崇、不當下制、舉欽聖已行之命足矣。欽宗然之。初、還自虜營、意虜且退、急召近臣豫定赦文、公請首以復元祐皇后載於赦文。屬藁未布而虜情中變、欽宗再幸虜營矣。后雖不克復、然久處外宮、名號不聞於虜、以是獲安。公深惟宗社之

寄獨太上皇暨元祐皇后在日、圖推奉之策。虜既得志、其衆皆思歸、太宰張邦昌前使虜、爲所質、挾與俱來、大酋粘罕輩欲捐河以南委之邦昌而去。公素不與邦昌接、聞之憂甚、造邦昌所善呂勤、訪其爲人。勤曰、公毋庸憂、邦昌齷齪畏謹、懦人耳。公陰自喜曰、吾事其濟乎。三月辛卯朔、邦昌入居都省、公說之曰、相公之入、爲眞欲立乎、抑姑塞虜意而徐改圖乎。邦昌驚曰、是何言也。在朝士大夫、皆道君與上所擢、若邦昌果有此意、誰復見容。公曰、相公及此言、非唯宗廟社稷之福、亦相公家族之福也。因從容道虜中事。邦昌曰、邦昌在粘罕軍、誰何嚴急、環牀皆甲卒、夜卧輾轉、輒升牀檢校。公以言動之曰、此虜情也、相公知中國人情所向乎。今日人情、畏女眞兵威耳、女眞旣去、復保人情如今日乎。邦昌變色曰、然。公曰、女眞言語不通、本不敢有意中國、特以契丹遺民讎夾攻之役、而燕人之

被遣者、怨我納之死地、合二憾以求逞於我、故縱與女眞以至於此。然大元帥在外、人心有繫、元祐皇后在內、虜復不知、殆天力也。相公雖勉塞虜意、以紓難、盍亟定還政復宗廟社稷之計、則可轉禍爲福。邦昌曰、此邦昌之心也。公曰、某所以不顧家族、首建此議者、以三世輔相、當以復趙氏爲己任、願相公毋與好利者謀、以亂視聽。邦昌曰、謹受教。公退而傾橐中裝募勇士李進、持帛書走大元帥府。進縋城徑重圍、爲候者所遮、以善解說得免。它日公復見邦昌曰、相公權以濟事、雖迫於彊虜、當微示人以意。邦昌曰、奈何。公曰、省中非人臣所宜處、盍寓直殿廬。晨出、毋令衛士俠陛。虜所遺袍帶、非戎人在傍、弛勿服。車駕旣未還、所下文書不當尙稱聖旨。邦昌皆如公言。邦昌又謂公曰、舜徒賢德衆所推與、今日欲安宗廟社稷、非得公共事、何以濟。因請公攝門下省。公始不肯當、邦昌曰、政府



虛位、虜中遣腹心來據之、將奈何。公念肘腋間參以虜人、且敗大事、遂不復辭。親黨或諗公宜闔門勿出、公曰、某身爲世臣、敢潔其身而忘國家大計乎。公雖攝門下省、止書兵部尙書銜、日治兵部事自如。同列諄之、公曰、受命於上、不可改也。卻奉祿不內、以兵部印封其券、至饘粥不繼。鄰僧哀公之窮、丐米遺公、賴以少濟。徐秉哲亟請邦昌改年、曰不則虜酋必大見猜、公固爭得已。然臺省文移、畏虜不敢以靖康冠歲月、公不能禁。獨兵部符檄、仍稱靖康二年、諸公聞之、頗有效者。吳玠、莫儔請邦昌見虜使於紫宸、垂拱殿、公曰、二殿乃正衙、其可耶。玠曰、旣權宜攝政、權宜御此殿、亦何傷。公曰、相公左右皆宮省久吏、驟見御正衙、必憤駭以爲即眞、變且不測。邦昌矍然而止。王時雍議肆赦、公爭之數日不能得。公曰、赦書日行五百里、今號令不出一城、四壁之外皆非我有、將誰赦。邦昌笑曰、俚

語謂錢氏肆赦五百里外、恐入李王世界。公曰、錢氏猶有數州地、五代之際、非素有君臣之分、豈今比耶。邦昌悟、遽追其赦。公乘間語邦昌曰、天命人心皆歸大元帥、相公若先羣議之未啓、遣人推戴、則功無在相公右者。若撫機不發、則他人將有其功、聲大義而來討、悔可追耶。邦昌曰、非敢緩也、兵戈蔽道、將何塗之從。公曰、第預遣人、俾軍民間之、雖未克行、異時按遣人日月、猶可自明。不然、豈惟相公不可自保、某輩家族亦豈可保耶。於是遣謝克家奉傳國寶往大元帥行府。須虜退發、女眞還師有期、邦昌將出別虜酋。公曰、虜酋或留兵防衛、何以處之。邦昌曰、恐不至此。公曰、不可不爲之備。若留兵則動息爲所脅制、釋位還政之謀、皆不得展、社稷危矣。相公當以死爭、逆順之分、政在今日、相公其勉之。邦昌之虜營、粘罕果欲爲邦昌置衛、邦昌力辭。翌日、虜又遣高慶裔、王訥來道留兵事、

公謂慶裔曰、南北異宜、恐北兵不習風土、或不道
遵南方要束、必不相安。慶裔曰、留一勃堇統之可
也。公曰、時向熱、勃堇貴人、假如萬分一致疾、則南
方負罪益深。慶裔曰、諾。吾軍近在河北、有變馳一
騎見報、則下鐵騎相援矣。遂不復留兵。四月庚辰
朔、女真中軍行。辛酉、女真後軍行。壬戌、女真掃地
軍行。公謂邦昌曰、大事其可緩乎。或曰、虜去未久、
請俟踰年。公怒曰、踰一日已懼其遲、倘城外推尊
冊立、則城中奈何。邦昌曰、彭寵之事、安保其無。舜
徒所謂愛人以德者也。或曰、虜若回兵、公能禦之
乎。公曰、女真糾合諸番、啗以中國之利、故爲虜用。
今子女玉帛既厭其欲、各思反其巢穴、豈能劫而
復南、政使回戈、則死於宗社、處死有名。苟猶豫不
亟決、軍民有變、吾屬必爲所魚肉、遺臭萬世矣。邦
昌從公策、遣使詣大元帥府勸進、請元祐太后垂
簾聽政。議已定、邦昌下書、乃尊后爲宋太后。公曰、

此事發端於予、若云宋太后、則人心疑懼矣、吾不
可預其禍。亟在告卧家。邦昌密使后姪孟忠厚持
所上太后奏視、公曰、前日未敢正名、出于畏偪、非
敢中變也。公起見邦昌、竟如初議。甲子、元祐太后
入居延福宮。乙丑、羣臣見太后於延福宮。太后泣、
羣臣亦泣。太后曰、豈意國家遂至於此。祖宗積德
甚厚、康王仁孝剛勇、又何慮耶。戊辰、公趣邦昌歸
政太后。邦昌欲俟明日。公曰、時不可失。遂以日晡
集百官將校、諭以太后垂簾迎大元帥入纂大統。
己巳、邦昌易服歸太宰班、出次資善堂。庚午、元祐
太后自延福宮入拱宸門、御小殿垂簾聽政。公始
議迎后、或以爲無益。后之將就輿、都人初聞蹕聲、
喜極、皆嗚咽流涕。塗經太廟、父老童稚、引首望廟
垣、驩呼鼓舞、濤翻雷動、闐衢溢陌、異議者大詘服。
建炎元年五月庚寅朔、大元帥康王即皇帝位於
南京、大赦改元。太后降手書、以是日撤簾、命公奉



手書詣行在所慶登寶位。癸巳次南都乙未賜對、上勞公曰、宗廟獲全、皆卿之力也。除尙書右丞兼散秩中大夫、封掖縣男。公感慨知遇、爲上深陳致亂之原、講求故典、期以歲月、盡還祖宗之舊、錄節義、拔滯淹、飭邊備、大略粗舉。李丞相綱夙敬公、同在廟堂、相得甚驩。士大夫之在圍城者、李丞相概欲以叛逆罪之、公曰、王業艱難、政含垢納汙之時、遽繩以峻法、懼者衆矣。圍中士大夫責以不能死、則可、若直謂之叛逆、彼豈無辭乎。李丞相意不厭、數遣其客胡瑄要說公、區圍城人爲三等、以差行戮。且曰、必如是方可表公忠誼之節。公謂瑄曰、與君俱處城中、衆以爲可罪者纔十許人耳、餘人本末、吾輩所共悉、寧可以叛逆加之耶。由是李丞相始不快公矣。時臺諫多李丞相所厚、因論圍城事、并以中公。太上皇出手札付尙書曰、呂某昨邦昌僭號之初、即募人賫帛書、具道京城內外之事。金

人南退、又遣人勸進、攷其心迹、與餘人不同、言官所不知、仰尙書省行下。公上章謝、且力求去、曰、臣世受國恩、異於衆人、親受賢者之責、所以不避虜人滅族之禍、遣人冒圍賫書於陛下、畫謀奉迎。向若虜人網羅得臣所遣之書、而臣之謀畫萬一泄露、臣之一身當如何、臣之家族當如何。然則臣果愛死耶、果不敢愛死耶。臣之心迹、顯然明白、臣今求退、乃其時也、乃初心也。臣猶自以爲當去、況它人乎。況言者乎。章連上至七八、太上皇雖重惜公去、而知公歸志確不可奪、除資政殿學士知宣州、時七月己酉也。八月辛未、公入辭、賜茶便殿、敦諭溫渥。公下車之十日、劇賊張遇聚徒數萬陷繁昌、勢張甚、動搖江東。公治城壁、聯保甲、遠斥候、扼險隘、賊望風震聳、犬牙不入宣境。明年、三拜疏請祠、詔提舉臨安府洞霄宮。建炎三年冬祀、進封東萊郡侯。虜騎比歲大入、江湖間羣盜蜂起、公避地轉

徙於筠、於連、於郴、於全、於桂、靡有定止。紹興元年七月丁酉、以疾薨于桂州、享年六十有八。訃聞、詔贈五官、恤禮視常典有加。八月壬申、藁葬于桂州城南之龍泉。子男五人、長本中、嘗任中書舍人、直學士院、終於左朝奉郎、提舉江州太平觀。次揆中、終於郊社齋郎。次弼中、嘗任駕部員外郎、終於右朝請郎、主管台州崇道觀。次用中、嘗任兵部員外郎、終於右朝奉大夫、主管台州崇道觀。次忱中、嘗任提舉江南東路常平茶鹽公事、終於右朝奉郎。知饒州。女一人、適右朝奉郎蔡興宗。孫九人、曰大器、大倫、大猷、大鳳、大陽、大同、大麟、大虬、大興。曾孫十六人、曰祖謙、祖仁、祖儉、祖恕、祖重、祖寬、祖慤、祖平、祖新、祖節、祖憲、祖永、祖志、祖慈、祖義、祖恣。而大鳳、大陽、大同、大興、皆蚤夭。公體氣高亮、音吐洪暢、衣冠甚嚴、顧盼煇如也。平生經籍之外、無它嗜。居陽翟、年六十餘矣、猶自課誦五經、日終一帙。晨起、

環庭除諷詠、聲琅然、雖少年有所不逮。滎陽公道學爲世宗、公蚤得其傳、樂天知命、阨困湮鬱、排抑詆挫、無入而不自得。晚歸朝廷、遇大變、兩陷虜營、出入白刃間、左右喘汗無人色、公裕然如平時。諸酋爭前、問公康王駐軍何地、公曰、名王貴人、在國門外、猶且不知、況圍城中耶。一酋怒、目公曰、尙書祇爲趙氏乎。公曰、家世輔相、實爲趙氏。聲淚俱墮。時梅尙書執禮、陳侍郎知質、程侍郎振、安給事扶、以括責金帛、不愜虜意、駢首就脔。中書高舍人伯振微服匿里舍、爲虜所族。公正色抗對不少下、旁立者代公縮頸。故事、誕節前期一月、即浮屠老子祠祈祥。會乾龍節、有司脅於虜、廢不講、公獨往景德寺之寶勝、永慶院行禮。是日虜使在館、公不顧。其在桂林、疾旣革、資政劉公珏訪公卧內、公與劇談、慷慨憂國、言不及私。迨至屬纊、神閑氣定、談笑而終。公於死生禍福之際、蓋如此。靖康之難、公含



垢忍恥以就大計、晚進後出、不知前輩本末、或以病公、給事中胡公安國每爲公辯、且錄其語曰、河間劉長歷、丞相莘老之孫也、來見曰、諸人事邦昌者、固不足論、獨呂舜徒可惜。余曰、舜徒固自不同、在圍城中遣人以蠟彈致元帥、蓋累朝輔相、身爲世臣、同國休戚、必欲復趙氏社稷。故偷生忍死、僞楚之朝、幹正大事、誘導邦昌、使之歸宰相班、勸進元帥、皆其力也。微斯人、則邦昌外倚金賊爲重、內有范瓊之兵、王時雍、馮澥、李回等已爲之用、京師人不知世間有三綱、但云得邦昌救其死命、莫不德之。占據都城、呼吸羣小、亦大索處置。使舜徒死節、第潔一身耳。以此易彼、故寧受汙辱以救大事。四方士大夫聞公之薨、以文致奠、紀公忠節者甚衆。如御史中丞常公同則曰、京師之禍、廟社傾隳。公以一身扶顛持危。安劉之業、平勃難之。丞相呂公頤浩、丞相秦公檜則曰、二聖未歸、公不敢死。竭

力戴上、以爲天子。胡公世大儒、常公以風節聞、其言皆世所取信。呂、秦二相亦身在兵間、熟當時事者也。紹興八年、公長子舍人以臺劾罷、語猶及公。第四子兵部疏其誣辨於朝、詔錄送史館。於是公之大節始明於世。公之薨也、寇難未平、葬故有闕。後二十四年、乃克改葬公於婺州武義縣之明招山、實紹興二十四年閏十二月己酉也。惟公薨距今踰三紀、言論風旨浸不傳於世、謹叙次終始藏於家、使子孫有考焉。

呂祖謙撰 《東萊呂太史文集》卷一四

胡先生墓誌銘

如村先生胡公、紹興十四年十一月二十六日終于平江府常熟縣塗崧村、享年七十有九。明年二月八日、弟嶧、孤百能奉先生之柩、合葬于吳縣至德鄉向龍山夫人樓氏之兆。後數月、某罷官江東、聞訃道上、哭而以書弔其子。又數月、百能屬以沉

刻之文。自念由故人子出入門下且三十年、百能以道義相磨切、亦非一日矣、無可辭理、特以人微詞拙、荒穢盛德是懼。先生之婿著作王公、某授學其門、而見命尤力、乃黽勉叙而述之。先生諱嶧、字仲連、世爲婺州永康縣人。曾祖諱賑、故贈金紫光祿大夫、尙書禮部侍郎。祖諱枚、故任尙書職方郎中、贈太中大夫。父諱稷言、故任通直郎致仕。母夫人鄭氏。太中葬吳下、子孫家焉。先生姿稟淡泊、恬于世嗜、故於道學、易若天成。自其少日、已蹈履繩檢、言行有常、慨然自許、志在斯世。屢上春官、卒不合、因退居于家。當宣和末、達官顯人居吳甚衆、富盛甲于東南、而大雲里中有莆陽方公子通、余伯舅氏林公德祖以雅望特操、與先生爲三、一時鄉州埋光隱耀、不爲無人。二三公以年輩相追、放浪泉石之間、一觴一詠、人欲艷之。先生居五柳園中、松窗蓬戶、植竹疏沼、兄弟雍如、父子論學、二小童

供薪水役。客至、談話終日、罕及世故、皆疑其爲隱君子也。間而忘懷極論、愛君憂世、發于詞情、雖當重寄、負憂責者不過如此、然後知其欲仕而求義于平居也。步趨言動皆有尺度、賓嘉喪祭率導古法。宗族遠近不間尊卑、多從之以質疑辨惑。鄉人相語曰、仲連不問姓氏、知爲先生也。某從遊之久、于始見也、秉風裁、愼許可、視世之爲不善者如己仇敵、面目嚴冷、使人不敢蒙非心。已而刻意性命之學、治心養氣、一本于此、德宇夷曠、凡前日深疾者至前、哀矜之而已。及其日益老、養益熟、頽然自放、同于衆人。淵淳川深、莫見涯涘、叩之小大、隨問意滿、則欲言其美、蓋難置詞。嗚乎。自古抱負其有無所遇合者、亦潤身行家、推于鄉黨而已。先生復何恨哉。建炎登極、以累舉法、特命之官、亦一至于銓曹、授右迪功郎、欽州安遠縣尉。而終不仕、曰、吾老矣、姑承朝廷恩意也。其居五柳、嘗以杜子美宅



儒藏

宋儒碑傳集 卷七七

舍如荒村之句、榜居室曰如村、因自號如村老人。有文集二十卷、文詩簡古、如其爲人。夫人樓氏、朝請郎禹鄰之女。二男子、百能、千能、其季早卒。二女、長適著作王公蘋、次適進士張句。一孫曰耕、孫女三人。銘曰、

出處二致、士之大節。蹈履其宜、維古明喆。或素而隱、潛于丘園。或亟于進、宜負而軒。我相彼躬、艱艱跋扈。出處之節、彼亦何議。允矣先生、合轍古人。進退求義、以沒其身。館娃之西、向龍几几。其下幽宮、先生攸止。咨爾吳民、夙知好賢。矧敢樵牧、尙千萬年。

陳長方撰 《唯室集》卷三

校記

①庠：原缺，據明正德七年刊本《屏山集》補。

②秋：原缺，據右引補。

③平：原缺，據右引補。

④則：原作「而」，據右引改。

⑤正：右引作「立」。

⑥「爲」字原脫，據四庫本《澹庵文集》補。

⑦文字橫斜而已：右引作「文字枕履，茶數串橫斜而已」。

⑧「先生文集」至「後宜大行」一段原無，據右引補。

⑨掾：原作「椽」，據文意改。

⑩毛：原作「手」，據金華叢書本《呂東萊先生文集》改。

⑪紹興二十四年閏十二月：按《建炎以來繫年要錄》諸書，紹興二十三年方有閏十二月，此「二十四」當作「二十三」。

宋儒碑傳集卷七十八

劉安節 陳侁 劉安上 華鎮 孫稷

黃策 尹焞 李知剛

劉知言墓誌銘

永嘉劉公舍人諱安節、與其從弟、給事諱安上、相繼以奧學粹行修於家、由於州里、達於朝廷、聲名籍甚、時人謂之二劉。至今吾黨之士、聞其風、想其爲人、無異親承警欬於長者之側。而況子弟朝夕見所以事親從兄、處宗族、御僮婢、與夫語默嚬笑、飲食起居之間、無非教也。薰陶濡染、宜有不學而能者。君諱讜、字知言、給事之長子也。幼穎悟、讀書止一再過即成誦。弱冠、郡試有司、曾與計偕、一不利輒棄去、曰、學止爲科舉耶。守門戶、不墜先訓、斯足矣。以父任補承務郎、監蔡州稅。自後給事倦於宦游、築室治圃、日賦詩、將老焉。母碩人張氏、亦苦多病。君不忍遠適、從容膝下、務盡其歡、由是不調

者殆二十年。比二親即世、乃始束裝趨行在所。會有詔得侍從各薦所知、今參知政事王公時爲工部侍郎、首以君應。陛對之日、敷奏詳雅、上頗喜、語執政曰、劉某佳士也。由監尙書六部門遷知大宗正丞、駸駸進用矣。屬微恙、庸醫誤投餌、一夕卒於臨安府官舍、年纔四十三、官止宣義郎。哀哉。曾祖諱瑩、祖諱去非、累贈正議大夫。君之配曰孺人鄭氏、故中散大夫詳之孫。生男五人、嗣忠、登仕郎。嗣直、將仕郎。嗣恭、未仕。嗣昌、嗣亨及女二人皆幼。其卒也、以紹興十二年四月辛卯。弟右承務郎監平江府糧料院誥棄官奉喪以歸、卜明年二月庚申、葬於其縣建牙鄉玉清觀之前山、距給事墓百步。君之從兄、鄉貢進士詡叙次行事、以其狀來乞銘。某與知言游久、且通婚姻、非敢以是私於知言也。知言循循孝謹、無子弟之過。嘗登其堂、見大書唐柳玭家訓於屏風、用以自警。志尙如此。且自宜銘。

銘曰、

牆高易圯、門高易毀。自昔聞家、鮮濟厥美。於赫二劉、華鄂韓韓。誰其似之、粵有令子。其令維何、克愼克祗。揚彼清芬、于宗有輝。位卑無年、吁其已而。維躬不有、後人之貽。

林季仲撰 《竹軒雜著》卷六

先豫章公墓銘

公諱某、字後之、福州閩縣人。漢太丘長之後。曾祖某、天禧中爲秘書省校書郎。祖某、父某、不仕、以德稱于鄉。母汝南周氏、都官員外郎輔之女。公幼有大志、刻意古道、諸老先生皆奇之。年十六、貢禮部、再上又黜。因周游京洛兩河、師友賢士、交一時豪傑、將有爲斯世也。元符庚辰歲、中進士第、授將仕郎、江州德安縣主簿。再調和州司戶參軍、歲滿遷通仕郎、建康軍節度推官。丁父憂、服除、監在京河南炭場。用舉者改宣教郎、充洪州司錄事。代且至、

以疾終于官、享年五十有三、實宣和三年六月八日也。葬于福州懷安縣太平山。娶吳氏、前卒、再娶林氏、太僕卿旦之女。林公在熙寧、元祐中、再以論事去。林夫人守節義、得家法。二男子、長方、少方、其季早卒。孫二人、正學、正行。當建中靖國元年、朝廷更張泰陵政事、公移書鄒侍郎浩、其略曰、天下事、元祐引而西北、紹聖引而東南、今復引而爲元祐矣。僕之私憂、將恐有甚於紹聖者。後黨錮起、如公言。與陳公瓘友善、陳公材高、作材論諷之。陳公在諫省、公多所裨益、獨論造作局、論險詖私謁進退人材、論士氣盛衰繫國勢輕重、其藁偶存。陳公陰薦之、未及用而蔡京進。陳公嘗論京必亂天下、京欲併害公、會江州易守、以公名付之。守來無所得、檄公按田湖口縣、還以旱告、即劾受成胥史、失賦稅。奏上、遇二赦、京猶請特旨廢公。公在德安、實崇寧壬午歲。後三十年、當紹興改元、族弟籍自蘄水



避李成之擾偶至德安、父老問其名氏族姓、知公弟也、委曲調護、全家以免。在和州、有獄不應死、守欲殺、久論不從。一日、同寮大集、抱牘與辨于座。守怒、以辭氣相加、座上直者憤、弱者懼、錯立引卻。公色平言莊、徐理前語、卒得要領而退。有信者、公曰、歷陽太守叱司戶、何預我哉。苟殺不辜、不以天下易吾介也。方暑、守與婦併卒、通判州事燕若霖挾怨不許治喪具、公爲之盡力、不顧。燕怒、未有以發。守之子訴于朝、燕以罪去。監炭場五年、率漏未盡十刻出泣局、午而歸。朋游問故、公曰、吾爲祿仕、敢不謹職。然居今唯此官爲易塞責爾。自隱筦庫、故人居政府、不一相聞、獨聞一士、則身先之、汲汲甚於在位者、其自任又如此。明堂禮官王昇以鈞臺江公公望之言、欲引公共事。昇之學易、以明象爲主、謂易爲象而成書、聖人所謂尙其詞、尙其變、尙其占、棄不取也。故其制東宮車服、皆續雲雷、以震

爲長子、爲雲雷而已。公與之言禮、不合、遂罷。在洪州、州吏何爽爲姦利、前後數守、爽惟摘紙尾請書判。公至、亦習故常。會攝事、發其姦、付之李官、自此一府竦然承聽。守病求去、未得請、以政委公。時游察院、醉守舒州、書來言江上舟往來、颿檣相望、頌公盈耳。察院、公之師友、其言非相諛悅者。後守至、公偶行縣、軍衣不時得、口語籍籍、州人稍引去。公聞之、料金帛、具車牛而歸、期以某日集。時諸軍譁于守廳事、入庫索庫官、道路什百爲伍。公至、呼其長與語曰、軍衣稍後、何敢爾。何敢爾。歸營三日、以尺籍先後、受衣某所、敢後者有法。其曹素熟威信、寂然如水歸壑。會金帛亦至、州遂無事。宣和中、內府須求、權倖又因之、達官臨州、畏首畏尾。公于二事每裁之以義、視棄官如去涕唾、人以蒙惠。然其官居下、故非卓然繫天下興衰治亂者。疾病卧、邑人日訶醫家。旣沒、哭有失聲者。事乖人欲、則相與



歎咤曰、陳司錄在、有此耶。天下善類無不悲悼。龜山楊公時、橫塘許公景衡皆有爲國家痛惜之語、欲述治行、未果而二公沒、嗚呼、公之學以有諸己爲基、以大而化爲極。髮齒暮矣、拳拳焉不知其他。齊家事君、處人應事、一出于誠、雖委蛇曲折、往復萬變、而卒歸于是。從仕二紀、丁君子彙征之時、又不幸不年、見於世者唯此。此天下善類所以聞之而悲也。乃若負至學、憂斯世、而不少貶、以覬幸于直尋、則其道固如是。銘曰、

望之若斧、深之若矩。體魄降于土、莫敢易其常古。學兮知天、行兮罔愆。不施不傳、所嗇者年。石紀遺躅、人子之欲。過者必肅、孰爲無父之國。

陳長方借如村先生名撰 《唯室集》卷三

劉安上行狀

公諱安上、字元禮、姓劉氏、系出彭城、世爲永嘉人。曾祖延貴、祖瑩。父去非、以公貴、累贈正議大夫。公

少端重、有成人風。祖父特所鍾愛、曰、異時必大吾門。與從兄舍人安節同硯席、相友愛、尤專勤嗜學、講習忘寢食、既長、俱以文行稱。公踰冠、首鄉薦、復聯名游太學、並爲上舍生、選預魁選、聲稱籍甚。號二劉、一時賢士向慕、爭與之交。赴省闈、別試第二人、登紹聖四年進士第、丙科、解褐調杭州錢塘尉。公操履清峙、輝映湖山、人謂眞仙尉。謹身律下、每被檄、所部雖庖廚必自辦以行、秋毫不以市於民。所憩惟亭傳僧寺、否則芟舍露坐、食息自如。見者咨美之。受代、留圭租縣廩、爲後人冒請。暨還、過之、雖久客、寔甚、勿問也。公以名流、陸沈下僚、怡然無忤色。究心職事、有捕獲功、未嘗自列、曰、幸人之死而已取賞、吾弗忍爲。雖同列以是被遷、不以介意。卒用薦者升處州縉雲縣令、除登州州學教授。時三舍法初行、擇師儒、國學尤極其選、遷博士、學行德器尤爲後進所尊仰。差考試貢士。舉院故事、考

官各進策問取進止。上皇雅重公文、親筆選用。以車駕幸學恩、循儒林郎、後改宣德郎。大觀元年、除提舉浙西學事、陞辭進對、風度詳雅、論事合旨、既退、上皇顧近弼稱某蘊藉有大臣體。既而中丞余深薦之、留爲監察御史、朝廷有所推鞠、多以屬公。公持法尤審、而更根於誠恕、吏不忍欺、讞議明允、多所平反、囚悅服無恨意。十一月、遷殿中侍御史、常曰、儉安患失、尤非言官所宜、故居處薪芻服用之物、取具朝夕。十二月、磨勘轉奉議郎。明年、因八寶恩轉承議郎。三月、遷侍御史、賜五品服。公沈厚謹密、凡風聞事皆反覆詢究、或遣親人參驗得實、乃始論列、舉無不當。一日奏事、上皇目送之、曰、劉某言事、可謂詳審矣。屬時相擅政、竊弄威福、凶焰滔天、意所趨向、海內風靡、黨與蟠結、根據朝廷、無敢撓其鋒者。公獨挺然不肯阿附、極言其罪、抗章不報、乃與石公弼率同列廷論之、詞旨愷切、時論

偉之。在言路三年、凡所彈射皆汙穢不法、敗政亂俗之尤者、其不畏強禦如此。平居恂恂若不能言、至辯論人主前、安詳不撓、無所畏避、以故眷注愈渥。三年八月、遷諫議大夫。逾月、丁太碩人憂。公性純孝、未冠、正議公即世、掩泣腐袂、奉事太碩人、色養尤篤。自筮仕以至禁從、榮侍版輿、夙興溫清、奉甘毳、供笑樂、始終如一日。至是毀瘠幾滅性。卜葬盡禮、極哀榮之奉、廬於墓側、手蒔松楸、蔬食終喪、徘徊不忍去。公生於里之西洲、及夫人既亡、宦游往來經行其處、必凝望泣下、人以爲有終身之憂慕焉。政和元年冬服闋、以中書舍人召。先是、兄舍人由察官登對、玉音宣問公安否及寓止何地、既朝、見入對、上皇面諭以曩日詢訪及簡記識擢之意。二年、用元圭恩轉朝奉郎。踰年、除給事中、其所獻納論駁有補時政者甚多。俄請外甚力。九月、除徽猷閣待制、知壽州。四年、以上舍試所差官撰號



差互罷、提舉亳州明道宮。復以磨勘轉朝散郎、封文安縣開國男、食邑三百戶。五年、除知婺州。七年、磨勘轉朝請郎、進封開國子、加食邑二百戶。時六尚書降造花羅額數頗衆、督程甚嚴、公以抑配多民困論、乞蠲減、弗克、則奏以非土貢、願不爲例。又部使者往往專事花石、以市恩寵、州縣希旨幸賞、或遣使臣檄州計置督、以支錢應副舟車事。公初不與之辨、但按法移文、回報往復、閱時淹久、使臣苦之、遂巡引去、自是無來者、遂免無名之費、調發之撓、民陰受其賜焉。尤不喜笞辱人、少年或坐法、公察知良家子、資可教、則命其父夏楚於庭、責使就傅。其務教化、厚風俗、蓋有古循吏風。治婺州凡三年、鎮撫惠養、百姓德之。里人過其境、詢及遺愛、則人人以手加額、至今稱頌。八年、移知邢州。時祖母徐氏無恙、年逾九十、奉之甚謹。初遇恩、妻張氏當封、以祖母未命、遜避不敢當、奏乞回授徐、上皇

嘉其意、優詔從之、封仁壽縣太君。念諸父蚤世、而徐氏年彌高、邢去親庭益遠、遂丐宮祠侍養。宣和元年六月、得請、提舉建州武夷山冲佑觀。九月、丁太孺人徐氏憂。公以介孫承重、遂終、恩禮有加、鄉閭榮之。三年服闋、除知壽春府、累表辭免、不克。四年、磨勘轉朝奉大夫、進封開國伯、加食邑二百戶。壽、公舊治、民懷恩弗忘、比再至、老穉欣迎、扶攜遠迓者屬路。府於淮西爲大藩、屯兵萬餘、密邇京師、每歲上供十二萬石、應付畿內軍糧、賦亦稱是、雖遇凶歉、租賦放免殆盡、而稅額不少減。前此官吏復加槩量及羨餘、以幸苟免、民重困、流移者衆。公至、嘆曰、奈何剝下以逃責耶。凡諸司額外泛拋、一切不應、以撫綏寬緩爲事。漕臣預調專調、奏乞較定一路上供及支移之數、課殿最、行賞罰、以風屬郡。是歲壽春官吏遂以數劣被劾降官、復以椿發軍糧虧欠再被削秩以去、終不自辨也。六年、除知

舒州。踰年請宮祠、從之。提舉南京鴻慶宮。靖康元年、覃恩再轉朝請郎、加食邑二百戶。尋復朝奉大夫、朝散大夫、以疾乞致仕。轉朝請大夫。建炎二年正月、終於正寢。享年六十。詔贈通議大夫、命有司量助喪事。卜以十一月壬寅葬於永嘉縣建牙鄉玉清觀後山。公識度粹凝、宗工鉅儒、見者莫不許以遠器。自爲尉、以學官薦者十餘人。守帥豐公稷皆譽推獎禮。讌集則分韻賦詩、講論文義、延留彌日、不以僚屬待也。大觀初、令侍從各薦所知。右丞徐公處仁以公應詔、其爲當路知遇如此。素堅正靜退、未嘗苟進取。部使者或欲縻公致門下、寄聲知舊、諷使致謁。公薄其爲人、終不詣之。尤不喜竿牘爲教。官登州、或勸貽書時貴、丐東南便親者、公謝不顧也。暨閒居里閭、當軸皆其知舊、或請致賀。答曰、吾平時不通書、今遽賀之、得無疑我有求耶。於時俗持祿養交、率顧望迎合以規進取、公深鄙

之。爲御史多所彈劾、務存大體、振綱紀、不爲訐直取名。凡論列章疏、退輒削稿。雖家人子弟無得見之。故其奏議人少知者。嘗語人曰、在言路久、仇怨殆滿目矣。然吾職風憲、獨安所避。顧在我本無心耳。出典三郡、凡所設施、不務表暴、示以好惡而人自化。御下寬簡不苛、吏卒服役之餘、咸許自便。然嚴重叵測、莫敢慢也。或乃爲投合以求當公意、終不可入。殆所謂易事難悅者。動準繩檢、進止有常度、而遇事裁決、咸中理解。所至有惠政、在婺市田以給浮橋費、民便之。刻石紀德。其守壽春、屬比郡歲饑、流民襁屬、公爲區處舍、止什器、資養畢具、至者如歸。屢丐常平賑濟、勿許、則倒廩散之。曰、民困且死、奈何坐視不恤。倘獲罪、吾當之。其有病者以私財爲致醫藥、爲糜以食之。不幸死、則給棺槨、卜爽塏收葬之。民賴以全活不勝計。恩及境外矣。蓋其志在爲民、凡所興爲、必欲其利及久而所濟廣



者蓋如此。與人言如恐傷之。待僚屬未嘗失色。然剛正不可以犯。尤嫉臧吏。壽春屬令有貪墨聞者。既廉問審實。一夕追逮證佐。盡得姦贓。令窘急。賂當塗致書營救。公不答。卒使引疾解印綬去。諸邑爲之竦動。始公先達爲侍從。前少宰吳公敏故右丞許公景衡未顯。公識其遠到。舉以自代。二公繼登宰輔。時論隱然服公知人。胸中恢廓而謙恭執禮一於純誠。不爲纖芥矯節。遇人無遺小大貴賤。至胥徒臧獲語必拱手自名。雖晏處私室。家人不見情容。和裕有體。至於臨事則斷之以義。於嗜好淡然。略無珍玩。財物視猶糞土。雖身處富貴。自奉簡薄。殆有布衣所難者。慈孝友弟。蓋其天性。宗族內外四百口。服公之化。閨門雍睦。無閒言。溫良謙遜有萬石君家風。位侍從二十年。所得恩澤以先弟姪。季弟安仁以太碩人所鍾愛。遇之尤厚。憐其困躓場屋。首以大禮恩奏補。其後早卒。諸孤幼穉。

撫養加意。不異己子。既長。爲畢婚嫁。躬與日者往來山谷間。卜地營葬。訖事。喜甚。曰。吾今而後無復他念矣。既疾。無甚苦。謂家人曰。吾其止此乎。臨終之夕。猶誦漢書。且命區處爲翌日親朋燕遊之會。既就枕。覺風眩。起坐命藥。繼至而亡。其好學達理。高明令終。死生之際。不惑也如此。嗚呼。母宋氏累贈太碩人。娶張氏。朝奉大夫。親賢宅博士時敏之女。封碩人。生子男二人。長曰謙。承務郎。前蔡州監稅。克有家。次曰誥。女一人。歸修職郎林待問。孫男三人。尙幼。公早與兄舍人從當世先生長者遊。深得中庸大學指歸。故能以其所學發爲政事。致身侍從。當巨姦朋邪。傾亂朝政。持一介孤忠。力排抵之。僅以獲免。後雖歷位禁闥。俄值斯人復進用事。勢焰赫然。度不能抗。因懇丐外補。自是十有六年。終老於外。雖仇怨銜之刻骨。欲搜抉疵釁。冀以中傷。而卒不能。避回宮祠。優游卒歲。處之泰然。亦無

慍色、卷懷韜晦、不肯爲赫赫名、眞若畏人知者。故其進退始終大節、而逆推夫所以用心、殆未易以闕其際也。蓋其蘊蓄浩浩淵淵、用之誠有未盡、彼暴露銜鬻者、抑公之所哂也耶。公爲文典重有法、尤工五言、晚更平淡、渾然天成、無斧斤跡。有詩五百篇、制誥雜文三十卷、藏於家。卜居南郭、治第築圃、盡湖山勝槩。益喜賓客、至則觴咏、延款無斁。暇日杜門觀書、味道養性、或攜杖課園丁畦蔬蒔果、以自娛嬉。當其心閒意適、雖田夫野老亦欲與之對。非所喜、雖位顯爵尊、扣閭弗見也。故識者論公平生出處、以方唐退傅白。至其夷曠淡泊、無聲色之娛、詩文雅正、不爲纖艷浮華之語、則又未可以優劣論也。公於嘉言爲父執行、世中表姍舊、且同里、知公爲詳。然公潛德隱行、所不能窺者蓋多。姑實錄所聞、少備采擇之萬一。

薛嘉言撰 《給事集》附錄

雲溪居士行狀

惟華氏其先蓋出於高。二十九世微子歸周、開國于宋。又八世至于戴公考父、食采於華。子孫以邑爲氏、世爲宋卿。仕兩漢魏晉、爰及江左、遂爲世家。其後或仕或隱、數百年間未有顯者。至先君復以儒術有家、經史諸子與夫陰陽方技之書、罔不口誦心維、未始須臾廢也。及登仕版、頗有經世志。元豐末、嘗獻所業于朝、召試太學博士、會革試法、以奏舉中書舍人孫公國子祭酒豐公即以先君應詔、兩上不報。先君平生亡所嗜好、惟喜讀書、至老不倦、故能力考前聖之微言、深究昔賢之書畫。發爲文章、諸體兼備、雖詩與詞皆有典則、非雅言不載也。其書則眞行草隸率盡其妙、小篆尤工。作吏州縣、奉法循理、以利澤民物爲心、不爲奇以賈名、故亡赫赫顯功、而所至稱治。糾曹營道、平反居多、賴以免於死者甚衆。鳴絃洛邑、化務愷悌、嘉禾甘



露皆致其瑞、四鄰五邑有蝗害稼、而獨不至其境、考課爲京西第一。爲郡漳南、政尙中和、惠民以德、馭吏以嚴、革諸剝主者請託之弊、易之以公舉、探籌而補。期月之間、州以大治。然卒不得乘其時行其道於天下、識者咸惜其不偶、而先君未嘗以爲意。嗚呼、先君已矣、所可傳者惟文。初成、念欲鏤板行于世、每以奔馳薄官、汨沒簿領、未遑編綴。比緣待次里閭、遂得哀集遺文、躬自書校、幾四十萬言、離爲百卷。儻非宗工鉅儒爲之冠序、曷以傳之不朽。茲者幸會樞密資政樓公來帥會稽、敬以先君之文求序焉、獲遂所請。昔柳公權唐之偉人也、當時大臣之家碑誌非其筆、人以子孫爲不孝。今先君之文、得樞密公爲之序、親染翰墨、光耀簡策、垂之無窮、而初成區區積年之志、一旦獲伸、不特無媿於唐史臣之言、而先君亦足少慰於地下矣。豈不幸哉。謹并以揚子法言訓解一十卷、書說三卷、

會稽覽古詩一百三篇、小詞一卷、會稽錄一卷、哀文一卷、鏤之于板、以廣其傳焉。紹興十三年癸亥九月望日、男右朝散郎、新差監行在樞貨務都茶場、賜緋魚袋、初成謹書。

華初成撰 《雲溪居士集》卷三〇附錄

亡叔墓志銘

君諱稷、字農先、姓孫氏。聰明博達、有高節、大度過人之材。平居抵掌論天下士、雖將相大人、名號聞四海、若未可吾意、益欲奮其能以自表見當世、而屢試於有司、輒不售。建炎初、天子東巡、蒐攬群策、片言投匭、往往起徒步至大官。君慨然自喜、庶幾於一遇、而單游孤立、無黨友之助、故卒於無所就、以死。悲夫。將葬、諸孤走泣而圖、所以詔後世者、乃叙而志之。孫氏望富春、而世家常州武進縣。諱諷、尙書職方員外郎、君之曾大父也。諱夷清、君之大父也。諱志康、登州文學、贈宣教郎、君之父也。宣教

生四子、長曰穆、以儒學起家、典兩州、刺一路、卒官朝散郎。曰棫、曰楨、皆以行義稱於鄉里、君其季也。君少長嗜讀書、尤邃於易、不守先儒傳注、而以莊周、列禦寇、浮屠氏之言合於經者佐其說、推原性命道德之理、幽明之故、鬼神之情狀、迎見立解、超驚獨出一時、老生宿儒歎譽以爲不可及。文章能傳其學、而辯於說理、辭義精確、不爲空言。嘗一試太學、遂超其列。會朝廷更三舍法、而君之親老矣、三兄相次下世、闔門僅千指、冠昏喪祭、衣食之具皆屬君、歎曰、吾道盡矣。遂束書不觀而治其家、閒從里長者劇談縱譎以爲笑樂。性夷曠、洞見肝膽、胸中有所懷、如茹物不下、必盡吐乃已。面刺人過、盡言不諱。或從旁竊聽、他日記疏以爲口實、君蓋忘之矣。疏財樂施、一語之投、捐數十萬無所計。意所不合、一錢不分也。疾革、後事皆有宿戒、至屬續無謬語。實紹興四年九月乙卯也。享年六十有一。

娶強氏、生子十一人、男曰好謙、好大、好修、好遜、好謀、女適右宣教郎、新知紹興府會稽縣事余衍、左宣教郎、新差權通判無爲軍劉彭年、左迪功郎、新授太平州蕪湖縣主簿席畸、右從事郎、新監溫州鹽倉施增、左迪功郎、新授台州司法參軍祝求仁、餘未行。明年九月甲申、葬於縣之西鄉鄭君莊原上。某君之從子也。兒童時、出所爲文辭見君、君喜而稱之、先大夫命某師焉。中閒宦游四方、離合不常、而視諸族子獨親且厚也。某守臨安、觸罪遷嶺表、君曰、嘻、此南柯太守夢也。一切世閒共一蟻垤、況身履而親見之耶。於是欣然悟笑、遂別。別三年、蒙恩北歸、而君沒矣。銘曰、
魏瓠五石、大弗能容。不龜手藥、一戰而封。孰哲孰愚、祇繫其逢。銘以著之、閱此新宮。

孫觀撰 《鴻慶居士文集》卷三五

黃直閣墓誌銘



秘閣黃君子虛歿、既葬、諸孤喪服更造予、跣以泣曰、先君子葬未克銘、治命以屬公。不肖孤其忍廢先君子之命、敢碣墓以請。予與君雅故、且諸孤請益急、則諾而銘之。君諱策、子虛其字也。其先居建之浦城、爲望族、世有徹官。自大父洩累贈奉議郎、大俗、因家焉、今爲姑蘇人。曾大父洩累贈奉議郎、大父挺仕承議郎、累贈金紫光祿大夫。父彥仕朝奉大夫。君性豪邁、風神峻拔。方童丱時、出語已驚人。弱冠一舉進士中乙科、追和梁昭明所選詩、持見眉山蘇公。公期之曰、異時必以文顯。初選授杭州司理參軍、折獄精明、吏屏息不敢弄以事。秩滿、授開封府雍丘縣主簿。元符末、詔許中外言事。是時昭慈聖獻皇后既復位號、而典冊有未盡正者。君上書引古義爭之、言劇剴切、藉藉聞搢紳。薦者以君才磊落、不宜浮沉簿領、改授齊州州學教諭。會崇寧黨錮之論起、故老名臣鮮克免者。君亦坐前

所上書刻名黨石、羈置登州。二年、徙海州。既而上皇感寤、斥用事大臣、破黨論、仆其石立碎之。君例還姑蘇休官、自號隨緣居士。閉戶讀書、益自刻苦。爲文章瑰詞老氣、絡繹間起、至其甚得意、視古作者無媿也。佳時勝日、相羊山水間、賦詩自娛、澹乎若與世無營。如是二十年。故禮部侍郎鄒公浩、諫議大夫劉公安世、右司員外郎陳公瓘、皆以敢諫爭名重當世。君從之游、上下其議論、相厚善。宣和中、姑蘇守賈諲知君名、強欲吏之、辟致幕下。諸有勢人意君可撼以祿、爭爲出力推輓。齟齬不合、去爲浙西提舉司幹辦公事、移京東、改發運司主管文字。君亦未嘗薄其官、所居稱治。上即位之二年、改宣教郎、通判嚴州。明年召對行在所。又明年、上追錄黨人、除直秘閣。其在嚴州、數以爭可否忤部使者意、使者嫉之、誣劾君縱獄事、按驗無所得。卒奪一官、左受宣義郎罷去。退而築室五湖之旁、曰

閱浮屠氏書、要以刮去世故、捐愛憎、然其了達、乃於死生之際、脫然如去來。忽一旦起盥櫛、呼諸子

侍前、曰、吾其脫於斯乎。而輩行自力、毋墜吾訓。語

訖、危坐而逝。實紹興二年八月十有二日也。享年

六十有三。娶程氏、生三男、曰維、曰纓、曰縱、皆以儒

業世其家。一女、適從事郎胡總。君作壽冢於靈巖

之麓、手植之木拱矣。諸孤即以其年十月十日舉

君之柩葬焉、從其卜也。先是、君得元符詞臣手疏、

載上皇聖訓、備言昭慈之復位號、乃欽聖追用泰

陵悔意、驚且喜曰、天也。使泰陵之意白於天下、死

不恨。亟上之。君既歿、始用昭慈戚屬信安郡王忠

厚奏請、詔以其疏付史官、示萬世。嗚呼、君才百於

人而不一試、偲偲然爲國納忠。雖擯斥流落、以終

其身、不少悔、其亦可哀也已。有文集百二十卷、藏

於家。銘曰、

山盤盤兮、松桂蕭森。川渺渺兮、魚龍嘯吟。顧瞻中

丘兮、宛其幽深。曰惟哲人之藏兮、抱器陸沈。訊來世兮、誰其賞音。

沈與求撰 《沈忠敏公龜谿集》卷一一

尹焞墓誌銘

紹興十二年十一月丁酉、和靖先生歿於紹興、以其族孫鎮爲孫、奉先生後。丙午、葬先生於會稽縣五雲鄉石帆里。其子婿邢純謂門人呂稽中曰、惟是喪葬嗣裔之事、屬之我、文書論說、傳於後世、屬之子、尙行先生之志乎。稽中曰、然。吾方銘先生墓。吾聞之先生矣、昔者周公歿、聖人之道不行。孟軻歿、聖人之道不傳。從千餘載之後、得不傳之學者、伊川程夫子也。先生曰、吾晚得伊川之道、四方師事之如伊川。而稽中也、亦事先生二十年矣。嗟乎、孟軻氏歿而道不傳、豈無傳之者哉。傳而差也、差則不勝其蔽。雖有豪傑之士、擇焉而不精、小醇而大疵、謂之不傳可矣。而程夫子得之。程夫子之語



門人每恨其差也。曰：差之毫釐，繆以千里。程夫子之歿久，門人高弟曰微而說又差。先生自洛入秦，自秦入蜀，自蜀入吳楚，朝行在所，退老於越，而後學者復聞其正而知其差。而孟氏、程氏之學復明。今先生歿矣，學者其謹傳之哉。昔者荀卿事子弓，而其傳至於韓非、李斯，盡壞先王之道。考之於書，蓋自荀卿而差也。而況其下者哉。先生，洛人也，姓尹氏。五世而上居太原，徙於汝，自汝徙居於洛，卒葬壽安之任范里。至先生之曾祖仲宣，娶張氏，生七子，而二子有大名。長子諱源，字子漸，是謂河內先生。次子諱洙，字師魯，是謂河南先生。河內娶何氏，生四子。其長子諱林，官至虞部員外郎，娶劉氏，萬年縣君。劉氏卒，娶陳氏，福昌縣君。是生先生。以先生貴，贈虞部爲朝散大夫，母皆贈令人。先生諱焞，字彥明。少孤，奉母陳氏以居。爲進士業，年二十，師事伊川程夫子。先生應進士舉，答策問議誅元

祐黨人。先生曰：噫，尙可以干祿乎哉。不對而出，告於程夫子曰：吾不復應進士舉矣。夫子曰：子有母在。先生歸以告其母。母曰：吾知汝以爲善養，不以祿養。於是先生退，不復就舉。程夫子聞之曰：賢哉母也。大觀中，新學日興，有言者曰：程頤倡爲異端，尹焞、張繹爲左右。先生遂不欲仕，而聲聞益盛。同門之士皆尊畏之。程夫子曰：我死不失其正者，尹氏子也。靖康元年，朝廷初辨忠邪，召用四方才德之士，懼先生不至，則以布衣召先生。先生謝不才，即往，又謝不欲朝。大臣知不能留也，授以和靖處士而歸。明年，金人陷洛陽，先生之家死於賊。先生旣死而復甦，竄於長安山中，轉徙四五年，而長安陷。劉豫僭位於京師，思以繫天下之望，則使其僞帥趙彬卑詞厚禮，來招先生，具僕帳衛從於山中，甚盛。先生逃去，夜徒步渡渭，匿鬻水谷中。當是時，上遣大臣宣撫處置川陝，在閬中，而稽中爲官屬，

在行。先生崎嶇走山間，遂至閬中，館於子弟之舍。久之，先生往來閬中，止於涪。紹興五年，上召先生於涪曰：「昔者之召程頤，蓋自布衣除崇政殿說書。遂以左宣敎郎、崇政殿說書召。先生力辭，章十數上。敕有司加禮，敦遣不已。六年，先生辭官而赴召。蜀之學者爲先生立祠於涪。七年，至九江，有言者攻毀程氏。先生復辭曰：『學程氏者，惇也。生事之三十年。今又三十年矣。請就斥。』朝廷恥之。於是大臣顯言先生拒劉豫之節，學問之正。上又思見先生，召之愈急，禮益至。先生辭避已數十，迫上命，布衣至行在所而病。上賜之金帛，使大臣存問慰勞，須病愈必受命而復朝。病愈，先生朝，又辭於上前。上曰：『卿尚可辭耶？朕渴卿久矣。』知卿之從伊川也。俟卿以講學，不敢以有他。先生退曰：『聖君也。』遂就職。又除祕書郎。先生年六十七矣。八年三月，除祕書少監。月餘，以病求去，不許。四月，賜緋衣、銀魚袋、象

笏，與御前珍玩之物。先生益衰且病，益求去。改除直徽猷閣、主管萬壽觀、兼崇政殿說書。九月，除太常少卿。十一月，除禮部侍郎兼侍講，進官左通直郎。而先生病日作，不能朝，告病甚於朝廷。十二月，除徽猷閣待制、提舉萬壽觀兼侍講。先生曰：『病不能朝矣，而寵祿日至。雖主上賢我，大臣安我，吾何功德以當之？』上章十餘不能已。朝廷哀其病且老，九年二月，使以待制提舉江州太平觀而去。先生去之平江虎丘，見門弟子曰：『噫，吾老矣，再應聘而得君，舉朝之士皆我與，謂可以有爲矣，而吾衰病也，不可以筋力朝。傷哉！事君之晚。』十年正月，先生年七十，曰：『吾無功而爲從臣，吾去而不能復辭，以期月而老矣。七十而老，尙矣。』遂致仕。進官左奉議郎，而從其請。十二月，先生如紹興，其子婿邢純爲浙東安撫司準備差遣，侍先生以居。蓋居紹興二年而歿，年七十有二矣。上命越制以賻之，贈官四



等。先生娶張氏、追封令人。生五男三女、坤城堪增、皆早喪。均仕爲將仕郎、娶趙氏、洛陽之陷、與張令人皆死。長女適進士伊川程暉、次適進士新安羅授、次適邢純者也。初先生老無子、其弟燭死於武功、有孤曰塤、及長、先生以郊恩仕之矣。其從弟烈、在長水山中、生子曰繼可。今九年而長水陷、不能以來、故立孫鎮爲均子、服三年之喪。稽中間之先生之學、學聖人者也。曰、聖人必可以學而至也、而不可以爲也。翫味以索之、踐履以身之、涵養以成之、有叙。於是乎下學上達、窮理盡性、而無贅無外者、事之正也。故先生莊正仁實、不過於心、不欺闇室。自誠而明、以之開物成務、推而放諸四海而準。孟氏而後、莫如此學者矣。故先生於聖人六經之言、耳順心得、如出諸己、見於容貌聲音之間、望之儼如也、即之則溫、言則厲。天下知道者必宗之、不知者慕之、小人見之必革面。後有聖人、不易先生

之道矣。然而先生進不得施之天下、退未嘗筆之於書。與群弟子言、據六經發明問答、不爲講解文字、弟子各記所聞見云。獨嘗奉詔撰論語解、今行於世。先生每病同門之士、昔者記伊川之言、出他意、謬誤失本指、今傳於世者益多謬。在蜀中時、取諸家所記、考證去取、爲師說一編矣。復不傳諸外、曰、伊川之成書、易傳而已矣。讀易傳、足以知伊川之學。故無書。今弟子記先生之言、亦各因其所得所知、必稽中與二三子參撰、整而行之、以見先生之學於後世。其銘曰、

道之不明、學失其傳。或得其一、莫見其全。駭外恨遺、躐高滯卑。莫身其本、莫質其疑。流爲怪誕、變爲異端。滑稽支離、莫即其安。惟吾先生、得傳之正。旣誠而明、窮理至命。上達無餘、下有根本。貫之則一、推之則準。惟性之復、畢顯於善。粹然其和、亦見於面。丕哉聖謨、六經之編。耳順心得、如誦己言。窮觀

其蘊達俟其施。如何昊天、不相於時。疇昔方強、如彼否窮。老而遇主、乃病乃終。不僭不忒、則畀後覺。我二三子、敢墜所學。學之不墜、惟不僭忒。百世之紹、萬世之則。惟億萬世、道不有定。我作銘詩、以俟後聖。

呂稽中撰 《尹和靖集》附錄

李司理墓誌銘

作父、吾婿也、名知剛。世有令德、爲時聞家。曾大父諱執中、累贈正議大夫。大父諱審一。父諱械。作父五歲而孤、又十歲而母夫人侯氏卒。伯父、今寧陵縣大夫公權育之、所以長養成就、恩義甚篤。方爲兒時、不喜嬉弄、顧有文字書畫處、往觀焉。大父異之、試使爲詩、語能動人。既長、志尙特然、嗜問學、至忘飲食。與兄知柔在太學久、二李名動京師。作父元祐五年舉進士、爲別試第一、遂中丙科。又明年見予穰下、如虎豹之駒、犀象之犢、豫章桎梏之苗、

其精神氣格、自然異也。至其經術、終日似不能言者、雖近在戶庭、予累年而後知之。由此以觀焉、天下之士、潛光匿迹、以遠不得而知者、顧豈少哉。居久之、予自南陽趣闕下、沿汴絕淮、訪吳市之異書、探稽山之勝穴、切磋琢磨、相將以道。一日、忽謂予曰、春秋屬商、其學之不傳久矣。公其爲發明之、願聞警歎之餘也。予曰、聞之先生長者、仲尼以魯春秋爲春秋。魯春秋今亡、則春秋有不可讀者。作父應曰、經一而足、聖人以比貫類使、從可知耳。雖無魯春秋猶著。予異其言。及得所謂繁露之書、作父讀至春秋無傳而著、引之魯則謂之外、引之夷狄則謂之內、會同之事、大者主小、戰伐之事、後者主先。易無達占、詩無達詁、春秋無達辭。曰、此等真奇語也。其他雖多、亦或牴牾。且在易到之域矣。予以仲舒積精此書、至三年不窺園、乘馬不知牝牡、斯已勤矣。而作父展卷疾讀、初不經意、便能摘玉杯



儒藏

之瑕、造竹林之美、若指白黑而數一二、何其敏也。嘗謂予曰、三傳傳經、公羊最精。穀梁殆其後人、其佳處拾公羊之遺耳。先儒云公羊不如穀梁之精、似誤也。予以其言攷之、信然。作父從予至數年矣、始以經術知之、每自以爲不如也。竊謂異時當爲國器、斯文實有寄焉。孰謂不幸短命死矣。死時、召其僚吳君愿、屬以後事。愿去、即盥手齎面、揖吾女、令勿悲惱、西向端坐而逝。噫、死生之際亦大矣。其處之定、有名僧高道憚而愧之者也。使老且死、德義備成、事業著見、闡前人而振後世、雖使搢紳先生願學焉可也。初訃至、予哭之慟絕。有解予者曰、此誠可痛。然年未三十、文足以華國、行可以儀世、早成如此、理自不得長也。予以爲詣理、然有不能割也、尙忍爲之誌耶。作父享年二十有五、爲池州司理參軍。以紹聖二年三月六日卒、四年正月三十日葬。墓在其鄉龍舒耐春秋里之先塋。二女子、

皆尙幼。

陸佃撰 《陶山集》卷一四

校記

①有：原作「君」，據四庫本《龜溪集》改。

宋儒碑傳集卷七十九

廖剛 士褒 胡宗伋 程振 林屹 許

景衡 方曄

工部尚書廖公墓誌

紹興九年詔以延平廖公爲御史中丞。方是時宰相秦檜當國、謀爲植黨固位之計、欲假臺諫之力、斥逐異己者。公先亦爲相所薦、及居言路、侃然守正、無所承望。每因奏事、論君子小人朋黨之辨、反覆切至。相遣人風之、則答曰、有言責者不得其言、則去、枉道徇人、非吾志也。會有故從官嘗委質叛臣之廷、以與相有姻、故歸自虜境、除資政殿學士、提舉醴泉觀、使奉朝請。公顯奏其惡、愈觸相怒。又嘗從容建白、願起舊相之有人望者、處之近藩重鎮。相聞之曰、是欲實某何地耶。公以言不行、上章乞歸老、改工部尚書。其繼公爲中丞者、受風指、劾公、上念公忠直、俾以徽猷閣直學士奉外祠。其明

年迄致其事。於是廖中丞之名重於天下。公諱剛、字用中、順昌縣人。曾祖諱隱、祖諱丕、以公故贈承務郎。考諱懋、任朝請郎、累贈通奉大夫。三世皆以淳質自守、孝義相傳、樂善好施、爲鄉黨所親依。公治家有法、資稟靜厚、濟以涵養。自爲布衣時、嘗從其鄉人故諫議大夫陳公瓘遊、又嘗從侍講楊公時問學。故其後立朝行己、具有本末、蓋非偶然者。初登崇寧五年進士第、歷縣主簿、州判官、錄事參軍、教授。凡五任、改秩調漳州司錄、就除國子錄、擢監察御史。時方爭驚於進取、公足跡未嘗及權門。已而以親老引外、得知興化軍。靖康初、以右正言召、未赴、遭通奉君憂。服闋、又以工部員外郎召、以母疾辭。會劇盜起旁郡、樂禍者相煽、縣之官吏悉逃去、鄉民扣公門求活。公以信義徧喻從盜者、使反業。既而復有群盜自旁縣來、據井絡、殺掠人、勢熾甚。部使者且以檄屬公、公遣子遲入賊中、喻以



禍福。其渠領素聞公名。旬月間相率從命。餘黨悉散遣。先是朝廷遣制置使將重兵來玩賊不時討。及聞公既撫定。則欲攘其功。遣偏將規圖傷害。至則執遲。注刃於頸。公不爲動。卒悔謝而去。除福建路提點刑獄公事。未幾召爲吏部員外郎。遷起居舍人。以撫賊事增一秩。公曰。以此受賞。非本心也。卒辭之。上方向儒學。公奏帝王之學不當如文士所爲。願去末學之無益。專務正心誠意以福天下。除權吏部侍郎兼侍講。奏乞罷遣高麗使。又條陳屯田便利。皆切當時事宜。遷給事中。遭內艱。服闋還瑣闥舊職。時紹興四年也。朝廷旌別淑慝。推究章惇蔡卞迷國本末。追貶其身。且出。其子若孫不得官於朝。於是章傑自郎官出知婺州。章僅自寺丞提舉江東鹽事。公封還詔書。謂如此豈足以示懲有旨。悉與之祠。明年遷刑部侍郎。初公之曾大母享年九十有三。大父享年八十有八。皆及見耳。

孫餘亦多壽考。累世以華髮奉養。公舊嘗名堂曰世綵。諫議陳公播之聲歌。士大夫從而爲詩者甚衆。緝之盈編。至是所以所當遷官贈大父。且曰。臣逮事大父。教以忠孝。念無以報。因述家世事。始末上嘉歎而可之。宰相忠簡趙公方務推廣上孝愛之志。遂以世綵集進奏曰。陛下以孝治天下。凡人之欲顯其親者。莫不曲從。固知陛下念親未嘗少忘。今復覽廖氏事跡。伏惟聖懷不無感歎。上它日謂公曰。觀世綵集。誠人間美事也。其書至今人間樂傳之。又明年以久在朝列。力請外。除徽猷閣直學士。知漳州。郡人素以侈靡相尚。昏葬例踰制。公下車。首立條約。且親爲文以訓告之。風俗爲變。在郡二年。應詔上封事。乞早以建國公正皇子之號。大略謂。惟誠足以動天地。感人心。今意雖有屬。而名未之正。恐未足以慰幽顯之望。是歲以年將七十。請謝事。時已降詔旨矣。詔書趣行至闕。則有



中司之拜、首奏、臣職在搏擊姦邪、當思大體。若乃摺拾細故、矜一得於狐兔之微、則非臣本心。又奏、經費不支、盜賊不息、事功不立、命令不孚、及兵驕官冗之弊、蓋不一。其原則在於一人之身、若意誠心正、以臨照百官、則是非不紊、邪正洞見、天下之弊可次第而革矣。又奏、人君之患莫大於好人從己。若大臣惟一人之從、羣臣惟大臣之從、則天下事可憂矣。又論當遠佞人、且劾從臣中爲佞之尤者。時大將恃功希恩、所請多廢法。公隨事論列、至於四、至肅然知畏。凡公奏論、皆本於誠實、務先大體、踐其初言類如此。方是時、善類倚公少安、至所言漸廣、卒爲時宰所擠去。自公之去、言事者類皆承望、而搢紳竄逐者相繼矣。公謝事三歲、以十三年正月壬寅沒於正寢。累官左^②朝奉大夫、封順昌縣開國男、詔以中大夫告其第。是歲十二月壬申葬於其居溪之南鳳山之原、從治命也。娶張氏、封

淑人。子四人、長遲、嘗任朝散大夫、知邵武軍、後公二十七年卒。次過、今爲朝散郎、前知梧州。次遂、承議郎、前知化州。次蘧、朝散郎、廣南西路提點刑獄公事。孫男十五人。諸子遇郊恩、累贈公少傅。公自少時、居母謝氏喪、已有聞於鄉黨、長事繼母陳氏、以孝謹稱。撫育其弟甚恩、先世舊產盡推以與弟、及猶子。居家儉約、雖貴不改寒素。居官以清簡率下、不事威嚴、人服而從之。平時不觀無益之書、不爲無益之文、蓋其所存、每貴於實用躬行而已。某爲兒童、侍先公忠獻旁、側聞公之名。及忝^③廣右帥事、公三子適皆爲郡於所部、而其季又爲朝廷選用、以使旨來治於桂。暇日求公奏議讀之、削稿之餘、僅有存者。一日、愀然以公墓誌銘爲屬。某自念晚生、其何敢任、而請愈力、顧不得而辭。於是首著公之大節、而次第其平生如此、實淳熙四年冬十月、蓋去公之沒三十有四年矣。銘曰、

廖氏之先家於太原。唐季避難。甌閩是遷。惟閩之廖自公而著。豈以其位。惟德之故。公之清德。壯老一節。持身立朝。冰玉之潔。人挈其華。我掇其實。躬行是尚。如漢萬石。靡慕於寵。靡撓於勢。進無隱言。退不苟愧。謝事於家。而名益崇。惟其守道。是以亢宗。有寧其宮。公則命之。溪山所環。後則宜之。奕奕其後。孔蕃且昌。克念其德。以篤不忘。

張枋撰 《新刊南軒先生文集》卷三八

士補之墓誌銘

東平士補之諱袞。其先自周適晉。有子爲理官。以士命氏。漢末燮嘗爲交趾太守。隋末義總爲侍郎。家河內。其後世遂家高密。而補之四世祖如玉。以天平軍判官卒。貧不克歸。因又家東平。故今爲東平須城人。天聖慶曆間。山東大儒以高行達學顯于時。仕尚書兵部員外郎諱建中者。于補之爲祖。妣韓氏。考郊社齋郎諱安亨。妣李氏。補之年四歲。

失父。知孝其母。跬步不去側。年十五。未嘗出門巷。既長。以孝聞。年三十五。失母。哀毀骨立。杖乃能起。兄才早世。無嗣。補之謹事寡嫂。爲之立後。既壯。又授之室。嫂亡。乃分貲產贍之。尤愛其弟永。自以既孤。惟一弟。視之如傷。寧身不擇利害。惟弟之聽。母有妹。已嫁而卒。貧無以葬。補之力爲營辦。乃克葬。崇寧初。被鄉薦。試禮部。不中。歸處庠序。益自勵。會詔舉八行。鄉老故張公椿。王公之明。今東公正卿。王公。撫與鄉人定計。以補之孝友諸行。皆應法。當舉。方草具其事。補之聞。亟來見曰。誰以此欺諸公。事當核真僞。況以詔誓不敢。諸老度不可奪。因姑止。初。母病寒厥。醫不能識。補之痛恨。遂學爲方。頃之。稍以其術視人。鄉閭賴焉。數歲之後。益明習。近自里巷。遠暨他邑。來問者相踵。大抵所治。貴保養。賤攻取。善用剛劑。充虛斷下。內固根本。使賊邪自消。非甚不得已。不爲瞑眩。或困憊危惓。人莫能如。



何補之輒愈。東平部使者所會、又仕者尤衆、凡疾不經補之不敢決、以是延請無虛日、而造門者黎明往伺、見之已不逮、則未听而往、猶屢返乃一遇、或不得盥頰出對客、然來者蟬聯、遂不得休、率常過午乃始飲食、窮日之力以應接、未嘗倦。人多欲厚餽之、辭不受、或求藥草諸好用物以將意、猶不肯盡取。蓋橐中空虛、妻子曰闕乏、未嘗卹也。喜稱人善、不言其短、與在位者言、未嘗及公事、識者以此尤賢之。政和八年三月疾病、自診知不可爲、麾去藥艾。將終、神爽不亂。居七日、以四月二日終于寢、年四十八。鄉人驚怛出涕。皇皇旬日。娶李氏、承議郎价女。又娶李氏、陳留丞侃女。子男三人、蘋、蘩、一幼未名。女五人、嫁吳大受、李曇、李璆、二未行。五月四日、葬東阿崇山原。銘曰、

行修于家庭、志行乎州里。源遠其流長、誰使涸也。咫藐有欒者棘、依止我悌弟。盛德諸孫曾、尙振于

永世。

劉跂撰 《學易集》卷八

胡府君墓誌銘

吾友胡浚明、諱宗汲、世爲越之餘姚人。自其叔祖父穆始以進士起家、仕至屯田員外郎、子孫遂以儒爲業。曾祖諒、贈大理寺丞、祖儼、父尙能、皆隱居不仕。君自爲兒時、有成人之操、其父目爲老子。比長、刻意問學、手未嘗釋卷、夜引睡、則以首叩柱、其自強如是。爲文清古、不蹈襲前人一語。少年預鄉薦、益自信不疑、翱翔兩學、幾十年。會朝廷以舍選取士、移其籍以歸、久之、復不利。即所居築室、買書以教子、聚宗族鄉黨子弟、不問疎昵、講說經史、責課程、皆聳然知化。君性至孝、雖飲食起居、未嘗忘親。治居第、首嚴祖廟、不以便燕私之適。堂室奧址、規模與世俗異、登其門者、皆恍然自失。奉養至儉、薄田廬所入、僅足餬口、而遇人急難、極力拯救、雖

焦首濡足、不悔也。鄉鄰仰以喪葬婚嫁與病而醫藥者甚衆、以是生理益落、君爲之不少變、蓋急義樂施、出于天資。或以爲過、君行之愈力。嘗曰、吾損己以益人、雖過于義庸何傷。己酉冬、敵犯明、越惡少相煽而起、幾徧山谷、君挺身諭止之。士族避地竄逃、顛沛、君與之周旋調護、恩若骨肉、眞可以託死生者。鄉人爭訟、多就評曲直、君每折以理法、皆灑然而返、不以干有司。聞人一善、若己有之。或少有過差、必正色詰誚、雖其尊屬、憚若嚴父師、惟恐君之聞也。方士有以奇藥煉黃金術授君、忽夢若有告者曰、君欲爲盜乎。旣寤、亟取焚之。每小疾、必夢僧伽處方、服之輒愈。所居湖山並海、百井皆鹽、夢人指其處、鑿之得甘泉、皆君誠意所格也。建炎改元、今上皇帝登寶位、凡五上禮部例、皆推恩、宗人強起之、授房州文學、調潭州瀏陽縣丞、改迪功郎。有知君者薦諸朝、監嚴州比較務、譏察出入吏

不能欺。郡遣官季點、君輒囚服待罪、衆亦察其廉介、不復問。務旣清整、課亦增羨。尋轉右修職郎、監潭州南岳廟。考滿、轉右從政郎、旣而授饒之德興丞。其在嚴也、郡將尤加禮、嘗啖以厚利、君曰、此非所當得、拒不受。未幾、爲郡者以賄聞、至下詔獄、坐貶。獨君無一毫之汙、衆皆歎服。某與君雖同里閭、崇寧初始識君京師、一見氣合、其後契闊、離合不常、每見必歡然道故。噫、君雖窮老、而浩然之氣不少衰、議論益剛決。謂富貴功名可以立致、不在吾身、則在子孫、日夜勵其子爲學。而沂復嶷然有立、能成君之志、魁多士、取甲科、聲名籍甚。君喜曰、是必大吾門、吾志得矣。因復丐岳祠、從其子宦遊、奉養甚適。往來江湖間、幅巾蕭散、怡然自得。享年七十、以紹興十年八月癸未卒於其子秀州軍事判官沂之舍。即日護其柩以歸、士友皆爲流涕。明年十二月壬申、葬本邑翁家湖之原、從新卜也。君平



生未嘗閱佛書、死之日、沐浴盥櫛、神識不亂。娶莫氏、有賢行、能通書史。凡君所爲、固有不近人情者、夫人能順適之、人尤以爲難。子男二人、長即沂、次汾、舉進士、亦有志操。葬有期、沂衰經踵門、出其友左迪功郎、溫州州學教授虞仲琳之狀、求銘于某。某知君能詳、追惟雅好、不敢以鄙拙爲解、因掇拾其大略如是。銘曰、

凜志節以希古之人兮、旣銳而堅。謂功名可立致兮、恥沒世而無傳。強學疾驅兮、人十已千。見義必爲兮、人後已先。心亨志遂兮、樂只丘園。雖屈于一時兮、白首迍邐。其存而不朽兮、嗣子之賢。蓋造物者不報其人、而報其人之天。翁湖之濱、卜此新阡。餘慶流芳、子孫綿綿。

李光撰 《莊簡集》卷一八

尚書刑部侍郎贈端明殿學士程公神道

碑

靖康元年冬、金人再犯京師。明年春、天子在野。敵索金繒、無藝、府庫不足、以民財繼之。詔尚書梅執禮、侍郎陳知質、程振、給事安扶督民輸。一日、敵帥坐城闔、猥謂四人者曰、吾國賦羊馬于民、率比屋相甲乙。若甲輸而乙否、則執而誅之、誰敢違者。意民窮且變生、將投隙而逞。四人同辭而對曰、今天子蒙塵、臣民皆願前死、雖肝腦不計也。于金繒何有哉。顧誠無有塞責。敵帥大怒、問官長安在。欲加以罪而置其餘。程公恐尚書坐之、遽前曰、皆官長。敵帥不勝忿、四人皆死之。建炎初、上即位、哀其忠、降璽書褒歎、各進官七等。于是程公自承議郎進朝議大夫、官其子若親屬二人。下饒州給葬事、遣官護視、厚賻其家。言者謂未足酬公、復以端明殿學士告其柩。公諱振、字伯玉、饒州樂平人。大王父承憲、大父溥、父翺、世業儒爲聞家。翺以公故、贈朝請大夫。公少有軼才、未冠、求師友四方。入京師、游

大學必秀出其輩類。一時名士如張商英、陳瓘、張廷堅、鄒浩、悉見之迎門。崇寧三年，車駕幸孔子祠，見諸生太學公^④，以高第補將仕郎，除和州州學教授，留爲辟雍錄。久之，遷博士。會詔近臣求人材可用者，或以公聞，召至政事堂，擢太常博士。以親老丐外，得提舉京東西路學事。秩滿復^⑤，留居東州。五年，奏立孟子冢祠，以公孫丑、萬章從祀，皆見聽。改京西南路提舉常平，入尙書爲膳部員外郎。逾年，拜監察御史。時大臣崇黨相軋，若水火然。一時士大夫鮮不附麗。公孤立行一意，屹然其間，人服其正。遷辟雍司業，兼太子舍人，改國子。初見太子東宮，言古者大祭祀，登餽受爵，必以上嗣。旣禮備載，且元豐彝典具存。昨上有事明堂，而殿下不預，非所以尊宗廟、重社稷也。太子瞿然曰：「初無人及此。」由是驟加獎重。後每進說古今治亂，輒向納之。遷左司員外郎，兼官如故。時方臘暴浙右，聲搖京師，

公從容爲宰相王黼言：「宜乘此時言天下弊事，庶幾稍革，當天意，順人心。」黼快然不悅曰：「上且謂黼挾寇，奈何？」公知黼忌其言，不答趨出。然太子薦公甚力，外廷莫知。會兩省官缺，上曰：「程振老成忠實，必以爲給事中。」黼銜前忿不能平，白公資淺，且雅長辭令，止除中書舍人。已而中書侍郎馮熙載黜知亳州，黼怨熙載甚，欲公劾奏，且以醜言詆之。公不從。黼大怒，風言者論公有黨，謫提舉武夷山冲佑觀。時宣和三年也。明年，復集賢殿修撰。丁內艱，尋除徽猷閣待制、中書舍人，皆力辭不拜。無幾何，太子受內禪，是爲淵聖皇帝。淵聖念公久，趣還舊班，對便朝，問勞甚渥。俄詔自中出，除尙書吏部侍郎。公以大臣不協，議論多駁，詔令輕改，失其事機。如金人挈兵且半年，而至今不解者，以或和或戰之說未一也。裁抑濫賞，如黑白易分，而數月之間，三變其說者，以廟堂不能忘私而多與其黨爲地。



也。今日一人言之、以爲是而行。明日一人言之、以爲非而止。或出聖斷險度而不暇疇咨、或用大臣偏辭而遂形播告、所以動未必善、處未必宜、乃輒爲之反汗焉、其勢不得不爾也。乃聞敵寇河北、力請合諸路兵、犄角擊之、以牽其勢。且曰、彼猖獗如此、陛下猶欲守和議、而不使之少有所懲創乎。淵聖雖美其言、而奪于大臣、卒不能用。連抗章求去、優詔不從。以吏部銓綜有聲、滋欲試之民事、除開封尹。先是大辟情、或可矜、多取旨原貸。祖宗行之歲久、好生洽于民心。崇寧以來、議者謂輦轂先彈壓、凡情不當法、率巧請殺之。公奏宜一準祖宗故事、遇得旨即著爲令、令不載者、許援其比而行。自此天府之囚、全活者不可勝計。已而詔捕亡卒、獲數千人、公請充入步軍司、而除其罪。步軍司請論如法、法當盡誅。公以多事時、一日而殺千人、民必大駭、且未決、當繫有司、寧無反側之患。淵聖大以

爲然。卒如公請。除尙書刑部侍郎。久之、敵邀天子幸其營、公亟白宰相何杲、思所以折敵之語、告于上而卻之。杲忽宣言翌日車駕出城、群臣失色。已而敵求金不已、朝廷莫知所爲。公冒死直前、卒與禍會。寔靖康二年二月二十五日也。得年五十有七。初、公爲中書舍人、王黼以客沈積中帥河朔、欲覘敵圖燕。公語積中、當思異時覆族之禍。積中佩公戒、至所部、首以書謝公、盛言其不可之狀。公具以積中語告諸朝。洎公左遷、童貫、蔡攸卒興是役、致變起肘腋、而公罹其凶。故聞公之喪、士無賢愚、皆爲之出涕。公天資樂易、與人談笑、極醞藉風流、至論事則挺然不可回奪。宣和中、上皇崇道家之說。公至東宮、淵聖問焉。公對甚悉。其略曰、周公作鴟鴞之詩、孔子以爲知道。其言不過迨天之未陰雨、綢繆牖戶而已。老子著道經、亦曰爲之于未有、治之于未亂。蓋老氏與孔子合者如此。今不固根

本于無事之時、而徒事目前土木之工、非二聖人之意也。他日淵聖爲太上皇道之、太上皇頗欲去健羨、疏左右近習之臣。而楊戩方興龍德太乙之役、懼不得肆、因讒家令楊馮將輔太子幸非常。上皇震怒、執楊誅之、而淵聖之言亦廢。及靖康中、公尹天府、言利者頗欲離間兩宮、公心獨鄙之、每調娛父子之間、甚有恩意。如詔鞠龍德宮近侍梁忻之類、特寬其文、由是纖介之疑不行、聞者無不歎服。公居鄉、專趨人之急、以急抵公者、未嘗辭。族有五喪、積年不能舉、命其子邁一日辦之。蓋公之于書、無所不觀、亦無所不學、屬文敏贍、下筆不能自休。書記翩翩千里如對面語。見之者把玩無斂、爭藏弃爲榮。著義語及詩文七十餘卷、藏于家。妻董氏封碩人。子邁承務郎、傳公學。次未名、生公卒之某月。邁以建炎二年十月辛酉、葬公樂平縣嶂嶺原太夫人塋之左、從公卜也。嗚呼、士方平時、劇談

抵掌、以禍福死生自任、而謂人不能此直易耳。及一旦臨利害、僅如秋毫、鮮不喪厥心而移其所守。若夫規以身免而推禍于人者、比肩接迹也。聞公之風者、亦可以少媿哉。藻少以同郡登公之門、知公之詳、宜莫如藻。邁以國子司業程瑀之狀來請、謹叙公之平昔而系之以銘。銘曰、

惟祝融之苗裔兮、公鼻祖曰伯休。越漢唐而南徙兮、家洎川之上游。天旣予公以修能兮、又重之以姱節。冠切雲而事君兮、景忠精之前哲。氛祲忽其蔽日兮、神龍蕩而失淵。衆憚殃而追禍兮、公踴躍而直前。左櫓槍而右翼、公胡獨罹此患。苟殺身而成仁兮、齊死生于夜旦。紛衆美曾不概見兮、獨令名其庶幾。偉蕩陰之節死兮、吾將從昔賢之所歸。

汪藻撰 《浮溪集》卷二四

宋故左朝散郎通判安肅軍林君墓誌銘



君諱某字無惑福州長溪人。曾祖仁珙祖昱父雄皆隱德不仕。父以君通朝籍累贈承議郎。君自幼童知好學刻意鑽研礪志寒暑飢渴久之自以聞見不偉慨然出求師。時太守蔡公襄大開學校延四方豪英而鄉先生陳公烈起處士爲學官士類益集君往從焉。先生每日夜聞君誦書策勵群弟子必以君爲言且相器重。元豐初爲太學生十年聲名日彰。司業朱公服覽其藝文以爲有柳柳州氣骨。又喜其莊重有常處以職事曰勉之爲餘子矜式。累試春官輒不利。至元祐六年始登進士第授溫州瑞安尉。未赴相繼丁內外艱服除調臨江軍司法參軍議法平允爲老吏所服。再調邵武軍司戶參軍皆兼學官。移建州松溪令政治不煩悉出愷悌。歲旱飛蝗被旁邑獨不入松溪境。邑人德之欲以聞部使者君謝止之曰使我得名如他邑何。終更士民遮道不得去者累日。尋授泉州晉江

丞再授建州甌寧令。甌寧負郭當道路之衝民剽悍健訟最於一路。食且朝造郡守使者歸聽民訟未竟或當食放匕箸出迓客無虛日。君不自以爲勞事益精密。夜秉燭省案牘不一以諉吏。威信並行盜爲出境囹圄屢空。使者交薦之御史中丞吳公執中以君治行聞于朝不果召。已而用薦改宣教郎知湖州歸安縣。君爲歸安甚暇且教且治之民不忍犯。歲潦民流有聖旨賑濟君擇地爲茆舍區處之適溫涼燥濕之宜視食飲淹速之節所全活甚衆。使者上其事減考功格三年轉奉議郎再轉承議郎權宗子博士。以年高請補外除通判安肅軍。待次京師聞大將開邊君曰此胎禍也吾不應及其難亟買舟還鄉築室於故園與親舊賓客舉酒相樂論者高之。轉朝奉郎賜五品服。遇淵聖皇帝登極恩遷朝散郎。以某年某月某甲子終於新居享年七十有一。以某年某月某甲子葬於長

松比明宗佛寺之旁、蓋君所自卜。娶同邑周氏、有賢行、先君十五年卒。男二人、曰聲、曰仰。三女、長適右迪功郎王旁。次未嫁、與子聲皆早亡。幼適鄉貢進士周直亮。孫一人、曰同仰、今爲右修職郎、袁州宜春縣尉。君孝于親、義于鄉黨、天姿粹然、金玉人也。鈎貫經術、善屬文、於詞賦詩章尤工。後輩從君學者、皆有軌則。有文集若干卷、藏於家。其待人一本於誠、所治三邑、去皆見思。嘗語仰曰、吾居官無以踰人、獨小大之獄必以情、有不安者、蚤暮以思、未嘗敢忘於心。吾老尙何求、以是遺汝耳。在歸安時、余以邑子見君、君相遇甚厚、因獲與仰遊。仰訪余於里間、民吏驚曰、是長官兒耶、我輩不之識也。蓋始出而從吾遊、其審慎而畏謹每若此、使余心愧焉。仰嗜學能文。仰父既葬、君若干年、復見余於會稽、則論議益富、文益工。其後以書抵余、求爲君銘、所不得辭。銘曰、

正而樸、匪讐匪斫。安且舒、惟仁是居。獄政慈祥、有苾其芳。以遺其子、天其勿忘。

劉一止撰 《苕溪集》卷五〇

資政殿學士許公墓誌銘

國朝自宣和之季、戎馬生郊、神州板蕩、起灰塵、投天隙、身都將相、無益於斯人、而沒於牖下者、何可勝數。其間才術德度、自結主知、有意於當世者、不過二三人、而會遇之際、僅得以聲名自終、何其艱哉。若永嘉資政許公、乃其一也。公諱景衡、字少伊。其先長沙人、七世祖贊避五季之亂、徙居溫之瑞安縣。至公遂爲名家。公兒童時、氣質端重、鄉丈人異待之。中紹聖元年、進士第、在選調久之、以廉勤守職、不爲因循苟且。出入京師、足不一至貴要之門、識者期以遠大。大觀中、大臣有知其名者、用爲勅令所刪定官。歲滿書成、遷承議郎、丞少府監。久之、乞外任、除大名少尹。未行、改通判福州。州將不



事事公悉力佐之、郡賴以治。終更、請奉祠館、得之。明年、宣和庚子歲也、以監察御史召、既至、除殿中侍御史。寇起東南、詔兩浙、江東路權免茶鹽比較、賊平、有旨仍舊。公論奏以爲、茶鹽人所日用、當視食之者衆寡以爲歲額高下、今被兵州縣戶口減半、而茶鹽歲額必使與舊比、東南赤子、何以堪命。奏三上、卒從公言、燕山之役、童貫爲大帥、公力論不當用、且列其罪數十條。又疏譚積罪大罰輕、時論譴之。燕山役不已、誅求益甚、公上疏論財不足當節用、民已困當厚恤之。元豐左藏庫月支約三十六萬緡、今費一百二十萬、非舊制者可減、營繕諸役、花石綱運非舊制者可罷。凡吏員以點檢文字祇應準備爲名、及伶官伎藝待詔之屬、因事增置、祿費尤多、與夫無名之功賞、非常之賜予、僥倖之請求、宜一切省絕。常賦之外、又以買糶爲名、與其他抑配者不可一二數。監司督責、州縣促辦、百

姓破產者相屬、爲民父母、豈不惻然加恤乎。王、蔡方擅政、公言、尙書省比闕長官、而同知樞密院亦久不除、雖近例以三公通治、然文昌政事之本、樞密總兵之地、各有任屬、安可遂虛其位。況近年賞罰僭濫、官吏猥多、奸賊狼籍、財匱民困、軍政縱弛、邊備不嚴、陝西諸路地震彌月、京東淮東積水害稼。此正敷求輔佐、振舉紀綱之時。望博攷公議、慎選忠賢、以補政府之闕。黼素已惡其多言、至是大怒、陰以他事中傷逐之。淵聖皇帝嗣位、即以左正言召、而中執法陳引親避嫌、遂改太常少卿兼太子諭德。至不閱月、召試中書舍人、賜三品服。入對、上曰、朕在藩邸、已聞卿名。公感動上書論人君心術及政事缺失甚衆。上方信向、會臺諫官李光程瑀以直言忤大臣耿南仲意被斥、公爲辨明。時過庭爲中書侍郎、公復引嫌、南仲并惡之、乃誣公視大臣進退爲去就、罷之、與宮祠。未幾淵聖開悟、有

旨召還。屬城守內外隔絕。今上登極之八日。遂以給事中召。至則除御史中丞。病暑未及朝。聞東京留守宗澤爲當路所忌。將罷去。公即具奏言。澤不可罷。狀事遂寢。時敵初渡河而北。車駕駐南都。公十上章請東幸。時浙西軍變。朝議欲招安。公言宜遣兵討之。今官吏百姓被塗炭。而作亂者反受爵命。非政刑矣。凡六論奏。迄如公言。又論方今人才未備。而政事不立。意欲節浮費。輕賦役。慎命令。明賞罰。平寇盜。嚴武備。汰奸貪。抑親黨。伸公論。以革往時之弊。悉蒙嘉納。黃潛厚以宰相兄爲戶部尙書。公極論其不可。潛厚遂罷。而猶以延康殿學士領財計。公論之不已。上由是益知公可任。拜尙書右丞。公旣受命。獨念天下方多事。欲調和同列。以求濟。已而嘆曰。調和不可爲也。則請問爲上端言之。時大臣有議改鈔法者。公曰。國家號令失信於天下垂三十年。而鈔法最甚。尤而效之。奈何。議者

中格。有嘗爲從臣爲敵人草表者。宰相以爲有文。欲復使典制命。公曰。是大辱國。此而可用。孰不可用也。卒止之。惡宗澤者毀之不已。公曰。澤忠義之節。居守之狀。非特臣能言之。東都宗廟所在。北抗強敵。責任不輕。必欲易之。非左右大臣不可。謗者默然。故迄公之去。澤賴以安。車駕幸廣陵。河北山東相繼陷覆。公言。敵勢方張。京師旣未可歸。此非可安之地。宜及時移蹕建康。限以天塹。據帝王之宅。保障東南。經理淮泗。倉卒無不及事之虞矣。懇懇爲上下言之。宰相以議非己出。極力排沮。公遂請去。至於再三。志益確。上不得已。以公爲資政殿學士。提舉杭州洞霄宮。公罷政之明日。宰相遂下還京之詔。公以爲深憂。行至瓜州。遇疾薨。寔建炎二年五月二十日也。享年五十有七。上聞之驚愕。詔贈五官。其子世厚以明年某月某日葬公於瑞安礪塘村下灣之原。曾祖俚。祖薄。父球。追贈東宮



三少。曾祖妣王氏、祖妣陳氏、母何氏、昌元、義和、永嘉郡夫人。公初娶陳氏、贈嘉興郡夫人。再娶胡氏、封齊安郡夫人。三男。世厚、迪功郎。女七人。長曰端、適文林郎、前婺州錄事參軍蕭振。季女章、適進士趙蒙孫。曰臺、曰中、尚幼。餘並早亡。孫男曰疇、曰峻。公幼喪母、長事父孝。少師公喜飲酒、好客。公手自製麴蘖、臨醞釀。居喪毀瘠、蔬食不浣垢、廬於墓者終三年。性不喜飲、它日遇名酒、未嘗不惻然思其親。與兄景亮、友弟尤篤。景亮試禮部、病卧逆旅、公時爲河間尉、聞之、即日棄官來省。兄死、事嫂謹慎、悉推家財予之。姊孀居食貧、析屋分田、割祿以養之。終其身。孝弟慈祥、忠厚樂易、恂恂然爲君子長者。鄉人化其德、搢紳推其賢、而萬乘信其忠。其師友淵源、蓋有所自也。平居與人言、如不出諸口。至其行己臨事、則毅然有不可回奪之操。方宣和間、窮奢極侈、虛內以事外、邦本將蹶、天下寒心。公卿

方導諛以爲太平之盛觀。公居言責、首陳節用、固本以救時病。自中常侍用事、文武將相皆出其門、無敢忤者。公乃誦言於上、視之如無有。故雖仕於當時、用亦不顯。而四海知其名。及靖康中、黃門大臣異論肆行、呼吸阿好、不次而用之、彈斥不附己者。公保正拂邪、從以去國、而名益重。晚受主知、擢長憲臺、與聞國政、直言讜議、不畏強禦、精忠懇到、以感動天意、祈於有補。不求赫赫之名、天下倚望。卜濟否焉。若假以歲時、贊襄彌縫、獲盡其心、則息禍亂、佐中興、必有過人者。權邪抑之、天又奪其年。嗚呼、可悲也已。公事三朝、所言於上者、退不以告人。故傳於世者少。而世以盡言歸之者、以公誠寔不自表暴、而共知事君之有犯而無隱也。有文集三十卷。既葬之七年、其子世厚以公行事狀、不遠數千里來請銘。以予知公之深、累請而益勤。予固不得辭、乃序而銘之。銘曰、

顯允右丞學有正聞。踐修厥德勁直而溫。逢時之衰志在濟物。言期有補終以不紕。出入三朝清議隆洽。遂聞大政。天子嘉納。先事而謀。措國於安。進賢是急恤民是先。邪說盛行。徒得公重。和而不同。仁者之勇。顧思其時。如涉川水。亦未克濟。舟楫傾墜。公以讒擠。隱憂而疾。殄瘁興哀。天不可測。考行無愧。雖亡猶存。曷庸信之。其在斯文。

胡寅代胡安國撰 《斐然集》卷二六

方聖時墓誌銘

方君聖時諱煜永嘉之賢者也。其父端嘗以文行為歐陽文忠公所器重。不幸蚤死。君生未晬而孤。稍長知自讀書。涉獵文史。論議衮衮可聽。獨於科舉之學非所好也。大觀初詔求行義之士。州縣以君應選。固辭。及鄉大夫款謁延致於學。以表多士。則悠然從之。殆古之有道不可得而親疏者。居常蓬鬢垢面。敝衣糲食。勞不坐乘。暑不張蓋。他人所

不能堪而處之裕如也。自號愚迂翁。而朱君敏功贊之曰。顏子之愚仲尼之迂。既愚而迂。嗟乎斯名也信不誣。觀今之人。馳驚聲利。役役至于老死。而閒居野處之士。澹然無營。志安而體舒。較之兩者。不知孰爲愚。孰爲迂。當有能辨之者。妻朱氏有賢行。前君二十五年卒。生子三人。曰冠。曰覽。曰峴。冠吾同舍友也。屢試春官不利。而志愈勵。女四人。荆湖北路提刑司檢法官薛昌言。鄉貢進士王言。處州松陽縣令黃袞。其壻也。季未行。君年七十有二。紹興十三年正月庚寅卒於家。是年某月某日。穿朱氏之墓而合葬之。實在其縣竹浦之北山。君性真率無矯激。與之友者。數十年不見有一言之僞。出入里巷。見童稚若皂隸。悉與均禮。沒之日。往往爲之出涕。其平日所游從與夫後進之士。嘗質疑而問業者。尤所傷悼。相率奔弔。爲文以哭之。其略曰。君之至行。里閭是師。如彼圭璧。瑩絕瑕疵。又曰。



儒藏

宋儒碑傳集 卷七九

溫溫先生、不事緣飾、和懌曠達、見者悅懌。又曰、先生詩文、匪雕匪琢、追陶自然、似白不俗。嗚呼、吾何以銘其墓哉。視鄉人之評可也。濟南林某撰。

林季仲撰 《竹軒雜著》卷六

校記

①出：原作「召」，據嘉靖繆補之刻本《南軒先生文集》改。

②左：原作「在」，據右引改。

③忝：原作「添」，據右引改。

④公：原無，據《新安文獻志》卷六四補。

⑤復：原無，據右引補。

⑥元豐：原作「元愷」，徑改。

⑦食且朝：疑有誤。

⑧芟舍：原作「芟合」。按芟舍，草野臨時止宿之所，見

《周禮·大司馬》。「合」字誤，徑改。

⑨三男：據文意，疑作「一男」。

宋儒碑傳集卷八十

葛勝仲 蘇過 王綱

宋左宣奉大夫顯謨閣待制致仕贈特進

諡文康葛公行狀

曾祖惟甫、故贈吏部尚書。曾祖母吳氏、贈陳留郡太君。祖密、故任承議郎致仕、贈通議大夫。祖母陳氏、胡氏、皆碩人。父書思、故任朝奉郎致仕、贈少師、諡清孝。母侍其氏、贈秦國夫人。公諱勝仲、字魯卿、其先嬴姓、夏后世封國於葛、春秋時嘗見於經、其後子孫因以爲氏。漢魏之世、著籍廣陵。唐天祐中、有諱濤者、避孫、楊連兵之禍、徙江陰家焉。其子虧、太宗時以高年有德、賜爵公士。生詳、隱居不仕、於公爲高祖。娶焦氏、是生尚書。至通議、清孝皆以進士擢第。通議早歲歸休、爲鄉人所宗、而清孝居官奉親、清德孝行著聞、旣卒、邑狀其事、諡於州、州聞於朝、詔特賜諡清孝。公幼警敏、日誦書數千言、九

歲能屬文。初、清孝篤志孝養、未暇爲公擇師。一日、公白清孝曰、某人不足以爲某師。清孝駭問其故、公徐於袖中出文藁、清孝遽取視、則語盡驚人、而師所竄定皆非是。乃笑而領之、遂爲公易師。清孝嘗與客論文、偶有遺忘、召公問之、酬答如響、一座嘆異。自是賓朋會集、必使公侍左右。年十五而學成、於經史無不精通。年十六應開封舉、中其選。年十九丁內艱、二十二再試開封爲第四、主文歐陽叔弼見其封建策、愛歎之。紹聖三年復預開封優選、明年試南宮。時再用經義取士、知舉文節林公希謂公遽於經旨、乃擢置高等、遂登是歲進士第。朝廷方興律學、公居學纔閱月、於法令貫通若素習、試爲第一、國子監上其程文、乞旌擢以勵衆。元符二年、調杭州右司理參軍。杭爲浙右都會、民俗繁夥、多鬪訟、狴犴往往充斥、而吏皆大姦宿賊、舞文市獄、無所顧忌。公自以儒生且年少、恐其易己、



乃痛繩以法、而於鞫獄必委曲詳盡。囚感公哀矜、咸吐情無隱。旬月間滯獄一空、吏益畏憚不敢肆。皇祐中、有司理某者以院吏名次高下立爲定格、每視役之劇易悉以序授任、循用既久、吏持必其上、莫有懲勸、事多不集。公暇日取其格視之、謂群吏曰、此非若衙規有成法不可動、顧前官可爲吾何爲不可改。索火焚棄不用、衆皆譁、公屹不變、遂一以能否勤惰爲升降而任劇易。於是人人競奮、事無不理。府帥豐稷知公爲一代偉人、累薦於朝、事皆倚公而辦。先是、福州有士族不肖子、因醉酒與其徒凡三人出郊、偶見巨商行支徑、隱關征者、即詐爲捕稅吏執之、商窘甚、以賂得釋。已而病死、其家乃以遇劫盜聞於官、獲其二、即抵法、獨逸其一、跡捕至杭得之、繫州獄。前官以其黨既伏誅、謂是囚亦當死無疑、鍛鍊成之、獄具未決。公至、得其情曲折、移牒福州、請收商家詰問、果辭窮、自言實

誣告、遂直其冤。衆皆服公之精明。文節公赴召京師、陰求天下奇士、一見公、謂曰、君文詞經術宜爲當今模範、獄訟冗職、柰何久居。因薦試學官。元符三年春、公以詩書禮三經試於有司、又試宏詞、二科俱爲第一、特遷河中府知錄參軍、改登仕郎。士林歆艷、見其文以爲不可及。公之華問自是彌大矣。建中靖國元年、除兗州州學教授。亮故先聖國師儒之任、朝廷不輕畀、以公有重名、特命焉。公居職益自勵、日與生徒談經論文、孜孜不倦、人得所未聞、心咸悅服。鼓箠踵堂者輻輳、至黌舍弗能容。公乃移書部使者丐錢、悉撤其舊、擴而新之。且豐其餼廩、學校之盛遂冠一路。崇寧二年、始行三舍法於天下、朝廷以太學首善之地、故除授學官非第一流人不在選。除公學正。清孝喜謂公曰、士積學非獨爲己、蓋將淑諸人、汝其勉旃。清孝自謝事高卧、未嘗出閭門、公因力請迎養、從之。公官卑祿

薄且處桂玉之地、日營滫瀡之奉、極其誠至。崇寧三年八月、以薦者遷文林郎。是歲天子幸太學、公奏賦數千言、時四方文儒之士上歌頌文章者以千計、徽宗皇帝命中書省第其優劣、公居其首。十一月丁外艱、執喪哀毀過制。既舉大事、貧甚、無以贍其孥、至全家食粥、終喪未嘗飲酒茹葷、居苦廬、閱釋氏所謂大藏經者盡其卷帙。大觀元年五月、用幸學恩循承直郎、差充提舉議曆所檢討官。是冬天子祀南郊、文武官通朝籍者例皆得封贈、公以檢討在職、若滿半歲則於格當改奉議郎、預計其日適在歲事之後、乃拜章乞減秩一等。及大禮前授命、朝廷嘉其孝、特改通直郎。由是恩霑泉壤、鄉里榮之。八月、除知大宗正丞事、檢討如故。始、朝廷以從臣提舉議曆所、至是俾郭天信代之、公深惡其人、弗欲與共事、謂之曰、是局既易長、則其屬義亦不可留。堅請引退。天信曰、公譽望如此、豈久

爲檢討官者、苟能暫屈相從、正字指日可得。公曰、富貴在天、儒者但當顧義耳。明日抗論於朝、力丐罷。天信聞之大怒。公請不已、併乞罷宗正職。上喜其不可奪、特許罷曆局、搢紳稱其難能。二年、以皇帝受八寶恩、轉奉議郎、仍加武騎尉。宗室仲瑑妄議學制、公劾之。上喜公能舉職、特轉承議郎。三月、除秘書省校書郎。五月、遷尙書考功員外郎、以親嫌改禮部員外郎。時方承平、四方上符瑞者、還至公掌南宮牋奏、或日草數牘、曾無滯思。時人服其敏而工。三年六月、磨勘轉朝奉郎。八月、以議廟制與時論不合、責知歙州休寧縣。歙地多巖嶮、其民狠復健訟、歲斷大辟以百計。在江東號最難治、而休寧尤甚。故諺稱鑊湯滾處、銓曹選注、無願往者。攝官歲久、弊滋甚、益不可爲。公初至、命吏於大辟中恣取其一旦親決、吏選久可疑者、案牘數千紙、俾兩人舁至、欲因以困公。公閱視不移晷、呼獄吏



曰、於若干紙外亡去一節、是必汝所匿。吏駭汗失措、度不可隱、迺於其舍故牘中出之、果皆中款情要。吏叩頭曰、囚罪本不至死、某故當以死、其所匿一節乃囚自白明甚、懼令平反、故匿之。公引囚覆問、皆合、因釋囚而正吏罪。一邑以爲神明、曾未踰月、囹圄告虛。公之始謫也、衆皆謂公必不行、既至又謂公必不事事、及見公視職甚謹、雖細務檢飭必親、簿書錢穀悉井井有條次、無絲忽不治、然後歎公之才有餘而度量宏遠也。每聽訟必先爲民辨曲直、已乃從容告以慈孝禮遜之節、恂恂然猶父兄之詔子弟、民多在庭中感泣、願息所爭、由是獷俗頓革、鬪訟衰止。暇日攜賓友登覽泉石、吟咏酬唱、略無遷謫之歎。考課爲江東第一、外臺列薦諸朝。政和元年磨勘轉朝散郎、加雲騎尉。三年復召爲禮部員外郎、以預議元圭轉朝請郎、未幾遷吏部員外郎。四年擢國子司業。時興學久、成均之

士爲文轉相模倣、率一律、公恐其漸入卑陋、每考試必取卓然不群者置之上列、文格翕然大變。士相慶以爲得師、質經叩疑者屢滿戶外、幾無食息之間。其爲當世推重如此。朝廷命諸生習雅樂、樂成上御崇政殿按試、大悅。學官皆增秩一列、轉朝奉大夫。七月、以公在吏部編脩大使臣名籍成、轉朝散大夫。九月、遷太常少卿。皇朝自建隆至治平初所行典禮、歐陽文忠公嘗哀集刊定爲書凡百篇、號太常因革禮。及是朝廷以公明習典章、俾續其書。公自治平迄政和四年、用文忠公條目纂錄爲三百卷、於是五十年間禮文之事粲然在目。書成、上覽而嘉之、使與前書併藏太常焉。五年、初建太子府、以公兼太子右諭德。公每見太子、未嘗不言治心修身之要、且以仁、孝、學三言各著一論獻之、勉之使進、於是大蒙嘉納。復采春秋戰國以來歷代太子善惡成敗之迹、日進數事、既久遂成一

書號承華詔嫩云。九月、磨勘轉朝請大夫。六年七月、移太府少卿。時盛章以諂媚權貴驟用爲開府尹、勢傾中外、忽遣其子并謂公曰、外府左遷、士論甚鬱、某能爲公即還舊物、其許之乎。公正色曰、進退百官、當自宰相、某雖不佞、顧安肯由他岐進、以重速戾哉。并歸以告、章大慙、遂與公爲仇。識者聞而譴之。除國子祭酒。七年遷大司成、以前任司業訓導高麗生有勞、轉朝議大夫。公慨然語家人曰、吾自布衣致身侍從、受國厚恩、當圖報效、前此位卑、不敢越職論事、今豈宜緘默。乃數求對、言天下治亂大計、且陳時政得失。雖歸削藁、不以示人、然貴要咸怒切齒、公由是不能自安於朝矣。俄落職提舉江州太平觀。宣和元年、朝廷明公非辜、復右文殿脩撰、仍改宮觀、作自陳、繼除知汝州。國初京西多曠土、寶元、康定間特輕其賦、募民墾闢、歲久地無遺利、而民益富饒。政和初言利者始獻議增

稅、民已不能支、其後宦官李彥爲京西之民率盜占官地、括其田而歸之官、號西城新法、由是破產者比屋、有朝爲豪姓而暮乞丐於市者。公下車數月、會彥至、一境騷然、苛暴肆行、人多逃匿以避禍。公見彥垂泣曰、某任郡寄、當爲天子牧養斯民、而坐視其離散如此、深所不忍、願公稍霽威嚴、退而條具不當括者數千戶請蠲之。彥大怒曰、是欲沮壞西城新法耶。草奏劾公。朝廷壯公敢爲、寢其奏不行。自茲西城及貢奉之事專委通判、而彥亦不復再至州境矣。二年、磨勘轉中奉大夫、加丹陽縣開國男。大河歲脩、埽岸費稍草不貲、皆取辦旁郡、而汝獨倍、民大困不堪命。公喟然嘆息、上疏乞免、且令民緩輸待命。轉運使怒不及期、符檄督迫曰、峻、公奏免益急、僚屬惶怖不知所爲、公慰撫之曰、諸君第勿書紙尾、某當獨任其責。頃之詔允。積年重斂一朝而除、民叫歡交賀、家家畫公像、歲時率



子孫環拜相語曰、微葛公、吾儕非餓死即流徙異鄉、能復自保於此乎。前太守常建言、汝州崆峒山實黃帝問道之所、宜築宮奉廣成子。既得請、則竭力以事土木、工未究罷去。及公至、主觀道士出大言脅公促繼前役、公叱之曰、歲饑民匱、可困以不急乎。即上疏乞須豐登、有旨特從。公之內剛不畏彊禦多此類。三年、復顯謨閣待制。四年四月、磨勘轉中大夫。七月、轉太中大夫、徙知湖州。是行實過闕、例得入覲。時親黨當國、將爲燕山之舉、公先以書遺之、其略曰、方今東南靖息、西北歡盟、相公之功業可謂大矣。然天下無事則宰相安、宰相生事則天下危、願相公享宰相之安而無使天下危也。省書不悅、乃畫旨令便道之任。公之未至湖、已聞有黠吏數輩持郡將短長肆爲不法、及視事數日、盡得其姦賊、流放之、闔郡稱快。燕山之役既興、國用益屈、乃科免夫錢於天下、輸後期者俾以軍法

從事、民大驚懼。時浙西連歲水潦、公持檄憂形於色、顧其佐曰、方茲艱食、何堪重斂。議減其半、衆爭諫以爲不可。公曰、苟利於民、死非所憚。卒奏減之。前此浙寇方臘起青溪、既破睦陷杭、湖與杭接壤、無賴輩乘時相劫掠、州縣兵單弱、弗能禁、乃便宜使土豪捕擊。有愚民無知、因平昔纖芥、遂誣其鄰以叛逆、殺數人。及事平、鄰家訟冤、有司推治、連蔓不已、因以求貨、無辜逮繫者百餘家。前二千石踰年不能決、公究問、則其首二三人皆瘐死久矣、即日決遣之、歡騰市里。宣和六年、移知鄧州。公之在湖、朱勔嘗求鵝鴈、白雀之屬、公拒之甚峻、勔銜公入骨、由是橫加媒孽、遂落職提舉江州太平觀。七年、加開國子。靖康元年、以淵聖皇帝即位、覃恩轉通議大夫。冬、公寓平江、敵人再攻東都、圍甚堅、四方音問莫通、公憂懣殆廢寢食。旋聞二帝北狩、西嚮號慟、白郡守曰、公當帥師勤王。又曰、元帥在濟

南以表勸進不可緩。因呼左右索紙筆立草數百言。俾守即遣官持詣元帥府。詞旨懇切。讀者流涕。及上即阼。一時人士皆爭爲攀附計。而公未嘗一語及之。建炎元年。覃恩轉通奉大夫。四年復集英殿脩撰。再知湖州。自庚戌歲敵人蹂江浙後。盜賊蠭起。破州縣。殺官吏。人情恟恟。朝不謀夕。公於是邦遺愛素著。民見公復來。歡迎蔽路。會劇賊邵青大緝舟楫。欲由江路入太湖。窺伺湖州。聲勢甚張。公乃繕城郭。蒐卒乘。作水戰艦數百艘。以綵幟別其隊伍。教之陣法。日親閱試。而加賞罰。士皆精勇可用。又命郊外團堡社。明斥埃。以堅防守。民恃以不恐。時高彥、張琦復相繼擁兵入安吉。長興界。公遣其屬李咸統兵與之力戰。獲首級甚衆。賊鋒旣挫。且聞有備。一夕而遁。邵青亦望風引去。有頃。孫誠於烏墩鎮殺傷官吏。居民散走。公亟遣單騎諭以禍福。恩信。賊徒乃相戒曰。葛使君至誠。吾儕聞

之舊矣。即投戈就降。安吉頑民施四九見群寇洊至郡境。因起爲盜。旬日間嘯聚千衆。鄰邦皆震恐。公選將校之驍勇者俾統兵授以方略。直擣其巢。遂生擒誅之。餘衆奔潰。皆縱不問。將吏請奏功。曰。捕盜守臣職也。何功之有。終不自言。是歲大饑。米價翔貴。一斛踰萬錢。餓殍相枕藉。公旣發官廩。又輸己穀數百斛遣官吏賑給。右姓見公憂勞惻怛。復爭出穀爲助。傍郡之飢者聞公荒政。咸襁負而來。至無以容。乃自城邑及郊野命闢僧舍若亭驛以處之。薪釜營藉之屬無一不備。蒙全活者不可勝計。建炎初。梁端守是州。嘗獲謀叛軍人童照并其黨數十人。被加職之褒。告者張成、沈賓皆命官人咸慕之。至是復有將校告其營卒有謀叛語。意公必樂聞。而已因受上賞。公夜半披衣集官吏訊治。則營卒醉卧猶未醒。公知其誣告。笑曰。吾豈肯殺無罪而利己乎。遂錄付獄。果無迹狀。因坐誣告



者徙之旁郡。有劉惇者自稱明節皇后弟、官承宣使、所至郡府皆接以禮、盜請俸錢積數百萬。公一見與之言、覺其詐、即加收治、一問而服、乃開封捕盜使臣也。紹興元年六月、轉左正議大夫。冬、復顯謨閣待制、提舉亳州明道宮。公在郡留心庶政、事雖甚微、亦不輕委其屬、視其民如恐傷之、有利立行、有害立去。邦人愛公如父母、出境之日、民挽車號泣、祖送數十里不絕。至今言及公、猶以手加額、頌歎不已。五年、加開國伯。七年、加開國侯。九年、磨勘轉左正奉大夫。十三年、加開國公、食邑自三百戶累封至二千戶、實封一百戶。公官京師二十年、遍歷華貫、而在太學之日爲多、自學正以及長貳、皆天子親擢、每歲禮闈試貢士、必使公預。方是時、群試者幾萬人、公考其文於數句中、輒知其學之淺深、是以多得天下奇士。於書無所不讀、一過目則終身不忘。研窮經旨、雖通顯猶不輟。祁寒隆暑、

手不廢卷、議論常出諸儒意表、學子得其說、爭抄錄藏去。其誨人則必先德行而後詞章、故諸生皆知自重而耻麗於罰。每薦士必觀其器識而後剡奏、其所推引位輔弼、禁從臺閣者比比相望、天下論知人必以公爲稱首。其爲文汪洋雄健而復精深醇密、衆製各自有體、大抵悉極其妙、所謂不煩繩削而自合者也。於紀事尤不苟、凡子之葬其親、非得公文識墓則必歉然。其爲詩清麗有句法、與賓客登臨宴賞、即席援筆立成、文不加點、坐者莫不驚異嗟服。公在孕時、其母夫人夢鳳凰集於庭、已而生公、人知其爲文字之祥。及中兩科歸、清孝公又夢歐陽文忠公授公以巨硯、自茲公文益進、遂以文章名海內、夫豈偶然也哉。公爲人開蕩而樂易、遇物盡誠、勇於義、若嗜慾不靳財費、賙人之急惟恐不及。從弟濟仲貧甚、以郊恩官之先其子。族女之孤不能自存者、則爲具奩奩、選婿歸之。江

陰歲租悉推以畀同產。其仕於杭、堯也，得俸不敢輕用一毫，菲衣糲食，寸積銖累，以嫁二妹。早年與長兄司成俱仕輦轂，飲食燕游須臾不暫捨。宣和辛丑歲，司成不幸，而公方守汝陽，爲位哭之，盡期而撤，復推己俸贍其孤。晚與仲兄工部居故里，公築堂山水佳處，名以二老，且日致珍異甘膳爲奉，探其志而先之。其友悌蓋出於天性，鄉閭慕而化之。居官清慎，所至必增市估之直，敕家人非飲食日用之物不得輒市於民。雖游宦四方而不知其土地所產，於奇器異物珍玩之具一無所好。臨事敢爲，不畏禍患，以白黑太分屢爲權倖所中，雖數齟齬處之恬然。或問其故，公曰：「吾道固當如是，又何悔？」四爲二千石，綽有古循吏之風。御僕妾亦以恩禮，未嘗妄加鞭箠，有不當意者以微言愧之而已。自稱^①爲湖州，適時多艱，疲於應接，慨然有退休之志。旣遂奉祠之請，乃築室寶溪之上，山水環湊。

名人魁士杖策造門，公爲之賦詩飲酒，樂而不厭。客去則觀書著文，優游閒適凡十有四年。與子孫講論文藝，朝夕不置，閨門之內，弦誦相聞，彬彬若庠序然。有文集八十卷，外集二十卷，又取諸史考證異同，發摘秘隱，褒善貶惡，皆古今名賢所未到者，別成一書，號考古通論，合若干卷。尤喜釋氏書，謂與吾儒同道，究其奧旨。每宴坐，凝然終日，或至夜分不寐。易簣之夕，數聞異香，索水盥手，合爪掌跏趺端坐，久之乃北首右脅而卧，薨於正寢。合夫釋典所爲如來涅槃相者。享年七十有三。時紹興十四年九月八日也。初，公屬疾，命左右上章告老，詔以左宣奉大夫致仕，及遺表上，詔又贈特進。旣捐館，吳興之民雖居深山窮谷中，聞者莫不泣下。此豈有以彊之然哉？蓋其感於中者深也。公之夫人張氏，金紫光祿大夫磐之女，而禮部侍郎滌之妹，有賢行。先公二十年卒，葬於江陰軍由里山之



原。諸孤以十五年九月壬申奉公之喪合葬焉。明年太常考功以公之行治言於朝曰、道德博聞曰文、安樂撫民曰康、宜賜諡文康。詔從之。於是人士益推爲終始哀榮者。嗚呼、公之仕則遇昌時而位三品、退則能自適而享壽考、生則爲大儒而見宗當世、沒則有易名以發揚潛德、亦可以無憾矣。然人猶以爲恨者、以公之所蘊者甚厚而所施者纔一二也。子六人、長曰立方、左朝奉郎、行秘書省校書郎、兼提舉秘書省編定書籍官、兼吳王益王府教授、兼權尚書考功員外郎、登紹興八年進士科。次曰立中、右迪功郎、提舉河北鹽香司幹辦公事。嘗試開封爲第五。而立器、立卓、立豫、立參皆早世。女三人、長適左朝請大夫、主管台州崇道觀許暘、前卒。次適左承務郎、監登聞鼓院劉封。次適左奉議郎、權通判紹興軍府事章倬。孫男五人、長曰郛、右迪功郎、臨安府於潛縣主簿。次曰郕、右承奉郎、

知建康府溧水縣丞。次曰邵、左承事郎、新太平州學教授。紹興十八年中進士甲科。次曰鄰、右承奉郎、臨安府鹽官縣丞。後公三年卒。次曰郕、右承務郎。孫女五人、長適右修職郎、監台州支鹽倉沈洵。次適右迪功郎章湜。次適左奉議郎、主管台州崇道觀張本。餘未嫁。曾孫一人、曾孫女三人。惟公始爲吳興、倬時方冠、拜公於稠人中、一見蒙器遇、遂歸以季女、獲從公遊二十餘年、故知公出處大節爲最詳。謹叙其事、泣以授公子立方、將求名世之士、篤古而達於詞者、表公之墓云。婿左奉議郎、權通判紹興軍府、主管學事章倬狀。

章倬撰 文淵閣四庫全書本《丹陽集》卷二四

葛文康公神道碑

文康葛公自元符末以文章名天下、登朝歷學校禮樂之任、至國子長貳。爾後二十年數躋終不苟合。宣和間親黨柄國、聲燄震中外、人謂公即大用

矣。公時已久詘爲郡、繇汝徙湖、聞將有燕山之舉、亟以書遺之、其略曰、今東南奠枕、西北歡盟、公之功莫大于此。然天下無事則宰相安、宰相生事則天下危。願公享宰相之安、毋使天下至于危也。是行實過闕、例得入覲。相省書不說、乃盡日令便道之官。未幾、燕山之役興、斂民間免夫錢以助軍用、急若星火、比屋駿懼。浙西仍歲水潦、公持檄蹙然有憂色。顧佐吏曰、吾民方艱食、奈何。議欲減其半、衆爭言不可。公曰、苟利於民、死且不辭。卒奏減之。公平生以氣節自負、議論鯁挺、未嘗一俯首爲貴倨下。雖位不補德、士大夫深惜之、然識者多其有守、以是尊仰焉。公旣沒十餘年、公子立方以墓隧之刻來請銘于某。某生也後、不獲游公之門。然頃以史事與纂修先朝實錄、見公出處大槩矣。又嘗讀公遺集及諸先生長者言、所聞蓋如此。今復得公之婿章侔所爲狀而考之、益不誣。銘不可辭、則

舉以冠其首、然後按公之世次官閥行治、掇其大者追序而顯論之。公諱勝仲、字魯卿。其先嬴姓、夏后氏封國於葛、後因以爲氏。漢魏之際、著籍廣陵。唐天祐中、有諱濤者、避孫楊連兵之禍、徙江陰家焉。其子彪、太宗時以高年有德、賜爵公士。彪生詳、公高祖也。隱居不仕。曾大父惟甫、贈吏部尙書。配曰陳留郡太君吳氏。大父密、承議郎、贈通議大夫。配曰胡氏、陳氏、皆碩人。父書思、以朝奉郎致仕、累贈少師。母侍其氏、秦國夫人。自尙書而下、三世踵登進士科。通議早棄官、悟性理之學、自號草堂逸老。少師以清德純孝聞。旣卒、州上其事、詔特諡清孝。公幼警慧、誦書日數千言。九歲能屬文、時出驚人語。少師異之。年十六、應開封舉、中其選。紹聖四年、擢進士第。律學方興、公游其間、纔閱月、于法令貫通若素習。一試即爲冠。調杭州右司理參軍。杭爲劇郡、多訟訴、岸圍往往充斥、吏習爲舞文市獄。



公至、痛繩以法、而於推鞠必委曲詳盡。囚感公之哀矜、咸吐情無隱。旬月間留獄一空。吏畏懼、不敢以儒生易之。府帥豐稷知公爲偉人、屢薦於朝。文節林公希赴召京師、一見公謂曰、君文詞經術宜範模多士、獄訟冗職溷君爾。因薦試學官。公以詩、書、禮三經試于有司、又試宏詞、俱第一。士林歆豔、見其文以爲不可及。公之聲聞自是彌大矣。除教授兗州學。公以充先聖國、益自刻勵、朝夕講學、訓諸生。人得所未聞、靡不悅服。鼓篋踵堂者輻輳、至弗能容。乃移書部使者、丐錢增闢而新之。且豐其餼廩。鄉校之盛、遂冠諸郡。入爲太學正、少師書謂公曰、士積學非獨爲己、蓋將淑諸人。汝其勉旃。公旣迎養、不以官卑祿薄、日營滫瀡之奉、極其誠至。上幸學、四方士獻歌頌者甚衆、公奏賦數千言、祕書省第名上之。公居其首。已而丁外艱、毀慼過制。終喪、屏酒肉弗御、閱浮屠氏大藏經、周其卷帙。服

除、爲提舉議曆所檢討官。是歲行明堂禮、官升朝者例封贈。公居職若半歲、則於格當改奉議郎、預計之適在秋享後、乞減秩一等、前期受命。朝廷嘉之、特改通直郎。由是恩及泉壤。繼知大宗正寺丞事、檢討如故。議曆所初以從臣提舉、至是郭天信代之。公深嫉其人、弗欲與共事、力求去。天信曰、公豈久于此者、能暫屈相從、正字指日可得。公曰、富貴在天、儒者但當顧義耳。遂罷曆局、縉紳稱公爲難能。除祕書省正字、遷尙書考功員外郎。以親嫌、改禮部。時郡國上符瑞者、逕至、公掌南宮牋奏、或日草數牘、無滯思。人皆服其敏而工。會御史中丞石公弼上言、僖祖原廟增置殿室、違元豐之舊、詔禮官議。公謂有其舉之、莫敢廢也。予而復奪、在常人猶難、況在天之靈乎。與時論不合。責知歙州休寧縣。歙在江東、號難治、而休寧巖邑也。民鬪狠尤甚。公視事、親決疑獄、洞見欺隱、姦吏不得肆。邑中

以爲神明。聽訟先與辯曲直。徐告以慈孝禮遜之節。民多感泣。息所爭。未踰月獄虛。課爲一路最。部刺史交薦之。更數歲。復召爲禮部員外。以預議元圭進一官。遷吏部。擢國子司業。公嘗患成均之士爲文率一律。恐其浸入卑陋。考試必取卓然不群者置前列。由是文格一變。諸生習雅樂既成。上御崇政殿按試。大悅。謂輔臣曰。士成於樂。可謂文物之盛。聲調與工師不同。手詔褒諭。增秩遷太常少卿。國朝自歐陽文忠公以建隆訖嘉祐禮儀沿革。纂成一書。凡百篇。號太常因革禮。至是命公續之。公用前書條目增脩爲三百卷。於是治平以後五十年禮文之事粲然在目。詔藏于奉常。太子府初建。以公兼右諭德。公每見太子。必言治心修身之要。爲仁孝學三論獻之。太子嘉納。復採春秋戰國以來歷代太子善惡成敗之迹。日進。數事久則成書十卷。號承華詔。云。徙太府少卿。盛章以諂附

權貴。驟用爲開封尹。忽遣其子并謂公曰。外府左遷。吾能爲公即還舊物。許之乎。公正色曰。進退百官。當自宰相。僕不佞。顧肯由他歧進以重速戾哉。并歸以告。章大慚恨。聞者躋之。除國子祭酒。遷大司成。賜對衣金帶。入謝。上曰。卿在朝不惟以文字著稱。實有靖共之操。且曰。觀每月私試程文。高下甚當。其爲上所知遇如此。公退而語家人曰。吾自布衣致身侍從。當有以報國。前此不敢越職論事。今豈宜默。乃數求對。言治亂大計與時政得失。貴要咸切齒。公自是不安於朝矣。俄提舉江州太平觀。宣和元年。朝廷明公非辜。復右文殿修撰。知汝州。京西多曠土。寶元。康定間。特輕其賦。募民墾闢。歲久地無遺利。而民益富。政和初。言利者始議增稅。民已不能支。其後宦官李彥謂京西之民率冒占官地。括其田而籍之。號西城。所破產者紛紛。或朝爲豪姓。暮乞丐於市。公下車數月。適彥至。大肆



苛暴人多逃匿避禍。公見彥泣曰、斯民離散、深所不忍、願公少寬之。且請蠲數千戶不當括者。彥大怒曰、是欲沮壞西城新法邪。草奏劾公、朝廷壯公敢爲、寢其奏不行。大河歲修埽岸、費稍草不貲、皆取辦旁郡、而汝特倍、民罷不堪命。公喟然上疏乞免、且令民緩輸待命。轉運使以不及期、督日峻、公奏免益急、僚屬惶怖莫知所爲。公慰撫之曰、諸君第勿書紙尾、吾獨任其責。頃之免符下、民叶謹交賀、畫公像、歲時率子孫羅拜相語曰、微葛公、吾儕非餓死即流徙異鄉、能復自保於此乎。前太守嘗建言、崆峒山實黃帝問道之所、宜築宮奉廣成子。旣得請、則竭力以事。土木工未究、公至、主觀道士出大言脅公繼前役。公叱之曰、歲饑民匱、可困以不急乎。即上疏乞須豐登、有旨特從。公之內剛不畏彊禦類如此。復顯謨閣待制、徙湖州。六年、又徙鄧州。公在湖、朱勔嘗求鷓鴣、白雀之屬。公弗與、勔

銜之。由此橫加媒蘖、遂落職、提舉江州太平觀。靖康之冬、金人再至闕、二帝北狩。公時寓平江、聞之西嚮號慟。白郡守曰、趣帥師勤王。又曰、大元帥在濟南、以表勸進不可緩。因呼左右索紙筆、立草數百言、俾守即遣官持詣元帥府、詞旨懇切、讀者流涕。建炎四年、復集英殿脩撰、再知湖州。自金人蹂江浙、盜賊蠭起、人情恟恟、朝不謀夕。民見公復來、懽迎蔽路。會劇賊邵青欲道江入湖、窺伺是州。公乃大修城郭、作戰艦數百、分部隊以綵幟別之、日閱試陳法而加賞罰。士卒皆精勇可用、民恃以不恐。賊望風引去。有頃、孫誠於烏墩鎮殺傷官吏、居民散走。公亟遣單騎齎樞密院旗榜招之曰、今日降、後自可得美官。賊徒相戒曰、葛使君至、誠不吾紿也。即投戈就降。是歲大饑、斗米踰千錢、餓殍相枕籍。公旣發官廩、又輸己穀數百斛、遣官吏賑給之。右姓爭出穀爲助。他郡之饑者咸襁負而至、公

於城內外關僧舍若亭驛以處之、薪釜管籍之屬無一不備、全活不可勝計。建炎初、太守梁端嘗獲謀叛軍人童照并其黨數十、被加職之寵、告者皆命以官。至是復有效之者、公察其誣、笑曰、吾豈肯殺無罪而利己乎。遂錄付獄、果無迹狀、因坐誣告者徙之、闔境肅然。公在郡能究心庶事、雖甚微不輕委其屬。視民惟恐傷之、見利害施罷不俟曰。適時多艱、疲於應接、慨然有退休之志。紹興改元、復顯謨閣待制、提舉亳州明道宮、乃築室寶溪之上、山水環湊、名人魁士杖策造門、公爲之賦詩飲酒、樂而不厭。去則觀書著文、課子孫習儒藝、商論不暫輟。閨門之內、絃誦相聞、若庠序然。尤喜釋氏書、謂其邃處多與吾儒合。有時禪寂宴坐、凝然終日、或夜分不寐、如是者十有四年。易簀之夕、數聞異香、索水盥手、合爪跏趺端坐久之、北首右脅而卧、薨于正寢。蓋釋典所謂如來涅槃相者。享年七

十有三、實紹興十四年九月八日也。爵丹陽郡開國侯、虛二千戶、眞食一百戶。階自通直郎以年若賞及致仕、十七遷爲左宣奉大夫。遺表上、贈特進。明年九月壬申、葬于江陰軍由里山之原。又明年、太常考功以公之行實言于朝、曰、道德博聞曰文、安樂撫民曰康、宜賜諡文康。詔從之。以其子立方列於朝、累贈少傅。配張氏、贈魏國夫人、金紫光祿大夫、磐之女、有賢行。先公卒。子六人、立方、左朝散大夫、前權尙書吏部侍郎。立中、右迪功郎、前河北路鹽香司幹辦公事。而立器、立卓、立豫、立參皆早卒。今立方知袁州。女三人、長適左朝請大夫、主管台州崇道觀許暘。次適右承務郎、監登聞鼓院劉封。次適左朝散郎、通判泰州章倬。孫男五、郛、右從政郎、臨安府新城縣丞。郙、左宣教郎、江東路轉運司幹辦公事。郇、左宣教郎、太平州州學教授。鄰、右承奉郎、湖州歸安縣丞。郈、右承奉郎、監潭州南嶽



廟郭邨嘗預國子爲名儒。孫女六、長適左儒林郎、臨安府司法參軍沈洵、次適右迪功郎、新饒州安仁縣尉章湜、次適左承議郎、主管台州崇道觀張本、餘未行聘。曾孫四、拊、縉、皆將仕郎、次尙幼。公問學敏博、書無所不讀、一過目終身不忘。研窮經旨、雖祁寒隆暑不廢。文雄贍而復精深醇密、衆製各操其妙、紀事尤不苟。凡子之葬其親、非得公文識墓則必歉然。詩清麗有句法、與賓客登臨宴賞、即席援筆立成、文不加點。坐者莫不驚異嗟服。公在孕、侍其^④夫人夢鳳凰集于庭、旣而生公。人知其爲文字之祥。及中兩科歸、清孝公又夢歐陽文忠公授公以巨硯、自茲文益進、信非偶然也。有文集八十卷、外集二十卷、考古通論六十卷、傳於世。公爲人閒蕩樂易、遇物盡誠、勇於義若嗜欲、不靳財費、賙人之急。從弟濟仲貧甚、官之先己子。族女之孤不能自存者、則爲之辦裝、遣擇所歸。租入悉推以

畀同產、於奇玩一無所好。臨事敢爲、不畏禍患。遭權倖巧中、屢致齟齬、處之怡然。或問其故。公曰、吾道當如是、又何悔。在太學爲師儒之日多、禮闈試貢士、必與考閱。公於數句中輟知其學之淺深、是以多得奇士。誨人則先德行、後詞章、故諸生皆知自重。薦士惟取其器識、凡所汲引、位輔佐禁從臺閣者相望、天下咸推公知人。四爲二千石、所至有惠政。治吳興、民愛之尤篤。去之日、挽車號泣祖送、數十里不絕。及聞其喪、雖深山窮谷中無不流涕。至今言公、猶以手加額、頌歎不已。嗚呼、天下無全才久矣。綴學之士、文豔用寡、或劣于任劇。至若嫻吏事、則類多舞智趨勢爲幸進計、不失節者幾希。如公以英儒發身、以循吏著績、而又能以介特之守卓然獨立於當世、可無憾于銘。銘曰、
葛爲名門、世禪厥文。祖也累科、雲仍其芬。自祖潛之、旣彌弗施。迨公發之、浩乎莫涯。匪殖斯學、惟得

之卓。實敏實博。先民而覺。甫登膠庠。載燁其光。勿毀勿荒。士式而臧。既屬既長。既究所養。終始不爽。承帝之獎。惟此吏道。治則弗擾。所試者小。吏之師表。勇于爲仁。仁行如春。我知愛民。遑卹吾身。汝鄧之區。棠蔽其廬。民歌袴襦。再騰于湖。人孰不藝。器徇則蔽。人孰不吏。術勝則詭。嶷嶷文康。通乎大方。內全吾剛。靡怵於彊。彼相回遙。孰砭其失。公弗與曜。曾莫我屈。考公平生。實大聲聞。展如有成。見道甚明。晚卧林壑。避囂自樂。安禪澹泊。心若雲廓。瞻彼江干。有山盤盤。豐珉巋然。千載之傳。

周麟之撰 《海陵集》卷二三

宋故通直郎眉山蘇叔黨墓誌銘

宋通直郎蘇過叔黨。東坡先生之季子也。母同安郡夫人王氏。元祐五年。先生知杭州。叔黨年十有九。以詩賦解兩浙路。禮部試下。七年。先生爲兵部尙書。任右承務郎。明年。先生出帥定武。即謫知英

州。繼貶惠州安置。三年。遷儋耳安置。既四年。漸從廉州。永州居住。邈乎萬死不測之險也。獨叔黨侍先生以往來。其初爲嶺外之役。時叔黨方居母喪。有以動塗人涕泣者。或曰。先生南居而樂焉。非也。先生憂國愛君之心。日加循省而鬱結。則何敢樂。惟是叔黨於先生飲食服用。凡生理晝夜寒暑之所須者。一身百爲而不知其難。翁板則兒築之。翁樵則兒薪之。翁賦詩著書。則兒更端起拜之。爲能須臾樂乎先生者也。其初至海上也。爲文一篇曰。志隱。效於先生前。先生覽之曰。吾可以安於島夷矣。先生因欲自爲廣志隱。以極窮通得喪之理焉。嘗命叔黨作孔子弟子別傳。則固有以處其子矣。當是時。叔黨之風使蠻蜚夷獠。若可以語禮義。而中癘噬毒。莫爲之疾病。雖有欲殺吾親者。亦無以措其斧斤。其傳而北也。霈然起天下父子之性。則叔黨之自處者如何哉。先生不至永州。稍還仕板。



居陽羨、不幸疾不起。叔黨兄弟得吉地於汝州郟城縣之小峨眉山以襄事、遂家於潁昌。叔黨偶從湖陰營水竹可賞者數畝、則名之曰小斜川、自號斜川居士、以視終焉之志。曰、吾未即從先大夫於地下、則生也何事爲。泯泯浮沉里巷、或時一至京師、自得於醉醒、而徜徉一世之外。所遇者與談、靡不傾盡。造次大笑謔浪間、節槩存焉、唯有知之者知之也。且若世未嘗有小人也、孰非士君子也哉。使叔黨以其屋岫嶺、桴溟渤之純孝、而一旦忠藎於九德俊乂之朝、則先生之立言者、叔黨之功業也。惜乎不及使人有見於此、而暴疾以卒於鎮陽行道中、年五十有二、時宣和五年十二月乙未。悲夫、諸葛孔明初不得申所志、而躬耕南陽、卒亦崎嶇巴蜀也。幸而有子曰瞻、可以肆所志、而無邦家以容瞻、則赴魏軍而死耳。嵇叔夜之志氣尤異、而曾不得一席以全其軀、而子紹身血、亦何益於邦

家。古之父子有如此忠孝兩全、而可恨者、天乎不壽吾叔黨於盛世、一振發之耶。叔父欒城公每稱其孝、以訓宗族、且言、吾兄遠居海上無他、成就此兒能文也。有斜川集二十卷、其思子臺賦、颶風賦、則早行於世、而書畫之勝、亦克肖似先人、人稱之曰小坡。仕宦之日少於閑居時、且多艱。初監太原府稅、次知潁昌府鄆城縣、皆以法令罷免。晚權通判中山府、無幾何以事如鎮陽焉。娶范氏、蜀忠文公之孫、承事郎百嘉之女。男七人、籥、籍、節、笈、簞、籛、竺。女四人、長適將仕郎常任佚、孫男二人、嶠、峴。其葬以七年四月辛酉、墓在先生兆之東南。籥等以說之有奕世之好、辱在先生薦賢中、求銘、不敢辭。銘曰、

文安先生之知人、難乎其爲子也。東坡先生之事君、其爲之子者、又亦不易也。孔子弟子傳之不成、尙何慰也。先生稱吾此兒若不娶、必得道。嗚呼、有

貴乎得道者、得以道茲世也。後之人觀蘇氏世世不失令名、棄然文墨之外也。

晁說之撰 《嵩山文集》卷二〇

贈少保王公墓誌

紹興丙寅春、某初肄業太學、今資政殿大學士參政王公爲博士、學者咸敬而仰之。師道之尊如陽司業、衡鑑之精如陸宣公、慨然痛革時文之弊、一歸於正、如昌黎、歐陽二先生。士有經指授、蒙品題者、感見頭角、爲時聞人。某最不才、且晚進、亦以舉子之業、誤被賞識、遇稠人必誦而夸之。卒繇舍選、竊科第、先生獎借成就之力也。乾道戊子冬十月、某懷清源郡章過三山、拜先生于黃堂、賜之酒、既半、出示所述先少保公世次行實、且曰、吾欲求有道能言者、屬之碑、子其人也。某懼而避席曰、先生誤矣、某不撫衣趨隅、二紀于茲矣。道固未之聞也、而言尤不工、先生門人弟子滿天下、而以是屬謏

學小生、烏能發揚遺懿之萬一邪。力辭至五六、卒不獲命。明年秋八月、書至自永嘉、督益嚴、乃即先生之所述而系之。公諱綱、字振仲、先世閩人、徙錢唐。開元中、旅游漢沔間、至襄州穀城、樂其風土、遂家焉。六世祖公達、生居能、居能生崇遇、崇遇生公之曾祖考諱允中、有子諱遷、於公爲皇祖考。生皇考諱文、自皇考而上、皆隱處不仕。皇考以公登朝、累贈朝奉郎。今天子即位之三年、求治甚切、思用異人、得公之子喜甚、擢左諫議大夫、宣諭江淮、入參大政。於是褒其三世、贈公之祖考太子太保、妣向氏琅邪郡夫人、彤氏博平郡夫人。贈皇考太子太傅、妣黃氏定襄郡夫人。贈公少保、配張氏襄國夫人。王氏世有陰德於鄉閭、至宮保尤號長者、見其容溫然、知其爲德人也。平生無忿恚、未嘗笞詈人、嘗使僕曝麥於場、僕游博舍去、雨俄至、漂且盡、杖之三、終身以爲恨。仲兄役於鄉、主郡驛、僕盜用



官米累之、宮保自誣曰、使僕者我也、兄不與知、官吏皆知其不然、以宮保執不可奪、姑緩其獄、一日將致刑、忽大赦、遂得釋、一郡歡呼曰、天果不陷善人、鄉人有負逋無以償、鬻其小女於市、頗有姿色、宮保見之、不商其直而售、且曰、翌日以女來作券、果如期而至、宮保笑曰、吾焉用汝女、聊爲君償逋耳、卒歸之、所居去杜母鎮十餘里、有僧與鎮將邢氏有怨、發怒投張海爲賊、導之自均房來、欲復仇、宮保聞賊至、曰、我若去、必殘吾鄉、因具牛酒以待、賊見其狀貌、兇暴之氣頓銷、且素聞其賢、甚敬之、約其徒秋毫無犯、僧感舊恩、見則拜曰、此來專欲謝公而報邢也、力解之不可、遂醉而閉之、亟遣告邢舉族遁去、賊既退、乃徐出僧、至鎮追其徒不及、竟無所肆其毒、猶子京豪俠任氣、使酒而好鬪、市有一無賴少年、惡之、嘗切齒、宮保呼無賴子、與錢十萬、使市布於房陵、衆皆爭曰、吾僕使不乏、何至

用此人、必不來矣、不答、無賴子得錢、醉酒蒲博數日而盡、遂遁去、爭者咎之、宮保曰、吾非不知、顧吾姪深惡其人、常恐杯酒之後、一與之遇、事有不測、吾以百千去之、所以兩全之也、常曰、家貲非我獨有、當三分之一以給家用、一以奉官輸、一以待賓客、賑貧窮、故四方之士皆奔走其門、有所求隨其意而飽滿之、飢者分之食、寒者遺之衣、婚嫁不給者助之、貧而死者爲之辦棺槨具衣衾、士大夫罷官赴調、流落不能歸者、資其費、假以僕馬、遠者數千里不計也、於是遠近翕然、不以姓氏稱、皆呼曰無怨公、議者以比漢伏不鬪云、臨終、戒其子曰、欲服人、毋蓄賄、欲睦族、無議財、尊師友以教子孫、藏經籍以待豪俊、好甘者飴以蜜、好安者設以席、果守吾言、必將有後、言畢而逝、琅邪夫人生二子、宮傳其季也、爲人魁梧寬厚、行義著於邦族、遵宮保之業、世其德而不變、好學有才華、詩筆清麗、所與

游皆鄉之賢士及時之名卿大夫。盛公次仲帥南陽卒于官。其子章卜葬于漢南。貧不能集事。造門哀告曰。聞公高義。且多山林。願得尋常地。以爲先人宅兆。慨然許之。曰。惟君所擇。章旣得卜。凡葬所須。皆仰給焉。又館穀其家數百指。幾歲而不厭。其好義皆此類。與從兄高相敬如賓。三世聚居。門內百口。每食必同席。甘苦惟均。上下無異財。鄉人服之。取以爲法。定襄亦嚴明有賢行。事皇姑至孝。年五十餘抱孫矣。猶曰。親盥饋。性無妬忌。愛庶孽過於己出。宮傳篤學喜客。不屑治生業。一切委夫人。小大斬斬。皆有條理。宮傳篤於教子。夫人佐之。其義方慶善。乃鍾於公。公幼謹孝。有立。及長。克家力學。有功名大志。時余公幹。鄒公浩。皆當世名士。相繼教授郡學。公往從之。勤苦絕人。其業日進。鄒公尤留心教誘諸生課程。其工拙美惡。必題數語爲品藻。公每蒙賞激。遂爲高第。舉進士。中元符三年。

丙科。授將仕郎。延安府法曹參軍。宮傳遺之詩。有利名場裏持清謹。冠蓋叢中寢是非之戒。公敬佩焉。丁外艱。執喪哀毀過甚。跣而尋山以葬。足爲跣裂。服除。調慶州司法參軍。帥錢公昂高其才而委任之。以進築香柏臺。神堂。九羊堡。應副有勞。及該八寶赦恩。累循儒林郎。有禁卒五人。夜踰甕城。劫門者衲衣。門者凍以死而復活。案具當斬。公白帥曰。一衲直數百錢。且變主不死而殺五人。情有可矜。錢公曰。公欲云何。曰。此軍人也。若送經略司。則死生在公特筆耳。錢公忻然從之。獄官怒曰。公欲以國法市陰德邪。公不爲動。卒皆活之。以久去親闈。自陳合入支掌資序。罷歸。授江陵府觀察推官。分曹建掾。改爲司兵曹事。屬貳車虛席。公攝事歲餘。一府仰辦。江陵大府。諸司皆在。爭以事諉公。曰。爲府中一俊。常平司檄主管其司事。時湖北行方田法。主於是司。前使者去。憲攝之。又按獄湖南。獨



僉聽行其事。公知其法之弊、委曲調護、利則伸之、害則違之。又選擇所差官而授以方略、於是方八州而無訟。公不自言、既去官、後使者白其功于上、特循承直郎。丁定襄夫人憂、扶護北歸、哀感行路。服除、授開封府扶溝縣建雄鎮權府學博士、改奉議郎、知金州漢陰縣。在京西極境、治所去利路界十餘里、梁雍之民錯雜其間、公臨以簡易、人甚宜之。范公致虛以前執政鎮南陽、聞其政聲、辟知穰縣、辭不行。終更、屢轉朝散郎、賜六品服、擬通判濟州。未赴、以建炎元年十月十一日薨于家、享年五十有五。公爲人淳質任真、不事表襮、遇人以一誠、喜稱其善、有過則面告戒之、退無後言。平生活退、不妄干進、入仕二十八年、在官纔十考。其除內艱而造朝也、盛章爲開封尹、權勢震赫、以皇考舊恩欲報之、公固不附。又嘗欲以妻黨張氏女歸公、公拒不受、積以爲怨、因不被薦。已而章敗、其客皆

坐遠謫、公獨不污。承祖父之風、好施予、不蓄資財。居官尤廉潔、先世雖厚所產、至公益貧。自漢陰代歸、糧食不繼。范公宗尹有詩曰、丈人古君子、清德肖冰玉。仕宦三十載、一飽猶仰祿。驅車向金闕、此行何太速。家山豈不戀、陶令瓶無粟。知者以爲實錄。其調濟州通判、州有田隸西城所、巨闢李彥主其事、兇焰熾然。人曰、公必往見之、不然且有禍。公曰、吾寧不調、不能屈於此。已而果見奪。其得倅徽州、未出都而金人再犯闕、公在圍中、官索金銀甚急、人多匿不肯輸。公劫掠之餘、囊有數金、悉以送官。人勸公少留以爲歸資、公曰、國家如此、吾尙忍有所隱耶。二聖旣入虜營、集百官於秘書省聯名以立張楚、公驚涕而出、曰、始以爲立皇太子、若爾、吾非所敢知。卒不書。見者皆爲驚悚。篤於風義、其釋褐也、同時鄉貢之士第與不第數十人、多依公以食、貧不能歸者資遣之。有風鑑、好獎借人物、所

許予後多顯達。范公宗尹爲布衣時，年甫及冠，公一見期以遠到，獎成之。其訓子弟，造次必以遠大。老猶自力觀書以誘迪之，聯案共檠，夜分不倦。襄國夫人聰明修整，好讀書，聞古今賢人才士之事業，則聳然慕之，常舉以勉公，且以誨其子。先公十七年薨，公念其賢，誓不再醮。初，公既葬，皇考而不宜其地，欲改卜，未遑也。大資政知荆門軍，以紹興癸酉正月十四日，奉皇考及公之喪葬於故居之東北一里龜山之原，各以其夫人祔。五子之深、之美、之珍皆未仕而卒，之望即大資政也。今知溫州之彥右承直郎，一女適秉義郎歐陽价，早卒。孫男十人，鏞右從事郎，銖右宣義郎，鐸右迪功郎，錞右修職郎，欽右承務郎，鑄、鑰、錫、鉞、鉛未仕。孫女六人，一適右從事郎錢慶祖，一適右通直郎魏欽弼。曾孫淙、濩，自靖康之亂，襄漢被禍尤酷，獲免者千一，往往無噍類。獨王氏幾絕而復滋，大資政又以儒

術文章奮，結知明主，致身執政，爲時重臣。初，宮保贈制曰：清塵美行，肩于古人；重義輕財，化貪息訟。州閭以無怨公稱之。我宋造邦，穀城以進士起家，自其孫始迨茲萬機，流澤燾後，信可取必。君子曰：王氏之有後也，宜哉！德厚者流光，天道不可誣也。銘曰：王氏之先，自閩徙杭，有唐開元，始家于襄。至無怨公，植德好誼，善積名成，始漢伏氏。宮傳遵之，不懈有加。慶鍾少保，進士起家。小試墨曹，活人惟死。攝官大府，政聲有偉。匪人不附，僞命不污。凜然節義，可激懦夫。天嗇其年，志不克究。不在其身，以昌厥後。果生人傑，早蜚大聲。模範太學，作新諸生。勤勞于外，治最荆蜀。帝曰來歸，資爾啓沃。進司言責，入贊政機。密疏輸忠，而人不知。惟帝知之，大藩是畀。不令而行，德威惟畏。帝念老成，行將相之。先世之褒，奚止於斯。龜山之原，小黃之口。紀德豐碑，有同



儒藏

峴首。

王十朋撰《梅溪先生後集》卷二九

校記

①「稱」字疑衍。

②漂：原作「漂」，徑改。

③進：原作「近」，據文意改。

④侍其：原作「時其」，按本文前云「母侍其氏」，據改。

⑤自「此兒能文」至文末原脫，四庫本《嵩山文集》同，

據《永樂大典》補。

宋儒碑傳集卷八十一

王縉 詹至 劉若川 周武仲 戴述

王司諫墓誌銘

乾道己丑歲某被命守嚴陵、驅車入境、俯仰其山川、而想子陵之風、詠仰止之章、且意夫人才代出、當不乏也。既視事、則進長老諸生而問近世鄉先生大夫之賢者、則得二人焉、曰諫議江公司諫王公、皆以風節論議顯聞於世、爲鄉里所重。已而司諫公之子、今筠州史君來訪予、又得從問其父事甚詳、恨未能與嚴之人表而出之也。越三年、予屏居潭湘之上、筠州走書以清江劉清之之狀來請銘公墓。以予曩日之所敬、固不得以荒陋辭也。乃叙而銘之。公諱縉、字子雲。王氏系出琅琊、晉司徒導南渡、始家江左。其後有居睦州桐廬者、曰胸封、仕唐爲和州刺史、生肅清、主簿、洵、生梁、烏程丞耕、耕生周、明州衙推、仁鎬、因家於明、而處者爲嚴

州分水人。公踰冠遊太學、中崇寧五年進士第、調歙州司法參軍、議獄以忠厚稱。移池州石埭令、斷訟、民服其明。方田法行、旋以不實罷。而石埭之民請以公所均爲定。用薦者改宣教郎、知婺州浦江縣。神霄宮初建、觀望者競爲侈費、邑當置下院、獨取之遠鄉、僅以充數而已。主者加詰、公曰、朝旨不言城內外、縣境有觀而舍之、吾非違御筆也。辟監杭州鹽倉、臨安縣市易務、知溫州永嘉縣、調監池州永豐監。丁內外艱、會邑人翁漆乘亂聚衆、剽新城、令不以時應、盜益熾。新城求捕且急、令遽調松村保甲、以謀不素、大擾。吏懼莫知所爲、則以告公。行義素爲鄉里所信、即日挺身往諭。已而縣得漆與其二子誅之、衆乃定。苗傅、劉正彥南遁、有詔起復公部松村民丁追之、公以終制辭焉。大駕在永嘉、從臣有以公應詔、權吏部郎官。方移蹕草創之際、公請許詣選者、得以闕自言、而爲定其宜、士無



滯留、而官不曠廢。以論事忤宰相、出知英州。時二廣多盜、郡有土豪、公縻以職秩、結以恩信、得其死力、所捕致無不克宜。章賊尤熾、公縱謀者諭以利害、他日賊過郡境、以俚語戒其徒曰、無犯吾佛。曹成蹂踐湖南、爲岳飛所敗、走桂而東、破連州、衆號數萬、廣東大震、科調紛然。公獨如平時、客問所以然、公曰、吾州無兵無城、寇至、但當登譙門諭之以禍福、否則以死繼之。處之既定、故寢食甚安耳。寮屬請退保、公曰、吾守土吏也、退將焉往。卒以靜鎮全安一境。御史循行、上公治行第一、有旨遷官。秩滿、令入^①對。會朱丞相勝非當國、雖故鄉監官至都堂、亦使趨庭自列。公顧不肯、勝非怒、虜方在邊、擬公至滁州。朝議皆言王公忤范丞相去之南荒、今方來歸、又置之北鄙、何邪。改知虔州、召爲金部員外郎。旋以選知溫州、加直秘閣。陛辭之日、太常謂公未得去朝廷、即拜監察御史。即謝、擢殿中侍御

史、時紹興五年五月也。公首陳正紀綱、嚴法守、明賞罰、立軍政、廣儲蓄、厚風俗、冀爲經久之謀、且援古事以申諷諭曰、晉武平吳、天下既定、何曾語其子曰、吾每宴見、未嘗聞經國遠圖。此亦今日之憂也。因言湯以七十里而有九有之師、惟仁足以得天下之心、夫豈以地之廣狹、勢之強弱哉。而書之言曰、慄慄危懼、若將隕於深淵、惟湯畏天保民、此所以天下歸之。雖狹而廣、雖弱而強也。於是東南大旱、而江湖爲甚。公慮所以振卹之者、如伸枉濫、寬繫累、禁科敷、緩逋負、免穀稅、通糴船、瘞殍者、其論奏甚備。而尤所拳拳者、以常平之法名存實廢、借兌之不撥還、支移之不收納、此所以坐視凶荒而莫之救也。至推其本原、則願詔大臣以燮理之事、飭清躬以脩省之意、論極剴切。六年二月、遷右司諫。公言聽忠言於艱難之時易、受直言於平定之後難、況寇讐未殄、願毋以目前暫無事而忽^②。芻

薨之言。又因對言、明皇即位之初、焚錦繡珠玉於殿前、厲精政事、以致開元之治。及侈心一動、窮天下之慾、以致天寶之禍。非初之難、而終之難也。陛下憂勤恭儉、圖濟中興、往歲金翠之禁、自內庭始、天下風靡、而近者庫藏供瑋瑁、坑冶采青綠、未必以爲器玩設飾之用。然恐下之人妄意好尙、緣類而至、願深戒明皇之失、終始惟一、以永無疆之休。上爲之改容嘉納。六月、臨安地震。公言、地震駐蹕之所、豈非天心仁愛、著陰盛之戒邪。女子、小人、夷狄、盜賊皆陰類也。女子、小人則遠之、夷狄、盜賊則備之、恐懼祗畏、以應天心、此先哲王所以中興也。又言、陛下纂承、十年於茲、頻歲豐稔、僅足糧餉、一有小歉、民已流移。蓋耕者寡、食者衆、軍政未立、國用未節故也。謂宜詔大臣參酌祖宗舊制、與每歲出納之數而均節之、抑僥倖以靖衆志、薄稅歛以寬民力、爲久長之計。上幸姑蘇、軍屯淮上、逆賊驕

雖方肆陸梁、而主帥有慢令不赴機會者。公請奮周世宗、我太祖之英斷、以勵其餘。又言、今所與共濟艱難、復大業者、二三大臣耳。或出而總戎、或處而秉軸、交修政事之間、進退人才之際、謀慮有不相及、則初意未必盡同。苟無私心、惟其當而已。蓄疑敗謀、理必不可。願戒大臣、俾同心同德、絕猜間之萌、協濟國事。公以大臣不和爲憂、比終歲再三言之、至謂執政間有於賊馬南向之時、倡爲抽軍退保之計、上則幾誤國事、下則離間宰臣、言尤至切。又言、軍興以來、多爲一切之制。今盜賊粗定、上下內外宜守成憲。而舊弊之未革者、如官資之轉行、過犯之改正、差遣之審量、皆用特旨廢定法。遠方監司守臣措置自肆、姦賊抵罪、鞠治旣白、或不行法、止從輕比。若此類紀綱不立、法令不信、雖宵旰焦勞、未見可以爲治也。張俊營第建康、廣袤占民居、公請密敕俊自還之。內侍李琮、童貫壻也、恩



旨復許其仕。公言梓宮未返、天下痛憤、忍令童貫壻再仕乎。所言多采用。兵部尙書呂祉護諸將於淮上、公請於都督府屬官中選知兵者助之謀議、且留軍中撫循訓練、通將士之情。未幾酈瓊叛、社死之。先忠獻公時爲宰相、臺諫議以擇帥不善爲責、公曰、司言責者獨不任其咎乎。且以是進退大臣、非知大體者也。旣而章交上、公獨論、劉光世屯淮西、士卒數萬、惟王德一軍忠勇敢戰、餘皆驕惰自肆、不可用也。一旦以德踵光世之後、酈瓊等憚其威嚴、訴於朝、旣爲之改命、而召瓊等赴行在、乃懷疑貳、相率北去、則潛爲此謀有日矣。張某引咎求罷、方防秋之際、二大將又入奏、而朝無宰相、無乃未可乎。章再上、不報、求補外、復以直秘閣知溫州。先是日食之變、詔求直言。臺臣有語公者曰、上任我輩言路、而外求直言、建此議者必懷姦。公曰、日食求直言、故事也、豈以臺諫而廢。及是又諷公、

曩趙丞相之去、我二人不擊、故不遷。今臺諫媒孽、右相勢已搖、吾與君遂言之、則同陞矣。公正色拒之。至是反劾公觀望、欲爲後圖、公聞之笑曰、吾老矣、不願目前之利、乃爲後圖、不亦左乎。坐落職奉祠。公在言路、知無不言。每謂人才實難、多事之際、尤宜爲朝廷愛惜、以故不專彈擊、而惟論安危利害、大計與所以啓悟君心者。上嘗稱公中正不阿、得諫臣體。它日、言事者有不稱、上曰、王某論事可思。即復直秘閣、知常州。淮上戍軍經從有攘民羊及誣民爲盜、縛之去。公追得民與羊於舟中、獨不得軍士姓名、貽書謂主帥、卒以三輩徇河上、聞者服焉。會有故從官歸自虜中、蓋嘗仕僞庭、據吾京邑而爲之守者、過郡、公惡之、不爲禮、力求見、公面詰媿之。而宰相秦檜與之親厚、歸而泣訴、檜怒、十一年春、以公主管台州崇道觀。州人惜公去、以爲循良之政、前人莫及也。州舊有河貫子城、達於倉

後或堙塞。公請於朝、開深以便輸、至今賴之。退歸幾二十載、恬然自樂也。積官左朝奉大夫。既告老、以郊恩賜三品服。二十九年六月己酉、與親戚笑語如常、時語其家人曰、心中無一事、時至可行矣。夜分而逝、享年八十七。九月甲申、葬於縣之分水鄉茅山之原。公天資忠厚、事親從兄、誠^④意篤密、子孫侍側、燕居笑談、必寓以訓敕。治縣八年、囚無瘐死者。去官、人思之不忘。雅不喜求請、及公之存、子孫悉從吏部選、無詣堂者。其行義尤爲文定、胡公翰林學士朱公所知、皆嘗論薦於朝。劉清之曰、嘗得公遺書、所謂霜臺諫垣稿者、合九卷、讀之累日、深惟既往之是非易定、而當時之毀譽難公也。觀前輩奏篇、至毀譽之際、雖元祐忠賢猶惜其是非之未定焉。而公書手跡具存、繫以時日、皆可依據、至所尊信必天下鉅人、所排黜必其自絕於善人之類者、非唯當時、迨今實然、而後知公之所言蓋

有見於中、非苟然也。配詹氏、贈左光祿大夫良臣之女、贈碩人。後公一年卒。子男二人、日休、右承議郎、權發遣筠州軍州事。日勤、左朝散郎、權發遣處州軍州事。女四人、長適右迪功郎邵希仲、次適左朝散大夫翟軫、次夭、次適右迪功郎詹煥。孫男四人、瑒、右從政郎。珙、珙皆右迪功郎。珙未仕。孫女六人、曾孫男女十一人。銘曰、

士或遠實、浮華是滋。凡厥言行、曷據曷依。觀公平生、惟實之務。陳言諫省、質直靡矯。有所毀譽、皆心所安。久而益信、是則爲難。其在郡邑、怙悞平夷。惟其有常、去輒愈思。其在閨閫、孝友融怡。豈惟其家、鄉黨是儀。子陵之山、千古蒼蒼。清芬不磨、惟公之藏。

張栻撰 《新刊南軒先生文集》卷三八

直秘閣詹公墓誌

自頃國家承平日久、士大夫參於寵利、無捐軀殉



國之志、狃於宴安、諱言兵事、一旦戎馬入中原、相視愕眙、不過爲畏避偷生之計、仗節死義、罕有所聞、至其謀國、則以退怯爲得筭、事讎爲全策、風俗至此、夫豈一朝一夕之故哉、然而其間天資忠義、務爲實用、不汨於習俗、有志於當世者、亦豈無其人、顧有而絀於時論、又不克盡其用、爲可歎慨、若詹公是也、建炎初元、公通判鞏州、虜騎再渡河、狙脅陝洛、長驅至秦隴、將及鞏、郡守假它檄去、公即日合兵民七千人、授甲^⑤登陴、虜至城下、大呼趣降、公命以勁弩射之、圍合數重、部分既定、歸與家人訣曰、自國門直鞏九郡皆不守、吾守死矣、竭家貲犒軍、謂其父老曰、我已與家人訣爾、當共助我、皆感激爭出金穀、虜盡力攻五日、不能破、會公所乞熙河兵至、與虜戰、殺其酋三人、遂遁去、城卒全、紹興初、苗傅等甫伏誅、虜勢憑陵、諸將有憤激戮力之意、有司顧以調度不給爲憂、會大饗明堂、已下詔

矣、公時從招討使、慨然奏疏、大略謂、靖康之禍、人神共憤久矣、今大敵在前、國勢不立、與其崇孝饗之虛文、曷若厲復讎之大義、請停大禮、悉以其費佐軍、督諸將分道攻守、以慰祖宗在天之靈、繼志述事、孰大於此、事雖不行、識者韙之、丞相張忠獻公督師、遴選時彥、首辟公掌機事、劇賊楊么據洞庭、奉檄先走鼎州、度事宜、所條上悉中機會、方是時、虜挾我叛臣日窺邊、諸將列屯淮漢、幕府議軍事曲折、有非文檄所能傳者、必委公往諭意、析理會情、無不切當、蓋公舊爲河州士曹、故將王淵爲寨主、捶將校至死、郡守欲加罪、公曰、小校犯階級、是不可以常人論也、卒免之、王公感激、平生事公如父兄、張俊、韓世忠始淵部曲也、故其言尤爲諸將所信、忠獻以是任之、公善將兵事、嘗佐世忠解濟州之圍、行至熙河、聞虜騎已南、公曰、卒遇敵、進退何據、當駐山陽、以佚待之、一戰可勝、世忠銳意

不能從、師至宿遷、果潰、自是愈心服。劉光世之罷兵柄也、尙書呂祉往蒞其軍於合肥。公已去幕府、貽書忠獻曰、呂尙書之賢、固爲一時選、然於此軍恩威曲折、卯翼成就、恐不得與前人比。兼此軍今已付王德、德雖有功、而與其下酈瓊輩故等夷耳、恐有中不能平者、願更擇其偏裨素爲軍中所親附者、使爲德副、以通下情。忠獻然其言、未及行而酈瓊以叛聞。公明審有謀類如此、自忠獻去國、和議興、公不復用。有薦之於時相者、時相方謀和亟、惡言兵、乃曰、詹君而賢、何乃樂從兵間耶。嗟乎、是豈知公心者哉。及虜暫歸河南地、見大夫無可使、則又謂公有守鞏勞、俾以使指往關中。時公年高矣、親舊爭勸無行、公曰、朝廷名爲撫舊疆、吾雖老、敢辭乎。曰、然則無以家行乎。公曰、人情危疑、使者不以家行、是重之也。即日盡室引道、間關入境、延父老問疾苦、布德意。會虜敗盟、不克終事。蓋其慄

慨狗義之意、至老不衰。其爲人本末大略如此。所謂天資忠義、務爲實用、不汨於習俗、而有志當世者、若公非耶。而絀於時論、不得盡其用以死、則可不爲之歎息哉。予故特表而出之。世之君子必有能辯之者。公諱至、字及甫、嚴州人。曾祖瑀、贈正奉大夫。祖詢、不仕。父安、學行爲鄉里所尊、以累舉恩仕爲浦江簿、贈宣奉大夫。母太碩人余氏。公中崇寧元年進士乙科、授泗州推官、河州推官、徙士曹參軍、改秩、監在京廣衍倉、通判濰州、易南京留臺、通判永靜軍及鞏州。召未對、除陝西轉運使、以親老辭。改御營平寇左將軍、隨軍轉運判官、主管臨安府洞霄宮。起爲江淮招討使司隨軍轉運副使、知常州、改徽州、辟州督府主管機宜文字。以幕府功、除直秘閣。忠獻將薦於上、會太碩人有疾、力辭歸。遭內艱、服闋、提舉台州崇道觀、知處州。言者希時相意、論公與諸將善、坐是罷。起爲永興等路提



點刑獄公事。後復丐祠。以崇道歸。紹興十年。以微疾沒於其家之正寢。享年六十有八。初娶何氏。兩娶許氏。俱封令人。子男三人。攸之。仰之。倬之。並右從事郎。孫光祖。紹祖。似祖。與祖。昭祖。女長適迪功郎潘淵明。次適承節郎方守中。次適承務郎王興義。是歲十月甲子。葬於遂安移風鄉新村之陽。積官至左中奉大夫。封建德縣男。公自幼沉厚寡言。外樸中敏。孝友尙義。居太碩人之喪。鄉黨以爲法。育伯兄孤孫如己子。孀妹來歸。爲之區處生事。兒女婚嫁皆得所。宗族之貧無所給者。曰。於我衣食。死於我葬。以至外姻亦賴以濟。度量恢廓。喜怒不形。而人亦莫敢犯。獎借後進。聞一善若出於己。有不善爲之憂。委曲諷曉之。雖甚不肖。亦知愧。訓誘子弟。不欲傷恩。反復諄諄不憚。故凡其宗族與其鄉之人生。則相與愛敬。病則合力祈禳。終則至於流涕。此豈偶然哉。公於書無所不讀。讀輒不忘。務

以躬行爲主。考論禮樂制度。往往得_◎經意。尤喜推原歷代治亂得失之故。蘊蓄深厚。發爲文章。雅健追古。其得意時。操筆如風。及讀之。雖宿致思者不能及。其稿隨多散失。所裒拾僅得瀛山集十卷。詹氏系本南陽。五代時有避亂來嚴之建德者。實公始祖也。其二子復徙遂安。一居遂安之原。至公凡九世。一居新安之原。亦同邑也。自宣奉公糾族講學。而詹氏始多秀士。及公益敦篤。懼兩原子弟世遠日疎。乃立二老祠。每歲季春。悉合其少長奉祀。事已。相與飲酒。序親愛以無忘厥初。雍雍然也。又爲之立墓祭之式。使後人世守之。其尊祖糾宗之意甚備。詹氏人才之盛。抑未艾也。公季弟曰棫。仕爲宗正寺丞。於公蓋同志者。公之葬。狀公行事甚詳。而銘文未有所屬。後三十有四年。歲在戊戌。宗丞有子曰儀之。今爲廣西轉運判官。與帥張某聯事。講學相好也。於是始以屬某。而某實公所從忠

獻公之嗣子也。乃不克讓爲之論次如此而銘之。
銘曰、

猗若人之好修兮、懷瑾而爲美也。不隨俗而風靡
兮、厲秋霜以爲志也。羌視讎而弗疾兮、已獨斯之
恥也。紛懷生以自營兮、予何艱之避也。周旋於羽
檄之間兮、抑將以伸其義也。凜自信之不疑兮、曾
習俗之何睨也。勒銘以昭之、尙後人之興起也。

張枋撰 《新刊南軒先生文集》卷三九

右迪功郎致仕劉公若川墓誌銘

隆興元年十二月一日、廬陵鄉先生劉公卒。州學
教授帥生員哭其家甚哀。郡人皆嘆曰、善人死矣。
於是門生、鄉貢進士田亮功會萃遺事、屬某爲之
銘。某之兄弟昔以童子受業公門、其可以辭。公舊
名武、字定功、後改名若川、字朝宗。世爲廬陵人。曾
祖海、祖惟一、皆不仕。父陶、字紹先、博學有聲稱於
勢利泊如也。其詳見文人葛敏修、李聖功所爲銘。

紹先娶樂氏、實生公。公自幼刻意讀書、事父母盡
孝、待兄弟以順。方三舍法行、爲正若錄、必經術行
誼俱優者。當是時、公固未老、人已曰非劉公不可。
其後改科取士、人又曰、劉公、元祐宿學也、宜留爲
吾徒師。中間預鄉薦、可以仕矣。公優游學舍不起
也。諸生亦謂公言行可法、挽之相與不置。蓋贊助
學官、表帥多士踰四十年。平居與物無競、休休然
真寬厚長者、人以是敬愛之。若乃施口惠、任心術
以沽流俗之譽者、固公所恥也。家素貧、學者聞其
名、自遠襁至、賴以自給。公損衣節食、推其餘以字
育孤幼、賙恤朋友、此又人所難者。紹興二十九年、
太上皇帝慶壽於慈寧宮、凡高年以差賜爵。時公
年八十七、且有子舉於鄉、實應詔書、遂補右迪功
郎致仕。初、公屢求解學職、衆輒留之、至是欲必去。
衆曰、公耳目尙聰明、況養老於學、古之遺制也。不
聽。蓋復留四年、以疾卒於家。公爲文醇正淡泊、如



其爲人有集二十卷。初娶夏侯氏，再娶王氏，彭氏。四子，長充實，通經篤行，有父風。次充國，鄉貢進士。次待問，以毀卒。次定國。二女，長適進士彭邦直，次適進士王景先，前卒。孫男女俱九人。男，鄉貢進士羲之暨麟之，釋之，涓元之，揮儀之，宗之，必勝也。曾孫男三人，伯雄、伯魚、伯鳳，皆業儒。女二人。議者謂公豐積而畱取，後世殆其昌乎？諸孤以二年閏十一月辛酉葬公於城西雞家嶺，與彭氏同兆而異穴。銘曰：

九十一年不其壽，子孫濟濟昌乃後。天豈我私躬自厚，如唐師德漢少游。無競無求以白首，附郭之山長而秀。公歸其宮安且久，列辭鑽石耀不朽。

周必大撰 《省齋文稿》卷三一

周憲之墓誌銘

公諱某，字憲之，姓周氏。其先本周苗裔，平王東遷，次子烈封汝墳，秦滅周，以汝墳爲郡，子孫因家焉。

至十八世孫仁爲漢太中大夫，徙家陽陵，子孫咸至大官，自漢歷唐，世有顯人。其後綿遠，族衆散適他郡，有居處之遂昌者。公之遠祖避唐亂，自遂昌徙之浦城，故今爲浦城人。王審知據閩，其三世孫璵仕王氏爲銀青光祿大夫，即公之七世祖也。生彥卿，爲王氏先鋒將。彥卿生文之，當閩滅，入南唐，官至殿中丞。文之生隆，隆生衡，即公之曾祖也。娶黃氏，楊氏，生某，即公之祖也。累舉進士，以文學教授鄉里。祖妣李氏用猶子禮部侍郎常陳乞推封所生，特封昌元縣太君。自高祖而下，雖隱德不仕，而皆以儒學行義稱于鄉邦。父諱某，仕至宣德郎，知廣德軍廣德縣事，卒于官，以公貴，累贈通議大夫。前母李氏、繼母郭氏，俱贈碩人。通議公以進士起家，事親以孝聞，屢爲縣令，公正豈弟，多陰德，有識之士知其慶必在後也。公生而相貌異常，通議公嘗撫之曰：大吾門者必此兒也。自爲兒童，卓犖

不羣、長益明敏。年十四、作進士詞賦、已有可觀。乘間更習他文、不專爲科目計。年十七補太學生、預廣文薦、會改科、用經術、後進競尙浮華綴緝、公獨不追時好、必以古文爲法。時張公廷堅爲博士、少許可、公贄書見之、張展讀大驚曰、子妙年之詞若此、古人不難到也。公之叔父侍郎、一日覽公所著唐贊論、持以賀通議公曰、此已遠過於某。其爲名公所推重如此。紹聖四年登進士第、授將仕郎、越州諸暨縣尉。丁通議憂、哀毀骨立。通議公仕宦二十餘年、以廉潔稱、捐館之日、家惟四壁。公扶護歸平江、竭力襄大事、安貧守分、人無間言。服除、授青州益都縣主簿。到官之初、外邑訴水災、州檄公檢視、通守者各放稅、且少公、輒大言曰、若多放一粒租稅、即當奏劾。公正色言、惟知盡公而已。奚卹其他。旣而躬行田疇、所傷禾稼果可驗、訴者不誣公。悉准法蠲放之。通守雖極怒、然無如公何也。秩滿、

用薦者陞從事郎、知婺州金華縣丞。丁母憂服除、授泗州錄事參軍。鄧帥李夔改辟公知浙川縣事。前政以軟懦去官、公事或經歲不決、公到、迎刃而解、舊事決遣無留。凡斷獄片言得其情僞、人人心服。老胥猾吏屏息聽命。邑以大治、士民稱頌、以爲前後所無也。州以公帑不足、委五邑賣醋、實皆抑勒所得息以十之二噉縣官。諸邑旣爭奉州、且利二分、至有月輸六七百緡者。公以縣陋民貧、度不能盡免、所輸才一二而已、以其所得二分均之僚佐、未嘗受一錢。京西漕專領修洛陽大內、坑冶使者創行鑄新鐵錢、科兩路市彩色鐵炭之屬、民不堪命。州下諸邑均出所科、公言邑有大小、難以一概力爭之。鄧帥許公光凝之前、引春秋平丘之會、子產爭承、以謂鄭伯男也、而使從公侯之貢、懼弗給也。由是更以諸縣戶口物力差次之、浙川遂減過半。許公先以文學易公、至是益加欽嘆、以爲有



古循吏風也。初公在任才一考，士民競於諸司投牒願留再任，而諸司應照例^⑧薦守令，仍以公爲首。及公得代而歸，百姓攀戀號泣，遮道絕梁，累日不得行，乃相率畫公像於浮圖舍，歲時祠之焉。用薦者改宣教郎，授亳州司儀曹事，磨勘轉奉議郎。政和七年，許公召還，薦公于朝，除武學博士，幾歲擢監察御史。宣和二年，有上封事告淮南連歲荒旱，饑民相食，常平使者顧彥成坐視不救，上大怒，詔公察訪，亟行賑濟。公登對陳八事：一、乞依法放免租稅；二、乞諸司錢斛并許支用；三、乞州縣倚閣催民間積欠；四、乞常平司錢斛已椿發未行者并截留；五、豪戶有願出粟濟饑民者許保奏推賞；六、所在官山林塘泊暫弛其禁，聽饑民採食；七、鄰路般販米斛入本路者，免收沿路力勝，庶得商旅輻輳；八、^⑨小民有無業可歸，願充軍伍者，委漕司多方招刺，以消攘奪之患。上皇一一開允，仍命行訖。及奏

疏降中書，執政頗難之，所陳^⑩八事從其四而已。公行人或謂公曰：「上慈仁博施，固無不可，然執政不肯盡用公疏，其意可見矣。況淮南監司郡守皆出權倖之門，凡財用又多供應御前爲名，公其慎之。」公曰：「吾受命訪察，若趨時顧避，則兩路生靈實吾殺之也。借使獲罪，豈敢愛一御史而輕億萬之命哉？」既檄監司州縣問百姓疾苦，悉推行所以賑濟者。宿守吳壽寧聞公將至，令諸門毋納饑民，遂至城外僵屍縱橫，悉差公吏穴地藏之，乃申以無饑民，無可抄錄。眞守蘇之悌夜遣兵杖逼饑民，載之江中洲上，悉皆致死。二守皆宦官腹心，專以進奉花石珍禽爲務，旁連漕使孫點，雄視江淮間，莫敢誰何。公并劾之，由是官吏風靡。兩路所養饑民流移僅三十萬，賑給闕食人一十七萬有奇，振糶貸穀三十餘萬，勸誘人戶出糶及借貸七十萬有奇，計其所全活不知其幾萬也。前所劾二守既以罪

去、造爲飛語以動朝廷、遂有旨促公疾速赴闕、更不賑濟。公旣忤宦官之意、使還請對、閣門百端沮抑、公即上章丐外補、除權知常州。會常州係高麗使經由郡、守臣例賜對。上因問淮南事、公從容陳之、聖心感悟、留不行、除尙書比部員外郎、遷右司員外郎、假太常少卿、接伴大遼賀正旦使。磨勘轉承議郎。時遼使耶律懷義、留嗣卿、皆猾酋也、公一見即開懷待之、然與之言、未嘗少假借。舊例、國信私覲皆售僞濫物、以其價廉。吏請循例、公不許、其所酬酢物不較其直、物皆精好、遼人悅服。及對、上喜見于色、褒賞再三、且諭公將來送伴如有合理會事、可一一憑內侍奏來。公聞而遲疑、上即曰、卿識鄧文誥否。公徐奏云、臣起自疏賤、於今內臣中無有半面之交者。上嗟嘆良久。翌日加賜茶、錦、宮花等、蓋特恩也。使還、差殿試初考官。進士對策間有言極切直者、有例欲指爲謗訕、取旨、公云、今盜

起東南、正是國家開言路之時、豈可吾儕先加以此名。遂改謗訕二字爲涉異奏之、已而降旨皆取于前列。宰相王黼建應奉司、公知黼不可盡言、姑欲以利害警之、造黼問焉。黼云、此以中官領供應者不一、凡物旣不可考覈、而騷擾已倍多、故總以一司。公曰、相公念應奉無節、不嫌以論道之任下領有司、意則美矣、第恐外庭旣行之、北司仍復干預、則用度將愈無算、而騷擾又倍前日、是使中官得以爲辭、而相公獨受其弊也。黼變色曰、理或如此、然掌九式九貢、正周官冢宰之職、由是不悅公。磨勘轉朝奉郎。是冬復假太常少卿、充賀大遼正旦國信使。遼人聞公名、頗畏服、待之禮有加焉。公還、睹河朔軍政不脩、將士驕慢、因使畢賜對、上疏論之、言、兵可百世不用、不可一日馳備。兵當畜銳以待敵、不當玩敵而自怠。上極嘉納、以公奉使稱職、賜五品服、擢侍御史。磨勘轉朝散郎。先是、王黼



採公察訪淮南之譽、俾爲都司、意欲援之從班。其後以公議論不附己、又難其應奉事、屢奏出公爲河朔漕使。惟天子察公忠直、故任以言責。時患法制委靡、士風奔競、公上章乞正紀綱、崇名節。又奏國朝技術雜流、命官皆從本色、遷轉有正法。比來寅緣幸會、或有至正任橫行者、名器不重、莫此爲甚。宜詔有司一遵舊制。又奏都水監修立大河堤岸、置文武官、以催促功料爲名、凡一百二十餘員、類皆權貴親舊、受牒家居、即日降旨悉罷之。徽猷閣直學士應安道自宮祠起知宣州、公言安道昨知平江府日、贓污罪惡暴著、不可爲民師帥、其命遂寢。公每對語必欵盡。既退、上常目送之。累欲擢公諫議大夫、皆爲王黼所梗。四年冬、金國遣泛使來、上以公前使遼稱職、欲俾館伴、復以爲言。黼云、館伴見宰執議事、不可領諫職。更除顯謨閣待制、充館伴副使、賜三品服。又差報聘、充國信使。先是、

政和間遣歸朝官趙良嗣由海道使金國。約其起兵夾攻遼、許其歲賂銀絹、以燕雲地來歸。至是、金人已盡併契丹。故地又西破雲中、而宣撫使童貫、蔡攸出師、纔至瀘溝、百萬之衆望風奔潰。金人遂據燕城、志愈驕悍、須索無厭。上既怒貫、攸且疑良嗣、故特命公。良嗣見公專使、懼察其奸、力請偕往。乃改差公充副使、仍賜金帶。公到敵營、見其酋長諸貴人議事、金恃彊背約、曰、燕山一道、全用大金兵力取到。除卻平、灤等二州、每歲自出租稅六百萬緡。若南宋於歲賂外、更增得此數、乃可商量。公言、本朝與貴國元約云何、今何故輒生此議。況重賦暴斂、乃契丹亡國之法、何足稽也。某受命而來、除許贈二十萬銀絹之外、一疋一兩不敢輒專。金人大怒曰、此事上面商量已定、使人乃如此爭、不知待望歸也無。公答曰、某持節出疆、以死報國、分也。若失辭而歸、將何面目以見主上。諸酋拂袖而

起遂遣介胄者數十起坐隨公。凡十有三日。聲言拘留。實欲脅公。俾許所欲。公愈不爲之屈。談笑如常。時與同行圍棋爲樂。金日遣親信數輩覘公。知其終不可奪。因改館。遣其酋領來見。公譏之曰。貴國用兵以來。雖號百戰百勝。然今深入燕地。西有天祚。北有四軍。東有張覺。而本朝大兵又在其南。盍思早爲定計。今行人見留。大事未成。以某觀之。恐非萬全也。金人無以應。但憑公再請于朝廷。公回至雄州。童貫、蔡攸懼公見上。發其誕謾。堅留公。惟令馳驛具奏。取朝廷指揮而已。公因上疏。歷言金國驕悍貪詐。前後背違元約之事。本朝初用謀臣言。輕與通使。實未爲得計。但累年聘問。理難一旦拒絕。今請求無厭。傲狠自大。釁端漸起。必不能久保歡好。且詔大臣深講所以禦戎之策。仍勅邊將訓兵積粟。先爲隄備。庶幾緩急不失支吾。於是大忤宰相王黼之意。旣而承朝廷指揮。前議增二

十萬銀絹。更不施行。今別以中國所出物計。直百萬緡爲賂。報聘禮成。與其使楊璞、撒母等同至。進徽猷閣直學士。復差館伴。撒母好爲大言。一日出語尤不遜。曰。若此事不了。於南宋不便也。公正色曰。使者勿謂本朝昨瀘溝小失利。遂有輕中原心。堂堂大國。若遇倉猝。忠臣義士不爲無人。時同館伴盧益恐言太過。曰。公乃止。又與公論國書內何不便。稱大金皇帝尊號。及將雲中別作一事。曰。欲俾公奏改之。公曰。國書出自聖訓。裁定一字不可移易。撒母云。如此則將去不得。公答以本朝今遣使報聘。此自是本朝使副將去。何預爾事也。當公與爭時。聲聞館外。上知之。屢降宸翰於王黼。言。周某氣直。何不再令報聘。黼多端沮抑。遂差盧益充國信使。上以公充送伴。公送使至燕山。當賜御筵。楊璞謂燕地是大金取得。將與貴朝少。問皇帝。公答云。兩朝共取燕地。貴國依元約以地未歸。卻受

了本朝歲餉。今地已屬本朝，御筵又是本朝所賜，豈有先北向拜之理？璞云：「如此，則御筵也赴不得。」公責之曰：「聖上優禮使人，不遠二千里，遣使錫宴，豈可因議事待不赴？如此行事，於義理上全無一分去得。反覆折難十次，公知其冥頑莫回，但移文照會而已。自朝廷與金人結約之後，彼勢日彊，肆爲驕蹇，前此漢使例皆莫敢與之校，獨公毅然不顧，語言未嘗小假借，非理之求，一切不從。金知無以加之，往往辭窮而退。使還，除尙書刑部。王黼既不喜公，又見雄州之疏，明其失計，故當國信結局，同僚并轉三官，進職三等，而公止遷直學士而已。上素知公孤立無朋，每加任用，在刑部供職纔九日，擢御史中丞，特封文安縣開國男，食邑三百戶。初對，上宣諭曰：「比來言官多攬撝瑣屑，卿朕所選用，官爲中司，當存朝廷事體。」公見宣和間朝政極弊，邊隙已開，知國家久已失計，但欲善後而已。首

章舉臯陶戒舜，屢省乃成，大概謂有虞之時治功至矣，而贊襄之臣尙以是爲戒，蓋恃其成而不加省，則其成不能保，遂至貽患，有不可勝言者。上皇悟其旨，因稱公雄州所上疏。公奏曰：「今無如之何，惟當脩政事以待之耳。」上深然之。諭公曰：「觀女眞所爲，不如契丹遠甚。前此趙良嗣只與朕言彼有威有信，可以永遠爲援，賴爲差得卿去，不爾，朕無緣得知也。公因上疏論瀘溝致敗之由，皆童貫、蔡攸不能節制諸軍，而屬官李宗振統制王稟其罪爲大。李宗振本曹州一胥吏也，致位承宣使，爲貫腹心，貨賂公行，由是賞罰不明，將士解體。王稟初無武略，惟善附會，瀘溝之役，其軍實先退，乞將二人重加竄責。章凡三上，方施行。童貫歸自河朔，奸妄盡露，上務欲保全之，俾以公師致仕，貫乃怙權不捨，復用太師除豫國公，遍檄陝西河東經略司，告諭蕃官首領，若所在官司騷擾，令申貫審復聞



奏。公上疏論云、貫名爲致仕、乃預軍旅邊務、其害政侵官莫此爲甚、乞令凡事不得干預。上即以公疏劄示貫。執政以簡貴自居、凡國忌行香、率多託疾不赴。公奏謂、大臣如此、何以表率百僚。宜嚴立法繩之。詳定勅令、官舊以二員爲額、後乃增至七員、學士待制領在京宮觀者至有三十餘員。公奏謂、局事不加多、而領官數倍前日。有職事侍從官纔二十九員、今不任事者其數乃過之、甚失所輕重。宜加裁定。又疏、國家馭軍之法至爲嚴密、承平不試、卒惰而驕。比陽武縣卒憤坐倉價錢不如所欲、乃敢羣擊縣丞楊慶諒。向使慶諒殞于非命、彼知罪大無所容、則其爲患甚矣。願詔爪牙之臣講明軍法而振起之。往者雖不復加誅、而來者必可使無犯也。上皆行之。觀文殿大學士林攄培克其使臣丘大成、令陪過錢萬二千餘緡、致家計破蕩、無力供應、則又追捕其家屬繫獄。公奏、攄身爲國

執政大臣、而乃貪污害物如此、乞委鄰路監司盡公根治。攄坐是降秩二等。宦官李某之子雍奏、乞與某析居。某遂奏令雍認姓。公謂雍之悖德亂常、其罪固不容誅、而某爲近臣、聞其子妄有奏陳、不能頓首謝、乃敢肆爲忿戾、上瀆君父。故某亦降秩。時權要親故官于外者、秩將滿、多經營再任、致使孤寒之士擬官至于三四、有未霑寸祿者。公云、公朝仕進之路、豈可使不均如此。宜一切杜絕之。新法茶鹽初行、凡獲私販、論賞甚重、而部使者又起請州縣推勘、盡公者許保明推賞、朝廷從其請。公言、自古豈有決獄而立賞格者。此法若行、則希進之徒歆慕榮寵、馴致深刻、甚非所以示天下忠厚之意。奏罷之。揚洪二州闕帥、朝廷起孟揆、應安道爲之。公疏言、揆昨任吏部侍郎、與鄧之綱有私隙、至詐傳命、令諷張樸言之、坐此貶置。安道昨知平江府、政以賄成、公納貨賂、嘗爲臣僚論列。究觀二



人固非忠實靖共廉良愷悌者豈可驟當方面之重。皆罷領宮祠。宦官李環之子純雅詐爲御書、寅緣敗露、詔開封府獄根治、公奏、若天府研究純雅等罪狀明白、固當正典刑。然環爲之父、恬不覺察、奚可逃責。鄜延帥薛嗣昌輒執奏所辟司錄士曹、特免。河北京東漕司輒差贓罪失官之人、俾權親民職事。昌樂等縣起免夫錢、違元降指揮、恣爲侵漁。湖北提點刑獄臧時中在任姦贓狼籍。前知泗州汪希旦以失奉行常平事抵罪、後乃擢爲常平使者、都水監丞賈鎮嘗爲孟昌齡小吏、後乃擢任主客員外郎。公悉論列之、如此類甚多。上方信用公、故言無不從。磨勘轉朝請郎、差殿試詳定官、除兼侍讀。公正色立朝、其所彈擊皆將相權倖、或其親密、雖宸眷益厚、而怨仇多矣。乃上疏乞出、降詔不允。繼因登對面請、上曰、朕自用卿爲耳目之官、得聞所未聞、豈可輕去。朝廷非久當別有委任。會

上復起童貫宣撫三路、貫優蹇顧避、出不遜語、上再三敦諭、乃曰、臣昔平燕之時、惟不能深取信于陛下、致使周某乘間攻臣。今若周某仍任言路、臣終不能成功。上不得已、罷公御史中丞、以本官提舉亳州明道宮。其制詞云、至使功罪不白、是非無所辨。謂公昔言貫不當也。蓋貫總戎一十餘年前、後臺諫未嘗敢一言及之、獨公上疏廷論、故貫之怨公深入骨髓、日夜與其黨百端爲計、苟可以害公者、不遺餘力。適當再用、故要上以逐公焉。遇赦復右文殿修撰。貫聞之愈不平、必欲致公於死地。於是親疏誣公昔奉使時、與趙良嗣結爲死黨。及爲中司、無一言及之。上雖深知公、然重違貫意、復落公職、降授宣教郎、黃州居住。公聞命即日就道。凡在黃州三年、日以詩酒自適、無漂泊流寓之嘆。淵聖宣皇帝登極、復朝請郎、覃恩轉朝奉大夫。今上即位、首召還公、已而除吏部侍郎。諫官鄧肅以

新進不知前朝事實、率爾論公以謂嘗建伐燕之謀、乞誅殛以謝天下。賴上睿明、灼見本末、又知公嘗諫上皇飭邊備、故肅之章、留不降。公至南京、賜對、上疏勸上以固結人心爲本。又言自古輕舉妄動、未有不貽悔者。當艱難之際、尤宜慎之。上深以爲然。因諭公曰、卿宿德重望、當即輔朕、且宜頻對。又宣取公雄州之疏、翌日徧示大臣曰、周某所言甚有理也。大駕南幸、公扈從至揚州。時選人赴行在磨勘者、部吏以文字不圓備、百端沮難。公建明權宜措置、舉狀不到部者、依舊例用奏檢照、牒其投下文字、并當日上簿。若有諸般違礙在上簿日後者、并依放散舉主法。及今後監司郡守舉官、并此上印紙。自是孤寒改官不復留滯、而亦無敢僞冒者。中外依五月一日赦、舉文武材略出倫幾數百員、而遷謫之人刑部亦節次檢舉、朝廷例皆不行。公奏言、感人心者必示大信、豈可使德音既下、

而實惠未周乎。宜詔大臣亟以勅令從事。擢刑部尙書兼侍讀、遷吏部尙書、用覃恩轉朝散大夫。是時上初踐祚、銳意講學、公首在經筵、獻納居多。凡至安危治亂之機、必旁搜遠紹、極其規諫。時北寇稍息、而朝廷上下偷安朝夕、公請對、引孟子之言、國家閒暇、及是時、明其政刑、雖大國必畏之。今不乘時爲無窮之計、將何以善其後。願陛下深詔二府大臣、條天下之事、其大者有幾、於今者宜何先、人才如何而可得、民力如何而可紓、國用如何而可足、將帥如何而可選、兵勢如何而可彊、盜賊如何而可殄、奔競如何而可息、深謀熟講、果斷而力行之。毋以細務妨日力、毋尙因循度歲月、庶幾日積月累、以成中興之功。又疏、今宿將之在者無幾、而後來以武略稱者未見其人、乞詔武臣知州軍務分以上各舉、可以將兵者、召赴朝廷、量才授職。若有小警、付以一隊之衆、觀其臨敵、果能立功、則



與舉者同加褒賞、如其敗衄、責罰亦如之。疏奏、皆降付中書。會臣僚上言三省舊未合併爲一、文書簡徑、事無留滯、詔侍從臺諫集議、公謂、方今夷狄尙熾、盜賊未靖、軍防兵政所宜討究者甚多、何暇倍費日力、講求併省條例。且門下中書未可併而爲一、其利害固自明白。至若尙書省六部、自更新制、其格目皆與往時不同、今若驟復其舊、則命官置吏、別案分窠、條畫纖微、其類不一。兼舊吏類多辭職、新吏懵不曉事、猝然改更、深恐紛擾、愈失其緒。言者不過欲吏無冗員、省無滯事耳。神宗皇帝分建三省之初、人吏員額皆有常數、文書行移、各有日限。比年以來、吏多額外、而行移者多違日限、故中外以爲病。今若依官制元立吏額、及行遣日限、則無冗員滯事、而得併省之實效矣。公前後爲銓曹長貳、究心吏治、多所建明。時士大夫出身告勅、或遭兵火毀失、而行在案籍又不全、凡參選注

擬者、胥吏詰難、動涉歲月、公奏乞召官委保上簿、先次施行、續具勘當。又奏、前朝得罪黨人、旣依赦復官、所有合得恩數、宜行給還。公自南京賜對、上即有柄用之意。比兩府虛位、而公在病告、上亟欲用公、屢從大臣詢公動止。及勅知閣門事韓恕曰、如周某下參假牒子、可先期奏聞。虛心倚佇如此、而公已不復趨朝矣。公初謁告且滿一月、念銓選劇部、不可曠職、上章乞罷、詔不允。更二旬、再申前請。上謂大臣曰、當今人才如周某者、未見其比。雖病、固當留。乃降旨賜寬假將理、而公求去益堅。復上章、詞極迫切。上仍欲留公、樞臣郭三益爲公開陳、乃除龍圖閣學士、提舉江州太平觀。公旣遂所請、即欲歸吳中、已而疾亟、上章乞謝事。轉朝請大夫致仕、遂薨于揚州官舍。實建炎二年八月十六日也。享年五十有三。天子聞之震悼、對宰執大臣傷痛不已、特贈太中大夫、與所得恩澤。公未薨三

日前、飲食起居無異平日。一旦悉召諸子告之曰、吾素寡病、今病至此、殆不復起。自念平生行己蒞官、無甚可愧。今官爲常伯、終于牖下、尙何求哉。吾歿、棺斂皆當從儉。百日之內、即營窆窆。汝等各勉名節、視吾平時所爲、則吾無憾矣。諸子悲不自勝。勉公以寬抱、公笑曰、吾豈畏死者。至疾革、神氣不亂、聞家人哭泣、則正色目之曰、慷慨之士、豈當如此。公爲人剛毅端慤、粹雅疏通、而識量過人、喜怒不形於色、怡然有常、不爲事物遷動。平生無僞飾、其語言行事一出於誠。其所施設宏大高遠、外視雖如甚略、詳觀其中則細故小物莫不悉備。當時制詞稱之曰、德本天成、渾然不見圭角。行惟言稱、考之皆有宮庭。又曰、險夷百爲、信厚一節。公議不以爲過也。是以屢當國家委寄、任言責之重、使不測之域、謀畫注措、沛然有餘。仕宦守節概、未嘗屈己以徇人、不爲權利所奪。宦官梁師成以待士傾

一時、慕公名德、數願結交、公確然不納。梁之志愈堅、而公愈不回。梁雖甚銜之、然迫於公議、亦不敢加害也。鄭詳以公與其表兄焦公衍同僚、數憑焦以致委曲、公亦謝絕之。平生喜薦士、得人爲多、其與人無怨惡、雖有仇怨、不務報復。公爲童貫、蔡攸所擠、謫居黃州。及攸敗、妻子過黃、中途失船、適公有一大舟、其子欲求而不敢言、公聞即輟以與之。自初仕至終、不營產業。當公爲御史時、被旨詣西京點檢諸陵、家留京師、臧獲不戒于火、生生之具一蕪而盡。旣歸、視之略不介意。素不與人交利、雖親故饋遺亦卻之。至上有賜予、亦廉於所受。其使金國也、上遣中使黃珣賜黃金二百兩、公殿門外附珣奏辭之。上知公特從其請。後累差館伴、例有支賜銀絹、公又以連併受賜爲辭、降旨不許、乃止。公平居、雖祈寒盛暑、對僮僕亦無怠容。待物樂易、不爲表襮、重然諾、敦篤契舊、雖貴顯、每見故交、握



手道舊如平昔。其官州縣時、舉將後多尙在庶僚、公遇之必執門生之禮、每賓客進、與之抗聲極談、簡直明辨、見者莫不愛服。居處簡儉、無所嗜好、獨喜觀書史、日夜不倦。病甚、猶手不釋卷。於經術務究大旨、雅嫌近代僻儒鑿空臆說。至於諸子百家之書、莫不該洽而彊記、每語及一事、輒誦數百言。常病春秋左氏傳叙事隔涉年月、學者不得其統、於是創新銓次其事、各列于諸國。俾易覽焉。公以文學名於世、餘暇留心翰墨、得歐陽率更筆法。所著春秋左傳編類三十卷、史贊論五卷、武學講義一卷、奏議十卷、經筵講義四卷、斐然集二十卷、丹川集七卷、寧一堂雜藁十卷、齊安集五卷。其遺逸不錄者尙數百篇、別爲編集、而未及成。公初娶楊氏、朝奉郎致仕訓之女、早亡。繼室張氏、朝散大夫元衡之女、前公十年卒、俱贈淑人。六男、長曰某、舉進士、早卒。次某、通仕郎。次某、次某、并承務郎。次某、

通仕郎。次某、未仕。女一人、適迪功郎韓愿胄。孫男二人、曰可大、彌大。孫女一人。先是、公二年前卜地於平江府吳縣太平鄉楞伽山、妣淑人墳之右、穿爲壽藏、張淑人同墳。至是某等以建炎二年十二月二十二日壬寅奉公之喪而葬焉、承先志也。昔公任中司、嘗舉余爲代、是爲知余者。及在維揚、同省、又同侍經筵、故知公爲詳。今其孤不遠千里、狀其行、請銘於余、余何可辭。乃掇其大概而爲之銘。銘曰、

在昔有言、達德惟三。於斯三者、公實無慙。黠寇驕悍、萌芽未熾。公策其終、宜飭邊備。先事而圖、惟公之知。淮南薦饑、帝聞其呻。命公出使、往撫其民。饑羸老稚、數十萬人、賴以全活。惟公之仁。闍寺之梟、貫爲擅寵。厲階是生、實微且尫。惟其凶焰、衆悚而奉。仇然廷擊、惟公之勇。雄州之言、國之著龜。違而莫從、其悔何追。上聖嗣服、惟公是思。擢長天官、天

子是毗。方航而濟、喪其楫維。施而未光、爲世所悲。德必有後、天固可推。琢石幽宮、莫有愧辭。後欲考者、視此銘詩。

楊時撰 《楊龜山先生集》卷三六

戴明仲墓誌銘

道學不明、世儒蔽聰明于方冊文辭之間、不知反身入德之要。仁義禮智根于心、而措于事業、致懵昧于理亂之機、顛冥于進退之義、道大悖矣、而不知返也。嗚呼、間有懷才抱器、知學達本之士、可與有爲而湮沈下僚、無所遇合、且覬其逢、不幸短命死矣、可不爲之歎息哉。吾友戴君明仲是已。明仲資秉剛明、少而有立。嘗從洛陽程氏問學、知聖人之道近在吾身、退而隱于心、合于聖人之言、若自有得。方且沈涵充擴、日進而未已、優游鄉黨、期以有爲于世、而年纔三十有七、奄至大故。嗚呼、真可謂不幸也已。君之弟迅狀君平生世次曰、君諱述

溫州永嘉人。曾大父某、大父某、父某皆不仕。君爲童子、誦書日數千言、爲文操筆立成。從人受學、未幾已盡其能、輒棄去。肄業鄉校、較其藝常爲諸生先。因去遊京師、試廣文館。時趙丞相主文柄、得其所試業異之、意其爲老儒先生、擢異等、而君未冠也。由是知名京師。以爲太學士皆科舉口耳之學、爲未至、于是益遊四方、求古所謂爲己之學。尋居父喪、寢食如禮、廬墓終喪。中元符三年進士弟、調婺州東陽縣主簿。吏哀私錢完公舍以待、君至得狀、悉以俸錢償之。州徙君監銀冶、君以去辭弗獲。因慨然賦歸去來詩十首以自見、投檄而去。邑人爭挽留之。君徐譬之曰、仕宦顧當擇地耶。乃奉親屏居里中、優游累年、闔門讀書、若無仕進意。會州置學官、選爲臨江軍軍學教授。部使者交薦其能。俄以母憂解職、居廬哀毀得疾以卒。時大觀四年三月癸卯也。妻同郡劉氏右諫議大夫安上之妹。



子男二人、顒、穎。女三人皆幼。君孝友直諒、挺然不可屈折、世儒或訾其太高。博學精識、議論古今、審至。嘗自許欲有爲于世、蓋于其小者不屑就也。不幸短命、不克盡其才以死。有志之士、莫不爲之太息出涕。病且革、無一語及私。顧妻子在旁、無憐色。嗚呼、可謂難矣。其遊同郡林定爲哀君之文、亦曰、明仲蓋吾鄉之益友也。初舉廣文館進士、未試于禮部、喪其親。鄉人謂戴氏有子、將于此乎觀禮。明仲不惑于老釋陰陽之說、居喪哀毀、不食菜果。旣葬、廬于墓側、無一不如禮者。鄉人翕然稱之。登第、調婺之東陽縣主簿、有所不合、賦歸去來十首、投檄而歸。會行三舍法、選用師儒、復出爲臨江軍軍學教授。丁母憂、得疾于倚廬。醫曰、是疾也、不可以風盍遷諸內。明仲不可、曰、疇昔之夜、吾夢焉、有告以生死之說、吾其止于此乎。居六日而卒。嗟夫、生死亦大矣。而所守如此、則夫用舍行藏之際、其肯

動心于刑禍利祿而輒變其操耶。蓋其天資過人、遠甚、自少時爲文、已爲先生宿儒所驚異。益廣以學、則隆禮篤孝、不交流俗、議論超邁、器業不羣、將以大用于世也。不幸而止于此、其命矣夫。明仲樂人之善而少所可、辱與定游久、其亡也、哭之哀、故又爲詞以哭之、創大廈之崇高兮、非一木之能支。涉長流之浩蕩兮、豈芥舟之所宜。致黃唐于茲世兮、匪大人而曷爲。嗟聖賢之難偶兮、或異世而參差。幸皇明之在御兮、誕圖任于臯夔。彼蹈襲之爲學兮、邈層霄而管窺。望古昔以並驅兮、足次且而莫階。美夫人之智及兮、復勇義而弗疑。蹈中庸之正路兮、喟末俗之多岐。氣邁往而莫屈兮、肯折腰于夸毗。坐藝圃以導道兮、將舞雩而浴沂。何命極而至此兮、亶閔凶而獨罹。又神聽之昧昧兮、仍疾疚于荒危。豈吾喪之不勝兮、守禮經而弗移。夢有神以來告兮、實明者之前知。痛才難而莫贖兮、撫

世儒而孔悲。晝惻惻以忘食兮，夕太息而不寐。寓斯文以告哀兮，匪交情之獨私。政和元年六月丙午，其家舉君之柩葬于郡之西山太夫人墓之次，以行己爲同學來請銘。顧二君之言，其文義皆可傳久，于是并著之而爲銘云。

周行己撰 《浮沚集》卷七

校記

①入：原作「人」，據清道光二十九年綿邑洗墨池刻本

《南軒先生文集》改。

②忽：原作「息」，據右引改。

③姑：原作「如」，據右引改。

④誠：原作「篤」，據右引改。

⑤甲：原作「申」，據右引改。

⑥得：原作「無」，據右引改。

⑦浙川：原作「浙川」，據四庫本《龜山集》改。

⑧例：原作「列」，據右引改。

⑨八：原作「又」，據右引改。

⑩所陳：原作「陳所」，據右引乙。

⑪儕：原作「濟」，據右引改。

⑫比：原作「此」，據右引改。

⑬丹：原作「舟」，據右引改。

⑭州：原作「洲」，據右引改。



藏書

⑮疆：原作「疆」，據右引改。

⑯未：原作「宋」，據右引改。

⑰少：右引作「存」。

⑱三千：右引作「二千」。

⑲局：原作「周」，據右引改。

⑳成：原作「戒」，據右引改。

㉑疾：武英聚珍版書本《浮沚集》作「辭」。按此句疑衍

「去」字，似當作「君以疾，辭弗獲」。

宋儒碑傳集卷八十二

胡安國

寶文閣直學士左朝請郎致仕南陽縣開

國男食邑三百戶賜紫金魚袋贈左太

中大夫諡文定胡公行狀

本貫建州崇安縣開耀鄉籍溪里。曾祖容故不仕。祖罕故不仕。父淵故任宣義郎致仕贈中大夫。母吳氏故永壽縣君贈令人。公諱安國字康侯。五世祖號主簿公。五代中至建州之鵝子峰下釣魚自晦人莫知其所從來。後世相傳云本江南人也。父中大始讀書爲進士業時同縣有仙洲翁吳先生以六經教授中大往從之。翁閱其所寫論語尙書終帙如一無差舛。即妻以女。是爲公母令人。公初能言令人試教以訓童蒙韻語數十字兩過能記。大母余氏撫之曰兒必大吾門。七歲爲小詩有自任以文章道德之句。令人俾就外家學歲時得一

歸留不過信宿。日記數千言不復忘。年十有五遊學信州。一日有爲馬戲于學前者諸生百許人皆不告而出。教授歎人胡公行兩廡間聞誦書聲問爲誰得公姓名延之堂上詢所習業與所以不出。咨嗟歎賞出紙筆佳硯爲贈益勉之曰當爲大器。越兩年與計偕既而報聞遂入太學修懋德業不舍晝夜。是時元祐盛際師儒多賢彥公所從遊者伊川程先生之友朱長文及潁川靳裁之裁之才識高邁最奇重公與論經史大義一日博士令諸職長呈其文將考優劣而去留之皆爭先自送公繳還差帖願列諸生自祭酒以下相與稱嘆曰是真可爲諸生表率者矣。凡三試於禮部年二十有四中紹聖四年進士第。初殿試考官定公策爲第一將唱名宰執以無詆元祐語遂以何昌言爲首選方天若次之又欲以宰相章惇子次天若時策問大要崇復熙豐公推明大學格物致知正心誠

意修身齊家治國平天下、以漸復三代爲對。哲宗皇帝命左右再讀之、諦聽逾時、稱善者數四、親擢公爲第三。臚傳至陛前、俄有聖語宣問、師何人。公對曰、久處太學、在廷者皆以爲名對。授常州軍事判官、改授江陵府觀察推官、未赴。如荆門納室、道出江陵、帥臣監司一見、合章奏乞除府學教授、報可。會學校頽廢、職事者十餘人以廩米爲家、欺公年尙少、扞格頑冒、公再三鐫諭不悛。乃按其蠹弊、事盡屏之、於是遠近父兄喜、遣子弟來。公正身律物、非休沐不出、凡所訓說、務明忠孝大端、不貴文藝。繕修宇舍、繩度整立。任滿、除太學錄、謝絕請求、無所假借。蜀人劉觀、越人石公揆、輕俊有名、試選屢居上遊。觀代筆事覺、公揆薄遊成訟、人多爲之遊說。公曰、錄以行規矩爲職、規矩不行、奚以錄爲。且二人如此、非佳士也。竟致之罰。未幾遷博士、足不躡權門、期年用法改京秩。至政事堂、請外任、蔡

京色變、密使張康國欲薦以館職、不願就。會新學法、博士例除諸道提舉官、擬公河北路、公辭以南人不便於奉親、執政曰、祿厚莫如朔部者。公終辭、遂除湖北路。陛對奏曰、學校所以養育人才、非治之也。今法令具矣、當使學者於規矩之外有所恥而不爲。謹按聖門設科、成周貢士、皆以德行為先、文藝爲下、臣當以此仰奉明詔。徽宗皇帝首肯之。實崇寧四年也。到官、改使湖南。是時蔡京所行事、旣不善、而官吏奉承過當、愈爲民害、學校其一也。公撙節行之、禁其太甚、士子恃法自肆者必懲之。常曰、韓魏公最善行新法者也、所至訪人材、詢利病、禮賢士、慎刺舉。五年三月、例罷學事司、除通判成德軍。八月所罷司官、仍舊。時令人多病、厭道途之勞、留居荆門。公以便養有請、再章上、未報。會詔諸道學事官舉遺逸、公得永州布衣鄧璋、王繪應詔。繪已老、不願行、公請命以一官風勸學者。零陵



縣主簿李良輔方以贓被劾乃逃竄訴於朝稱二人者黨人范純仁客而鄒浩所請託也。蔡京特改良輔官與在京差遣命湖南憲司置獄推治人皆爲公膽落。帥臣曾孝廣來信公退語人曰胡康侯當患難凝然不動賢於人遠矣。用例冊致餽公不受。曾復書曰前此無不受者當明載於籍以彰清德云。蔡京以獄不成罷憲使陳義夫命移北路迄無請託狀直除公名勒停而曾及永守樂昭厚別教官皆坐黜。五人者非特無怨而問勞不絕。公問舍求田於漳水之濱治農桑甘淡薄服勤左右婉然愉色得間則專意經史及百家之文家人忘其貧而親心適焉。大觀四年良輔以他罪抵法臺臣毛注乃辨明前事有旨復公官改正元斷。政和元年張商英相除公提舉成都府路學事公以親年浸高旁無伙助叱馭泝峽皆所甚難即乞侍養曰臣而留令無所逃誅子若委親亦將安用得請滿

二年未朝參丁令人憂公侍令人疾食不盡器衣不解帶居喪哀毀營奉窀穸冒犯霜露一事一物必躬必親荆楚風俗素陋州里見公自致者如此然後知以慎終送死爲重公糲食逾年不能勝衣中大勉之力乃少進滋味以慰中大之意服除政和八年矣余深相薦名士十人九人者已遷拜公赴召至京師卧疾知舊交來勸勉或稱廟堂威怒以脅之公孫言而已所訪問惟醫藥居百餘日遂巡謁告而歸宣和元年除提舉江南東路學事復召對未受命中大捐館初中大常欲公及時報國榮家而令人又欲公保身崇德公承志以道既不拂中大之嚴訓且不失令人之素心及公赴闕辭未獲命也中大手書促之歸無復曩時督責矣中大感疾且一年公奉事節適如一日凡服餌禁戒中大必聽既免喪謂子弟曰吾奮迹寒鄉爲親而仕今雖有祿萬鍾將何所施遂致其事築室塋山



旁分置圖籍、瞻省丘墳、繙閱古今。慕陶靖節爲人、誦心遠之章、望雲倚杖、臨水觀魚、淡然無外營、將終身焉。宣和末、侍臣李彌大、吳敏、譚世勣、合章薦公經學可用、齒髮未衰、特落致仕、除尙書屯田員外郎、公辭不起。靖康元年二月、除太常少卿、公辭。再除起居郎、又辭。時女眞乘虛直擣京師、爲城下之盟。公移書大諫、楊公時曰、按春秋書齊人來歸鄆、謹龜陰之田、是田本魯田也。始失不書者、不能保其土地人民、爲不君諱也。太原兵勁天下、藝祖太宗自將再駕、而後入於版圖。河間、中山、北方重鎮、猶鄭有虎牢、虞虢有夏陽、秦之潼關、蜀之劍閣、吳之西陵也。今聞割以遺敵、不亦辱乎。按春秋齊侯侵蔡、伐楚楚使請盟、美而書來者、荆楚暴橫、憑陵中國、鄭在畿內、數見侵暴、齊侯伐而服之、則自此帖然矣。此門庭之寇、所當懲創、不可已焉者也。遠方犯闕、釋而不擊、反與之和、戾於聖人之訓、不

已大乎。按春秋鞏之戰、齊師敗績、遣國佐致賂、請盟、晉卻克欲以蕭同叔子爲質、而使齊之封內盡東其畝、國佐震怒、請收合餘燼、背城借一。卻克懼、反與之盟、而不敢復也。故聖人特書曰、及國佐盟、以明國佐一怒、折伏卻克、示天下後世忠臣義士、以克敵制勝在於曲直、不以強弱分勝負也。金人陵辱朝廷、人心同疾、非止卻克之於齊、四鎮三關、倘皆割棄、豈特盡東其畝而已乎。而城下結盟、親王出質、不競甚矣。按春秋徐子章羽斷其髮、攜其夫人以逆吳子、聖人特削其爵而書其名者、罪其不自強、無興復之志也。敵欲地則割要害而與之地、欲人則飾子女而與之人、欲金帛則傾府庫而與之金帛、欲親王貴戚則抑慈割愛而與之親王貴戚。假如敵請六飛會於遼水之上、不往則恐違其約、欲行則懼或見欺、又將何處乎。按春秋於寶玉大弓、失之書、得之書者、重傳器、戒不恭也。強敵

猝至、上下無備、取金帛於盜臣之家、以紓急、緩攻則亦可矣。似聞宗廟供器輸於敵庭、果有之乎。於寶玉大弓、孰輕孰重。於聖人失則書得、則書之意、又如何也。按春秋滅梁者秦也、聖人不書、秦滅而書、梁亡者不能守在四鄰、而溝公宮、亡其自致也。今勤王大眾不以擊敵而以治城池、金帛用物不以募戰士而以賂敵國、堂堂大宋、萬里幅隕、奚至陵藉如此其甚哉。主上初政、老儒在朝、四方俟觀安危所係、而外侮侵陵、國勢衰削、豈其既往言之不及乎。必有應之於後者矣。人以是知公通於春秋、雖畎畝堅卧、固非素隱忘世者也。朝廷促旨沓降、公幡然有復仕意。六月至京師、以疾在告。一日亭午、孝慈皇帝急召、坐後殿、玉色虛佇、勞問甚渥。公奏曰、明君以務學爲急、聖學以正心爲要。心者、事物之宗。正心者、揆事宰物之權也。自王迹既熄、微旨載於易、詩、書、春秋、時君雖或誦說、而得其傳

者寡矣。竊意陛下在昔潛德東宮、其於經籍所載帝王制世御俗之大略、必有所避而不欲問、官屬之司勸講者、必有所隱而未及陳。今正位宸極、代天理物、則於古訓不可不考。若夫分章析句、牽制文義、無益心術者、非帝王之學也。願慎擇名儒明於治國平天下之本者、虛懷訪問、以深發獨智、則天下之幸。臣又聞爲天下國家者、必有一定不可易之計謀。議既定、君臣固守、雖浮言異說、沮毀動搖、而初計不移、故有志必成、治功可立。陛下南面朝天下、越半年矣、而績效未見、紀綱尙紊、風俗益衰、施置乖方、舉動煩擾、大臣爭競、而朋黨之患萌、百執窺觀、而浸潤之姦作、用人失當、而名器愈輕、出令數更、而士民不信。若不掃除舊跡、乘勢更張、竊恐奸雄不忌、敵人肆行、大勢一傾、不可復正。上世帝王詢事考言、以圖成績、願咨訪大臣、何以修政事、禦外侮、令各展盡底蘊、畫一進呈、宣示臺諫。



如有不合者、使隨事疏駁。若大臣議訕、則參用臺諫之言。若疏駁不當、則專守大臣之策。仍集百執議於朝堂、衆謀僉同、然後斷自宸衷、頒之中外、以次施行。敢有動搖、必罰無赦。庶幾新政有經、民聽不惑、可冀中興之效。淵聖領之良久、問曰、卿學何所師承。對曰、孤陋寡聞、莫逃明鑑。淵聖曰、比留詞掖一員相待、已令召卿試矣。公對曰、臣壯年守官湖湘、得足疾、頽心榮進、亦已乞身。今日扶憊趨闕者、貪慕聖德、願瞻天表、一伸其志而已。於侍立之職、且不敢當、況敢聞異恩。語未畢、日昃暑甚、龍袞汗洽、公遂退而具奏。蓋自七月七日親奉玉音、被受堂劄、四上辭免、淵聖數予寬告。時門下侍郎耿南仲倚攀附之舊、凡於己不同者、即指爲朋黨。見公論奏、慍曰、中興如此、而以爲績效未見、是謗聖德也。乃言、胡某意窺經筵、不宜召試。淵聖不答。及公屢辭、南仲又曰、胡某不臣。淵聖問其迹、南仲曰、

往者不事上皇、今又不事陛下。淵聖曰、渠爲疾而辭耳、非有向背也。遇臣僚登對者、往往問其識胡某否。中丞許翰對曰、臣雖未識、然聞其名久矣。自蔡京得政、士大夫無不入其籠絡、超然遠迹、不爲所汙。如胡某者有幾。淵聖嗟異、遣中書舍人晁說之至公所居、具宣德意、令勉受命。且曰、他日必欲去、即不強留。時已九月初矣。公旣趨試、復上章乞外。有旨除中書舍人、賜三品服。南仲諷司諫李擢、侍御史胡舜陟論公稽遲君命、傲慢不恭、宜從黜削、以儆在位。疏奏不下。公乃就職。南仲旣傾宰相吳敏樞密使李綱、欲併逐善類、遂謂中書舍人許景衡、晁說之視大臣升黜爲去就、懷姦徇私、失事君義而黜之。公繳奏曰、二人爲去就、必有陳論。懷姦徇私、必有實迹。乞降付本省、庶可按據載諸詞命。不報。王安中責授散官、隨州安置。公言、安中自大臣建節知燕山府、委任重矣、而畏避童貫、專務

蔽蒙。民力殫殘、敵情變動、軍食缺乏、師徒失律、略不上聞、數奏祥瑞、以固寵祿。一旦敵騎深入、社稷幾危、推原本因、其罪與蔡攸等。乃居漢東近地、公論不以爲允。今并圍未解、朔部戒嚴、若非恃賞罰之公、厭服人心、何以攘卻外侮乎。安中移置象州。言者論內侍王仍、張見道、鄧文誥圖欲離間兩宮、將以遂其奸計、有旨令三省覺察。公言、圖欲離間兩宮、則罪不可赦。將以遂其奸計、則惡不可留。望深察衆情、及時裁處、以全慈孝之情。三人遂黜。應天尹葉夢得坐爲蔡京所知、落職宮祠。公言、京罪已正、子孫編置無遺、土地悉入縣官、家財沒於府庫、無蔡氏矣。則二十年間嘗爲京所引用者、今皆朝廷之人也。若更指爲京黨、則人才之棄於此時者衆矣。且黨論何時而彌乎。以臣所見、棄瑕舍過、消散朋黨、正在今日。乃除夢得小郡。中書侍郎何臬建議平則宜重內、遭變則宜重外、乞分天下爲

四道、置四都總管、各付一面、爲衛王室禦邊境之計。公上奏曰、內外之勢適平則安、偏重則危。東漢季年、王室多故、劉焉言四方兵寇由刺史威輕、宜改置州牧。及焉求益郡、劉表鎮襄陽、袁紹得冀、曹操取兗、爭相割據、自此不復有王室矣。今州郡太輕、理宜通變、然以數百州分爲四道、事得專決、財得專用、官得辟置、兵得誅賞、則權復太重、又非特州牧比也。使四人者果皆盡忠君父、則固善矣。萬一號召不至、如焉、表、紹、操所爲、又何以待之。五大在邊、古人所戒、以身使臂、於理乃宜。臣愚欲乞據二十三路帥府、選擇重臣、付以都總管之權、專治軍旅、每歲一按察、其部內或有警急、京城戒嚴、即各帥府所屬將應援。如此既可擁衛王室、又無尾大不掉之虞、一舉兩得矣。臬方得淵聖心、密陳京師不可守、則幸山南、因可入蜀。其意蓋自欲當南道、又以於公有推挽之力、必無駁異、及此奏上、淵



聖深然之、果力爭於上前、謂公專以異義爲高、不可信用。淵聖不能決、止令於四道各削其遠外州郡、命大名守趙野總北道、公奏曰、魏都望冠河朔、今爲天下重地、謹按趙野在政和間初爲侍從、首乞禁士庶用天王君聖等字、厥後置身丞轄、童貫、譚稹分掌兵柄於外、王黼、蔡攸、梁師成紊亂三省政事於內、造成兵革之禍、野居其間、不聞救正、以爲無所干預、則身在二府、以爲言而不從、則懷祿不去、何也。竊恐緩急必誤委寄、乞更用素有才術、歷練老成之人、庶可倚仗。詔命一出、難復輕改、疏入、不從。是冬敵大入、野遁逃、爲群盜所殺。西道王襄擁衆漢上、不復北顧、大略如公所策云。中書後省論資政殿學士詹度罪惡、自金紫光祿大夫降兩官、公奏曰、言者謂度首開燕山、罪不下於童貫。養成邊患、使朝廷不爲備、罪不下於王安中。廣行賄賂、故庇之者衆。今乃仍崇資領優局、舍邊境、就

鄉閭、纔削兩階、何名懲戒。昨日宸翰咨訪禦敵之計、聖心焦勞、群臣悚懼、莫知所出。追究亂原、無不切齒。於度望依王安中例施行、以厭公論。少釋河北憤怨。乃落度職。吏部侍郎馮澥上言、中書舍人劉珣行李綱責詞、實爲綱遊說。珣坐貶。公上言、李綱昨自樞密宣撫使除觀文殿學士知揚州、詞臣列其罪狀、不肯具草。而聖旨令以次舍人行下、是聖心不以繳奏爲是、未欲罪綱也。故珣先言厚於記功、薄於責過、以將順聖德之美。復言綱敗軍覆將、豈可不責、以申明賞罰之公。朝廷遂用珣言、罷綱。郡寄、又用諫官袁當可等言、置綱遠郡矣。澥乃節略珣章、中以險語、謂綱薄加朝典、未快輿議、不亦甚乎。從臣雖當獻納、至於彈擊官邪、必歸風憲、各有分守。今臺諫臣僚未聞緘默、而澥遽越職、此路若開、臣恐在位者各立是非、滋長怨讎、上瀆宸聽、非所以靖朝宇也。漢室之東、大興黨論、始以微

憾結釁、藉人主威福相排掣、卒皆誤國、馴致亂亡。而士大夫自謀其身者亦不能免、故君子謂始爲黨論者亦不仁矣。陛下無私好惡、廣開正路、而解稱黨與未殄、議論未一、宜察奸罔、早加懲戒。夫欲殄黨與一議論、此蔡京行於崇寧、脅制異己、遂其跋扈之謀也。何忍更遵用之。坐使群臣益分門戶、強者主盟、弱者附麗、徇私情、爲向背、置國勢於傾危、豈朝廷之福乎。陛下數降德音、追復祖宗善政、良法、而解獨建言祖宗未必全是、熙豐未必全非、推隆王氏之學、再扶紹述之議。國論紛紛、解之故也。若指爲敢肆奸言以惑衆聽、豈不可乎。然朝廷不以此罪解者、正恐人務雷同而言路壅也。今解乃欲以章疏加人之辟、苟合目前、不爲國家遠慮、望加詳察、別降指揮。臣孤立無朋、誤塵詞掖、苟有所見、不敢隱情。於是耿南仲大怒、宰相唐恪與詹度姻家、故亦怨公、論度太迫、何果從而擠之、有旨

除郡。果請除懷州、淵聖曰、懷當敵衝、可與東南。恪擬德安、果知公素苦足疾、聞海門地最濕、遂除右文殿修撰、知通州、蓋是年十月晦也。公在省一月、告曰、居半、每出必有論列。或曰、事之小者、盍姑置之。公曰、大事皆起細微、今以小事爲不必論、至於大事又不敢論、是無時可言也。公去國逾旬、敵復至城下。長子寅校書中秘、賓客每爲公念之、公愀然曰、主上在重圍中、號令不出、卿大夫之辱也。余恨效忠無路、敢念子乎。聞者感動。敵圍益急、有旨促召公及許景衡、竟不達。越明年五月一日、今上皇帝登極、公上言、崇寧以來、事不稽古、奸臣擅朝、濁亂天下。論其大者、凡有九失。上皇即位、日食正陽之月、下詔求言、曰、言而不當、朕亦不加罪。於是臣庶爭言天下事。及蔡京得政、公然置局推考直言、盡行竄斥、使上皇失大信於天下。一失也。上皇嗣位、文母垂簾、增置諫員、擢用名士、豐稷、王觀、鄒



浩、陳瓘諸人各以危言自效、公論既行、下情不壅、幾有至和嘉祐之風。及蔡京用事、放諸嶺表、於是天下以言爲諱二十餘年。二失也。立朝廷者爭爲歌頌、取說求容、祥瑞之奏未嘗虛月、至於災異大變、則匿不上聞、使人主不復知省修。三失也。廢格法、棄公論、市井儇薄而居宰府、世卿愚子而秉兵柄、臺省寺監清望之班、雜用商賈胥吏技術之賤、於是仁賢退伏、奸佞盈廷。四失也。士大夫進爲於元祐之初、與元符之末者、盡忠許國、不顧其私、乃誣以謗訕、竄逐下逮其子孫、追削上及其祖父。於是善類陷於黨籍、不能自明、而群飛刺天、讒諂益勝。五失也。奄寺得志、用王承宗故事而建節旄、用李輔國故事而封王爵、用田令孜故事而主兵權、用龔澄樞故事而爲師傅、生殺予奪、悉歸掌握、宰執侍從皆出其門。於是賄賂公行、廉恥道喪。六失也。變銓法而官制紊、變軍法而兵政弛、變泉貨法

而輕重失平、變學校法而風俗衰薄、變榷茶法而刑獄滋熾、變鹽鈔法而征賦倍增、變漕運法而倉廩空竭。法既屢變、吏得爲奸、民受其弊。七失也。用兵暴亂、軍旅數起、南復渠陽、西收扼郛、建石泉於成都、置珍播於巴峽、開古平於五嶺、築振武於河外、餽運艱險、勞民費財、積怨連禍、實基於此。八失也。牛羊用人、窮極奢侈、道宮王府御幸之館、園林池沼花竹之勝、運土塞路、伐木空山、民困而不恤、財竭而不慮。九失也。靖康之初、輕許割地、尋復堅守、已正濫賞、事即中變、號令無常、紛錯更下、而四海不知所從矣。余應求、李光以憲臺得罪、陳公輔、程瑀以諫省去官。趙令衿以獻書論事、黜送銓曹。潘良貴以奏對語侵、責司征市。於是臣庶結舌、而迷國誤朝之語入矣。淵聖東宮潛德、中外所知、不待贊也。至如未習爲國、則當進盡忠益以相弼亮、乃有稱頌春坊節儉、乞宣付史館者、亦從其請、而

責誚不加。李邦彥擢居上宰，張邦昌進位次輔，趙野等主審較基命之司，李稅等當肅政本兵之地。未數月間，登延宰執十有五人，遷轉如流，不孚人望，指爲蔡氏黨而罷。許翰指爲吳敏黨而逐，許景衡指爲李綱黨而去。劉珏等大臣爭競，至用醜語詆訐於朝，百執窺觀，互以邪說批根於下，苟可快其私忿，雖危國亡師，安行而不顧。都人毆擊內侍，出於積憤，非有私也。而府尹巡門，朝廷降詔，奄侍厲氣喧爭御側，此乃無禮於君，不可恕也。而詞臣論奏，僅得贖金。命帥宣撫而遣之，監視守禦京闕而付之總領。宰臣均逸，體貌不加，而臺屬召還，遣賜優渥，破吏部格而楊景得監殿門，破宮廟格而葉煥得除祠館。其餘紊亂規程者不可悉數。敵騎南牧，封境日蹙，賞罰無章，士不用命，調發嚴峻，民多失業。昔秦有十失，漢去其九，遂致興隆。崇寧以來，國有九失，淵聖即位而不知變，獨九重節儉，工

役不興，一事爲愈爾。八失不去，一事雖愈，欲正已傾之勢，難矣。陛下親睹覆車，如不改轍，豈有興復之望乎？夫有生不可無信，聖人以信急於食，君子以信重於生。按春秋幽之盟，魯莊公在會而不書者，齊侯始伯，仗義以盟，莊公叛之，首失大信。仲尼以爲大惡，故諱不書公，以爲後戒。願自今慎出詔令，無令反復，以去棄信之一失。興國必開言路，而賞諫臣，亡者反是。按春秋書陳殺其大夫洩冶於前，而載楚子入陳於後，明殺諫臣者必有滅亡之禍，不待貶絕而自見也。願自今開納直言，無令壅閉，以去拒諫之二失。導諛者召亂之原，按春秋不書祥瑞而災異則書者，絕諂端，垂警戒。正天下後世人主之心術也。願自今黜遠佞媚，無令得行，以去導諛之三失。名器者國家之寶，按春秋，非三命正卿者，姓氏不登於史冊，非有天子之命者，不書其官。至於有罪，雖以諸侯之尊，或黜其爵，卿士之



貴、或書其名。重名器也。願自今重惜恩賞、無令冒濫以去。輕用名器之四失。人臣義無私交、君子正而不黨。按春秋祭伯來朝、不書朝、祭叔來聘、不稱使、譏外交、戒朋黨也。願自今信任君子、抑絕小人、以去互分朋黨之五失。奄侍通傳內外、以一身兼僕妾之職、可謂賤矣。按春秋書閹弑吳子、不稱其君者、言閹寺之賤、不使得君吳子也。願自今門戶掃除、復其常守、以去信任奄寺之六失。爲國必師上古、必法祖宗、必戒末世危亡之漸。按春秋書稅畝、丘甲、田賦、曰初、曰作、曰用者、譏變古也。願自今遠稽上古、近法祖宗、以去輕易改作之七失。古者不以蠻夷弊中國。春秋內諸夏而外四夷、齊侯伐山戎、爲燕闢地、貶而書人、戒勤遠略也。人君職在養民、有國必先固本。按春秋凡臺囿門廐土木之工、必書於冊者、重民力也。願自今修明軍政、保固邦本、以去外事邊功之八失。震驚陵寢、則有衣冠

弓劍之悲。播遷沙漠、則有羹牆急難之念、積覆載不同之憤、懷滄溟不滌之恥。據九重之位、而不以解憂、享四海之奉、而不以爲樂、必期於殄滅仇敵、伸中國大義、則凡百臣子、亦將震懾奔走、捐軀殞命、而不辭矣。六月四日、召公爲給事中、會宰相黃潛善專權、妄作、斥逐忠賢、公再辭免、因奏曰、臣賦性疏拙、全昧事幾、前掌贊善、積日雖淺、適緣六押、兼管兵刑、所降詞頭、苟有未便、不敢觀望、迷誤本朝、須至盡忠、逐件論執、遂因繳奏、遍觸貴權、貽怒既多、幾陷不測。陛下方圖中興、而政事人才弛張升黜、凡關出納、動係安危、聞之道途、揆以愚見、尙多未合、臣竊寒心。而況瑣闥、典司封駁、倘或患失不言、即負陛下委任、其罪至大。若一一行其職守、動皆違異、必以妄發、干犯典刑、徒玷清時、無補國事。臣所以不敢當恩命者也。況臣自嬰危疹、多歷歲年、前後陳情、並關朝聽、辭榮處約、衆所共知。不

緣多事之秋、乃有計私之請。有旨不允。公三辭、因致書右丞許景衡、曰、強鄰肆擾、蠶食併吞、以若所爲、更欲兼制南北五胡、英傑所不能辦也。況今河朔遺民未甘自棄、朝廷主議、不棄中原、恭聞鑾駕巡幸淮南、盡護四方、東州群盜諒已消除、遼海鯨波想難直搗。願回天步、歸格宗祧、副七室憑依之靈、繫萬方歸向之望、此正不可失之會也。善爲國者、謹禮於至微。比聞民部郎官出督材用、忽慢條約、罪狀明白、直行罷黜、誰曰不宜、而下諸路根尋州郡管押、恐非所以習外方耳目也。按春秋王人不書姓氏者、蓋下土耳、而序於方伯連帥之上。唐制御史纔八品、衣碧、亦下士也、而將命出行、則節度使必具軍禮、送迎於道。此得聖人尊王室抑諸侯之意者也。故方鎮雖跋扈、而國祚延長。自今宜精堂選而重其禮。凡在京職事官出使諸路、略如唐制、苟有罪犯、內付憲臺、不使外方得行陵藉、則

朝廷之體不至於弱、而禮行於外吏矣。凡士民之必聽於縣、令佐之必聽於州、守將之必聽於按察、監司之必聽於朝廷、猶指之順臂、葉之從根、不可逆施之也。崇觀以來、每下赦令、必開越訴、以荆門言之、則造私醢、戶酗酒、學生鬻茶、猾吏訴郡太守於監司而罷之者三。以荆南言之、賈客豪民訴都鈐轄於朝省而罷之者二。使民習見犯上之可爲、而貴賤無等、此亂之所由作也。建炎赦令不知改更、豈撥亂反正之道哉。謂宜精選監司守令、重禁越訴、苟有故犯、以違制論。雖已經由而所訴虛妄、不移前斷者、加越訴之罪三等、則人知嚴上而禮行於庶民矣。自唐末用兵暴亂、禮法不行、五十載間變置十有餘君。藝祖受命、首修軍法、自押官以上、各以階級相承、小有違犯、罪至於死。然後行伍整肅、賊亂不興。崇觀以來、決遣衛士而斥責三衙、降配軍員而斥逐提點、於是無知之兵習於陵犯、

靖康之變、衛士祝靖之徒、委棄君親、破州略縣、至於此極。今既投換法、謂宜依周世宗顯德元年故事、悉行選揀、去羸軟、取精銳、藉如祝靖等類、別加裁處。選將明法、日教旬比、月一試而施賞罰、則人將不敢驕縱陵犯、而禮行於士卒矣。凡此三者、若緩而急、若迂而直、乃趨時救弊之要務也。靖康皇帝誠心願治、已及期月而澤不下流者、以諸方按察師帥皆宣和之舊、非糟粕書生、權豪親戚、則奄寺之奴隸也。以若等人位於民上、幸寇賊擾攘、恣爲奸欺以自潤耳。故內寇有三、係籍驕悍、習於陵犯之兵也。就招潰散、利於劫掠之兵也。人戶點差、憚於征役之兵也。三寇縱橫、而官吏又有甚焉。謂宜據今諸方憲漕功效已著者、旌賞之、功罪未明者、程督之、罪惡可知者、澄汰之。命侍從官以上各舉堪任職司者二人、審其才、具所宜以補其闕、則耳目明達而不蔽矣。至於諸藩與要郡亦如是、則

教條宣布而不墜矣。申明久任、斷以三年、使得展其才志、則小州下邑官吏之爲寇者無所措其手足、而三寇可消弭矣。國事以安民爲本、軍事以足兵爲要。輕徭薄賦、所以厚其生也。稱物量力、所以平其施也。扶善良、助貧弱、所以著其仁也。剔奸僞、鋤強惡、所以行其政也。若不正戶籍、則四事必格、求欲安民、乃以病民耳。既罷常平官、今歲適當造、宜令民皆以土田爲斷、而一一自言、凡私所蓄藏與馬牛廬舍、頗如舊法、悉皆闕略。田有隱匿、必沒縣官。諸詭爲官戶、因濫賞得比蔭補者、咸許首陳。命監司專以此爲守令殿最、庶幾四事可施而民可安。古者大國至於家邑、諸侯至於士庶、軍師有數、城堞有制、聯屬有分、器械有物。若不本先王法度而急於招置、則足兵乃所以起兵耳。夫律禁民蓄兵器者、所以息爭而收其柄也。今置巡社、使得自備、敢必其皆以禦賊而不自爲賊乎。夫尉司弓



手、巡檢土軍、大約不過百人、於以覺察奸細、良民猶有被擾者。今巡社人人執持凶器、絡繹道路、則必陵暴居人、困苦羈客、刑法有不能禁矣。又巡社首領將使與令佐抗行乎、抑猶以部民遇之也。抗行則名分不正、以部民遇之則有悖心、如唐初魯寧者矣。又今東南名藩帥府兵不滿千、而巡社總轄萬人、團結推排、權在百姓、借之名目而稱號同王命、給之朱記而行遣比公移、守令徒有統制虛名、莫之能制矣。又巡社悉行於諸路、以爲守令殿最、不出歲月、必當坐得數百萬之衆、挽強者解發推恩、廣加激勸。又選將壅而不行、復加裁損、則必指爲釁端、而禍變起矣。謂宜詳議審裁巡社之法、使無後悔、施於河朔、以禦金兵。而東南諸路、有便於保甲者、宜增修其法、別行排造。其便於弓手土軍者、宜增置其數、精加教閱、則兵可足而亂可息矣。夫易積而難通者、事也。自大觀赦令廣開恩倖、

眞僞渾淆、軍興之後、恩霈相仍、賞典踰越。百司緣此、竊弄權柄、招賕納賂、百事滯留、四方急奏、待報稽遲、百姓訴陳、漫無可否。蓋六部諸司事皆稟於都省、中書取旨、門下審駁、行遣迂回、此政事所以日壅而不決也。夫宰相者、啓沃人主、進退賢才、阜安百姓、天下之事無所不統者也。而日覽詞訴、又各兼一省、互相關制、則失其職矣。謂宜合二省、正宰相之權、使得專行其職。而六曹之事皆決於長官、應奏上者直奏上、應下行者直行下、自非關大體、有改更、更不經由僕射、丞轄、則事不稽壅矣。往蔡氏時、首與黨論、塞天下之口、汲引群小、輕用名器、交結閹尹、汨喪廉恥。今宜一切反其行事、乃可以撥亂反正、殄讎雪恥、使天下士大夫伸眉吐氣、食息世間、無所愧矣。黃潛善諷給事中康執權彈擊、謂不合辭免、乞重譴黜。中書舍人劉觀實有力焉。上恩止罷除命。建炎三年反正之始、樞密使張



浚薦公可大用、申命前除。公辭、因致書宰相呂頤浩曰、伏讀四月八日赦書、首稱遵用嘉祐條法、遠方傾耳拭目、固以仁宗皇帝盛德大業、跂望主上、而以魏國忠獻輔佐勳績、期於相公也。夫嘉祐政事、其大要本於愛民、始於審謀、成於果斷。置寬恤司、詔均田稅、募耕唐鄧廢田、收諸坊監及牧馬餘田、賦貧民、籍戶絕田租、置廣惠倉、出百萬緡、賜諸路常平爲糴本、弛江淮茶禁、通商收稅、罷提點刑獄、武臣守令治有善最者、使久於其任。凡此數端、事方經始、必博采衆謀、詳究利害、立爲條約、委曲周盡、故議成而舉朝不異、令下而所至奉承、行久而弊端不見。至於軍政修明、戎行輯睦、六軍聳聽而驕惰革、邊方震懼而暴橫消、則其政事本於愛民、審謀能斷之明驗也。今朝廷欲理兵政以強國、而官吏不知恤民以養兵、是欲稼之長而涸其水、欲木之茂而去其根、則與嘉祐本於愛民之意異

矣。至於衆謀紛紜而國論未定、命令交錯而民聽未孚、法制數更而下不知所守、其與嘉祐審謀能斷亦異矣。夫審謀而不斷、罔克有成、斷果而不藏、必貽後悔。惟相公深究嘉祐政事本末、專務愛民、凡新舊法度與增添創置一切擾民之事、置司討論、參稽衆謀、窮極利病而後罷行、則政事可立、民心可安、軍旅可強、讎恥可雪、宗社可寧矣。朝廷遣使詣公所居、詔州郡以禮敦遣。寅時修起居注、上賜之手札曰、卿父未到、可諭朕旨、催促前來、以副延佇。公以建康東南都會、上旣在是而眷待如此、行次池陽、會聞車駕移駐姑蘇、將踰浙而東、公重感疾、遂具奏而返。是日亦勅下、除公提舉臨安府洞霄宮。紹興元年十二月、除中書舍人兼侍講。公辭、因致書參政秦檜曰、春秋大略貴前定、是故撥亂興衰者、其君臣合謀、必有前定不可易之策。管仲相齊、狐偃輔晉、樂毅復燕、子房興漢、孔明立蜀、

王朴佐周、莫非策畫前定、令出必行、故事功皆就。建炎改元、聖主憂勤、願治於上、大臣因循、習亂於下、國制搶攘、漫無定論、玩歲愒日、寢失事幾。於今五年、已極紛擾、天下之事、未有極而不變者也。至於極而不變、則危者遂傾、亂者遂亡。考今民情、尙未潰散、猶可更張、雖事幾已失、無半古必倍之功、而危可復存、亂可復治、無傾亡之患必矣。宜及時建白前定之計、振頽綱、修弊法、變薄俗、蘇窮民、庶幾觀聽有孚、以啓中興之兆。春秋序正官名、而綱紀重、事責歸宰相、蓋位隆則所任者大。上則啓沃人主、經理朝綱、中則選用百官、賞功罰罪、下則興利除害、阜安兆民。仰而深思、夜以繼日、猶恐有不得者、而暇省文書、接詞訴乎。頃者、遵用元祐大臣奏議、合中書門下二省爲一、而事不分決於六部、是循名而不得實、併與不併、無以異也。宜及時建白、令列曹尙書各得專達、各辟其屬、久於其任、責

以事功、而宰執不復親細務、庶幾奸蠹消除、漸可爲矣。春秋以好生惡殺爲心、猶於叛逆之黨必誅而不赦、以用兵侵伐爲戒、獨於救患解紛、惟恐中止遷延而欲其速也、以此見聖人之情矣。蓋亂常毀則赦而不誅、則天理必滅、賊虐無辜、視而不救、則人道必淪。故罪在五刑、上天所討、大眚俱肆、春秋譏之。苻秦之世、凡叛逆者必加原宥、終復失邦、措身無所。比歲盜賊毒徧諸方、皆奸惡之徒乘隙肆暴、非迫饑寒、官吏不恤、弄兵潢池之赤子也。而謀國者盡用招安、不吝濃賞、遂使軍民傾心健羨、遠近縱橫、莫之能止。宜及時建白、乘破李成、馬進之鋒、盡掃三楚綠林之聚、誅魁首、散脅從、庶幾遺種餘民復得解衣而寢矣。春秋貴守土疆、恥於喪地、戒於失險。昔尙父周公以盛德大勳受封齊魯、而儉於百里、雖列壤南面、而大夫必命於王朝。方伯雖得專伐、而遣將出師必請王命。昨建分鎮、舉

河南、汝、孟、帝都之地合爲一鎮、輕以授人、若此、類可疑一也。廢置僚屬、事無待報、二也。足食足兵、專征闔外、三也。舍建康、棲東越、而以湖北爲分鎮、四也。詔令已行、誠難反汗、然有應機、無害於信者、宜申述前詔、得專征者、謂攘外寇、討亂臣、如李成、馬進之比、則當不拘常制、或無故舉兵、自相吞噬、必以擅興坐之。又別降指揮、以湖北一路與諸鎮事體不同、當仍舊制、亦無失信之嫌。宜及時建白、保固形勢、倚爲基本、庶幾有恢復之期矣。春秋大一統、遵王命、惡臣下分權、諱賤人犯上、歷紀王正而不私朔、使舉上客而不稱介副、微者名姓不登於史冊、所以嚴分正名也。比者雖命江表三省復歸行闕、百司庶務決自天臺、而宣撫重臣久居外服、諸方守將並假便宜。夫以便宜從事、本爲出師、臨機奏報不及、明有建炎赦文矣。諸路後來並不遵稟、或以察訪爲名、而擅按他路、截留公賦、編營師

臣、執殺郡守。或以節制爲名、而擅兵外境、專斬命官、直轉資秩、移易守將。或未被受指揮、先次便宜行事、或擅罷堂除監郡、自辟別路正官、凌蔑朝廷、於斯爲甚。宜及時建白、收斂權柄、以弭分裂之形、嚴分正名、以遏侵凌之勢、而後大經可正、民志可定矣。春秋惡以邪人塞言路、慎於遣使而重於用民力。臺諫者朝廷綱紀所憑也、監司者外臺耳目所寄也、守令者宣教條均賦役百姓所恃以安其生也。辨小事而不及大政、彈小吏而不及大官、三綱淪而不扶、九法斁而不救、則朝廷紀綱無所憑矣。漕臣理財賦而公私匱竭、憲臣理刑獄而盜賊公行、上下相蒙、莫知糾察、則外臺耳目無所寄矣。惠澤壅而不宣、教條廢而不守、暴虐百姓、與奸爲市、貧窮孤弱、冤苦失職、則田里無以安其生矣。宜及時建白、精選監司、刺舉郡守、精選郡守、刺舉縣令。明詔臺諫官、使論奏大事、無入小言、則綱紀可



肅視聽可用、賦斂可平、民力可裕矣。春秋戒失兵權而嚴於軍律、以三綱爲本、以民事爲要、以賞功罰罪爲先。昨者屢降詔書、專理軍旅於行事、竊有所疑。僞楚篡逆之臣也、許錄其親屬。金人不釋怨之讎也、而遣使請和。其於三綱有未正也。河南江北群盜嘯聚、焚燒倉庫、靡有孑遺。波漢之陽、外薄五嶺、急征橫斂、不務勸農。其於民事有未急也。誤朝迷國之人、與盡忠死節之士、恤終贈典、略無差等。是賞未足以勸忠也。或擅興專殺、或罔上奏功、罪狀明白、典憲不申、是罰未足以懲惡也。然則何謂理戎旅乎。本則不正、治於末流、雖力扼虎、氣蓋世、必無成功。而謂安定天下在於長槍大劍、此楊邠、史洪肇所以喪身及其國也。可不戒乎。宜及時建白、行春秋理戎之法、使天下心悅而誠服、則盜賊可弭、邊土可拓矣。春秋尊嚴廟制、而謹於祀禮、故古者師行必載廟主、寓戎田獵、以乾豆爲先、戰

而必勝、其有以乎。頃者南狩、神主豫選、洪、虔、館、御、薦、享、未、肅、奉、常有請、顧謂遷移窮僻、爲已試之效、至乞更擇五嶺之西、迎奉前去者。時方渙散、格廟爲本、奉先既隆、人心自屬、而獻議若此、如禮樂何。宜及時建白、尊崇禮祀、嚴致孝享、則人知所從來、而天下服矣。春秋不與公族大夫專政用事、而以親賢爲急。聖主屢詔諸方、津遣宗室、俾赴行在、優加寵獎、誠以昨者皇族北徙、枝葉已疏、必施茂恩、以滋根幹。宜及時建白、上稽帝堯、明峻德、睦九族之義、中循周漢、急親賢之隆、下掃六朝、孤立之弊、則王室益強、國勢磐固矣。自崇寧以來、邪說盛行、公論廢格、獻言者以亂制爲能、不期於定制。從政者以擾民爲事、不務於安民。用人者以辦事爲才、不求於曉事。望治者以速成爲策、不冀於美成。取快目前、積成後患、至於綱紀大壞、宗廟丘墟、皆此曹所致也。積習成風、至今未殄。夫欲撥亂世反之



正者、必變衰亂之俗、欲變其俗者、必去衰亂之臣。今衰亂之臣死亡無幾矣、然猶內歷華途、外典方面、間有廢黜、尋復寵升、毀譽不核其真、賞罰不當功罪、使聖上憂勤願治、未有見效者、亦皆此曹所致也。天下有公、是非出於人心、不可易者。今國步艱危、民情搖動、宜乘勢更改、轉敗爲功。不然大勢益傾、不可復振矣。朝廷不許公辭、又遣使至所居、公遂行、以時政論先獻之。定計論曰、臣聞自昔撥亂興衰者、必有前定不移之計、而後有舉必成、大功可就。修內政、張四維、師帥不遣、上卿伐國不動。大衆教民懷生、示信討貳、此齊侯晉文前定之計也。取關中、據河內、大封同姓、以懲孤立、減省官吏、以息百姓、抑制將帥、保全功臣、此高帝、光武前定之計也。斬高德儒、叱字文士、及以遠佞人、賞孫伏伽、禮王、魏以開言路、宣示好惡、使民向方、薄賦輕徭、選用廉吏、此唐太宗前定之計也。陛下履極六

年、以建都則未有必守不移之居、以討賊則未有必操不變之術、以立政則未有必行不反之令、以任官則未有必信不疑之臣。奕者舉棋不定、不勝其偶、況立國而不定乎。夫難平者事也、易失者時也。舍今不圖、後悔何及。人主廣覽兼聽、不可自專、宰相擇才使能、不可自用。望賜咨詢、僉定國論、謀所以前定者。建都論曰、立國者必建都、必據形勢、握輕重之權、必居要津、觀方來之會、如北辰在天、安於其所、不可動也。陛下駐蹕金陵、本以舊邸號稱建康、降詔爲受命之符、傳播天下、則可都者一也。自劉先主、吳孫氏、諸葛武侯一代英雄、周游吳楚、皆稱建康王者之宅、則可都者二也。北據大江、外阻長淮、隔絕奔衝、難於超越、則可都者三也。有三吳爲東門、有荆蜀爲西戶、有七閩二廣風帆海舶之饒爲南府、則可都者四也。諸路朝覲、郡縣貢輸、水陸舟車道里適等、則可都者五也。凡都北者

必關境於南、而都南者必略地於北。昨者鑾輿時邁、狩於吳越、則王道所謂望實俱喪、而晉不果遷之地也。三省百司寓於南昌、則李煜避周、徙自秦淮、卒不能振之所也。國勢一統、不可數分、國都一定、不可數動、與北人居穹廬、逐水草、無城郭宮室、市朝者異矣。今宜還都建康、環諸路而中持衡、則人心不搖、而大事可定也。設險論曰、按春秋書晉師伐虢、滅下陽。下陽者、虞虢之塞邑也。塞邑既舉、則虢已亡矣。聖人特書、以示後世設險守邦之法。故魏人都許、不恃方城而守襄陽。蜀人都益、不恃劍門而守漢中。吳人都秣陵、不恃大江而守荆渚。夫荆渚、江左上流也。北據漢沔、西通巴蜀、東連吳會、真用武之國。故楚子自秣歸、徙都、日以富強。近并穀、鄧、次及漢東、下收江黃、橫行淮泗、遂兼吳越、傳六七百年而後止。此雖人謀、亦地勢使然也。後逮漢衰、劉表收之、坐談西北。先主假之、三分天下、

關公用之、威振中華。孫氏有之、抗衡曹魏。晉、宋、齊、梁、倚爲重鎮、財賦兵甲當南朝之半。其爲江東屏蔽、猶虞虢之有下陽也。今欲定都建康、而以湖北爲分鎮、失險甚矣。按湖北十有四州、其要會在荆峽。故劉表時、軍資寓江陵。先主時、重兵屯油口。關公、孫權則并力爭南郡。陸抗父子則協規守宜都。晉大司馬溫及其弟冲、則保據渚宮、與上明、此皆荆峽封境也。今割以與人、使跨長江、臨吳會、猶居高屋建瓴水也。獨無虞虢下陽之慮乎。臣謂欲保江左、必都建康。欲守建康、必有荆峽。然後地形險固、北可出秦甲、西可下蜀貨、血氣周流、首尾相應矣。又曰、昔人謂大江天所以限南北、而陸抗乃曰、此守國末務、非智者所先、何也。杜預嘗襲樂鄉矣。胡奮嘗入夏口矣。賀若弼嘗濟廣陵矣。曹彬嘗渡采石矣。則其險信未足恃也。雖未足恃、然魏武困於居巢、曹丕困於濡須、拓跋困於瓜洲、苻堅困於



淝水皆不得渡、則其險亦未可棄也。設險以得人爲本、保險以智計爲先、人勝險爲上、險勝人爲下、人與險均、纔得中策。方今所患、在於徒險而人謀未善爾。地有常險、則守亦有常勢。當孫氏時、上流爭襄陽而不得、故以良將守南郡與夷陵。下流爭淮南而不得、故以大衆築東興與皖口。中流爭安陸而不得、故以三萬勁卒戍邾城。邾城、今黃岡是也。今欲固上流、必保漢沔、欲固下流、必守淮泗、欲固中流、必以重兵鎮安陸。此守江常勢、雖有小變而大概不可易者也。今強敵侵河朔、叛臣擾山東、淮北京畿諸鎮處危疑之地、大江設險、未可輕棄。若委任得人、則不特可保江左而已。制國論曰、凡制國者、必周知山川形勢、土地所宜、然後可與謀。荊州在江漢沮漳之間、水陸沃衍、乃足食足兵要地。江左六朝所以必爭、而不肯失也。棄爲分鎮、使法得自立、兵得自用、財得自理、官得自命、即與戰

國諸侯無異、而非上世封建之法也。宜有更張、獨仍舊制、通荊湖憲漕二司治盜理財、而以襄陽隸湖北、岳陽隸湖南、鄂渚隸江西、則地理連屬、形利勢便矣。又曰、變更舊制、不稽今古、則事不可行。近歲荊湖變更舊制多矣、於國家形勢初無所益、徒困兩路之民耳。今既復南北兩路、宜罷荊峽分鎮、仍舊制帥司於荊南、一便也。公安軍宜仍舊廢爲屬邑、二便也。靖州置在崇寧元年、自鼎澧應副、歲費二十七萬。今此二州既皆殘毀、宜仍舊廢爲渠陽砦、三便也。武岡軍置在崇寧四年、自邵衡永應副、費亦不貲。今此三州既皆空乏、宜仍舊廢爲武岡縣、四便也。四者仍舊、創添窠闕、悉從除削、省併官吏、裁損文書。有所謂刀弩手、博易務、營田司事、皆欺罔驅民爲盜者也。宜依往年禁止保馬茶鹽法施行、以戒誤國害民之賊。然後國制定、民心安矣。又曰、昔祖宗宅都於汴、其勢當自內而制外、是

故置京西路、而襄州在漢水之南、則以制湖北也。置湖北路、而岳鄂在荆水之南、則以制湖南與江西也。今建都江左、未能恢復中原、則當自南而制北。置於江西者、治南昌、而分兵屯鄂。置於湖南者、治長沙、而分兵屯岳。置於湖北者、治荆南、而分兵屯襄。則東南之勢全、恢復之基立矣。今安撫大使古州伯也、形勢必相屬、而後能相援、有無必相資、而後能相成。五嶺之外、財賦盛於東南、兵馬出於西北、宜置大帥一員、兼統二廣、以殿南服。荆湖殘破、北路尤甚、若置大帥、必兼領夔府。蓋峽中有鹽、米、耕牛、而無曠土、荆渚有沃衍桑田、而無餘田。若弛瞿塘之禁、懋遷有無、商旅自西而入、物貨沿江而下、不越數年、荊州富盛、形勢可成矣。恤民論曰：保國必先恤民、而恤民之事有五：一曰除暴、二曰擇令、三曰輕賦、四曰革弊、五曰省官。近歲除外暴者、主通和、竟爲敵國所誤、不敢用兵、而其流毒遍

中國自若也。除內暴者、用招安、竟爲盜賊所誤、不敢用兵、而盜賊毒遍天下自若也。爲民父母、安得若是、愬又官爵之。其與成湯爲童子報讎、不亦異乎。今劉忠殘黨蹂數郡、曹成反復劫帥臣、理無可赦。宜早加殄滅、肅清江湖、然後精擇縣令、一意撫綏、則民心安、邦本固矣。近歲此官冗濫已極、宜以五說稍革其弊：籍中外嘗爲臺省寺監官、依倣漢制、分宰百里、俟有殊績、即不次擢用。又增重事權、優假其禮、許借服色、厚給廩餼。凡軍馬駐本縣者、並聽節制。其經由者、悉從階級、以免將士陵辱。示百姓瞻仰之尊。則又據今縣分戶口賦入多寡、輕重分爲三等。上縣朝廷選差、中縣吏部注擬、下縣帥臣監司通共奏辟、不得侵互、立爲定格。仍用宋元嘉法、以六期爲斷、革去三年爲任、兩考成資與堂選數易之弊、使吏無苟免、民心有係。凡三等縣皆以四條糾正稅籍、團結民兵、勸課農桑、敦勉孝

弟。俟及三年考其事效、已就緒者、就行旌賞、未有
倫者、嚴加程督。如此則民心安、邦本固矣。焚林而
田、非不得獸、而明年無獸。竭澤而漁、非不得魚、而
明年無魚。以近事驗之、京東西路歲入凡一千萬、
其餘山澤之利、在祖宗時捐以與民、不盡取也。百
姓歸戴、無有二心。及李彥等取爲西城之租、窮竭
民力。其時若有言罷此、培尅、然後國用足、則必指
爲妄言也。然百姓愁苦轉而爲盜、今此四路所入、
不歸王府五年矣。荆湖南北歲入凡五百萬、其外
豈無遺利。在祖宗時捐以與民、不盡取也。百姓歸
戴、無有二心。及部使者取之折變、則有一折、兩折、
三折、收糴則有均糴、敷糴、補糴、散引則有麴引、鹽
引、茶引、受納則有一加、再加倍加。其時若有言罷
此諸色、然後國用足、亦必指爲妄言也。然百姓愁
苦轉而爲盜、今此兩路所入、不歸王府三年矣。乃
知有若所謂。百姓足、君孰與不足、信不誣也。今封

境日蹙、賦斂日重、百姓日貧、田萊日荒、更臨之以
貪吏、困之以弊法、是爲敵國驅民也。願詔大臣、速
講輕賦恤民之事、爲生財足用之源、以京東西、湖
南北爲至戒、則民心安、邦本固矣。凡爲國以利不
以義者、皆自小人始、爲其所見者小、不知大體、法
所以弊也。祖宗時以義爲利、四海無困窮之苦、天
祿永安、所利大矣。姑以鹽法論之、行於西者與商
賈共其利、行於北者與編戶共其利、行於東南者
與漕司共其利。大計所資、均及中外、所謂以義爲
利也。崇寧首變此法、利出自然者禁而不得行、則
解池是也。利在編戶者皆入於官府、則河朔是也。
利通外計者悉歸於朝廷、則六路是也。諸路空乏、
乃復百種誅求、尤不能給、民窮爲盜、遂失歲入常
賦以數千萬計、則鹽法實致之耳。陛下宜鑑前失、
有所改更、久而未也。天下望焉。略以湖南一路言
之、昔日歲課一百萬緡、本路得自用者居其半、故



斂不及民而上下足。變法以來，既盡歸之朝廷，則本路諸色支費皆出橫斂。至如上供舊資鹽息者，猶不蠲除，民所以益困也。又略以道州一郡言之，歲認上供錢二萬緡，往時本州歲賣鹽息常倍此數，故斂不及民而上下足。今上供錢仍舊，而鹽息不復有矣，乃至以麴引均科，此民所以益困也。又略以來陽一邑言之，有未變法前官所自運鹽，有既變法後客所拘納鹽，封椿日久，既緣軍期支用，而鹽司必欲追索，朝旨亦令撥還，不知何自而出，豈得不取於民。此民所以益困也。以一路一郡一縣觀之，則他處可知矣。今權貨所入，歲以千萬計，其利至厚，謂宜遍下諸路，一一檢會，凡若此類，悉蠲除之，以活百姓，使稍安其業，不至爲盜，長納二稅，存國家大利之原，不亦善乎。權酷之弊亦極矣，略以道州言之，課額既高，歲有虧欠，即抑勒專知牙校，令兼管州倉，俾因受納，取足於稅戶，其害爲

如何。此民所以益困也。又以邵陽言之，酒課歲約二萬餘緡，而折稅爲糯者凡六千斛，糯貴於粳，價幾一倍，其他固未論，此民所以益困也。近者嘗下諸路會計，而州縣利此爲造弊之端，不以實聞。固當斷以必行，令凡係官監酒務，許百姓買撲，入納淨利，與轉運司及本州支用。收官務年費米麥等，專以贍軍，兼濟公私，存活百姓，使稍安其業，不至爲盜，長納二稅，存國家大利之原，不亦善乎。如此庶幾民心安，邦本固矣。自崇寧以來，中外創添員局，重以濫賞，不勝其冗，蠹國生亂，至今未革，而又加甚。兵官舊係兩員者，添差至於七員八員而未止也。監當舊係一員者，添差至於四員五員而未止也。其餘荒殘州縣，未有百姓，先置官司，凡是舊員一一填足，又多不應差注之人，其爲民害，不異寇賊。考於春秋，以民爲重，而大夫次之。考於孟子，以民爲貴，而社稷次之。故養民者陛下之職也。願



亟行併省、以建武爲法、既不病民、所省官吏使居閒散、稍捐廩祿養之、亦無失職之嘆、庶幾民心安、邦本固矣。立政論曰、人主宰臣必先明其所職、而後政可立。選擇忠賢以爲輔弼、任而不疑者、人主職也。薦進人才、布列中外、賞罰不私者、宰相職也。唐太宗旣黜封德彝邪說、任房、杜爲相矣、又敕尙書庶務並屬左右丞、而責二公以廣求賢人、隨才任使。此委相臣以其職者也。陳平旣不答文帝決獄之問、自謂所主佐天子理陰陽矣、而召河南守吳公爲廷尉、吳公治平爲天下第一、其能致民無冤可知。此使九卿各得其職者也、而政有不立乎。陛下以宰相不可非其人、頻有選任、可謂得人主之職矣。然而政事未立者、竊恐所以責任異於唐太宗、而宰相所以自任未若陳獻侯也。夫坐政事堂、受詞決訟、弊精神於簿書、而進退人才、賞功罰罪、有未察焉、則失其職矣。政何由立乎。陛下以庶

務決之六曹官長、皆得專達、並如元祐大臣所請、自非大事、不復資白、則中書之務簡矣。然後專責宰相、以慎簡六曹長貳、諸路帥守部使者、及上縣令宰、咸得其人、而政治不建、未之聞也。又曰、三綱軍國政事之本人道所由立也。三綱正則基於治而興、三綱淪則習於亂而亡。春秋宋華督有不赦之惡、齊魯陳鄭同會以成其惡、受賂而歸、天子不討、方伯不征、咸自以爲利也。未幾、陳有五父之亂、齊有無知之亂、鄭有子突、亶儀之亂、魯有叔牙、慶父之亂。數十年間、四國舛逆、幾至喪亡、則以昧於堅冰之戒、不能辨之於早也。春秋備書於策、以明三綱之重、爲後世鑑、深切著明矣。昨者張邦昌挾女真僭名號、援契丹立晉爲例、分遣使人布諭諸路、直下赦令、倍行恩賞、原其用心、與華督何異。陛下特施寬典、賜死於隱、而不尸諸市朝、已失刑矣。及敵騎南驚、乘輿渡江、黃潛善及其黨事窮計迫、

乃指邦昌爲金人所立而迫之至死、遂以致寇、欲自解其誤國之罪、至其宗族皆命以官。是訓誘亂臣賊子、使利於爲惡、此臧哀伯所謂百官象之、又何誅焉者也。於是不踰旬月、苗傅、劉正彥有今將之心、既伏大刑、而近臣乃有抗章乞行湔洗、無所忌憚。故比日群盜所在焚劫、或有官吏樂爲之用、未流至此、可不戒乎。願特降指揮、昨在圍城有職當守禦、視城垂破而端坐不救者、有草爲表章、上詆君父、取媚敵人、受其婦女者、有起自閒散、特仕僞朝、長其諫省者、有於苗、劉肆逆、並建節旄、所除制命、極意稱美者、及乞用邦昌、傅、正彥之黨者、審其輕重、不過數人、依法施之、以正人心、息邪說、則三綱不至淪胥、而軍國政事得以時立矣。覈實論曰、政事紀綱、莫大於賞罰、而功罪是非、以毀譽爲本者也、必要其眞僞、而後賞罰當。比下赦文、推美仁宗皇帝盛德大業、應舉行政事、並欲上遵嘉祐。

臣嘗攷其大要、特在於直言數聞、毀譽核實而已、必自大臣與臺諫始。大臣定功罪、施賞罰於上、臺諫論功罪、主毀譽於下、不可不先核也。仁宗皇帝信王曾之正、任呂夷簡之才、終以富弼、韓琦爲宰相、而余靖、蔡襄、賈黯、呂誨等迭居臺諫、此眞僞所由核也。故丁謂雖以奸邪當國、而終投四裔、寇準雖以忠正遠貶、而終得辨明、范仲淹雖屢以危言獲罪、歐陽脩雖以譏斥佞人招難明之謗、而皆終聞政事。是邪說不得亂毀譽之眞、而直道行也。邪說息、直道行、則惡人有所憚而不爲、善人有所恃而不恐、此所以致至和、嘉祐之治者也。昨者黃潛善、汪伯彥、范宗尹輩廣引奸邪、顛倒是非、變亂名實。諫官鄭穀攻李綱以六不可貸之罪、驗於奏議、則無據、按於施爲、則無迹、特以撰造文致、傾陷大臣、當時遂信行之、又以美官激勸之、是欲其亂毀譽之眞而不核也。言官馬伸擊潛善、伯彥措置乖



方、凡舉一事必立一證、皆天下所共知見、不敢以無爲有、以是爲非、當時乃罷黜之、又置諸危地、殘賊之、是惡其亂毀譽之眞而不核也、邪說何由息、公道何由行乎、今穀雖已死、恤典隆厚、伸雖有詔命、不聞來期、按春秋治奸慝者、不以存沒、必施其身、所以懲惡也、獎忠良者及其子孫、遠而不泯、所以勸善也、陛下必欲繼仁宗之政、則按是非、明賞罰、使天下知所懲勸、亦何遠之有、尙志論曰、帝王應時而造、必先立志、欲定大事、而志不先立、則無本矣、焉能有成、靖康臣僚不知責難、勸淵聖篤於立志、而即安屈辱、城下結盟、此齊國佐、宋華元請合餘燼、背城借一、誓死力爭、有以國斃而不肯從者也、當時國勢何異厝火積薪之下、而寢其上、宰相徐處仁遽進諛說、以爲金兵出境、社稷再安、由聖德儉勤、致有天人助、遂言今日可比唐虞、而臣主俱榮、抑何志之卑陋也、故廟堂聚訟、顛沛末

流、未及期年、坐以失國、夫志則不立、急於事爲、雖有遠猷宏議、必格而不得施矣、陛下自初發憤、欲殄寇讎、當時親信左右、莫能輔道、乃至因循、坐消歲月、國日益削、六載於今、然上天所以啓悟聖情、日躋盛德、陛下所以深懲既往、刻厲將來者、可謂卓然有立於萬物之表矣、願堅持此志、無復變遷、仍飭群臣、各致法家拂士之義、必志於恢復中原、祇奉陵寢、必志於掃平仇敵、迎復兩宮、必志於得四海之歡心、以格宗廟、必志於致九州之美味、以養父兄、然後文武百僚、六軍萬姓、不應徯志、而陛下孝弟之責塞矣、正心論曰、心者身之本也、身者家之本也、家者國之本也、國者天下之本也、能正其心、則朝廷百官萬民莫不一於正、安與治所由興也、不正其心、則朝廷百官萬民皆習於不正、危與亂所由致也、然心有所憤怒而弗能忍、則不得其正、有所貪欲而弗能窒、則不得其正、有所蔽惑

而弗能斷、則不得其正。有所畏怯而弗能自強、則不得其正。正心之道、先致其知而誠其意、故人主不可不學也。蓋戡定禍亂、雖急於戎務、而裁決戎務必本於方寸。不學以致知、則方寸亂矣、何以成帝王之業乎。陛下日親典策、博考古今、往行前言、固將畜德、又經變故、備嘗險阻。外患益深、必無邪念、至誠所發、通貫幽明、固有人不及知而天獨知之者矣。願更選正臣、多聞識、有智慮、敢直言者、置之左右、日夕討論、以克厥宅心、表正於上、則內外遠近將各歸於正、奚亂之不息乎。養氣論曰、凡用兵勝負、係軍旅之強弱、軍旅強弱、係將帥之勇怯、將帥勇怯、係人主所養之氣曲直如何耳。蓋人主將將者也。以真養氣、自反而縮、則孟子所謂約、而狐偃所謂壯也。壯則強、以曲喪氣、自反而不縮、則孟子所謂餒、而狐偃所謂老也。老則弱。紂師如林、武王數其不事宗廟、賊虐諫輔之罪、則商曲而周

直、故周勝。項羽威震天下、漢祖數其弑義帝之十罪、則楚曲而漢直、故漢勝。凡曲直者、兵家之大要、制勝之先幾也。金人稱兵、曲亦甚矣。陛下上皇之子、孝慈之弟、自大元帥入踐宸極、比年以來、克勤聽政、追賞直士、登用讜言、令問四達、可謂直矣。以直對曲、勝負已分、中國士氣、宜不待鼓而自強。然敵兵每動、四方震懼、奔走莫與抗衡者、以兵家之略、制勝之幾、未有以明之也。今欲使人人知彼曲我直、以作其衰敗不振之氣、更在陛下強於爲善、益新厥德、使無有曲失、可得指議、則守爲剛氣、可塞乎兩間、震爲怒氣、可以安天下。將帥必聽命而不敢驕、軍旅必畏威而不敢惰、不待對敵接刃、而百勝之算已坐決於九重矣。宏度論曰、人主以天下爲度者也。明當並日月、不可私照臨、德當配天地、不可私覆載。所好當遵王道、不可以私勞行賞、所惡當遵王路、不可以私怒用刑。其喜怒則當發



必中節和氣綢繆而萬物育也故能理其情而君道備矣。然人情易發而難制者惟怒爲甚克己然後可以治怒順理然後可以忘怒。書曰必有忍乃其有濟。此治怒不遷之法也。忍者隱忍不發之稱。遷者自此遷彼之謂。能隱忍而不遷則事必濟矣。漢高帝忍於有故怨者而封雍齒忍於數窘辱者而赦季布忍於比己爲桀紂者而用周昌。至如丁公免己於厄可謂有再生之恩矣及即位乃斬以徇其不賞私勞如此故能成帝業於五載之近。陛下聖度虛明天心廣大固當不以私喜親近諛佞亦當不以私怒疏遠正直。中外百執其有迷國誤朝罪惡昭著衆所指目不可掩者雖有私勞願陛下與衆棄之不使幸而得免以致天下之疑也。其有抱忠守正犯顏逆耳公論所歸不可蔽者雖遭讒謗願陛下與士共之不使退而窮處以失天下之心也。如此賞而必當是謂天命。罰而必當是謂

天討。施之一人而千萬人悅以畏矣。寬隱論曰。自昔創業興衰與增光洪業之君待遇臣下恩禮雖一而崇高嚴恪常行於介冑爪牙之夫以折其驕悍難使之氣。柔遜謙屈必施於林壑退藏之士以厲其廉靖無求之節。乃能駕馭人才表正風俗。故漢高祖之威行於暴秦強楚而不行於四皓。世宗之威行於尋邑王郎赤眉銅馬隴蜀之主而不行於嚴光周黨。惟公孫述能行其威於李業等然不能行於吳漢。是何也。威有所當加勢有所可屈。加於所當加以立威則強屈於所可屈以忘勢則昌。反是道者難乎免於亂亡之禍矣。陛下屢下詔書詳延遺逸而群臣有不能欽承美意者凡所宣召或有未至不原情實即肆讒謗以爲違於君命召不俟駕之義被以偃蹇之名而欲加以不恭之罪。雖陛下寬容不從其說而侍從近臣不有忠言奇策上動聖聽奮揚天威殄殲強敵顧請施於疾病

退藏之臣、其意安在。夫召而不至者、其心豈樂貧賤而惡富貴哉、其必有以也。若聽其所守、下全隱居之操、上有好善之美、兩得之矣。四月八日所下赦書、首欲上遵仁宗法度、謹按康定間嘗以詞館招張俞矣、辭而不受、至於四五、其後又以修起居注用王安石矣、辭而不受、至於八九、皆從其欲、又優獎之、以勵風俗、未嘗加以雷霆之威、而紀綱不緣此而不立、命令不緣此而不行、威加於西則臣服元昊、威加於北則削平王則、威加於南則掃蕩智高、柔巽屈於隱士而德愈隆、剛克伸於四裔而威愈震、可謂知所用矣。此其所宜遵者也。望特降詔書、申明此旨、凡被召有不能赴者、悉從其欲、不強制之。獨以威刑外施暴威之戒、內掃貪殘之賊、與悍驕不可使之將、讒說殄行、則天下歸心而治道成矣。其言反覆甚詳、此其大略也。論既入、上即命再遣使促召。未至、復除給事中。二年七月、入對

於臨安行在所、上曰、聞卿大名、渴於相見、何爲累召不至。公再拜辭謝、進曰、臣聞保國必先定計、定計必先定都、建都擇地必先設險、設險分土必先遵制、制國以守必先恤民。夫國之有斯民、猶人之有元氣、不可不恤也。除亂賊、選縣令、輕賦斂、更弊法、省官吏、皆恤民之事也。而行此有道、必先立政、立政有經、必先核實、核實者是非毀譽各不亂真。此致理之大要也。是非核而後賞罰當、賞罰當而後號令行。人心順從、惟上所命、以守則固、以戰則勝、以攻則服、天下定矣。然致此者、顧人主志尙何如耳。尙志所以立本也、正心所以決事也、養氣所以制敵也、宏度所以用人也、寬隱所以明德也。具此五者、帝王之能事備矣。乞以核實而上十有六篇付宰臣參酌施行。上勞問甚渥、公退而就職。居旬日再見、以疾懇求去位、上曰、聞卿深於春秋、方欲講論。遂以左氏傳付公點句正音、公奏曰、春秋



乃仲尼親筆、門人高弟不措一詞、實經世大典、見諸行事、非空言比也。義精理奧、尤難窺測。今方思濟艱難、豈宜虛費光陰、耽玩文采。左^③氏所載師春等書及諸國交兵曲折、尙涉繁碎、況於其他。陛下必欲削平僭暴、克復寶圖、使亂臣賊子懼而不作、莫若儲心仲尼之經、則南面之術盡在是矣。上稱善。八月一日轉對、奏曰、臣扶疾造朝、備位瑣闥、亦既經月。凡所書讀、多是臣庶整會升降資給、事涉細微、少有論駁、虛度時刻、愧溢顏面。復詳論定計、建都設險三事。上尋命除公兼侍讀、專講春秋。時講官四人、援例乞各專一經。上曰、他人通經、豈胡某比。不許。公乞在外編集成書、仰備乙覽、不敢當講席。章再上、不允。未及卒辭、會除故相朱勝非同都督江淮荆浙諸軍事。公上奏曰、謹按勝非與黃潛善、汪伯彥同在政府、緘默附會、循致渡江、至今人心追恨未泯。南狩倉皇、國勢岌岌。凡下詔令、當

本至公、以收潰散之情、冀安天步、乃稱尊用。張邦昌結好金國、許其子孫皆得錄叙、淪滅三綱、天下憤鬱。若謂事由潛善、己不預知、此大事也、亦可從乎。及正位冢司、苗、劉肆逆、貪生苟容、辱逮君父、故七月八日聖旨、以其荷國重任、不衛社稷、式遏兇邪、不如歐陽脩所稱斷臂婦人之節、其責詞曰、凶意已行、乃援唐襄王之故事。逆謀先定、共推晉太后之前聞。在君可移、於國何有。以此觀勝非其忠邪賢否、斷可見矣。方今強敵憑陵、叛臣不忌、沿江都督極天下之選。用人得失、係國安危、深恐勝非上誤大計。勝非改除侍讀、召赴行在。左相呂頤浩以公既有論列、不復經由、遂命檢正官黃龜年書行。公上奏曰、由臣愚陋、致朝廷過舉、侵紊官制、隳壞紀綱。孟子曰、有官守者不得其職、則去。臣待罪五旬、毫髮無補、既失其職、當去甚明。況勝非係臣論列之人、今朝廷乃稱勝非處苗、劉時能調護聖

躬即與向來詔旨責詞是非乖異。昔公羊氏以祭仲廢君爲行權、先儒力排其說、蓋權宜廢置非所施於君父。春秋大法尤謹於此。自建炎改元、凡失節者、非特釋而不問、又加進擢、習俗旣成、大非君父之利。臣蒙睿獎、方俾以春秋入侍、而與勝非爲列、有違經訓、倘貪祿位、不顧曠官、縱臣無恥、公論謂何。初、呂頤浩都督江上還朝、欲去異己者、未得其方、過姑蘇、太守席益謂之曰、曰爲朋黨可矣。然黨魁在瑣闥、當先去之。頤浩大喜、力引勝非爲助、而降旨曰、胡某屢召、優蹇不至、今始造朝、又數有請。初言勝非不可任、以同都督、改命經筵、又以爲非、豈不以時方艱難、不肯致身盡瘁、乃欲求微罪而去。其自爲謀則善矣、百官象之、又如國計何。可落職提舉建昌軍仙都觀。實八月二十一日也。是夕、彗出東南、右相秦檜三上章乞留公、不報、即解相印去位。侍御史江躋上疏極言勝非不可用、胡

某不當責。右司諫吳表臣上疏言、胡某扶疾見君、亦欲行其所學。今無故罪去、非所以示天下也。奏皆寢。頤浩即排根黜給事中程瑀、起居舍人張燾及躋等二十餘人、云應天變除舊布新之意、臺省一空、勝非遂相。公登舟稍稍沂流、三日而後、行次衢、梁訪醫、留再旬。至豐城寓居、又半歲、乃渡南江而西、休於衡岳、買山結廬、名曰書堂、爲終焉計。寅被召造朝、公戒之曰、凡出身事主、本吾至誠懇惻、憂國愛君、濟民利物之心。立乎人之本朝、不可有分毫私意。議論施爲、辭受取舍、進退去就、據吾所見義理上行、勿欺也。故可犯至誠而不動者矣。不誠、未有能動者也。善人君子吾信重之、不輕慢之、惡人小夫吾憫憐之、不憎惡之。天下事猶一家、如仲舉於甫節、元規於蘇峻、皆懷憤疾之心、所以誤也。諸葛武侯心如明鏡、不以私情有好惡也。故黃皓安於卑賤而不辭、李平、廖立甘於廢黜而不怨、



馬謖入幕上賓、流涕誅之不釋也。孔明此心、可爲萬世法。觀公室中所以戒其子者如此、則其自爲者可知矣。河南尹焞聞公進退大致、語人曰、斯人可謂聞而知者矣。翰林徐俯侍讀春秋、薦公曰、道術有在、公論所歸、臣敢蔽賢不報。初、王荊公以字說訓釋經義、自謂千聖一致之妙、而於春秋不可以偏傍點畫通也、則詆爲斷爛朝報、廢之、不列於學官。下逮崇寧、防禁益甚。公自少留心此經、每曰、先聖親手筆削之書、乃使人主不得聞講說、學士不得相傳習、亂倫滅理、用夷變夏、殆由此乎。於是潛心刻意、備徵先儒、雖一義之當、片言之善、靡不采入。歲在丙申、初得伊川先生所作傳、其間大義十餘條、若合符節、公益自信、研窮玩索者二十餘年、以爲天下事物無不備於春秋。喟然歎曰、此傳心要典也。推明克己修德之方、所以尊君父、討亂賊、存天理、正人心者、必再書屢書、懇懇致詳。於是

聖人宏規大用、較然明著、讀而味之、犁然當於人心。翰林朱震久從公游、方侍講此經、欲見公所著、公曰、某之初學也、用功十年、遍覽諸家、欲多求博取、以會要妙、然但得其糟粕耳。又十年、時有省發、遂集衆傳、附以己說、猶未敢以爲得也。又五年、去者或取、取者或去、已說之不可於心者、尙多有之。又五年、書向成、舊說之得存者寡矣。及此二年、所習似益察、所造似益深、乃知聖人之旨益無窮、信非言論所能盡也。今幸聖上篤好、要當正學以言、不當曲學以阿世。子發其勉之。先儒有制作以俟聖漢之語、其不見排誚幾希。紹興五年二月、除徽猷閣待制、知永州、公辭以擯斥三載、未能寡過、不敢當次對之除、不習吏事、年衰病劇、不能勝共理之寄。詔曰、胡某經筵舊臣、引疾辭郡、重憫勞之、可特從其請、差提舉江州太平觀、令纂修所著春秋傳、候書成進入、以副朕崇儒重道之意。仍給吏吏

筆札、委疾速投進。公嘗謂宮觀之設、本以養老優賢、非因辭職不欲請、非獲譴不欲受也。及此、除乃謝曰：「謹修有用之文、少報無功之祿。」即自爲工程、再加訂正、然後繕寫奏御。凡十餘萬言。上屢對近臣稱道、謂深得聖人之旨、非諸儒所及也。除提舉萬壽觀兼侍讀、委潭州守臣以禮津遣、金書疾置、召旨甚駛。宰相以事不自己出、形於言。諫官陳公輔方上疏力詆程氏、公上奏曰：「臣忝預從臣、職當次對。雖嬰疾疹、尙竊祠宮。苟有見聞、自當論奏。伏見元祐初、宰臣司馬光、呂公著急於得人、首薦河南處士程頤、言必忠信、動遵禮義、實儒者之高蹈、聖世之逸民。乞加召命、擢以不次、矜武士類、裨益風化。」遂自韋布超居講筵。而諫臣朱光廷等又奏頤道德純備、學問淵博、有經天緯地之才、有制禮作樂之具、實天民之先覺、聖代之真儒也。則頤之見知於當世至矣。自頤之司勸講、不爲辨詞釋解、

文義所以積其誠意、感通聖心者、固不可得而聞也。及當官而行、舉動必由乎禮、奉身而去、進退必合乎義、其修身行法、規矩準繩、獨出諸儒之表。門人高弟莫或繼焉。雖崇寧間、曲加防禁、學者宗之、不可遏也。近年頤之門人稍稍進用、而士大夫有志利祿者、口誦其說、高自標榜、或乃託於詞命、妄加褒借、紛然淆亂、莫分真僞、識者憂之。學士大夫植黨相非、自此起矣。蓋安於王氏者、不肯遽變、而道伊洛者、多失其傳、無以厭服人心。故言者深加詆訕。夫不辨真僞、皆欲屏絕、旣已過矣。又及於頤、不亦宜乎。其言曰：「聖人垂訓、無非中庸是也。然中庸之義、不傳久矣。自頤兄弟始發明之、然後知其可思而得也。不然、則或謂高明所以處己、中庸所以接物、本末上下、析爲二途、而其義愈不明矣。」又曰：「士大夫當以孔孟爲師、亦是也。然孔孟之道、不傳久矣。自頤弟兄始發明之、然後知其可學而至



也。不然則或以諸經語孟之書資口耳以干利祿。愈不得其門而入矣。今欲使學者蹈中庸師孔孟而禁使不得從頤之學。是猶欲納之室而使不得由戶也。夫頤之文於易則由理以明象而知體用之一原。於春秋則見諸行事而知聖人之大用。於諸經語孟則發其微旨以示求仁之方入德之序。然則狂言怪語淫說鄙喻豈其文也哉。頤之行其行已接物則忠誠動於州里其事親從兄則孝弟顯於家庭其辭受取舍非其道義則一介不以取與至人雖祿之千鍾必有不顧也其餘則亦與人同耳。然則幅巾大袖高視闊步豈其行也哉。本朝自嘉祐以來西都有邵雍程顥及其弟頤關中有張載皆以道學德行名於當世公卿大夫之所欽慕而師尊之者也。會王安石當路重以蔡京得政曲加排抑其道不行深可惜也。願下禮官討論故事以此四人加之封號載在祀典比諸荀揚韓氏

仍詔館閣搜集其遺書委官校正取旨施行便於學者傳習羽翼聖經使邪說者不得乘間而作而天下之道術定豈曰小補之哉。奏既入溺於王氏學者喧然於是公輔及中丞周秘侍御史石公揆承望宰相風旨謂公學術頗僻行義不修章疏交上除知永州公辭復除提舉江州太平觀久之諸言者皆罪斥除公寶文閣直學士賜銀絹三百疋兩公辭詔曰朕憫邪說之誣民懼斯文之墜地肆求鴻碩爰命纂修卿發心要之未傳洞見天人之閩奧明聖師之獨斷大陳治亂之權衡俾給札於上方旋觀書於乙夜往承朕意勿復固辭公常念故鄉宗族貧不能自給逮受此賜即付猶子憲買田於先廬傍歲時修祀曾高丘壠施及親屬以疏戚爲差方公之奉詔纂修也雖寒暑不少懈畢精竭慮殆忘寢食疾遂日增至是上章謝事以紹興八年四月十三日歿於書堂正寢享年六十有五。

遺表上聞、詔贈四官、賻銀絹二百疋兩。公積階至朝奉郎、靖康登極、覃恩轉朝散郎、致仕轉朝請郎。至是贈左朝議大夫。繼又降詔旨云、胡某春秋義著一王之大法、方欲召用、遽聞淪亡、特賜銀絹三百疋兩、令本路轉運司應副葬事、仍賜田十頃、以恤其孤、他人不得援例。公卿大夫士莫不爲時嗟悼、形於文詞以祭公而挽其葬、惜公迄不大用、佐天子成撥亂反正之功也。公見善必爲、爲必要其成、知惡必去、去必除其根、強學力行、以聖人爲標的。初登科、同年燕集、微有酒、自是終身飲不過量。嘗好弈、令人曰、得一第、事業竟耶。遂終身不弈。爲太學官、同僚爲謀買妾、旣卜姓矣、歎曰、吾親待養千里之外、何以是爲。亦終身不復買也。奉使湘中、日出按屬部、過衡山下、愛其雄秀、欲登覽、已戒行矣、俄而止曰、非職事所在也。它日二親欲遊、亦以是告、中大及令人喜曰、爾周慎如此、吾復何憂。晚

歲居山下五年、竟亦不出。平生不樂近城市、寓居必深靜之所。逢佳樹清流、輒扶筇拂石、徘徊而後去。風度凝遠、蕭然塵表、視天下萬物無一足以嬰其心者。言必有教、動必有法。燕居獨處、未嘗有怠容慢色。尤謹於細行、麟經之外、語孟、易、詩、書、中庸、資治通鑑、周而復始、至老孜孜、常不自足。每子弟定省、必問其習業、合意則曰、士當志於聖人、勿臨深以爲高。不則頓蹙曰、流光可惜、無爲小人之歸。戚屬後生艱難窮阨、但勉以進修、使動心忍性、不爲濡沫之惠。士子問學、公教之大抵以立志爲先、以忠信爲本、以致知爲窮理之門、以主敬爲持養之道、開端引示、必當其才、訓厲救藥、必中其病。每誦曾子之言曰、君子愛人以德、細人愛人以姑息。故未嘗以辭色假人。近世士風奔競、惟事干謁、公在瑣闥、雖抱羸疾、接納無倦、隨其品歷、訪以四方利病。於容貌顏色辭氣間、消人貪鄙、有欲啓口請



託者、必忘言而去。壯年嘗觀釋氏書、亦接禪客談話、後遂屏絕。荅贛川曾幾書曰、窮理盡性、乃聖門事業、物物而察、知之始也。一以貫之、知之至也。無所不在者、理也。無所不有者、心也。物物致察、宛轉歸己、則心與理不昧、故知循理者、士也。物物皆備、反身而誠、則心與理不違、故樂循理者、君子也。天理合德、四時合序、則心與理一、無事乎循矣。故一以貫之、聖人也。子以四端五典每事擴充、亦未免物物致察、猶非一以貫之之要、是欲不舉足而登泰山、猶釋氏所謂不假證修而語覺地也。四端固有非外鑠、五典天叙不可違、在人則一心也、在物則一理也、充四端可以成性、惇五典可以盡倫、性成而倫盡、斯不二矣。學佛者其語則欲一聞便悟、其行則欲一超直入、縱有是理、必無是人。如舜可謂上上根矣、然猶好問、猶察言、猶取諸人以爲善、獨聞斯行之若決江河、與人異耳。今以中才欲了

此事、不從博學審問、慎思明辨、篤行以求之、則亦何以異於談飲食而欲療饑渴乎。釋氏雖有了心之說、然知其未了者、爲其不先窮理、反以理爲障、只求見解、於作用處全不究意也。以理爲障而求見解、故窮高極大、而失其居、失其居則惑人也。故無地以崇其德、至於流遁、莫可致詰。於作用處全不究意、故接物應事、顛倒差謬、不堪點檢。聖門之學、則以致知爲始、窮理爲要、知至理得不昧本心、如日方中、萬象畢見、則不疑其所行、而內外合也。故自修身至於天下、國家、無所處而不當矣。子又曰、四端五典起滅心也、有所謂自本自根、自古以固存者。夫自本自根、自古以固存者、即起滅心是也。不起、不滅心之體、方起、方滅心之用。體用一源、顯微無間、能操而常存者、動亦存、靜亦存、雖百起百滅、心固自若也。放而不知求者、靜亦亡、動亦亡、燕居獨處、似繫馬而止也。事至物來、視而不見、聽

而不聞矣。是以善學者動亦察、靜亦察、無時而不察也。持之以敬、養之以和、事至物來、隨感而應、燕居獨處、亦不坐馳、不必言致其精明、以待事物之至也。子又謂充良知良能而至於盡、與宗門要妙兩不相妨、何必舍彼取此、則非某之所敢知也。夫良知不慮而知、良能不學而能、此愛親敬長之本心也。儒者擴而充之、達於天下、立萬世之大經、經正而庶民興、邪慝息矣。釋氏則指此爲前塵、爲妄想、批根拔本、殄滅人倫、正相反也。而謂不相妨、何也。孔子曰、道不同不相爲謀。惡似是而非者、差之毫釐、謬以千里、故善學之君子、慎所取焉。公精識強記、無所不知、而與人談論、氣和詞簡、若中無所有者、故未嘗失色於人、亦未嘗失言於人。仕止久速、由道據義、行心之所安。其欲出也、非由勸勉、其欲去也、不可挽留。朱震被召、問出處之宜、公曰、子發學易二十年、至有成說、則此事當素定矣。世間

惟講學論政、則當切切詢究。若夫行已大致、去就語默之幾、如人飲食、其飢飽寒溫、必自斟酌、不可決諸人、亦非人所能決也。某之出處、自崇寧以來、皆內斷於心、雖定夫、顯道諸丈人行、亦不以此謀之、而後亦少悔。浮世利名、真如蟻蠅過前、何足道哉。定夫、游公酢、顯道、謝公良佐也。與楊公中立、皆程門高弟。公之使湖北也、楊尙爲府教授、謝爲應城宰、公質疑訪道、禮之甚恭。來見而去、必端笏正立目送之、僚屬驚異。吏民聳觀。鄒公浩聞之、歎曰、將軍北面帥師降敵、此事人間久寂寂。謝公嘗語朱震曰、胡康侯正如大冬嚴雪、百草萎死、而松柏挺然獨秀者也。從遊三君子之外、則河清劉奕君曼、開封向子韶和卿、贛上曾開天游、荆南唐恕處厚及朱震子發、情義最篤者也。又嘗曰、四海神交、惟君曼一人。且稱其有相業云。平居尙論古人、自兩漢而下、則以諸葛武侯爲首、於本朝卿相、則以



李文靖、韓忠獻爲冠、言必稱之。每語學者曰、學以能變化氣質爲功。公性本剛急、乃其老也、氣宇冲澹、容貌雍穆、若無喜怒者、即之和樂而有毅然不可犯之^⑤象、望之嚴威而薰然可親。年寢高矣、加以疾病、而謹禮無異平時。每歲釀酒一斛、備家廟薦享、造麴蘖、治秫米、潔器用、節齊量、無不躬視。於其祭也、沐浴盛服、率子孫諸婦各執其事、方享則敬已祭必哀、濟濟促促、如祖考之臨之也。禮成、置酒五行、分胙內外、雖亂離遷次、衣食或不給、而奉先未嘗闕。由少至老、食不過兼味。疾病中值歲大旱、所居岑寂、膳羞不可致。子弟或請稍近城郭、便藥餌。公曰、死生有命、豈以口體移不貲之軀哉。躬耕漳濱二十餘年、所仰以卒歲者、一旦廢於盜寇、聞之容色無變、若未嘗勤力其中也。惟問丘墳、則泫然流涕。雖轉徙屢空、取舍一介、必度於義、飢不可得而食、寒不可得而衣。自登第逮休致、凡四十年、

在官實歷不登六載、雖數以罪去、其愛君之心遠而逾篤。每被召、即置家事不問、或通夕不寐、志在康濟艱難。見中原陷沒、百姓塗炭、若疾痛之切於身也。然宦情如寄、道有不合、色斯舉矣。侯無可諸孫冲良有祖風、言必稱二程先生、他無所許可、後至漳濱、矚公言行、日月淹久、不覺嘆服。語同志曰、某以爲志在天下、視不義富貴眞如浮雲者、二先生而已、不意復有斯人也。常服澣濯紬補、或至三十年、歲不必隨有所增製、遠適亦以自從。謂子弟曰、不使汝等有倉卒不辦之憂。年既六十、即命造束身裨、自授尺寸、歲一漆之。得疾不能閱書、命子宏取春秋說誦於前、間一解頤而笑。時結廬猶未成、獨戒宏曰、當速營家廟、若祭於寢、非禮也。二弟問疾、泣而撫之。至於諸子、則正容曰、事兄友弟、遂不復語、泊然委順。斂以深衣、不用浮屠氏、皆治命也。初娶李氏、繼室王氏、皆贈令人。子三人、長寅、

左奉議郎、試尚書禮部侍郎兼侍講。次寧、右承務郎、行尚書祠部員外郎。季宏、右承務郎。女申、適迪功郎、監潭州南嶽廟向沈。其父即和卿也。孫大原、右承務郎。公沒五年之後、始生大經、大常、大本、大壯、大時。公少時有作爲文章立名後世之意、其後篤志於天人性命之學、乃不復作。故召試、辭免之。奏曰、少習藝文、不稱語妙。晚捐華藻、纔取理明。既覺昨非、更無餘習。文集十五卷、皆不得已而應者、靡麗無益、一語不及。每患史傳浩博、學者不知統要、而司馬公編年通鑑正書、叙述太詳、目錄首尾不備。晚年著舉要歷八十卷、將以趨詳略之中矣。然尙有重複及遺缺者、意司馬公方事筆削、入秉鈞軸、尋薨於位、不得爲成書也。遂略用春秋條例、就三書修成一百卷、名曰資治通鑑舉要補遺、自爲之序、以廣司馬公願忠君父、稽古圖治之意。諸孤以其年九月一日葬於潭州湘潭縣龍穴山、令

人王氏祔焉。從臣建言、公當蔡氏專權、棄官不仕、歸養膝下、左右無違。靖康、紹興出入禁闥、正義直指、風節凜然。方春秋大禁之時、慨然憂世、心無二慮、窮源闡奧、學遂顯行、其功不在先儒之下。昔人有一節可稱、猶褒之以謚、列諸史傳、況如某孝於親、忠於君、好學不倦、身死而言立、可不飾其終乎。詔下禮官議、禮部太常官合議曰、謹按謚法、道德博文曰文、純行不差曰定、請謚爲文定。制曰、朕憫士大夫高爵祿而下禮義、尙權勢而薄廉恥、禍敗之釁、職此之由。惟予近臣守死善道、服仁體義、老而不衰、生多顯名、沒有遺美、顧此褒恤、豈限彝章。具官某以名世傑出之才、探千載不傳之學、窮春秋奧旨、續前聖微言、旁貫諸經、網羅百氏、優游饜飫、久自得之。不可以勢利回、不可以威武屈。近代以來、數人而已。是用致尊名之義、廣崇德之風、以訓後人、以明吾志。凡爾有學、尙克繼之。可賜謚曰



藏 齋

文定。蓋非常格也。紹興十有九年，郊恩贈左大中大夫。惟公道學溥博渾深，不可涯涘，追究平生言行，反覆訂正，凡十有五年，粗能成章，以備太史氏采擇，且求誌於有道立言之君子，傳諸永世。謹狀。

胡寅撰 《斐然集》卷二五

校記

①焚燒：原作「楚燒」，據清抄本《斐然集》改。

②謂：原作「爲」，據右引改。

③左：原作「尤」，據文意改。

④究意：原作「究竟」，據下文所述改。

⑤之：原作「知」，據文意改。

宋儒碑傳集卷八十三

李端方 蔡元康 翟汝文 毛隨

宋故左朝請大夫李公靖之墓志銘

元符末、余始著籍鄉校、識靖之與其兄宗子學博士相之、爲同舍生。是時方尊王氏三經字說之學、學者數百人、手鈔口誦、連榻累笥、非王氏之書不讀也。靖之兄弟魁壘豪健、有氣節、彊記洽聞、不專事舉子業。間出東坡先生詩文爲余讀之、音節謹亮、耳目醒然、如挽天河覆八溟、一洗先儒箋注蟲魚之陋、而一時諸老先生往往竊笑其迂。遇^①休告則出、從所厚善抵掌劇談、縱酒博奕、歌呼竟日而後已、眞天下之奇男子也。後數年、余與靖之同登進士第、宦遊四方、不相聞。又數年、余以御史斥、靖之亦繇平江從^②事代還、相與握手談笑、道舊故以爲樂。靖之意象索然、無復故時俊壯邁往之氣、而相之亦病矣。余固怪之、靖之曰、平江大都會、而朱

勛以竇人子爲蛇豕、侵暴一方、奴使將佐、與之驅除、惟恐後、吾如彼何哉。已乃脫巾几上、怒髮竦立、椎牀大叫、又復悵然以^③悲。自是湛浮里中逾二紀、不復有進取意。嘗一佐永嘉郡、以避建炎之亂、秩滿徑歸、築室田間、不交人事。益復飲酒、時有感遇、作^④詩歌舞以自娛戲、卒不究所施、遂齎志以沒。沒於紹興十二年六月辛巳、年六十九。諸孤抵父友乞銘識其葬、而以屬予。嗚呼、余從靖之游四十年、見其盛而悲其衰、又哀其死、是不可以無銘也。靖之、隴西李氏、諱端方、今爲常州武進縣人。靖之其字也。大觀三年試上舍、賜出身、主海州流陽簿。用舉者遷通仕郎。又以鹽最改宣教郎、調平江府司士曹事、抑鬱不自得。歲滿家居。久之、折資監沂州酒稅、不赴、遂致仕。建炎初、近臣薦其材、召赴行在、除鴻臚寺丞、不拜。紹興元年、通判溫州。八年、除知韶州。尋請宮祠、主管台州崇道觀、積官至左朝請



大夫。靖之學博而辯、屬文辭清麗有典則、則長於詩。樂善多愛、尤喜誦它人之工者。得一言一句、手錄藏之、累數十編、而探求猶未已。見其人、則未始出一語稱善。或問其故、則曰、吾惡其近於諛也。平生故人、去爲公卿、足不及門、不通餽問、若不可以親者。居官潔修自好、顧以所蒞皆丞佐、不能獨有所爲、以自表見於世。至於循道守官、則未嘗屈意變節於一人、自謂賁育不能過也。朱勔用事、負責驕橫、士大夫獻讒諛、備使令、以濟其惡。靖之如避垢汙、不忍開眼視之、以故出仕常欲去而無留心。惜乎仕不逢時、不得使其身一日立於朝廷之上、故文章不大傳於世、行義不博聞於天下、而獨爲士友所記、可哀也已。曾祖中立、永州零陵縣令。祖士宗、贈承事郎。父鎮、奉議郎、贈宣奉大夫。妻余氏、馬氏、皆封宜人。生五子、男曰長裔、右迪功郎、前監潭州南嶽廟。長茂、將仕郎。女適右從事郎、監臨安

府龍山稅務施培、次適登仕郎吳萃、餘一女在室。孫男女二人。長裔、長茂卜以其年九月丙午、葬於武進縣懷德南鄉朱夏村之原上。靖之晚喜誦佛書、不囿於因果名相之說、遇住處則據榻卧讀之。客曰、奉佛當如是乎。靖之曰、禍福竟何在。通其意而已。一日、忽書、辛酉四月某日、獲麟於所居之壁。纔逾月、遂屬疾不起。嘻、亦異矣。銘曰、

猗歟靖之、瑚璉之器。以抵鵠而毀、以腊鼠而棄。秦柱睨而起、楚門撞而逝。嗚呼已矣、與瓦礫異。

孫觀撰 《鴻慶居士文集》卷三五

蔡君濟墓誌銘

吾友君濟既卒之三月、其父彥先遣使來訃、余驚咽不能語、頃之方能哭泣問故。嗚呼、善人君子、其不幸至是耶。而彥先以鄉先生林師古信夫狀請銘其墓。信夫、君濟所厚也、故得其行實爲詳。然余豈足知君濟者耶。惟蔡氏其先溫陵人、避五季亂、

徙居溫之平陽。君濟曾祖諱某、祖諱某、父諱某、實嗣其業。且以命君濟。君濟資稟剛峻、能自克力學、其精識絕人、論天下事、評一時人物、始卒皆如所言。方兒時、舉止端重、有所遊觀、輒曰、不貽親憂否。既冠、游太學、見儕輩從事乎文藝、慨然曰、此科舉所須耳。夫學豈止是耶。故聞賢有德者、一言一行、孜孜訪之、惟恐不及。太學善士聞名而願交者、不可以一二數。崇寧中下第、忽忽不樂、謂其游曰、吾未嘗以得失爲念、而不樂者、非親意有所不安耶。即日馳歸、及門而父疾甚已淹時矣、醫卜皆曰不可療。君濟齋戒沐浴、默有禱焉、得吉兆而疾愈。其事諸父友昆弟、輯睦上下、各得其歡心。經理家事、凡人情所難堪者、皆身任之。闔門幾百口、今三十年矣、無一後言者。故鄉人稱族居者必曰蔡氏、而戒狠戾不睦者必曰、盍觀君濟之爲人也。其訓弟姪與朋友講習、必以忠信愷悌爲先。嘗賦詩曰、君

親等天地、忠孝無古今。弟姪有過差、未嘗面斥之、委曲諷喻、使改而止。其在京師逆旅中失金、方揭榜購賞、有得諸同舍篋中者以告、君濟曰、此非吾金也。常曰、古之全交者非一道、必欲伸己以求名、人將何望耶。往還京師、朋友有疾病、則爲之辦醫藥、同寢處、終始不厭。死喪則主後事、或護其柩以歸、前後蓋十數。賢士遭斥逐、傾橐資之、眷眷焉勉以忠義報國而已。凡游太學十餘年、七上於禮部、不第、中朝搢紳皆嗟惜之。會天子以八行取士、郡人條其應令者凡數十事、有司方施行、而四方有識聞之、相與歡忻稱頌。太學辟雍之士曰、徯其貢遣以來、而君濟屬疾死矣。悲夫。君濟所學以正心誠意爲本、其優游涵養、日趨於自得、蓋質諸聖言而合、措諸行事而不紊。其進勇甚、浩乎其未易量也。其所往來皆一時賢士大夫、而鄒志完、陳瑩中、楊中立、周恭叔尤所欽愛、皆許以有爲於世。鄒、陳

翟氏公巽埋銘

久於謫籍、君濟從之、不遠千里。志完疾病、以書招之、比君濟至、病且革矣、盡吐生平所欲言者、而性命之理、死生之說、見於問答云。至君濟感疾啓手足、神色不亂、危坐如平時。嗚呼、非真有得者能如是耶。君濟諱元康、年四十三、政和七年八月甲子卒於家。明年二月甲子、葬於邑之大奧山某原。娶王氏、閩清人、仲舉之女、有賢行、順事其夫、邦人取法焉。生女蘇娘、無男子、以兄子蘇郎爲後。議者謂君濟安窮達、一死生、雖不幸短命、宜無惑者。顧其親有子如此而失之、何以塞其悲乎。余以爲死生命也、夫人豈有不死者乎、顧所爲何如耳。今君濟所學皆聖賢之事業、而其從遊皆千載人也、亦豈不足以慰其親乎。衆皆曰然。於是叙而銘之。銘曰、人不間於父母昆弟之言、與夫見其進、未見其止、皆善學者之事也。若吾君濟、其庶幾乎。非天爲之而止於斯乎。嗚呼哀哉。

公翟氏、名汝文、字公巽、潤之丹陽人。翟受姓於周、有封國曰翟桓、世居北地、後爲晉所滅、徙于西河。周景王時、翟僂新居宋、宋元公無信、大夫華氏謀弑元公、國人與華氏作亂、僂新戰敗華氏、脫甲於公所而歸。璜佐魏文侯、以得士顯名諸侯。漢高祖總帥群雄、剪滅項氏、即帝位、盱以功封衍簡侯。文帝時、廷尉居下邳、太史公所謂自書其門者。牧、況父子、並以易傳世。方進以儒術飾吏事、號通明相。子東郡太守義舉、兵謀復漢室、爲王莽所殺。酺以道術政事高第第一、拜尙書。超、山陽太守、齊名李膺、陳蕃、號八極。坐沒入中常侍侯覽財產、髡鉗輸作、後同膺死詔獄。高士湯與其子莊、隱居尋陽、五徵不起。永嘉盜賊聞湯名德、皆不敢犯、鄉里賴之。孫矯、曾孫法賜、世有隱行。世言率左右羽林兵討



武氏期迎復中宗。長孫弭賊薛仁杲之亂。涇州賴安。良佐宋州刺史。璋虢州刺史。自周迄國朝。代有顯人。明德偉烈。踵武相望。由廷尉至刺史。子孫散居陝。虢。潁。洛之間。翟氏之胄。始分南北。居陝虢者曰北翟。而居吳越前楚者號南翟氏。公之宗自高士以來。世居尋陽。五代秦宗權之黨劉建封陷長沙。公五世祖避亂遷潤之丹陽。以孫權常射虎丹陽之陵亭。又自別曰陵亭之翟。始祖顯。越州山陰宰。高祖玘。故汝州太守。非禮不動。與人交必以身下之。汝。潁間所謂翟古人者。曾祖濤。知蘇州長洲縣。贈太子少保。通三傳。專于禮樂。一時之碩儒。好禮者推之。祖從。故揚州通判。贈太子少傅。父思。故秘書監。知應天府。贈少師。公年十四。舉進士。試孔子集大成論。詞旨贍博。老儒不過也。以書謁南豐曾鞏。子固。子固立言窺制作之奧。負大名。簡賓客。于造語。少印可。喟然曰。吾道不墜。繫子是賴。及請

退。三留更僕。徒御改觀。士林傳耀。既登第。十年不仕。曰。親老。可遠乎哉。崇寧壬午。先少師捐館。公廬墓三年。還舍。毀瘠不勝衣。除喪。干祿京師。大臣一見奇之。曰。王佐材也。除議禮局編修官。薦于徽宗。帝召對。謂蔡京曰。翟某器識深遠。議論通明。可儲東觀。拜秘書郎。公父子踵武蓬山。縉紳榮之。館中謀白宰府。請議登封以彰洪烈。公言。治貴清淨。柳宗元猶知封禪之非。今不勸上三代禮樂以文至治。而啓上師秦漢之侈心。懼王通之譏也。白簡論公詆忽治功。譏侮盛典。責監宿州稅。大觀丁亥。除著作郎。公九流七略靡不該貫。率語成章。事以類舉。一日。館中群集。問植栢于墓何義。公言。任昉云。地中有獸名弗述。好食亡者腦。銅鐵擊之不死。栢插其腦即斃。前漢黃腸題湊。蓋以禦之。漢制。主第樹栢中庭。取松栢之茂也。明年秋。遷左史。淵聖皇帝出就外傳。擇一時人物爲官僚。首命公勸講儲



宮。冬、詔試詞掖。徽宗皇帝務述熙豐政事、士夫學宗王氏、以通經爲要、史學無介意者。言官媚公負材驟進、論公少從蘇軾、黃庭堅游、學術不正、不當內史贊書之任、除顯謨閣待制、知襄州。未行、再論、降直龍圖閣、知齊州。郡圃舊引舜泉爲流水、周臺榭、前政貪墨無藝、淤之、植澤瀉私己。公命導泉如初。或謂使君有拔葵之風、公曰、郡圃與民皆樂者、而瀆利自汙、懼民之弗率也。未幾、言章再論、落職知唐州。坐謝章自辨、言者挾忿、肆攻不已、罷郡符畀祠祿。政和壬辰秋、復職知陳州。明年春正月、詔還西掖。公以天子修明禮樂、比隆三代、王言非深厚爾雅、不足行遠、乃師盤詰、以敷辭令、震耀中外、明并日月、四方傳誦、咨嗟太息。夏、除修哲宗皇帝國史、提舉京畿常平。范愼奏、陛下執大象以撫域中、天人和同、幽明感格、奠九鼎、作晟樂、受玄主、行冠禮、祀園丘、祭方澤、協氣橫流、珍祥沓至、天神

降、地祇出、皆甚盛德事、曠古所未聞也。然未有顯大之舉、以榮天休、以彰美績。願詔儒官、制爲樂章、薦之郊廟、以傳無窮。奉旨委公修製。公奏、古者登歌在上、乃播八音、聲依永言、始協律呂、雖有韶、濩之作、必先雅、頌之正。所以猗那、長發、光祀成湯。清廟、我將、周人用享。其上推本有妣、姜嫄受命之始、其次備載太任、太姒作合之德。爰暨武丁、成宣、褒大其子孫。下及周、召、山甫、顯揚其佐命。聖君賢臣、勳德光明、更歷千載、震耀如初。體大事重、苟非其人、孰敢輕議。陛下肇新晟樂、天地顧答、改作禮器、比隆商周、宜得語言文學之臣、付以聲詩郊廟之奏、薦功皇天、明詔萬世。乃以臣愚討論、是使蚊虻負山、氣力幾何。不允。冬、祀圓丘、帝出郊、有人物車馬空峙雲端、時謂天人相與、白日顯行云。宰相蔡京請率百官慶賀、詔表非翟某莫能昭明嘉祥、叙侈神貺、其俾視草。冬十一月、除給事中。京兆投事

使臣、吉州防禦使竇鑑強買市人張順女爲側室、順不從、誣順京城殺牛、白晝集群不逞劫其家、掠女以去。順訊冤闕下、詔鑑奪爵爲士伍。未幾、詔刊丹書、許用郊恩薦其子昌。公言、鑑招合亡命、白晝肆掠平民、昌聚衆殺人輦下、父子肆行兇威、無所忌憚、縱未即肆市朝、豈可蒙被世賞、重汙爵列。如此、則小人無所懲艾、刑法無所施用矣。詔格前旨。雞林遣使入貢、詔元宵觀燈、班侍從上。公請對、言、春秋王人雖微、序諸侯上。聖王之制、先諸夏而後外域。廉陛崇峻、則堂堂尊嚴。軌物凌遲、則國威頓損。今島夷細介、奉琛而至、一旦升法從上、是中國自卑、天子近臣、而尊顯陪臣之小物。若遂行之、貽辱朝廷、有無人之歎。帝矍然曰、非卿不及是也。命如舊制。政和間、內外乂安、百揆時叙、詔儒臣修明典則、肇新宋禮、以訓四方、除公禮制局詳議官。明年、天錫帝簋、帝承天休、詔禮官革漢唐諸儒臆說、

之陋、憲三代稽古象物、昭德于彝器。凡祀園丘、祭方澤、享禩宮及太室諸器、專命公監三代、正軌則、制器銘功、以格神祇祖考。於是宋器大備、匹休商周。楚庭讎上命公作讎師逐癘詞四六韻語凡三篇、辰受命、午即上。帝讀之曰、班馬才也。內侍梁師成寵冠一時、位兼三事、畫旨和買百姓墓田、增闢園地。公言、昔鄭簡公葬、欲毀公族之廟與司墓之室以行、子產不可、君子以爲知禮。曰禮無毀人以自成者。今近幸之臣假詔平人之墓、以廣遊樂之所、非所聞也。梁怒、諷宰相黜公守宛陵。郡山嶮民貧、酒坊課額夥大、月入稍虧、或負沽過界、常平使者逕遣官封坊場、籍家財、充逋賞。公奏、前後征繫爲戶一百三十有八、爲錢三十六萬八千有奇。窮民較沽、規利養生、坐不售、或繫累致蕩產、復逮繫不聊、且非無良故犯者。今責必不可得之逋、使朝夕愁嘆囹圄、上累至仁。請一切貸貰、以洗瘡痍。裁



減歲額、以省刑罰。詔悉除負、額減舊半。明年秋、除吏部侍郎、未拜、改帥合肥。踰月、移守密州。密負海、鹽課甲諸郡。崇寧初、宰相蔡京廢平準爲榷貨、飭爲新法、茶鹽鈔、俾商人先輸錢請鈔、赴產鹽郡授鹽。始嚴刑杜絕私市、欲囊括四方之錢、盡實中都。意欲帝謂非相市、他人莫能給用、則己可固位肆姦。常使見行之法、售給才通、輒復變易、欺商賈以奪民利、名對帶法。客負鈔請鹽、扼不即畀、必對元數、再買新鈔、方許帶給舊鈔之半。季年又變對帶爲循環法。循環者、已買鈔未授鹽、復更鈔、更鈔鹽未給、復貼納錢、然後給鹽。凡三輸錢始獲一直之貨。民無資更鈔、已納錢悉乾沒、數十萬券一昔爲敗楮、無所用。富商巨賈、朝爲猗頓、夕至殍丐。盜販衡石者、推原經歷、窮治黨與、追逮跡捕、狴犴充溢、死亡道路。重抵黥配、輕辟至徒、即獄更累、政不敢縱捨。公曰、祖宗法獲私商不詰所由、以靖民也。今

嬖集不逞、苛刻之一旦亡命、是樹寇也。悉縱之。卒公代、無以鹽犯禁者。宣和初、朝廷興燕山之師、諸路稅帛、指會須給。版曹言、祖宗制、衛兵以八月授衣、請夏賦六月畢至。詔諸路促輸。上下相承、催督峻急、富室乘時射利、匹至倍值。公曰、今四月蠶未簇而督絹、殆如緣木求魚。命匹納見值之半、遣官貿易京師、從容告辦。東武多牛、朝廷歲須牛黃、牛失黃輒瘠死、民坐黃破產者相屬。公曰、守勸民耕者、而督黃致斃其牛、此孟子所謂以政殺也。天府藥物所聚、宜易致、遣牙校往求以獻。公言、黃以享上、臣敢有辭。請歲輸錢、就市輦載。徽宗皇帝大德至仁、降旨直免。明年賦花羅頒六宮、戶部言、膠西絲帛所產、請不敷給。公曰、此定潤物、邦人雖莫嫻、當經畫承命、苟復抗請、蔑濟也。遣吏走兩郡、傭工以教織紵、甫期自集。冬、請宮祠以歸。又半歲、有浩然獨往之志、乃上章謝事。踰歲、帝聞公精神強固、

詔復奉祠。明年詔還東省、旋報罷。淵聖皇帝即位、以東宮舊臣、召直翰苑。公以時事俶擾、即日造朝。既對、請遣使北人、立其裔結林牙伊都、以尋舊好、與爲唇齒、以抗金兵。力言、金人盟好難信、今傾國內侵、苟不厭志、其肯徒回。若倚和緩備、使得逞其間、非計也。且中國久安、兵不習戰、是我力已不敵。顧今無策、惟分促勤王之師、速會畿甸、散屯以多其應、持重以老其師。詔諸將審用間諜、互爲策應。彼野無所掠、攜而久留必怠、怠而擊之、庶幾或濟。今日之事、非老臣無敢盡言者、惟陛下深計社稷安危、無忽大事。時耿南仲及其子延禧以潛邸調護恩、言聽計從、堅請和戎。公言不用、請去、除顯謨閣學士、守會稽。先少師凡再牧越、公繼爲郡、邦人美緇衣之榮。下車專以仁政、賦訟有更數政不決者、公一語開曉、咸得其情、皆悅伏而去。公聞二聖出狩、集本道兵五千人援京師。時上駐蹕畿

甸、遣官走帝所、請即帝位、以慰民望。復請糾合義師、追賊鏖戰、以張國勢。帝至廣陵、公以牧守不得詣見、乃遣上佐及其子耆年奔問官守。建炎二年春夏淫雨、蠶麥告病、公言、浙東和預買帛、歲九十萬六千匹、越二十三萬五百、以一路計當十之三。郡三邑、經方賊焚劫、戶口彫耗。總蕭山一縣家業錢一百七十緡、民力困弊、於此可見。陛下即位元年赦書、祖宗上供物帛悉有常數、熙寧已後、獻利之臣奏請增擴、不勝其弊、其議裁損、以紓民力。六月甲子、制詔賦斂之厚、其痛蠲除。臣謂與其剝窮民爲朝廷得少縑帛、不若敷君父實惠、使百姓咸知愛戴。臣已體赦敕惻怛之意、將第三等戶以上減半、第四戶以下權行住罷。及百姓身丁鹽錢、祖宗皆有定制、其後始於折米、今悉爲帛。臣已令只納見直。制曰可。轉運使吳昉劾公擅放錢帛、詔降官兩等。公表言、臣叨臨劇郡、實任牧民。當上



聖總戎之初、屬二聖蒙塵于外、遐方俶擾、衆志易搖。西有倪賊之未誅、東有方寇之餘黨、征徒潰散、群盜繁興、若催科之不聊、則環視而俱起。臣所謂輕捐州郡之租賦、乃以重保朝廷之土疆。明年飢、公問策於寮佐、咸請誘富室出穀以賑。公曰、今盜賊方興、誘勸之利未及貧民、而誅求之禍首及上戶、殆斷履補履也。即捐兩歲圭租散給。已而發郡廩、截上供以濟民、免流殍、賴活者數萬人。秋八月、杭卒陳通嬰城以叛、公曰、遠人猾夏、東南國根本。盜賊肆發、吾莅方鎮、賊在鄰境、不討、吳越環視爲盜區矣。即提兵七千渡濤江、與賊搏戰。公奏、浙西屯兵進退不一、莫肯用命。乞暫付臣節制、以畢臣功。朝廷方以專軍委憲臣高士瞻、士瞻戚里子、必欲招攜以幸功寵。公復言、今兵勢已盛、誅戮已加、而憲臣欲釋賊納降、意在黨賊、固沮軍興。昨嚴賊倪從慶跳踉山谷間、止十數輩、朝廷不深責帥臣

誅討、苟就招安、致人心無所懲艾。今復許招降、是朝廷專以官爵誘人爲盜、獎其叛逆、非所以訓也。及士瞻爲賊欲誘質、始專用兵。後文臣提刑周格繼至、復逗留、士瞻竟爲賊擄、而格被殺。賊志旣得、分遣間諜、散誘官軍、黨附滋衆。公復乞濟師、朝廷遣辛道宗將西兵五千爲援、至嘉禾、肆掠而潰。十一月、帝遣殿帥王淵統王師收復、言章論公總兵臨城、不肯會戰、有旨令公具析。公言、臣奉詔旬日、不知所對。自杭賊叛亂、獨臣首提孤軍與賊鏖戰、諸將悉爲憲臣抑制、不許會合、無一人肯應臣者。臣累奏乞暫付臣大將旂鼓、庶無汨撓、得以討賊。臣日夜策厲、瘡痍枕戈待命、不旬日王師蕩定。若責臣不武、不能破賊、則臣無所逃罪。若以臣不會合、則無單車一介與臣犄角、不識使臣與誰會合。臣前後乞討賊、奏牘具在、非可誣也。奉旨特降充顯謨閣直學士。富民諸葛氏即居爲樓、臨通衢、歲

久爲鬼物所據、白晝顯出、夜明炬如墟野間、人莫敢登、因塑像其上、往來或不致嚴、即崇苦之。公命關樓爲酒肆、名曰和旨、取課入以資軍儲、徙像叢祠中、神無聞焉。左轄葉夢得聞之、曰、是肯受令翟公、信有德君子哉。吏部尙書黃裳、道山前輩也、歎曰、翟公能使鬼神知畏、是難能也。後月入豐衍、朝廷置官莅沽、以佐經費。公爲郡、軍士以事遠適者、必計道費、具藥物、審視遣之。旣行、經理其家、靡有闕遺。計杭賊之亂、管置郵傳、通息耗、委官撫拏、咸懷愾敵、無私顧憂。軍行、與士卒同起居、次舍庖爨無異具、時嘆以爲古賢將所不及。公牧越、始至、營無屋、軍士僦舍、與民雜處。公曰、帥職不修至此、其能責士用命乎。即廢基創屋三千楹。旣成、躬按行廬舍、爲辦服用、微至匕箸杯盂、靡不備具。然後以次授館。士卒咸感涕稽顙、謂撫士恤隱、昔所未聞。然有犯必誅、人人畏愛、莫不自盡。浙東副總管楊

應誠累歷廉訪使者、以下除箠牧、怫鬱不平、數詆時政。懼公不能自安、謀爲保全計、乃欺朝廷稱嘗隨其父任邊吏、熟知敵情、及自高麗至、女眞逕道、請身使三韓、結雞林、圖迎復二聖。公奏、應誠欺罔君父、自爲身謀、實無奇計、可返翠華。苟應誠至高麗、高麗辭以大國之使、假道以問行所、敢不承命。或金人聞使人至自敝邑、請問津以窺吳越、則將何辭以對。決辱命、取侮遠人。臣已檄四明、苟應誠至、毋濟其行。應誠聞之、自臨安登海舶以往。旣至高麗、果如公言、氣索而返。郡僚聽訟有不能得者、衆以謁公、語未旣、已洞始末、片言折之、群疑渙然、罔不歎伏。公旣去、邦人塑公像于郡之龍瑞宮、能仁寺、咸以公射弧之日修梵供、以伸善頌。戶繪公像奉祠、畫史至摹本立直以售。邦人飲食、必祝公而後食、閔閔焉惟曰夕望公復至。公莅郡、或細故而置理、或重負隨釋遣之、然咸得其情、衆始腹非



卒皆心服。後政師公行事不當也。既而訪其跡。則厚貸者果善良。而吏訊者凶人也。已而曰。無以爲也。是得於心。不可學。建炎四年冬。以疾力請掛冠。章十上始得去。明年。金人南渡。避地閩嶠。紹興初。天子駐蹕山陰。詔復以翰林學士起公。未至。除承旨兼侍讀。命所寓郡守即廬勸駕。敕使人頒詔。須公啓行以聞。既對。帝顧公進趨雍容。議論英特。謂中興人物之表。殿廬御士見公步武溫麗。音吐暢潤。論事切要。咨嗟改觀。曰。今日豈止復睹漢官威儀。是學士位廟堂。中興必矣。每制詔上。帝讀之。恨起公晚。踰月。除參知政事。公力辭不得命。公亦以經世爲己任。天子虛心聽納。倚以圖治。海內引領尅復。二聖狩金國。議臣言。三韓距金境密邇。請取道以迎兵衛。高麗隨遣使造朝。帝令止行人于四明。俾其屬進。及堂參。公適在告。宰相出笏逆之。公聞亟出。謂丞相曰。三韓國陪臣。藉其主來。猶班兩

省下。今使人之屬至。僕射以漢相之尊。與爲客禮。是自貶以傷國體。非所謂折衝禦侮者。及再見。公命吏諭之曰。宰相出笏見使者。以恭問二聖行蹕。今竣事矣。其以吏見使人。既進。加恭疇昔。秦檜爲相。四方奏請填委未決。吏並爲奸。公語檜專責都司程考吏牘。稽違者峻懲之。公當印。凡訟訴直送所屬。會六部者不得過一日。吏懼自力。無復滯事。同列誚公非堂牒典故。公曰。天子蒙塵。四方奏報利害。間不容髮。若用承平故實。則玩時廢日。不唯事失機會。舉有滯留之嘆矣。方時艱棘。聖賢馳驚。猶不給。吾儕可惰而任吏耶。公因對。乞治堂吏受賄者。檜面劾公擅治吏。公言。臣位執政。按吏而宰相見劾。豈可無恥居位。即力求去。帝挽之不可。公言。宰相既不許臣預政。臣豈敢苟偷榮以誤國事。退復堅請。言官方孟卿逢檜意。抗章論公不合與宰相不協。因防秋。欲以細故去位。詔以散官就第。

公表言、臣昨陪國論、誤簡聖衷、不量孤獨之交、欲濟艱虞之會。謂蒙全度之見察、豈料同列之不咸。而雖號參知了無關預。人材除擢、但見畫于錄黃。政事施行、一視成於牒檢。憂心自念、負愧益深、若蹈淵冰、不能朝夕。與其雷同充位之無補、莫若潔己求去之爲宜。又云、爵祿非事君之本心、所懷經世。去就乃□臣之大節、安敢辱身。使臣得辭寵利於聖朝、是亦能識廉恥而爲國。既歸、謝賓客、以道釋書自娛。曰、五千言守恬淡、合虛無爲先。金仙氏明空寂、覺妄幻爲本。旨趣玄遠、自非上智默識、無自而入。然有無之相資、如形影之相隨、初不獨立。謂無上普度天人、莫尊於黃籙大醮、著盟眞玉檢十卷。如來升濟六趣、莫大於冥陽齋作淨供普濟儀三卷。皆哀晉、唐以來郊天奉佛之典。丹章綠字之書、稽據參考、創成一家、軌量宏深、廣大悉備、眞前古之所未有。欲使修真之士知非勤功行、嚴齋

戒、盡誠恪躬禮容、不足以格上帝、感大雄、濟群生。其立意陳辭、貫通墳典、合六經之實旨、闡玄教之至言、非叔世諂道佞佛狹隘之所窺識。冬十月、丁普安夫人憂、哀過而禮不踰士之好禮者式焉。又明年、徒行扶護、自台歸、祔先少師之塋。子弟諫公六十不毀、禮經所著。今老人血氣已衰、跋涉千里、日又摧傷、脫冒霜露、將謂卒大事何。公曰、荼毒至此、吾忍以年不自盡乎。是歲、金人復窺江表、軍行不得進、乃葬湖州之官宅村。既復土、留湖以奉松楸。服除、泛恩除端明殿學士。劉豫挾金人臨淮、師退、詔前宰執議禦敵善後之計。公言、朝廷無遠略、無定論、無腹心謀議之臣。三者不立、何後之善。自金人躡藉中國、乘輿越在裔土、雖西晉劉、石之禍、唐室安、史之亂、不至于此。自建炎俶擾、今九年矣、天下日苦于兵、而戰守之計初未定也。經國規模、初未立也。將相大臣每至防秋、則豫謀避地之計、



至春則泰然安肆、如無事之日。敵至與衆同懼、適退與衆同喜、如斯而已。所謂禦敵者、臣不識也。昔晉武帝欲平吳、得張華、羊祜、杜預以贊其計。唐憲宗討淮蔡、武宗伐澤潞、賴裴度、李德裕以成其功。今群臣泛泛然如河中之木、則陛下誰與權事、揆策以圖今日之事乎。臣願擇大臣有深謀遠略者、任之、責其恢復。拔用能將、必以卻敵。合天下之英傑、相與講謀立國之紀綱、規模先定、然後可爲也。公以湖去行朝一舍、冠蓋旁午、乃遷寓平江之常熟。紹興七年冬、以郊恩除資政殿學士、提舉臨安府洞霄宮。金人歸地之歲、自沂密來者言京東西人懷歸之心、朝不能夕、約王師至則倒戈相應。既聞公登廊廟、曰、庶撫我乎。苟朝家命給事、公自給事中出守密、故民云、收復、我必死鋒鏑、以報公德。朝廷無遺矢亡鏃之費、京東西可一日復也。既聞公去國、咸蹙然曰、莫有推誠軫物、忠實無私、可與成此功者。

吾其爲異域鬼矣。京東西人謂公政通神明、旁郡之不伸者、咸即公求成。公笑遣之。舉陳牒部使者、請送公理正、曰、公不吾與、吾無憾也。大觀末、三代禮器稍出、學士大夫獲識全古、漸跡先秦科斗字。學公建言、古者班諸侯宗彝、使鎮撫其社稷、以世守之。當是時、咸受彝器於王室、而後能國、抑爲寶重矣。聖人制器尙象、載道垂戒、寓不傳之妙於尊彝、使人即器以求象、即象以求意、心悟目擊、命物之智、曉禮樂法、而不說之秘、於起居飲食之間、朝夕監觀、罔有逸德。此唐虞所以畫衣冠爲紀、而民不犯。蓋犧象、尊彝、鼎彝、豆籩所用不同、爲禮各異。周人小宗伯之職、辨六尊六彝之名物、又專設官以司其用、刻銘皆科斗文字。聖人作經、以載道、經非字莫成文。周禮保氏以六書教國子。其後官弗修方、罔知跡于籀古、至謂小學、不復經意。枸鼎、惺銘之竅、羽陵汲冢之書、曾不耳聞。周宣王時、史籀

變倉頡之法、作大篆、總天下字、一以會意。書法之壞、自籀始、其書俗惡、已不可言。秦又惡大篆之煩、務從簡易、李斯、趙高、胡毋敬變爲小篆。程邈起獄隸、創爲隸法、始皇謂便於迅急、行之不疑。四人胥吏之資、臧獲之見、挾秦刑殺之威、鉗天下儒術之口、必欲顯名不朽。斯因奏罷天下書、不合秦文者盡除之、焚燒先典、殄滅籀學、而古文絕矣。漢去周爲近、習於秦隸、不識籀古。唐開元間、又變漢隸爲今文、人至不識隸書。今字學舉宗許氏。方東漢和安永元、建光間、先秦古文已絕、許氏但襲秦隸、悉從轉聲、野陋淺薄、繆妄斯甚、其害至於錯亂經旨。錯亂則事君訓民、何自而正。聶崇義集腐儒之說、著三禮圖、以誤後學。今商周禮器、科斗文字、燦然畢出、陛下方紹稽三代、光明典禮、此獨鬱而未揚、疑有闕也。願詔碩儒博聞之士、稽正六經、考禮於夏商之器、正字於鼎彝之間、剷革繆僞、搜訪失絕、

使六經尊疊犧象之用、六書象形科斗之書、昭明炳煥、與六經相表裏、以教後人、天下幸甚。上大喜、詔禮官即議以聞。有司謂事大功夥、曠日引時、繼罹金人之亂、竟不克成、識者太息。公爲郡、必稽公帑之逋於民者、罷宴集、絕饋餉、儲月廩償之、曰、瘠民以適己、白取以稱客、吾不能也。凡朝廷與郡市民物、必面給直、曰、守不親畀、則爲吏豪奪、所得無幾矣。公奉先嚴恭著享禮一卷、節朔按以行事。每祭必先掃除、內外宿設筵几、率族屬告于祖廟。既夕、迎主就位、戒內外無或警咳及聞履聲者、以謂祭求諸陰、故昏而行禮。屏氣山立、餽尊拜祝、如聞嘆息、如見所祭。質明竣事、奠幣燎瘞、奉祐返室、再拜綏神乃退。自少至老、雖甚疾、必自力。公言、范曄後漢書語近詞冗、事多注見、其自叙云、筆勢縱橫、比方班氏、非但不愧、今叢陋乃爾、豈筆削未定、緣事被誅、遂傳之耶。乃刪取精要、總合傳注、作東漢



通史五十卷。謂儒者道不行、立空言無補也。著圃學五卷、廣聞三卷、人物志五卷、曰亦足以遺人矣。公藏金石刻千卷、心畫妙天下、用筆窺六朝書法之秘、盡沉着痛快、遒麗勁逸之美、雖一點一畫、不妄下筆。米元章、蔡天啓見公行筆、驚曰、非唐賢所及。張文潛贈公詩稱顏筋柳骨、世不聞、翟公筆力回千鈞、蓋實錄也。公心印剛正、訟牒押尾、吏悉截取以怖瘞。蓄六朝至唐名畫甚富、洞曉畫法、白畫三境高真圖、十極列聖圖、九天朝元圖、四聖降魔圖、凡六十軸。三天雲輅圖、九天乘龍圖、七佛圖、淨土彌陀觀音勢至像、着色楚山春曉圖。又妙於刻塑、授法工師、刻三清玉帝真武像於會稽之告成觀、盡端嚴溫慈之相、神氣虛閑、如與人接、見者肅然。郡人謂之木寶。常州廣孝寺僧伽留衣化也、公以舊製不工、親爲易塑、得如來憫世援溺之狀、雖戴安道、楊惠之復出、殆無以過。既成、五色光出、窳

堵波、燁然高數十丈、有目咸睹。公知人之鑑、世服其明。嘗相吳敏、范宗尹、自布衣期以遠達。秦檜爲密州學官、一見知必爲公輔、執政、從官或援於場屋、或自僚屬薦於朝者、一百三十五人。程俱、陳橐、韓駒、皆門生也。公喜治藥物、哀方之經驗者爲肘後秘書三十卷、施藥濟人、四十年未嘗少怠。炮炙和劑、必躬必親。爲守日、遣醫歷民居、及軍伍視疾苦、坊置病歷、遣官檢校、具增損以告。貧者賙恤之、死亡則給槨具、贈其家。先祖帥商丘、遣公應貢松楸。至盱眙、宿普照寺、寺僧伽真身所捨塔也。主僧子英設食腴而惡、公曰、一齏麵足矣。奚以是爲。英夜夢紫衣僧告曰、翟公須齏麵、宜亟設。英素凶德、訶遣之、逮曉復夢僧至、曰、客須齏麵、師勿靳也。英驚寤、見僧反手扃戶而出、惕然悟爲塔中仙。遲明過公語故、公留行致謝曰、弟子敢以口腹累和尚耶。公至朝、以力請復北人之裔、修好以禦金人不

合、求去。是冬、京師陷、獨脫圍城之禍、始悟其請出也。太夫人吳氏潤人、享年八十有八。自歸先少師、至公位執政、歲時奉祀、治家咸有典則。婦德母儀、時稱閭訓。賢夫令子、世爲名臣、四方榮焉。翟氏內外宗族以百數、舉無間言。軫姻黨之急、甚于己私。居先少師喪、貧悴不聊、有相資者、夫人笑曰、吾貧暫爾、吾兒豈資人者。初不屑也。公俸稍奉親賑施外、未嘗妄費。買田於高郵及鄉里、謂子弟曰、吾豈老而悖謬、置多田遺子孫爭端哉。蓋欲創道宮曰仁靖、佛廟曰植德、徼福老釋、升濟考妣、少伸風樹之悲爾。公捐館舍、耆年營靖館於櫺之陽、創梵宮于公墓之右、卒父業也。治家鞭撻臧獲、必正衣冠拱立曰、五刑、天儆怠荒、今私用之、復情肆、吾懼不敢。所謂非禮威嚴不行、聖人教人先自肅爾。公奉養未嘗過量曰、吾寒儒、敢易天祿以肆志哉。至於竹頭木屑、未嘗蔑棄曰、暴殄天物、用不以道、是殄

物也。及義所當施、雖黃金百鎰、舉猶鴻毛。金人至中原、衣冠厄兵火、十室而九、惟公獨免。公與人交、必誠必信。前後爲同列中傷、不遺餘力、直道而行、恬然自信。庸人狡夫、欺以百數、或請閑之、公曰、不誠無物、尤而效之、又可乎哉。與人期、雖虎豹在前、烈風雷雨、不變也。每戒子弟曰、汝寧容人欺、毋以不誠待物。嘗言快意事勿爲、爲必有悔。又言、麟鳳、人雖不識、聞其名者莫不聳悅。梟獍、雖不害人、見者莫不憎惡。士人不師德麟鳳、而爲刻薄使人如見梟獍、是自棄也。宣政間、士夫咸附北司、以圖進寵。及二聖出狩、汨喪忠赤、以苟活性命、獨公以道自守、進退光明無垢。公言、三代人攸好德、叔世稟性不善、剛戾暴恣。先師老釋更出而化導之、使依仁寶慈、以自免于戾。懼其頑弗格也、又申言福善禍淫、以教誘之、冀其知畏而懲焉。三聖者哀傷諄誨而莫格、甚矣人之難化也。公濟物之心、須臾不



怠故賦政以惠民爲本。祇畏之心日省夕惕故行事以遠悔爲先。嘗言、人生於憂患故易稱履虎尾索索終吉、此聖人教人儆畏以遠禍也。公清明垣夷表裏洞達、口未嘗言人過、篤於行義、奏補先甥姪而後子孫。鄉人貧不克婚葬者、輒爲主辦。錄旅櫬之無歸者千七百函瘞之。爲郡必搜境內之在殯者、具費使復土、曰、掩骼埋胔、王澤也、守可壅乎。晚年數夢釋迦佛、教工刻製極華飾崇奉之嚴。公薨之歲、自正月上日、金碧頓昏、如煙霧所噎、日現顰蹙之容。仲秋晦、公忽棄世。公以熙寧九年丙辰九月十一日戌時生、紹興辛酉八月二十九日薨於平江府常熟縣寓舍、享年六十有六。前三日、群鳥集正寢、號鳴不止、夕有大星隕于室。父老嘆曰、公其殆乎。公疾革、命耆年凡故臣恤典之例錫者、悉辭於朝、曰、吾生無益於國、死不敢重爲君費。遺表言、今國步方艱、人危未靖、將帥驕惰而不能復

尺寸之地、倉廩空虛而至於無歲月之儲、士有溝壑之憂、民懷杼軸之嘆。致睿躬之嘗膽、期勵衆以止戈。所願益慨聖衷、誕恢遠略、思爲君之難而慎於出令、欽惟刑之恤而審于用刑。懋終典學之勲、以廣生知之聖。清心省欲、崇簡易以經邦。務儉寶慈、敷柔惠以懷衆。修己以安百姓、耀德以綏四方。旌諫以來盡言、營田以期足食。重名節以激媮弊、信賞罰以振紀綱。減冗食之吏以靖民、清入仕之源以省吏。鑄任子之令、使知學古而入官。嚴薦舉之科、敷求實材而授職。赫然復古、繼周室之中興。力致郅隆、使漢儀之復見。語皆救時之弊、極言無隱。人所不敢及者、君子謂至矣盡矣。自得疾至易簣、惟飲水自潔。及屬纊、無一言及家事。卧左脅、沉然以沒。非平日於性命道德所悟入、孰能視死生如晝夜至此。始娶吏部尙書原武邢恕之女、邢惇夫者、其弟也。夫人詞學輩惇夫、而識過之、享年三

十一、贈魯國夫人。繼室趙郡太守汝陽王純之女。封魏國夫人。夫人事先君謹而甚至。子三人。長即耆年。邢出也。耆年自少知友。皆天下有名士。丈人行也。劉器之所甚愛。而以著騷見稱于張文潛。養志自修。好古文及黃老言。介褊不苟合。質不任吏。自謂爲吏必以戇罷。少日即退休。著黃冠服。放浪山谷間。以著書自娛。宰相范覺民語徵君蘇養直曰。翟子清濁大明。善惡太分。此張惠恕之所以不能取容當世也。既老。居于家。環舍植桐百本。自號拚臉老隱。次鉉。右朝奉大夫。通判嚴州。次紱。右朝請大夫。權發遣南劍州。孫十人。次右奉議郎。監登聞鼓院。賜緋魚袋。略。右從事郎。淮南東路提舉常平司幹辦公事。嶧。右承事郎。監建康府權貨務都茶場門。峻。右承奉郎。兩浙路轉運司幹辦公事。疇。右承事郎。福建提舉茶鹽司幹辦公事。貺。承奉郎。隣。愁。皆承務郎。曾孫五人。襄。恣。哀。皆將仕郎。交。未。

官。次未名。女三人。公病痔。痛苦不聊。仲女慈忍者。再刳股雜劑進。公賴以少損。以其年十一月二十六日葬于潤州之丹陽縣九靈山。耆年哀公平日著述。爲翟氏家集三十卷。系除官制誥於後。欲後世考公行實。知家傳之實錄也。孤耆年曰。先君平昔言。吾死無誌墓。無請諡。無立墓隧之碑。自古有死。疾沒世而無稱。太上立言。惟託名爲不朽。吾三朝遺老。進退不疵。應傳太史。若無求事刻畫以誇流俗。苟平日不爲人信。是直資鎮石耳。惟公能足以康天下。道足以經百世。窮居約處。欲以一身支大廈之將傾。障狂瀾於既倒。言未發而衆先喻。功未見而衆先信。力不及而世與之。其宣于事業者。萬不一試而彰焉。猶爲一世之所甚重。使出其二三以安利乎人。則澤之被世。其何涯也。孤耆年懼無以光昭先君之令德。傳於永世。故追紀平日語言行事爲家傳。以備史氏之求。而其質固陋不足



以識立身行道之大方、其辭鄙拙不足以述致君澤民之萬一、適足以玷累光明、蕪穢盛德云。既葬、孤耆年再拜稽顙請于賓曰、先公有治命矣、敢請所以信於無窮而昭其德者、寵嘉先人而庇其遺嗣、是先大夫之沒不朽、而不肖之孤猶可以釋憾於九原也。賓拜稽首曰、夫子納君於善、終食不違、嘉績協於師言、是不亦忠乎。夫子濟物之心、坐以待旦、不亦惠乎。故謂夫子忠惠先生。

翟耆年撰 《忠惠集》附錄

朝散大夫行尚書司封員外郎致仕毛公

墓誌銘

建炎四年秋、有旨召朝散大夫毛隨詣行在所、尚書下衢州趣爲駕。既至、始見政事堂、陳天下利害、慷慨明白、有言動聽。先是、虜比歲大入。是年春、猖蹶至東南、並海郡回、留兵淮南、須涼秋、示必渡。君言、按漢志、歲星所在、國不可伐。昔湯之元祀、歲星

順行、與日合于房。房心、宋亳分也。周之興也、武王還自盟津、至于豐。明年、歲星順行、與日合于柳、建留于張、其分實河洛之墟。故武王定鼎洛邑、而周公迄營成周。今年冬、歲星當躔于斗、歲主福德、斗吳越之會、蓋與商周之事略同。天其或者將厭亂而興宋乎、虜不南渡矣。然敵人進退、本不足言。自古禦戎上策、莫先自治。今六軍在行日久、豈無致果殺敵之心、在朝廷所以用之耳。爲今日計、莫若保天險、增戰備、權宜都邑、不爲輕動、以係四方之觀聽、則人心不搖、士氣日壯。此孫武所謂恃吾有以待之者也。因條上三策、所以措畫之宜甚悉。已而詔以爲尚書司封員外郎。明年春、有薦公材中御史者。方召對、而君病矣。會余亦召至行在所、備官蘭臺、間至君舍、問所苦。病浸劇、則日一至其舍。君上氣加腫、奄奄息僅屬、言及天下事、輒奮髯扼擊、語吃吃不能盡意、則太息而止、不以後事一語

屬人。余未嘗不悲其志而惜其病且死也。請老。詔以本官朝散大夫、尚書司封員外郎致仕。竟以紹興元年四月己巳卒于越州大善僧寺之寓舍。享年五十五。季子叔度實從以喪歸其家。將以某月某甲子葬君於其鄉某山之原。來請銘。崇寧初。當國者取士大夫所上書舉爲二籍。余與彥時在邪籍中。皆罷吏歸鄉郡。彥時固邑子。至是始識面。與游驩甚。時年皆未壯。平居相與言。必天下所以治亂興衰之槩。與夫出處去就之宜。所從游往往一世英豪。後十五年。上皇稍更政事。去泰甚。黨禁少弛。余浸被收錄爲尚書郎。君纔脫州縣。因以類進。得爲秘書省校書郎。遷著作佐郎。會二府三公相傾奪。思以不克紹述臻罪宰相者。出君通判虔州。已而相以它罪罷。黨事復緩。而北方兵起矣。余知君最深。其出處又如此。是安得辭。君諱隨。字彥時。衢州江山縣人。其世所自出與徙著之由。則有先

世之譜牒在。曾祖諱煥。贈中大夫。祖諱愷。朝請郎。贈正議大夫。清約有古人之介。父諱勉。朝奉郎。贈中大夫。躬行有家法。母江氏。累贈令人。君年始冠。中紹聖四年進士第。調秀州華亭縣尉。其持身效官。爲邑人之所欽愛。秩滿。調明州鄞縣主簿。遷文林郎。爲江寧府司戶曹事。丁外艱。服除。監大觀東庫。改宣教郎。丁內艱。服除。遂入秘書省。其在虔州也。靖康初。朝廷調諸郡將吏防秋北邊。虜犯河南。經制使復哀見卒。援京師。虔居江西上游。俗喜鬪。輕死。群不逞乘間起。嘯聚山澤。衆且數千。郡吏憑虛堞。張空券以示備。君馳諭諸邑。索土豪大猾。拳勇奇技。得數十人。徹衛與語。開懷見誠。人人感奮。爭自效。因使各部其衆。淬勵須戰。則又榜盜區曰。不爲盜。居數日。賊黨散三之二。公擇所募。授以方略。曰。賊曾以其衆今在某山中。若爲我生致之。期



三日反報。公還未及城。渠魁以生得。朝廷嘉其功。進官三等。時中原新罹虜禍。劇盜潰卒。驚剽相望。君方攝行郡事。益募士除戎器。謹關候。待糒糧。郡以無事。軍興。調發。應時趣辦。而人不擾。君幼則警敏。嘗讀漢書一傳三千言。數過輒成誦。長遊學校。有俊聲。一出仕。即坐上書不得調。於是刻意爲己之學。函泳六經諸史。百氏之間。窮理盡性之說。至天文地理曆數卜筮。無不學。學必窮日夜。書必汗牛馬。至占驗消息。猝然失之。即棄去。又學不休。其爲文歷落平易。獨寫其意所欲道。意盡便止。粲然立成。論事抗顏不疑。視天下事若無難者。其爲吏自縣簿尉。參幕府。至監一郡。隨事不苟。必有所裨助。建立所歷有能聲。然人卒不能以能吏名也。妻李氏。故朝奉大夫杅之女。累封宜人。二男子。曰伯亮。將仕郎。曰叔度。舉進士。一女子。嫁從政郎詹堯謨。前卒。孫男一人。集其文得十五卷。藏於家。銘曰。

士有才奮。勇於敢爲。火馳機張。蹈險若夷。不奠其發。以顛以危。亦有君子。負繩抱規。擇地而行。惟古是稽。詭以應變。昧時與幾。君學而思。又敏於施。吏不蘄能。不苟不隳。學不蘄言。期見於時。而阨于初。而隕方躋。匪死之哀。君志是悲。

程俱撰 《北山小集》卷三三

校記

①遇：原作「邁」，據四庫本《鴻慶居士集》改。

②從：原作「後」，據明鈔本《孫尚書大全文集》卷六改。

③以：原作「已」，據右引改。

④「作」下右引有「爲」字。

⑤凡六十軸：此四字疑爲錯簡，似當接於「春曉圖」後。

⑥從事郎：原作「從侍郎」。按宋代階官有從事郎而無從侍郎，見《宋史·職官志》九。今據改。

⑦興：原作「典」，據四庫本《北山集》改。

宋儒碑傳集卷八十四

汪思溫 程俱 彪虎臣 劉一止 汪藻

宋故左朝議大夫直顯謨閣致仕汪公墓

志銘

左^①朝議大夫直顯謨閣致仕汪公以紹興二十七年二月六日感疾終於四明私第之正寢。將葬公之子右宣教郎大雅以太學博士史浩狀公世系爵里卒葬年月日授余請銘。余曰顯謨公行治勞烈稱天下今子釋其殯犯大暑絕重江走千里屬於不腆之辭以圖永久豈敢以既老爲解。乃序而銘之。公諱思溫字汝直明州鄞縣人。曾祖順祖元吉不仕。父洙明州助教以春秋之學知名用公貴。贈正奉大夫。公幼讀父書有聲場屋間。會朝廷更舍法改授他經。政和二年以太學上舍中乙科授將仕郎河南府登封縣尉就除雄州州學教授秩滿調衢州西安縣尉。宣和二年改承奉郎知越州

餘姚縣監河南草場。五轉至朝奉郎鄆王肅王景王府贊讀。上即位恩遷朝散郎提舉江南西路茶鹽公事。除屯田員外郎俄改倉部。紹興元年又改吏部再遷朝奉大夫。三年知衢州。時有諫議大夫被召過郡或請公致豐餉公曰諫官御史當如部使者之禮不敢過也。既有緒言謂公薄己公曰諫大夫辭受天下所瞻而子敖以我爲簡乎。歲餘嚴睦盜起公聚兵境上塞其隘秋毫不犯盜平而諫議公適在樞省劾公玩寇降秩二等罷歸。未幾御史中丞辛炳道三衢得公冤狀疏辯其誣詔復故官再除吏部轉朝散大夫進司農少卿吳興擇守有言公三衢治狀者除直徽猷閣知湖州。六年召歸太府爲少卿權知臨安府遷左朝請大夫直顯謨閣兩浙路計度轉運副使。八年復還太府公在吏部不爲權貴人下出守三衢至是復用事坐嘗抗己罷公爲直顯謨閣主管台州崇道觀江州太



平興國宮、凡五任十八年、終權貴人之世不用、遂老於家。公器資精悍、居官任事、以智爲樂、興功利、飭蠱壞、所泣皆有迹。雄地被邊、俗武悍、異時官師鄙夷其人、倚席不講。公曰、鵠音尙可革、況吾人乎。日課月試、躬自勸督之、而秀出之民、彬彬稍見焉。餘姚大邑、賦役不均、爲民患、公一不以屬吏、召諸豪入縣庭下、案版籍、差次甲乙、推選一人之應令者、曰、甲歲滿、乙代甲如律令。乙捧檄而出、無異言。他日、州將語公曰、諸縣訴徭役者無虛日、餘姚獨無有、何故。公曰、不使一吏預其間、縣無訟矣。縣瀕海、舊有隄六十里、除水患、歲久圯壞、民之墊於海者、呻吟相屬也。公舉衆力復之。隄成、而七鄉並海之田、桑麻杭稌之饒、盡復其故。又有湖號燭溪、疏通二斗門、視水漲落而閉縱之、灌東西五鄉田數百頃。歲旱、東鄉厭水矣、而西斗門地高仰、率嘗不應。請改築如東斗門以溉旱、而東鄉擅其利、積十

數年訟不決。公一日行縣至其處、曰、一湖如許大、使民求水而不得乎。爲之計工賦材、撤而大之。兩門相望、五鄉之田一等受水、而訟息。乃即治所爲樓於門上、斂敕書藏其中、高明碩大、爲一方壯觀。又斥餘材築一亭於大門外、凡詔令當頒行者、揭之亭中、使知避就。榜曰承宣云。吏部案牒、南渡之後、水火焚漂、埽地盡矣。一時予奪、吏操其柄、貧無資者、皆不得調。公至、群訴於庭。公延之坐、聽其說、應文書有一驗者、悉令補授、皆無者、爲奏立保任之法。不旬月而庭無留事、吏不能得一人一錢。有飛語聞、公詣都堂抗言辯數、不爲訕、用事者益不說。公請郡得衢。久之、詮法復壞、會用事者去國、再除吏部。選人改授京秩、而舉將有他故報罷去、留落蹭蹬、或至窮老。公始建請薦員溢格者、本部以收使不盡之數、移文所舉官別行改奏、詔從之。公每得一二錄紀姓名、納佩囊中、遇有舉將坐累、或物



故而不得升改者、公出囊中所儲、使自擇圖之、至今多所成就。公在三衢、有婦人送訟其子、公械送獄、徐召其母、以微言感之而察其情、母悔謝請貸。翌日慮囚、公曰、汝母訴汝當抵罪、又欲貰汝。破械縱遣、爲母子如初。有姑暱婢讒而虐其婦、婦求去、而姑譟譟喧訴不已、公曰、汝爲人姑、信讒而出其婦、婦去則汝子棄妻、汝孫失母、奚爲自破其家也。答其婢逐之、戒婦曰、害汝者去矣、善事其姑。姑亦感悔、跽謝而出。邦人聞之太息曰、使君眞古循吏也。祁王至自蜀、吏入白、親王詣州、州將當避正堂、須其至。公曰、^②即乘輿至、何^③以待之。治供帳如大賓客之儀。王入據館、公率僚吏進謁、退而語人曰、帝王之胄、自與常人殊、而舉措不類、何也。復有帝姬舍郡邸、群奴怙貴、劫請州縣、執辱官吏、一郡騷然。公曰、是亦一祁王也。不爲動。已而皆敗如公言。會稽渡錢塘、舟人冒利捆載而行、半渡弭楫邀取

錢物。而暴風猝至、舉舟盡溺死、操舟者皆善泅、獨亡恙。公曰、不戮此輩、則殺人未艾也。悉捕繫獄、論殺之。更造大艦十數、每一艦受若干人、製號如其數、以五采別異之、置吏監總、渡者給號登舟。即過數、而號與舟不類者、皆不受。舟人給直有定估、除十之一備補苴之費。抵今二十年無一舟之覆。浙江天下之至險、以龍山、外沙兩閘納東南之舟、而龍山之閘廢久矣。大駕駐錢塘、九州四海萬里之外、千艘百舵交錯其中、十倍於舊、一遇啓閘、奮棹爭前、進有擊鬪傷敗之憂、退虞潮波覆溺之害。公於是鳩工徒、疏龍山河、修復舊閘、啓閉出納如外沙之制、一時舟楫皆便之。湖人喜私釀、暴吏乘之、發卒圍捕、囊空甌倒、不遺一簪。公至、下令而予之期、過期不改、而後以文法從事、人感公誠、皆徙業無犯者。吳興地汙下、故有溝以走潦水、而並溝之居歲久填淤、或置屋其上、遇甚雨則水及半扉、公

按尋遺迹、撤屋除地、復還故道、水患遂除。公尤通練財計、屬時多故、暴斂急征、人不堪命、公宰一縣、守一州、使一路、不以一毫取於民。按視經數、設爲科條、凡粟帛酒茗征輸之入、爲圖揭之坐右、杜並緣乾沒之姦、罷不急無名之費、貲聚沛然、上下贍足。嘗因奏事、論天下之財、所以開闔斂散之術、上善其言、命公條具、付有司立法。公曰、臣所言、即陛下法也、但當擇吏推行爾。故入爲太府、司農、出爲轉運使、皆號稱職。公之材見於世用蓋如此。而屢困於讒忌、不得大位以佐天子、故止於效一官、任一職、無大勳名、爲可惜也。二十七年、上書致仕、積官至左朝議大夫、職直顯謨閣、佩服三品、爵文安縣開國男、食邑三百戶。享年八十一。公事親誠孝、居喪毀瘠甚。旣葬、有雙芝產墓上、冢舍成、遂以名之。公弟思齊、建炎初、上錄潛藩之舊、擢吏部郎。公持節使江右、命甫下、吏部得疾不可治、公具棺衾

於兵火創殘之中、如禮而辦。護喪下汴、絕淮沿^④江、僅次毘陵、而嘉禾叛兵奄至、公倉皇負柩舍一佛寺。寺僧驚逃出矣、公獨置一榻卧喪側、群盜過門、睥睨不入。亂定登舟、而大盜據錢塘、乃枉道趨華亭、僦舶舟爲航海之計。黎明欲解、而逆風大浪、不可進、舟師恐而言、喪舟涉海、徵祥已見、盍權厝而行。公具冠笏焚香、大言曰、某弟思齊遇疾而沒、自南京持旅櫬歸葬、間關盜賊、跋涉水陸^⑤、數千里而後得至此。舟人以驚觸神祇爲辭、將使亡弟遺骨棄之異縣、永無還理。鬼神有知、監余手足急難之故、加惠存沒、賜以便風、歸柩先壟。香火未收、風回浪息、舟師以手加額、挂席而東。日亭午、已次會稽之曹娥埭矣。旣還、治葬送、拊孤嫠、擇士嫁遣二女、又奏乞隨龍恩、任其婿。一子未勝衣而夭、公以第三子大有者爲主。後、今爲右迪功郎、監潭州南嶽廟。公嘗營一堂、號友恭、與吏部相戒、爲蚤退閒居。



對牀聽雨之約。堂成而吏部逝矣。公因之不改飭諸子曰。汝等識之。行吾志。公配恭人王氏。前卒。公命擇地於正奉之次。既得卜。又從旁築一塋。遷祔吏部曰。死而有知。父母兄弟相從於地下。奚羨有生之樂。諸孤以明年十一月甲申。舉公之柩合祔於縣之桃源鄉西嶼王恭人之墓。三男。長即大雅也。知紹興府諸暨縣丞。大猷。左宣教郎。知平江府崑山縣事。大定。登仕郎。七女。適右朝請郎樓璩。左朝奉大夫。太府少卿陳膏。右從事郎向子遇。右迪功郎洪筏。餘未行。孫男六人。行中。右迪功郎。通判海門縣主簿。積中。得中。端中。精中。敏中。孫女三人。長許嫁進士姜械。餘尚幼。曾孫男揆。公慷慨特達。勇於爲義。視人急難如在己。太學同舍生將論升而抵規罰。公歎曰。選補之法。躋攀分寸如曳九牛。一跌則墜重淵。不復出矣。請代君任此咎。時參知政事王絢爲學官。聞而義之事遂已。已而同舍生

以上舍賜第。後爲顯人。四明士俗喜事而樂施。一時寓公寄客困乏。不能自存。死而無以斂葬者。公爲首倡。士大夫應之翕然。故四方遊士皆以公爲歸。紹興初。余被讒斥徙象郡。舟次三衢。頓郊寺。治遵陸之裝。公閒遣別乘移具存省。而果茗藥餌肴醴之餉。亡虛日。蓋過旬而後去。有旨。所過州發卒護送。公擇五人。之謹厚者。戒曰。歸日。視某官書。有無爲殿最。於是五人者在道途。代負荷。備使令。如使君坐視其旁。行次臨川。授書而返。嗚呼。余方抵重譴。旅游萬里。日懷內溝下石之虞。公亦以抗直忤宰相出守。已又觸諫大夫之怒。而獨於放臣逐客哀窮悼屈。矜護纖悉。尙蒙賜於數百里之外。距今二十七年。得公行事論次爲書。少紓懷惠不報之責。而老去廢學。辭不逮心。懼不克稱。銘曰。士生於時。有遇不遇。僞鳳楚說。眞龍葉懼。踴貴履賤。惟時之遭。堇啄豨苓。而伯其曹。眩於創見。越犬

吠雪。敗於旣厭。吳牛喘月。矯矯汪公。絕類離倫。名滿四海。行配古人。獨立介然。不茹不吐。衆醉獨醒。人棄我取。高明之家。萬首俯趨。蚊蚋過前。視之無如。孰蹈坎井。擠之下石。山鞠窮呼。號之而出。金堅玉潔。不可磷緇。廉貪立懦。百世之師。權臣擅朝。用國威福。乃讒乃忌。一斥不復。短褐練巾。匹馬二童。儒先哲艾。閭里之宗。壽八十一。有化無死。銘以著之。亘千萬祀。

孫觀撰 《鴻慶居士文集》卷三七

宋故左中奉大夫徽猷閣待制新安縣開國伯食邑九百戶致仕贈左通奉大夫程公行狀

曾祖伯照。故贈光祿卿。祖母扶風太君魯氏。彭城太君錢氏。祖迪。故任尚書都官郎中致仕。祖母仁和縣君江氏。仙居縣君余氏。天水縣君愼氏。父天民。故任瀛州防禦推官。信州貴溪縣丞。贈左宣奉

大夫。母贈太碩人鄧氏。公諱俱。字致道。衢州開化人。程氏實高陽之裔。周成王時。伯符封國於程。休父爲宣王司馬。後因以國爲姓。春秋時。嬰以立趙孤顯。六國時。邈爲秦獄吏。易大小篆爲隸書。漢有不識。魏有昱。號名將。晉元帝即位。命元禪爲新安太守。百姓悅之。代還。遮道請留。不得去。詔從其請。比卒。賜其子孫田宅於新安之歙縣。遂居黃墩。遷開化北原者。公十世祖也。公之曾祖光祿君樂愷。平易。重然諾。喜施與。鄉里稱爲長者。祖父都官君始以儒奮。擢進士第。治劇邑。有德於民。唐質肅介。爲江東轉運副使。日特加賞遇。以謂不任威刑而人不犯。雖古循吏。無以加也。父宣奉君爲兒時。日誦數千言。成童屬文。握筆立就。未冠舉進士。試南宮爲第一。廷試中甲科。益博觀典籍。研繹奧義。常進所撰詩書論。得相州。饒州州學教授。尋爲瀛州防禦推官。貴溪縣丞。攝令事。闔邑欣賴。召試太學。

博士而卒。公時方年九歲，哭泣哀毀，見者咨歎。終喪，從母氏寓外家。母性嚴，公左右承意，得其歡心。外祖尚書鄧公左丞潤甫深奇之。後其家人緣左丞意，奏補公假承務郎。紹聖四年，授蘇州吳江縣主簿。時徽宗即位，肆赦放免秋苗，本縣復行催理，吏持文書通策，公即申縣請準赦蠲放，而轉運司牒準省符，講求遺利。公申狀謂：財用之在天下，譬之衆川之水，漕之萬頃之陂，決漏既多，乾涸可待。乃欲崎嶇回遠，引綫脈之流以益之，不如塞其陂之決漏而已。今諸路賦入，則衆川是也。萬頃之陂，則總計是也。決漏如江河，則無藝之費是也。崎嶇回遠，引綫脈之流以益之，則講求遺利是也。凡無藝之費，一切罷之，則息民裕國之政具在，守而勿失，可以有餘。見者驚嘆，亦或指以爲狂。任滿，辟差舒州太湖茶場。以上書論時政罷歸。時執政者方力持紹述之說，以售其私，凡持正論者，斥以爲邪。

雖被擯廢，人更以爲榮焉。大觀初，監常州市易務，八寶恩遷通仕郎。政和元年，改宣德郎，差知泗州臨淮縣事。三年，召赴審察，以前上書報罷，尋主管兗州岱嶽觀。七年，差通判延安府，以侍親非便辭。改通判鎮江府。俄除編修國朝會要所檢閱文字。八年，兼道史檢討。宣和二年，轉承議郎，賜五品服。明年，除將作監丞。時論謂公以儒術世其家，今藝學績文之士鮮出其右。近臣亦推公長於撰著，於是以聞。徽宗即遷秘書省著作佐郎，賜上舍出身。三年，除禮部員外郎。駕幸秘書省，特旨召觀書閣下，因賜御筆書畫，遷朝奉郎。五年，丁母憂。七年，復除禮部員外郎，以病告老，不俟報而歸，坐責。歲餘，今上登極，轉朝請郎。建炎三年，復爲著作佐郎。尋再遷禮部員外郎。除太常少卿，卧家力辭。章四上，遂以直秘閣知秀州。會車駕臨幸，有旨賜對，公奏事訖，即啓陳濟大業，致中興之說，言極剴切，有曰：



陛下盛德日新、政事日舉、賞罰施置、仰有以當天意、俯有以合人心、則趙氏安而社稷固。苟惟不然、則天之所以眷佑者將恐替、人之所以欣戴者將恐離。如是則社稷危而天下亂、其間蓋不容髮。上欣然納之。及虜騎南渡、既據臨安、遣兵破崇德、海鹽。公厲兵守禦、方力已降、省劄令公遷避、復被旨管押錢帛、由海道趨行在。始出華亭、宣撫使留公、有旨趣使津發、因航海至永嘉。既朝見、以病乞歸鄉聽命。時建炎四年三月也。冬復召赴行在。紹興改元、始置秘書省、即以公爲秘書少監。九月、除中書舍人、仍兼侍講。二年、罷職、提舉江州太平觀。四年、差知漳州、以病辭、改提舉台州崇道觀。五年、復集英殿脩撰。六年、除徽猷閣待制。九年、除提舉萬壽觀、充實錄院脩撰。先是、公得風痺之疾、朝廷知公步趨拜跪良難、特緣兵火之後、簡冊散逸、謂公雅精史學、持心平實、欲使免朝參、坐局充職、其意

甚厚、而公以疾力辭、乃差提舉亳州明道宮。累官至朝議大夫。三遇明堂郊祀恩、封新安縣開國伯、食邑九百戶。十四年六月、疾稍寢、乞致仕、轉左中奉大夫。壬辰、卒於寢、享年六十有七。遺表聞、贈左通奉大夫。公初娶新昌石氏、贈令人。再娶同郡江氏、封令人。男一人曰行敏、右承務郎、監潭州南嶽廟。女三人、孟以病在室、仲嫁右承務郎、提點坑冶鑄錢司檢踏官趙伯暘、季嫁右迪功郎、監潭州南嶽廟江振卿。公天資端方、誠直、言動不安、思慮精切、志趣高遠。加以該洽深邃之學、典雅閎奧之文、自其幼年未仕、人推爲有父風。稍任州縣、即能遇事引義、慷慨論列利害。及緣上書坐譴、湮阨連年、飢寒轉迫、氣益堅剛、而自信愈篤。學業大成、偉然有公輔之望。然不能以辭色假人、頗亦寡徒少侶、訛笑隨之。而與之深交者、率名卿才大夫、或其丈人行。久之、名實益孚。其再佐著作、三爲郎儀曹、朝



廷蓋欲用之矣。晚登掖垣、侍經席、凡命令之下、竭思畢慮、有不安于心者、率明白反覆言之。其進講若故事、必考古驗今、曲致規鑑、未嘗有所觀望畏避。大抵務合人情、當事機、守祖宗之法度、遵先聖之訓誥、非持甚高難行之論以苟邀名取譽也。每憂外難未夷、寢食不置、章奏數上、如所謂國家之患、在於論事者不敢盡情、當事者不敢任責。言有用否、事有成敗、理固不齊。今言不合、則見排於當時。事不諧、則追咎於始議。故雖有智如陳平、不敢請金以行間。勇如相如、不敢全璧以抗秦。通才如劉晏、不敢言理財以贍軍食。此有志祖宗之制。謂近年禁庭宮邸與夫宗室貴戚之家、其享富貴之奉、極驕奢侈麗之欲、皆自古所無有。然其卒也、流離狼狽、亦自古所無之。而懷利封己之人、習熟聞見、至今猶以侈大爲當然、以嗇儉爲削弱。此不可以不變。又論武臣轉官、皆自武功大夫轉入橫行、

得者既衆、則官益以輕。使人人皆懷欲得之心、無有紀極、在於厲世勸功之時、其爲敝害爲尤大。祖宗之法、文臣自將作監主簿至尙書左僕射、武臣自三班奉職至節度使、即是以次遷轉之官。而武臣自閣門副使至內客省使爲橫行、不係磨勘遷轉之列。既不係磨勘、即非皇城使、所得轉入之官、其除授皆頒特旨。故元豐肇新官制之時、以承務郎至特進爲寄祿官、以易監主簿至僕射之名、而武臣獨依舊、不以寄祿官易之、蓋有深意也。政和間改武官稱爲郎大夫、遂并橫行易之、而爲轉官之等級。此皆當時有司不習典故、不思祖宗之深旨、率意改更、以開僥倖之門、故流弊日深。且文臣之所謂庶官者、轉不得過中大夫、而武臣乃得過皇城使、此何理也。自改使爲大夫以來、常調之官、下至自隸、轉爲橫行者、不可勝數、其敝極矣。夫官職輕重、在朝廷所以用之而已。朝廷愛重官職、不

妄與人則官職重。若輕以與人得者冗濫則官職輕。官職輕則得者不以爲恩未得者常懷缺望。他人莫能言也。顧任職未幾而罷罷未幾而病病卒不可復起此有識者之士所以深爲天下惜也。公平生著述不可勝紀已抱病猶不輟然憂深慮危時時芟削焚棄今所存者北山小集四十卷麟臺故事五卷默說三卷餘無傳焉。其孤卜以九月辛酉葬于開化縣北山之原屬瑀狀公行實將求銘於鉅儒碩學以圖不朽謹考核叙如右。紹興十四年九月日龍圖閣學士左中奉大夫提舉江州太平觀鄱陽縣開國子食邑五百戶賜紫金魚袋程瑀狀。

程瑀撰 《北山小集》附

彪君墓志銘

君諱虎臣字漢明。生七十五年紹興二十有二年卒。卒之日湘中賢士大夫失聲歎息曰善人亡矣。

有子一人將葬于湘潭沿湖之原其子泣而請叙其行治求銘。作者謹按彪氏出于楚鬬穀於菟實令尹子文後世著姓于衛君七世祖避李唐中葉之患自山東徙于潭州湘潭縣曾大父翼大父淑皆好善樂施有長者稱父約天性孝友沉厚君生六齡家貧甚有道流誘之奮然曰我家世讀書可從爾乎。父甚壯之力遣就學穎出諸童穉年十有一遊郡庠俊偉不羣既而連遭大父母喪竭力營養不汲汲求進獲薦之日年逾四十益念親老不復求仕以經術教授學者爭迎致因是徙居湘潭縣之冠田天性和易而教尙方嚴以不欺爲本以孝弟爲先以文藝爲後故從之者不徒務進取率有不畏而不爲青人張所早遊京洛聞二三先生餘論所至知訪求人物宣和中典教長沙遣其壻就學遠近士子益依歸焉號爲鄉先生居親則油油翼翼不忍暫出無毫髮忤丁父憂慮無以葬友



人譚烈父奉議公極見其哀毀、惻然心動、則與以己所卜地、又使用其最吉者。及至葬、遠近來觀、無可恨恨、皆嘆息曰、此誠信所致也。因母有上氣疾、遂究心于醫、每疾作、與其配王氏衣不解帶。及母喪、年始衰矣、哀慕如童少。夫婦終始相敬、君必整冠衣危坐。生二子、曰居厚、居正。女一人、適鄉人許君。許君早卒、女從父母守志節不貳。收教親族孤遺者三人、教之不入、自恨自責、爲之婚娶、死又撫其孤。終身與人交、惟恐其有不善。父子兄弟朋友之間有爭忿、欲離絕者、必爲之洗磨瑕垢、復相和好。鄰有幼孤、以門內閨奪、潛寄橐中、巨萬、君哀而受之、長而歸之、無毫髮取。奉上不過恭、接下不輕狎、愛重故舊、犯而不校。胸中了然、不妄臧否、遇人飢寒、解衣推食。君之學本諸六經、汎觀百氏、無所不通、甚不喜浮屠學。我仲氏被召造朝、訪以治道、君慨然曰、今日之急、民心渙散、收之在于理財、理

財在寬其力。省官吏而嚴限冗雜、併州縣而尊重守令、禁侈而節制衣服、勵任予、舉孝廉、嚴保仕、增泉貨。行法之初、遣使觀風、考較真僞、信賞必罰、時不小康者、未之有也。其言明辨、亶亶有條理、真懷才抱道不試之人也。有湘山野老十一論傳于知己。方君壯年、靖州^⑧守王公某、個儻好士、聞名立挽致、一見奇之、欲以邊功奏。君曰、此澆冒事、某不爲也。晚年欲勸就恩、君笑曰、早乖志願、晚而竊祿、非本志矣。少時與同郡王以寧負豪氣、不相下、後二十年、王因亂自達、以詩問君、曰、浩歌排兩腳、豪思橫天涯、今如何也。君謝曰、初年習氣掃除盡矣、窮達異道、何相問爲。足跡不入城府者二十年、伏飢臘寒、泊如也。交遊衰金、爲求田問舍、君不肯受。我伯氏及向公子復交、以書喻之、君雖不得辭而終自愧。自春陵周先生死、湘中學者無所師承、吾先君南渡熊湘、君一見則有得于心。及其子長、遂命

受業于門矣。將啓手足、命居正曰、爾其卒業于文定之門。援筆書曰、痛哉永訣、累吾良友。又命居正達意許氏、俾爾姊得終其節、則吾死亦瞑目矣。語畢而卒。嗚呼、生不爲名利累、死不爲兒女悲、臨大變、質諸義、無愧辭、全天歸之、可謂仁矣。惟君深知宏、義不得辭其子請、謹狀。後九年、居正再拜而前曰、楚衡先生既終矣、銘先人之墓者、舍先生誰可爲之。銘曰、

維時子文、孔聖以爲有未知兮、後二千年其曾孫能之。不王不伯、紓國難以成其忠兮、而天命嬰之。克振厥祖有曾孫兮、啓佑後人而敬承之。我作詩詔爾三楚之士兮、庶或賡之。

胡宏撰 《五峰集》卷三

敷文閣直學士左朝奉郎致仕劉公行狀

曾祖昉、贈尙書刑部侍郎。祖逢、太子中允、贈左光祿大夫。父撫、贈右太中大夫。母王氏、贈太碩人。公

諱一止、字行簡、湖州歸安人。曾大父而降、世以儒學名家。伯祖述以直道清節事神宗、爲知雜御史、疏新法得罪者也。御史之子握、年十八登進士第、至龍舒守。見公尙幼、趨于前命賦詩、操牘立就、語奇出。舒州撫而嘆、此異童子、吾宗其興。既公舉進士、又少于舒州四歲。未冠、試太學、屢先多士、聲稱籍甚。丁內外艱、跣哭就道、見者爲感動。家貧、力葬無遺禮。有司欲以公應八行選、公曰、行者士之常也、謝不就。宣和三年、始獲奏名禮部、唱第廷中。少年朋從多以貴顯、至公名莫不舉笏相慶、公視之泊如也。得監秀州都酒務、人皆言公宜在文字之職、公不卑其官、事以辦給。長吏知公名、未始以常僚待之也。秩滿、爲越州州學教授。時翟汝文知州事、間出所爲文屬公定其藁、至以託客曰、頗曾見人物如此乎。公既代去、避地于姚江。傅崧卿來攝郡政、書禮致公、即勸傅公起義以赴國家之難、至



稱劉琨祖逖同寢之事語甚激烈傳公感慨流涕。會李參政邴得祠過郡見公留語終日密薦公人物議論宜在朝廷蓋不使公知建炎四年得用爲詳定一司敕令所刪定官紹興改元召試館職因對策極言當世之故且曰天下事不克濟者患在不爲不患其難聖人不畏多難而能圖爾昔吳王夫差旣勝齊而子胥以爲憂曰是吳命之不長也未幾果滅于越吳人侵楚及郢楚人大懼而令尹子西獨喜曰乃今可爲矣而楚以不亡是禍福倚伏果不可料而不可不爲也如其不爲而俟天命自回人事自正敵國自屈盜賊自平有此理哉上覽之稱善且諭近臣劉某所對剴切知治道欲驟用公而執政者不懌也除祕書省校書郎考試兩浙類試進士公語同列科舉方變欲文學之外通時務爾凡言涉浮靡者盡黜之旣皆患無其人公袖出一軸曰是宜爲首及啓號乃張九成也九成

以行誼推重鄉里餘多一時聞人衆始厭服是年冬遷監察御史即上疏論君子小人用否之辨以謂天下之治衆君子成之不足一小人敗之有餘君子雖衆道則孤小人雖寡勢易蔓且引易五陽決一陰其卦爲夬而繫辭則曰君子道長小人道憂也夫以五君子臨一小人不曰道消而曰道憂蓋上下交而志同如泰之時然後小人之道不行若徒能使之憂則將圖之而無不至矣朝廷行事無一定之議公又上疏陛下憫宿蠹未除念頽綱不振政煩民困用廣財殫置司講究德至渥也曾未聞有所施行恐以疑似之說欺陛下曰如此將失人心矣夫所謂失人心者刑政之虐賦役之多則失百姓之心好惡不公賞罰不明則失士君子之心若無是則失者小人心耳失小人心而得百姓士君子心何病焉願審其利害當罷行者斷自聖衷勿貳勿欺則事之委靡不振者悉舉矣上

覽奏嘉納。時庶事草創，有司法令類以人吏省記，而吏生因緣，欲與則以與例進，欲奪則以奪例陳。公曰：法令在奸吏猶得侮之，今一切聽其省記，欺弊可勝言。願以省記之文送敕令所定而頒焉。公雖未嘗任言責，而論事不一。方手詔詢中外利害，命大臣修政之日，公即具言：宣王內修政事者，修其所謂攘四夷之政而已。如緩其所急，先後倒置，何修爲哉。今不過簿書獄訟，與官吏遷除、土木營建之務，未見所當急也。又言：人才進用太遽，而仕者或不由銓選。朝廷之士入而不出，在外者雖有異能，不見召用。執親喪非軍事，至起復爲州縣官，皆僥倖之門不塞，而至公之路不開爾。又請選近臣曉財利者，倣唐劉晏法，瀕江置司，自辟官吏，以制國用。鄉村皆置義倉，以備凶荒。增重監司，自轉運副使至提點刑獄，並以曾任侍從官爲之。及令侍從臺諫各舉所知。當是時，雖中丞、侍御史有論，

必咨公而後決。明年秋，遷起居郎，奏事上前，上迎語曰：卿朕親擢也。自六察遷二史，祖宗朝有幾。公謝曰：臣不足以知舊典，尙記宣和間張徵、李稅與臣實同。顧臣何以當此。公既荷上知，其在臺察已刺口論事，至是因面對，極陳堂吏宦臣之蠹，執政植私黨，無憂國心。翌日，遂罷爲主管台州崇道觀。寓德清僧舍，杜門卻掃，自放于山水，而詩文益清健。閱二年，召爲尙書祠部員外郎，奉神主于溫州。未行，改權發遣袁州，又改浙東路提點刑獄公事，加直顯謨閣。公盡心庶獄，每行部，其株連久繫者釋遣，動數十百人。守令至，聘貽而民或畫像以祠公。然悍強冒法者，未嘗故縱。越有巨姓怙富橫甚，致仇人于死，賂二三達官，求以爲受雇覬末減。公治之愈急，屬吏咸恐。公不顧，卒刑于市，一路始服公之平。會攝安撫司，即奏疏比年帥臣權稍輕，屬郡莫能統攝，調兵則不遣，移食則自占。今旣罷管內，



安撫矣。則諸郡有得便宜指揮者、亦宜聽帥司節制、以革前日之弊。秩滿、除權發遣常州。未赴、召入祕書爲少監。既賜對、上曰、知卿久外、無爲卿言者也。公頓首稱謝。居兩月、復爲起居郎、遂遷中書舍人、兼侍講、賜服三品。時九年正月也。會莫將亦賜出身、除起居郎。公亟上奏、將以太府丞驟綴從班。前此未有、道路籍籍、以爲將上書助和議而已。臣之誤恩、與將同制、臣若不言、人必謂臣自爲地而不忠、乞併與臣罷之。疏入、不報。九月、遷給事中、仍兼侍講。徐偉達除知池州、偉達嘗事張邦昌爲郎者也。公言、邦昌僭逆、凡仕僞之人、皆知諱其官、惟偉達至今自謂郎中、豈稍有廉恥者。一郡旣足惜、且無以示好惡于天下。遂罷偉達。呂伉以大臣子、除貼職、添差浙東提舉茶鹽。王存等非老病而罷、從軍與差遣、公皆謂不可。至貴近之請、尤論執不避。其下雖小事悉爭之。孟忠厚乞試河南一郡、公

奏后族業文如忠厚不可多得。此例一開、有出忠厚下者、何以禦之。汪伯彥知宣州、入覲、詔以元帥府舊臣、特依現任執政給俸。公曰、伯彥誤國之罪、天下共知、節度使俸借減尙不薄。況州供給圭田之厚、以郡守而依執政、殆與異時非待制而視待制、非兩府而視兩府者類矣。上皆爲罷之。武臣王仲寶等押扈衛人馬、依康履例給料歷。公亦奏、料歷非參選不可給。一二年來、始以給奇功者。履等非奇功、而仲寶又其屬也。廖剛時爲中丞、謂其僚曰、臺當有言、皆爲劉公先矣。我輩獨無愧乎。居瑣闥僅百許日、繳奏未已、用事者始忌公、因誣公薦士失實、又罷爲提舉江州太平觀。久之、除祕閣修撰。十五年冬、除敷文閣待制。議者希用事意、謂公辭免有譏訕、遂中格。併奪修撰。二十三年、上疏請老、始復祕閣修撰致仕。九月、再除敷文閣待制。二十五年、用事者死、上更嫩庶政、即起公赴行在。公

雖屏居鄉閭、非無意于當世者、聞上有命、不敢即辭、杖而造朝。至國門、辭曰、臣老。且憊、念竭力以報陛下、然足嘗跌而傷、拜伏不能如儀、惟陛下貸而歸之。上雖思公之賢、渴欲見公、而亮其無隱、遂進公敷文閣直學士致仕以歸。紹興三十年十二月初四日、以疾終于家、享年八十有三。明年正月丁酉、葬于烏城縣澄靜鄉趙村後塢山之原。官至左朝奉郎、爵至長興縣開國伯、食邑至八百戶。訃聞、贈左朝散大夫。娶臧氏、同郡記室參軍詢之女、勤儉有禮節、閨內巨細未嘗憂公、而勸公以游學。及公既達、不以爲喜、既退、不以爲蹙。先公十年卒。男二人、巒、右宣教郎、主管台州崇道觀、慤、右承務郎、淮南東路提舉常平司幹辦公事。孫男九人、簡、符、筓、篆、皆將仕郎、籀、策、籍、箴、業進士。孫女三人、適張穎、周楠、而一尙幼。公少敏悟、七歲能屬文。既長、博極羣書、至星曆、方技、佛老之說、莫不窮析要眇。

爲文章推本經術、出入韓柳、不效世俗纖巧刻琢、雖演迤宏博、而關鍵嚴備。鄉人士大夫葬其父祖、得公誌墓、乃以爲榮。其爲制誥、明白有體、麗而不佻。雖書詞填委、一日數十、倚馬輒辦。嘗曰、人君訓告、賞善罰惡、辭也、豈過情溢美、怒鄰罵坐之爲哉。故公在詞掖數月、人爭傳頌。顏魯公孫特命官、公當制偉甚、上歎賞不已、至手書之。其爲詩、高處陵轢、鮑謝下者、猶足奴視。溫、李、然清深簡易、自成一。家。呂舍人本中、陳參政與義、皆號能詩、得公詩驚曰、此語不自人間來也。石林葉公夢得與公平生交、其論當世人物、以公爲第一流。至公詩、亦曰、世久無此作矣。有類藁八十卷、藏于家。公儀矩整秀、樂易長者、聞人有小善、至單詞隻句、可取、率稱道不容口。後進經公指授、其爲文必可觀。然公于文、蓋無所不能、于學無所不通、自少馳聲場屋、四十始得一第、暮年僅掌書命、曾不得上玉堂爲學士。



其雍容獻替、已不勝忌克、擯廢于祠宮者十有七年、及上欲用公而公已老矣。嗚呼、使公而早得用、用而不爲儉人間之、旣間而歸不病、而至于復用、則其所立詎止是哉。公文章之餘、筆法甚工、而樂府亦盡其妙、京師市人鬻者、紙爲之貴。而公實冲澹寡欲、戲于翰墨。自布衣至登法從、不蓄聲色、雖飲食奉養、未之少異。閒居不妄營一錢、客或謂公宜有以遺子孫、公誦疏廣之言以對。退而誨其子、則曰、吾平生通塞、聽于自然、惟機械不生、故方寸自有樂地。年逾八十、抽思作文、不減少日。臨終之秋、豫戒其家、疾旣革、無一語謬、蓋達于性命如此。予兄弟久從公遊、荷公之愛爲深、故知公行事爲詳、而公之二子且以治命來屬、因泣而次之。

韓元吉撰 《南澗甲乙稿》卷三

宋故顯謨閣學士左太中大夫汪君墓誌

銘

建炎紹興閒、大盜據中原、群惡嘯亡命相聚爲寇、於是環四海爲盜區矣。天子慨然仗一劍出入兵閒、禁暴除殘、拯溺弔凶於戎馬喋血之餘、以建中興之烈。當是時、顯謨閣學士左太中大夫新安汪公爲中書舍人、翰林學士、一時詔令往往多出公手。凡上所以指授諸將、感厲戰士、訓飭在位、哀憫元元之意、具載誥命之文。開示赤心、明白洞達、不出戶窺牖、而天威咫尺、坐照萬里。學士大夫傳誦、以比陸宣公。居亡幾何、權臣樹黨、除不附己者、公亦抵罪、斥居永州。積十二年、更四赦、不得還。閒遇勝日、幅巾葛履、登西山、循鈇鉞潭、入愚谿、並湘流、沈文以弔古人、而自肆于山水。年益高、文益奇、詩益工、筆妙精深、與柳儀曹相望於數百載後。文章格力與之相上下、何其盛也。公旣沒、諸孤護喪歸葬、且致公治命、屬余銘。余與公游四十年、知公爲審、乃序而志之、系以銘。公諱藻、字彥章、姓汪氏、饒

州德興縣人。曾祖震、太常丞、贈光祿卿。祖宗顏、尚書都官員外郎、贈中大夫。考穀、奉議郎、贈少傅。妣越國夫人、陳國夫人、皆陳氏。公自童幼已卓越有大志。學舉子業既成、得春秋左氏、西漢書讀而好之。銳意欲與之並。年甫冠、徒步游太學、有司第其文、屢出諸生上。中崇寧二年進士乙科。瓊林錫宴、酒半、上方賜冰、狀元霍公端友屬公表謝、授紙筆、立就、如素習、一坐歎驚。調婺州觀察推官。方待次、除宣州州學教授。丁少傅公憂。憂除、官制行、授從事郎、荆南府掌書記。不赴。改江南西路提舉學事。司幹當公事。代還、至京師、會徽宗親製君臣慶會閣詩、群臣和進喜事者。集錄爲一大卷。公適見之、擬和一章、屬詞用韻、句法清新、出衆作之右。即日傳布、諸公喜稱之。除九域圖志所編修官、改宣德郎。遭陳國夫人之喪、免喪、除祕書校書郎、遷著作佐郎。再遷符寶郎。是歲政和八年也。故相王黼頃

與公爲太學同舍生、不相中。比當國、黜公通判宣州。州將俗吏、公益不樂。上書請宮祠、得提點江州太平觀。寓家晉陵八年、終黼之世不用。累轉朝奉郎。公博學強記、自六經、百家、太史氏之籍、先儒箋疏、傳注之書、兵家、族譜、方言、地志、星經、曆法、佛老之衆說、與夫萬里海外蠻夷異域荒怪之序錄、靡不記覽。山陰賀鑄方回、知名士也、亦寓晉陵、聚書萬餘卷。公日從之游、多得所未見者。凡伏臘衣食所須、盡以供筆札而錄藏之。其爲詞章、明於道德、達於世務、指事析理、引物託諭、馳騁古今、貫穿經傳、該備衆體、蓋數十萬言、自成一。公在江西、徐俯師川、洪炎、洪芻有能詩聲、自負無所屈。一日、師川見公詩於僧壁、喟曰、此我輩人也。率二洪詣舍上謁。既去、公曰、騷人墨客、撚須琢句、以鳴其不平耳。烏足尙已。至是數年、卒以大手筆稱天下。金華勸講、石室紬書、典冊施之朝廷、樂歌薦之郊廟、鴻



文碩學、暴耀一世、人知其名、家有其書。而詩律高妙、興寄深遠、亦非近世詩人之所能及。淵聖登極、召爲尙書屯田員外郎、旋改禮部、進太常少卿、起居舍人。今上踐祚、轉朝請郎、召試中書舍人、賜三品服。大駕狩維揚、詔中書後省試潭州進士何烈、烈對策稱臣、臺疏論列非所宜言、公與滕康、衛膚敏、三舍人俱罷。爲集英殿修撰、提舉江州太平觀。明年、復召爲中書舍人、擢給事中、兵部侍郎兼侍講、直學士院。公草高麗答詔、上顧輔臣、稱公得代言之體。久之、麗人謝表至、上復稱公。眞拜翰林學士、以所御白團扇親書紫誥、仍兼綰黃麻、似六經十字以賜、搢紳榮之。累轉朝議大夫。公自登侍從、屬時多故、感懷恩遇、凡所建請皆當世要務。嘗論諸大將擁重兵、高位崇秩、子女玉帛、已極富貴之欲、而根據盤互、浸成外重之勢。陳所以待諸將者三事、後十年卒如公策。又言、宣和諸臣交通貴倖、

一時誤恩、官有至銀青光祿大夫者。臺諫極論、方就鐫褫、詔墨未乾、而建炎恩宥、又當甄復。盍依祖宗法、至中大夫而止。論駁數人、國論以爲允。又言、太上皇元符以來、至上建炎之元、並無日曆、可謂闕典。古者有國必有史、有史必有官。漢法、太史公位在丞相上、天下計書先上太史公、副上丞相。自唐至本朝、亦以宰相監總國之重事、願留聖心。上欣納。翌日、輔臣請擇所付、上曰、無以易藻矣。尋除龍圖閣直學士、知湖州、領日曆如故。公蒐攬闕文、參稽衆論、遠至閩蜀數千里外、近在寓公寄客之家、或具公移、或通私書、旁搜博采、遠近畢至。分設科條、以類詮次、纔十二三、移知撫州。歲餘、罷爲提舉江州太平觀。會翰林侍讀學士范冲疏言、日曆國之大典、比詔汪藻纂集、更涉歲月、稍見功緒。書未成而中止、積久散逸、後人益難措手矣。今方就閒、可降詔令依舊纂集爲一書、裨三朝文物著在

方冊、非小補也。於是有旨復命公許辟官屬二員、賜史館修撰、餐錢辭不受。書成、凡八百冊、上之。遣使賜茶藥二銀合、進官二等、加中大夫、除顯謨閣學士、知徽州。公前後典六州、先惠愛、重名教、有古循吏之迹。唐顏魯公嘗爲湖州刺史、公建言、昔章聖皇帝幸亳、次睢陽、親屈帝尊、臨見雙廟、旌巡遠異代之忠、以風厲天下。顏真卿叱叛臣李希烈而死、廟食吳興、距行殿不能百里、宜蒙褒異、以增忠臣義士之氣。詔從之、賜號忠烈。詔下、公大治祠屋、書榜揭之。郡有籍錄朱勔窗戶數十種、丹漆之光可鑑、寮吏請爲州治樓觀之飾、公曰、吾葺魯公祠、可用也。輪奐一新、州人大說。徽州學舍敝小、方議改築、公嘗爲文記鎮江府學之成、州將程邁以白金致餽謝、公報曰、比葺郡學、費無所從出、而餉金適至、已付諸生。今拜賜矣。又斥公帑之贏續之。落成、爲一方壯觀。轉左太中大夫。十二年、知泉州。

殿前司大校蒐選禁卒之伉健者、移州具資糧遣送、公曰、州並海、宿兵數百、所以備非常。留不遣、馳奏驛聞。大校怒、以語侵公、免符下、乃已。移知宣州。閱月、改鎮江府。鎮江自經建炎之亂、歲輸上供米率不如數、轉運使按視、計倉粟之在存者尙負數萬、盡局鑰而去。軍食不繼、官吏憂窘、不知所出、而公適至、命破鑄給之。詒書使者曰、官軍張頤待哺、米在廩中而不予之食。群黔饑餓亡聊、雖錮南山猶有隙也。輒以便宜開發、老守重得罪、不敢辭。會言者讒公而罷。論奏不已、落職永州居住。更七八年、感風痺、乞致仕、不許。竟卒於永州寓舍。實二十四年六月癸未也。享年七十六。積官至左太中大夫、爵新安郡開國侯、食邑一千五百戶、實封一百戶。公沒後二年、詔復顯謨閣學士、官其一子。公性樂易、不事藩飾、以峙聲名。至居官任職、則矯矯然不輕爲然諾者也。不喜殖財利、榮貴三十年、無屋



儒藏

廬以居。有田陽羨亦不足以卒歲。而嗜書學古。老且病。猶不去手。大璫梁師成用事。小人朋附。目爲隱相。武人吳可者。師成許以能詩。至出入卧內。公罷符寶。可過公。致師成意曰。聞名久矣。幸不鄙過我。禁從可拱而俟也。公謝不往。客曰。吾曹望隱相之門。如在天上。召而不往。何故。公曰。若使我輩與可輩爲伍耶。守湖日。朝廷和糴米六萬餘斛。公視六縣民力所堪。鐫三之一。而上書自劾。詔勿問。居歲餘。戶部被旨。降本錢復糴數萬斛。歲適大稔。物估相當。如數而辦。例進一官。公曰。吾嘗以減糴待罪。幸蒙恩貸。今豈可復受賞耶。三辭卒不拜。海船次泉。閩婆國王附送龍腦數百兩爲公壽。公卻之。或曰。異國之王。因舶商致方物。修故事。不可卻也。公飭送公帑。一銖不取。公於辭受類如此。亦以故。遂多齟齬於世。始。公在太學。與王黼有纖芥。後黼入相。嫌恨不除。竟坐廢斥。而言者指公爲黼黨。黜

居永州。累赦不宥。卒厄於窮裔以死。雖然。朝愠暮喜。乍賢乍佞。初若一閥。然曾未轉盼。已如潯水之歸壑。而高文大冊。垂世傳後。與古作者並列於圖書之府。聖主親攬。追錄故侯。復還舊物。得喪相除。孰與公多。公之文。有浮谿集六十卷。行於世。後集若干卷。裔夷謀夏錄三卷。青唐錄三卷。古今雅俗字四十四篇。公尤工大小篆。得李斯。陽冰用筆意。元配淑人趙氏。今配淑人莊氏。皆前卒。葬於常州宜興縣陽蔡後隄。二十五年十二月乙酉。諸孤奉公之喪。合葬于二淑人之墓。子八人。男曰恬。右從事郎。曰悟。右宣教郎。新差知婺州金華縣丞。曰恪。右承事郎。曰儋。曰懌。曰懌。並右承務郎。曰偉。未仕。女適右迪功郎莊珪。孫男女十三人。男曰文舉。嚴舉。皋舉。伯舉。賢舉。女適左奉議郎嚴康朝。進士莊霆。莊霈。餘尙幼。新安汪氏之徙鄱陽。蓋已久矣。自曾祖至公。四世皆以儒學中進士第。而公遂以文

章大顯於時。德興田園悉推予其兄。以郊祀恩任其弟之子怡。而公子至今有未仕者。元豐己未。少傅公爲泉之晉江丞。而公生後六十三年。公刺泉入竟。恍然悲喜。太息曰。城郭是矣。昔陳秀公生於鎮江。後建鎮江節。築大第居焉。泉。實公始生之所。山川之靈。鍾爲人英。古今所傳。不可誣也。銘曰。

赫赫我宋。崇雅右文。藩飾萬物。如歲之春。治具炳然。監于二代。儒先曾魯。光明碩大。偉歟汪公德配先民。學窺聖域。文媲皇墳。芸省讎書。螭坳珥筆。論經石渠。坐五十席。代言西掖。視草北扉。渙發大號。雷動風馳。持橐剖符。出使入侍。今之名臣。古之循吏。風流儒雅。慈惠之師。六州之氓。途詠而思。誰私黨讎。乃讒乃逐。投畀荒裔。一斥不復。斗野之南。光氣燭天。埋藏不沒。至寶在焉。擾擾萬生。趨死一軌。百鍊之英。有化無死。巍巍昂昂。命世之儒。流傳海內。公有遺書。銘公于石。石磨可磷。公名下磨。爲萬

世準。

孫觀撰 《鴻慶居士文集》卷三四

校記

- ①左：原作「右」，據《孫尚書大全文集》改。
- ②曰：原脫，據右引補。
- ③何：原脫，據右引補。
- ④沿：右引作「沂」。
- ⑤水陸：原無，據右引補。
- ⑥必：原作「以」，據清抄本《五峰集》改。
- ⑦考：原作「者」，據右引改。
- ⑧靖州：原作「靖康」，據右引改。
- ⑨至：原作「知」，據《荅溪集》卷五四所附《行狀》改。
- ⑩帥：原作「師」，據武英殿聚珍本《南澗甲乙稿》改。
- ⑪簿：原作「簿」，據右引改。
- ⑫奏：原作「奉」，據右引改。
- ⑬老：原作「死」，據右引改。
- ⑭牖：原脫，據《孫尚書大全文集》補。
- ⑮者：原脫，據右引補。

⑯益：原脫，據右引補。

⑰「嗜」字上，《新安文獻志》卷九四所引有「嚙」字。

⑱維：原作「淮」，據右引改。

⑲諸：原作「疏」，據《孫尚書大全文集》及《新安文獻

志》改。

⑳者：原無，據右引補。

㉑伯舉：原無，據右引補。

㉒泉：原無，據右引補。

㉓擾擾：原作「憂憂」，據右引改。



儒藏

宋儒碑傳集卷八十五

黃伯思 黃珪 翁彥深 陸韶之

王庭珪 汪喬年

故秘書省秘書郎黃公墓誌銘

公諱伯思字長睿父姓黃氏其遠祖自光州固始徙居閩中爲邵武人曾祖汝濟贈太師曾祖妣高氏贈相國太夫人祖履任資政殿大學士會稽郡公贈特進祖妣段氏封魏郡夫人考應求任奉議郎饒州司錄事妣王氏封仙源縣君繼李氏封貢寧縣君任氏封華容縣君會稽公由布衣擢高第以德行文學被遇三朝致位丞弼號爲名臣公其嫡長孫也公天資警敏風度夷粹幼不好弄惟喜讀書日誦千餘言每聽會稽公講論經史退與他兒言無遺誤者會稽公尤鍾愛之俾晨夕侍左右躬自訓導任爲假承務郎嘗夢孔雀集于庭覺而賦之詞采甚麗識者知其爲文祥也故右文殿修

撰贈太師李公會稽公之甥也於公爲外伯父儒學冠一時會稽公命公師焉鍾學績文根柢淵源益臻壺奧年甫冠入太學與宿儒寒俊校藝累占上游優與薦送遂過南省屬哲廟升遐天子諒陰不言詔罷廷試公名在行間不得據其素蘊會稽公將以恩例繼奏俾增秩公固辭由是益奇之時朝廷方以宏詞取士公將應其科肄業不輟人皆謂公決中高選屬會稽公薨公以毀得羸疾竟不遂所志士論惜之初公未第前以銓試高等調磁州司法參軍久不之任至是改通州司戶丁內艱不赴服除授河南府戶曹參軍公平居篤志文史視世務邈然不以經意其掾洛陽也衆謂會府劇曹難於稱職而公應事接物游刃有餘不勞而辦洛陽故都素號衣冠藪澤公以餘暇與其賢士大夫遊從容翰墨間相得甚適秩滿當受代故資政殿學士鄧公洵武實司留鑰惜公之去辟知右軍



巡院公亦樂其山水人物之勝、因留不辭。蓋留者又二年、朝廷有知公者、除詳定九域圖志所編修官、兼六典檢閱文字、改京秩。尋差充監護崇恩太后園陵使司、掌管牋表。以修書恩陞朝列、擢秘書省校書郎。未幾、遷秘書郎。既入館、縱觀冊府藏書、雅愜所好、耽玩至忘寢食。在館踰再考、丁奉議公憂。公性至孝、自幼失母氏、而貢寧、華容[○]君復相繼捐館舍、執喪咸以孝聞。素抱羸瘵、至是不勝哀毀、疾遂以劇。釋服至京師、清癯骨立、而嗜學不倦。蓋如昔也。復除舊職、不數月、疾竟不起。實政和二年二月二十有六日也。公初不甚信釋氏、遭會稽公喪、讀佛書恍若有悟、遂篤好之、奉事精謹。將沒之夕、沐浴易衣、西嚮修念佛三昧而逝。家無餘貲、盈篋笥者書籍而已。公體弱如不勝衣、而風韻灑落、飄飄有凌雲之意。遇人廉謹、恂恂如不能言、而高明宏達、善著書、揮毫數千言、倚馬可待。自幼學至

強仕、手未嘗釋卷。其所至雖假室暫寓、必求明窗淨几、圖史滿前、欣然處其間、誦習述造、皆有程度、寒暑不易。故其所學、汪洋浩博、上自六經、下至諸子百家、歷代史氏之書、天官、地理、律曆、卜筮之說、無不精詣。又好古文奇字。官洛下、得名公卿家所畜商、周、秦、漢鐘鼎彝器款識、研究字畫體製、悉能了達、辨正是非、道其本末、遂以古文名家。在館閣時、當天下承平無事、詔講明前世典章文物、修輿地圖、集鼎彝古器、考訂真贋、公以素學與聞議論、發明居多。館閣諸公皆自以爲莫能及也。與同僚襄陵許翰尤相善、翰喜述作、所解太玄諸書、有疑義多就公質之。是時士務浮競、枝辭蔓衍、趣時好以取世資、公獨退然無營、寓意古道、所學最爲絕俗。文辭雅健、格高而思深、歌詩俊逸清新、追古作者。蓋公之學問慕揚子雲、文章慕柳子厚、詩篇慕李太白、此自其平日所稱道也。有文集五十卷藏

于家。公尤精小學，凡字書討論備盡。本朝淳化中，博求古法書，命特詔王著緒正諸帖，公病其乖僞，龐雜作刊誤二卷，考引載籍，咸有依據。而公之書，正行草隸皆精絕，初倣顏柳，後乃規摹鍾王，筆勢簡遠，有魏晉風氣，得其尺牘者多藏弃。嗚呼！昔之所謂好古博雅君子，與夫直諒多聞之益友者，非公其誰當之？公亦頗好道家言，自號雲林子，別字霄賓。其再至京師也，夢人告之曰：子非久人間，上帝有命典司文翰，覺而書之，不踰月遂謝世。其事頗與李長吉、王平甫同，亦異矣。夫公自假承務郎，六轉至朝奉郎，自磁州法掾六遷至秘書郎，娶張氏，故朝奉大夫、直龍圖閣、淮南路計度轉運使根之女。男二人，長曰詔，今爲右宣教郎，前充荆湖南路安撫都總管司書寫機宜文字。次曰訥，右從事郎，新差福州懷安縣尉。女一人，適故兵部侍郎鄒公浩之子曰栩，今爲右承務郎，監潭州南嶽廟。孫

男二人，曰祿、曰祐。某年月日，葬公于鎮江府丹徒縣招隱山之麓，距今蓋十有七年。方葬時，詔、訥尚幼，不克銘于墓，大懼湮沒先德，乃狀公平生行事，來請銘。綱於公中表姻婭，相與甚厚，義不得辭。銘曰：天地和氣，清微淑靈。山川炳煥，草木敷榮。公稟其秀，應時以生。岐嶷之姿，見自幼齡。風神凝遠，玉粹冰清。溫良端恪，祖訓是承。孔翠之祥，乃以文鳴。含英咀華，休有俊聲。來遊賢關，令譽騰躍。遂登儒科，縻此好爵。筮仕之初，于邑西^②洛。簿書粗辦，寓意寥廓。發聞惟馨，高步館閣。縱觀群書，得其所樂。貫穿古今，見聞日博。沈酣耽玩，心醉于學。根深華茂，其辭如雲。文章典雅，詩句清新。人皆窘束，我獨滄淪。追古作者，超類軼群。夏鼎周鼓，鍾鐻彝樽。雲雷刻畫，繚以繆文。銘章款識，研究本根。洞視千古，別其贗真。下逮小學，訂正精明。字畫之妙，晚臻老成。有



正有隸、有草有行。鸞翔鵠峙、嶽立淵渟。兼資衆妙、以大其名。身反不昌、遽速殞零。蘭摧桂析、鳳去梁傾。莫詰其由、歸于杳冥。白玉樓成、上帝有詔。往司文翰、脫屣塵淖。世間夢幻、孰非顛倒。壽夭升沉、竟亦何校。京口之藏、既安宅兆。十有七年、星流電掃。子孫方興、天有顯報。追作銘詩、萬世之告。

李綱撰 《梁谿集》卷一六八

黃吏部墓誌銘

政和中、福唐黃先生爲杭州教官、余時居鄉校爲諸生、實在先生座下。其爲人氣貌莊重、資性寬仁、望其容儼然有不可犯之色、聽其言、周旋勤懇、循循然進人於善、余甚敬之。自先生秩滿、不相見凡二十年、每思天下士大夫爲善人君子者、先生未嘗不經余心。紹興八年、余忝爲禮部侍郎、先生時爲吏部郎官、間相過、仁心義色肅然郁然如昔日也。一日、先生見過、喑不吐一辭、若有不相悅者、余

避席前曰、先生無恙否。若有憂色、何也。先生曰、吾何憂哉。吾聞子一事爲子憂耳。余驚起曰、所聞者何事。願請教。曰、某文字、公豈當作耶。余對曰、實不曾作。先生曰、是公職事、如何不作。余曰、朝廷不以見委、某亦不問也。先生微笑曰、如此則吾心無憂矣。遂大笑而去。少頃、送茶一銚、橄欖十顆來、曰、適所云果不曾作、某甚喜。偶家信到、有此二物、輒爲一笑。余感激之甚。曰、使師友人人如黃先生、日在吾左右前後、切磋琢磨、吾何憂不爲善人君子哉。嗚呼、余今老且病、悠悠度日、不教不學、先生亡矣。余晚節末路、於何考德而問業乎。余所以悲也。以余所已知、遡余所未知、以先生所已試、遡先生所未試、使天假之年、必將任重致遠、卓然爲有宋名臣。惜乎終於郎官而死也。言之使人泣涕。紹興戊寅九月七日、先生之子濬以其宗人右司員外郎黃祖舜狀其行實來請銘、云、先生諱珪、字元功。曾

祖植曾祖母陳氏。祖郭祖母陳氏。父臻累贈奉議郎母徐氏累贈安人。自上世居福州永福縣新豐里白面村。舉鄉無儒冠者。祖母每陋其俗。一日慨然有孟母擇鄰之意。謀去故居。遂徙候官之赤岸家焉。先生皇考因得挾策從人。既長。讀書爲文。能吟五七字律詩。恂恂豈弟。鄉人稱其長者。生三子。皆登進士第。先生其長也。年十九從司業李隲學。未半歲超越流輩。隲奇之。間語先生曰。如子材器。異日當爲聞人。一第何足道也。暨游鄉校。籍籍有聲。崇寧貢於辟雍。升補太學內舍。與諸生群試。屢居甲乙。三舍法。諸生每歲以季試優劣爲考察。有上中下之別。而上舍亦分爲三等。內舍生入二上者。即賜第。謂之釋褐。先生政和元年校試已在選中。偶有旨。皆赴明年殿試。復中乙科。注官爲襄州司理參軍。旋爲衢州州學教授。三衢士多俊秀。先生訓導啓發之甚至。一時中第者獨多於二浙。中

書侍郎馮公熙載。尙書毛公友。皆衢人。賢先生之爲。共薦延之。終更循從政郎。除杭州州學教授。其教人如在三衢時。士皆勵志於學。自是生徒相繼取巍科。如沈待制晦。舍人凌景夏。會三舍法罷。先生亦以溢員解去。從辟爲鹽官縣丞。先是方臘竊發於睦州。攻掠旁郡。賊平。新復郡邑。給復二年。并住賣鹽。鹽官亦預其數。後鹽法復行。適當歲饑。爲令者務趣辦以爲己功。詭令人戶請買。尋責其價。急於星火。帥府知其擾。改以屬先生。先生曰。急疲民以悅上官。吾何能爲。於是盡呼邑之父老。告諭之曰。有司恃此以供公上。固不可蠲。吾將寬若程督。免若追胥。若曹亦樂輸耶。邑人皆曰。戴公之德。敢不赴期。踰月而辦。秩滿。薦者應格。改宣教郎。除汾州衛州教授。皆以親老地遠不能赴。廟堂有知先生者。欲以爲衛尉寺丞。先生語於朝曰。寺監丞簿。乃異日晉用之資地。第偏親垂白。若得一官稍



近鄉閭、不廢甘旨之奉、乃所願也。當路善先生語、誠即除福建路提舉茶鹽司幹辦公事、官居富沙、仍就次見。時仲弟琳爲邵武軍司戶參軍、相距數舍、板輿往來、頗盡親歡。俄丁外艱、旣除而仲弟亡、遂無仕進意。親舊敦曉之、勉強造朝。時中書舍人林公邁、禮部侍郎李公正民交薦之、除主管官告院、改大理寺丞。紹興四年之任、在官二年、擢監察御史。未數月、除刑部郎、明年遷吏部。九年四月十四日、以疾終于行在之官舍、享年若干、積官至左朝請郎。十年八月壬申朔、葬於報恩寺山先塋之西。妻蔡氏、封安人。子濬、右承務郎、新知興化軍僊游縣。女適進士陳壽隆。先生天性純孝、於兄弟尤篤友愛、平居一日不相面、則惘然若有所失。其仕進不屑就、不苟合、亦不爲崖異之行。官杭日、外臺有緣宦寺進者、欲薦先生、先生曰、固願出門下。今舉狀幸已滿員、乞回此以錄寒士。雖辭之甚力、然

其言婉遜、亦未嘗以語人。公嗜學不倦、自登第以至踐歷臺省、無一日廢書、上自諸經、下至諸子百家之言、無不研究、搢紳稱其博洽。嘗謂季弟琇曰、大學所謂誠其意者、毋自欺也。吾兄弟素習禮經、盍佩而行之。平昔所寓、必大書誠意正心四字於座右、以效古人盤盂几杖之戒。此皆黃公狀其行也。先生重於義而輕於利、其在吏部也、時中執法與之相好、使所親語之曰、將屈公再入臺中、如何。先生正色對之曰、起居中丞、某人小人也、乃班從官首、某人小人也、乃班庶官首。中丞日造庭中、見此二人、汙人眼目、亂吾風教、敗人名節、如何不擊去、如某輩安用。嗚呼、使先生不死、其排斥小人、保護君子無疑矣。先生於朋友無不盡其歡心、平居暇日、婆娑嬉游、笑談戲劇、若將無不可者。及朋友微有害理、則正色斥之、使人心寒而股慄、故人皆樂其誠而畏其正。余知先生自謂不後於黃右司、

銘其可辭耶。銘曰、

和而克莊、嚴而靡忒。君子之容、君子之德。吁嗟先生、爲百世則。

張九成撰 《橫浦先生文集》卷二〇

右朝奉大夫集英殿修撰翁公神道碑

東漢而後、賢士大夫多由銘誄以傳。國朝官至卿監、即附史立傳。史之體略而直、志銘之義婉而詳。以二者參考之、則斯人之寔殆不可掩已。不幸而史或闕遺、志之又有所未盡、則金石之託亦無以行乎悠久。豈非尙論者之所惜哉。前奉常翁公旣沒之六年、某爲其孫女婿、得徵士劉勉之所述公行事狀、與故中書舍人呂君本中所撰公志銘、而求公遺文於其孫紹之。蓋亂離放失之餘、尙班班也。夫作史者未嘗不先詢求於當傳之家、次及於見聞、故其家之所載宜尤悉、以俟太史氏采擇。而孝子慈孫思顯揚祖考者、必爲之行錄、以請幽藏

之文。猶以爲未也、復大書深刻於外、曰表、曰碣、曰神道碑、而門人學者往往爲之歌詩贊詠、以翼而張之、庶乎其先德之流光而不泯、斯亦仁之至義之盡矣。紹之以是見謂曰、先祖應得神道碑、願屬之子。寅曰、公父執也、不敢辭。乃次序之曰、公諱彥深、字養源、世居建州崇安縣之白水。曾祖伯珍、不仕。祖元方、贈朝奉郎。考仲道、仕至朝奉郎、累贈至特進。恂恂長者、不言人過、師事安定胡瑗先生。歸以諸經教授、從之者數百人。守官多建學校、興水利。前後溉田萬餘頃。朋游有貴達者、欲援之、輒辭以親老。生三子、公仲也。初補太廟齋郎。紹聖元年進士第出身。福州侯官主簿。攝閩清令。爲濠州鍾離令。詳定九域志所編修官。秘書丞。禮部員外郎。提點淮東、湖南、京西路刑獄。尙書右司員外郎。秘書少監。國子祭酒。秘書監。除集英殿修撰。知濟南府。提舉南京鴻慶宮。知婺州、亳州、皆未赴。入爲



太常少卿、復以修撰提舉江州太平觀、則公所歷任也。由選調改宣德郎、遷至右中奉大夫、則公所歷官也。生於熙寧己未十一月之甲午、終於紹興辛酉五月之戊申、則公所享之年也。葬於所居里之鍾臺山、與其妃余氏恭人合葬、則公將沒之治命也。初、與鄉薦中南宮選、而丁父憂、次榜乃奉廷對。其在侯官、月奉錢十有二千、公以五奉母、以一資女弟。與布衣數人交友、論文覽勝、後皆知名。閩清故令厚斂、諛部使者、公條具以告、且乞聞諸朝省、部使者善之。邑之苛政盡革。令鍾離時、崇寧間也。歲大蝗、公請於當路、得米十萬斛、食餓者、貸之種。明年鄰邑田尙蕪、而鍾離獨賴麥、以免飢。既滿秩、丁內艱、哀毀骨立。服除、不忍去墳壠者幾年。大臣薦入書局、更六歲不遷、淡如也。其於古今地理、多所是正、而丞中秘、遂爲南宮郎。逾年改金部、凡度支用度無成法者、移金部給之、重複無以稽考、

公立籍以著移、吏奸遂沮。自外使召爲都司、入對論奏讞之弊曰、伏見淮東十一州軍、政和六年七年坐殺人而死者纔十有二人、刑幾措矣。然計二年之獄、蓋一百三十二人、而獨此十二人者死、問之有司、則曰、不死者有情理者也。自五帝三代至於漢唐、未有殺人不死之法。在律、詈人者笞四十、借如以一詈之故、即遭毆殺、是殺人者不死、詈人者顧當死、輕重倒置、莫此爲甚。且百有二十人皆大辟也、州郡奏而免之、可謂仁心矣。彼其遭殺者受無辜之虐、而銜不報之冤、反不足恤乎。廷尉天下之平、乃仁於強暴、使寡弱者不保其生、烏在其爲平也。以一路二年計之、已如此、天下復當幾何。所謂好生者、將以省刑而召和氣也。今舍止殺之具、致被殺者滋多、非所以省刑也。寬殺人之人、使銜冤者益衆、非所以召和氣也。朝廷徒見夫歲斷大辟之少、以爲刑將措矣、盍亦并奏案而計之乎。

致治猶元氣也、刑之禁民爲非、猶藥疾也、慕措刑之虛名而忘失刑之寔患、是猶慕治古之無札瘥、而但去其藥、民知擠於溝壑矣。今之官吏外希雪活之賞、內冀陰德之報、遞相驅煽、遂成風俗。一作奏案、無敢異議、胥吏乘之、奸弊萬態、文致情理、莫可究詰、讞狀徑上、不由憲司、其就東市者大抵貧民耳。臣請於讞狀列囚之曰、必使大理刑部得以檢察、庶少革其弊。從之。退而以民間疾苦論於宰相、且條所宜更張者甚衆。又與同僚綱紀省務、追復舊制、於是堂吏失權、而宰相不悅。會公弟爲御史中丞、公引嫌自列、即徙爲秘書監。公建言、唐人文章悉藏御府、而本朝不然、宜訪求國初至今諸儒論纂、可傳永久者、並以來上。從之。宣和元年冬、盜起睦州、東南大震、上言、兩浙自錢氏納土百四十餘年、無桴鼓之警。今狂夫一嘯、從者如雲、若非百姓不樂其生、何以致此。夫民有疾苦、不得上聞

者二十餘年、以言爲諱故也。宜取上書邪等名籍焚諸通衢、應太學生上書更不經由長貳、刪去大觀三年指揮、而下詔求直言、則天下之事畢陳於旒宸之前矣。又言、諫官久缺不除者、以朝廷無事、四方無虞、不必論列故也。今羽書狎至、禁旅出征、諸路騷然、調兵餽餉、不可謂無事矣。杭爲都會、歙、睦、嚴、邑也。城郭焚蕩、死者莫知其數、不可謂無虞矣。迹其致此、豈無所自哉。宜悉召忠臣義士列於諫垣、使直言日聞、糝政盡去、則海內竦然、知陛下之德如禹湯之心、雖太平可致也。盜何足云乎。又言、六路者、朝廷府藏、而淮南處上流、淮南者、六路咽喉、而揚據要害。今乃地最狹、力最弱、非所以爲控扼也。乞如熙寧故事、廢高郵爲縣、及取泰州之泰興、海陵俱隸揚州、則官減冗員、民力頓寬、形勢增強、戰守有備矣。且乞亟選忠義名節之士、易沿江守臣之不勝任者、其語之切當者曰、折衝禦侮、



要在得人而已。明年秋方賊平、公又言、大軍之後、公私虛困、撫綏安集之事、尤當加意。唐既平、龐勛不能深恤其民、遂致乾符之亂、可以爲監。今賊魁就擒、而它方相應蠭起者、尙多有之、宜曲赦二浙、江東西、福建、淮東南路、不問前過、俾各復其業。令下十日不散者、亦未得進兵、具賊首姓名以聞。其所破六州及諸縣遺民無幾、宜蠲放兩稅三年、免役一年、權罷和預買、倚閭見欠常平錢、坊渡課利、並減半、盡三年止。州縣官非治獄、可暫減者減之、曹官可暫併省者省之。茶鹽宜暫弛之。非泛拋買年例科率、宜並止之。商人販牛及五穀農器如六州者、宜蠲其征。比緣軍興、除武臣守郡若尉者、宜還用文吏。其越、台、溫、秀、信、建、宣則勤於戰守、昇與潤則大兵所駐、饒、蘇、湖、明、常、廣德則供億頻煩、皆失耕桑之候、宜與蠲兩稅一年、免役和預買一次、而蠲放所在官兵之費。宜委發運司速於豐熟州

郡置場和糴、專一應副、仍不得苛糴於人戶、及用官告、度牒、香藥鈔準直、乞從朝廷支降、見錢務令寔惠早及百姓。朝廷既下赦、其間條目、往往有用公所請者。南師凱旋、即議北討、公見宰相論曰、匈奴自古抗衡中國、前世能臣服之、未嘗不因其乖亂。今遼主猶存、而守燕者自立、此其乖亂之時也。徒以女真內侵、隔絕其間、是以未至爭國。爲吾之計、莫若駐師境上、養威飭備、俟女真退卻、匈奴兩主必且交兵、吾勿有所助、彼兵拏不解、人畜耗盡、猛敵時發、勢力皆窮、當有款塞稱臣者。然後撫而定之、使向風慕義、永爲宋藩、則功光祖宗、德垂後裔、可謂萬世一時矣。既不渝盟、信結方外、一利也。大河東北、無調發之勞、金革之患、二利也。契丹爲吾固圉、女真不得窺邊、三利也。天子有道、守在四夷、又況全燕本非吾有、委之以封北狄、吾又從而助之、則備女真有餘力矣。今女真雖半得燕地而

不能得其人、則引弓之民、燕尙屬之、王師出境、能必克乎。未能必克、而先自渝盟、兵連易水之上、曠日引久、是使女眞爲卞莊子也。萬一燕已衰弱、屈服於吾、露布告捷、天聲赫然、信可夸耀一時矣。女眞席破燕之威、長驅而南、是吾代契丹受猛敵也。然則王師克與不克、皆未見其可。且契丹與國也、女眞強敵也、今有強敵、壓據垣墉之外、己自當之乎、抑使人當之乎。夫拓復土宇、誠曰美事、亦必長慮卻顧、保無後虞乃可也。矧女眞方張、蠶食無厭、而欲與之爲鄰、決有近憂、豈惟土宇未可拓復而已乎。以愚見揆之、如二漢故事、使契丹當女眞便。是時廟算已定、不可回也。車駕幸三館、賜公三品服。未幾師表成均、建言、自三舍法行、學者急於中選、有苟得之心、不復窮經閱史、惟誦程文爲楷式、以剽竊對義、以阿諛荅策、氣節委靡、寔關盛衰、識者以爲深憂。今旣罷舍法、宜降詔旨、申敕多士、俾

深明經術、博知古今、以養其氣節。在外舊無教授處、委知通物色名士、爲衆所推服者充之。於是太學士習稍變。蔡氏子任大宗伯、媚公異己、譖之云、所以勸誘、皆元祐學也。徙拜秘書監、公笑曰、彼亦知有元祐學耶。八月朔日食、太史前一夕以奏、且移省知、而執移者誤送著作局、及期百官赴明堂待班、朔車駕不出、始知日食。公坐是降兩官、守濟南。復值歲大飢、公發粟平糶、民賴以安。輦運司和糴麥、經制司責民燕山府貸錢、皆奏罷之。帥司捕盜、將過境內、殺平人十二、公痛劾之、詔鞠引伏、而爲權倖所沮。宦者李彥奉使至、公待之如舊儀、彥大怒、除公提舉南京鴻慶宮。公素愛金陵江山之勝、遂買宅居焉。除守婺、改亳州、尙待次。建炎元年十月召貳奉常、從車駕自睢陽至江都。是歲卜郊、宰相以出城可虞、築壇城中、公陳三不可、爭之不從。又每陳江都無險固、宜早渡江以定基業、又不



納。二年冬大諫鄭穀者論公緣李綱相有今命見綱被黜懷忿恚神識如癡無心職事每食已乃赴寺數刻而出有旨罷免未兩月女真輕軍來襲而東南亦多故矣公自是不復當世之念歸老舊山貧甚故食祠祿逮於終其爲人忠厚樂易平居靜默喜怒不形接人無衆寡小大一以莊謹雖家人不見其惰容自少至老且病未嘗釋書不觀道論古昔博洽審緻無少舛謬鑑裁精遠臧否泯然而胸中是非如白黑也語甚希簡出必中理不以己所不能者告人女兄嘗以子屬公補官公經郊祀恩即以名上而法不許也或勸公改奏族黨者公泫然曰亡姊之意切姑行吾志焉守官四值旱饑力舉荒政皇皇然如在己所活者不可勝計在濟南曰山東多群盜公所部獨無之每與僚屬論事率以教化爲本勤恤爲先不汲汲於簿書期會馭吏不嚴而畏亦無敢欺侮者志慕前修期以所學

及物既稍用會在位者以市爲朝公冲泊自守見謂連蹇然弗屑也梁師成提舉中秘書凡文士希進者必稱門生宰相且然公未嘗一造其舍師成數數致願見之意公卒不往或尤其太甚公正色曰三館在大慶殿旁乃國家書院也臣璫雖貴猶直事老兵耳吾領袖群英而納交於彼不懼辱天子之館乎少監蜀人韓其姓者方以詞采受梁知猶難於越公而進乃以日食不奏出公翌日韓即召試知制誥公之文質而麗體製多放古作者凡十五卷又有皇宋昭姓錄十五卷忠義列傳二卷唐史評一卷鍾離子自叙一卷公嘗宰鍾離故因以爲號其著述之最刻意者莫如春秋學蓋纂特進公之遺業而源流自安定先生以來成書十二卷有卓絕之論百餘條嘗有客以荆國王文公圖像示公求爲贊者公筆之曰壯長圖書癖老大禪寂痼枉教黃閣開竟把蒼生誤雖纔二十言而王

氏之平生亦概舉矣。惟公學術有本、取舍素定、不必進亦不必退、扁舟短棹、夷猶於橫流之世、泛而不溺、既老且窮、所履益固。嗚呼、孔子稱尙德君子、詩歌老成人、子雲所謂不作苟見、不治苟得、非公其誰。其葬以終之明年十二月丙寅。子揆、文林郎、密州司戶曹事、及二女皆先卒、揆自有誌。孫男紹之、右迪功郎、湖州德清主簿、存之、登仕郎、象之、右迪功郎、衢州常山^③縣尉。孫女長適右文林郎、福建茶司幹官余祉。次即寅婦。寅既得公言之詳、而屬比之如此、又係之以詩曰、

士名一善、其中或偶。言純行懿、惟學斯有。學亦多門、各趨所安。孰泝其派、而窮其源。元豐作人、迪以新說。元祐之教、祖訓是式。渾渾翁公、亶其覺而。何去何從、善則吾師。潛思麟經、多所自得。發於云爲、正靜溫直。以其不競、因不見庸。以或泥之、德名乃崇。散逸之餘、哀載遂少。於稽厥心、亦既皎皎。白水

之原、千古之藏。賚其後人、寔繁且昌。

胡寅撰 《斐然集》卷二六

朝奉郎陸虞仲墓誌銘

建炎三年春、金人犯淮南、余以史官扈屬車南渡、抵錢塘、亡友陸虞仲之子景端與其仲過余泣且請曰、不肖孤奉先君子之喪至自京師、既克葬而未有銘。念先君子之友無厚於君者、儻惠顧先君子之好、施及不肖孤而賜之銘、則景端死且不朽。余方扈蹕行在、未果諾。明年冬、待罪政府、景端請益堅。念余與虞仲交久且篤、哀其生不遇而死可悲也、乃以其實書之。公諱韶之、虞仲其字也。世爲錢塘人。曾大父滋以高行聞仁宗朝、拜本州文學、贈宣教郎。大父逢休不仕。父申累贈中奉大夫。公幼孤、鞠於大父、器質嚴重如成人。大父卒、依諸父、皆愛重之。聰悟不凡、甫冠舉進士爲榜首、明年擢第、益刻意問學、時譽籍甚。調復州景陵尉、次蘇州



常熟丞、改宣教郎、知開德府衛南縣。稍厭吏役、試教授中之、除真定府海州教授。講說答問、多自得之旨。學晚益粹、發爲文詞、溫厚典雅。試詞學兼茂科、復首中、有旨除書局官。時宰相汨於勢利、蔑侮寒俊、命久不下。公恬不介意、亦不爲小屈、或勉之、則曰、吾鬻技有司而幸中、竊已愧矣。天子有命、實之文字職、而執政者不我與、命也夫。有直公於朝者、宰相乃曰、彼欲自致富貴耳。久之、除敕令所刪定官、未上、會減員罷、遂授公大晟府按協聲律、公亦無愠色。或賦簡兮諷公、公曰、爲貧而仕、豈曰能賢、奚敢沾激爲高邪。兼編集舒王遺文所檢討官。會有詔裁罷在京冗局、公斂板詣政事堂曰、樂府有協律郎、又置按協聲律、冗孰甚焉。宜罷。後果罷。通判宣州、且攝郡事數月、精明豈弟、吏民愛仰之。漕臣有挾宰相親黨椎剝爲姦利、屬邑迎意風靡、無敢迂者。時徽州新殘蠲賦、俾鄰郡輸杭以釀民

方告病、而徽偶能自辦。漕臣乃檄諸郡曰、已取給他州矣、當以應輸見償。且轉移之費、斛追錢一千二百。民益病之。公率太守張公叔夜聞於朝、宰相下其事。漕司反劾奏、奪一官。益縱哀斂、無所憚。令民租以次色輸、十益六、及賤估均糴、追理積欠、民不堪命。一日至宣城、公折之曰、米之精麤、斗校十許錢爾、奈何欲十許錢取六升耶。均糴本路唯以若干貫、不以若干石、蓋朝廷不欲多取於民也。今斗米二百、而以半價售之、不太傷民矣乎。積欠嘗蠲、且多亡絕、皆不可行。漕臣怒、誣奏公四罪、寓家問中以聞、得旨衝替、人皆冤之。公自謂無愧、不復辯。由是人益知公。時相旣免、除太常丞、繼擢監察御史、未上、以疾致仕而卒。公端靖溫厚、不輕愠喜、人有過失、不以挂口。燕居接下、未嘗妄戲笑、見者必爲之正容莊語。談經論文、倫類該貫、妙極理致。所爲詩文、以意爲主、不事華麗。所著五百餘篇、遭

寇亂僅存其半。貧而喜施。家人或難之。乃曰。我貧不愈於彼耶。使我每有以予人。亦復何幸。至於親故婚姻喪祭不能辦。不待請而助之。坐是雖祿仕二十年。家無餘貲。與弟襲之友愛特厚。妻俞氏。封安人。三男。長即景端。次景莊。次景寬。景端。迪功郎。二女尚幼。積官至朝奉郎。賜緋衣銀魚。宣和七年十一月二十七日卒於京師。年止四十六。景端護喪。敢於錢塘城外僧寺。建炎元年八月。陳通叛。近寺皆焚。而敢塗所在。獨不及。人皆異之。以其年十月十六日壬申葬於南山履泰鄉之積慶原。銘曰。天既生之。而弗殖之。纔予之名。而復抑之。宜且有年。而又嗇之。蒼蒼是非。誰其識之。

張守撰 《毘陵集》卷二二

左承奉郎直敷文閣主管台州崇道觀王

公廷珪行狀

公姓王氏。諱廷珪。字民瞻。本貫吉州安福縣。曾祖

著。故不仕。祖祥。故不仕。父奭。故不仕。其先太原人。八世祖該。避唐末亂。徙居廬陵郡西六十里之何山。好善樂施。人號長者。僞吳順義元年。龍見所居陂田間。有異僧云。是將爲佛寺。公宜北去百里。遇三白即止。子孫當繁衍。且出文士。長者如其言。行至安成北之連嶺。遇白馬一。問其地名曰大白茅。稍前曰小白茅。乃家焉。李氏保大中。龍復見何山。遂爲龍田寺。今金地寺是也。公之在母。大父夢赤文亘天。既寤。公生。人知爲文字之祥矣。元祐間。自連嶺徙居邑中。公時爲兒童。毅然有成人風。年十三。刻志於學。晝夜不息。弱冠通經史百家。崇寧癸未。舍法取士。公一試。右諸生。何損以對策貶廬陵。故工部侍郎郭公孝友從之學。一日聽公講。歸以大義告損。損驚曰。後來之雋也。明年貢辟雍。時方錮史學。禁士人說詩。公獨與顯謨閣直學士劉公才邵吟誦自若。丁父憂。家事一付弟姪。縣榜其



里曰清節。未幾、芝產塋上、木連理、人謂孝友所致。大觀間、提舉本路學事張公根欲薦以八行、公曰、此士之常、乃以爲異耶。辭不就。登政和八年第、調衡州茶陵丞。邑大俗樸、公擇秀士教以學、應書者歲增。猾吏文雅善交結、脅持橫甚、前令丞莫敢治。公獨發其奸言於郡、黥徙之。至今父老能道其事也。先是湖南田賦不均、茶陵尤甚、富者受田不受稅、以避力役。公與令約、凡執役者一毫無所須。民既不病役、徐下令正其賦、不悛者沒入之。自是產與稅偕而役均矣。丞舊兼造船場、有部使者嘗薦公、旣而委公役匠造私器。公不可、且歸其章。使者大怒、會與守倖爭公事、遂拂衣去。潭帥曾公孝序挽留再三、頃之、宰掾倪公濤左官來、致書願交、且責監司不能容一賢者。其爲名人所重如此。宣和末、公年未五十、知時事阽危、無宦游意、學道著書、若將終焉。邑有瀘溪、築草堂其上、鄉人號瀘溪先

生、執經來者屢滿戶外。紹興初、州賦屬邑修城、期會迫遽。公語守令黃衡、軍興民困、城幸堅、胡爲勞人。衡告太守。守大怒、將劾衡。公謂衡、君盍輕一官、全民力乎。衡即日解印綬去。守聞愧甚、爲輟是役。趙丞相安撫江西、奇衡、薦於朝。衡欲攀公、固避乃已。公雖不仕、常懷憂世心、事苟宜民、必告於當路。宣諭劉公大中、李公棗皆遣官屬咨訪利病、公盡言無隱。二公賴之。嘗著論二篇、極言招安大盜之害。洪帥李丞相奇其說、未及行而去。後帥參政張公守遂以遺逸薦於朝。郡守右史王公洋號儒宗、吏師、下車首以禮幣邀公、虛正堂訪政事、即學宮聽公講經。一時士大夫多爲歌詩紀賓主之兩賢也。十二年、今敷文閣直學士胡公銓以忠言忤時、相謫嶺表、親交無敢通問、公獨送以詩、語峻驚人。後數年、時相知之、命帥臣鞠公謗訕、坐流辰州。遠人素重公、爭以爲師。武將馬羽攝郡事、尤待公厚。

公謝曰、某罪人也、將累公。羽曰、由公獲譴、其榮多矣。更遣子受業、後遂登科。太上更化、許公自便、時年幾八十、讀書益力、夜對短檠作細字、率宵分乃寢。今上即位、有薦公者、一見語合、詔略曰、粹然耆儒、凜有直節、頃以言語文字牴牾權臣、流落排根、殆踰二紀。召對便殿、敷奏詳華、特改左承奉郎、除國子監主簿。公以年高力求退、命主管台州崇道觀、令所在州常加存問。既歸、滋以道誼化鄉閭、無貴賤賢愚一接以誠。平生工詩、至是格力雄健、興寄高遠、讀者不知其齒之宿也。心畫端莊、自其天性、人貴珍之。乾道六年冬、再召赴闕、固辭。上不聽、敕守臣備舟車禮遣、仍以引道日聞、踰年始至。對內殿、特蠲拜跪禮、賜坐、勞問甚寵。上欲留公、公固乞歸。於是制詔有司、王某年九十餘、而智識不衰、行義益固、錫對便坐、富有嘉言、其特除直敷文閣、復以崇道俸祿之、加賜寶香茶綵、皆異恩也。公蒙

犯霜雪、往來數千里、略無勞瘁容。明年三月己丑、乃得微病、啓手足、詞色不亂、則其所養可知矣。享年九十有三。娶同邑劉伯玉女、前二十八年卒。一男頤、一女、嫁將仕郎彭飛。孫男二人、詹、澹、皆世其業。孫女二人。所著書有瀘溪集五十卷、易解二十卷、六經講義十卷、論語講義五卷、語錄五卷、雜志五卷、滄海遺珠二卷、方外書十卷、校字一卷、鳳亭山叢錄一卷。公學無不通、而尤邃於易。少嘗師鄉先生張汝明、晚自得於言意之表。漢上朱先生震文定胡公安國、薌林向公子諱見其解皆嘆賞、以爲必傳。公亦不輕示人、欲獻公車。會詩獄興、郡守議收公、理掾汪公涓奮曰、王君剛介勇於義、一紙書招之必來。他掾變色云云、自請提禁卒挾巡尉捕公、守唯唯。他掾遂行、至則突入公家。公談笑就逮、家四壁立、惟易解鐫篋中、卒疑其貨也、摯以去。他日、公嘆曰、天厄吾書。或謂今藏掾家云。子頤卜

以十年正月丙午葬公本縣清化鄉長賦之原使來速行狀將求銘於胡公。惟昔伯父暨先君與公同爲政和戊戌進士故知公詳。其再召也某適對禁中坐定上問銓薦詩人朱熹王某卿識之乎。某既奏熹出處具言公年德文章在今未易多得且登第五十三年矣。上曰官卑何故。某曰斯人早忤上官晚復流竄官簿所以不進。陛下若哀窮悼屈厚加品秩錫之章服足以勸善。上曰俟其至議之。明年公至上命寓直西清蓋待以卿監去朝禮。某嘗白丞相濟公王某百年故老扶杖造朝意欲掛其冠神武門。丞相能爲上言俯聽所請而官其一子非美事與。丞相曰君言是也上必不爲老人惜一子官。明日又言之丞相曰決矣已而乃不報其或者欲公子孫自以儒業發聞於世乎。敢具列之敬俟筆削謹狀。

周必大撰《省齋文稿》卷二九

監簿敷文王公墓誌銘

乾道八年歲在壬辰三月己丑瀘溪先生王公卒。公諱庭珪字民瞻其先太原人。八世祖諒厭唐末亂徙居廬陵郡西六十里曰河山爲善好施號長者。順義元年或見物若龍出於所居旁田間有僧求其處爲寺欣然從之。保大中所謂龍者復見遂名寺曰龍田今金地寺也。僧告長者自此行一里許遇三白即止後當繁衍有以文名者。如其言至邑之北白蓮嶺遇白馬一問其地名曰大白茆遂家焉。曾祖著祖祥父爽皆業儒以氣節聞於鄉里。元祐戊辰皇考復徙居邑南。公生時大父夢赤文亘天寤而公生乃喟然曰僧言其告之矣。公爲兒時凜然有立年十二三潛心大業寒暑不擁爐揮苒旣冠通經史百家崇寧癸未三舍法行公一試卽爲選首爲郡學講書間出新貫聽者環堵時何公損以對策訐直竄廬陵故工部侍郎郭公孝



友受業焉。一日聽公講歸以所聞語損損驚異。明年貢辟雍。時錮史學及元祐學莫敢犯者公獨與其友劉公才邵口不絕吟。劉公後爲常伯德公不忘。丁父憂毀瘠如禮。撫弟姪人無間言。邑榜其里曰清節。亡幾何親塋產瑞芝木連理識者以爲孝友之祥。大觀間提舉學事張公根以公應八行詔公曰此士之常彼以爵位釣吾志耶不就。政和戊戌登進士第調衡州茶陵縣丞。民俗樸陋擇秀民實之學士咸被服其化。三年間應書者增至數百人。猾胥文雅者勢傾一邑交結諸監司爲囊橐累政不能去。公把其宿負白於郡鯨之合郡稱快。至今六十年猶德之。湖南田稅不均茶陵猶甚富者田多稅寡以規役。公語令凡執役者邑毋得秋毫擾使者安於其鄉民既不病役田復元賦莫敢欺之。由是產與稅侔役不煩矣。他郡之民人或以事訴於監司願得公決者相踵。丞舊兼造船場憲臺

初與薦削之久而欲役船工造家具公不可即卻其薦。憲臺怒甚又適守倅不相能拂衣去。湖南帥曾公孝序力挽留且欲薦之朝不屑。左司倪公濤方員外致書願交復責當途不能容一賢者諸司大愧。濤蓋政和間名士也。宣和末公見禍根已萌葺草堂退居瀘溪之上。時年未四十棄官卻掃教授鄉里執經登堂者肩摩人不稱其官曰瀘溪先生。紹興初郡賦工役修城時武夷黃衡攝邑公謂衡城初堅而勞疲敝之民。衡白太守守大怒欲械繫衡公曰若能不愛一官以息民力不亦善乎。衡即棄去。太守愧服寢役。趙丞相帥江西薦衡欲歸功於公固辭乃止。初江西盜猖獗公著論二篇言招安之害李丞相帥隆興欲行其言會罷去。後帥參政張公守遂以遺逸薦公。先是劉公大中李公宋相繼宣諭各遣其屬訪以時政民瘼公極言以對。二公服膺。公居草堂未嘗入州府。右史王公洋



出守廬陵、遣官賫書幣至山中招、且虛其堂、諏以政事。繼率其僚屬延詣學宮、升堂講道、使諸生有所矜式。一時士大夫哦詩紀其盛。自是郡數以禮請、不出。公雖在畎畝、懷憂世心。紹興戊午、某以狂瞽忤時相、壬戌秋謫嶺表、士皆結舌。公獨作詩送某行、有癡兒不了官家事、男子要爲天下奇之句。詔江西帥沈昭遠鞠治以聞、除名竄夜郎。公至貶所、人迎勞、以先睹爲快。執經躋門者屢滿。時中州刺史馬羽攝守、日夕就見、尊以師禮。公謂羽曰、公方爲時用、而加禮罪人、恐與時左。羽曰、某聞先生之名舊矣、若以此獲罪、有榮耀焉。且遣其子從學、遂登進士第。公自夜郎歸、年紀八十、讀書觀蠅頭字、率夜分始就枕。上即位之初、召對、極言時政、詔云、粹然耆儒、凜有直節。頃以言語文字牴牾權臣、流落排根、殆踰二紀。召對便殿、敷奏詳剴。改左承奉郎、除國子監主簿。論事與時相不合、乞去、主管

台州崇道觀、令所在州常加存問。乾道庚寅再被召、固辭免。詔郡將給輿楫趣遣、仍具引道日申中台。明冬始到闕、引對免拜、賜坐問勞、令少留。公以老乞還、詔云、王某年九十餘、而智識未衰、行義益固、賜對便坐、嘗有嘉言、除直敷文閣領祠、仍賜香茗繒綵。士羨其榮。公少從鄉先生學易、晚益悟於言意之表。漢上先生朱公震、薊林居士向公子諲、過公草堂、講論經旨、嘗至夜漏盡皆歎服。文定胡公安國過公家、亦歎且云、公有經濟大略、文章特其餘事耳。爲作易解序引、公未嘗輕示人、欲獻之公車。會獄興、郡守郭東集台議逮公、獄掾汪君涓曰、王君剛介勇於義、若幅紙招之必來。守變色曰、彼得罪大臣、可善待之乎。請部卒會巡尉捕卒待之、守首肯。戶掾遂行、至則排闥突入、公談笑就逮。公之書緘鏤頗固、衆卒疑奇貨、挈以去。公喟曰、此吾書之厄。遂不復傳。公土木形骸、儼然有不可犯

之色、雖市井無賴子見公、亦莫不斂衽。人無賢愚貴賤、一待以誠。雖三尺之童、亦牖迪款款必盡。聞人善若己出。有爲不善者、或告之曰、吾以語盧溪先生矣。其人必慚汗悔過。公學極高明、尤工詩、書有楷法、自成一家。平生治心養氣、翛然有高舉意。年幾百、齒髮視聽不衰、溘然而逝。享年少衛武公之二。娶同邑劉伯玉女、先卒。男一人、頤、能稱其家。女一人、嫁將仕郎彭飛。孫男二人、詹、澹、皆志學。孫女二人、有瀘溪集五十卷、易解二十卷、六經講義十卷、論語講義五卷、語錄五卷、雜志五卷、滄海遺珠二卷、方外書十卷、校字一卷、鳳亭山叢錄一卷。將以九年某月某日葬於安福縣清化鄉連嶺吟峰之下、烏石巖。其孤頤扶服乞銘殊專。某曰、禮部侍郎周公狀自足、傳信不朽。安用糞土之言。頤請益虔、叙而銘之。初隆興甲申、某備員侍讀、於楊前論人物及公云、王某雖老、宰相才也。蓋用狄梁公

薦張柬之語、上不以爲過。逮庚寅冬、某應詔舉詩人、再以公爲舉首。且奏云、周必大深知其人。必大、端人也。上雅記前語、肯首久之。然上之知公深矣。倘未死、其功用殆不可量。嗚呼惜哉。銘曰、

才大而剛、志直以方。百世之豪、鋤強掖弱、蒐獮民瘼、小試牛刀。皋比當路、嶮其勢距。雪虐風饕、禮經墓式、封止四尺、德與山高。

胡銓撰 《胡澹庵先生文集》卷二九

左奉議郎汪公墓誌銘

公諱喬年、字房儒、信之上饒人。公自爲兒嬉戲膝下時、已能順適親意。既長、操行益篤。天性敏悟、又能刻厲于學。在崇寧、大觀間、雖以習一經應試、而徧觀他經及諸子、歷代史記、往往浹洽。規摹古人、作爲詩騷、蓋不專于舉子之業。至舉子之文、亦自成一家也。會御史陳公師錫來居于信、公獨知所愛重、朝夕敬請。陳公爲公言前輩出處大節、學問



文章本末甚悉、公益得以攷正焉。于是郡丞洪公芻監試進士、得公之文而大奇之、以爲非尋常舉子所及、恨考官拘于尺度、僅能勿失而已。其贈行之言、以爲汪子之文、獨余知之、璆琳瓊琚如也、驊騮駟如也、設不長、雄于二千人中、猶當霸于一經也。或乃指其瑕而捨其瑜、議其牝牡驪黃而棄其千里、何哉。然自是試輒不售、至紹興五年、始以特奏名進士對策、擢爲第一。歷池州、建康府、饒州教授、自左迪功郎用舉者再轉至左宣教郎、又以從國信使出疆、轉左奉議郎。池兵火之餘、庶事草創、時沿江猶未解嚴、戍兵往來類多、託宿于學生、徒解散、學官備員而已。先聖廟像摧剝、棟宇傾圯、公至即白于州而更新之。學故有邸舍、爲富民冒占者數年、至是皆攷究而簿正之。其他所經畫甚衆、廩庫充牣、養士至百人、實自公始。公平居雖食貧、而于貨錢出納、物價低昂、漫不訾省。至其當官、

乃留意于細碎如此。其後二郡亦隨其窾隙補葺焉、不求新奇也。接納後來、訓誘不倦、四方游學無所歸者、病則臨視療治、死則任其後事以爲常。其歸自饒、貧益甚。荒郊敝廬、藜藿塞徑、或飭粥不繼而獨以書冊自娛。紹興二十有五年正月乙亥、終于家、年七十有六。公豈弟樂易、不以世俗細故蒂芥其中。于人無怨尤、雖有以惡聲至不校也。臨事接物、一以誠信、未嘗逆設機械。喜賓客、每或斥服用爲食飲費。聞人之過如不聞、得人一善則稱道不容口。少以文字顯、晚以年德尊、而未嘗自居、退然如不足者。故雖耄老而齒髮不衰、耳目聰明、亦其德性寬裕致然也。鄉里之士、方喜公之康彊、而不意其止此、莫不失聲歎息、或至流涕。有文集七十卷。曾祖諱惠、祖諱濟、考諱皓、贈右承事郎、妣陳氏、贈孺人。其配鄭氏、贈孺人、左宣教郎東陞之女。男七人、曰大忠、某某。女二人、長適進士鄭鍵、次在

室。諸孤將以是年月日葬公于開化鄉之橫山、奉公之治命、以來請銘。惟信之汪氏、皆唐末自徽來徙、分散既廣、莫可攷也。公于某有宗黨倍年之尊、而屈折輩行與之爲友、臨絕之音、以銘見屬、某其何敢辭。銘曰、
嗚呼房儒、其德之裕。俛仰一世、無怨無惡。維心之亨、豈曰不遇。今其亡矣、誰或起之。有子七人、尙其似之。

汪應辰撰 《文定集》卷二一

校記

①容：原作「陽」。復：原無。據道光本《梁谿先生文集》改、補。

②「邑西」二字原倒，據右引改。

③常山：原作「當山」，據《宋史》卷八八《地理志》四「衢州」條改。

④瀘溪：《盧溪先生文集》附錄作「盧溪」。下同。

⑤詹澹：原作「澹□」，據右引改。

⑥八世：右引作「十一世」。

⑦名：右引作「鳴」。

⑧郡學：右引作「潁水」。

⑨此句原無，據右引補。

⑩學：原無，據右引補。

⑪戊戌：原作「戊午」，據右引改。按，政和無「戊午」，戊戌爲政和八年。

宋儒碑傳集卷八十六

王蘋 胡份 李謨 高載

王著作墓誌銘

道學衰微、千有餘載、士習於章句傳註、孰有心傳自到者。憲自髫齡、已聞河南二程夫子紹孔孟之絕學、私淑諸人、獨恨不得供灑掃應對之役、問所以學也。既冠居吳、則聞州里福清王先生實程門高第、乃與吾季弟慙、又聞陳長方、少方執門弟子之禮、薰蒸灌溉於仁義道德之言、若江海之浸、雖莫測其涯涘、然知師道可尊、朋友講習可樂也。先生諱蘋、字信伯、世居福之福清、自其考徙平江、先生資稟清粹、充養純固、平居恂恂儒者、及語當世之務、民俗利病、若習於從政者、蓋其理達而義精故也。然不邀名當世、世罕知之。今天子急賢圖治、搜揚巖穴、俊乂彙征、知府事孫公佑列先生學行於朝、召見、賜進士出身、除秘書省正字。先生於是

冀得行其道、以所學爲上言曰、道無古今、惟人能弘、故堯以傳舜、舜以傳禹、禹以傳湯、湯以傳文武。或見而知、或聞而知、前聖後聖、若合符節、然非傳聖人之道、傳其心也。己之心無異聖人之心、廣大無垠、萬善皆備、盛德大業由此而成、故欲傳堯舜禹湯文武之道、擴充是心焉爾。又曰、帝王之學與儒生異尚、儒生從事章句文義、帝王務得其要、措之事業、蓋聖人經世大法備在方策、苟得其要、舉而行之、無難也。未幾、兼史館校勘、屬刊修裕陵實錄、書奏、改左承奉郎、遷著作佐郎、丐外、補通判常州、主管台州崇道觀、族子坐法、一時觀望、文致以罪、久之還故官、復主管崇道觀、引年致仕、官至左朝奉郎、壽七十有二、紹興二十三年五月戊午疾終於里第、以其年八月甲申葬於湖州長興縣和平鎮茅栗山之原。嗟乎、先生所試止於是、故見之行事不大彰徹、道學淵微不得暴之天下、然一時



名儒推與論薦、亦可槩見。楊文靖公時、程門先進、嘗曰、同門後來、成就莫踰吾信伯。中書舍人朱公震、寶文閣直學士胡公安國、徽猷閣待制尹公焞、皆舉以自代、胡公論薦尤力、謂其學有師承、識通世務、使司獻納、必有補於聖時。是二三公蓋有心照莫逆之道存焉。先生純一不雜、故得之深、不事表暴、故所養厚、貌肅而氣和、言簡而義明、故望之可欽、即之可愛慕。其接物意誠而感通、其治事從容而中理、其從政必盡其職、其涖民必極其惠、豈非所謂時措之宜者耶。曾祖諱珣、祖諱礎、皆隱君子、考諱伯起、假承務郎、贈右宣教郎、室蔡氏、胡氏、前卒、俱贈安人。胡氏欽州安遠尉嶧之女、安遠名士女又賢也、以配先生、士以爲美談。三子、曰大本、右修職郎、淮南東路安撫準備差使。曰大中、曰大臨、皆業儒。女二人、壻皆進士。嗚呼、夷考世儒之學、自先秦兩漢更魏晉、涉隋唐、窮經探道、號稱名儒、

者不乏、然韓愈氏顧以爲孟軻氏不得其傳、下到今若河南氏之學、若先生所受學、遠有端緒、質之孔孟無愧也。其學要以深造自得、敏於躬行、其序自正心誠意、以至修身齊家治國平天下、要本於格物致知、自盡己之性、以至盡人物之性、極於參天地贊化育、要本於至誠不息、達於禮樂、則可以窮神知化、擇乎中庸、則可以開物成務。然士無師傳、以肄業考疑、往往不得其門而入、雖然後生可畏、焉知來者無渙然冰釋於斯道。先生既葬、修職以狀來、曰、先君未嘗著書、所以傳後者惟幽堂之銘是賴。子從先君遊久、子實甚宜。憲義不得以淺陋辭也、謹次其狀、且具列古今之學、可考不誣、蓋有待於來者。銘曰、

聖人跡熄、經僅存、章句傳、註極絲棼。衰微絕塞、道之真、剽剗鬪儷、攻於文。卓哉夫子、闢聖門、學得其承、道乃尊。不雜不溺、醇乎醇、相時行義、覺斯民。胡

神裔此畀窮屯、我述墓文琢斯珉。諗茲源委垂無垠、聞而知者存乎人。門人浦城章憲撰。

章憲撰 《王著作集》卷五

王蘋傳

王蘋字信伯。世居福之福清。自其考始寓平江。蘋師事河南程頤。視其高第龜山楊時爲後進。而時獨深許可之。每以爲後來師門成就者惟蘋也。上親征駐蹕。知平江府。孫佑薦其學行。召見之。蘋曰。民離而聽之。則愚。合而聽之。則聖。古語謂謀從衆。則合天心。以衆心之所同有至公之理也。今陛下親征詔下。而四方民大和悅。當於人心耳。陛下誠推是心以見於用人。則用人必慰人望。推是心以見於政事。則政事不拂於人情。故曰愛而知其惡。憎而知其善。使朝廷不乏才。要道也。汲黯之戇。漢武每惡其妄發。及與嚴助論之。必以爲社稷臣。宇文士及之佞。唐文皇每延入閣。語必至夜分。至稱

佳木。乃以佞人目之。二君不蔽於好惡。此所以能盡臣下之賢否。人主好惡。猶天焉。惟才是用。何適莫之有。上他日語輔臣曰。蘋起草茅。而議論若素宦於朝。通儒也。賜進士出身。授左迪功郎。秘書省正字。詔條具賊退利害。蘋曰。六月宣王北伐之詩也。而詩序及於鹿鳴四牡。皇皇者華。常棣伐木。湛露彤弓。菁菁者莪焉。此亦何預於北伐哉。及觀車攻之詩。稱宣王能內修政事。外攘夷狄。然則攘夷狄實係於政事之脩也。今日政治之本有三。一曰正心誠意。二曰辨君子小人。三曰消朋黨。記曰。欲明明德於天下者。先治其國。欲治其國者。先齊其家。欲齊其家者。先修其身。欲修其身者。先正其心。欲正其心者。先誠其意。治天下國家本於正心誠意而已。誠者。天之道也。意與天合。則動靜語默。無毫髮私。而此心無適。非道矣。舉而措之。事業宜無難也。君子之與小人。如水炭之不可並用也。君子



儒藏

曰可、小人曰不可。君子曰然、小人必曰不然、其相戾若是。欲望其共成功、難矣。然彼之所不同、非故不相侔也。以知識之小大、見聞之廣狹不同耳。齊侯伐魯、展喜犒師、對齊侯曰、小人恐矣、君子則否。晉陰飴甥對秦伯、亦曰、小人感謂之不免。君子恕、以爲必歸。然則可不辨之哉。唐文宗嘗歎曰、破河北賊易、破此黨難。蓋是時牛、李之黨互相傾軋、四十餘年、而文宗不知。當時之黨雖起於牛、李、而實成於文宗之疑也。惟人君以爲疑、故親戚故舊人得以謂之黨、交遊執友人得以謂之黨、宦學相同得以謂之黨、門生故吏得以謂之黨。朋黨之成、破係於人君取舍。使文宗不以爲黨、臣下孰從而成之。會修神宗皇帝實錄、兼史館校勘、書成、改左承奉郎、遷著作佐郎、通判常州、主管台州崇道觀、累官左朝奉郎。卒、年七十二。蘋識慮精微、議論平易。平居頽然、若與世忘。及語當世之務、乃如習於從

政者。在常州、人以爲不屑於簿書錢穀也。蘋鈎考不懈、必舉職乃已。或叩之曰、子欲我爲不解人事耶。不著書。既老、乃集古今論語說、取其與所見合者爲一書、亦未及而卒。

《國史》本傳 《王著作集》卷五

靖州通判胡公墓誌銘

予自藤再遷瓊、瓊守張公仲爽嘗爲予言、通守靖州胡公有交游之雅、可人也。予恨不識其人。無幾何、廬陵胡邦衡自廣東遷珠崖、道瓊山、見予於雙泉、則其季也。會張公亦來、二人合談靖州之美、不容口。予益以未獲見爲歉。後予再遷儋耳、距邦衡不數舍。一日、邦衡忽書來告、靖州兄篤行文雅君子也、今不幸即世、世之知者蓋鮮、非公直書、恐遂湮沒不傳、敢以銘請。予出涕曰、哲人云亡、尙忍言也耶。邦衡請不懈、益虔、遂刪取其狀、叙而銘之。公諱份、字兼美、姓胡氏、其先自建康家廬陵。曾祖不



仕祖諒將仕郎考登臣贈右宣教郎妣歐陽文忠公族朝散郎粲之女。公三歲失母。字於李氏姑。九歲而宣教郎繼室前太夫人之妹。儒林郎延壽之女。劉丞相沆之外孫。公事後母已以孝聞。早就外傳。能肄宵雅之三。長學章句。司業李公朴時莅講席。門甚高。獨與其進藝。屢占高等。不喜時文。文一出已。無剽竊。每郡試。輒伏場屋。標望籍。舍法行。貢璧水。繼入上庠。閱一星。學益進。年三十八。釋褐授臨江軍刑曹。明習三尺法。多所平反。吏不得舞筆。時有以深文賊不辜者。鉤得其情。刑不濫及。吏深刻者。折其尾毒。力職常最其列。以妣憂去官。服闋。遷掾袁州兵曹。建炎初。官制行。改司法。繼改辭曹。攝郡幕。得憲臺移文。取讀之。則宜春縣斷牛訟未直也。索案一見。知其冤。蓋富人與貧人子居相直。富人久欲其居。不與也。其牛偶蹊富人之門。而攘之。牛人無敢言。久復放之野。牛歸貧人家。富人反

訟之縣。坐以盜。貧人訴於州。罪之如縣。公語吏。是不可不直。遂歸牛貧人。一郡稱快。時給事中李公大有之子同幕。以白其父。李抵公書。不意老年見古循吏。方用兵。兼機幕。郡政一出公畫。會盜起。郡乘城。官分隅以守。而隅長不時給米。士有饑色。公怒。欲斬以聞。其人叩頭祈哀。得免。兼倉民與其僚賦粟。卒數十。恚言粟紅腐。手刃譟呼。稍稍引避。公獨開以禍福。卒舍兵拜。是日微公幾殆。叛將趙萬江江西。地既散。老弱係路。命左右廩。凡無告者。訪所親歸之。人多其義。同僚有去官遭掠者。亦調護其行。衆以爲難。上即位。覃恩。晉從政郎。罷歸。久之。除衡州教授。而宣教公捐館。免喪。且數年。無仕進意。或謂恩未暨親。乃詣闕。除教授澧州。始至。生員才十數。既四方來學者輻湊。學宮大張。一歲。諸司章交。改左宣教郎。君以訓導有方。上聞。得終成資。賜象服左魚。尋除通守靖州。轉奉議郎。初。州郡率

開邊釁公至務在撫摩九谿按堵。曾獻琛于朝乞爲管伴公不可。郡犬牙蠻獠儲粟寡一被圍則乏軍興公經營增其廩入無倉卒憂。歲旱盜且萌蘖與郡將齋禱飛山之神雨隨車至鄙以不聳。渠陽士亡幾公招攜以禮曾爭遣子入學士科對者以內郡禮祖行谿獠嚮化翕然守條死要不相魚劫。以公善綏撫乞留郡以聞公曰吾忍左墳墓久於此乎。轉左承議郎代還送者卧轍百餘里弗忍去。還鄉轉左朝奉郎請老。童顏秀眉偶感疾而終實辛未正月辛丑也享年七十。娶彭氏前十六年亡。媿德於公人無退言。男四人昌朝昌時苦學早夭。昌時嘗舉進士試禮部。昌言昌明能緝父志克肖其爲。昌言今爲右迪功郎澧州石門縣主簿一女適右文林郎新授辰州錄事參軍張瓘前卒。孫男四人。羣昂曷昱皆志學。昂後公二月而死。孫女九人。長適進士易如璋次適楊忠襄公幼子蔚文次

適進士張璆易張兩孫女亦繼卒餘在室。公爲文長於持論在郡庠太學時屢中第一士爭膾炙工爲詩得風雅體有書解三十卷文集五十卷藏于家。紹興二十二年十二月癸酉葬于吉水縣之中鵠鄉山塘之原。公性寬易躬自厚而責人薄善如自口出於惡焉隱操履純正雖閭室不欺務以中道訓人故號所居堂曰中庸。謁人無親疎倒履以迎雖少必肅談辯終日無一言忤物慍怒不見辭氣。或夷俟則曰我必無禮呼以緩急無在亡辭儉以幅己祭祀潔豐若節春秋必身先之事親盡道。閨門睦如親疾藥不嘗不進在視寒煖帶雖夜不解居喪柴毀過禮加等既葬朔望必哭墓雖疾風迅雷大雨雪不避也。妣忌日則設外祖妣享之族有不克祀者春秋享焉。從叔父子死養叔母終其身連舉三喪費不貲不靳。從弟貧不給周之及卒無子爲立嗣喪葬計三十萬鈔於我乎出。鄉黨或

誤絀憲網、冒寒暑求救、不得請、食不下咽。蘇枯弱強、有害善穉者、必痛抑、雖要人居間、不聽也。處庠序、朋友疾、夙夜藥石弗懈。同舍有取己器物者、衆詰責請庚之、謝無所失、取者慙。公蒞政通敏、爲大吏所知、有闕員、至兼數職、簿領山委、日披決至夜分爲常。大吏或摘語、對無一謬。持官將身廉清、所行無顧忌。不妄干進、當路多平昔同舍生、一不浼汲援、至困躋二十餘年、澹如也。廨舍敝、葺之則止。有請爲游觀地、曰、勞人費財以役耳、豈吾志耶。嘗言不願宰邑、拙於催科、毋以賊賞改官、懼有冤抑、卒不愆于素。又嘗語猶子公武、仕宦惟廉、勤和三者闕一不可、吾行之二十年、未嘗有失。其大概如此。予聞廬陵胡氏世業儒、無顯者、公始起家、里人艷其榮進、進於學。而兄敷字歸美者、繼取賢科、自是弟銓、鎬連中第、而子姓貢禮部相躡、皆公發之。惜乎公卒老于州縣、而不大顯于時、蓋有待云。

銘曰、

爆順裏方、氣剛以閔、蓋德之光。爬癢櫛垢、弱強植穉、吏帖民良。父父子子、家巷術理、刑于鄉邦。穀我後嗣、玄石昭美、千稔之藏。

李光撰 《莊簡集》卷一八

通判兄墓誌銘 假李泰發參政名銜

予自藤再遷瓊、瓊守張公仲爽嘗謂予言、通守靖州胡公有交承之雅、可人也。予恨不識其人。亡幾何、廬陵胡邦衡自廣東遷朱耶、道瓊山、見予於雙泉、則其季也。會張公亦來、二人合談靖州之美、不容口、予益以未獲見爲歉。後予再遷儋耳、距邦衡不數舍。一日、邦衡忽書來告曰、靖州兄、篤行文雅君子也。今不幸即世、世之知者蓋鮮、非公特書、恐遂湮沒不傳、敢以銘請。予出涕曰、哲人云亡、尙忍言也耶。邦衡請不懈、益虔、遂刪取其狀、叙而銘之曰、公諱份、字兼美、姓胡氏。其先自建康家廬陵。曾



儒藏

祖副不仕。祖諒贈將仕郎。考諱登臣。贈右宣政郎。妣歐陽文忠公族朝散郎粲之女。公三歲失母。字於李氏姑。九歲而宣教公繼室前太夫人之妹。儒林郎延壽之女。劉丞相沆之外孫。公事後母以孝聞。早就外傳。能肄宵雅之三。長學章貢。司業李公樸時洫尙席。門甚高。獨與其進。藝屢占高等。不喜時文。文一出己。無剽脫。每群試。輒蜚場屋。標望籍籍。三舍法行。貢辟水。繼入上庠。閱一星。學益進。年三十八。釋褐授臨江軍刑曹。明習三尺法。多所平反。吏不得舞文。時有以深文賊不辜。鉤得其情。刑不濫及。吏深刻者折其尾毒。力職恆最其列。以妣憂去官。服闋。選掾袁州兵曹。建炎初。官制行。改司法。繼改詞曹。攝郡幕。得憲台移文。取讀之。則宜春縣斷牛訟未直也。索案一見。知其冤。蓋富人與貧人子居相直。富人久利其居。不與也。其牛偶蹊富人之門而攘之。牛人無敢言。久復放之野。牛歸貧

人家。富人反訟之。縣坐以盜。貧人訴於州。罪之如縣。公語吏。是不可不直。遂歸牛貧人。一郡稱快。時給事中李公大有之子同幕。以白其父。李與公書。不意老年見古循吏。方用兵。兼領機幕。郡政一出公畫。會盜起。郡乘城。官分隅以守。而隅長不時給米。士有饑色。公怒。欲斬以聞。其人叩頭祈哀得免。兼倉氏與某僚賦粟。卒數十。恚言粟紅腐。手刃譟呼。衆稍稍引避。公獨開以禍福。卒舍刃拜。是日微公幾殆。叛將趙萬江江西也。既敗。老弱繫路。命左右廩之。無告者訪所親歸之。人多其義。同僚有去官遭掠者。亦調護其行。衆以爲難。上即位。覃恩循從政郎。罷歸。久之。除衡州教授。而宣教公捐館。免喪且數年。無仕進意。或謂恩未及親。乃詣闕。除教授澧州。始至。生員財十數。既四方來學者輻湊。學宮大張。一歲。諸司交薦。改左宣教郎。君以訓導有方。上聞。得終成資。賜象服左魚。尋除通守靖州。轉



左奉議郎。初州郡率開邊釁，公至，務在拊摩，九谿安堵。曾獻琛於朝，乞爲管伴，公不可。郡犬牙蠻獠，儲粟寡，一被圍則乏軍餉。公經營，增其廩入，無倉卒憂。歲旱，盜且萌孽，與郡將齊禱飛山之神，雨隨車至，民賴以安。渠陽士無幾，公招攜以禮，曾爭遣子入學。士計對者，以內郡禮祖行。谿獠嚮化，翕然守條，死不相漁劫。以公善綏撫，乞留，郡以聞。公曰：「吾忍棄墳墓久於此乎？」轉左承議郎，代還，送者卧轍百餘里，弗忍其還鄉。轉左朝奉郎，請老。童顏秀眉，偶感疾而終，實辛未正月辛丑也，享年七十。娶彭氏，前十六年亡，嫺德於公。人^①無間言。男四人，昌朝、昌時，苦嗜學，早夭。昌時嘗舉進士，試禮部。昌言、昌明，能緝父志，克肖其爲。昌言今爲右迪功郎，澧州石門主簿。一女，適右文林郎，新授辰州錄事參軍張瓘，先卒。孫男四人：羣、昂、晷、昱，皆志學。昂後公二月而卒。孫女九人，長適進士葉如璋，次適楊

忠襄公幼子蔚文，次適進士張璆，餘在室。葉、張兩孫女亦繼卒。公爲文長於持論，在郡庠，太學時，屢中第一，士爭膾炙。工爲詩，得風雅體。有書解三十卷，文集五十卷，藏於家。紹興二十二年十二月癸酉，葬於吉水縣之中鵠鄉山塘之原。公天性寬易，躬自厚而責人甚薄，見人善不啻如自其口出，於人之惡也隱之。操履純正，即暗室不欺，務以中道訓人，故號所居堂曰中庸堂。謁者無親疏，屣履以迎，雖少必肅，談論終日，無一言忤物。愠怒不見辭氣，或夷俟，則曰：「我必無禮。」叩以緩急，必無不諾。儉以幅己，祭祀必豐，若節春秋，必身先之。事親盡道，閨門睦如。親有疾，藥不嘗不敢進，視寒燠^②，丙夜不解帶。居喪柴毀過禮，既葬，朔望必哭墓，雖疾風迅雷，大雨雪不避也。妣忌日，則設外祖妣位享之。族有不克祀者，春秋享焉。從叔父子死，養叔母終其身。連舉三喪，費不貲，不靳。從弟貧，不時周給之。及

卒無子、爲立嗣、喪葬計三十萬錢於我乎出。鄉黨或誤挂憲網、冒寒暑往救、不得請、食不下咽。甦枯弱強、有害善者、稚者、必痛獮、雖要人居間不聽也。朋友疾、夙夜藥石弗解。同舍有取己器物者、衆詰責、請庚之、謝無所失、取者大慚。公涖政通敏、爲大吏所知、有闕員、至兼數職、簿領山委、日披決至夜分爲常。大吏或摘語、對無一謬。持身廉清、罔所顧忌、不亡干進。當途多平昔^③。同舍生、一不丐汲援、至困躓二十餘年、泊如也。廨舍敝、葺之則已、有請爲游觀地、曰、勞人費財、以悅耳目、豈吾志耶。嘗言、不願宰邑、拙於催科、毋以賊賞改官、懼有冤抑。卒不愆於素。又嘗語猶子公武、仕官惟廉、勤和三者廢一不可。吾行之二十年、未嘗有失。其大概如此。予聞廬陵胡氏世業儒、無顯者、公始起家。里人艷其榮進、進於學。而兄敷字歸美者、繼掇賢科、自是弟銓、鎬連登第、而子姓貢禮部相躡、皆公發之。惜乎

公卒老於州縣、而不大顯於時、蓋有待云。銘曰、表順裏方、氣剛以閱、蓋德之光。爬痒櫛垢、弱強植稭、吏帖民良。父父子子、家巷衍理、刑于鄉邦。穀我後嗣、玄石昭美、千稔之藏。

胡銓撰 《胡澹庵先生文集》卷三〇

宋故左中大夫直寶文閣致仕李公墓志銘

左中大夫、直寶文閣致仕李公諱謨、字茂嘉、實南唐李氏。國除族散、有徙常州之無錫縣者、公其後也。公少孤、事母孝、貧無以爲養、始感憤讀書、曰、惟是足以亢吾宗。記誦日千言、下筆語出驚人。旣冠、束書詣鄉校、從樂安先生受詩。時學者數十人、與余爲同舍生。穎異秀發、治經章解句達、文詞驟進、不類舊常、一試遂收其科。仕州縣如素習、遇事明辨、未嘗讀律令、而斷治皆應法、尤爲當世大人所器重^④。徽宗召見、擢部使者。歷事三朝、涖官五十年、



刺八路、典四大州、秩上大夫、著籍內閣、遂爲一世功名之士。享年七十二、以紹興二十三年三月乙未卒于無錫之私第。諸孤以進士陳昭狀公世系、爵里、行治、年壽、卒葬之地、從父黨乞余銘、乃序而銘焉。公以崇寧五年解進士褐、調通州司法參軍。歲滿、升文林郎、調江州軍事判官。用舉者改宣教郎、知南康軍建昌縣、未赴、通判信安軍。疏治城塹、創置樓櫓、招選禁兵、先期而辦。連進秩、遷承議郎。代還、除廣南東路轉運判官。升陞^⑤入對、奏言、豪民率以田園分寄官蔭之家、而貧民下戶一畝之宮、數口之聚、皆受役、力不勝則逃去。告賞之法著于令甲、可詔監司督責州縣推行、以紓百姓之急。又言、吏部注守令不計能否、一切以格令從事、而貪鄙無狀居其半、偏州下邑窮民無告。宜詔大臣更治制立法、甄別人品、蒐擇材能、黜去貪懦、以惠天下。徽宗韙其言、留弗遣、擢太常丞。唐宰相李紳短

小精悍、世號短李、嘗隱無錫之惠山、立祠在焉。公長不滿五尺、而精神滿腹、或曰、李茂嘉殆是公垂後身也。言者論公年貌未應居禮樂之司、公笑謂客曰、吾生壬戌、言章尙云乳臭乎。差高陽關路安撫都總管司主管機宜文字。河朔盜起、亡命嘯聚、所在千百爲群、帥欲閉關以虞變、公曰、姦民竊發、當飭將士以示討除、何爲遽如許也。帥悟、即日授甲于庭、令曰、具糧糗、視吾旗所向。軍聲大振、群盜奔潰、境內無一跡。除京東西路提舉鹽香茶礬事、移河北東路、再徙京東、進直徽猷閣、知平州、改營州、又改河北西路常平。公以平、營、新疆、蒙恩進職、今易地河朔、還所賜告上之、不拜。除提舉措置河北燕山府路糴使公事。朝廷餉新邊、歲糴粟麥亡慮三百萬斛、率用度牒、香藥鈔充糴本、實不持一錢、而州縣抑配爲民病。公曰、度牒關鈔、大商賈之輕資也。稍下其估售之、而增穀賈以受糴、不使一

吏預其間。未幾、粟麥至三百萬斛、無斗升之負、而民不知勞。朝廷嘉之、進直秘閣、除兩浙路轉運副使、以邊餉方賴公也、留再任。羅使置司在慶源府。虜騎大入、守將懦、緩不任、詔公就節制府事。公檄召所屬兵民官吏、皆入保而臨城。尉黃諲將部曲、徜徉境上、獨不至、公得其文書、已署虜中年號、陰遣壯士執殺之以徇。高邑務官與縣人趙文炳有邪謀、文炳踰城數出、公捕繫獄、驗治有狀。文炳懼罪誅、請以妻子爲質、斬捕同惡自贖、公許之。文炳出、而務官者方會其徒縱酒大醉、文炳就席伺其寐、刺殺之、提九級馳還。一府大震、人人如公坐視其旁矣。事聞朝廷、除公直徽猷閣、知慶源府、改充河北河東路宣撫使司參謀。積功次六遷至朝請大夫。建炎元年、除江南東路轉運副使。覃恩遷朝議大夫。御營統制官王赤者、駐兵建康、謀爲變、以夜縱火爲信。公覘知之、馳告守帥。弗德。公飭兵

將官、率所部團民伍伏塗巷中、柵其隘。夜半、天慶觀火起、諸軍譟而出、所至不得入、遂斧南門而去。遲明訪守帥、則縋城宵遁矣。已、乃除簽書密院、江淮兩浙路制置使呂頤浩兼領建康府。頃、公提舉常平、頤浩爲河北燕山府路都轉運使。頤浩以經制便宜、起懷衛二州常平粟輸濟州倉、以備軍餉。公曰、濟、京東也。燕山軍士張頤待哺、而輦懷衛之粟繇京東轉河北兩路、二千里漕之燕山、雖三尺童子知其妄也、必有他圖。奏罷之。頤浩固不說也。會明受改號、官吏讀赦皆失色、獨頤浩怡然自若。公曰、樞省大臣、盍徵天下之兵以除君側之惡。頤浩左右視、接以他語。公曰、王室在難、如救頭然之急、公豈應躊躇在衆人之後。頤浩唯唯。方議行、而御營參贊軍事張浚檄書至、二叛伏誅。頤浩第功進右丞相。公歎曰、群凶稱亂、全軀保妻子之臣、握兵坐視、相顧不發。幸諸將讎復王淵臬首之禍、而



因人成事者遂至宰相。頤浩聞之益怒。秋八月、上幸建康、詔公主錢糧、黃敦書主橋道。大駕次張橋、山水暴溢、隄齧橋壞、頤浩通劾之、公與敦書皆罷。丁母永嘉郡夫人憂、卒喪、主管台州崇道觀。紹興三年、除江南西路轉運副使。入對行殿、奏言、人主欲知天下利害之實、而九重阻深、吾^⑧人疾苦壅於上聞、則匹夫匹婦有不被其澤者。今者法駕時巡、所過郡國、延見父老、特降清問、則守令貪廉、法令廢舉、民之休戚、事之利害、一見勝百聞矣。改兩浙路轉運副使。五年、轉左中奉大夫、知鎮江府。乘輿幸建康、兩駐京口、公每賜對、眷獎甚寵。進直顯謨閣、兩浙路轉運副使。方聞命、遷直寶文閣、知臨安府。比入對、上曰、臨安之命、出自朕意。公頓首謝曰、臣與大臣無一日之素、知事陛下而已。七年、再知鎮江府。時都督府統制官种潛屯江上、軍民不相中、人情惴恐。公次丹陽、或勸公單騎獨進、嚴兵而

後入。巡尉部千百人執戈以衛、公視而笑曰、設有急、若輩足恃乎。亟去無留、乃合^⑨。老幼數百指造官。涓日視事、延見吏民^⑩。賓接將佐如平時、一府帖然。潛見公、至感泣。公兩守鎮江、屬兵火創殘之後、重兵屯聚其中、繕治乘輿巡幸頓舍之所、儲侍千官萬兵共億之費、隨宜區處、上下贍足、不擾而辦。移牧臨安、百姓遮道而泣^⑪。公舉手謝曰、不久當復來。已而果然。州民罷市、空巷來逆。歲大旱、公率寮吏禱長山之白龍池、香火未收、雲起池中、一夕雨足、遂稔。於是宰相當國、官職除授以苞苴豐儉爲差、公因退食、語家人曰、吾跳兵走馬燕趙之地、不自意全、歸埽墳墓、盍少休矣。上書請祠官、提舉台州崇道觀。時年五十六、竟不復言仕矣。官左中大夫、職直寶文閣、服三品、爵隴西縣開國男、食邑三百戶。公材高識明、長於治劇。御史民、不以小法微文佐喜怒。以故崎嶇兵亂反側之中、發紓隱詘、鉅治

彊梗聽公一語而決無後議者。慶源被圍、虜人檄守將高景雲、而口語籍籍、指景雲爲姦細、衆怒欲起。公馳指景雲所、諭其衆曰、朝廷屬我節制府事、高公無預也。檄書具在、未嘗開發。索火焚之、衆遂定。通判許和卿與添差通判歸明馬觀國不相能、因倡言觀國久通虜人爲內應、衆起圍第、欲屠其家。公面詰和卿曰、艱危如此、吾曹未知稅駕之所、公首爲亂階、行且及矣。揮其衆使去曰、城中動息、吾自知之。後公使江東、忽見一人衣紫佩金拜庭下、公驚曰、吾僚馬公耶。觀國曰、慶源之圍、微公一言、骨已朽矣、願效一死以報。久之、虜中撤還北客之落南者、觀國在遣中。過公別曰、銜恩未報、死而有知、尙當結草也。涕泣而出。公曾大父勤、大父度、不仕。父景芳、以公貴、贈右光祿大夫。母朱氏、贈永嘉郡夫人。妻戴氏、封令人、有賢行。寶文公起徒步爲聞家、繫令人之助。四男子、時澤、右宣義郎、新知

平江府吳縣事。時習、右文林郎、前江南東路提點刑獄司幹辦公事。時俊、右修職郎、揚州泰興縣主簿。時庸、右從事郎、新江州觀察推官。四女、彭慥、俞民從、戴必先、張采、其婿也。民從、右文林郎。采、左朝奉郎。孫男九人、杞、榛、桐、並登仕郎。樞、朴、桴、軌、拱、餘一人未名。孫女七人。諸孤以其年十二月壬午、奉公之喪葬縣之茗嶼鄉青山灣、公所自卜也。公生十四歲而光祿公下世、後十年起家筮仕、始迎母夫人就養。自佐信安、參高陽機幕、奉使典州、皆在河朔。戎馬內侵、大盜群起、將母其閒、踐艱乘危、數矣、若有相之者。建炎初、將漕江左、始奉安車以還。考終大耋、哀榮終始。遇郊祀恩、任兩兄之子時哲、時修者。中外宗姻喪死、嫁孤力不任者、皆倚公以辦。公已旬閒、闢舍北地、營一大圃。面西山、枕長河、穹堂奧宇、曲闌幽榭、疏沼沚、藝花竹環之、日具酒茗、命客吟嘯其中。延接後輩、不以爵齒自高、與鈞



禮既屬疾曰、河圖七十二數、若嚙語者、即所享壽也。崇寧中、公婦翁戴君築大第、壯麗爲一州之甲、縣人數見夢曰、李運使宅也。翁除地、又獲一金魚、以爲子孫之祥、大喜。翁沒、而諸子瓜分、不數年、卒爲李氏。胡馬南牧、一大酋、燕人也、集群胡舍公第中、揭篋見公畫像而驚號、其徒曰、李徽猷也。皆以手加額、問公安在。守舍者懼不敢告。蓐炊而行、秋毫不犯。且大書其壁曰、此李徽猷宅也。以曉後至者。嗟夫。始公食貧爲布衣、而戴翁以財雄爲大姓、自崇寧距建炎蓋一世、由幽燕抵全吳、僅萬里、而公姓氏官稱宮室證兆之應如啐啄、無毫釐之謬。世人乃欲以智力取非其有、豈非惑歟。銘曰、治道之行、文武二柄、孰強弗友、孰弱弗競、孰致予武、徙木以令、俯僂循牆、若兵在頸、孰振予文、執鐸以徇、噓枯吹生、祈醒愈病、矯矯李公、德配前修、治軍牧民、如農一丘、磔其梟狼、以殖善柔、惠立威振、

兩取其尤。百犬吠聲、衆狙皆怒。舉臂一揮、掉尾而去。三窟狡兔、兩端首鼠。鑄切弗喻、夾以砧斧。文馴武克、左右具宜。如牢圈虎、如乳哺兒。詩書之帥、慈惠之師。不配其有、孰主張之。河圖告終、乘雲跨箕。嗚呼已矣、次有銘詩。

孫觀撰 《鴻慶居士文集》卷三五

知靈泉縣奉議郎致仕高君載行狀

君諱載、字東叔、世爲邛之蒲江人。自爲兒時、穎異越常、八歲能屬文。嘗爲犬所噬、作賦以言之、其間有云、逐利不顧、則從跖而吠堯、爲養所移、則事齊而皆漢。父師得其文大驚、由是不敢以凡兒蓄之。少長、通六學、尤精於毛氏詩、旁及子史百氏、異端小說、率數行下。遇有扣質、則事詞顛末、姓名月日、語端駘驛無窮。以詞賦冠鄉舉、登嘉泰二年第、調嘉定府峨眉縣尉。前官以解圯僦民居、君至拓而新之、未半歲、百廢具舉。太守果山游君仲鴻、廣都

費君士幾聞其才、召攝嘉定法曹。永康陳君謙爲詳刑使者、亦甚器之、取置幕下、且除館授粲、遣子從游。建人劉君崇之代陳、君固請還邑、弗聽、事無細大、異席諮之。轉丞丹稜、邑號難治、會闕令、君以次攝、以公勤重吏足、以文雅服士心。聽訟本諸義理、嘗有兄弟交愬而父直其弟者、且曰季能食我、君語之曰、孔子爲魯司寇、釋父子之訟、漢韓延壽不肯決兄弟之爭議、天倫所在、麗於法則害於教。今爲之兄者既不能養其父、儻繩以令甲則寧翅不祥之離。姑令百拜以謝、幸其幡然以返于彝也、而猶不悛、以干于僂、則縣令風之未至、將無詞于責、敢緩閉閣之思乎。於是兄弟感泣、拜唯而退、遂爲父子兄弟如初。訟鉅因以浸稀。俄丁父憂、喪葬盡禮。嘗於讀禮之餘、覽前朝史牒、嘆熙豐祐聖符靖、崇觀政宣汔于建、紹乾淳熙元黨論屢變、國勢僨起不常、慨然有感於來今、乃取制詞之褒貶、建

論之是非、粹成巨編、而自以己意識其後。大抵雖以國史、實錄、長編、會要爲之據依、而一時詔旨訓詞、封章奏疏、則必於先賢文集、私史簡稽參質、以潰于成。凡百數十年間一治一亂、開卷瞭然、亦庶幾爲時事之補、非今世類書比也。服闋、調瀘州錄事參軍。前給事侍郎許公奕爲州、州事悉經其手、裁處明雋、許公既上其續、去之曰、又以所知薦焉。吏部范公繼至、則君治任將歸、乃曲留之、俾攝帥屬、主賓從容、惟孜孜講學之務、或語及前言往行、誦荅如響。范公即郡齋修地理書、語寮吏曰、無踰於高君者矣。首以委付、又參以劉君湜、史君堯輔。君夙夜究心、不日而成、又取佗人之未竟者爲粹成之。世所謂寰宇九域、堪輿輿地諸書、亦略備矣。君復以國史、郡乘、私志、野錄參繹貫通、凡郡縣之升降、諸道之分合、職官之沿改、風俗之微惡、人物之盛衰、與夫宣畝丘乘、封國江河久遠難明之事、



鳥獸草木選蠕細瑣殊尤詭異之物皆親爲筆削靡微不周往往前之爲丘乘者莫加焉嘉定九年正月改宣教郎居數月制置司辟知靈泉縣君至則曰縣令民社之寄徒自近世視爲冗惡數日待滿況此邦民貧地瘠夏賦雖輕秋輸最重脫又恣吏侵牟民何從出於是取先民格言凡有涉於爲宰者輯爲書寘諸坐隅視事窮晨夜受輸者立得券劑以歸無復它日所謂寄廊攬納之弊又曰今爲令者率以簿書不報期會爲大故漫不省訟且拘以定日民有緩急將焉愬乃立爲剖決立未容決則貯之紫囊俟公退反復籌惟厥明即以書判示兩詞之人莫不厭服愧謝嘗被制置司檄差充類省別院點檢官會本路詳刑使者護試事始下令曰異時考官往往不深惟朝廷取士之意背公首私吾儕尙懋敬之毋枉有司衆皆曰諾無何與同舍大會堂皇上作而曰今有某所某士以某經

應選所當籠取衆復唯唯君獨徐而前曰夫朝廷以糊名取士可焉取之不可黜之不知其他也今以公之初公明若此而以是終之無乃不可乎使者爲改容君夷易疏暢洞無城府雖居官亦敝衣羸馬不改其度請謁者或以情告則厚加顧予不則善辭焉親族之貧者歲以俸廩周之戚疏厚薄各足其分自掃一室繙閱舊書每語人曰人斯須廢學則無所措其身以故孜孜兀兀如不能終日下至詞章小技亦積累成編與賓朋語毋問經史有觸其機則絲貫繩聯娓娓不絕或講論至夜分無倦意所予雖晚出後進亦折輩行與語所不與雖大官貴人視之亡如也然亦以是狡險者欺之己所不予者謗焉至其自信則凜不可奪今年春忽覺氣血不仁迨夏四月又聞母病于寧川憂厲熏心遂感忪怔淫熱之疾乃即白府乞身以便省侍諸弟尋以母喪赴君執書慟泣曰吾何以生爲

也。於是柴瘠加等疾不可爲矣。遂以七月之九日屬纊。嗚呼痛哉。痛哉。君取同郡安仁計氏生三子男。斯立。斯和。斯美。一女。巽。早卒。斯立兄弟將以今年十二月庚申葬君于眉州丹稜縣長寧鄉仙水里乾山之原。與計夫人同兆。重惟君自幼力學。考質經傳。上下數千年如指諸掌。爲文不事鈎棘。和平瞻逸。自成一家。當世之儒生聞人咸共期以遠到。而未見有所施設。賁恨以歿。宜有立言君子爲識其竊以詒世信後。顧事嚴日薄。其孤有志未就。姑爲撰次其爵里行義年。刻諸墓石以俟。

魏了翁撰 《重校鶴山先生大全文集》卷八八

校記

- ①人：原作「又」，據文意改。
- ②燠：原作「襖」，據文意改。
- ③昔：原作「者」，據四庫本《莊簡集》卷一八改。
- ④重：原無，據《孫尚書大全文集》補。
- ⑤陞：原作「辭」，據右引改。
- ⑥儒：原作「偶」，據右引改。
- ⑦語：原作「蟻」，據右引改。
- ⑧吾：原闕，據右引補。
- ⑨合：原作「命」，據右引改。
- ⑩吏民：原作「民吏」，據右引乙。
- ⑪泣：原作「立」，據右引改。
- ⑫啐啄：原闕，據右引補。
- ⑬狠：原作「狼」，據右引改。
- ⑭尤：原作「曾」，據右引改。

宋儒碑傳集卷八十七

李綱

宋丞相故特進觀文殿大學士致仕隴西

郡開國公食邑四千四百戶食實封一

千七百戶贈太師諡忠定李公行狀 上

曾祖僧護故贈少保曾祖母廖氏成國夫人龔氏茂國夫人盧氏昭國夫人祖賡故贈太保祖母黃氏秦國夫人饒氏魏國夫人父夔故任中大夫充右文殿修撰贈太師追封衛國公母吳氏韓國夫人邵武軍邵武縣八龍鄉慶親里李綱年五十八公字伯紀其先系出有唐有以宗室爲建州刺史者卒官因家焉皇朝太平興國四年析建州置邵武軍故今爲邵武人曾大父大父隱德不仕行義爲鄉閭所宗先衛公以進士起家爲時名卿妣韓國夫人處州龍泉人賢淑懿範中外所仰事具龜山楊先生所撰墓誌銘公形神俱清器識絕人自

幼有大志舉動必合於規矩法度見者知其必將名世年十有四從先衛公官延安時夏人入寇圍城甚急舊法邊城被圍乘城者以日計功僚屬子弟皆登城冀賞公獨不從然時時騎遶城上示無所畏寇退朝廷以言者謂濫賞報罷衆以是愧公將冠丁韓國夫人憂廬毗陵錫山塋次凡三年哀感閭里手植松柏數十萬處畫規摹他人莫擬父執見之謂人曰吾畏李君旣冠補國子監生第一方先衛公之入上庠也名在第一而公繼之每試必上列聲稱籍甚舉進士未第以先衛公遇郊祀恩補假將仕郎附試貢士復首送屬聞期親之喪友人貽書謂道路之傳蓋不的勉試春官以慰親望公不可調將仕郎眞州司法參軍政和二年上舍及第臚傳之曰徽廟顧問再三特旨升甲改合入官授承務郎充相州州學教授以親庭遠易鎮江四年召除行國子正十二月對便殿除尙書考



藏

功員外郎。五年、謁告迎先衛公於霅川、有旨除先衛公提舉醴泉觀以便就養。九月還闕、道除監察御史、兼權殿中侍御史。既入臺、嘗因職事進對、先衛公亦以是日朝見。徽廟顧公曰、卿父子同日造朝、搢紳榮事。未幾、以論內侍建節及宰相任用堂候官、從官入朝以笏擊其下、凡三事忤權貴、罷言職。公之在臺纔一月耳。十一月、除尚書比部員外郎。六年、轉承事郎。七年、差充禮部貢院參詳官。八年四月、復召對。五月、除太常少卿。八月、出朝陵寢、未還闕、除起居郎。十二月、差兼國史編修官。宣和元年、同知貢舉。六月、京師大水、徽廟降詔遣使、所以憂勞者甚至、而在位者乃寂不聞有發憤納忠之人。公獨異之、懷不自已、奏疏論列、謂變異不虛發、必有感召之因。災害未易禦、必有消復之策。臣有已見、急切利害事須面奏、乞許臣因侍立次直前奏事。翌日、宰執班退、傳旨閣門、令公先退、更不

侍立。公因奏便宜六事、且上章待罪。有旨所論不當、送吏部與監當差遣。繼以待罪章上、有旨更降一官、與遠小處監當、授承務郎、監南劍州沙縣稅務。先是、父友故贈諫議大夫了齋陳公瓘識公之幼、每謂人曰、李公有子。了齋既以天下之重自任、知無不言、欲求天下奇士以此道付之。方是時、人皆以公爲鳳鳴朝陽。了齋聞之、以書至先衛公曰、伯紀所言、天下亦有非之者乎。天下莫有非之者、則其言也當矣。使不當其可、天下豈有不非之者乎。積誨有自、可以百拜爲壽而遠莫能也。公既來沙陽、日所居僧舍曰寓軒、職事之餘、閱藏教於其間。時了齋以書至、且爲公引狄梁公、李文靖、王文正前言往行、繼之以言曰、巍巍梁公、疇克與對。文靖、文正、輔世無悔、誰者嗣之。願公繼躋乎筌笈之外、羸壯不同事、趣舍不同業、安敢以同我者爲是而忘盡忠之告歟。時故右文殿修撰羅公疇方家



居嘗以書致了齋。道與公從遊之適。了齋報書曰。吾儕老矣。寓軒之人。嘗發妙旨於箠篴。舉世傾耳。以需其再鼓。今乃欲韜絃袖手。以適吾儕羸歇之社。若許其來而不拒。則是私乎適己。而以天下爲非我事也。其爲一時名德。推與愛重如此。其後公兩在廟堂。所爲所守。天下想聞風采。蓋不負了齋所期矣。二年六月。復承事郎。十月。復本等差遣。三年。磨勘轉宣教郎。公歸膝下。五月。先衛公感疾不起。公哀慕不自勝。八月。合葬先衛公於韓國夫人之塋。了齋方謫居山陽。以文致祭。其末云。孟仲叔季。咸遵誨飭。論水者誰。其動也力。不苟不許。孰曰不然。誰其爲之。嚴父之賢。識者謂了齋所許與父子之間。不遺餘力矣。喪既除。六年。差權發遣秀州。未赴間。七年三月。除太常少卿。六月到闕。是冬。金人敗盟。邊報狎至。朝廷震懼。不復議戰守。惟日謀避狄之計。歲暮。賊馬逼近。始遣李鄴奉使講和。降

詔罪己。召天下勤王之師。且命皇太子爲開封牧。宰執日聚都堂。茫然無策。先是詔求直言。有旨召侍從之臣聚議。各具所見以聞。公上封事。大略以謂當今禦戎之急務。要須治其本原。敵乃可制。杜牧所謂上策。莫如自治者。誠爲知言。所謂治其本原者。其說有五。一曰正己以收人心。二曰聽言以收士用。三曰蓄財穀以足軍儲。四曰審號令以尊國勢。五曰施惠澤以弭民怨。又陳捍敵十策。時建牧之命既下。公素與故相吳公敏厚善。敏時爲給事中。夜過其家。謂敏曰。事急矣。建牧之議。豈非欲委以留守之任乎。東宮恭儉之德。聞於天下。以守宗社是也。而建以爲牧。非也。巨盜猖蹶如此。自非傳以位號。使招徠天下豪傑與之共守。何以克濟。公從官以獻納論思爲職。曷不非時請對。爲上極言之。敏曰。監國可乎。公曰。不可。唐肅宗靈武之事。當時不建號。不足以復邦。而建號之議。不出於明

皇、後世惜之。上聰明仁慈，儻感公言，萬有一能行此，金人且將悔禍退師，宗社底寧，豈徒城都之人獲安，天下之人皆將受賜，非發忘身徇國心，孰能任此。敏翌日求對，具道所以。且曰：陛下果能用臣言，則宗社寧長，聖壽無疆。徽廟曰：何以言之。敏曰：神霄萬壽宮所謂長生大君，陛下也，必有青華帝君以助之，其兆已見於此。徽廟感悟歎息。敏因言：李綱之論蓋與臣同。有旨召公赴都堂，稟議訖，隨宰執至文字庫祗候引對。實十二月二十三日。公具劄子，大略以謂皇太子監國，特國家閒暇之時，典禮如此，今大敵入寇，天下震動，安危存亡在呼吸間，而用平時典禮，可乎。名分不正而當大權，稟命則不威，專命則不孝，何以號召天下，率勵豪傑，期成功於萬分之一哉。胡不假皇太子以位號，使爲陛下保守宗社，收將士心，以死捍敵。如臣之計，天下可保，在此一舉。仍刺臂血書之。其日徽廟御

玉華閣，先召宰執吳敏等對。至日晡，時內禪之議已決，公不復得對。二十四日，孝慈淵聖皇帝即位，詔有司討論所以崇奉道君皇帝者。公在太常條具以聞。二十六日，上實封言事，大略以謂方今夷狄憑陵，中國勢弱，姦邪充斥，君子道消，法度紀綱蕩然無統。陛下履位適當斯時，得不上應天心，下順人欲，外攘夷狄，使中國之勢尊，內誅姦邪，使君子之道長，以副道君皇帝所以付託之意。二十八日，召對延和殿。淵聖迎謂曰：卿頃論水災疏，朕在東宮見之，至今猶能憶誦。嘗爲賦詩，有秋來一鳳向南飛之句。公叙謝訖，因奏曰：今金寇先聲雖若可畏，然聞有內禪之事，勢必退縮請和，厚有所邀求於朝廷。臣竊料之，大概有五：欲稱尊號一也，如契丹故事，當法以大事小之義，不足惜。欲得歸朝人二也，當盡以與之，以示大信，不足惜。欲增歲幣三也，當告以舊約，以燕山、雲中歸中國，故歲幣增



於大遼者兩倍、今既背約自取之、則歲幣當減、國家敦示和好、不校貨財、姑如元數可也。欲求犒師之物四也、當量力以與之。欲求割地五也、則祖宗之地子孫當以死守、不可以尺寸與人。願陛下留神於此數者、執之堅、無爲浮議所搖、可無後艱。淵聖嘉納。二十九日、除兵部侍郎。靖康元年五月三日、充行營司參謀官、蓋幹離不之兵、遂渡河。是日聞報故也。夜漏二鼓、道君皇帝東幸、宮闈相續以行、侍從百官往往潛遁。四日、公侍對班於延和殿下、聞宰執奏事、議欲奉鑾輿出狩襄鄧間。公思之以爲不可、適遇知東上閣門事朱孝莊於殿庭間、語之曰、有急切事欲與宰執廷辨、公能奏取旨乎。孝莊曰、宰執未退而從官求對、前此無例。公曰、此何時而用例耶。孝莊許諾、即具奏、得旨引對。公因啓奏曰、聞諸道路、宰執欲奉陛下出狩以避狄、果有之、宗社危矣。且道君皇帝以宗社之故傳位陛

下、今捨之而去可乎。淵聖默然。太宰白時中曰、都城豈可以守。公曰、天下城池豈有如都城者。且宗廟社稷、百官萬民所在、捨此欲將何之。若能率勵將士、慰安人心、與之固守、豈有不可守之理。淵聖顧宰執曰、策將安出。宰執默然。公進曰、今日之計、莫若整齷軍馬、揚聲出戰、固結民心、相與堅守、以待勤王之師。淵聖曰、誰可將者。公曰、朝廷平日以高爵厚祿崇養大臣、蓋將用之於有事之日。今白時中、李邦彥等雖書生、未必知兵、然藉其位號、撫馭將士、以抗敵鋒、乃其職也。時中怒甚、厲聲曰、李綱莫能將兵出戰否。公曰、陛下不以臣爲庸懦、儻使治兵、願以死報。淵聖顧宰執曰、執政有何闕。趙野對曰、尙書右丞闕。淵聖曰、李綱除右丞、面賜袍帶并笏。公致謝、且叙方時艱難不敢辭之意。宰執猶以去計勸淵聖、有旨命公爲東京留守。公爲淵聖力陳所以不可去者、且言、唐明皇聞潼關失守、

即時幸蜀、宗社朝廷碎於賊手、累年然後僅能復之、范祖禹謂其失在於不能堅守以待勤王之師。今陛下初即大位、中外欣戴、四方之兵不日雲集、敵騎必不能久留、捨此而去、如龍脫於淵、車駕朝發而都城夕亂、雖臣等留守、何補於事。淵聖意頗回、而內侍王孝竭從旁奏曰、中宮國公已行、陛下豈可留此。淵聖色變、降榻曰、卿等毋留朕、朕將親往陝西起兵以復都城、決不可留此。公泣拜俯伏淵聖前、以死邀之。會燕、越二王至、亦以固守爲然。淵聖意稍定、即取紙御書可回二字、用寶俾中使追還中宮國公。因顧公曰、卿留朕、治兵禦寇、專以委卿、不得稍有疏虞。公皇恐再拜受命。是夕、宿於尙書省、而宰執宿於內東門司。中夜、淵聖遣中使令宰執供軍令狀、詰旦決行。五日、公自尙書省趨朝、道路紛紛、復傳有南狩之事。太廟神主已出寓太常寺矣。至祥曦殿、則禁衛皆擐甲、乘輿服御皆

已陳列、六宮襍被皆將升車矣。公遑遽無策、因厲聲謂禁衛曰、爾等願以死守宗社乎。願扈從以巡幸乎。禁衛皆呼曰、願以死守宗社、不居此將安之。公因拉殿帥王宗澹等入見曰、陛下昨夕已許臣留、今復戒行何也。且六軍父母妻子皆在都城、豈肯捨去。萬有一中道散歸、陛下孰與爲衛。且虜騎已逼、彼知乘輿之去未遠、健馬疾追、何以禦之。淵聖感悟、始命輟行。公謂宰執曰、敢有異議者斬。因出祥曦殿、傳旨宣示、禁衛皆拜伏呼萬歲。其聲震地。復入勸淵聖御樓以見將士。淵聖可之。駕登宣德門、宰執百官將士班樓前起居。復降步輦勞問將士。公與吳敏撰數十語、叙金人犯順、欲危宗社、決策固守、各令勉勵之意。俾閤門官宣讀。每讀一句、將士聲喏。須臾、六軍皆感泣流涕。於是固守之議始決。是日以公爲親征行營使、一切許以便宜從事。自車駕御樓之後、方治都城四壁守具、以百



步法分兵備禦、每壁用正兵萬二千餘人、而保甲居民廂軍之屬不預焉。凡防守之具無不畢備。又團結馬步軍四萬人爲前後左右中軍、軍八千人、日肄習之。以前軍居東水門外、護延豐倉、倉有粟豆四十萬石、其後勤王之師集城外者賴之以濟。以後軍居宋門外、占樊家岡、使賊騎不敢近。而左右中軍居城中、以備緩急。自五日至八日、治戰守之具粗畢、而賊馬已抵城下。是夕攻西水門、公臨城捍禦、斬獲百餘人、自初夜防守達旦、始保無虞。翌日、賊攻酸棗封丘門、公慮城上兵卒不足用、乞禁衛班直善射者千人以從、傳旨如所乞。賊渡壕以雲梯攻城、公命班直乘城射之、皆應弦而倒。公登城督戰、激勵將士、人皆賈勇、近者以手砲櫺木擊之、遠者以神臂弓強弩射之、又遠者以牀子弩座砲及之、而金賊有乘棧渡壕而溺者、有登梯而墜者、有中矢石而踣者甚衆。又募壯士數百人、縋

城而下、燒雲梯數十座、斬獲酋首十餘級、皆耳有金環。淵聖遣中使勞問、降御筆褒諭、有公忠略之志、朕記於心、及公悉心捍禦、朕皆知之之語。特給內庫酒、銀、絹等以頒將士、人皆歡呼。自卯至申、未間殺賊數千人。賊知城守有備、不可以攻、乃退師。因遣使隨李鄴請和、抵城下已昏、堅欲入城、公傳令輒開門者斬、竟俟明乃入。實初十日也。淵聖御崇政殿、引使入對、出幹離不書進呈、道所以舉師犯中國之意、聞上內禪、願復講和、乞遣大臣赴軍前議所以和者。公因請行、淵聖不許、曰、卿方治兵、不可。命李稅奉使、鄭望之、高世則副之。宰執退、公留身問所以不遣之旨、淵聖曰、卿性剛、不可以往。公對曰、今虜氣方銳、吾大兵未集、固不可以不和。然所以和者得策、則中國之勢遂安、不然禍患未已。宗社安危、在此一舉、臣恐李稅等柔懦而悞國事也。因爲淵聖反覆具道所以不可割地及過許

金幣之說、淵聖頗以爲然。李稅是日至軍中果辱命、北面再拜、膝行而前。金人出事目一紙付稅等達朝廷、稅唯唯不能措一辭。金人笑之曰、此乃一婦人女子爾。自是有輕朝廷心。十一日、稅至自軍前、宰執同對於崇政殿、進呈金人所須事目、須金五百萬兩、銀五十萬兩、絹綵一百萬匹、馬駝驢騾之屬各以萬計、尊其國主爲伯父、凡燕雲之人在漢者悉歸之、割太原、中山、河間三鎮之地、又以親王、宰相爲質、乃退師。具道其語甚狂厲、宰執震恐、欲如其數悉許之。公引前議力爭、以謂尊稱及歸朝官如其所欲固無害。犒師金幣所索太多、當量與之。太原、河間、中山國家屏蔽、號爲三鎮、其實十餘郡地、塘濬險阻皆在焉、割之何以立國。又保塞翼順、僖三祖陵寢所在、子孫奈何與人。至於遣質、即宰相當往、親王不當往。爲今日計、莫若擇使與之往返熟議、道所以可不可者、金帛之數令有司

會計所有續具報。宿留數日、大兵四集、彼以孤軍入重地、勢不能久留、雖所得不滿意、必求速歸、然後與之盟、以重兵衛出之、彼且不敢輕中國、其和可久也。宰執皆不以爲然、方謂都城破在朝夕、肝腦且塗地、何有三鎮、而金幣之數又不足較也。淵聖爲群議所惑、凡爭踰兩時、無一人助公言者。公自度力不能勝衆說、因再拜求去。淵聖慰諭曰、不須如此。卿第出治兵、益固城守、恐金人款我、此徐議可也。公被旨不得不出、復前進曰、金人所須、宰執欲一切許之、不過欲脫一時之禍、不知他日付之何人、能爲陛下此、願更審處、後悔恐無所及。因出至城北壁、復迴、尙冀可以力爭、而誓書已行矣。所求悉皆與之。今上皇帝方在康邸、俾同少宰張邦昌爲質於金人軍中。公無如之何、則爲之留三鎮詔書、戒中書吏以輒發者斬、庶幾俟四方勤王之師集、以爲後圖。而宰執哀聚金銀、自乘輿服



御宗廟供具、六宮官府器皿皆竭取、復索之於臣庶之家、金僅及三十萬兩、銀僅及八百萬兩、宰執以金銀之數少、惶恐再拜謝罪、公獨不謝。於是王孝迪建議、欲盡括在京官吏軍民金銀、揭長榜於通衢、立限輸官、限滿不輸者斬之。許奴婢親屬及諸色人告、都城大擾。限既滿、得金二十餘萬兩、銀四百餘萬兩、而民間藏蓄爲之一空。公奏淵聖曰、收簇金銀限滿、民力已竭、復許告訐、恐生內變。外有大敵而民心又變、不可不慮。淵聖曰、卿可往收榜。歸行營司、移牒王孝迪照會、人情乃安。自十五日四方勤王之師漸有至者、日數萬人、公於四壁置統制官招集之。至十七八日、統制官馬忠以京西募兵至、遇金人於鄭州南門外、乘勢擊之、殺獲甚衆。金人始懼、遊騎不敢旁出、而自京城以南、民始獲奠居矣。二十日、种師道、姚平仲以涇原、秦鳳兵至、公奏淵聖曰、勤王之師集者漸衆、兵家忌分、

節制歸一、乃克有濟。願令師道、平仲等聽臣節制。而宰執間有密建白以爲不可者、於是別置宣撫司、以師道簽書樞密院事、充河北河東京畿宣撫使、以平仲爲宣撫司都統制、應西兵及四方勤王之師並隸宣撫司。又撥前後軍之在城外者屬之、而行營司所統者獨左右中軍而已。淵聖屢申勅兩司不得侵紊、節制既分、不相統一、宣撫司所欲行者託機密往往不復關報、公私憂之。自議和誓書既行之後、金人益肆須索、無所忌憚。及勤王之師既集、西兵將帥日至、淵聖意方壯。又聞金人虜掠城北、屠戮如故、而城外墳墓殯殮發掘殆盡。始①赫然有用兵之意。公贊淵聖曰、易以謙之上六稱利用行師、征邑國。師之上六稱開國承家、小人勿用。蓋謙之極非利用行師不足以濟功、師之成非戒用小人不足以保治。今陛下之於金人屈己講好、其謙極矣。而金人貪婪無厭、兇悖已甚、其勢非

用師不可。然成功之後，願陛下以用小人爲戒，使金人有所懲創，不敢有窺中國之心。當數十年無夷狄之禍。不然，一日縱敵，數世之患憂未艾也。二
十七日，公與李邦彥、吳敏、种師道、姚平仲、折彥質同對於福寧殿，議所以用兵者。公奏淵聖曰：「金人之兵，得其實數不過六萬人，又大半皆奚、契丹、渤海種類，其精兵不過三萬人。吾勤王之師集城下者二十餘萬，固已數倍之。彼以孤軍入重地，正猶虎豹自投於檻穽中，當以計取之，不可以角一旦之力。爲今之策，莫若扼河津，絕糧道，禁抄掠，分兵以復畿北諸邑，俟彼遊騎出則擊之，以重兵臨賊營，堅壁勿戰。如周亞夫所以困七國者。俟其芻糧乏，人馬疲，然後以將帥檄取誓書，復三鎮，縱其歸，半渡而後擊之，此必勝之計也。淵聖意深以爲然。衆議亦允。期即分遣兵，以二月六日舉事。約已定，而姚平仲者古之子，屢立戰功，在道君朝爲童貫

所抑，未嘗朝見。至是淵聖以其驍勇，屢召對內殿，賜予甚厚。平仲武人，志得氣滿，勇而寡謀，謂大功可自有之。先期於二月一日夜，親率步騎萬人以劫金人之寨，欲生擒所謂幹離不者。取今上皇帝以歸。雖种師道宿城中弗知也。公時以疾給假卧行營司。夜半淵聖遣中使降親筆曰：「平仲已舉事，決成大功，卿可將行營司兵出封丘門，爲之應援。公具劄子辭以疾，且非素約，兵不預備。斯須之間，中使三至，責以軍令，不得已力疾分命諸將解范瓊王師古等圍，斬獲甚衆。復犯中軍，公親率將士以神臂弓射卻之。是夜宿於城外，而平仲者一夕劫寨，爲敵所覺，殺傷相當，所折者不過千餘人。旣不得所欲，即恐懼遁去。宰執臺諫闐然，謂西兵勤王之師及親征行營司兵皆爲金人所殲，無復存者。淵聖震恐，有詔不得進兵，而幹離不遣使以謂用兵特將帥所爲，不出上意，請再和。宰相李邦彥



於淵聖前語使人曰、用兵乃大臣李綱與姚平仲
結約、非朝廷意。僉議欲縛公以予之、使人反以爲
不可、遂罷公尙書右丞、親征行營使、以蔡懋代總
兵。蔡懋計會行營司兵所失纔百餘人、西兵及勤
王之師折傷千餘人外、餘並無故、乃知朝廷前所
聞之非。是夕淵聖賜親筆慰勞、且令吳敏宣諭將
復用之意。公感泣謝恩、方欲丐歸田廬、而太學生
陳東與諸生千餘人詣闕上書、明公及師道之無
罪、不當罷。軍民聞之、不期而集者數十萬人、填塞
馳道街巷、呼聲震地、舁登聞鼓於東華門、擊破之、
軍民必欲見公及師道乃去。於是淵聖遣中使召
公及師道入對、公聞命惶懼、固辭不敢行、而宣召
絡繹、不得已入見淵聖於福寧殿閣子中。公泣拜
請死、淵聖亦泣、有旨復公尙書右丞、充京城四壁
守禦使。公固辭、淵聖不允、俾出東華門至右掖門
一帶安撫軍民。公稟聖旨宣諭、乃稍散去。再對於

福寧殿、淵聖命公復節制勤王之師、先放遣民兵、
蓋不復有用兵意也。所留三鎮詔書、公既罷、乃遣
宇文虛中齎詣金人軍中。是夕公宿於咸豐門、以
金人進兵門外治攻具故也。先是、蔡懋號令將士、
金人近城不得輒施放、有引砲及發牀子弩者皆
杖之、將士憤怒。公既登城、令施放自便、能中賊者
厚賞之。夜發霹靂砲以擊賊軍、皆驚呼。翌日薄城、
射卻之、乃退。金人自平仲劫寨及封丘門接戰之
後、頗有懼意、既得三鎮之詔及肅王爲質、即不俟
金幣數足、遣使告辭。初十日遂退師。十三日、宰執
對延和殿、公奏淵聖曰、澶淵之役、雖與大遼盟約
而退、猶更遣重兵護送之、蓋恐其無所忌憚、肆行
抄掠故也。金人退師今三日矣、盍遣大兵、用澶淵
故事護送之。宰執皆以爲太早、公固請之、淵聖以
公言爲然、可其請。是日分遣將士、以兵十餘萬數
道並進、且戒諸將度便利可擊則擊之。金人厚載

而歸、輜重既衆、所掠婦女不可勝計、氣驕甚、擊之決有可勝之理、將士踴躍以行。十四日、除知樞密院事、封開國伯、食邑八百戶、食實封一百戶。十七日、澤州奏粘罕既破忻、代、圍太原、陷威勝軍、入南北關、陷隆德府、遂次高平、朝廷震懼、恐其復渡河而南。宰執咎公盡遣城下兵以追幹離不之師、將無以支吾。公曰、幹離不之師既退、自當遣兵護送、粘罕之師雖來、聞既和亦當自退、決無他虞。而執政中有密啓淵聖者、悉追還諸將之兵。諸將之兵及幹離不之師於邢、趙間、相去二十里、金人聞大兵且至、莫測多寡、懼甚、其行甚速、而諸將得追詔即還。公聞之、於淵聖前力爭、得旨復遣、而諸將之還已五程矣。雖復再進、猶與金人相及於滹沱河、然將士知朝廷議論二三、悉解體、不復有邀擊之意、第遙護之而已。於是金人復旁出抄掠、及深、祁、恩、冀間、其去殊緩、而粘罕之兵聞已和、果退、如公

言。乃命种師道爲河東、河北宣撫使、駐滑州、而以姚古爲制置使、總兵以援太原、种師中爲制置使、總兵以援中山、河間諸郡。先是、公乞力守三鎮、不可割之議、朝廷僉議以租賦歸之、求保祖宗之地故也。三月、詔以道君迴鑾、命門下侍郎趙野爲奉迎使。初、恭謝行宮所、以都城圍閉、止絕東南遞角、又止東南勤王之師、又令綱運於所在卸納、泗州官吏以聞、朝廷不以爲然、道路籍籍、且言有他故。道君還次南都、欲詣亳州上清宮燒香、及取便道如西都。淵聖憂之、每有御書至、必及朝廷改革政事、又批道君太上皇后當居禁中、出入正門、又批吳敏、李綱令一人來、莫曉聖意。公奏淵聖曰、所以欲臣及吳敏來、無他、欲知朝廷事耳。吳敏不可去、陛下左右、臣願奉迎。如蒙道君賜對、臣且條陳自圍城以來事宜、以釋兩宮之疑、決無他慮。淵聖初不許、公力請之、乃聽、即令齎御書達道君行宮。既



次陳留縣秋口、遇道君太上皇后船、公幄前奏事、太上皇后曰、朝廷欲令於何處居止。公對曰、朝廷見以擷景園爲龍德宮、奉道君太上皇后、蓋遵稟道君十二月二十三日聖旨指揮。道君太上皇后曰、已得旨令居禁中。公對曰、天下大義、惟禮與情、情欲其通而禮所以節文之。以皇帝聖孝、殿下聖慈、母子之情豈復有間。但稽之三從之義、道君居龍德宮而殿下居禁中、於典禮有所未安、朝廷討論、但欲合於典禮以慰天下之望、兩宮安則天下安矣。道君太上皇后曰、朝廷須是措置令是則得。公拜辭登岸、復傳教旨曰、相公所論甚有理。公以前語具劄子奏知、且云道君太上皇后已有許居龍德宮意、願一切不示疑阻、以昭聖孝。抵南都、道君御幄殿、公升殿奏事、具道帝聖孝思慕、欲以天下養之意。道君泣數行下、曰、皇帝仁孝、天下所知。且獎諭曰、都城守禦、宗社再安、相公之力爲多。公

因出劄子、乞道君早回鑾輿、不須詣亳社西都、以慰天下之望。道君慰勞再四、因曰、相公頃爲史官、緣何事去。公對曰、臣昨任左史、得侍清光者幾年、以狂妄論列都城水災、伏蒙聖恩寬斧鉞之誅、迄今感戴。道君曰、當時宰執中有不喜公者。公愧謝、因奏曰、臣昨論水災、實偶有所見、天地之變、各以類應、正爲今日兵革攻圍之兆。災異變故、譬猶一人之身、病在五臟則發於氣色、形於脈息、善醫者能知之。所以聖人觀變於天地而修其在我者、故能制治保邦而無危亂之憂也。道君以爲然、因詢戎騎攻圍、都城守禦次第。公具以實對。道君復曰、敵旣退師、方渡河時、何不邀擊。公曰、朝廷以肅邸在金人軍中、故不許。道君曰、爲宗社計、豈復論此。公於是竊歎道君天度之不可及也。語旣浹洽、道君因宣諭行宮止遞角等三事、只緣都城已受圍、恐爲金人所得、知行宮所在、非有他也。公奏曰、

方艱危時、兩宮隔絕、彼此不相知、雖朝廷應副行宮事、亦不容無不至者、在聖度照之而已。道君因詢朝廷近事、如追贈司馬光及毀拆夾城等凡二十餘事、公逐一解釋、復奏曰、皇帝小心仁孝、惟恐一有不當、道君太上皇帝意者、每得御批詰問、輒憂懼不進膳。臣竊譬之、人家尊長出而以家事付之子弟、偶遇強盜劫掠、須當隨宜措置、爲尊長者正當以能保田園大計慰勞之、不當問其細故。今皇帝傳位之初、陛下巡幸、適當大敵入寇、爲宗社計、政事不得不小有變革。今宗社無虞、四方以寧、陛下回鑾、臣以謂宜有以大慰安皇帝之心者、其他細故、一切勿問可也。道君感悟曰、公言極是。朕只緣性快、問後即便無事。因內出玉帶、金魚袋、古象簡賜公曰、行宮人得公來皆喜、以此慰其意、便可佩服。公固辭不允、因服之以謝。宣諭曰、本欲往亳州太清宮、以道路阻水不果、又欲居西洛、以皇

帝懇請之勤、已降旨揮更不戒行。公先歸達此意、慰安皇帝。因袖中出書付公、仍宣諭曰、公輔助皇帝、扞敵守宗社有大功、若能調和父子間、使無疑阻、當書青史、垂名萬世。公感泣再拜受命、辭訖即行。先具劄子以所得道君聖語奏知。淵聖批答曰、覽卿來奏、知奏對之語、忠義煥然、朕甚嘉之。二十五日、還抵闕下、進呈道君御書、具道所以問答之語。淵聖嘉勞久之。二十七日、宰執進呈車駕出郊迎奉道君儀注、耿南仲建議欲盡屏道君左右內侍、出榜行宮門、敢留者斬、先遣人搜索、然後車駕進見。公以爲不必如此示之以疑。南仲曰、或之者、疑之也。古人於疑有所不免。公曰、古人雖不免於疑、然貴於有所決斷。故書有稽疑、易曰以斷天下之疑、儻疑情不解、如所謂竊鈇者、則爲患不細。南仲紛紛不已。公奏曰、天下之理、誠與疑、明與闇而已。誠則明、明則愈誠、自誠與明推之、可至於堯舜。



疑則聞、聞則愈疑、自疑與聞推之、其患至於有不可勝言。耿南仲當以堯舜之道輔陛下、而其人聞而多疑、所言不足深採。上笑之、南仲怫然怒甚。既退、再召對於睿思殿、南仲忽起奏曰、臣適遇左司諫陳公輔於對班中、公輔乃二月五日爲李綱結士民伏闕者、豈可處諫職。乞送御史臺根治。上及宰相皆愕然。公奏曰、臣適與南仲辯論於延和殿、實爲國事、非有私意、而南仲銜臣之言、故有此奏。伏闕之事、陛下素所鑑察、臣不敢復有所辯。今南仲之言如此、臣豈敢留、願以公輔事送有司、臣得乞身待罪。上笑曰、伏闕士庶以億萬計、如何結約。朕所洞知、卿不須如此。南仲猶不已、公因再拜辭上而出、不復歸府。入劄子求去、章凡十餘上、皆批答封還、不允。道君皇帝以三日入國門、公扈從朝於龍德宮、訖復上章懇請罷知樞密院事、并繳進劄子、以謂今日朝廷方禍亂、收寧之初、正當以

別白是非爲先。廟堂之上、是非不明、何況天下。若以南仲之言爲是、朝廷自當付之有司、根治黨與、誠果有之、臣首當在誅夷之列。若以南仲之言爲非、則當明告中外、洞然曉知、使臣不受黯闇之謗。臣之於此、豈得不辨。必若朝廷重惜大體、欲兩全之、莫若與臣一宮祠、使歸田里。上降手詔數百言、不允。有曰、迺者敵在近郊、士庶伏闕、一朝倉猝、衆數十萬、忠憤所激、不謀同辭、此豈人力也哉。不悅者造言何所不可、故卿不自安、殊不知朕深諒卿之不預知也。復令徐處仁、吳敏諭旨、又召至內殿、面加慰諭、且曰、戎馬方退、正賴卿協濟艱難、前事不足介懷、宜爲朕少留。辭意懇惻、公不得已就職。虜騎出境、公具奏乞用富弼守禦二策、分兵控扼要害之地、又乞修邊備防秋、仍用李邕措置塘泮水櫃等事。批答依奏。又具劄子、乞措置三鎮及詔在廷之臣集議、擇其所長而施行之。於是條具所

以備邊禦敵者凡八事。其一謂以太原、真定、中山、河間建爲藩鎮，又分濱、棣、德、博、建、橫海一道如諸鎮之制。其二謂河北、河東保甲宜專遣使團結訓練，令各置器甲，官爲收掌，用印給之，蠲免租賦以償其直。其三謂復祖宗監牧之制。其四謂河北塘灤不復開濬，又自安肅、廣信以抵西山益增廣，宜專遣使以督治之。其五謂河北、河東州縣城池皆當築城，民有所恃而安。其六謂河北、河東州縣經戎馬殘破蹂踐去處，宜優免租賦以振卹之。其七謂宜復祖宗加抬糧草鈔法，一切以見緡，走商賈而實塞下。其八願復祖宗解鹽舊制。淵聖俾宰執同議，而其間所論異同，公力爭之，不能得。大抵自賊馬旣退，道君還宮之後，朝廷恬然，遂以爲無事，防邊禦寇之策置而不問，公切憂之。惟兵事樞密院可以專行，乃與同知樞密院事許翰議，淵聖前以謂今秋敵必再至，宜預詔天下起兵防秋，爲捍

禦之計。條具將上，得旨頒行，然後關三省。其間猶有以爲不須如此者，公又乞降旨在京許監察御史以上，在外監司郡守帥臣各薦材武智略大小使臣，樞密院籍記姓名，量材錄用，淵聖從之。二十四日，以覃恩轉太中大夫。吳敏建議欲置詳議司，檢詳祖宗法制及近年幣政當改革者，次第施行之，詔以公爲提舉官。命旣行，爲南仲沮止。公奏淵聖曰：陛下即大位於國家艱危之時，宜一新政事，朝廷玩愒，未聞有所變革。近欲置司討論，尋復罷之。今邊事方棘，調度不給，前日爵祿冒濫，耗蠹邦財者，宜稍裁抑以足國用。淵聖以爲然，委公條具以聞。公條上三十餘事，謂如節度使至遙郡刺史，祖宗本以待勳臣，今皆以戚里恩澤得之，除邊功外，宜悉換授環衛官以抑其濫。又三省堂吏，祖宗時轉官止於正郎，崇觀間始許轉至中奉大夫，今宜復祖宗之制。餘皆類此。淵聖深然之，降付三省。



已而揭榜通衢曰、知樞密院事李綱陳請裁減下項。又榜東華門曰、守禦使司給諸軍卸甲錢多寡不均、御前特再行等第支給、而守禦使司初未嘗給卸甲錢也。公聞之驚駭、徐詢所以、乃執政間有密白淵聖、以公得都城軍民之心、欲以此離散之。公始憂懼、不知死所矣。方欲丐罷、五月初、會守禦使司補進武副尉二人、具狀奏知、淵聖批出、有惟辟作福、惟辟作威、大臣專權、浸不可長之語。公惶懼於淵聖前辨明曰、始親征行營及守禦使司得旨一切以便宜行事、給空名文武告勅宣帖等三千餘道、自置司以來用過三十一道而已。此二人乃齎御前蠟書至太原、當時約以得回報即與補授、故今以空名帖補訖奏聞、乃遵上旨、非專權也。且叙孤危之蹤爲人所中傷者非一、願罷職任、乞骸骨以歸田里。淵聖溫顏慰諭、以謂偶批及此、非有他意。公待罪丐去、章十餘上、皆批答不允、遣使

宣押歸府。公翌日見淵聖曰、人主之用人、疑則當勿任、任則當勿疑、而大臣以道事君、不可則止。今陛下惑於人言、於臣不能無疑、又不令臣得去、不知聖意何在。淵聖安慰久之。公自此多在告、日欲去而未能。會种師中歿於軍前、師道以病告歸、執政有密建議以公爲宣撫使代師道者。初、粘罕之師至太原城下、太原堅壁固守、粘罕屯兵圍之、悉破諸縣、爲鑲城法以困太原。姚古進師復隆德府、威勝軍、阨南北關、累出兵、互有勝負、然未能解太原之圍。於是詔种師中由井陘道與姚古犄角、應援太原。師中進次平定軍、乘勝復壽陽、榆次諸縣、不設備、有輕金人之意。又輜重犒賞之物悉留眞定、金人乘間衝突、諸軍以神臂弓射卻之、欲賞射者、吏告不足而罷。士皆憤怒、相與散去。師中爲流矢所中、死之。師道駐滑州、復以老病丐罷。淵聖納議者之說、決意用公、宣撫兩路、督將士解圍。一日

召對、諭所以欲遣行者、公再拜力辭、自陳書生不知兵、在圍城中不得已爲陛下料理兵事、實非所長。今使爲大帥、恐不勝任、且誤國、死不足以塞責。淵聖不許、即命尙書省出勅令面受。公奏曰、藉使臣不量力爲陛下、行亦須擇日受勅、今拜大將如召小兒可乎。淵聖乃許別日受。公退、即移疾乞致任、力陳不可爲大帥、且云此必有建議不容臣於朝者。章十餘上、並批答不允、且督令受命。於是臺諫相繼上言、公不當去朝廷、淵聖皆以爲大臣游說斥去之、乃無敢言者。或謂公曰、公知上所以遣行之意乎、此非爲邊事、乃欲緣此以去公、則都人無辭耳。公堅卧不起、讒者益得以行其說、上且怒、將有杜郵之賜、奈何。公感其言、起受命。淵聖錄裴度傳以賜。公入劄子、具道吳元濟以區區環蔡之地抗唐室、與金人強弱固不相侔、而臣曾不足以望裴度萬分之一。且言、寇攘外患有可掃除之理、

而小人在朝、蠱害本根、浸長難去、其患有不可勝言者、謂宜留神照察、在於攘逐戎狄之先。朝廷旣正、君子道長、則所以扞禦外患者有不難也。今取裴度論元稹、魏洪簡章疏、節其要語、輒塵天聽。淵聖優詔寵答。宣撫司得兵二萬人、分爲五軍。時勝捷兵叛於河北、遣左軍往招撫之、又遣右軍屬宣撫副使劉韜、又以解潛爲制置副使、代姚古、以折彥質爲河東幹當公事、與潛治兵於隆德府。宣撫司見兵實有萬二千人、所得銀絹纔二十萬、期以六月二十二日啓行、而庶事未辦集、乞量展行期。淵聖批曰、遷延不行、豈非拒命。公惶懼、入劄子辨所以未可行者、且曰、陛下前以臣爲專權、今以臣爲拒命、方遣大帥解重圍而以專權拒命之人爲之、無乃不可乎。願併罷樞筦之任、乞骸骨。淵聖趣召數四、公入見、具道所以爲人中傷、致上聽不能無惑者、祇以二月五日士庶伏闕事。今奉命出使、



無緣復望清光。淵聖驚曰、卿只爲朕巡邊、便可還闕。公曰、臣之行、無有復還之理。昔范仲淹、自參知政事、出安撫西邊、過鄭州、見呂夷簡、語暫出之意、夷簡曰、參政豈復可還。其後果然。今臣以愚直、不容於朝、使臣既行之後、無沮難、無謗讒、無錢糧不足之患、則進而死敵、臣之願也。萬有一朝廷執議不堅、臣自度不能有所爲、即須告陛下求代罷去、陛下亦宜察臣孤忠、以全君臣之義。上頗感動、乃以二十五日戒行。前期錫燕於紫宸殿、又賜御筵於瓊林苑、所以賜勞甚渥。公犒軍訖、號令將士、斬裨將焦安節以徇。初、安節隸姚古帳下、在威勝軍、虛傳賊馬且至、安節鼓扇衆情、勸姚古退師。至隆德、又勸遁去。於是兩郡之人皆驚擾潰散、而初無賊馬。至是從姚古還闕、公召斬之人、皆以爲當。翌日進師、以七月初抵河陽。入劄子以畿邑汜水關西都河陽皆形勝之地、城壁頽圯、當亟修治、今雖

晚、然併力爲之、尙可及也。又因望拜諸陵、具奏曰、臣總師道出鞏洛、望拜陵寢、潸然流涕。恭惟祖宗創業守成垂二百年、聖聖傳授、以至陛下、適丁艱難之秋、戎狄內侵、中國勢弱、此誠陛下嘗膽思報、勵精求治之日、願深考祖宗之法、一一推行之。進君子、退小人、無以利口善譎言爲足信、無以小有才未聞君子之大道爲足使、益固邦本、以圖中興、上以慰安九廟之靈、下以爲億兆蒼生之所依賴、天下幸甚。初、公陛辭曰、爲上道唐恪、聶山之爲人、陛下信任之篤、且誤國、故於此申言之。上批答有銘記於懷之語。留河陽十餘日、訓練士卒、修整器甲之屬、進次懷州。自出師後、禁士卒不得擾民、有趕奪婦人釵子者、立斬以徇、拾遺棄物、決脊黥配、逃亡捕獲皆斬、以故軍律嚴肅、無敢犯者。公嘗謂步不勝騎、騎不勝車、於是造車千餘兩、日肄習之、俟防秋之兵集、以謀大舉。而朝廷降旨、凡詔書所

起之兵悉罷滅之。公上疏力爭，大略以謂今河北賊馬出沒，並邊諸郡寨柵相連，兵不少休，太原之圍未解，而河東之勢甚危，秋高馬肥，決須深入，宗社安危殆未可知，故臣輒不自揆，措畫降詔團結防秋之兵，不過十萬人，使一一皆到，果能足用，而無賊馬渡河之警乎？臣被旨出使，去清光之日未幾，朝廷已盡改前日詔書，所團結之兵罷去大半。若謂太原之圍，賊馬不多，不攻自解，則自春徂秋，攻守半年，曾不能得其實數。姚、种二帥以十萬之師，一日皆潰，彼未嘗有所傷衄，不知何以必其兵之不多。今河北、河東州郡日告危急，乞兵皆以三五萬爲言，而半年以來未有一人一騎可以副其求者。防秋之兵甫集，又皆遣罷。若必謂不須動天下之兵而自可無事，則臣誠不足以任此責。陛下胡不遣建議之人代臣，坐致康平，而爲此擾擾也。未報間，再具奏曰：近降指揮，罷防秋之兵，臣所

以深惜此事者，一則河北防秋闕人，恐有疏虞。二則一歲之間再令起兵，又再止之，恐無以示四方大信。夫以軍法勒諸路起兵，而以寸紙罷之，臣恐後時有所號召，無復應者矣。竟不報。淵聖日以御批促解太原之圍，而宣撫副使制置副使、察訪使、幹當公事、都統制皆承受御前處分，事得專達，進退自如。宣撫司雖有節制之名，特具文耳。公奏淵聖，以節制不專，恐誤國事，雖降指揮約束，而承受專達自若也。公極爲淵聖論節制不專之弊，又分路進兵，賊以全力制吾孤軍，不若合大兵由一路進。會范世雄以湖南兵至，即薦爲宣撫判官，方欲會合，親率師以討敵，而朝廷之議又變矣。初，賊騎旣出境，即遣王雲、曹曠使金人軍中，議以三鎮兵民不肯割地，願以租賦代割地之約，至是遣回，有許意，其實以欵我師，非誠言也。朝廷信之，耿南仲、唐恪尤主其議，意謂非歸租賦則割地以賂之，和



藏

議可以決成。乃詔宣撫司不得輕易進兵。而和議之使紛然於路矣。既而徐處仁、吳敏罷相而相唐恪、許翰罷同知樞密院事而進用聶山、陳過庭、李回等。吳敏復以內禪事責授散官、安置涪州。公竊歎曰：事亡可爲者矣。因入表劄奏狀丐罷。初，唐恪謀出公於外，則處仁、敏、翰可以計去之。數人者去，則公亦不能留也。至是皆如其策。章數上，猶降詔批答不允。公具奏道所以材能不勝任者，且得昏憤之疾，不罷決誤國。并叙曩日楊前之語。於是淵聖命种師道以同知樞密院事巡邊，交割宣撫司職事。召公赴闕，且俾沿河巡視防守之具。公連上章乞罷知樞密院事，守本官致仕。九月初，交割宣撫司職事與折彥質。公行至封丘縣，十八日，除觀文殿學士、知揚州。具奏辭免不敢當，且上疏言：所以力丐罷者，非愛身怯敵之故，特事有不可爲者，難以虛受其責。始宣撫司得兵若干，并防秋兵若

干，今屯駐某處，皆不曾用。始朝廷應副銀絹錢若干，又御前降到若干，除支官兵食錢并犒賞外，今皆椿留懷州及在京降賜庫，具有籍可考按也。臣既罷去，恐不知者謂臣喪師費財，惟陛下遣使覈實。雖臣自以不材丐罷，願益擇將帥，撫馭士卒，與之捍敵。金人狡獪，謀慮不淺，和議未可專恃。一失士卒心，無與禦侮，則天下之勢去矣。臣自此不復與國論，敢冒死以聞。既而言者果謂公專主戰議，喪師費財，於是自落職提舉亳州明道宮，責授保靜軍節度副使、建昌軍安置。又以公上疏辨論，謂退有後言，再謫寧江^②。

李綸撰 傳增湘校《梁谿先生文集》附錄

校記

①始：原作「如」，據四庫本《梁谿集》改。

②此句下，原校者有墨筆批曰：「甲子中秋日，聞榆關戰事且發，爲之憂悒。」

宋儒碑傳集卷八十八

李綱

特進觀文殿大學士致仕隴西郡開國公

食邑四千四百戶食實封一千七百戶

贈太師諡忠定李公行狀 中

建炎元年春行次長沙被閏十一月三日指揮復元官除資政殿大學士領開封府事時金寇再犯闕前日以和議爲然者舉皆誤國淵聖感悟故復召公然都城圍閉道路阻絕久之方聞命即率湖南勤王之師入援王室傳元帥府檄方審都城不守二聖播遷號慟幾絕次太平州睹上登寶位赦書悲喜交集是時金陵爲叛卒周德所據囚帥臣殺吏民焚舟船劫官府公即遣使臣齎文檄諭之令聽稟節制勤王乃肯釋甲然桀驁不以時登舟擅驅不當行士卒欲乘間遁去既次金陵因與權安撫使李彌遜謀誅其首惡四十六人而以其徒

千餘人令提舉常平官王枋統之以行因奏表詣行在賀登極且辭領開封之命上書論時事次寶應聞降麻告廷除正議大夫尙書右僕射兼中書侍郎隴西郡開國侯加食邑七百戶食實封三百戶公荷上特達之知感極而繼之以泣行次虹縣始被受尙書省劄子有旨趣召蓋行在前此不知公由江淮以來也次會亭上遣中使王嗣昌傳宣撫問賜銀合茶藥次穀熟御史中丞顏岐遣人投文字封以御史臺印乃論公不當爲相章疏大意謂張邦昌爲金人所喜雖已爲三公郡王宜更加同平章事增重其禮公爲金人所惡雖已命相宜及其未到罷之置之閒地前後凡五章皆不降出故岐封以示公欲公之留外而不進也公乃知命相蓋出於淵衷獨斷而外庭所以沮之者無所不至益以感懼會復遣使趣召遂行有旨賜御筵於金果園龍圖閣學士兼侍讀董耘來傳上旨云嘗



儒藏

遣從事郎劉默齎御書由湖北迓卿書中有學窮天人、忠貫金石、方今生民之命急於倒掛、諒非不世之才何以協濟事功語。公感泣流涕、遂如行在。上遣使趣見、進對於內殿。見上叙致、不覺涕泗之橫流。上亦感動。因奏曰、金人不道、專以詐謀取勝中國。而朝廷不悟、一切墮其計中。自古夷狄之禍中國、未有若此之甚。賴天祐我宋、大命未改、故使陛下總師於外、爲天下臣民之所推戴。興衰撥亂、持危扶顛、內修政事、外攘夷狄、以還二聖、以撫萬邦、皆責在陛下與宰相。而考愼之際、首及微臣、自視闕然、不足以仰副陛下知遇之意。伏望追寢成命。上曰、朕知卿忠義智略甚久、在靖康時宣力爲多、特爲同列所不容、故使卿以非罪去國、而國家有禍故如此。朕嘗欲言於淵聖、欲使夷狄畏服、四方安寧、非相卿不可。今朕此志已定、卿其勿辭。公頓首泣謝、且道董耘所傳聖語、荷知如此、雖糜捐

不足以報德。然臣未到行在數十里間、御史中丞顏岐封示論臣章疏、謂臣爲金人所惡、不當爲相。如臣愚蠢、但知有趙氏、不知有金人、固宜爲其所惡。然岐之論臣、謂材不足以任宰相則可、謂爲金人之所惡不當爲相則不可。臣愚不知其所喜者爲趙氏耶、其所惡者爲趙氏耶。今陛下用臣、斷自淵衷、而岐之論如此。如臣迂疏、自知不足以當重任、但願一望清光、乞身以歸田里、至於陛下命相於金人所喜所惡之間、更望聖慮有以審處於此。上笑曰、岐嘗有此言、朕告之以如朕之立恐亦非金人之所喜者、岐無辭而退。此不足卹。公奏曰、陛下天縱聖明、固不難察此。然臣材力綿薄、實不足以勝任。因出劄子、再拜力辭。上慰諭久之、遣御藥邵成章宣押赴都堂治事。時六月一日也。翌日、有旨立新班奏事、對於內殿。同執政奏事訖、力陳不敢當一相之任。上曰、卿素以忠義自許、豈可於國



家艱危之時而自圖安閒。朕決意用卿。非在今日。社稷生靈賴卿以安。卿其無辭。公感泣再拜曰。臣愚陋無取。不意陛下知臣之深也。然今日之事。持危扶顛。以創業爲法。而圖中興之功。在陛下而不在于臣。昔管仲語桓公曰。不能知人。害霸也。知而不能。用。害霸也。用而不能。任。害霸也。任而不能。信。害霸也。能信而又使小人參之。害霸也。夫知人能信。任之而參以小人。猶足以害霸。況於爲天下而欲建中興之業乎。方靖康之初。淵聖皇帝慨然有圖治之意。而金人退師之後。漸謂無事。是非雜揉。且和且戰。初無定議。如臣者。徒以愚直好論事爲衆人不容於朝。使總兵于外。而又不使之得節制。諸將自度不足以任責。乞身以退。而讒譖竄逐。必欲殺之而後已。賴淵聖察臣孤忠。特保全之。卒復召用。然已無及矣。不謂今日遭遇陛下。龍飛初。無左右先容之助。徒採虛聲。首加識擢。付以宰柄。顧臣

區區。何足以仰副圖任責成之意。然靡不有初。鮮克有終。如臣孤立寡與。更望聖慈。察管仲害霸之言。留神於君子小人之間。使臣得以盡志畢慮。圖報涓埃。雖死無憾。昔唐明皇欲相姚崇。崇以十事要說。皆中一時之病。類多施行。後世美之。臣嘗慕其爲人。今臣亦敢以十事仰干天聽。陛下度其可行者。願賜施行。臣乃敢受命。其未合聖意者。願賜折難。臣得以盡其說。上可之。公因出劄子奏陳。一曰。議國是。大略謂中國之御夷狄。能守而後可戰。能戰而後可和。而靖康之末。皆失之。今欲戰則不足。欲和則不可。莫若自治。專以守爲策。俟吾政事修。士氣振。然後可議大舉。其二曰。議巡幸。大略謂車駕不可不一到京師。見宗廟。以慰都人之心。度未可居。則爲巡幸之計。以天下形勢觀之。長安爲上。襄陽次之。建康又次之。皆當詔有司預爲之備。其三曰。議赦令。大略謂祖宗登極。赦令皆有常式。

前日赦書一切以張邦昌僞赦爲法。如赦惡逆、選人循資責降、罪廢官盡復官職、皆汎濫不可行。謂當改正以法祖宗。其四曰議僭逆。大略謂張邦昌爲國大臣、不能臨難死節、而挾金人之勢、易姓建號、其後不得已乃始奉迎。朝廷尊崇之爲三公郡王、參與大政、非是。宜正典刑、垂戒萬世。其五曰議僞命。大略謂國家更大變故、鮮仗節死義之士、而奉敵旨、受僞官、以屈膝於其庭者、不可勝數。昔肅宗平敵而汙僞命者、以六等定罪。今宜倣之、以勵士風。其六曰議戰。大略謂軍政久廢、士氣怯惰、宜一新紀律、信賞必罰、以作其氣。其七曰議守。大略謂敵情狡獪、必須復來、宜於沿河、江淮措置控禦、以扼其衝。其八曰議本政。大略謂崇觀以來、政出多門、綱紀紊亂、宜一歸之於中書、則朝廷尊。其九曰議久任。大略謂靖康間進退大臣太速、功效蔑著、宜慎擇而久任之、以責成功。其十曰議修德。大

略謂上初膺天命、宜益修孝悌恭儉之德、以副四海之望、而致中興。翌日降出議國是、巡幸、赦令、戰守五劄子。餘皆留中。次日與執政同奏事於內殿。進呈議國是劄子。上曰、今日之策正當如此。以次進呈四劄子奏事訖。公留身奏上曰、臣愚瞽、輒以管見十事冒瀆天聰、已蒙施行五事。如議本政、久任、修德三事、無可施行、自應留中。所有議張邦昌僭逆及受僞命臣寮二事、皆今日刑政之大者、乞早降處分。上曰、執政中有與卿議論不同者、更俟欵曲商量。公曰、張邦昌僭逆之罪顯然明白、無可疑者。當道君朝、邦昌在政府者幾十年、淵聖即位、首擢爲相、奉使虜中。方國家禍難之時、如能以死守節、推明天下所以戴宋之義、以感動其心、虜人未必不悔過而存趙氏。邦昌方自以爲得計、偃然當之、正位號、處宮禁者月有餘日。虜騎旣退、四方勤王之師集。邦昌擅降僞詔以止之、又遣郎官分



使趙野、翁彥國等皆齎空名告數百道以行。迨彥國等囚其使而四方勤王之師日進，邦昌知天下之不與己，不得已乃請元祐太后垂簾聽政而議奉迎。邦昌僭逆本末如此，而議者不同，臣請備論而以春秋之法斷之。若都城之人則謂因邦昌立而得生，且免取再科金銀而德之；若元帥府則謂邦昌不待征討遣使奉迎而恕之，若天下則謂邦昌建號易姓，其奉迎特出於不得已而憤疾之；都城德之、元帥府恕之者，私也；天下憤疾之者，公也。春秋之法，人臣無將，將而必誅。趙盾不討賊，則書以弑君。今邦昌已僭位號，賊退而止勤王之師，非特將與不討敵而已，其罪爲如何？昔劉盆子以宗室當漢室中衰，爲赤眉所立，其後以十萬衆降光武，而光武祇待之以不死。今邦昌以臣易君，其罪大於盆子，不得已以身自歸，朝廷旣不正其罪，而又尊崇之，以爲三公郡王，參國政，此何理也？議者

又謂邦昌能全都城之人與宗廟宮室，不爲無功，而陛下登極緣邦昌之奉迎，臣皆以爲不然。譬之臣之室家偶遭寇盜，主人之戚屬悉爲驅虜，而其僕欲奄家室奴婢而有之，幸主人者有子自外歸，迫於衆議，不得而有，乃欲遂以爲功，其可乎？陛下之立，乃天下臣民之所推戴，邦昌何力之有？臣於劄子中論之詳矣。方國家艱危，陛下欲建中興之業，當先正朝廷，而尊崇僭逆之臣以示四方，其誰不解體？又僞命臣僚一切置而不問，何以厲天下士大夫之節？執政中有議論不同者，乞降旨宣召，臣得與之廷辨。如臣理屈，豈復敢言？上許之，乃令小黃門宣召黃潛善、呂好問、汪伯彥再對。上語之故，而潛善主之甚力，詰難數四，乃屈服，然猶持在遠，不若在近之說。公曰：邦昌當正典刑，何遠近之有？借使在近，當幽繫而反尊崇之如此，何也？潛善不能對。上顧呂好問曰：卿在城中，知其詳，謂當如

何。好問曰、邦昌僭竊位號、人所共知、既已自歸、惟陛下裁處。又引德宗幸奉天、不挾朱泚行、後以爲悔、以附會潛善、不若在近之說。公曰、呂好問援朱泚以爲例、非是。方德宗之狩奉天、朱泚蓋未反也。姜公輔以其得涇軍心、恐資以爲變、請挾以行、德宗不聽、而其後果然。今邦昌已僭逆、豈可使之在朝廷、使道路指目曰、此亦一天子哉。因泣拜曰、臣不可與邦昌同列、正當以笏擊之。陛下必欲用邦昌、第罷臣、勿以爲相、無不可者。上頗感動、而汪伯彥亦曰、李某氣直、臣等不及。上乃曰、卿欲如何措置。公曰、邦昌之罪、理當誅夷、陛下以其嘗自歸、貸其死而遠竄之、受僞命者等第謫降可也。上曰、俟降出卿劄子、來日將上取旨。翌日、同執政進呈、潛善猶左右之、乃以散官安置潭州。次呈議僞劄子、上曰、國家顛覆、士大夫不聞死節、往往因以爲利、如王及之坐蕃衍宅門詬詈諸王、余大均誘取宮

嬪以爲妾、卿知之否。公奏曰、自崇觀以來、朝廷不復敦尚名節、故士大夫鮮廉寡耻、不知君臣之義。靖康之禍、視兩宮播遷如路人然、罕有能仗節死義者。在內惟李若水、在外惟霍安國、死節顯著、餘未有聞。願詔京畿諸路詢訪、優加贈卹。如王及之、余大均、朝廷見付御史臺推鞠、必得其實。臣聞方金人欲廢趙氏、立張邦昌、令吳玠、莫儔傳道意旨、往返數四。王時雍、徐秉哲奉金人旨追捕宗室戚里、令居民結保、不得容隱、以袂聯屬以往、若囚繫然。其後迫道君、東君、后妃、親王出郊、皆臣子之所不忍言。又受僞命、皆爲執政。此四人者、宜爲罪首。上以詢呂好問、好問以爲有之、得旨皆散官。廣南遠惡州軍安置、餘以次謫降。內王及之、余大均、胡俛、陳中等、以賦濫繫御史臺、候結案日取旨。李若水已贈官外、霍安國贈延康殿學士、有死節者、令諸路詢訪以聞。上曰、卿昨日內殿爭張邦昌事、內



侍輩皆泣涕、卿今可以受命矣。公拜謝曰、自非陛下英睿天縱、豈能決斷如此。天下不勝幸甚。臣雖愚陋、敢不黽勉自力、以圖報稱。因爲上言、今日國勢比之創業爲尤難、正賴陛下剛健不息、以至誠惻怛之意加之、不爲群議所動搖、先其大者、急者、而小者、緩者、徐圖之、信任而責成功、臣乃得以竭盡愚慮、以裨補萬一。復奏曰、人主莫大於兼聽廣視、使下情得以上通。陛下即大位已踰月、而檢、鼓院猶未置、恐非所以通下情而急先務者。上曰、屢語執政、猶未措置、卿可即施行。公因請置看詳官兩員、於侍從職事官中選兼、應士民上封事、俟降出簽擬可施行者、將上取旨。有旨兼充御營使、以覃恩告廷、轉正奉大夫、進封開國公、加食邑一千戶、食實封四百戶。時六月六日也。是日同執政對於內殿、公奏上曰、以今日國勢而視靖康間、其不逮遠甚、然而有可爲者、陛下英斷於上、而群臣輯睦於下、庶幾革靖康之風而中興可圖。然今日之事、須有規模而知先後緩急之序。所謂規模者、外禦強敵、內銷盜賊、修軍政、變士風、裕邦財、寬民力、改弊法、省冗官、誠號令以感人心、信賞罰以作士氣、擇帥臣以任方面、選監司郡守以奉行新政、俟吾所以自治者、政事已修、然後可以議興舉而問罪金人、迎還二聖、此規模之大略也。至於所當急而先者、莫先於料理河北、河東兩路。夫河北、河東者、國之屏蔽也。料理稍就、然後中原可保而東南可安。今河東所失者、忻、代、太原、澤、潞、汾、晉、其餘猶存也。河北所失者、不過眞定、懷、衛、濬、四州而已、其餘中山、河間、慶源、保塞、雄、霸、深、祁、思、冀、邢、洺、磁、相、信安、廣信、二十餘郡、皆爲朝廷守。兩路士民兵將、所以戴宋者、其心甚堅、皆推豪傑以爲頭領、多者數萬、少者亦不下萬人。如此知名字者已十數處、朝廷不因此時置司遣使、有以大慰撫之、分兵以

援其危急、臣恐爲金人所困、糧盡力困、坐受其敝。兩路軍民雖懷忠義之心、使救援之兵久而不至、危急無告、必且憤怨朝廷、金人因得撫而用之。皆精兵也。莫若於河北置招撫司、河東置經制司、擇有材略者爲之使、宣諭陛下德意、所以不忍棄兩河於夷狄之意。朝廷應副錢糧告勅、有功者即命以官、其能保全一州、收復一郡、隨其高下以爲節度、防禦、團練使、如唐方鎮之制、使自爲守。非特絕其從敵之心、又可資其力以禦敵。朝廷久遠無北顧之憂、此最今日之先務也。僉議亦頗以爲然。上曰、誰可任此者。公奏曰、陛下儻採用臣策、臣當詢訪其人、續具奏。既退、詢於士大夫間、多謂張所可以招撫河北、傅亮可以經制河東、公亦頗聞其爲人。張所者、山東人、當靖康間爲監察御史、朝廷以金人再犯闕、欲割棄河北、既遣使矣、鐵騎薄城、京師圍閉、所在圍城中、獨上言乞以蠟書募河北兵、

淵聖許之。蠟書至河北、士民皆喜曰、朝廷欲棄我於夷狄、猶有以張察院欲救我而用之乎。應募者凡十七萬人、故所之聲滿河北。部勒既定、會都城破、謀弗果用。上即位於南都、所首至行在、見上、論列且條具應募首領姓名人數、合措置事件以聞。朝廷欲以爲郎官、奉使河北、以董其事、會所以察官上章論黃潛善及兄潛厚姦邪不可用、恐害新政、潛善引去、上留之、乃謫所鳳州團練副使、江州安置、是時公未至行在也。故衆謂招撫河北非所不可。然公以所嘗論潛善之故、頗難之。不得已一日過潛善閣子中、相與欵語曰、前日議置河北招撫司、搜訪殊無人可以承當、獨以張所可用、又以狂妄有言得罪、儻能先國事後私怨、爲古人之所難、不亦美乎。潛善欣然許諾。乃薦之於上、且道潛善意。上悅、有旨借所通直郎、直龍圖閣、充河北招撫使。遣使臣齎劄子召對、摹畫稱旨、錫五品服、內



府賜緡錢百萬、以備募兵半年錢糧、給空名告千餘道、以京畿兵千人爲衛、將佐官屬聽自辟置、一切許以便宜從事。有朝請郎王圭者、眞定府人、眞定府旣破、率衆數萬保西山、屢勝金人。聞上登極、自山寨間道來、其所謀正與朝廷同、能道河北事尤詳。有旨除直秘閣、招撫司參謀官、使佐所。傅亮者、陝西人、以邊功得官、諳練兵事。靖康初至京師、上封事、請以親王爲元帥、治兵於河朔。其冬復有薦者、再召之。亮至而都城已破、率陝右、京西勤王兵三萬人首至城下、屢立功。統御將佐士卒如古人、斬斬整一、無敢犯令者。上即位、亮詣行在、召對、除通直郎、直秘閣。而亮之爲人氣勁言直、議論不能屈折、執政不喜之。除知滑州。滑兩經殘破、無城壁。亮上疏自陳曰、陛下復歸東都則臣能守滑、陛下未歸則臣亦不能守也。執政摘其語、以爲悖傲、不遜、降通判河陽府。公至行在、亮已行、使人召之。

乃來、與語連日、觀其智略氣節、眞可以爲大將者、欲且試之、乃薦於上、以爲河東經制副使、而以觀察使王瓌爲使。瓌亦陝西人、累立邊功、僉謂在武臣中可用者。上宣諭亮前疏中語、公廣上意而奏曰、人臣論事、言不激切、不足以感動人主、激切則近謗訕、故昔之聽言者必察其所以、如果出於謗訕、何所逃罪。至於有所激而云、則必恕之以來讜言。如周昌之對高祖、劉毅之答武帝、皆人之所難堪者、而二主恕之、以其有所激故也。亮之言如此、但欲激陛下以歸京師耳、非有他故。願聖度有以含容之。且人材難得、而將帥之材爲尤難、如亮者今未見其比、異日必能爲朝廷立大功。氣勁言直、乃關陝氣俗之常、不足深責。上乃許如所請、並召對、賜亮五品服、與兵萬人、告勅、銀絹、與川綱之在陝西者、詔京西、陝西漕臣應副糧草、餘如張所已得旨而遣之。初、公建議以料理河北、河東爲所當

先者、適後宮降誕皇子、率執政入賀、公奏上曰、皇子降誕、考祖宗故事當肆赦、陛下登寶位赦已曠蕩、獨遺河北河東而不及勤王之師、天下尙缺望。夫兩路爲朝廷堅守、而赦令不及、人皆謂已棄之、何以慰忠臣義士之心。而勤王之師雖不曾用、在道路半年、擐甲荷戈、冒犯霜雪、亦已勞矣。疾病死亡者不可勝數、恩卹不及、後日復有急難、何以使人。願因今赦該載德意。上嘉納、故皇子赦於二者尤詳。又請降詔褒慰兩路守臣將佐軍民、諭以朝廷措置救援不棄之意。又詔自今有能收復兩路已陷州軍及救解急危、保全一方、功效顯著者、並除本處節度、觀察、防禦、團練、依方鎮法。命使臣齎夏藥徧賜兩河守臣將佐、命樵貨務印造見錢鈔、遣使齎送兩路州郡。命降見錢鈔三百萬貫付河北東路、陝西路漕司、廣羅應副兩路。命起京東路夏稅絹於大名府椿管、川綱、河東衣絹於永興軍

椿管、以待兩路支俵。於是兩路知天子德意、人情翕然。蠟書日至、間有破敵捷報、虜人圍守諸郡者往往抽退。且山^③寨應招撫經制司募者甚衆。而潛善建議、令馬忠將所部兵、會雄州弓箭手李成所募兵凡五萬人、擣虛入界、虜必釋諸郡之圍以自救。公曰、今日士怯兵弱、恐未可深入、莫若使之與張所協力、先復濬衛、懷三州、而眞定可復。潛善堅執其議、上可之。公不欲力爭、乃以忠爲河北經制使、而以張換副之。換者、陝西人、質樸有謀而善戰、其材遠勝於忠。既使副忠、又令與張所相應援、而換亦以公之策爲然。公嘗論京西、河北爲金人盜賊侵犯、有能以死固守而保全一方者、有賊未至而先遁遂失守者、謂宜褒黜。有旨各增一官^④。或與職名、或落職。有許高、許亢者、防河而逃遁、會言者論列、編管嶺南、至南康軍且欲爲變、守倅以便宜誅之而待罪。衆謂擅殺爲非是、公曰、淵聖委高、亢



防河、付以兵將甚衆、賊將至而先走、以鐵騎五百自潁昌趨江南、沿路劫掠、甚於盜賊、朝廷不能正軍法、而一軍壘守倅敢誅之、必健吏也。使後日受命捍敵者知退走而郡縣之吏有敢誅者、其亦少知所戒乎。是當賞。上以爲然、乃命各轉一官。時開封留守闕官、公以爲留守非宗澤不可、力薦之。澤至京師、果能彈壓撫循、軍民畏愛、修治城池樓櫓、不勞而辦、屢出師以挫賊鋒、雖嫉之者深、竟不能易其任也。是時除侍從卿監郎官管職以補班列之闕及召赴行在者多未至、而行在官出自圍城中者多求東南差遣、上命公草詔以戒諭之。其後許翰至、公薦之於上、謂翰外柔內剛、學行純美、謀議明決、宜在左右參決大政。上亦喜其論事、乃以爲尙書右丞。初、汴河上流爲賊所決者數處、閉塞久不合、綱運不通、命都水使者陳求道等措置、凡二十餘日而水復舊、綱運沓來、間撥入京師、米價

始平。又於兩京城外及沿汴至泗增巡檢、商價始通、人情漸復舊。命進奏院邸吏分番赴行在、朝廷差除鏤板傳報外路、增置馬遞鋪、命令始通。綱運入京者還載諸部公案圖籍赴行在、官府始有稽考。蓋行在草創、凡百皆逐一施行措置、悉此類也。又進呈三劄子、一曰募兵、二曰買馬、三曰募民出財以助兵費。上皆以爲然。又議措置控禦、修舉軍政、謂宜於沿河、沿淮、沿江諸路置帥府、要郡、次要郡使帶總管、鈐轄、都監、以寓方鎮之法、許其便宜行事、辟置僚屬將佐以治兵。又命招置新軍及御營司兵、並依新法團結、五人爲伍、伍長以牌書同伍四人姓名。二十五人爲甲、甲正以牌書伍長五人姓名。百人爲隊、隊將以牌書甲正四人姓名。五百人爲部、部將以牌書隊將正副十人姓名。二千五百人爲軍、統制官以牌書部將正副十人姓名。有所呼召、使令按牌以遣、而逃亡死傷皆可周知。

三省、樞密院同置賞功司、置籍以受功狀、三日不檢舉施行者必罰、受賂乞取者行軍法、許人告、遇敵逃潰者斬、因而爲盜賊者誅其家屬。凡軍政申明約束及更改法制者、數十條、皆勅榜通衢、將士觀者皆奮厲。公又奏宜詔諸路州縣以漸修葺城池、繕治器械、有旨依奏。又奏步不足以勝騎、而騎不足以勝車、請以車制頒於京東西、使製造而教閱之。因繪圖進呈、有旨令御營司製造閱習。諸將皆以爲可用、乃頒降兩路、委提刑司總領之。又奏於沿江、沿淮州郡置造戰船、因其俗之所宜、招募水軍、平居許其自便、有故則糾集而用之、逐時教閱、量行激賞、得旨如所請。又詢訪陝西、山東及諸路武臣材略可用者、以備將佐偏裨之用、有旨皆召赴行在。自六月初至是凡四十餘日、措置邊防軍政之類始漸就緒。是時朝廷議遣使金國、公奏上曰、堯舜之道、孝悌而已、孝悌之至可以通於神

明。今陛下以上皇、淵聖遠狩沙漠、食不甘味、寢不安席、思迎還兩宮、致天下養、此孝悌之至、而堯舜之用心也。今日之事、正當枕戈嘗膽、內修政事、外攘夷狄、使刑政修、中國強、則二聖不俟迎請而自歸。不然、使冠蓋相望、卑辭厚禮、朝迎暮請、恐亦無益。今所遣使、但當奉表通問兩宮、致思慕之意可也。上以爲然、命公草表并致書二虜酋、乃以周望、傅雱皆借官爲二聖通問使、齎表及書以往。又奏曰、陛下當艱難時、爲臣民之所欣戴、纂承大統、宜降哀痛之詔、以感動天下。具言金人不道、賴天下士民同心協力、相與扶持保守、以致中興者、按其所言、次第行之、無爲虛文、務施實惠。上乃命公撰擬詔文進呈頒降。又具劄子乞省冗員以節浮費、上命中書條具、乃詔省臺寺監官以繁簡相兼、復開封府官舊制、減學官員額、罷提舉常平司併歸提刑司、罷兩浙、福建市舶司並歸轉運司、復幕職



曹官舊制、非萬戶縣不置丞、罷吏員三分之一。又請以三省堂吏依祖宗法轉官、不得過朝請大夫。初陳乞出官止爲通判、應宰執子弟以恩數帶貼職及待制以上並罷、宰執及見任宮觀待闕未有差遣、京朝官以上俸錢並減三分之一、有旨從之。是時劇賊李昱擾山東、杜用起淮南、李孝忠亂襄陽、皆遣將討平之、其餘降者十餘萬。一日^⑤論及靖康間事、上曰、淵聖勤於政事、省覽章奏有至於終夜不寐、而卒有播遷之禍、何也。公奏曰、淵聖在東宮、令德聞於天下、及即大位、適當國步艱難之時、勤儉有餘而爲小人之所惑、故卒誤大事。人主之職、但能知人、雖不親細務、大功可成。上以爲然。公因論靖康之初、金人犯闕、中國所以應之者得策凡二、道君內禪一也、淵聖固守二也。使其後更得一策、中國可以無事、而和戰兩者皆失之、遂致大故、而夷狄之患至今爲梗。方金人初犯闕、提兵不

過六萬人、旣薄城下、累日攻擊、知都城堅而士卒奮勵、不可攻、則遣使厚有所邀求而請和。臣獻策淵聖、以謂金人之所邀求有可許者、有不可許者、宜遣使者往來欵曲與之商議、俟吾勤王之師旣集、然後與之約、其可與者許之、其不可與者堅執而勿許、則約易成而和可久。當時不以爲然、一切許之、其後果不能如約、遂再入寇、此失其所以和也。勤王之師集於都城四面者三十餘萬、臣獻策淵聖、以謂兵家忌分、宜使節制歸一、用周亞夫困七國之策、以重兵與之相臨、而分兵收復畿邑、使無所得糧、俟其困而擊之、一舉可破。當時不以爲然、置宣撫司、盡以勤王之兵屬之、故姚平仲得先期舉事、而朝廷懲劫寨小衄、不復議兵、敵退又不肯邀擊、遂使金人有輕中國之心、而中國之勢日弱、此失其所以戰也。一失機會、悔不可追。今日機會尤不可失、願陛下以靖康爲鑑、審處而決斷以

應之庶可以成功。上曰：靖康之初能守，而金人再來遂不能守，何也？公奏曰：靖康之初與靖康之末，其勢不同，條目甚多，臣請論其大者。金人初入寇，未知中國虛實，亦無必犯京闕之意，特中國失備，無兵以禦之，故使得渡河以至城下，而粘罕之兵亦失期不至。及其再來，兩路並進，遂有吞噬中國之心。此其不同者一也。靖康之初，賊至城下，不數日間，勤王之兵已集。及其再來，敵已圍城，始以蠟書募天下兵，遂不及事。此其不同者二也。靖康初，賊寨於西北隅，而行營司出兵屯於城外要害之地，四方音問絡繹不絕，勤王之兵既集，賊遂斂兵不敢復出。其後再來，朝廷自決水以渰浸京城西北，瀰漫數十里，而東南不屯一兵，使賊反得以據之。故城中音問不傳於外，而外兵亦不得以進。此其不同者三也。淵聖即位之初，將士奮勵用命，其後賞刑失當，人心稍解體。此其不同者四也。金人

圍城之初，城中置措有叙，號令嚴肅，晝夜循撫，未嘗少休。聞其後無任責者，賊至造橋渡壕，恬不加恤，以十萬人^⑥登城，將士遂潰。此其不同者五也。臣在樞密院時，措置起天下防秋之兵，降詔書已累月，及臣宣撫河北，即詔減罷太半。蓋朝廷專恃和議，以謂金人必不再來，一切不爲之備。故靖康之末不能守者，勢不同而患禍生於所忽也。翌日奏事，因哀聚靖康初建議措置，與金人約和，用兵次第，劄子及朝廷分置宣撫司指揮，後在宣撫司論不當減罷防秋之兵，章疏進呈，上皆命留中。公因奏上曰：靖康間雖號通言路，然臺諫官議論龔峭者皆遠貶，其實塞之也。乃納劄子，勸上以明恕盡人言，以恭儉足國用，以英果斷大事，上皆嘉納。與執政同奏事，因納劄子乞減上供之數，以寬州縣，修茶鹽之法，以通商賈，劃東南官田募民給地，倣弓箭刀弩手法養兵於農，籍陝西保甲，京東西弓



箭社、免支移折變而官教閱之、又請於陝西、河北東路、京東西置制置使、以遠近相應援、有旨皆付中書省條具、進呈取旨。其後遂置諸路制置使、而餘事以公罷政、皆不果行。初、公嘗從容奏上曰、朝廷外則經營措置河北、河東以爲藩籬、葺治軍馬、討平賊盜、內則修政事、明賞刑、皆漸就緒、獨車駕巡幸、所詣未有定所、中外人心未安。夫中原者、天下形勢根本、一去中原則人心搖而形勢傾矣。臣嘗建巡幸之策、以關中爲上、襄陽次之、建康爲下。今縱未能行上策、猶當適襄、鄧間、示不去中原、以係天下之心。近日外議紛紜、皆謂陛下且幸東南。果如所言、臣恐中原非復我有、車駕還闕無期而天下之勢遂傾、難復振矣。上曰、但欲迎奉元祐太后及津遣六宮往東南耳、朕當與卿等獨留中原、訓練將士、益聚兵馬、雖都城可守、雖金人可戰。公再拜贊上曰、陛下英斷如此、乞降詔以告諭之。乃

命公擬撰詔文頒降、榜之兩京、讀者皆感泣。後半月、上忽降出手詔、欲巡幸東南以避狄、令三省樞密院條具合行事件以聞。公極論其不可、且言自古中興之主起於西北則足以據中原而有東南、起於東南則不足以復中原而有西北、蓋天下之精兵健馬皆出於西北、一委中原而棄之、豈惟金人將乘間以擾關輔、盜賊且將蠭起、跨州連邑、陛下雖欲還闕不可得、況治兵勝敵以歸二聖哉。惟南陽光武之所以興、有高山峻嶺可事控扼、有寬城平野可屯重兵。西通關中、可召將士。南通荆湖、巴蜀、可取財貨。東達江淮、可運糧餉。北距三都、可遣救援。暫議駐蹕、自冬徂春、兩河措置就緒、即還汴都、策無出於此者。上乃收還巡幸東南手詔、令與宰執商議。翌日再具劄子、援楚、漢、滎陽、成皋間、曹操、袁紹官渡事、論天下形勢於上前。且曰、今乘舟順流而適東南、固甚安便、但中原安則東南安、

失中原則東南豈能必其無事。一失機會、雖欲保一隅恐亦未易。臣誠不敢任此責。且陛下既已降詔獨留中原、人心悅服、奈何詔墨未乾、失大信於天下。願斷自淵衷、以定大計。上乃許幸南陽、將以秋末冬初擇日啓行、而潛善、伯彥陰以巡幸東南之計動上意、其議頗傳于外。客或謂公曰、士論洵洵、咸謂密有建議者、東幸已決、南陽聊復爾耳、盍且從其議乎。不然、事將變。公曰、天下大計、在此一舉、國之安危存亡、於是乎分、成命已行、儻或改易、吾當以去就爭之。且上英睿、必不爲異議所惑。不然、吾可貪祿保身、虛受天下之責哉。然自是雖未嘗有改議巡幸之命、而初公每因留身奏事、從容論治體、及有所規諫、雖苦言逆耳、上皆嘉納、至是、陳奏當世急務、擬進指揮多不降出、及每批出、改易已行、指揮頗多。公知譖愬之言、其入已深、一日留身奏上曰、臣近日屢煩宸翰改正已行事件、臣

逐一按據辨明、幸蒙聖察、又所進擬措置機務多未蒙降出。顧臣孤拙寡與、獨荷陛下特達之知、忌媚者多、恐陰有譖愬而離間臣者。夫君子、小人、勢不兩立、治亂安危、係其進退、在人主有以察之而已。因出劄子、極論君子、小人之理、以謂臣昨日奏事、論及人主之職在知人、雖堯舜猶以爲難、誠能別白邪正、使君子、小人不至於混殽、然後天下可爲。伏蒙宣諭、知人亦非難事、但考其素行則知之。竊仰聖訓、誠得知人之要。且言疑則當勿任、任則當勿疑、持狐疑之心者、來讒賊之口、願致察於此。上慰諭曰、無此、但朕思慮偶及之耳。其餘章疏見省覽、非晚降出。公拜謝而退。至八月五日、告廷遷公銀青光祿大夫、尙書左僕射、兼門下侍郎、加食邑七百戶、食實封三百戶、而除潛善右僕射、兼中書侍郎。既命兩相、則潛善顯沮張所而罷傅亮、公以去就爭之、遂定進退、雖知墮潛善策中、蓋勢不



得不然也。初、張所既受招撫使之命、建言乞置司北京、候措置就緒即渡河、移司恩冀、以圖收復。而權北京留守張益謙奏招撫司搔擾、不當置司北京、故附潛善、伯彥、相與謀爲此奏、以沮張所而惑上意也。公奏曰、張所畫一乞置司北京、候措置就緒日渡河、今所尙留京師以招集將佐、故未行、不知益謙何以知其搔擾而言不當置司。方時艱危、朝廷欲有所經略、益謙小臣、乃敢非理、公然沮抑、此必有以使之者。上乃令降旨招撫司依畫一置司北京、就緒日疾速渡河、張益謙令分析以聞。既劄下矣、樞密院復以益謙申狀將上取旨、凡千餘言、痛詆招撫司。後數日乃關過尙書省、公始見之、乃以樞密院畫旨并尙書省元降旨揮同將上進呈、與伯彥慙爭於上前。公奏曰、張益謙所奏、尙書省已得旨行下、而樞密院又別取旨痛詆訾之、不過欲與益謙相表裏、以細故而害大計、沮抑張所

耳。沮抑張所、有何所難、致誤國家之大計、將誰任其責。伯彥茫無所對、第云初不知尙書省已降指揮。上乃令樞密院改正、依前降指揮施行。既不得逞、即又爲傅亮之爭。初、王瓊、傅亮既受命爲經制使副、即畫一申朝廷、以謂河東州縣多爲金人所陷沒、至於陝西接連如河中府、解州亦爲所據、與陝府相對、以河東爲界。今經制司所得兵纔及萬人、皆烏合之衆、其間多招安盜賊潰散之兵、未經訓練、拊循難以取勝、乞於陝西置司訓練、措置招募陝西正兵及將家子弟、結連河東山寨豪傑、度州縣可復即復之、可以渡河即乘機進討收復。有旨從之。纔十餘日、樞密院取旨令留守宗澤節制、即日過河。亮申今欲即令過河、無不可者、但河外皆金人界分、本司措置全未就緒、既過河後、何地可爲家計。何處可以得糧。烏合之衆、使復爲金人之所潰散、何自可以得兵。亮等不足惜、第恐有誤

國事。公將上進呈、奏曰、經制司軍旅未集、遽違前議、不恤其措置未辦、集而敵之、使渡河、正所以爲賊餌、不見其利也。且亮等受命而行、纔十餘日、豈可使以爲逗遛、不若只依前降旨、揮爲便。潛善、伯彥執議、聖意頗惑、依違不決者累日。公留身極論其理、具言潛善、伯彥始極力以沮張所、賴聖鑑察之、不得行其志、又極力以沮傅亮。蓋招撫河北、經制河東、皆臣所建明、而張所、傅亮又臣所薦用、力沮二人、乃所以沮臣、使不安其職。臣每見靖康大臣不和之失、凡事未嘗不與潛善、伯彥商議而後行、不期二人乃誤用心如此。如傅亮事理明白、願陛下虛心以觀之、則情狀自見。上曰、俟批出、只令依元降旨、揮於陝府置司。至翌日批出、乃云傅亮兵少不可渡河、可罷經置司、赴行在。公留御批、將上奏曰、臣昨日論傅亮事、已蒙宣諭、俟批出、依元降旨、揮。繼奉御批、乃罷亮經制使、不知聖意所謂。

上曰、亮旣兵少不可渡河、不如且已。公奏曰、臣論傅亮、乞依元降旨、揮、非謂不使之渡河。緣軍旅未集、驅烏合之衆渡河、即成孤軍、必爲金人所潰。此必潛善等以私害公、陰有以熒惑聖聽、欲以沮臣使去耳。聖意必欲罷亮、乞以御批降付潛善施行。臣得乞骸骨歸田里、非敢輕爲去就。更望陛下留神熟思之、使亮不罷、則臣何敢決去。因再拜榻前、上猶慰諭、謂不須如此。公退、聞亮竟罷、乃入表劄求去。上遣御藥宣押赴都堂治事、復入第二表劄、皆批答不允。翌日、遣御藥宣押赴後宮起居、隨宰執奏事訖。公留身、上曰、卿所爭事小、何須便爲去就。公奏曰、人主之職在論一相、宰相之職在薦人材、方今人材以將帥爲急、恐不可謂之小事。儻以爲小、臣以去就爭之、而天意必不可回、臣亦安敢不必去。因再拜榻前、復奏曰、臣以愚忝仰荷睠知、初無左右先容之助、龍飛之初、首命爲相。潛善、伯



彥自以謂有攀附之功、方虛位以召臣、蓋以切齒。及臣至而議論僞楚、建請料理河北河東兩路、車駕巡幸宜留中原、皆與之不同、而獨陛下嘉納聽從、固宜爲其媚嫉、無所不至。臣獨立群枉之中、獨賴陛下察之、得以盡其區區之愚。如傅亮之事、曉然無可疑者、又不蒙聖察、是臣薦進人材不足用、議論國事不足採、其失職大矣、豈敢復任宰相哉。方朝廷承平無事之時、宰相猶可尸祿、今艱難多故之秋、當惜分陰。臣自度終無以當陛下之委任、而副天下之責望、敢久居此以妨賢路哉。且臣嘗建議車駕巡幸不可以去中原、潛善等必以此動搖聖意、故力沮張所、傅亮而去臣。臣東南人、豈不願奉陛下順流東下爲安便哉。顧車駕巡幸實天下人心之所繫、中國形勢之所在、一去中原則後患有不可勝言者、故不敢雷同不說、以誤大事。願陛下以宗社爲心、以生靈爲意、以二聖未還爲念、

留神於此、勿以臣去而其議遂改也。臣仰荷天地之德、雖去左右、豈敢一日忘陛下。不勝犬馬依戀激切之至。因泣辭而退、遂上第三表劄。客或謂公曰、公決於進退、於義得矣、顧讒者不止、將有患禍不測、奈何。公曰、大臣以道事君、不可則止、吾知盡事君之道、不可、則全吾進退之節而已、禍患非所恤也。畏禍患而不去、彼獨不能諷言者詆訾而逐之哉。天下自有公議、此不足慮。翌日降麻告庭、除觀文殿大學士、提舉杭州洞霄宮、加實邑七百戶、食實封三百戶。時八月十八日也。以九月半抵鎮江府、聞辛道宗之兵變於秀州、宿留不行者半月。聞其掠毗陵、焚丹陽、遂以客舟由外江以歸梁谿。而言者又言公遣弟綸與賊通、且傾家貲以犒賊、爲緋巾數千頂與之、朝廷不復究問其實、有旨落職、令鄂州居住。附會時宰者盡形於制詞、讒謗如此、自非上恩保全、有以照見其無他、雖欲處江湖

之善地豈可得而綸亦且死於非辜矣。公荷上知遇付以國事當軸秉鈞纔七十有五而罷。既罷之後張所亦以罪去傅亮辭母病不赴行在而歸陝西招撫經制司皆廢車駕遂東幸而兩河郡縣皆陷於賊金人以次年春擾京東西深入關輔殘破尤甚。凡募兵買馬團結訓練車戰水軍之類一切廢罷。中原盜賊蠭起跨州連邑朝廷不能制率如公之所料也。二年十月有旨謫降官不許同在一州移公澧州居住。會有上書訟公之冤者復有論列。十一月責授單州團練副使移萬安軍安置。三年行次瓊州三日而德音放還任便居住。四年自嶺表訪家鄱陽。未幾挈家還邵武。七月復銀青光祿大夫。紹興元年三月提舉杭州洞霄宮。九月復資政大學士。

李綸撰 《梁谿先生文集》附錄

校記

- ①官：原無，據四庫本《梁谿集》改。
- ②張：原無，今據墨筆旁批補。
- ③山：原作「土」，據四庫本《梁谿集》改。
- ④增一官：右引作「增降兩官」。
- ⑤一日：原無，據墨筆旁批補。
- ⑥十萬人：原作「十數人」，據四庫本《梁谿集》改。
- ⑦「上乃收還」至「宰執商議」，原無，據右引補。

宋儒碑傳集卷八十九

李綱

宋丞相隴西郡開國公贈太師諡忠定李

公行狀下

紹興二年二月八日、除觀文殿學士、充荆湖廣南路宣撫使、兼知潭州。公以憂患之餘、衰病日加、不敢祇受、具奏辭免、且致書宰執、力陳所以不敢當之意。四月七日、內侍于蓋傳宣撫問敦遣、令視上道乃還。公迫不得已、祇受告命。密院差任仕安兵三千人、以二十四日假福州貢院開司。五月六日啓行、有旨就孟庾、韓世忠下撥統制辛企宗、郝晟兩軍、及令見在湖南岳飛、韓京、吳錫、吳全等軍聽受節制。初、荆湖自庚戌春爲金人蹂踐、土賊如鍾相、雷進、楊華、鄧裝、李冬至等各擁數萬之衆、殘破州縣、保據巢穴、東北流移之人相率渡江、州縣不能制御。孔彥舟據潭州、後爲馬友所逐、李宏據岳

州、劉忠寨於江湖兩界、出沒數路、而曹成兵犯郴、衡水道以及二廣、湖南安撫使向子諲爲曹成虜置軍中、民不聊生。韓世忠原留統制官董旼招曹成、成雖受招而焚掠如故。公是時總師由廬陵入本路界、聞曹成將自邵入衡、以趨江西、而董旼所帶親兵纔數百人、勢不足以彈壓、即駐泊衡陽、先遣使臣齎榜約束、令放散驅掠老幼及嚴戢其徒、不得作過。曹成至邵、以公狀申稱放散三萬餘人、尙有四萬。至衡、率頭首百餘赴本司公參、公召與語、且以善言慰撫之、戒以所至不得搔擾、俟出境寧肅、當爲保奏。成感泣聽命、一路遂以無事。曹成旣出境、長沙報馬友之黨頭首步諒等其衆二萬餘人、自筠、袁還犯本路、焚掠醴陵、攸縣、衡山、屯泊於魚集市、放兵四出、人情震動。公乃留統制官韓京屯茶陵、統領陳照屯安人、統領湯尙之及將官白德屯衡州以備賊、公乃親率大軍趨衡山、有獻



儒藏

策者謂自衡山至魚集市三十餘里、隔湘江及茶陵江、凡兩涉水、不若自白沙濟師、即一涉水、白沙在衡州來路、去衡山三十里、去賊壘亦三十餘里、賊無斥堠、必不虞官軍之來、可以得志、公從其言、乃約衡州備舟楫於白沙岸下、駐衡山之次日、遣統制官任仕安、吳錫、王俊率將佐軍馬還自白沙、連夜渡江、凌晨叩賊壘、賊衆初不之覺、倉卒出拒、見官軍徧滿山谷、戈甲旗幟鮮明、知勢不敵、乃降、盡得其輜重、兵仗老小等、並釋器甲、押赴本司公參、先是賊遣四千餘人出掠、欲犯衡、郴諸郡、爲陳照、湯尙之等所遏、公遣使臣齎榜諭以步諒等已降、老小盡在本司存恤、宜早自歸、亦令步諒遣人同往招之、出掠之衆悉還聽命、凡得首領統制統領官十餘人、將佐五十餘人、使臣五百餘人、其衆萬有九千餘人、應江湖間驅虜人并疾病老弱者、並給公據放散、擇強壯精銳得七千餘人、分隸諸

將、既揀汰放散訖、即令精彊者每五百人爲一部、擺拽於湘江灘磧中、公御中軍帳、具軍容、乘高以臨之、諭以爾等皆朝廷赤子、失業至此、良可矜憫、今既歸降、並令與舊軍相雜團結、祇刺手背、應新軍所得財物輜重預行約束、並不得毫髮侵動、本司自以三萬緡及所獲牛畜等犒賞、以故人情安帖、自衡山趨長沙、道中無散逸者、其後措置招降、並皆倣此、入長沙、交割潭州職事、時湖南頻年爲盜賊所據、州縣官類多權攝、乘時爲姦、公於視事日、枷項巨猾付獄、得入己贓凡三萬六千緡、具案上之、其餘州縣權攝官以漸易置、爲民所訴訟者乃按治之、於是望風引退者甚衆、賊吏稍戢矣、方入境之初、趨見長老、問民所疾苦、皆謂所苦者無甚於盜賊與科須、公既措置招捕群盜、而科須之弊一縣至有十萬緡者、公即移檄州縣盡罷科率、非奉使司旨揮而擅科率者以軍法從事、應日前



科須之物並以正賦率折。又荆湘間民戶輸納稅米率四石始了納一石、百姓貧困、仍檄漕司行下州縣、除官耗外不許轉增加升合、以故流移歸業民皆樂輸。是冬長沙頗稔、得稅米四十餘萬石、軍儲遂以足用。方李宏之殺馬友也、王進、王俊以五千餘人遁去、據七星寨、在湘鄉、寧鄉、安化三縣之間、日肆焚掠、一方爲之騷然。公抵長沙之次日、命郝晟出師次七星寨、進以衆三千約降。俊以二千餘人犯安化、及破邵州、新化以逼邵陽、公遣吳錫以其麾下由徑路趨邵陽以討王俊。錫率所部倍道兼程、自潭五日而至邵、王俊之衆去邵纔數十里、而錫兵至、適雪作、錫乘其不備、縱兵掩擊、殺千餘人、生擒俊、餘衆悉降。自是湖南境內潰兵爲盜者悉平、民漸安居、唯江西接境間有出沒如劉超、張成等多者數千人、少者亦不下千數、遂檄江西會合夾擊、且招且捕、節次悉降、揀汰放散外、得精

壯又數千人。郴州土賊鄧裝、彭鐵大、攸縣土賊王順等、分遣韓京等討殺、以故境內悉平。獨湖北楊么者、鍾相餘黨、以左道惑民、據洞庭重湖之險、北達荆南、公安、西及鼎澧、東至岳陽、南抵長沙之湘陰、益陽、周環千里、出沒作過、有衆數萬。於是旋創戰艦、命統領官李進屯湘陰、爲準屯益陽以備之。吳錫屯橋口、破其數寨、么不敢犯。先是、長沙遭兵火、官府之屬尺椽無有、市井蕭然。公留衡陽日、先遣官造州宅、便廳、門廡、堂屋之類。既入城、始及甲杖庫、州官廨舍、兩獄、倉庫等、又造營房六千餘間、民稍歸業、易草舍以瓦屋、城市始就緒。帥府制度日以備具。時有統制官張忠彥者、緣討捕駐軍廣州、脅制州縣、供億以萬計、一路爲之震擾、屢欲爲變、撥隸孟庾、韓世忠、岳飛並不稟命。至是、撥隸公麾下、遣使臣召之、不報。忠彥意樂爲郡、公因檄令權知岳陽、忠彥果來、即械送所司取旨。諸路帥臣

帶宣撫者並罷。公止帶湖南路安撫使。公嘗建議以謂荆湖之地綿數千里、南過二廣、北控襄漢、東接江淮、自昔號爲上流、諸葛亮謂之用武之國。今朝廷保有東南、制御西北、荆湖諸郡如鼎、澧、岳、鄂、連荆南一帶、皆當屯宿重兵、倚爲形勢、使西川之號令可通、襄漢之聲援可接、乃有恢復中原之漸。蓋公之志氣、其素所蓄積也。丐祠得請、乃以節次招降到潰兵盜賊人數、及見管軍馬數、自打造戰船、教習水戰次第、並見在金銀錢物與江西廣南未支撥到錢米之數、逐一具奏即行。二年四月、得旨令省記編類建炎元年三月以後時政記、公乃以昨任宰相日得聖語及所行政事賞刑黜陟之大略、著建炎時政記以進、有旨宣付史館。是冬虜僞入寇、侵犯淮甸、邸報既傳、中外憂憤。公具奏、以今日捍禦賊馬事勢、陳爲三策以獻。其大略曰、今僞齊悉兵南下、其境內必虛。儻命信臣乘此機會、

擣潁昌以臨畿甸、電發霆擊、出其不意、則僞齊必大震懼、呼還醜類、以自營救。王師追躡、必有可勝之理。非惟牽制南牧之兵、亦有恢復中原之兆。此上策也。朝廷或以茲事體大、則鑾輿駐蹕江上、勢須號召上流之兵、順流而下、旌旗金鼓、千里相望、以助聲勢、則敵人雖衆、豈敢南渡。仍詔大將帥其全師進屯淮南要害之地、設奇邀擊、絕其糧道、賊必退遁、保全東南。徐議攻討。此中策也。萬一有借親征之名、爲順動之計、委一二大將捍敵于後、則臣恐車駕既遠、號令不行、賊得乘間深入、州縣望風奔潰、其爲吾患有不可勝言者矣。此最下策也。往歲金人南渡、利在侵掠、既得子女玉帛、而時方暑、則勢必還師。今僞齊使之渡江而南、必謀割據、將何以爲善後之計哉。故今日爲退避之計、則不可、朝廷措置得宜、將士用命、則安知此賊非送死於我。顧一時機會所以應之者如何耳。望降臣章、



與二三大臣熟議之。有旨以公所陳皆今日之急務也。已付三省樞密院施行。降詔獎諭。有卿忠貫神明。慮先著蔡。料敵於千里之外。制勝於三策之語。公既以三策奏陳。時又報韓世忠統全軍於淮。楚間迎擊賊兵。連獲勝捷。有旨令遣臺臣督劉光臣。張俊縱兵渡河應援。車駕已發。進臨江上。撫勞諸軍。公又條奏宜備有四。曰生兵。曰海道。曰上流。曰四川。至於保據淮南。調和諸將。增置禁衛。廣備糧食。措置戰艦。水軍及措置楊么。凡十事。以獻廟堂。五年春。詔問凡今攻戰之利。守備之宜。措置之方。綏懷之略。可悉條具來上。公乃條對以獻。其略曰。議者或謂戎馬既退。當遂用兵爲大舉之計。臣切以爲不然。今朝廷以東南爲根本。儻不先爲自固之計。將何以能萬全勝敵。又況將士暴露之久。財用調度之煩。民力科取之困。謂宜大爲守備。痛自料理。使之蘇息。乃爲得計。議者又謂戎馬既退。

當且保據一隅。以苟目前之安。臣又以爲不然。宜於防守既固。軍政既修之後。即議攻討。乃爲得計。此二者。守備攻戰之序也。至於守備之宜。則當料理荆襄。以爲藩籬。葺理淮南。以爲家計。異時可省經費。爲無窮之利。守備之宜。莫大於是。有守備矣。然後可以議攻戰之利。亦當分責於諸路大帥。謂如淮東之帥。則當責以收復京東東路。淮西之帥。則當責以收復京東西路。荆襄之帥。則當責以收復京西南路。川陝之帥。則當責以收復陝西五路。諸路尅捷。因利乘便。收京畿。復故都。至於臨事制變。不可預圖。願勿失機會而已。若夫措置之方。則臣願駐蹕建康。綏懷之略。則臣願先爲自強之計。大概近年所操之說有二。閒暇則以和議爲得計。而以治兵爲失策。倉猝則以退避爲愛君。而以進禦爲誤國。衆口和之。牢不可破。今天啓宸衷。親臨大敵。逆臣悍敵數十萬衆。潛師宵遁。則和議之

與治兵、退避之與進禦、其效概可觀矣。臣願自今以往不復爲退避之計、可乎。古者敵國善鄰、則有和親、仇讎之邦、鮮復遣使。今使輶往來、邀我以必不敢爲之謀、於吾自治自強之計、動輒相妨。金人二十餘年、以此策破契丹、困中國、曾不知其害。臣願自今以往、勿復遣和議之使、可乎。二說既定、藩方協力、將士用命、雖強敵不足畏、雖逆臣不足憂、特在陛下方寸間耳。臣昧死條上六事：一曰信任輔弼、二曰公選人才、三曰變革士風、四曰愛惜日力、五曰務盡人事、六曰寅畏天戒。反覆論議、幾萬言、皆切中時病。內變革士風、尤爲著明。其略曰：夫用兵之際、似與士風初不相及、然士風淳厚、則論議正、而是非明、朝廷賞罰功罪、當而人心服、士風澆薄、則議論不正、而是非不明、朝廷賞罰功罪、不當而人心不服。晉之士風、尙虛浮而不事事、時措置乖謬、盜賊並起、而有五戎亂華之禍。本朝嘉祐、

治平以前、士風何其淳厚也。自數十年來、非特不事事而已、奔競爭進、議論徇私、邪說利口、足以惑人主之聽。元祐大臣如司馬光之流、皆持正論而群枉嫉之、指爲姦黨。士風遞相倣效、顛倒是非、變亂白黑、政事大壞、以馴致靖康之變。逮今數十年、愛惜之情銷盡、然後朝廷始知元祐群臣之忠、褒贈官秩、錄用子孫、然已何補於事。曷若早變此風、則忠臣無誅謫之冤、國家有治安之實、兩受其利、豈不美哉。臣觀近年士風尤薄、不顧國體、惟欲進身、不覈實事、惟欲傷人、大言則大進、小言則小遷、諂訛成風、此非朝廷之福也。陛下得一張浚、付以重權、使禦強敵於關陝、雖以忠許國、事失機會、不爲無過、言者痛繩醜詆、誣以大惡、豈不太甚歟。浚有浴日之功、足以結陛下之知、有大臣之辯、足以回陛下之聽、故得自洗濯、復侍清光於帷幄之中、然其所傷已多矣。藉使遭謗困讒之臣、無浚之功、



又無大臣之辨白、而有下石以擠之者、則何以自雪於君父、冀察其不然哉。夫朝廷設耳目及獻納論思之官、以廣視聽、固許之以風聞。至於大故、亦須覈實、使果如其言、則誅責所加、豈宜止從輕典。使言而無實、則誣人之罪、伏讒蒐慝、得以中害善良、皆非所以修政也。臣願陛下降明詔、以戒諭士大夫、使體德意、從忠厚、變近年澆薄之風、將見士風淳厚、而中興之業不難致矣。又曰、陛下視建炎以來其所措置是耶非耶、以爲是則何以不見其效、以爲非則安可復蹈其轍。臣前所陳皆改轍之道、非循舊跡所能爲也。擇善而從、斟酌而行、則在陛下、所謂善後之策、何以加之。閏二月、復觀文殿大學士、再任提舉西京嵩山崇福宮。七月十七日、蒙降親筆手詔、以公條具賊退事宜、已施行外、特賜褒諭、有卿首陳三策、適投卻敵之機、繼上六條、大闡興邦之略、意拳拳而曲折、言凜凜而高明、有

發予衷、如對卿語。此乃卿精忠許國、義節表時、雖在燕閒之中、不忘開濟之事之語。十月十六日、除江南西路安撫制置大使、兼知洪州。公兩具辭免、復賜親筆勉公使行。公辭尤力、亦不允、且得旨許赴行在奏事畢之官。六年二月三日、準告兼營田大使。二十四日到國門、翌日內殿引對、上慰勞再四、以已見利害并本路職事再對於內殿。三月一日朝辭、得旨引見上殿、三對之間、所進呈劄子凡十有六、而論中興及金人失信、襄陽形勝與夫和戰朋黨五事、皆利害之大者、其詳具奏疏。有旨令申世景一軍前去洪州駐劄、聽江西安撫制置大使司節制使喚。先是、公以靖康間道君、淵聖所賜御書刻石、因呂祉以示張浚、浚以上聞。至是因蒙宣諭、欲見道君御書真蹟、具奏以進外、又以劄子繳進靖康間奉迎錄、曰、臣靖康初任知樞密院事、被淵聖皇帝旨迎奉道君太上皇帝於南京、蒙道

君賜封、聽納其說、罷幸亳社、西洛、旋歸京師、二聖重歡、四海胥慶。道君察臣之忠、賜以御筆、禮數優異。淵聖察臣之忠、賜以親筆、褒諭再三。而靖康之末、臣既去位、群枉當國、與臣爲仇、顛倒是非、變亂黑白。孫覲因召試中書舍人、作戒勵詔、顯詆臣爲指天畫地、睥睨兩宮、唐恪因令榜於朝堂、士大夫信以爲然、罕有知其實者。銜冤抱憤、順受默闇、不敢自明。伏遇皇帝陛下盛德日躋、大明旁燭、凡臣子之忠於所事而爲回邪之所誣蔽、有跡可考者、悉蒙昭雪、君人之道、孰先於此。臣近嘗以二聖所賜御筆刻之琬琰、蓋欲侈大其賜、因自辨白、以裝成碑本、託給事中臣祉以示右僕射臣浚、遂獲上聞。伏蒙宣諭、欲見道君御筆真蹟、臣已恭依聖訓、具奏繳納外、有臣靖康間編修到奉迎錄并臣進呈劄子二首、徐處仁等表一道、道君御製青詞一首、淵聖御筆宣諭一首、繕寫合成一軸、謹具劄子

繳進。仰塵天聽、伏望聖慈特加睿察。三月六日、得旨送史館。是時朝廷銳意大舉、既遣相臣張浚視師川陝、荆襄、又降制命以韓世忠、岳飛爲京東京西路宣撫使。上嘗面諭公以十數年來訓練士卒、今方可用。公既陛辭以行、因極論所以進兵者、具劄子以奏。大略謂今日主兵者之失、大略有四。兵貴精不貴多、多而不精、反以爲累。陣貴分合、合而不能分、分而不能合、皆非善置陣者。是四者今日諸將之失。願陛下明詔之、使知古人用兵之深意、非小補也。朝廷近來措置恢復、有未盡善者五、有宜預備者三、有當善後者二。何謂有未盡善者五。善制國用者、有生財之道、有節用之法、有救弊之說、有覈實之政、有懋遷之術、有闔闢之權。審此六者、則雖養兵之多、何患乎財用之不足。而朝廷初不留意於此、唯務降官告、給度牒、賣戶帖、理積欠、折帛博糴、預借和買、名雖不同、其取於民一也。此



未盡善者一也。議者謂當因糧於敵。臣以爲敵人聚糧。或有敗北。焚蕩而去。必不使爲我有。若欲取於僞地之民。則官軍抄掠甚於寇盜。有違弔伐之義。失民望而堅從賊之心。非計之得。此未盡善者二也。金人專以鐵騎勝中國。而吾平時不務爲可。以制鐵騎之術。此未盡善者三也。今朝廷與諸路之兵。悉付諸將。外重內輕。緩急何以使之捍患而卻敵哉。此未盡善者四也。臣於陛辭日。竊聞麻制以韓世忠、岳飛爲京東、京西路宣撫使。聖意可謂斷矣。然兵家之事。行詭道。今吾軍初未嘗有其實。而遽以先聲臨之。其可乎。此未盡善者五也。何謂宜預備者三。中軍旣行。宿衛單弱。肘腋之變。不可不虞。此行在不可不預備者一也。江東東西、荆湖南北。兵將盡行。屯戍鮮少。敵人或有乘間擣虛之謀。則將何以待之。此上流不可不預備者二也。海道去京東不遠。乘風而來。一日千里。蘇秀、明、越全

無水軍。則下流不可不預備者三也。何謂善後者二。使王師克捷。能復京東、西地。則當屯以何兵。守以何將。金人來援。當何以待之。兩路之民。懷戴宋之心。堅甚。萬有一得其地而不能守。得其民而不能保。兩路生靈。虛就屠戮。而使兩河之民。絕望於本朝。則恢復之功。難爲力矣。勝猶如此。則所以圖爲善敗之計者。宜如何哉。此當善後者二也。二十三日。至撫州。金谿界。交割本路安撫制置大使職事。是時朝廷以本路旱災。饑民闕食。御筆詔書令帥守監司多方勸誘積米之家。以其食用之餘。盡數出糶。濟此流殍數月之苦。公即條具畫一措置事件具奏。又延見父老。詢問疾苦。乞將災傷路分第三等以下人戶。四年積欠。特與蠲免。又奏乞旋賜本錢十萬貫。以爲營田之本。有旨並依。洪州月支官兵米五十餘碩。料錢六千餘貫。諸縣及泛支在外。而見在米止四碩。餘錢只五百餘貫。公具奏

急闕得旨令都轉運司應副一月。朝廷以財用闕乏、建議欲推行交子之法、公因致書時宰、以謂交子之法初若可行、其後官司皆受其弊、而卒至於不可行、朝廷遂改爲關子。先是降詔以六月乙巳地震、求直言、公應奏陳八事。時虔吉盜賊爲患數路、有旨令公與連南夫、張致遠相度申樞密院。公以謂虔寇巢穴多在江西、福建、廣東三路界首、置立寨柵、爲三窟之計、一處有兵則散往他處、官軍旣退則又復團聚。中間遣發軍馬、不能窮討、正以節制不一之故。若節制歸一、使其不能散逸、且捕且招、威令旣行、則窮寇別無他策、必須自歸、然後結以恩信、使之改過自新。將爲賊首、徒黨桀黠之人盡赴軍前使用、以除後患、此最策之上者。乞與江西路置都統制一員、節制三路軍馬、以招捕虔賊。至於盜賊衰息之後、又須縣令得人、勞心撫字、使作過桀黠之人旣去、良民得以復業、安於田畝、

乃可以化盜區復爲樂土。然虔之諸縣多是烟瘴之地、盜賊出沒不常、朝廷初無賞格、士大夫之有材者多不願就、又難強使之行。欲望朝廷優立賞格、將來辟置知縣、到任半年、盜賊消除、良民復業、選人特與改官、京朝官與轉一官、候任滿日各再轉一官。其賊平定之後、量與蠲免租稅、以前欠負並免催科。庶幾官吏盡心、民庶安業、復有承平之象。得旨並依。初、洪州城池遭金人殘破之後、城壁摧毀、壕塹堙塞、兼地步闊遠、緩急難以防守。嘗有旨令逐路帥司督責州郡、點檢城壁、若城大難以因舊、仰隨宜減蹙。公恭依指揮、相度裁減、畫圖貼說、繳申尙書省、并乞修城。用度旣省、處畫有序、不擾而辨、城高池深、民有所依。是年王師與虜僞相持於淮、泗幾半年、公具奏、以謂自古用兵相持旣久、則非出奇不足以取勝、願速遣得力兵將、自淮南前來、斬黃間、約岳飛兵、以爲犄角、以夾擊之、大



功可成。既而王師屢捷、劉光世、張俊、楊沂中大破僞齊賊馬於淮、淝之上、斬馘擒捕甚衆、殘黨遁歸淮北。公又奏陳利害、大略以謂切見間探所報、僞齊乞兵於虜人頭項頗多、未聞有渡淮西南者、其侵犯淮、淝及光山、六安等處作過、只有李成、孔彥舟叛將簽軍、深慮賊情狡猾、匿重兵於後而以簽軍來嘗我師、若一勝之後、兵驕墮、則爲患有不可勝言者、伏望降詔諸將、益務淬礪、以待大敵。仍命朝廷按圖以視諸路、某路固實當設疑以歛賊兵、某路空虛當增兵以禦侵掠、使江淮之間表裏相資、首尾相應。有旨以公奏陳防秋利害切中事機、降詔獎諭。公再陳己見劄子、願降哀痛之詔、憫將士罹兵革之苦、凡死於戰陳、先加封爵、厚給賻贈、收卹其家、死者褒則生者勸矣。然後明詔統師、審定功狀、俟防冬解嚴、慶賜兼行、其誰曰不然。七年正月、以公賑濟饑民、招還流亡、降詔獎諭。會左司

諫陳公輔以靖康間士庶伏闕、爲人誣其鼓唱、至今猶未辨白、以^①此求去、具奏乞宮觀、謂臣當時遭謗尤甚、雖嘗蒙淵聖皇帝特降詔書宣示四方、而仇怨至今以之藉口。臣以積年往事、不敢復自辨明、至使諫臣援以求去、在臣愚分、其何敢安。降詔不允、訓辭有云、且伏闕之往事、皆不根之浮辭。排邪議以用卿、斷由朕志。守夙心而自信、無恤人言。及車駕將幸建康、公具劄子、乞益修戰守之具、沿淮、漢修築城壘。二月、報徽宗皇帝升遐、寧德皇后上僊、公既奉慰表、又具劄子、乞推廣孝思、益修軍政。二十七日、車駕進發、巡幸建康。三月、公遣本司幹辦公事韓岳奉表起居、又具劄子論建中興之功、大概曰、願陛下益廣聖志、擴而充之、與神爲謀、日新其德、勿以去冬驟勝而自怠、勿以目前粗定而自安。凡可以致中興之治者、無不爲、凡可以害中興之功者、無不去、有所規畫措置、必以天下爲

度必以施於長久、可傳於後世爲法、則中興不難致矣。夫中興之於用兵止是一事、要以修政事、信賞罰、明是非、別邪正、招徠人材、鼓作士氣、愛惜民力、順導衆心爲先。數者既備、則士奮於朝、農安于野、穀粟充盈、財用不匱、將帥輯睦、士卒樂戰、用兵其有不勝者哉。繼進論舉直言極諫之士、乞不必遠召將帥二劄子。四月十六日、有旨以公典藩踰年、民安盜息、寬朕憂顧、宜有褒嘉、可特轉左金紫光祿大夫。六月、上遣中使傳宣撫問、賜夏藥兼銀合茶藥。先是、虔寇以守臣失於撫循、致已受招安、人蠭起爲盜、雖官軍屢捷、賊黨甚衆。公致書宰相、以張譽材術正可任此、所以薦之者甚力。其後朝廷果命譽自鼎移守虔州、招安說諭、並令放散徒黨、赴州公參與免罪犯。八月、諸路大旱、江湖淮浙被害甚廣、公具劄子乞益修政事、以救今日之弊。大略以謂前年江湖閩浙嘗苦大旱、殍路相望。陛

下軫慮之深、親灑宸翰、勸誘賑濟、其所存活不知其幾千萬人。至誠動天、報以休應、曰雨而雨、曰暘而暘、歲大豐穰、民以安樂。自經一稔之後、上下恬嬉、不復勤恤民隱、朝廷百色誅求、上供不以實數、而以虛額、和糴不以本錢、而以關子。絲蠶未生、已督供輸、禾穀未秀、已催裝發。州縣困於轉輸、文移急於星火。官吏愁歎、閭里怨咨。感動天心、旱災復作。然則陛下欲銷弭災異、導迎吉祥、不必他求、但如前日之用心、自然感召和氣、休應立臻。繼旱暵復爲豐年矣。夫今日之患、欲民力寬、則軍食闕矣。欲軍儲裕、則民財匱矣。二者如鐵炭之低昂、此首重則彼尾輕、非有術以權之、使斂不及民、而軍食足、不可得而均也。惟陛下留神邦本、天下幸甚。及探報鄺瓊叛逆、擁淮西全軍、並都督行府、廬州官吏兵民等盡歸僞齊、公具奏指陳朝廷措置失當者五、深可痛惜者五、及鑑前失以圖將來者五、凡



十有五事。且言天地之變不足爲災、人不盡言國之大患。侍從者獻納論思之官也、臺諫者耳目心腹之寄也。今侍從、臺諫以言爲職、類皆毛舉細故以塞責、所論不過簿畫資格、守倅令丞除授之失當、至於國家大計、係社稷之安危、生靈之休戚者、初未嘗聞有一言及之。陛下試察、如淮西之變、侍從、臺諫之臣亦有見危納忠爲陛下言之者乎。大臣懷祿而不敢諫、小臣畏罪而不敢言、此最今日之可憂者。仍具奏以論列淮西叛將事宜、其言指陳朝廷措置失當、但欲納忠於國、情迫言切、必有抵忤、難以復當帥守之寄、乞降旨黜責、或除一外任宮觀。九月、又具奏乞外祠、且以到任以來賑濟饑民、招填軍額、建置營房、修築城池、繕治器甲、增修官府、創蓋倉庫、催發錢糧、招捕盜賊並逐一躬親措置處畫事件、釐爲六狀繳奏。有旨以公奏陳淮西事宜切中事機、降詔獎諭。時張浚旣罷相、外

議皆謂車駕將幸平江、公以謂平江去建康不遠、徒有退避之名、而言者引漢武誅王恢事以爲比、非是、乃復奏陳利害、大略曰、臣切見張浚罷相、言者引漢武誅王恢事以爲比、臣恐智謀之士卷舌而不談兵、忠義之士扼腕而無所發憤、將士解體而不用命、州郡望風而無堅城、陛下將誰與立國哉。伏望陛下堅聖心而勿動、修軍政以自強、無爲趣時獻言者之所搖動。古語曰、臨大難而不懼、聖人之勇也。夫張浚措置失當、誠有罪矣、然其區區徇國之心有可矜者、願少寬假、以責來效。又具奏乞宮祠。十月、被詔書不允、準告以明堂赦恩加食邑五百戶、食實封三百戶。時建康移蹕之謀旣審、公具奏陳車駕不宜輕動利害、大略曰、臣聞自昔用兵以成大業者、必先固人心、作士氣、據地利而不肯先退、盡人事而不肯先屈。是以楚、漢相距於滎陽、成、皋間、高祖雖屢敗、不退尺寸之地。旣割鴻

溝羽引而東、遂有垓下之亡。曹操、袁紹戰於官渡、操雖兵弱糧乏、苟或止其退師。既焚紹輜重、紹引而歸、遂喪河北。由是觀之、今日之事、豈可因一叛將之故、望風怯敵、遽自退屈。果出此謀、六飛回馭之後、人情動搖、莫有固志、士氣銷縮、莫有鬪心。我退彼進、使戎馬南渡、得一邑則守一邑、得一州則守一州、得一路則守一路、亂臣賊子、黠吏姦氓、從而附之、虎踞鴟張、雖欲如前日返駕還轅、復立朝廷於荆棘瓦礫之中、不可得也。借使虜騎衝突、不得已權宜避之、猶爲有說。今幸疆場未有警急之報、兵將無不利之失、朝廷止可懲往事、修軍政、審號令、明賞刑、益務固守、而遽爲此擾擾、棄前功、蹈後患、以自趨於禍敗、豈不重可惜哉。臣故曰車駕不宜輕動、靜以鎮之者也。又具防冬畫一事件奏請、方欲俟報措置間、而以論列淮西、言及臺諫、遂犯臺諫之怒、竟以言者之故、檢會累乞宮觀奏章、

提舉臨安府洞霄宮。時未有代者、懲靖康之故、且以本司積蓄財穀之數申奏。既而除端明殿學士、李光爲代、公貽書具言所以措置之意。八年正月、還次長樂。是冬以王倫使事、具劄子奏陳、大略曰、臣竊見朝廷遣王倫使金國、奉迎梓宮、往返屢矣。今倫之歸、與虜使偕、乃以江南詔諭爲名、不著國號而曰江南、不云通問而曰詔諭、此何禮也。臣請試爲陛下言之。金人毀宗社、逼二聖、而陛下應天順人、光復舊業。自我視彼、則仇讎也。自彼視我、則腹心之疾也。豈復有可和之理。然而朝廷遣使通問、冠蓋相望於道、卑詞厚幣、無所愛惜者、正以二聖在其域中、爲親屈己、不得已而然、猶有說也。至去年春、兩宮凶問既至、遣使以迎梓宮、亟往遄返、初不得其要約。今倫使事、初以奉迎梓宮爲指、而虜使之來、乃以江南詔諭爲名。循名責實、已自乖戾、則其所以罔朝廷而生後患者、不待詰而可知。



臣在遠方、不足以知其曲折、然以愚意料之、虜此名以遣使、其邀求大略有五、必降詔書、欲陛下屈體降禮以聽受、一也。必有赦文、欲朝廷宣布頒示郡縣、二也。必立約束、欲陛下奉藩稱臣、稟其號令、三也。必求歲賂、廣其數目、使我坐困、四也。必求割地、以江爲界、淮南、荆襄、四川盡欲得之、五也。此五者、朝廷從其一則大事去矣。金人變詐不測、貪婪無厭、縱使聽其詔令、奉藩稱臣、其志猶未已也。必繼有號召、或使親迎梓宮、或使單車入覲、或使移易將相、或改革政事、或竭取賦稅、或朘削土宇。從之則無有紀極、一不從則前功盡廢、反爲兵端。以謂權時之宜、聽其邀求、可以無後悔者、非愚則誣也。使國家之勢單弱、果不足以自振、不得已而爲此、固亦無可奈何。今土宇之廣猶半天下、臣民之心戴宋不忘、與有識者謀之、尙足以有爲、豈可忘祖宗之大業、生靈之屬望、弗慮弗圖、遽自屈服、祈

哀乞憐、冀延旦暮之命哉。臣願陛下特留聖意、且勿輕許、深詔群臣、講明利害、可以久長之策、擇其善者而從之。疏奏、雖與衆論不合、上不以爲忤。嘗降玉音、謂宰執曰、大臣當如此矣。九年二月、除知潭州、荆湖南路安撫大使。公累具辭免、悉降詔不允。又具奏力辭、曰、臣迂疏無周身之術、動致煩言。今者罷自江西、爲日未久、又蒙湔洗、畀以帥權。昔漢文帝聞季布賢、召之、旣而罷歸。布曰、陛下以一人譽召臣、一人毀去臣、臣恐天下有識者有以窺陛下也。顧臣區區、進退如雙鳬、隻雁之去來、何足少多。然數年之間、亟奮亟躡、上累陛下知人任使之明、實有繫於國體。有旨以公累具奏陳、可依所請、依舊提舉臨安府洞霄宮、仍降詔示不欲重違之意。十年正月十一日、中使徐珣傳宣撫問。初、公之叔弟經博學多識、公所以期之者甚遠、不幸早世、公悼恨不能自己。適上元日、具家饌致祭、公撫

几號慟、不勝手足之痛、倉卒感疾、是日薨於叔弟之居。除特進致仕、特贈少師、官其親族十人、命公之仲弟維自浙東提點刑獄移閩部、以營葬事。公命相曰、合得支賜銀絹、方時艱難、國用正闕、力辭不受、至是給還及依條給賜賻贈、以爲葬事之費。三省樞密院遣官致祭、所以存恤者甚厚。是年十二月十四日、葬於福州懷安縣桐口大家山之原。十三年、以長子儀之升朝、遇郊祀恩、贈太保。十六年、再贈太傅。公娶鄱陽張氏、故直龍圖閣、贈左金紫光祿大夫根之女、故資政殿大學士、會稽郡公黃公履之外孫、累封越國夫人、以長子進封魯國太夫人。後公十二年薨。子男八人、長曰儀之、右奉議郎、主管南外敦宗院、後公九年卒。次曰資之、右宣教郎、主管台州崇道觀、後公十一年卒。次曰集之、右通直郎、新差充福建路提點刑獄司幹辦公事。次曰潤之、早卒。次曰望之、早卒。次曰茂之、後公

百餘日卒。次曰秀之、右宣義郎、新差充福建路轉運司幹辦公事。次曰申之、女七人、長早卒。次適右宣教郎、前福建路轉運司主管文字黃訥。次曰住、早卒。次曰惠、早卒。次適右從政郎、福建路安撫司準備差遣張坦。次適進士范端贇。次許嫁右承務郎、監潭州南嶽廟常祿。孫男九人、長曰震、右承務郎、監潭州南嶽廟。次曰泰、右承務郎、後公十年卒。次曰升、右承務郎。次曰晉、右承務郎。次曰蒙、次曰同、次曰謙、次曰需、次曰頤。孫女六人、長適進士鄒煜、早卒。次適右宣義郎、通判溫州軍州事呂虛己。次適進士張蒙。次適右迪功郎、新德安府司戶參軍余永弼。次許嫁將仕郎、傅伯高、餘尙幼。公資父事君、移孝爲忠、一心^④不忘、所以爲天下國家者、誠意所至、是非利害、煥然明白、直道而行、無毫髮自爲心。所爲所言、合於往古、驗於方來、天下之人信之如蓍龜、仰之如太山北斗、名動夷貊、沉於華夏、



受知三朝、以身之用舍爲社稷生民安危。其所論列、無非天下大計、勤勤懇懇、古人所謂慟哭流涕、長太息者、其事未足道也。自爲御史、一對而罷。旣爲識者之所推與、至以左史論暴水遠謫閩嶠、故老前輩莫不爲之咨嗟歎服、固以任天下之重期之。去國七年、賜環未幾、虜騎果至、宛若疇昔巨浸之環都城。爰從庶僚建大策、畫長算、外捍黠敵、內釋群疑、雖小人共朝、所以摧沮敗壞者無所不至。然而卒全都城、安宗社、使黠虜引而北歸、惟淵聖能用公於倉卒之際故也。道直則身危、功高則謗多、群姦方以公去位爲得計、而國家之事有不可勝諱者矣。嗚呼、此天耶、其人耶。聖主嗣興、公膺爰立之拜、制書遐布、懽喜一辭。公所以爲上處畫者、規模宏遠矣。同列害成、少日竟罷、讒言巧詆、人爲寒心。惟聖主察其精忠、每躡輒起。忠言嘉謨、遇事憤發、中心精微、罔不展盡、感激深切、不復顧身、其

挺挺之節如此。然且時被褒嘉之寵命、非公莫之能言、非聖主莫之能用也。與公深交、間有見其奏議者、必且爲之涕下沾襟。閒居無事、一話一言、未嘗不在國家也。迨將薨謝、爲綸論天下事、且以比者奏疏爲言、悵然久之。言猶在耳、起奠叔兄、一慟而絕。嗚呼、痛心之極、豈特爲吾家也哉。昔韓魏公稱司馬溫公大忠大義、充塞天地、橫絕古今、但當與有志之士同有執鞭之願。使魏公尙在、覩公之所爲所守、則其所稱道將如何耶。公於諸弟友愛旣篤、相知尤深、嘗有國士之稱、然而未始效世俗相推挽也。紹興七年郊祀恩、當奏子、公之子未官者三人、乃以仲兄之子琳之名聞。至叔兄不幸、悼其無子、欲以茂之爲之嗣、事有齟齬、抱恨遽終。嗚呼痛哉、可以興百世之下矣。而綸之不肖無狀、蒙公之所以愛憐者、蓋蔑以加。未薨半月、抱送幼子、殆預識去期、聞者驚歎。方先衛公無恙時、每欲於

邵武置義莊以贖宗族、有志未就、公晚年乃決意成之、遠邇懽欣、非獨被惠者懷感也。公平生交游皆一時名士、其所薦進不可勝言、故有聞其名稱、初未識面、而既蒙引拔者矣。然而與其進不保其往、既而以怨報德、負公蓋多、而公未始以此怠於待士也。陳少陽平生未始識面、其慕公之誠、至爲公死、而公每以謂幽冥之間、痛此良友。若少陽與公、真不媿古人矣。若乃放意山林、昆弟朋友、把酒賦詩、談笑酬唱、動盈卷軸。每有奏議、下筆數千言、俄頃而就。蓋公平日以愛君憂國爲心、籌畫計策、胸中素定、故遇事成章如是之易也。晚於易尤有所得、著易傳內篇十卷、外篇十二卷、其言微妙、有深長之味、頗取卦變互體爲說、動有所稽、異於今世君子之所辨釋。又著論語詳說十卷、所以發明聖賢之意甚備、而文章、歌詩、奏議凡百有餘卷。其在政府帥閫、紀一時之事、則有靖康傳信錄、奉迎

錄、建炎時政記、建炎進退志、建炎制詔表劄集、宣撫荆廣記、制置江右錄。惟公勲在王室、德在生民、至忠大節、孝誠友愛、罔不具備、雖身或不用、用或不久、其光明傑出、故已如此。而薨謝有年、未克銘諸幽宮、是敢輒狀公之行事、有求於大君子。惟其文辭鄙拙、無叙次之能、不足以發揚公之盛德、不勝媿懼。謹狀。紹興二十六年六月、右奉議郎、通判洪州軍州、主管學事、賜緋魚袋弟綸狀。

李綸撰 《梁谿先生文集》附錄

校記

①以：原無，據四庫本《梁谿集》補。

②咨：原作「吞」，據右引改。

③將仕郎：原作「將任郎」，據右引改。

④一心：原作「心心」，據右引改。



宋儒碑傳集卷九十

胡舜陟 張綱

胡待制舜陟傳

胡待制舜陟字汝明、績溪人。自幼端重。登大觀三年上舍第、調山陰簿。歷會州、秀州教授、改宣教郎、爲睦親宅宗子博士、繇御史臺檢法官、遷監察御史。丁母憂、免喪、遷故職。當靖康初、金帥驟至、中外多事、舜陟建議依祖宗法、許六察官言事。於是極言軍國利病、無所隱、爲上所信。嘗面諭曰、有事盡言、不得觀望。自此五日一對、率漏下五刻。嘗奏言、今日威令未振、是非糾紛、四郊多壘、驕將跋扈、大臣無同寅協恭之誼、小吏有徇私背公之風、罪大者傳經典、惡同者其罰異、勞未見而賞驟至、過已著而任愈隆。及言橫恩有可奪、苟賤有宜去、及治道先後緩急之序、因勸上以乾剛獨斷。上竦然曰、斯言深救朕失、非卿忠直、安得聞。進殿中侍御史。

俄監秋試、進士或謂宰相吳敏方時多事、正藉臺評、何故令胡殿中入試院。敏曰、且教汝明閉口一月。拜侍御史、面賜緋魚、又賜文犀帶。王雲使北還、欲假名號車服恭進以求和。舜陟言、敵國方強、何畏而欲解、一墮其計、不可悔。尋議遣康王出使、舜陟又言、肅王出質不反、當以爲戒。未幾、兵壓境上、獨召舜陟問曰、卿嘗以和議爲不可信、今果然矣、將奈何。舜陟對曰、今日二策、在於守河。大臣之議、惟欲守城、則爲失計。退陳備禦之術、且言若宰執得人、則國家可保。章下三省、宰執怒、擬下遷光祿、上不許。金師薄青城而軍、舜陟言、聞康王在河北、人服其忠義、乞多遣蠟書、以爲元帥、募武勇來援。乃遣秦仔等八人、以大元帥命王。衆議進金帛求和。舜陟奉詔督索、以言抗之、被鞭瀕死。僞楚立、病中貽以書、勸速歸政。元祐皇后又請后留勤王兵、邀還二聖、其詞甚切、仍乞降詔迎立康王。於是太



上即位于南京、以瘡痍丐去、除秘閣修撰、知廬州。方淮西盜賊充斥、舜陟奏復帥府於廬州、增築東西水門、糾合鄉民爲巡社、首招巨寇劉文舜、高勝、命以官、以其徒爲部曲。自是諸郡有警、即檄之、無不辦。張遇自濠州奄至梁縣、舜陟使毀竹里橋、伏兵河西、遇半濟、伏弩發、駭走。孫琦來圍城、索糧不答、而時出兵擊其鈔掠者。琦嘗環城而觀、怪寂無人聲。及聞喏如雷、且垂燈照塹、四壁如一、驚嘆而遁。丁進攻光州、劉正彥討之、至廬而進已去。舜陟止之于外。正彥欲取廬卒以自益、又不與。正彥不勝忿、聞於朝、舜陟亦劾其有異意。明年、正彥果作亂、其黨范瓊焚掠壽春、遣五騎來責餉、舜陟叱斬其四、留一還報、且戒諸郡無給食、陰發卒尾之、瓊卷甲南去、率誅死。是時淮西八州唯廬按堵、邦人立祠生事之。積功再遷官、加集英殿修撰。居三歲、上疏言願以所部將兵、民兵合劉文舜兵、無慮二

萬、及於本道招惡少年亦二萬人、將之以北當敵、必爭之地、望許臣躬上方略。詔曰、胡舜陟議論慷慨、請兵督戰、以徇國家之急、除徽猷閣待制、淮西制置使、趣入覲。舜陟見上、抗言方今搢紳皆謂國勢未易振、故兵備弛、而土宇侵、自古未聞有專務退避而能立國者。惟陛下堅意不屈、效漢高之必戰、以起士心。上嘉嘆之。會杜充以宰相宣撫淮南、而制置司罷、徙舜陟提領水軍沿江措置使。俄知建康府、兼措置水軍使。充猶未去、以殺人爲威、至遣將擅入公帑取經制錢、舜陟爭之、不得、自劾改兩浙宣撫司參謀官。周望以宣撫使守平江、不修備、舜陟議不見納、乃自爲奏、乞分兵前途控禦。言者以爭進爲罪、降右文殿修撰。舜陟復說、望移軍扼吳江、兵過則以舟數千傍擊之、可以取勝不用。及兵過江、舜陟私遣裨將陳思恭以小舟數百自太湖出抄之。會有焚舟內應者、所獲不貲。俄提舉

江州太平觀擢知臨安府、奏罷和買絹十萬、鐵三萬、牛驢鹿皮二千、新城豪徐權出力捕殺羣盜、盜有得逸者、妄訴其殺平民、幾償死。舜陟一問得情、誅盜而釋、豪閭府稱快。未幾、丁父憂。紹興初、詔奪服、乘驛赴行在、以故職宣諭京淮湖北、與時相議不合、謝歸。二年、起復、知江州、兼沿江安撫使。時新經李成之禍、止存空壘。舜陟修城訓兵、他日劉忠至城下、聞有備去。已而還待制職、爲廬壽等州安撫使。先是、舜陟去後、州遭殘破、守者武人、責官逋在民者數萬甚急、又託繕卒令市販輸金、至則蠲罷之、招集流散、官爲築室貸種、簡集鄉兵、威聲甚震。僞齊豪帥王彥充遣其弟谷求欵附、舜陟將與之約、併力取劉豫、會議和乃止。後知靜江府、兼廣西經略、聽訟率盡辰漏、庭中肅然。海寇周聰及東寇陳旺相繼奔軼、聰犯高化等三州、旺軼入雷境、舜陟以爲難、與入海爭利、命將嚴守津岸、使不得登。聰無水可飲、而食且盡、轉泊南恩、乞降於東路。旺尋亦就縛。自國家南狩、增市戰馬於橫山諸蕃、而馬政未立。舜陟爲定規畫、置官立務、謹火印、減役呼、所買比常歲贏四倍。南丹州獠莫公晟命知南丹、桀黠不受敕、結獠人入暴省地。舜陟揭榜諸洞、募能擒斬者、以其官爵貲產畀之、又益以錢鹽萬計。獠人動心、公晟屏跡。時以爲胡公一榜、賢於兵數萬。尋奉祠歸。後二年、又起知靜江府。宜章巨寇駱科自稱鎮東王、爲湖廣之害者十五歲、詔舜陟節制三路兵討之。即日趨賀州、擣李松、科挺身降、引兵揜其柵、所向披靡。舜陟從江華出桂陽、時他軍已散、獨與本道二千人俱、而賊處處屯結、舜陟拔郭振於囚隸、使爲先鋒、深躡臨武洞中、五戰皆捷、降馘萬計、振自是進用。至秉節鉞、世以爲知人。舜陟卒、年六十一、州人爲罷市、醵金致祭、飾西山故生祠、歲時享之。始舜陟既貴、父尙在、嘗以當

賜五品服回授焉。弟舜申、舜舉既仕、乃與約、悉以租產畀弟之在家者。曰舜俞雅好讀書、多所論著。晚號三山老人、有奏議文集、論語義、孔子編年、詠古詩、師律陣圖藏于家。舜申後歷官舒州通判、舜舉登進士第、知建昌軍、南劍州。乾道中、舜陟季子仰爲太府丞、輪對、以舜陟所論江淮事進呈、上語仰曰、豈非欽宗朝作臺諫者乎。朕觀實錄、惟卿父奏疏甚多。仰今以直秘閣提舉湖南常平云。

羅願撰 《新安文獻志》卷七八

故資政殿學士左通議大夫丹陽郡開國公食邑二千二百戶食實封一百戶致仕贈左光祿大夫張公行狀

曾祖俊、贈太子少保、妣朱氏、贈普安郡夫人。祖祺、贈太子少傅、妣王氏、贈齊安郡夫人。父翺、任右朝議大夫致仕、贈少保、妣李氏、贈榮國夫人。公諱綱、字彥正、姓張氏。其源出於姬姓黃帝之後、青陽氏

第五子揮爲弓正、始制弓矢、子孫因賜姓焉。周宣王有卿士張仲、其後裔事晉爲大夫。至唐支派漸廣、世居河朔、有官于潤者、遂家金壇。曰銑、上柱國、曰連、主揚州六合簿、寶應、貞元制書具存。南唐李氏考定其書、以其家爲是邦衣冠之裔。公自叙譜牒、載本末甚詳。由高祖、王父而下、皆晦迹、以德行稱鄉里。逮公登二府、三代贈官保傅、榮及九族矣。公幼而穎悟、沈厚寡言。始入小學、與群兒伍、特不好弄。鄉先生授以經史、一覽輒不忘。由是日記數千百言、衆咸駭服。父少保喜曰、張氏種德積善、後世必有大吾閭者、其在此兒乎。十歲能屬文、出語不凡、同舍生歛衽畏避。時少保之子唯公一人、公晝則幹蠱、夜則讀書、積日累月、身脩學成、猶未忍離親側、少保屢勉之。年二十始入縣庠、居無何、試藝優長、升補泮宮。方舍法盛行、游學之士肩袂摩屬、公偉然傑出、冠於諸生、郡將尙書俞公桌一見



藏

異之期以公輔。大觀四年，褒然爲舉首，貢入辟雍，繼升太學。方是時，承平日久，京都以侈靡相尙，士之不悅紛華盛麗者十無一二，公獨深居簡出，潛心大業，至不知飢渴寒暑。流輩初易之，久而見其志趣益篤，問學益精，每群試輒處上游，乃更推服。質問疑義，或摳衣就弟子列。四方人士聚於成均，無慮數千人，語學行之懿，必以公爲稱首。政和三年，試內舍第一。明年，以優等較定試上舍，主文尙書張克公見公程文，稱歎不已，謂邃於經術，遂復擢爲第一。是年四月七日，天子御崇政殿，賜上舍及第，釋褐授承事郎。玉音宣諭，張綱係三中首選，可特除太學官。臚傳旣下，在廷歎仰，蓋一時異恩，前此所未有也。宰相蔡京與張克公不協，故特抑之。後數月，始除辟雍正。當時好事者，以本朝衣冠盛事編次爲圖，載公三魁之美，搢紳榮之。五年，除國子正。蔡京方用事，必欲使天下士盡出其門。朋

附之徒，有朝處奧渫而暮躋華要者，唯公守正不阿。初賜第，旅進一見而已，絕迹不再往。京以公爲時第一流人，意欲羅入己黨，頻遣所親致委曲，且曰：「倘能屈意相從，簪橐可立致。」公曰：「富貴在天，蔡氏其如予何？」京聞其語，大銜之。徽宗皇帝屢欲擢用公，京但於學官中時一改除，勉從上意爾。公久在學校，諸儒敬服，旣橫經上庠，以師道自任，循循訓迪，卒歲忘倦。六年八月，除辟雍博士。一日忽有旨召對便殿，公自謂起疏遠，荷聖主特達之知，思竭忠言，冀以感悟淵聽。旣見上，首論朝廷用人，當分別邪正，以謂方今之患，在於君子小人混淆而莫辨。陛下倘奮乾剛，擴離明，詢之以言，試之以事，稽諸古訓，格以僉言，則邪正不啻黑白之易見。不然，將恐小人得志，無所忌憚，或苟且以害成，或邀功而生事，其禍有不可勝言者。又論奢侈之弊，以謂民之化上捷於令，陛下履豐亨豫大之期，固常



憂風俗侈靡而下戒飭之詔矣。然而背本趨末、日甚一日、流蕩而不返、臣愚以謂陛下不率之以躬行之教、未見其能革也。陛下誠能以祖宗躬行之教爲法、其不合於祖宗者一切去之、則天下雖大、有不難化者。公儀貌端偉、音吐洪暢、所言切中時病、上爲之改容嘉納、獎諭數四。除秘書省校書郎、蔡黨聞之大怒、益欲逐公而未有間也。七年、磨勘轉宣教郎。明年、竟爲蔡氏所擠、韓駒、張忭輩凡與公厚善者二十一人俱在遣中、得主管成都府玉局觀以歸。宣和二年五月、依元豐法、罷宮觀。八月、磨勘轉奉議郎。三年閏五月、再除秘書省校書郎、兼脩國朝會要。明年、兼校正御前文字。上方崇儒重道、博彙群書、公洞貫九流、多識奇字、校讎天祿、是正魚魯、功實多焉。朝廷議遣童貫、蔡攸宣撫朔方、公上疏極論不可出師之狀、且引易大君有命、開國承家、小人勿用、必致亂邦之語、書奏、爲持權

者沮格不報。公憤惋久之。繼傳郭藥師歸順、蕭后納款、收復燕山、捷音踵至、在朝莫不相慶、唯公憂懼益深、至忘寢食。暨遭靖康之變、人皆謂公有先見之明。十二月、除著作佐郎。五年八月、入尙書省爲屯田員外郎。十一月、磨勘轉承議郎。初、王黼秉政、威權浸專、公惡其爲人、雖同僚以職事見、公亦託疾不往。周旋數年間、竟不識黼之面、黼憾之。公在職年餘、徽宗皇帝一日取班籍指公名謂黼曰、此人馳譽文場、行實相稱、可與除近上差遣。黼設辭障蔽、竟不得遷。七年六月、改司勳員外郎。九月、磨勘轉朝奉郎。十二月、北虜渝平、兵及畿甸、公夙夜憂憤、謂所親四方、今國步阽危、吾處下僚、不獲與聞朝論、然苟有可以效節者、不敢不勉。乃爲書與父母訣、獨留老卒、垂二繩於梁間、曰、都城脫有不免、與其辱於犬羊之手、不若就死於此。於是乘城晝夜守禦四十餘日。既解嚴、有旨登城及一月

例遷一官、公曰、主憂臣辱、義則當然、顧可因此以幸賞邪。卒不自言。靖康元年三月、遇欽宗皇帝登寶位、覃恩轉朝散郎。是時少保榮國以公久在圍城中、音問不通、積憂成疾。公得家問、即上章丐祠、於是以公爲兩浙路提點刑獄公事。陛辭之日、上宣諭曰、朕知卿不阿權貴、操守方嚴、故授卿此職、切宜爲朕愛恤百姓。公頓首受詔。還家方浹旬、復被召赴闕。大臣傳上旨、欲除公橫楊、公方迎醫就養、籲天有請、辭甚哀切。欽宗皇帝雅知公無兼侍、特可其奏。及聞二聖北狩、張邦昌僭竊、遂棄簪紱、移病告老。忽傳太上皇帝踐祚於南京、詔至之日、公病立愈、自陳乞就職、時浙憲已別差王詡矣。建炎元年、遇太上皇帝登寶位、覃恩轉朝請郎。駕幸維揚、降旨召公赴行在所、公以二親垂老力辭、遂再除兩浙提點刑獄公事。四年七月、復除司勳員外郎、公又固辭、乃還浙憲。紹興元年、磨勘轉朝奉

大夫。二年、改除江東提刑。是時戎馬初息、民力未蘇、公到官、撫摩凋瘵、惠恤鰥寡、屬吏之贓污不法、怠不舉職者、悉按劾無少貸。諸郡詳覆具獄、躬親省閱、必以情、刑名或不當、駁正之、吏以舞文抵罪、與夫民有冤而獲伸者、非一。自中原俶擾、士庶或盡室嬰禍、事既定、往往立子爲繼、而於法不合、承絕家財產、坐此牒訴紛然。公具奏、乞將已絕命繼之人視出嫁女等法、量許分給。又鋪兵依條不許別役、而無立定罪名、公乃乞比巡附轄使臣私役法一等科罪、今皆著令、實自公發之。凡州縣事有未便、及民所願欲而未獲者、皆罷行之、不可概舉。統兵官王進駐池州、凶暴放肆、凌蔑州郡、有曹官以小事忤進、遂釘其手於門。上聞其事、詔公體究。時國勢未安、諸將皆有輕朝廷心。公到池陽、進擁鐵騎數百、突至輅車之前、衆頗失色。公不爲禮、入傳舍、廉問得實、立進數責之、進叩頭伏罪、自是不



復越紀律。公巡歷所部、訪民疾苦、未嘗休息。迄冬、奔馳道路、居鄱陽公廨止數十日而已。凡爲民去害、建利、唯恐不至。席未及暖、而江東九州無違梗、吏斂手不敢爲非。公在任、及所過州郡、餽送絲毫、不受。下車之初、廨舍所列器皿、謂之併淨、例皆一新。公即令公帑緘封、以俟後政。所用唯隨行瓦木之器。比去、悉以所緘封者揭於榜。歎曰、民之困弊、未有甚於此時、而有司供帳、視承平不少減。吾忍用之哉。至今士大夫相與語廉節者、多舉公此事爲師法。太上皇帝方銳意於治、二千石刺史之賢否靡不周知。一日顧宰臣、盛稱江東最績、遂以左司召。公入對、極論天下之事。上擊節稱賞、有大用之意。公又言監司守臣數易之弊、及州縣獄囚瘐死、吏無考課法。上嘉納之。三年正月、兼中書門下省檢正諸房公事。二月、除起居舍人。是時北虜漸退、川陝屢捷、公恐中外苟安、上疏乞益嚴邊備、又

乞舉行仁宗皇帝故事、諸路帥守替日、各令條列利害五事以上、畫一具奏、後皆施行。五月、除中書舍人。公文思敏贍、凡得詞頭、即時具草、未嘗稽留。方多事時、書命填委、公灑翰泉涌、事辭俱稱、玉音稱獎、謂比年詞臣、鮮能及之。自擾攘以來、史筆未修、雖詔論譔、而秘省權輕、關會稽失。公建言、乞依祖宗故實、委大臣兼領史事。即日詔宰臣呂頤浩兼修國史。至今遂爲定制。北虜初議和、朝廷數遣使、而虜情叵測。廷臣以預選爲憂、公獨奮然請行。大臣以公姓名進。上曰、張某親老、且詞命正有所賴、朕將委以北門之任矣。公聞之感泣。未幾、榮國病甚、乞外。詞章十餘上、不許。遂賜告迎侍還鄉。繼被旨趣歸甚峻。是冬還朝供職。四年正月、兼詳定一司敕令、尋除給事中。公由江東憲蒙召擢、不二年間、致身法從、自以遭時遇主、古人所難、知無不言、未嘗有分毫顧望意。是時獻言者交章公車、每

付給舍看詳。公曰：祖宗成憲具在，患不能舉行，捨是而一切紛更，何益？自非卓然可用，皆報罷。或挾勢以強公，卒莫能得。大將有以軍中田產乞不起稅爲言者，朝廷欲從其請，公毅然以爲不可。先是推恩元祐黨籍子孫，許其自陳，一時有司失於限制，來者不止。公建議以崇寧初年所定碑刻九十八人爲正。又軍興以來，小人乘時召亂，經涉五年而仇怨告訐，連蔓不已。公上言乞截日蔽囚，後有告者勿受，庶以廣好生之德。事即施行，而潭帥申請委曾焚劫爲首之人，請論如法。公復奏駁，上卒從公議。是時所在狴犴填溢，一旦釋遣，皆洗然自新爲良民矣。公又論舉將帥、修戰艦、淮南官冗、軍糧闕乏、科敷弓料、私置稅場及宿衛單寡等，皆一時急務。舊法應庶官至中大夫止，若太中大夫非侍從不遷，謂之止法。宗室有特旨轉行太中者，公因此上言。崇寧、大觀以來，士風不競，叨官竊寵，不

循資序，遂至國紀大壞。陛下慨然念治，將欲大變其俗，故前日冒濫之人，大者追奪，小者審量，有識之士方竊欣幸，以爲自是遵守祖宗之法。今乃復違舊章，超遷官秩，臣所未諭。上聞公言，即寢其命。宣政大臣有上遺表章復官推恩者，公力疏其諂諛誤國之罪以駁之。舊相或以生計自言，乞借撥官田，公引子產辭邑事以告於上。貴戚近侍，凡所干求，苟涉僥幸，一切奏罷之，人皆服公不畏強禦。公在省闈二年，凡命令有不當，輒封還，詆斥權貴，盡言切直，無所回避。風采振一時，上亦知公忠赤，屢見褒美。人以公居閒恂恂，似不能言者，而臨事慷慨如此，益知所蘊蓄與常人殊。因爲之語曰：張公論事有回天之力，今信然矣。張俊以宣撫使屯江上，遣營卒持書至江州瑞昌縣，卒怙俊勢，見令踞視，出慢語，且與獄囚有疑似之迹，令郭彥參械繫之，俊訴於朝，彥參坐免官。公言：近時州縣之吏，



多曲意迎合、獻諛當路、至不隨流俗、能爲陛下奉法遵職者蓋寡。如彥參者謂宜有以崇獎之、今乃坐免、何以爲剛直之勸。時俊典領重兵、專制閩外、朝廷每務優假、駁疏既上、在列駭愕、權要有爲俊地者、公由是不能自安、俄解職提舉江州太平觀、朝野無不惜其去。五年二月、除徽猷閣待制。七年三月、再任於江州太平觀。初、少保以公恩封位至五品、公既奉祠歸養、備盡子職。每歲時燕集、或賓客過從、公腰金侍立、捧觴上壽、鄉人以爲榮。是年六月、少保卒、公執喪哀戚甚、勺飲不入口、杖乃能行、人謂曾閔不過也。九年九月、外除、十月、差提舉亳州明道宮。十一年四月、轉左朝散大夫。公自轉正郎、以朝廷多故、十載不叙年勞、至是有司始檢舉焉。十二年至十四年、凡兩請奉祠、皆提舉亳州明道宮。十一月、磨勘轉左朝請大夫。十六年、丁榮國夫人憂。方強仕時、每念親闈無手足之助、暮年

乃克躬色難之養、溫清甘旨、未嘗廢離。及榮國寢疾、公屏去家事、專務醫藥、衣不解帶者累月、居喪哀癯不自勝、執禮逾於少壯。十九年三月服闋、五月、差提舉江州太平興國宮。二十年、轉左朝議大夫。二十一年八月、再任提舉江州太平興國宮。二十三年、公生七十年矣、遂引年辭祿。十二月得請、轉左中奉大夫、依前徽猷閣待制致仕。公任司勳郎官日、秦檜以酬賞事屬公、公據法以爲不可、檜甚怨之。及檜當國、公絕不與通問。一日、檜謂公舅氏李朝正侍郎曰、張夕拜正而不他、吾所心服、闕不聞問、鄙我也。李移書道其語、公不答。閱歲、檜數溫前語、色頗厲、朝正復相告、檜方專權、睚眦必報、大臣誅殺流竄者踵相躡、士大夫重足一迹、日虞禍及。公得朝正書曰、吾已無救於世矣、京黼尙不爲之屈、況檜乎。檜由此益怒、至是乃祈謝事、以卒素志。二十五年十月、檜死、太上皇帝躬覽萬幾、圖

任舊人共政。不閱月、召公落致仕、赴行在所、制曰、七十而歸政、古之道也。古之人亦惟曰無以事勸耆老云耳、然至於壽考康寧、抱道懷德、而諳練治體者、則賜之几杖、乞言詢事、不懈夙夜、安有聽其引年而去、不知寶貴如我今者。具官某、時之耆傑、朕所體貌、給事東臺、迨茲二紀、而凜然風聲、猶著搢紳之間。不爲朕留、以老自請、亦既許之矣。載惟老臣之居國、譬如合抱之喬木、封植成材、豈一日積。知材不顧人、謂朕何。是用起之丘園、引對便殿、使朕不失貪賢之美、而卿有不忘君之忠、豈不休哉。安車肯來、副我虛佇。公以老疾爲辭、詔不允、促行甚亟、公不得已就道。都人以公年耆望重、久間復出、夾道聚觀、爭先睹之爲快。衛士之舊人識公者、更相告語、咨嗟歎息之聲、洋溢朝路。公對便殿、太上皇帝喜見顏間、曰、卿閒居已二十二年矣、前屢趣卿者、正欲速聞讜言耳。首問當今治道之所

先公敷奏甚悉、因論比年公道不行之弊、亟蒙睿獎、對數刻乃罷。即日除吏部侍郎。方是時、盡逐秦黨、號召天下、名德之士咸處班列。不數月間、自執政至侍從、臺諫、多公門人、如魏良臣、周葵、湯鵬舉、凌哲、皆公昔所論薦。一時服公知人之明、且歎其爲當今舊德也。秦檜當軸二十年、士大夫不登其門者幾人、唯公七任宮祠、退藏密深、未嘗以一毫干之、而檜亦不少假借。比公再登禁塗、秦門舊客、各欲詭脫蹤跡、往往極口談檜之惡、而公反不出一語。或問之、公曰、今之因革、惟公道是從、豈以譏諂求勝哉。由是更服公德量之不可及也。十二月、兼給事中。二十六年、兼侍講。初講詩關雎一篇、因后妃淑女之事、歷陳文王用人以致規諫之意。上褒諭再三、且曰、久不聞卿博雅之言、今日所講、析禮詳明、深啓朕意。公乃奏、比年舉子、鮮知經術、宜令詞賦之士、兼隸一經、如紹興十四年故事、庶免



偏廢之患。上深然之。明年省試畢。事遂施行。尋權工部侍郎。二月。權吏部尙書。自祖宗以來。立公私贓罪三等之法。以戢貪殘之政。暨秦檜爲相。復增民事一條。凡麗於民事。永不得注親民差遣。公曰。守倅令佐。親民之官。苟有所犯。未有非民事者。錮人聖世。豈不重可惜哉。亟奏罷之。公晨入坐曹。事無大小。必躬自鈎考。發擿按治。吏無所容其姦。士大夫希恩雪罪。有數十年不決者。公悉以法訂正。可與者即奏與之。因進故事。極言銷金之費。異時論事榻前。上復以此爲問。公口陳爲患甚大。宜速禁止。遂下詔如公言。三月。再轉左中奉大夫。五月。大金賀生辰。使敬嗣暉入境。詔公館伴。既接見。嗣暉謂其副曰。我自幼聞此公姓名。今尙在邪。由是執禮甚恭。故事。觀潮浙江。坐定潮至。嗣暉舉前輩詩數十首以問。公應答如響。中使入奏。上喜甚。及事畢。褒寵異於常時。蓋嗣暉在虜中。號知書。虜以

秦檜死。選擇而使之。欲以覘吾國。知公德望素著。辯論不可屈。故卒禮而去。無或違者。會彗出東方。詔士庶實封陳言。其間貪競之徒。以權貴人死。意朝廷必欲盡變其所施設。故其言不擇是非。雜然並進。公亟上疏。謂求言不可不廣。聽言不可不察。舉而行之。尤不可不審。蓋恐疏遠之人。銳於納忠。有強出新意。而致衝改祖宗舊法者。有取便一時而行之。既久。不能無害者。有貪蠲復之名。而不以用度較之。致州縣不免暗取於民者。上曰。數日來。朝臣獻言多矣。唯卿所陳之言。獨合朕意。大臣用心正當如此。明日宰執奏事。上宣諭此語。知公才堪丞弼。遂除公中大夫。參知政事。公入謝。因奏。臣待罪政府。不欲令子弟仕於朝。乞罷男堅。國子簿見任。上曰。卿深鑒權臣私親之弊。首變前轍。朕甚嘉之。特依所乞。厥後大臣爲子弟引嫌。丐罷者。相繼有請。遂以爲例。初。秦檜久擅政柄。以嚴刑峻法。

鉗天下之口、太上皇帝慨然總覽、盡去苛刻之政、自爾詔令之下、無非寬恤民力。公建意以頒降重複、官吏奉行不虔、恐民庶不能通知、乃令有司看詳、取其切於利民者、得八十餘事、止標大意及降旨月日、其間繁文一切削去。奏乞鏤版、宣布中外、仍令州縣揭諸粉壁。於是天下曉然、皆知吾君之德意矣。公在政府、孜孜庶務、憂國如家、錢穀甲兵之問、或至廟堂、必爲之竭慮經畫、至通夕不寐。幸而得之、則翌日以告丞相、俾奏行焉。未嘗自以爲功。而上亦深知士大夫無辜被罪、竄斥遠方、有未還恩數者。公奏事上前、便便言不已、每蒙開納。薦舉人才、必參公論、皆曰賢矣、然後剡章。兩省侍從由公延譽而被擢用之人甚衆。公未嘗語人、而其人亦卒不知爲公所薦也。公自參機政、天下事多所建明、更化以來、所以維持紀綱法度、可以數百年猶蒙其功者、公實有力焉。至二十七年九月、公

謂家人曰、吾貳政已期年、衰疾豈可久妨賢路。宜出裝、吾丐歸矣。乃夜奏、遲明懷至漏舍、示同列、遂留身乞辭機政。上驚曰、卿在政府、宣力甚多、方切倚毗、豈當捨朕而去。確然不許。公既退、即挈家屬出私第、示必不可留。相繼章四五上、累降詔遣中使宣押、恩禮備至、公力懇不已。上已知公去意甚決、曰、卿先朝老臣、出處皆可觀、今之求去、蓋欲全進退之節、豈可以朕故令卿有不滿意。然觀筋力尙壯、尙爲朕卧理一政。而公又懇辭。上曰、比年執政無善罷者、卿之行可謂勇退矣。且大臣去國、自有體貌、此不可辭。拊勞久之、除公資政殿學士、知婺州。陛辭之日、上復與公極論異日爲治之要、已而曰、舊德去朝、相見無日。因顰蹙不懌。公再拜謝恩。既下殿、復宣坐、賜茶、慰免加厚。公至浙江亭、將登舟、忽中使馳至、賜御札一封、通犀帶一條、天語丁寧、備極恩寵、縉紳歆艷、以爲近世創見也。是日、



宰執侍從下至百執事悉會江亭叙別冠蓋相望、填溢阡陌、都人縱觀、或繪爲圖、以比漢之二疏云。公至婺州、布宣天子德澤、爲政務簡易、存大體、至於事干休戚、則必反覆詳審、而不敢忽。一方之民、初未識公、徒以公名德之重、更相戒飭、勿犯公法。自郡丞以至諸邑官吏、翕然奔走率職、曰、豈可復以猥瑣上累我公神明。公以獄者人命所係、尤所加意、每錄重囚、必使升階立坐隅、親加臨問、察其辭色、多得其情。洎事之初、有大辟囚以疑奏、讞得旨杖脊流配、當決日、引囚出、則癰瘡若病者、公命減杖數之半。僚吏皆曰、此敕斷也、不可。公曰、主上寬仁好生、哀矜庶獄、某嘗親聞聖訓、今此囚旣以疑故宥其生矣、脫或斃於杖下、則如勿讞。人主欲生一人、而郡守乃殺之、尚可謂之承流化宣乎。衆莫敢言。本州歲以綾羅輸內庫、自紹興以來、逋負重積、前官以屬官禁、不敢丐免、有司督責嚴甚、公

具奏一切蠲除之。又乞增大禮買羅之直、民皆被其賜。公在郡祿令之外、一錢不受、或以謂例所當得、前後相承、莫有廢者、公曰、吾顧法如何、未聞以例從事也。食指猥衆、用度不足、至質錢以自給、飭內外非飲食日用之物、不得輒市於民。婺出羅帛、家人欲一見且不可。仲春勸耕、例攜妓樂、公悉屏去。燈夕出游、吏以故事告、公亦罷之。政務便民、安靜不擾、數月之間、郡以大治。公曰、可以休矣。遂再辭祿。明年三月、命下、依前資政殿學士、轉左中大夫致仕。即日西歸、資裝無浙東一物、盡以錫賚之餘、分給親族之貧者。致仕官暨使臣合得俸祿悉罷去、不請曰、吾平生食君之祿多矣、豈可復更尸素。吏輩役於私室、難以費蠹餽廩、寧自給之食。築亭池上、名曰喜歸。公自號華陽老人。日與親舊游息其間、又作詩以叙喜歸之情。一時名士賡和盈軸。公遭遇累朝、晚年蒙太上皇帝擢與機政、眷遇

優渥、雖一飯之間、未嘗忘感戴之意、晨起必注香上祝千萬歲。每戒子孫曰、吾老矣、不能上報國恩、汝曹其勉之。至被疾、猶諄諄道此語、人皆謂公發於至誠而然。二十九年七月、以其子堅該恩叙封、轉左通議大夫。三十一年、太上皇帝巡幸建康、出京口、公扶病朝行宮。是時虜踐淮甸、王師到屯江滸。上見公、慰勞周悉、因語時事、且曰、卿在政府時、屢講募兵之議、有司措置失當、今遂乏用。公奏述江淮形勢、乞寬聖慮。上問公體力增損、授以藥方、仍述脩養之法、恩意欵密、人皆屬目焉。主上登極、首訪公安否。明年十一月、召公赴闕、公具奏力陳兩經致仕、衰病難支。上察其由衷、詔曰、張綱一時老成、朕所渴見、已令趣召、乃以耄老爲辭、重違雅志、可從所請。令所在州軍常加存問、仍賜羊酒。郡守備禮、委縣令入公里致詔、特異之恩、一時鮮儷。世以爲寵。乾道二年正月、感微疾、踰月、疾良已。甲

午之夕、與家人笑語如平時、遽命取水浴體、浴畢安卧、三問夜如何、至二鼓忽舉手加額、三叩齒、遂薨於正寢。三日而歛、手足和柔、膚革如生。享年八十有四。官左通議大夫、職資政殿學士、爵丹陽郡開國公、食邑二千二百戶、實封一百戶。遺奏上聞、天子嗟悼、輟視朝一日、詔贈左光祿大夫、恤典皆如式。公始以經術大儒爲上舍第一、釋褐即官上庠、自正至博士凡三遷。時鼓箏踵堂、閭閻秩秩、盛於唐漢。公講論經旨、研窮理窟、人人渙然冰釋。五經尤精于書、每因講解、著爲義說、皆探微索隱、倫類通貫。嘗疾夫絺繪揣合以應故事、故其言無一不與聖人契。既卒業、遂成一書、凡三十卷、世號張氏書解。自是後學潛心此經者、爭傳誦之。諸家之說、雖充棟汗牛、束之高閣矣。公在三館、于未見之書、無不讀、聞見日益博洽。雖位通顯、未嘗一日廢卷。晚年披閱稍倦、則命子孫讀于前、而卧聽之。議



儒藏

論常出諸儒意表、人有得其警歎之餘、皆抄錄藏去。其爲文雄深雅健、粹然一出于正。代言西掖、綽有典誥之風、奏議詳明、直而不訐、實近世文章之宗伯也。平生著述、有華陽集四十卷、六經辨疑五卷、確論十卷、告猷集三卷、聞見錄五卷、瀛州唱和八卷。靖康建炎間、遭兵火焚掠、煨燼之餘、所存無幾。公純誠直亮、稟于天性、自布衣至貴顯、操守奉養不少異。氣貌嚴正、雖燕處無惰容。未嘗姑息、而人親之、未嘗暴怒、而人畏之。交游盡天下名士、推薦人才、先德行後文藝、卒皆通顯。大抵不喜沽名、常曰、中庸之爲德、其至矣乎。捨是而要一時之譽、吾弗能也。召節屢頒、皆出簡記、貴倖近習、無一相識者。其愛君憂國、出于天資、每從容上前、必以進君子退小人、信號令明賞罰爲言。尤小心恭謹、避權遠勢、退朝未嘗與人言奏對之語。疏狀稍干機密者、往往削藁不留、以故忠謀讜議、人亦莫能盡

知也。宣政間在京師、二姦相繼弄權、氣燄熏灼、士類不能改其操。紹興中、退而里居二十餘年、當國之人復視之如仇讎、不能害。暮年遇合、遂入政府、守法任職、親舊未嘗敢干以私。急流勇退、再辭榮祿、全名高節、爛然獨著。公嘗書座右曰、以直道行己、以正色立朝、以靜退高天下、是三者人之大節、不可違也。吾雖不才、反身而誠、亦庶幾焉。其子以是刻諸石。觀其言可見公用捨行藏素定久矣。公事親至孝、承顏順志、雖古人有所不及。親沒、追慕白首不少衰。時祭如見其享、忌日號哭如初喪、人言及親、未嘗不垂涕也。初祖母齊安夫人在堂、奉事尤謹。政和七年、公正室新安夫人徐氏以宗祀恩當受封邑、公乃以回授祖母。宣和七年、再乞回授、遂封太安人。紹興元年、公以正郎初遇郊、當任子、以叔父汝弼爲少保所友愛、遂奏乞先補叔父、被旨特許。既秉政、得謝而歸、許上其子若孫三人、

公自念吾白屋起家、備位二府、皆先世遺澤、而群從猶布衣、安得愬然忘之、遂剡章乞官、其堂弟曰絢、堂姪曰基、曰圭。未幾基亡、復以郊恩官、基之弟塾。公載念曾祖後猶有未仕者、又以郊恩官、其從姪鉞。自叔父以下、由公而仕者凡六人。公媚適溧陽進士談思文、實榮國所鍾愛、復奏補甥、將仕郎。公始輟妻之封及祖母、輟子之祿及叔父、輟孫之官及群從甥姪。至薨沒時、曾孫數人皆未官。嗚呼、非孝義過人、安能若此。建炎初、六飛南渡、江浙雲擾、公侍二親奔竄山谷、鄉鄰之避寇者、知公所、在、爭趨附之、曰、此公純德孝行、可以動天、天必佑之、冀賴餘庇以免。由是相從者數千人。晝伏夜行、周旋於烟塵矢石間、凡數月、卒獲無虞。間有捨公而出他途、必遇寇掠、前後數十無免者。一日公與群衆隱大林中、虜騎遶林歡譟、聲勢甚迫、衆大恐、遷徙紛亂、或啼哭失聲、鬨然不可遏。正爾惶惑、忽

大風起、飛沙折木、震動林藪、移刻而止、虜騎尋引去。是日微此風、則虜聞人聲、無噍類矣。人皆以爲公德行所感。厥後中朝士大夫流散南徙、狼狽於道、有至公卿者、不以在亡爲辭、必厚館之、或經歲乃去。性儉約、自入禁闥、贊化鈞、首尾踰三十年、家無金玉之器、室無衣帛之妾。凡世之聲色玩好、一無所著。在政府時、每解衣、人見所服縑素、無不歎息。鄉人衣冠新異者、不敢服以見公。有爲不善、寧受辱於有司、惟恐公之知也。公居依山、而田瀕湖、每歲夏潦、山水湍激、悉爲巨浸。有勸公增置良田者、公曰、先世以此貽子孫、倘可保守、足以資伏臘、豈可廣植膏腴、以損子孫之志哉。故自微至貴、田不加益。祿廩之餘、推以賑貧、無吝色。每蓄善藥、名方、人有疾、手自施予。鄰里死者、賙其棺槨。歲穀熟、必損衣食之費、增價糴而藏之。至春則減其值以濟乏絕。一方賴此免於饑饉流徙者、不知其幾千



萬人也。紹興十六年丁榮國憂，有穀千餘斛，盡以貸鄉民之無告者。既而焚券，柩前曰：「世俗以厚緇黃爲孝於親，孰若惠貧乏以酬親志？」公所居宅南，甘露降於衆木之上，一歲凡三見，穰穰如貫珠。庭前雙桂枝生連理，寢室之後復產紫芝。又有群鶴數百，回翔寥廓，下視所居。公祝曰：「胎仙見臨，願示丹頂。」俄有二鶴垂首簷檻，飛舞自獻，人皆異之。先是公夢遊一官府，殊庭虛寂，非人世比。夢中以爲異，日當居於此。後十餘夢宛然如一。公薨之月，族弟統夢至其所，與公言同門設綠牌而無字，有告之者曰：「俟張公至則書此額矣。」考公平生所踐履，則知身後所歸宿，夫何疑哉？公娶同邑徐氏，贈新安郡夫人。建炎四年卒。男二人：堂，右宣義郎，前公二十年卒；堅，朝散大夫，直寶文閣，知泉州，嘗歷御史、國子、太常簿。孫四人：釜，承議郎，新通判信州，鑒迪功郎，早卒；鑒迪功郎，池州貴池縣主簿，鎬從事。

郎，新平江府崑山縣主簿。堅、釜皆中進士第，種學積文，能世其家。鑒嘗薦名禮部。孫女六人，適士族。曾孫男女八人，尙幼。乾道二年十一月己酉，葬公於家北古觀基之原，從治命也。公以全德碩望，遭遇四朝，言聽計從，澤及天下，克保富貴壽考，屹然爲世重臣。訃音流傳，學士大夫暨閭巷之人，無問識不識，舉皆痛惜流涕。蒙公恩者，至畫像而祠之。公平生不求赫赫之功，唯以道德仁義自任，誠心守之，老而不衰，此其所以大過人者，眞所謂古之遺直歟？公之子堅欲上公行實於朝，以丐易名之典，俾箴叙其本末。箴出入公門三十年矣，知公出處最詳，輒以所聞見紀其實，以授公之子，不敢有加焉。庶幾議謚勒銘，有所考信，以傳不朽。視質諸夏，無且畫工爲無愧云。謹狀。乾道四年三月某日，通直郎、大理寺丞洪箴狀。

洪箴撰 《華陽集》卷四〇

宋儒碑傳集卷九十一

曾纁 曾幾 朱弁 李邴 晁公壽

蔣璨

奉議郎知舒州曾君墓誌銘

紹興十年三月、故人子曾協以書抵余曰、惟先人棄諸孤有年、惟不肖孤于窀穸事不敢緩。今歲月逝矣、所以詔後世者無傳焉。顧先人好友惟丈人存、敢介伯父以請。則又爲書一通、錄君平生族出官閥行治、授使者速余銘、乃序而銘之。君諱纁、字元禮、世家建昌南豐。南豐之曾、自國初聞天下、蓋君之曾祖致堯、事太宗、眞宗、有大臣之言、不克施以歿。仕至戶部郎中、贈諫議大夫。君之祖易占、復以議論文章名世。卒官太常博士。有子六人。曰鞏、爲中書舍人。神宗時學者宗之、號南豐先生。曰布、相徽宗皇帝、諡文肅。曰肇、終翰林學士、諡文昭。同時鼎峙爲名臣、于是曾氏之名、益彰徹于時。士大

夫以氏族名家、皆出其下。君文昭暮子也、少警敏、自以承父祖百年餘、不痛自激昂、無以紹厥世、乃力學問、爲詞章、被服勤苦如寒生。未冠試有司、已能超出其輩類。坐黨家子不得至京師、著七志、鷗鳥、老酒二賦以自見。文昭公見而奇之。年三十餘、始舉進士、中其科、調主應天府虞城、明州鄞縣簿、復陞阨。久之、當路有憐其才、悼其屈者、挽爲大晟府主簿、非其好也。出提舉兩浙河北、京東路鹽香、改梓州路常平、皆不赴。除京畿提舉學事、言者猶指君黨家子免之。得知太平州、提舉兩浙鹽香、又皆不赴。選知高郵軍、移未期年、遭母兗國夫人憂、歸吳中。至毗陵卒。年四十一。官止奉議郎。時宣和五年四月五日也。娶強氏、資政殿學士、文憲公之女、兗國夫人之姝。生子五人。曰懋、懋、懋、懋、懋。迪、功、郎、鎮、江、府、金、壇、縣、主、簿、懋、承、務、郎、懋、懋、皆、未、命、皆、後、君、數、年、卒。協、今、爲、右、承、務、郎、監、臨、安、府、新、城、

縣稅。君清修謹厚、齟齬時已凝重不可干、見者無不敬異之。及長嗜書、得一書必手鈔口誦、非得其甚解不已。于春秋之學尤長。平居終日寡言、淡若與世無情者。及處父母兄弟朋友之間、則能爲人之所難。文章簡古、似其爲人。議論袞袞、挾其家數

世敢言之氣、必有爲而發、不崇空言。政和間、余始識君文憲公座上、自是日相親。每君文一篇出、讀之若川增條達、莫見其止。余未嘗不愧嘆彌日、以爲不可及也。當是時、人材盛矣、君獨秀出其間。自艱難以來、典章文物委地、昔之所謂人材者、各以其所長班班見世、取能名、登顯仕、而君墓上之木拱矣。古人所謂人不可無年者、如君非耶。由是知君者莫不哀君。君歿時、協未勝衣、今頎然爲舉子之秀、乃能數百里求文識君墓、人又莫不喜協之能紹君、如君之紹其家者。謂君有後、而曾氏世不乏人者、其在茲乎。君墓在鎮江府丹徒縣丹徒鄉

其葬也、以某年某月某日。銘曰、

嗟夫子兮志莫倫、承奕世兮自發身。佩明月兮冠切雲、策堅良兮問要津。八鸞奏兮步始陳、忽中道兮柅厥輪。成之艱兮意若勤、復奪去兮疑大鈞。君有後兮將益振、謂不信兮視此文。

汪藻撰 《浮溪集》卷二七

曾文清公墓誌銘

公諱幾、字吉父。其先贛人、徙河南之河南縣。曾祖識、泰州軍事推官。妣祖氏、寧晉縣君李氏。祖平、衢州軍事判官、贈朝散大夫。妣慈利縣君劉氏。考準、朝請郎、贈少師。妣魏國太夫人孔氏。公有器度、舅禮部侍郎孔武仲、秘閣校理平仲、嘆譽以爲奇童。未冠、從兄官鄆州、補試州學爲第一。教授孫勰亦贛人、異時讀諸生程試、意不滿、輒曰、吾江西人屬文不爾。諸生初未諭。及是、持公所試文、矜語諸生曰、吾江西人之文也。乃皆大服。已而入太學、屢中



儒藏

高等、聲籍甚。會兄弼提舉京西南路學事、按部溺死、無後、特恩補公將仕郎。公以太夫人命、不敢辭。試吏部銓中優等、賜上舍出身、擢國子正、兼欽慈皇后宅教授、遷辟雍博士、兼編修道史、檢閱官。時禁元祐學術甚厲、而以剽剝頽闖熟爛爲文。博士弟子更相授受、無敢異。一少自激昂、輒擯弗取、曰：「是元祐體也。」公獨憤嘆、思一洗之。一日、得經義絕倫者、而他場已用元祐體見黜、公爭之、不可。明日、會堂上、出其文誦之、一坐聳聽稱善、爭者亦奪氣。及啓封、則內舍生陳元有也。元有遂釋褐。文體爲少變、學者相賀。改宣義郎、入秘書、爲校書郎。道士林靈素以方得幸、尊寵用事、作符書、號神霄籙。自公卿以下、群造其廬拜受。獨故相李綱故給事中傅崧卿及公俱移疾不行。出爲應天少尹、尹故相徐處仁敬待公。公嘗決疑獄、徐公謝曰：「始徒謂君儒者、乃精吏道如是耶。」一日、有中貴人傳中旨取

庫金、而不賚文書。徐公用府寮議、將姑許之。公力爭、至謁告不出。徐公雖不果用、而尤以此服公。丁內艱、服除、主管南外宗室財用。靖康初、提舉淮南東路茶鹽公事。女真入寇、都城受圍、太府鹽鈔無自得、商賈不行。公乃便宜爲太府鈔給之。比賊退、得緡錢六十萬。喪亂之餘、國用賴是以濟、而公不自以爲功也。改提舉荆湖北路茶鹽公事。群盜大起、湖北諸郡皆破、獨辰、沅、靖三州僅存。有封椿鹽、公以與蠻獠貨易、得錢數巨萬、間道上行在所。賊孔彥舟據鼎州、川陝宣撫使司幕官有傳雱者、輒假彥舟湖北副總管。彥舟因自稱官軍、而殺掠四出、自若也。俄以總管檄、檄公求鹽給軍食、官屬震恐、請與以紓禍。公卒拒不予。甚後、有爲鼎澧鎮撫使者、怙權暴橫、復欲得鹽。公曰：「使吾畏死、則輸彥舟矣。」亦卒不予。以疾乞閑、主管臨安府洞霄宮。起爲福建路轉運判官、未赴、改廣南西路。廣南支郡



賦入。悉隸轉運司、歲度所用給之、吏緣爲奸。公獨親其事、吏不得與。文書下、諸郡愜服。徙江南西路提點刑獄公事、改兩浙西路。故太師秦檜用事、與虜和、士大夫議其不可者、輒斥。公兄爲禮部侍郎、爭尤力、首斥、而公亦罷。時秦氏專國柄未久、猶憚天下議、復除公廣南西路轉運副使、以慰士心。徙荆湖南路。賊駱科起郴州宜章縣、郴道桂陽皆警、且度嶺。詔湖北宣撫司遣將逐捕、賊引歸宜章之臨武峒。宣撫司遂以平賊聞、公獨奏其實、朝廷始命他將討平之。主管台州崇道觀。起提舉湖北茶鹽、未赴、改廣西轉運判官。公雖益左遷、然于進退、從容自若、人莫能窺其涯。復主管崇道觀、寓上饒七年、讀書賦詩、蓋將終焉。紹興二十五年、檜卒、太上皇帝當宁慨然、盡斥其子孫姻黨而收用耆舊、與一時名士。十一月、起公提點兩浙東路刑獄。公老矣、而精明不少衰、去大猾吏張鎬、一路稱快。明

年、知台州。公娶錢氏、有郡酒官者、夫人族子也、大爲奸利、且恣橫、患苦里閭、公亟捕繫獄、奏廢爲民。黃巖令用兩吏爲囊橐以受賕、吏持之、令不勝怒、械吏置獄、一夕皆死。公發其罪、或以書抵公曰、令左丞相客也。公治益急、亦坐廢。逾年、召赴行在所、力以疾辭。除直秘閣、歸故官、數月、復召。旣對、太上皇帝勞問甚渥、曰、聞卿名久矣。公因論士氣不振旣久、陛下興起之于一朝、矯枉者必過直、雖有折檻斷鞅、牽裾還笏、若賣直沽名者、願皆優容獎激之。時太上懲秦氏專政之後、開言路、獎孤直、應詔論事者衆、公懼或有以激訐獲戾者、故先事反覆極論、以開廣上意。太上大悅。除秘書少監。先是少監選輕、士至不樂入館。公旣以老臣自外超用、名震京都、及入朝、鬢鬚皓然、衣冠甚偉。雖都人老吏、皆感歎、以爲太平之象。于是公去館中三十有八年矣、舉故事與同舍賦詩飲酒、縱談前輩言行、臺

閣典章、從容每竟日。故相湯思退嘗語客曰、恨進用偶在前、不得當斯時從曾公游也。其爲薦紳歆慕如此。擢尙書禮部侍郎。初、公兄楙、歷禮部侍郎至尙書。兄開亦爲禮部侍郎。至是、公復繼之、衣冠尤以爲盛事。二十七年、吳越大水、地震、公極論消復災變之道、及言賑濟之令當以時下。太上皆嘉納。時將郊祀、公力請對、言臣老筋力弗支矣。陛下郊天、若禮官失儀、亦足辱國。太上曰、卿氣貌不類老人、姑爲朕留。公再拜謝曰、臣無補萬分一、惟進退有禮、尙不負陛下拔擢。不然、且爲清議罪人。乃以集英殿修撰、提舉洪州玉隆觀。又三歲、除敷文閣待制。完顏亮盜塞、下詔進討、已而虜大入、或欲通使以緩其來。公方病卧、聞之奮起、上疏曰、遣使請和、增幣獻城、終無小益、而有大利。爲朝廷計、當嘗膽枕戈、專務節儉、整軍經武之外、一切置之。如是、雖北取中原可也。且前日陛下降詔、諸將傳檄、

數金人君臣、如罵奴耳、何詞復和耶。今上初受內禪、公又上疏累數千言、大概如前疏而加詳。既封奏、具衣冠溯闕再拜、乃發。公自宣義郎十一遷爲左中大夫、至是以即位恩、遷左太中大夫、執政欲起公入侍經筵、度不可致、乃以公子逮爲提點浙西刑獄以便養。隆興二年、公上章謝事、遷左通議大夫、致仕。莊文太子立、群臣爲父後者、得加封其親。公子逢請于朝、而有司疑公官高、詔特遷左通奉大夫。乾道二年、五月戊辰、卒于平江府逮之官舍、享年八十三。爵至河南縣開國伯、食邑至七百戶。公平生燕居莊敬如齋、至沒不少變。九月辛酉、逢等葬公于紹興府山陰縣鳳凰山之原。詔贈左光祿大夫、有司謚曰文清。娶故翰林學士錢勰之孫、朝請郎東美之女、封魯國太夫人。男三人、逢、朝、散大夫、尙書左司郎中。逮、朝奉大夫、充集英殿修撰、知湖州。迅、通直郎、主管台州崇道觀。女一人、嫁



右朝散郎知吉州呂大器。孫男七人。槃迪功郎監戶部贍軍烏盆酒庫。梟承務郎新知平江府長洲縣。梁從政郎監戶部贍軍諸暨酒庫。槃迪功郎監建康府提領所激賞酒庫。概宣教郎。裴修職郎。監明州支鹽倉。棠迪功郎。新湖州長興縣尉。孫女九人。長適從事郎衢州江山縣丞李孟傳。次適通直郎新通判揚州軍州事朱輅。次適宣義郎新浙東提舉常平司幹辦公事詹徽之。次適從政郎新婺州金華縣丞邢世材。次適宣教郎幹辦行在諸軍審計司葉子強。次適修職郎呂祖儉。次適文林郎湖州長興縣丞丁松年。次適迪功郎前明州慈溪縣主簿王中行。次適迪功郎監衢州比較務張震。曾孫男女十三人。公貫通六經。尤長于易。論語。夙興正衣冠。讀論語一篇。迨老不廢。孝悌忠信。剛毅質直。篤于爲義。勇于疾惡。是是非非。終身不假人。以色詞。少師捐館舍。公才十餘歲。已能執喪如禮。

終喪不肉食。及遭內艱。則旣祥猶蔬食。凡十有四年。至得疾顛眊乃已。每生日。拜家廟。未嘗不流涕也。平生取與一斷以義。三仕嶺外。家無南物。或求沉水香者。雖權貴人不與。守台州。以屬縣并海產蚶菜。比去官。終不食。初佐應天時。元祐諫臣劉安世無恙。黨禁方厲。仕者不敢闖其門。公獨日從之游。論經義及天下事。皆不期而合。避亂寓南嶽。從故給事中胡安國推明子思。孟子不傳之絕學。後數年。時相倡程氏學。凡名其學者。不歷歲取通顯。後學至或矯托干進。公源委實自程氏。顧深閉遠引。務自晦匿。及時相去位。爲程氏學者益少。而公獨以誠敬倡導學者。吳越之間。翕然師尊。然後士皆以公篤學力行。不譁世取寵爲法。公治經學道之餘。發于文章。雅正純粹。而詩尤工。以杜甫。黃庭堅爲宗。推而上之。由黃初建安。以極于離騷。雅頌虞夏之際。初與端明殿學士徐俯。中書舍人韓駒。

呂本中游。諸公繼沒，公巋然獨存。道學既爲儒者宗，而詩益高，遂擅天下。有文集三十卷，易釋象五卷，他論著未詮次者尙數十卷。某從公十餘年，公稱其文辭有古作者餘風，及疾革之日，猶作書遺某，若永訣者，投筆而逝。故公之子以銘屬某。會某客巴蜀，久乃歸，銘之歲，實淳熙五年，去公之歿十二年矣。銘曰：

聖人既沒，道裂千歲，士誦遺經，用鮮弗戾。孰如文清，得于絕傳，耄期躬行，知我者天。秉禮蹈義，篤敬以終，病不惰媮，大學之功。仕豈不逢，施則未究，刻銘于丘，維以詔後。

陸游撰 《渭南文集》卷三二

奉使直祕閣朱公行狀

公諱弁，字少章。其先吳郡人，中徙歙之黃墩。唐末有諱古僚者，爲陶雅偏將，以兵戍婺原，因家焉。因其後世有隱德，至奉直公始爲儒，尤以沈默自將，

足迹未嘗至城市。生五子，公其次也。幼穎悟，讀書日數千言。十歲能文，既冠，遂通六經百氏之書。遊京師，入太學，補內舍生，客食諸王家。會景迂晁公說之爲宮學教授，一見其詩，奇之，與歸。新鄭妻以兄女。鄭介汴洛兩都之中，一時故家遺俗，蓋彬彬焉。公游其間，聞見日廣，文章日進，益厭薄舉子事，遂不復有仕進意。靖康之難，家碎賊手。南歸及淮甸，光堯太上皇帝已承大統，駐蹕揚州，議遣使問兩宮安否，而見大夫無敢行者。公聞之，慨然攘袂而起，撫髀太息，即日奮身自獻闕下。宰相以聞，詔補修武郎，借右武大夫，吉州團練使，充河東大金軍前通問副使。且命之曰：朕方俯同晉國，用魏絳以和戎，爾其遠效侯生，御太公而歸漢。公受命，即日與使者王公倫、張旛、誓衆，直犯兵鋒以行。實建炎戊申正月也。行遇虜相黏罕于白水，樂邀說甚切，黏罕不聽，使就館雲中，餽餉如禮，而實以兵守

之。公復屢與書，具言用兵講和利害甚悉。紹興壬子之歲，虜忽遣宇文虛中來言和議可成，當擇使副一人詣元帥府受書歸報。虛中欲二人探籌以決去留，公正色曰：「此市道之所爲耳。吾之來，固自與以必死，豈今日乃覬幸於先歸者哉？願使長亟詣軍前受書，歸報天子，遂成兩國之好，使吾君得以蚤申四海之養於兩宮，如前日臨遣詔書本指。則吾雖暴骨方外，猶生之年也。」於是王公行有日，公請焉，曰：「古之使者有節以爲信，今無節而有印，則印亦信也。公旣還朝，無所事此，願留見授，使某不幸一有意外之辱，得抱以死，死不腐矣。」王公揮涕解以授公。公受而懷之，卧起未嘗不與俱也。是時劉豫盜據京邑，虜迫公仕豫，且誑之曰：「此南歸之漸也。」公曰：「吾受命而北，不受命而南。且豫國賊，吾常恨不食其肉，又忍北面而臣之哉？吾有死耳，不願歸之。虜人怒，絕其餼，遺以困之。公反從中固

拒驛門，忍饑待盡，誓不爲屈。於是虜人亦知感動，復慰安之，致禮如故。久之，復迫公換虜官。公曰：「自古兵交，使在其間，言可從從之，不可從則囚之，殺之，何必換其官哉？吾官受之本朝，今日有死而已，誓不易以辱吾君也。」且移書虜用事人，邪律紹文等曰：「上國之威命朝以至，則使人夕以死。夕以至，則朝以死。又以書告訣於後使者洪忠宣公曰：『殺行人亦非細事，吾曹不幸遭之，亦命也。』命出於天，其可逃哉？要當舍生以全義耳。」一日，具酒食，召雲中被虜士夫常所與往來者飲，半酣，語之曰：「吾已得近郊某寺之地，一旦畢命報國，諸公幸瘞我其處，且識其上曰：『有宋通問副使朱公之墓。』於我幸矣。衆皆淚緣睫，不能仰視。公獨談笑自若，曰：「此臣子之常分，諸君何悲也。」虜知公終不可屈，遂不復強。然公以使事未報，憂憤得目疾，其懿鬱愁歎，無慘不平之氣，一於詩發之。歲久成集，號曰聘游。虜



中名王貴人亦多遣其子弟就學公以此又得時因文字往來說以和好之利而碑版篇詠流行北方者亦甚衆得之者相誇以爲榮焉王公還朝太上前聞公守節不屈因其再使賫金銀綾絹爲賜歲在丁巳虜諸酋相繼死滅公陰使從者李發求得河陽人董考祥等密疏其事及虜中虛實使間行歸報曰此不可失之時也其後王公復歸又以公奉送徽考大行之文爲獻其詞有曰臣等猥以凡庸誤蒙選擇茂林豐草被雨露於當年絕黨殊鄰犯風霜於將老節上之旄盡落口中之舌徒存歎馬角之未生魂消雪窖攀龍髯而莫逮淚灑冰天太上讀之感涕詔官公親屬五人如故事別賜吳興田五頃顧丞相張忠獻公喻以密指曰歸日當以禁林相處也明年虜使烏陵思謀石慶充至詔公子咏及司馬倬入館見之仍許附以家書且賜黃金三十兩以寄思謀等見咏稱公忠節嗟歎

久之至以手加額云紹興癸亥約和已定公乃與洪忠宣公及歷陽張公邵皆得歸其事見洪公家書輜軒集今行於世入境傳旨促行者數輩至國門太上命中使梁璋引入便殿延見勞苦嘉歎再三公頓首謝且言曰臣聞人之所難得者時也而時之運無已事之不可失者幾也而幾之藏無形惟無已也故來遲而難偶惟無形也故動微而難見陛下與金人講和上則返梓宮次則迎太母又其次則憐赤子之無辜肉白骨於已朽此皆知時知幾之明驗也然時運而往或難固執幾動有變宜鑒未兆盟可守矣而詭詐之心宜默以待之兵可息矣而銷戢之術宜詳以講之且夷狄君臣上不奉若天道下不求合民心人怨神怒不知修省以黷武爲至德以苟安爲太平虐民而不恤民廣地而不廣德此皆天助陛下中興之勢也若時與幾陛下既知之於其始圖惟厥終願陛下益留神



焉。太上納其言、賜金帛甚厚。公又以虜中所得六朝御容及宣和御集書畫爲獻、并上所著聘游集、且述北方所見聞忠臣義士朱昭、史抗、張忠輔、高景平、孫益、孫谷、五臺僧眞寶、丁氏、晏氏女、閻進、朱勣等死節事狀、及故官屬姓名以進、請加褒錄、以勸來者。太上高其節、壯其志、異其文、俾易文資、且有進用意。詔曰、朱某奉使歲久、忠義守節、理合優異、特賜券金千緡。而宰相秦檜方以講和爲功、惡公言虜情、悟上意、奏以初補官換右宣教郎、直祕閣、主管佑神觀。有司校公考十有七年、應遷數官、檜又尼之、僅轉奉議郎。明年四月六日、遂以疾卒於臨安府白龜池之寓舍。遺命歸葬故山、不果、則權厝西湖上智果院。忠義之士莫不哀之。公配晁氏與其子鄭老皆死于兵、再娶王公倫之女弟、與晁氏皆封孺人。子泳、仕至宣教郎、知撫州崇仁縣以卒。女適里人王仔、以公恩補承信郎。孫勣早卒、

照未仕。公之文慕陸宣公之爲者、其氣質雄渾、援據精博、明白疏暢、曲盡事理、識者以爲深得其體。於詩酷嗜李義山、而詞氣雍容、格力閑暇、不蹈其險怪奇澀之弊。聘游集凡四十二卷、別有奏議一卷、尙書直解十卷、曲洧舊聞三卷、續觥醵說一卷、雜書一卷、風月堂詩話三卷、新鄭舊詩一卷、南歸詩文一卷、皆藏於家。熹先大父於公爲三從兄弟、先子初登第時、嘗往拜公、漆洧之上、公送以詩、意寄甚遠。其後先子仕於朝時、公已在北方。比南歸、則先子不幸是歲已棄諸孤矣。後六年、熹始得拜公之殯而讀其遺文。又三十有四年、乃復得官浙中、則公之殯猶在智果院也。方將爲謀葬故、而遽以罪逐。今密院檢詳尤公表、臨安帥守張公杓聞而悲之、相與悉力經紀其事。而太學錄張君體仁又爲得吉卜於□□縣積善峰之下、書來曰、將以某月某日葬公之柩、而以王氏孺人祔焉。熹竊惟

國家承平百年、所以遇士大夫者不爲不厚。政宣以來、公卿大臣荷國寵榮殊異優渥、又有非前日比者。一旦狂徒^①誤國招禍、使君父蒙塵、越在沙漠苦寒無人之地、而一時遺臣賣國降虜之餘、接迹於朝、覩然相視、乃無一人肯奔問官守者。公以草野諸生、平日未嘗沾一命之祿、顧獨奮然出捐軀命、請冒鋒鏑斧質之威、以嘗不測之虜、而守死不屈、至于十有六年之久、卒不汙虜僞官爵、竟得復持漢節、歸見天子、其忠義大節、終始凜然。雖竹帛所書、丹青所畫、無以過之。和議之成、雖若不在其身、而風喻從臾、蓋亦與有力焉。而公不肯自以爲功、還朝所建、皆遠謀至計、不欲朝廷遂以目前所就爲安、而必期有以致中興於異日者、此其忠慮之深、又與一時貪天之功、以爲己力、而遂宴安江沱、以至於忘讎而辱國者、蓋萬萬不侔矣。上賴太上皇帝深照其衷、前後褒嘉賜賚甚寵、而不幸厄

於權臣、使不獲申其志以死、豈非天哉。今葬有日、宜有銘刻以告于幽。因訪其家、得公外孫王炳所記行實一編、參以舊聞、第錄如右、而敬以請於尤公。伏惟幸哀而終惠之、以覆賴其後人、且詔太史氏筆削、以爲萬世臣子忠義之勸。謹狀。

朱熹撰 《晦庵先生朱文公文集》卷九八

資政殿學士參知政事贈太師李文敏公

邴神道碑

濟水貫兗與徐、居古九州之二、其在四瀆、得天地質信寬徐之氣、其澤曰大野、是爲十藪之首。鍾英炳靈、今於故參知政事文敏李公見之。始以淵源之學、華重之文藻飾王度、中以剛大之氣扶顛持危、晚以超卓之見居安資深、允所謂間生之賢者也。公諱邴、字漢老、系出唐邴王禕。其十一世孫濤仕五代爲相、入本朝歷兵部尙書、生水部郎中承休、公高祖也。水部生廣文館進士、贈兵部尙書諱



仲寶加贈太子太保者、公曾祖也。宮保次子諱景山、官至駕部郎中、贈太子少傅、兩娶藺氏、贈咸寧郡夫人、公祖父母也。朝請大夫諱瑒、贈少師、公父也。娶仲氏、鎮國夫人。孔氏、鄆國夫人。高曾皆葬濟陰、伯祖殿中丞景圭及宮傅葬濟之任城、故公爲濟州鉅野縣人。幼警敏、喜讀書、弱冠能文。伯父樂靜先生昭玘嘗從眉山蘇文忠、文定公、御史中丞孫公覺、門下侍郎李公清臣講論文章、仕至起居舍人。性靜厚忠實、其文演迤貫理、穩密不露斲削、公獨得其傳。崇寧五年登進士第、授將仕郎、德州平原尉、上官待以異禮。秩滿、升從政郎、濮州鄆城丞。外艱服除、執政知其名、用爲編修國朝會要所、檢閱文字。宣和初、以儒林郎特除秘書省校書郎、改宣教郎。二年十月、擢尙書禮部員外郎。時中外奏祥瑞無虛日、公草賀表、筆不停綏、精確典麗。三年夏、進起居舍人。是冬、以通直郎試中書舍人、賜

服金紫。五年七月、遷給事中。閱月、權直學士院。陳橋顯烈宮成、特命公撰文刻石。明年八月、入翰林爲學士。徽宗曰、內外制得卿稱職矣。高麗入貢、選充館伴。會召宰輔親王、貴戚宴睿謨殿、賞橙橘、侍從預者纔四五人、而公在焉。詔賦紀事詩、公乘館客夜草百韻以進。上大嘉、遣中使持示麗人。麗人表謝、乞傳本以歸。凡私覲悉加等。適蔡京再領三省、言路觀望、摘公作大宴樂語盛稱鎮圭爲罪、黜提舉南京鴻慶宮。七年冬、除徽猷閣待制、知越州。爲政清簡、抑強扶弱。欽宗覃恩、轉承議郎。詔諸路兵備、胡公擇掾屬通明者付以調發、城中至不聞兵出。議者猶論公因時宰驟進、而不知主眷素厚也。坐落職、提舉西京嵩山崇福宮。高宗初元、復右文殿修撰。踰年、召爲兵部侍郎、再直學士院。三年二月壬子、車駕南渡、壬戌至杭州。三月癸未、苗傅、劉正彥反、露刃宮門。上登樓撫諭、公亟趨前叱責

傳等兇焰稍息。又諭殿帥王元擊賊。元唯唯。公扣宰相朱勝非問計策。傳等皆在。公反覆鐫詰。人爲公危。公無懼色。退勸勝非密引外援制賊。又謂傳所聽者正彥。正彥則倚王世修爲謀主。宜陽許世修侍從以間之。蔑不濟矣。太后垂簾旬餘。勝非遂奏變故以來從官能助朝廷者惟李邴、鄭穀。協心於內。誦言於外。乃除公翰林學士、穀御史中丞。呂頤浩、張浚、劉光世、張俊等義師起。公與權直院張守分撰請復辟表及批答。丙午。勝非白太后除公與穀並爲端明殿學士、同簽書樞密院事。四月戊申朔。上御朝。明日遷公尙書左丞。自朝散郎例轉中大夫。公懇辭。上賜親札略曰。卿毅然正詞。氣折兇醜。萬衆動色。具臣覲顏。公謝表亦云。謀寢淮南。雖慚素望。笏擊朱泚。實厲壯心。詰責兇渠。激揚禁衛。迨成復辟。實與秘謨。蓋出孤忠。豈徼後福。當時稱爲實錄。乙卯大赦。其文云。斷鼉立極。開闢功成。

取日授龍、神明御正。亦公所草。四方誦之。駕幸江寧。六月。依祖宗舊制合三省官。改參知政事。尋以防秋。分六宮百司奉太后如洪州。命公爲資政殿學士、權知行臺三省樞密院事。公與丞相呂忠穆公議論不協。臺諫有向背意。公聞之。固辭。八月。仍本職提舉洞霄宮。上念公不已。未閱月起知平江府。視事三日。復從請祠。兄鄴帥越失守。連坐落職。明年復端明。紹興元年大禮還舊職。十六年五月甲午。以疾薨於泉州居第之正寢。享年六十有二。遺表聞。贈正奉大夫。八月庚申。葬南安縣石鼓山之原。爵隴西縣開國男。食邑四百戶。妻東平郡夫人任氏。朝請郎之立女。前七月卒。五子。縝、警、悟、絕。人不樂仕進。號萬如居士。有梅詩百篇。終朝請大夫。侍講朱熹碣其墓。維、宣、敎、郎。贈朝奉大夫。紀疾廢。綸、朝奉大夫。紉、承議郎。贈朝請大夫。五女。長適朝奉大夫、直秘閣傅自得。次適左迪功郎趙如川。



儒藏

宋儒碑傳集 卷九一

再適朝請郎晁子闔。次適通直郎梁護。次適從政郎仲壽朋。次適迪功郎馬諒。再適迪功郎傅伸。孫男十四人。詵承議郎。讜承奉郎。諤從事郎。諫承務郎。誼朝散郎。謙承務郎。訥從事郎。訖今爲朝奉大夫。荆湖北路轉運判官。說通仕郎。訢從事郎。疊將仕郎。詠訥。孫女十一人。公天資高明。積學深至。早歷清要。號稱文士。猝遇國難。大節凜然。爲廟廊之器。嘗奉詔編類平江勤王及奏請本末。付禮部鏤板。公既列上。即匱藏元牘。後自泉南繳納省中。子孫始知一時定計具草手疏皆出公及朱丞相之手。他執政著名押字而已。罷政十七年。避時相不復出。讀書作文。雖病不廢。延納後進。教誘無倦。稱人之善。覆護所短。若親舊行己未至。則質問再三。使歸之正。奉養簡薄。賑恤宗族。治家嚴而恕。每愛徐孺子。申屠子。陶淵明之爲人。晚棄世故。深造以道。夫子所謂朝聞夕死者。公蓋得之。所著草堂

前後集一百卷行於世。其葬也。寶文閣待制趙思誠爲之誌。諸子遇恩。累贈公太師。配封魯國夫人。淳熙初。公薨三十餘年矣。近臣及公叱苗。劉事。孝宗嘉歎。特令定諡。其後有司以勤學好問曰文。應事有功曰敏。易公名。今公諸孫惟季子之子訖在。典州持節。學世其家。以公神道未碑。遠使來請。某久備史官。得公出處。故詳書而系以銘曰。

齊魯之間。儒學之淵。道閉賢隱。祥麟出焉。由漢迄唐。士多名世。公生盛朝。亦拔乎萃。其來儀儀。資適逢時。以文華國。天子所知。變起弗圖。公奮烈烈。面折羣兇。我勇彼懾。籌幄既咨。義旗既麾。中外協力。乾清坤夷。倬彼宸章。燦若星日。告於萬邦。丕顯公績。上方用公。公曰歸歟。成功者天。寵則難居。燕處超然。道則深造。窮理盡性。庶其允蹈。生有自來。死也名垂。刻詩道周。言何敢欺。

周必大撰 《平園續稿》卷三〇

嵩隱長子墓表

嵩山晁說之長子公壽字平子大觀元年丁亥疾病中改名公艾生于昭德故廬時元豐八年乙丑少敦龐有成人之氣象方年十三四寺庭游行多得古書畫以歸嘗欣然視予曰是北齊楊子華勘書圖中一幅也博古者驗之猶信雖幼善用硬黃影楊古法書予因見澗上陳叔易寫科斗古文頗留心願學顧非宜教童子者則乃輒自能爲文外作五字詩往往有合處時學李賀歌行亦不凡專讀禮記嚴于陸氏音其義說制度根柢鄭氏孔氏不苟異妄從蓋其志不規于舉子事業也間則泛觀務博庶幾可與學士大夫語言予知其所能者如是而止也逮其既卒余親爲料理其書篋見其簡牘之志甚大有數巨編正書細密是謂資治通鑑鈔蓋其中夜燈下之功予悲怛于是增甚久不能忘也其卒在陝州芮城年二十有三丁亥六月

丁巳也是年之春暴得嗽疾恐貽父母憂強忍不以言既不能離枕席父母始往問所苦必曰今日少損亦未嘗不巾櫛也一日私語其妻子曰我死矣謂父母何至死不復他言方其未病時予偶與論近世人物白首而不遭者或咎諸人彼天不得壽者又將誰責如吾家微之光道渙之繪道王文正家慥予顧原武小邢廬山劉和仲皆奇才也吾兒輒愀然不懌曰是數人者何恨往往見稱于東坡諸公余當時不知其語不祥也今復忍追恨哉母盛氏自芮城歸其柩于東里祖塋政和四年甲午四月乙卯葬于祖塋東第二域之甲穴妻賈氏女三歲曰鍊師男方生六月名子健

晁說之撰 《嵩山文集》卷一八

宋故右大中大夫敷文閣待制贈正議大夫蔣公墓志銘

義興蔣氏以東漢函亭侯澄爲鼻祖距今千餘年



諸戎亂華、大盜移國、名臣巨室、捐墳墓、棄印綬、老死巖谷、何可勝數。而後世之興、往往不知其族之所自出。惟義興之蔣、祖孫相望、名迹斑斑然、以宦學世其家、爲聞姓。奕世顯融、以至宋興、尙占。數義興譜、山亭之昭穆、爲三十一世祖。今常州宜興縣山亭鄉是也。咸平中、有諱堂者、以進士起家、事仁宗皇帝、爲吏部侍郎、樞密直學士、贈太尉。而猶子太師魏公之奇、又以文學政事稱天下、繇開封尹擢翰林學士、知樞密院、尊顯三朝。而蔣氏子孫有名籍於朝者、比比出焉。公諱璨、字宣卿。曾祖九皋、贈太傅。祖滂、江寧縣主簿、贈太師。考之美、奉議郎、通判真州、贈正議大夫。妣、碩人程氏。所生母令人李氏。公生十歲而孤、鞠於世父魏公。誦習群書、操筆爲章句、已卓越不凡。魏公喜而賦詩曰、渥窪之駒、必汗血、青雲之幹、飽霜雪。器重蓋如此。奏補假承務郎。崇寧五年、調將仕郎、婺州蘭溪縣主簿。秩

滿、監泰州海安鹽倉、升通仕郎、開封府酸棗縣主簿、遷文林郎、改宣義郎、監京東抽稅竹木場、轉宣教郎、編修、遷史局檢閱官。丁令人憂、憂除、除都水監丞、轉通直郎、提舉江南西路常平、四遷右朝散郎、知撫州。江西漕計空乏、軍士廩食不繼、一日聚而譟於轉運使之庭、排門闖擊胥吏、出不遜語。公聞變馳往、麾其衆詣常平倉受粟、已乃推首事數輩論殺之。臨川歲薦饑、群盜白晝入市、市人惶擾不知所爲、會公謁客與之遇、盡執以歸、戮其魁以徇。戍兵由上饒路趨撫吉、所過侵暴、公爲治次舍、具糧糗、嚴兵憚之。旣至、斂兵以入、受一日之食而去、秋毫不犯。上書請祠、主管亳州明道宮。未幾召見、擢尙書比部員外郎、知通州、轉右朝奉大夫。通州並海、實饕商舟楫之聚、有杜興帥所領屯淮上、遇敵、奔海陵、謀欲襲通據城、以待招納之命、官吏驚怖欲逃。公曰、此等妄意、室中之藏、故昧於一來。

飭吏卒持酒載逆之、而盡驅饕商出境。興至、周視四顧、悵然失望、留一夕遂行。事聞朝廷、就除淮南東西路茶鹽、進直秘閣、淮南東路轉運判官、又直徽猷閣、升副使。逾年、直寶文閣、知揚州。淮海大會、更建炎戎馬蹂踐之後、獨有孤城、塊然在草莽中。於是增濬城隍、建置府寺、召募吏卒、安集流亡。立關市、招商賈、治廢田、開阡陌、而江之南、湖之北、有操橐糶、攜婦子而至者。除兩浙轉運副使。公歎曰、假我數年、可以盡復其故、而以不卒業爲恨。累轉右中奉大夫、直龍圖閣、知臨安府。臨安浩穰、典治京師、世家大族恃恩驕橫、公稍以法繩之。改兩浙轉運副使。俄徙江西、道出臨川、公舊所臨也。州人罷市出迎、環立道左、啓問使君無恙。公褰帷勞遣、賦詩紀其事。今刻石存焉。豫章守帥調軍食、出助教補牒率民錢、期至不如律令、一境騷然。公移書喻止之、貸漕錢以紓其乏。所過屬州、暴骨朽柴、

狼籍道路、公視而太息曰、朝廷有掩骼之令、州縣吏無一人推行者。乃募道釋流、分授錢米、每斂數百軀、則穿一大坎瘞之、用富韓公故事、號叢冢云。移淮南路兼提點刑獄。居數月、知鎮江府。當是時、權貴人執爵祿之柄、視苞苴豐儉爲低昂、公獨無所餉、遂罷歸。請祠得台州崇道觀、賜服三品。轉右中大夫、凡四任宮祠。十二年、乃即山亭之西山水勝處、築室居焉。閒遇^③勝日、稅杖葛履、從常所往來者飲酒賦詩、自肆於林壑之間。魏公耆儒宿學、所爲文章精深典麗、一時士大夫傳誦。而公於群從中、獨能傳其學、尤工於詩。清醇雅奧、聲比字屬、皆中律呂。凡悲愉欣戚、行歌坐嘯、不平有動於心、皆於詩見之。東坡先生、魏公所善也、故公蓄東坡詩文、自幼壯逮老、連榻累筥、至不能容、乃營一堂儲之、號景坡云。余南遷、過疏山、見公擬東坡煨芋詩、刻龕之僧壁、詩律句法良是。趙令時家藏東坡遺



文中有公數詩、不能辨也。權貴人死、詔起公爲淮南轉運副使。明年召歸、擢戶部侍郎、除集賢殿修撰、知平江府、進敷文閣待制、右大中大夫。公在淮南、奏言、兩淮薦經兵火、公私埽地、滁小州、尤爲窮陋、獨有上供錢、向著板籍中、戶部移文督索、無虛月、積二十年、終不得一錢、徒費紙札耳。有詔蠲之。又言、朝廷募人治淮上廢田、設有侵冒、變斥鹵爲桑田、奚不可。而無賴告訐、官吏追呼、無寧居者。令丞職在勸耕、實擾之也。以故良田上腴、蕪沒爲汙萊、爲可惜矣。今欲令占田者免租稅三年、使肆耕其中、人人歆艷、相慕相先、無曠土矣。而後按所占田、簡徭薄賦、積穀實邊、爲公私百世之利、不亦善乎。平江大府、大家勢人、豪商富賈、舟車之會、號難治。公禁戢姦偷、鉏刈強梗、植善柔、撫貧弱、獄市爲清。諸軍牧馬有廐屋數百區、茨以茅竹、歲一更之、用財與力皆出於民、公請於上、出內帑金佐其費、

它徒賦工、掄巨財、陶瓦覆之、堅壯可支數世。州人歡呼、相率詣北禪寺作佛事以報上恩。諸將掠人爲兵補軍籍、率用大舟往來漕河、無人處、道遇強壯少年、束縛鉗梏之。惡少利其貲、通爲囊橐、囚閉柵中、無脫者。公密緝^④、盡得其姓名、窮治株穴、捕實諸法、遂絕。水潦大飢、詔發常平粟、公調粟十二萬石、計道里遠近、視男子婦人老幼強弱、分日異處、各有法、無餓者。已而屬縣長洲鬻獄、公與諸司皆坐貶、降右中大夫、提舉洪州玉隆觀。明年、復右太中大夫、上用公之意、未衰也。而公病矣。以二十九年四月己亥卒、贈右正議大夫。公仕三朝、出使入侍四十餘年、所泣皆有迹。守平江時、已過七十、日閱訟牒百餘紙。延見官屬、綜理庶務、接對賓客、餞過迎來、雖精練少年不能過也。自朝廷表疏奏議、箋記、部使者書檄之文、與夫朋友族姻寒暄之間、一不以屬記室、皆自手出。客至命酒、即席賦長短

句、畀歌者持杯勸侑、巧麗清新、不襲蹈前人一言一句。府治有唐刺史韋應物、白居易、劉禹錫遺像、號三賢、廢於兵火久矣。公即故地繕治祠屋、繪三賢像、自書榜揭之、以示邦人尊賢尚德之意。公從祖太尉公堂、與從父大夫公之翰嘗典此州、至是公以西清法從踵其後、衣冠之盛、搢紳歎慕、以爲口實。公善書、得古人用筆意、大者徑尺、細者如蠅頭、怪奇偉麗、獨步一時。凡今仙宮佛廬、穹堂奧殿、層臺崇榭、得公書榜、以爲壯觀、至今尺牘人皆寶藏之。公除戶部時、奏事殿中、上顧見所進疏劄、小字楷法、筆勢遒健、不類老者、嘉歎久之。有詩文三十卷藏於家。享年七十五。娶同郡李氏、承事郎畸之女、贈令人。一男子、志祖、右文林郎、監潭州南嶽廟。一女、適左從事郎李處全、監鎮江府戶部大軍倉門。孫男五人、蘧、藺、並登仕郎。蓋、蕭、范、該、公遺恩而未命。孫女適進士張操、一尚幼。公平生無嗜好、

沖澹簡遠、有晉人之風。家無十金之產、聲伎之奉、終日據一幾、遊戲翰墨、至忘寢食。讀書著文之暇、則寫佛經、作禪偈、皆出世間語。遇人無貴賤少長、恂恂然。自州縣小官、貴爲公卿、人不見其小異。嘗治齋室爲便坐、榜曰師恂、實信踐之。其在官府、馭吏民如家、待寮吏如賓友、不立崖塹、以自矜大、至抵冒憲禁、未嘗有所私貸、亦不自爲輕重、以故人畏而愛之。公守臨安、坐小法、知通皆貶秩一等。是歲當郊、通判應任子而坐貶、公造堂、請獨任其咎、遂兩已。遇恩當任志祖、而魏公諸孫獨思祖未著仕籍、改奏登仕郎、蔣氏諸老喈曰、眞吾宗之表也。公嘗過縣之永豐鄉碧雲寺、顧見一地岡阜深秀、曰、此佳城也。卜之吉、乃自營冢墓、手種松柏環之、從旁築屋十數楹、舍守冢者、名曰西歸。後五年公沒。志祖以三十年三月某甲子奉公柩以葬、舉李氏令人以祔。銘曰、



儒藏

蔣侯開號、自山亭始。奕世蟬連、祖孫代起。或仕或已、維桑敬止。千載相望、不去其里。於赫太尉、發迹初仕。歷宋二葉、持橐入侍。魏公繼出、文武兼備。碩大光明、噲呖卓瑋。繫公挺生、前人是似。屈首受書、不俟憤悱。落筆千言、四座驚靡。於時魏公、孰視而喜。喜而賦詩、吾道東矣。一幹昂霄、可拱而俟。剖符一州、曰古循吏。發粟振饑、如哺其子。按節十城、曰古膚^⑤。使布宣上恩、澤及枯槁。閣省之華、殿廬之秘。父祖百年、三貴並峙。公材經綸、猶未盡試。天不憖遺、俛仰一世。君山之陽、碧雲之址。曰此佳城、山蟠水委。公所自卜、順以卒齒。有銘昭之、以配信史。

孫觀撰 《鴻慶居士文集》卷三七

校記

①徒：原作「圖」，據清康熙二十七年刻本《晦庵先生朱文公文集》改。

②占：原作「然」，據明鈔本《孫尚書大全文集》改。

③遇：原作「過」，據右引改。

④密緝：原脫，據四庫本《鴻慶居士集》補。

⑤膚：原缺，據明鈔本《孫尚書大全文集》補。

宋儒碑傳集卷九十二

李郁 胡憲 陳東 李純德 楊邦乂

西山先生李公墓表

西山先生李公者、龜山先生楊文靖公之門人也。龜山既受學於河南程氏、歸以其說教授東南、一時學者翕然趨之。而龜山每告之曰、唐虞以前、載籍未具、而當是之時、聖賢若彼其多也。晚周以來、下歷秦漢、以迄于今、文字之多、至不可以數計。然曠千百年、欲求一人如顏曾者而不可得、則是道之所以傳固不在於文字、而古之聖賢所以爲聖賢者、其用心必有在矣。及李公請見於餘杭、則其告之亦曰、學者當知古人之學何所用心、學之將以何用。若曰孔門之學仁而已、則何爲而謂之仁。若曰仁人心也、則何者而謂之人心耶。李公受言、退求其說以進、愈投而愈不合、於是獨取論語、孟子之書而伏讀之、蚤夜不懈、十有八年、然後渙然

若有得也。龜山蓋深許之、而公之語學者亦曰、學者於經讀之又讀、而於其無味之處益致思焉、至於羣疑並興、寢食不置、然後始當驟進耳。龜山既沒、後進多從之遊。後舉遺逸召對、卒官福建路安撫司主管機宜文字、而葬其鄉邵武軍光澤縣東黃嶺之原。學者共追號爲西山先生云。公諱郁、字光祖、元祐黨人朝散郎深之子。母安仁縣君陳氏、贈諫議大夫陳忠肅公之女兄也。公幼不好弄、坐立必莊。少長、學於舅氏、陳公器之。踰冠、乃見龜山而請業焉。龜山一見奇之、即妻以女。既而以朝散公遺命、出爲叔父將仕郎庭之後。中間游太學、被鄉薦、皆不第。紹興初、天子慨然有志中興大業、思得山林遺逸魁傑非常之材而用之。會遣御史朱異行郡國、詔俾搜訪以聞。異聞公名、使還以對。召對便殿、所陳皆當世大務、上爲改容傾聽、請退而留者再。詔以爲右迪功郎、尋除詳定一司勅令所



刪定官。未久以憂去。用進書恩。特改承務郎。及免喪。會秦丞相檜已用事。公自度不能俯仰祿仕。遂築室邑之西山。往來讀書其間。家益窮空。人有不堪其憂者。公獨曠然不以爲意。然當世賢士大夫益高仰之。遷官者多引以自代。久之。起家佐閩帥幕府。人謂非公所宜處。而公不辭。既至。人謂公且不屑爲。而公治文書惟謹。日訪民情。戚休利病。以告其長而罷行之。一日。帥用小人言。欲毀民居數十爲列肆。酤酒以牟利。公白其非便。帥不樂。頗見色詞。公即移病告老。帥悟。慚謝。公爲強起。二十年七月壬辰。竟以疾卒。年六十有五矣。公天資粹美。而涵養有方。其事上恭而有禮。其御下嚴而有恩。平居未嘗有惰容。誨人終日無倦色。自奉甚約。而事親極其厚。於所後尤兢兢致孝。服喪毀瘠如禮。治喪必誠信。至竭其貲。不吝。兄階官杭州。罵賊死。公事寡嫂如母。教孤姪。遺遺女。皆如己子。其於世

務人情。官政文法。下至行陣農圃之事。靡不究知。然竟不及用於世。以沒。識者恨之。所著書有易傳參同契論孟遺秉及平生遺文。合數十卷。藏于家。夫人楊氏。龜山先生第三女。有賢行。通經史大意。平居誨飭子孫。整齊內外。皆中禮法。後公十六年卒。子揆承^①務郎。陳公誌於將仕之墓。所謂延孫者也。晚以德壽慶恩補官而卒。女適同郡上官墨卿。孫男閑。闡。闡女適某人。閑於是。以迪功郎爲全州州學教授。始將伐石以銘^②其墓。而來請文以識焉。嗚呼。聖賢遠矣。然其所以立言垂訓。開示後學。其亦可謂至哉。顧自秦漢以來。道學不傳。儒者不知反己潛心。而一以記覽誦說爲事。是以有道君子深以爲憂。然亦未嘗遂以束書不讀。坐談空妙爲可以徼幸於有聞也。若龜山之所以教與西山之所以學。其亦足以觀矣。予是以著之。而并記其行事。後之君子。尙有考也。淳熙十有二年秋八月

己卯具位朱熹述。

朱熹撰 《晦庵先生朱文公文集》卷九〇

秘書省正字胡宣教行狀

先生諱憲、字原仲、姓胡氏、其先云云。先生幼不好弄、而天資粹美、夙成凝然莊重、見者改容。當舍法盛行之際、入太學、應科舉、而獨不喜爲王氏三經字說之習、汲汲然求所以學者。如是者有年、然後得涪州譙處士定於京師逆旅中、而問學焉。譙授以易學、開而未達、初嘗爲其諄諄言也。而先生淵然深造、每自得之。譙喜甚、爲之盡發所蘊、俾洞明格物致知之要。既歸、日從季父文定公游、文定公又益以堯舜孔孟道學授受之詳、爲之講貫演繹、曲盡精微、究極博大。由是能以篤信力行、居之無悔。且其師友淵源所漸、又皆當世之德人鉅公、而能博觀遐取、以資所學、故其聞見益廣、而行實益尊。文定公每謂其族黨、爾輩皆弗如也。蓋文定公以

道任天下之重、而先生與從弟侍郎公各得其家學之正傳、學者宗之。先生學成於家、名顯於朝、雖其深自翫襲于衡泌之下、粥粥若無能者、而海內善類固已浩然歸重矣。然竟以所學不能俯合時好、是以老而不達、韋布蓬蒿、若將終身焉。會朝廷博延儒先、崇信古學、俊乂彙征、從臣曾公開等十人以遺逸薦之於朝、有旨起先生於家庭。先生以母老固辭徵命、廼賜進士第、添差建州州學教授、將俾邦人之勸業樂群者咸有所矜式焉。先生猶力辭、而學者交贊其門、義不可卻也。始強爲之起、莅教于鄉校者七年、誠達心化、士風爲是翕然丕變、而其人問學之審、行義之篤、于今遂爲全閩多士之奧區矣。先生既秩滿歸籍溪、築室藝圃、棲遲丘壑、奉祠祿而家食者亦又累年。蓋嘗一爲福建路安撫使司準備差遣、居無何、以與大官爭辨征權是非、不肯詭隨阿容、卒亦請祠而去、遂絕無仕

進念矣。雖先生漠然不復意於斯世、然世之論人物、講治體者、莫不以先生未即大用、爲朝廷惜之。輔臣有以爲言者、由是以大理司直召、洊除祕書省正字、其擢用眷注蓋未艾也。而先生辭避再三、不屑就、已乃幡然而起。既至闕下、則又求去堅甚。諸公極力挽留之、不可回、有旨改秩授宣教郎、主管台州崇道觀以歸。歸未期年、以疾卒于家之正寢、享年若干。有論語集解二十卷、傳之學者、遺文若干卷、藏于家。先生之卒、實紹興三十二年某月日也。而以隆興某年月日葬于鄉里某山之原、從遺命也。先生兩娶劉氏、後娶嚴氏、二人並早世。有男孫一人、曰應進士業。女一人、適進士詹某。先生之學、本之以譙處士之清、居之以文定公之任、而濟之以和理、一之以誠實。守節樂道、不名一行、而粹然皆出於正。博取百家諸子之長、不主一說、而必體之於身、驗之于心。辭約而理備、行高而操堅。

與學者處、雖危坐植立、端默無言、而即之者莫不服深遠、去疵吝、油油然日與之偕、而且不知其益也。其里居貧甚、饘粥或旬月不繼、人不堪其憂。而杜門著書、躬耕養志、曾不以一介取求於人、至使家人忘其貧、而閭州鄉黨稱其仁。其性怡怡融融、無一日不樂。方且收召宗族子弟之髫鬣未冠者、草衣芒屨、布褐不韞、環列其前、而教以句讀訓詁、窮年矻矻、惟日不足。見者莫不笑其徒勞、而先生樂此不倦。雖得天下英材而教育之、不是過也。先生之在館閣也、屬逆亮干紀^③、聲爲南牧之言、邊鄙爲之震。先生匭書于朝、羸數千言、剴切體要、悉根本於經術、而莫不釐然曲當於世務。且力勸皇帝係隆民望、增重國體、亟用張魏公浚於內、用劉太尉錡於外、以銷侮拂、固封圉。上嘉納其言、二公由此召用。是時輿論專以折衝之任屬於張、劉二公、故建言者往往亦能及是、而先生首獨誦言於庭、



無所回婉、衆論藉以爲重、然後獲伸。夷考其一時
著龜獨智之明、旱澇備具之審、莫有爲先生斯言
比者、然後知先生晚年之黽勉一出、志在報國、其
通知時務之要、爲不苟然也。先生既葬而誌銘未
鐫、將欲狀先生之行、以求文於當世立言之君子。
諸門人之在建寧、以鄉黨之義相先、莫肯任此責
者、而近捨遠取、遂以屬諸某。某雖愚陋、不可得而
辭也。竊嘗謂論語記載先聖人言動、蓋群弟子相
與廣記講言之、然後集而成書、非成於一人手也。
明道先生之歿、伊川先生既狀其行矣、門人之達
者各自有所記、人人言殊、然後墓表立。今某之所
載、姑及夫先生平昔學問出處之大概、衆所共知
者而已。至於先生之潛德隱行、善言嘉話、一皆可
以爲範世翼教者、則有孔、程之門故實在焉、豈某
末學管穴之見能以究知、而盡識其純全、而盡知
其善美也歟。謹狀。

林之奇撰 《拙齋文集》卷一八

籍溪先生胡公行狀

先生諱憲、字原仲、姓胡氏、建州崇安人。故侍讀南
陽文定公從父兄之子也。祖聳、父淳、皆不仕。先生
生而沈靜端慤、不妄言笑。稍長、從文定公學、始聞
河南程氏之說、尋以鄉貢入太學。會元祐學有禁、
乃獨與鄉人白水劉君致中陰誦而竊講焉。既又
學易於涪陵處士譙公天授、久未有得。天授曰、是
固當然。蓋心爲物漬、故不能有見。唯學乃可明耳。
先生於是喟然歎曰、所謂學者、非克己功夫也耶。
自是一意下學、不求人知。一旦揖諸生、歸隱于故
山、非其道義、一毫不取於人。力田賣藥、以奉其親。
文定公稱其有隱君子之操、而鄉人士子慕從之。
遊日以益衆。一時賢士大夫聞其名者、亦皆注心
高仰之。於是從臣折公彥質、范公冲、朱公震、劉公
子羽、呂公社、本中共以先生行義聞於朝、詔特徵



之。先生以母老辭。既而折公入西府。又言於上。促召愈急。先生辭益固。乃授左迪功郎。添差建州州學教授。先生猶不欲起。郡守魏公玘爲遣行義諸生入里致詔。且爲手書陳大義。開譬甚力。先生不得已。乃出拜命。既就職。日進諸生而告之以古人爲己之學。聞者始而笑。中而疑。久而觀於先生所以修身。所以事親。所以接人。無一不如所言。於是翕然尊信悅服。而先生猶以爲未足也。郡人程君元以馴行稱。龔君何以廉節著。皆迎致之。俾參學政。於是教日益孚。士日益化。秩滿。復留者再。蓋七年不徙官。而太夫人年益高。不樂居官舍。求得監南嶽廟以歸。居累年。間嘗一爲福建路安撫司準備差遣。帥守大鬻鹽。私販者雖銖兩必重坐。先生爲陳法義。請寬之。而帥守顧不悅。先生於是有去意。久之。復請奉祠以歸。是時秦檜用事。天地閉塞。幾二十年。先生亦已泊然無復當世之念。及檜死。

羣賢稍復進用。白以先生爲大理司直。未行。改秘書省正字。人謂先生必不復起。而先生一辭即受。雖門人弟子莫不疑之。到館下累月。又默默無一言。人益以爲怪。會次當奏事殿中。而病不能朝。即草疏言。虜人大治汴京宮室。勢必敗盟。今元臣宿將惟張浚。劉錡在。而中外有識皆謂虜果南牧。非此兩人莫能當。惟陛下亟起而用之。臣死不恨矣。時二公皆爲積毀所傷。上意有未釋然者。論者雖或頗以爲說。然未敢斥然正言之也。至先生始獨極意顯言。無所顧避。疏入。即求去。諸公留之不得。上亦感其言。以爲左宣教郎。主管崇道觀。使歸而食其祿。於是向之疑者乃始愧歎心服。而繼其說者亦益衆。以故二公卒召用。而先生則以病不起矣。紹興三十二年四月十二日也。享年七十有七。明年葬於建陽縣東田里。先生兩娶劉氏。皆白水先生之女弟。又娶嚴氏。子男一人。愉蚤世。女一人。

適進士詹炳。孫男親仁、治進士業。先生質本恬澹而培養深固、平居危坐植立、時然後言。望之枵然如槁木之枝、而即之溫然、雖當倉卒、不見其有疾言遽色。人或犯之、未嘗較也。其讀書不務多爲訓說、獨嘗纂論語說數十家、復抄取其要、附以己說、與它文稿藏于家。先生所與同志唯白水先生、既與俱隱、又得屏山劉公彥冲先生而與之遊、更相切磨、以就其學。而熹之先君子亦晚而定交焉。既病且沒、遂因以屬其子。故熹於三君子之門、皆嘗得供灑掃之役、而其事先生爲最久。先生葬時、親仁尙幼、不克銘。乃今屬熹、使狀其行、將以請於當世之君子。熹不敢辭、謹件如右、以俟采擇。謹狀。淳熙五年七月日、門人宣教郎、主管台州崇道觀朱熹狀。

朱熹撰 《晦庵先生朱文公文集》卷九七

籍溪胡先生憲墓表

先生姓胡氏、名憲、字原仲、崇安人。紹興庚辰與某同爲秘書正字、原仲年長過倍、予敬而親之、原仲尤相愛、每同舍退、往往留語竟日。原仲自言少從其從叔文定公傳論語學、時時爲予誦說、以爲入道之要也。明年、原仲上書論事求去、天子待之良厚、縉紳皆榮其歸。官長玉山汪公聖錫合館職、七人置酒道山堂、以先生早賦歸去來之句分韻餞別。又明年而原仲沒。今蓋一世矣、其孫親仁遠來長沙、出門人秘閣修撰朱元晦所作行狀求表其墓。凡其家世出處、問學本末、元晦紀次有法、行遠無疑。若夫懷思舊好、尙論師友、以慰夫慈孫之心、則亦不得而默也。自堯舜禹湯文武周公以道相傳、見諸行事、所謂師弟子之說固不必論。惟孔子繼聖有作、無時無位、折衷六藝、授之門人、固嘗自謂文不在茲乎、而終有天喪予之嘆者、以顏子既死、曾子晚方傳道、其餘則所得未深、其器未大也。



馴至戰國、異端浸起、獨孟子能因師說、僅續不傳之緒。然諸子百家已復並行。道術自是分裂。至秦遂一掃而空之。漢興、諸儒稍習六藝之文、而不知明聖人之道、專門名家、互相矛盾、道德性命之理、仁義禮樂之具、視之蔑如。又其久也、雖訓詁章句、猶且前無所承、後無所授、況其上者乎。韓退之晚出於唐、頗以師道自任、終亦莫能救也。天啓聖朝、世與道興、上而元臣大老、信此道以覺斯民、下而老師宿儒、進此道以覺後覺、然後人知聖賢事業、本非空言。間有操持或謬、趨向或僻者、相與辭而闕之、縱未能盡得周孔之傳、其視歷代從事末流、失其指歸者、固已不同。乖離千歲、庶幾復合、茲非師友淵源之效與。方其盛時、伊川程公正叔之門、從學者衆、上蔡謝良佐、顯道最爲高弟、以其所得授之文、定公康侯、而涪陵譙定、天授亦^④學於程氏者。原仲既傳其家學、復往問易於譙、譙謂其學有

不可以言傳、特爲原仲稍發其端。原仲因誦所聞、譙弗許、曰：「心爲物漬、則不能有所見、惟學及乃可明耳。」原仲退而求之、久乃有得、喟然嘆曰：「所謂學者、克己工夫也。由是自信不疑、篤志力行、以至於老。中間可仕則仕、必行其道、可止則止、必致其義。近而一鄉、遠而四方、皆師尊之。於是元晦以先大夫之命、事原仲如父、既盡得其言行之美、而又曰：『進焉、今遂爲世儒宗、豈無所自而然哉？』顧予何足以知之？姑述見聞、附元晦所書之後、使親仁歸併刻之、以告來者。」年月日、具位周某書。

周必大撰 《省齋文稿》卷三五

陳東行狀

公諱東、字少陽、鎮江丹陽人也。曾大父諱廣、大父諱思齊、考諱震。自五世以來、以儒嗣其業、皆隱德不耀。公生而性穎悟、有氣局。未冠、已如成人、博學強記、善屬文。年十七、朝廷以三舍取士、入學、與諸

生居十年以上舍貢於辟雍升太學。在太學十五年。屢以校定試上舍。俱不利。人或誘以他道進。公正色謂之曰。吾雖不材。必欲取科第爲親榮。君奈何以是汙我耶。政和三年。朝廷大作雅樂。命太學生五百人習之。有司將按試於庭。或謂事竟且次第推賞。時諸生及縉紳子弟多以夤緣獲與者。人有德色。公時以齋長與焉。一日輒詣長貳白辭之。長貳謂公曰。樂成且官矣。人咸願與而不可得。公何遽辭焉。曰。寧有是事。萬一有之。吾何以僥倖進身耶。同舍生力挽之。卒不肯與。有識者高之。俄而奔先君喪以歸。哀毀成疾。終三年不入妻室。鄉黨稱其孝。服除。復游太學。毅然有澄清之志。每與士大夫論巨姦。往往怒髮衝冠。見者爲之竦然。宣和八年。金人寇河北。徽宗倦于勤。淵聖皇帝即位。明日詔內外及士庶言時政得失。公慨然曰。太學賢士之關國家涵養之地。豈可無應詔者乎。乃率

在學數百人上書闕下。首論蔡京、王黼等誤國姦狀。乞正典刑。以折敵氣。淵聖納其言。然執政者營救之。猶未遽出。時金人犯京城。公在圍城中。再上書。反覆論京等罪惡。繼而臺諫亦論列京罪。於是朝廷始盡黜而誅之。明年春。淵聖方召五路兵以拒敵。用李綱、种師道主其事。而肉食者偷安畏懼。欲爲城下之盟。沮罷綱、師道等。京師俱罷兵。金人乘我不備。恟恟不自安。公曰。事急矣。於是夜復草書。黎明合在學諸生伏闕下以進。軍民不期而會者十餘萬人。淵聖悟。即起二公於廢籍中。金人聞二公之復用也。因遂解去。初。公之與諸生伏闕。軍民始相聚以觀。俄至數萬。奈其書爲姦人蔽塞。不即通。軍民因毀闕前欄楯。搗登聞鼓。其不逞者憤宦官之前爲姦也。乘勢鼓噪。殺御藥朱拱之等。至揉其膚髮。公止之。雖甚力。衆怒譁不聽。有同舍生前謂公曰。事勢如此。奈何。盍且逃死乎。公笑曰。君



何言之謬耶。吾去則君等戮矣。顧君等何罪。吾今自是頭已在地矣。繼而綱師道出謂衆曰。朝廷已復用我總兵矣。衆皆識二公豐采。遂稍稍散去。實靖康元年三月初五日也。於是用事者遂以脅持君父爲名。令太學官屏公出學。已而王時雍輩又欲矯制盡殺太學生上書者。賴開封府聶山力救得免。淵聖復降內批付山曰。前日太學生陳東言事。誠出忠義。可令還學。山同祭酒楊時出御筆。率學官請公。或曰。君可去矣。公曰。吾家貧親老。欲由學校取科第。今天子禮士如此。吾何舍學校去乎。遂還學。久之。宰相吳敏請以官命公。實欲寵之也。公再上書力辭不受。夏五月。因謁告歸省親。公既欲以科舉進。是歲秋八月。應鄉貢進士舉。預薦未行。奉親居里閭。甘旨之餘。日與親舊把酒爲樂。酒後耳熱。往往援筆賦詩以自適。冬十月。金人犯京城。公憂國步艱危。至寢食俱廢。繼聞京城陷。乃北

向慟哭。或中夜興起。恨無死所。明年夏五月。今上皇帝即位於南京。改元大赦。公聞之喜而不寢。謂所親曰。吾今始有生意。未幾。有旨召公。於是知鎮江府。延康殿大學士趙子崧移文趣公行。公聞命戒嚴行李。或勸公無行。公曰。新天子即大位十日。而下詔呼一布衣。必欲聞天下之言也。有君如此。頂踵尙奚惜耶。遂就道。以棺自隨。示不求生以害仁。八月十五日。至行在所。即具狀申尙書省。不報。因寓居神霄宮。杜門不敢見賓客。聞宰相汪伯彥黃潛善議欲遷都建業。京師人情日益不安。遂上書乞罷潛善。伯彥進用賢相。又上書請車駕早還京。決策親征。又論遷都於國家大有利害者。皆不報。公知事勢已不可回。欲乞歸田里待罪。狀未及上。私念之曰。天子以忠言召我。若不以微罪行。人必以我爲畏禍而去。遂蔬食焚香。草書再上之力論潛善。伯彥等姦。書上。潛善以公言逼己。乃與宦

官康履謀以他事奏請、令應天府尹孟庾追取而殺之。蓋康履方怒公在靖康初伏闕致軍民殺其黨朱御藥輩、而孟庾又王黼客也。潛善、伯彥既有殺公意、二憾在焉、遂置極法。公自赴召至行在所、凡十日而得罪死。然公雖以言忤權貴見殺、而書中所言、多中時病、朝廷往往略施行之。方應天府追吏之來也、公睡正熟、寤寐而見之、乃徐起更衣索飯、語吏曰、朝廷召我來、未曾得見官家、爾曹不可無禮、容我寫家書。吏曰不敢。遂就食、食訖索紙作書、區處家事纖悉備盡、字畫遒勁、有顏柳遺法。臨刑神色不變、既死、面如生、識與不識之人、莫不爲之流涕。隨行僕夫具棺以殮、鄉士胡璣爲護其喪以歸。建炎三年春、車駕南幸臨安、大臣有以公死爲言者、上始驚悟、即命贈承事郎、仍官有服親一人。夏四月、車駕回幸建業、道由鎮江、參知政事王綯爲上言曰、昔太學生陳東嘗奏封事、出於忠

義、用事大臣私涉嫌疑、力行奏請、亟加誅戮。上曰、朕方深悔過之誠、旌盡忠之士、旣已追贈京職、仍官其子、今行經其鄉、未忘於懷、可特贈錢五十萬。紹興三年再貶南京用事大臣、復追贈朝奉郎、秘閣修撰、仍與兩資恩澤、賜官田一十頃。誥詞御筆云云。初、王綯旣言公以忠死、上即命賙其家、官其子、綯退而謂人曰、以此見陳公之死非聖心也。公被罪之日、年四十二。其配吳氏、生二女。方赴召時、吳氏有娠、一日晝寢、夢白蛇自身外繞其身、驚而覺、因語家人、家人皆怪之。及訃音至、始知夢之曰、乃被罪之日也。遺腹後得男、聚族而觀之、且喜且悲。知公之後不絕、名曰嗣宗。二女、長適忠翊郎楊中和、次適潘好謙、右迪功郎、處州麗水尉、皆以公恩澤故。公之歿也、祖母蔣氏卒、繼母吳氏年高、而家益窶、二女未及嫁、而嗣宗尙在孩抱。公之配吳氏、乃謀諸姑而請於朝、令南受所賜有服親恩命、



哀慟累日。始公母蔡氏懷公七月而生。六歲而蔡氏卒。鞠於吳氏。公事父母盡孝。事祖母尤謹。而吳氏視之如己子。繼生二子。曰坦曰南。兄弟友愛。人不知其異母焉。公平日與朋友信。其於鄉黨恂恂然。宗族姻婭皆得其歡心。家雖貧而輕財重義。賙人之急。雖質衣冠不靳也。爲文章不事華靡。命意立言。必合風雅。有詩文數百篇。經兵火多不存。自少尙氣節。有憤世嫉邪之志。當宣和末。群姦益用事。公知其社稷必危。嘗因大雪。與同舍生飲太學。初筮齋。酒酣聯句爲樂。衆皆默然不能落筆。公獨爲古詩云。飛廉強攪朔風起。朔風飄飄灑中土。雪花著地不肯消。億萬蒼生受寒苦。天公剛被陰雲遮。那知世人凍死如亂麻。人間愁歎之聲不忍聽。誰肯采摭傳說聞達太上家。地行賤臣無言責。私憂過計如杞國。揭雲直欲上天門。首爲蒼生訟風伯。天公倘信臣言憐世間。開陽闔陰不作難。便驅

飛廉囚下酆都獄。急使飛雪作水流潺潺。東方日出能照耀。坐令和氣生人寰。又爲律詩三十韻。有云山嶽遭埋沒。乾坤着蔽蒙。已成堆積勢。漸費掃除功。其措意類如此。在淵聖皇帝朝。凡六上書。今上皇帝臨御。又三上書。公初上書論蔡京。王黼等。太學人人言殊。雖平日與共腹心者。然亦忌憚。蓋以數人者用事日久。盤根錯節。恐未易以言破也。公乃曰。公等未許我。我當斷之於心。於是閉門焚香。危坐默自計。曰。書上而言幸中。朝廷設命我以官。雖貴且顯。吾不受。設得罪以死。吾不悔。如是可也。繼而諸生見公書。翕然願從。俄而祭酒謝克家。司業蓋望之。博士孫覲坐堂上。克家曰。聞爾率諸生伏闕。奈何。俱不敢答。至覲則曰。太學何蕃蓋所以稱於當世者。獨以叱六館之士。不從朱泚之亂而已。未聞伏闕也。上書何爲。公亦不答。即長揖而退。二公訖無所發怒。諸生又以是偉公。故書終得

達今往往皆流傳於天下。公初自太學奔喪歸而先君已葬矣。公以喪非治命、欲擇遷葬蔡氏合之、志未遂而公被罪以歿。南後於縣之尚德鄉桐村之原得吉卜焉。以建炎三年十月十四日遷先君與蔡氏合葬、以成公之志、而公之喪實祔焉。南重惟不肖、未爲公立墓隧之碑、今述公平生事列於行狀、以備史官采擇云。

陳南撰 影印文淵閣四庫全書本《少陽集》卷六

特奏名李公墓誌銘

邵武軍光澤縣東里所有地曰烏洲、李氏世居之、爲郡著姓。其先有贈大理評事者諱鐸、始以文行知名鄉黨。生太常博士誥、始登進士第、卒贈朝請大夫。陳忠肅公賢之、稱其真率樂易、有古人之風。其仲子深、紹聖間以論斥時相之姦、與任公伯雨等俱入元祐籍。季曰處士濬、隱居不仕、而其葬也、右文殿修撰李公夔實銘之。蓋自其先世、所與交

游姻好盡一時知名士、故其子弟見聞開廓、趣尚高遠、不與世俗同。若特奏府君諱某、字得之者、則處士之長子也。少治周禮學、兼通左氏春秋、爲文簡古、不逐時好。弱冠遊太學、薦而不第。舍法行、當充貢、又不果行、竟以累試禮部恩。奏名天府。將入奉廷對、前一日卒於臨安之客舍。實紹興五年八月十八日、年才五十有二。歸殯、宅之東岡。三十二年、其子呂乃更卜兆于烏君山下獅子嶺之原、奉其柩而遷焉。淳熙六年、呂始見予廬阜之陽、如舊相識。一日、泣而言曰、呂不孝、先人之沒二十七年、而後克以禮葬。葬又十有九年矣、而未克識、將無以爲幽遠無窮之計。惟吾子幸而予之銘、因出其親友、崇陽大夫游君嘗之狀以請。予辭謝不獲、乃次其事如右。按狀又言、府君爲人事親孝謹、友愛其弟甚篤、之死不少衰。遇族黨有恩意、少有忿爭、則爲居間極力平處、不令入官府。不幸死喪、則爲



經理其家事而任其婚嫁之責。嘗有死上庠者、遣仲弟護其柩以歸。里人有以惡聲至者、未嘗與之較。至周其急、則輟衣食不顧也。諸弟嘗問善人之道、府君語之曰、臨事而無陰據便利之心、斯可矣。又嘗語人、事有當爲、力雖未及、亦勉爲之。若必有餘而後爲、則終無時矣。此其行身及物之本意也。平居方嚴、不妄戲笑、而遇事輒應、無所凝滯。從弟西山先生嘗面歎曰、兄於答問若不經意、而受其言者反覆十思、終無以易。此非諸弟所能及也。性尤敦厚質實、發言處事不以幽顯物我爲間。樂聞人善而務掩其惡、所與交皆巨人長者、無不愛而敬之。縣嘗以民兵爲屬、府君爲制戰陳擊刺之法、而以時閱習之、甚可觀也。令欲以聞、冀爲府君得勳賞、府君笑謝去、不復有所預。時海內多虞、舉人有不能試禮部者、往往以恩直補官。人有謂府君盍自言者、府君不答。老之將至、婆娑丘林、吟諷書

史、迺然自適、未嘗有不遇之歎也。嗚呼、予生晚、不及識府君、而游君不予欺也、則府君者可謂好德有常之士矣。乃不得少見於用以沒其身、其亦可悲也夫。夫人上官氏、朝議大夫合之女。繼室黃氏、曲江令銓之女。子男三人、呂爲長、次某、次某。女四人、游君與將仕郎高志旻、從政郎何鎬、保義郎上官賁其婿也。孫男女於今二十有六人。而呂之彊學既有聞、又教諸子皆有法、天之所以報府君者、其將在於此乎。乃爲之銘、使刻宰上以竢。其詞曰、利不自予、惟義之取。義則彊爲、惟仁之歸。孰長其源、不豐其委。斯丘斯藏、有起無墜。

朱熹撰 《晦庵先生朱文公文集》卷九一

宋故贈中大夫徽猷閣待制諡忠襄楊公

行狀

曾祖亨、故不仕。祖中謹、故不仕。父同、故潭州司戶參軍、贈宣義郎。公諱邦乂、字希稷、胄出漢太尉震。

五代之亂、徙居廬陵、故今爲吉州吉水人。世以儒學相承、宣義府君登進士第、初命長沙民掾、未終更而早世。後以公追秩宣義郎、公其季子也。父歿之五月始生、未冠而妣陳夫人即世、兄弟相爲命。公天性孫悌、視兄猶父、嘗揭其所居之堂曰華鄂。仲氏沒、公時賓貢入京、聞訃慟絕。太學七年、苦心嗜學、言行忠敬、必以古人自厲。政和乙未、以上舍生解褐賜第。還家拜伯氏、感兄之訓、更華鄂曰韓。同郡郭孝友記之曰、予嘉楊氏友其季而不伐、恭其兄而不忘、是可振頽俗矣。一時名勝賦之者數百人。初調歙州婺源縣尉、改蘄州州學教授、以育才作人爲己任、不顯文辭而已。學政最淮西、部使者交薦、授從政郎、廬州州學教授、改南京宗子博士、又改建康府府學教授。秩滿、改宣教郎、辟權知本府溧陽縣事。縣久苦苛政、公當官豈弟、先教化、後刑威、均征繇、遠近悅服、惟恐其去、傾邑請留。

於部刺史者數千人、尋命爲眞。光堯踐祚、覃慶轉奉議郎。時二聖北狩、中原多故、寇盜蠭起。公訓民爲兵、五里一墩、號令期會、明信而肅、枹鼓一鳴、遐邇畢集。未幾府兵叛、閉關殺官吏、四境狼顧、慮變。公繕治軍實、大閱民兵、申嚴號令、刻日趨府討叛者。賊畏公威聲、丞白部刺史、願從諭招。發運方公會諸郡之師討賊、公董民兵首集城下、士整而奮、器甲犀利、旗幟鮮明、觀者偉之。已而群凶就擒。初、兵之叛也、溧陽舊縣鎮射士數十百、以羽檄往戍他所、乘隙離次而歸、劫巡檢爲魁、甲而趨溧陽、欲屠之以掠其金帛。公即帥民兵逆之、諭民出財募士、殺敵者賞、一戰賊殲焉。邑人德公、肖像祠之。部刺史奏功議賞、公悉推遜僚佐云。三年盜不入境。建炎三年十月當受代、九月除通判建康軍府、兼提領沿江措置使司公事。大將杜充擁兵數萬保建康、公以兵隸焉。是時賊李成剽江北、瀕江守備。



十一月、充謂成師老、遣^⑧戰艦進擊之。偶金虜大至、與成合、我師敗績。賊取我舟以濟、奪馬家渡、充出兵復戰、不利、潰兵夜叩南門以入。虜進營于南門外鐵佛^⑨寺、充下令官吏兵民用命城守、公信其言。明日充悉師出下水門、乘舟以遁^⑩。金陵空無守備。知軍府事陳邦光柔怯不足賴、是日父老驚懼、擁邦光出城、迎拜敵前、亦強公以行。公至街^⑪橋、大呼曰、我豈爲降虜者。欲赴水、父老救免。既至虜營、邦光以下皆拜願降、公獨僵卧不起。邦光乃啓曰、通判素有暝眩疾。虜酋曰、四太子者乃掖出療之、遣所降官屬勸降、公閉口不答。明日復遣所親厚者說之、曰、公故貧、有兄垂老、仰分祿、寡嫂孤姪遠來就養、五子尙幼、一女未嫁。今去鄉數千里、妻孥無所於寄、寧不念此。國家事勢至此、公不降將誰爲。公曰、茲人之常情、吾獨無情乎。家國事不兩立、吾計決矣、願無辭費。明日、四太子置酒、令僞知軍府

事號張太師者及前知軍府事陳邦光召公議事、公拒不往。衆挽以至庭、其二人已就位、虛一席以俟公。及階、以首觸柱礎、疾呼曰、我豈苟生與犬豕均飽者。流血被面、憤不蘇者久之。左右掖以出、虜酋大怒、幽之他室。明日、邦光復請出諭使降、乃釋出。至庭、邦光降階語曰、事固無可奈何、願少回意、毋爲徒死、無益也。公瞋目曰、爾以從臣守藩、臨難不能死、甘心屈膝、犬豕苟生、復幾何時、使人人效爾、朝廷何賴。時坐有虜官曰團練劉者、取幅紙書死活二字示之、曰、汝無多言、忠於趙氏即書死字下、歸我書活字下。公起取筆徑^⑫書死字下、虜酋大怒、復囚之。先是、公刺血書襟曰、吾寧作趙氏鬼、不爲他邦臣。虜人初不知也。明日復引公出南門、砦問公意如何、答曰、直不能降虜爾。四太子震怒、公廼大罵曰、我食趙氏祿、終不負國。汝夷狄豈是真天子、乃使我從汝。國家何負汝、而敢肆凶殘。吾恨

未劍汝頸。吾豈爲死怖耶。遂裂布褌衣以祈速死。虜見所書襟。知不可屈。遂害之。割腹取其心。聞者哀壯之。實建炎三年十一月二十七日也。享年四十有四。先娶傅氏。生女一人。後娶曾氏。生男五人。振文、郁文、昭文、蔚文、月卿。月卿蚤夭。時振文纔十歲云。女後歸新淦進士陳敦書。四年五月。軍府上其事于朝。天子愍悼。加贈直秘閣。官其子二人。詔廟祀于建康府。紹興元年冬。知軍府葉夢得復請于朝。以公大節罕儷。褒表未稱。宜加秩賜諡。錫廟號。葬以禮。二年三月。詔復贈公朝奉大夫。諡忠襄。廟曰褒忠。仍付其事史官。命有司改葬。三月甲辰。夢得奉天子命。率官屬啓公殯。具衣衾棺槨。葬于廟之上東南隅之山。五年十一月。朝廷以公子幼未仕。即其鄉賜田二百畝以廩其家。七年四月。駕幸建康。大臣復以爲請。光堯曰。顏真卿異代忠臣。朕昨猶官其裔。楊邦乂爲朕死節。可不厚褒。加贈

徽猷閣待制。再賜田二百畝。銀兩絹疋。各百。復官其一子昭文。昭文孫于孺文。以報託孤之恩。杜充之遁也。或告公。盍去諸。公曰。我通守。苟去。城誰與守。我尙愛生也哉。雖然。吾仲氏惟一子。不可無炊火。乃命其猶子孺文御其母以奔溧陽。而屬其子。明日城失守云。公神色明秀。長身山立。見者畏愛。居無事時。溫良惠和。與物無忤。及遇事。勇決彊毅。萬夫不能奪也。其德行修於家。稱於鄉。信於友。爲郡學官。教孚於弟子員。爲縣大夫。恩洽於百姓。至於以身殉國。立天下萬世臣節之端。凌霜貫日。非一時適然也。故天子褒之曰。綽有張御史之風。無愧顏常山之節。紹興三十一年冬十月。逆亮渝盟。寇邊。入淮南。至江北。建康震擾。人皆禱于公廟。楚巫占之曰。吉。狄主其殂。狄旅其遁。大邦其寧乎。有老人夢公。告之者。亦云。十二月。光堯視師江左。父老杜彥誠輩數十百人述其事。遮法駕以聞。有旨



儒藏

宋儒碑傳集 卷九二

五八七

下江東帥漕司驗問。建康帥臣張公浚上其子昭文、蔚文祿尙不及、願官之以勸忠義。會今上皇帝即位、命官昭文、明年又官蔚文。公後以振文陞朝、四贈至中大夫。公之被害也、有卒子曰陳大伯者、嘗從公爲僊、至公被囚、陳在旁不去。公罵僞四太子、陳亦舉臂擊之不中、遂同遇害。又有主山砦曰賈三郎者、武勇絕人、時號爲賈山砦、亦同公被執。賈命其子結里人爲鬻薪者、置兵於薪以入。閩人索之事覺、虜礎其父子於市。朝廷旣褒公之忠烈、二人者亦各官其一子以武階、邦人肖其像於公廟、立公之前、以從公祀云。謹狀。淳熙十三年正月二十四日、姪孫朝奉郎、尙書吏部員外郎萬里狀。

楊萬里撰 《誠齋集》卷一一八

校記

- ①承：原作「成」，據宋浙江刻本《晦庵先生文集》改。
- ②銘：右引作「表」。
- ③逆亮干紀：原作「敵警日逼」，據小山堂本《拙齋文集》改。
- ④天授亦：原作「夫授易」，據《宋史》卷四五九《譙定傳》改。
- ⑤恩：原作「思」，據宋浙江刊本《晦庵先生文集》改。
- ⑥計勸：原作「計勸」，據四庫本《誠齋集》改。
- ⑦諭：原作「論」，據右引改。
- ⑧遣：原作「遺」，據右引改。
- ⑨佛：原作「作」，據右引改。
- ⑩遁：原作「道」，據右引改。
- ⑪「邦光」至「至街」十六字原脫，據右引補。
- ⑫徑：原作「經」，據右引改。
- ⑬銀兩絹疋：原作「兩銀疋絹」，據汲古閣本、四庫本

《誠齋集》乙。

⑭治：原作「治」，據四庫本《誠齋集》改。

⑮殂：原作「殖」，據右引改。

⑬公：原脫，據右引補。

宋儒碑傳集卷九十三

程瑀

龍圖閣學士廣平郡侯程公墓誌銘

淳熙三年八月、宣教郎、充江南西路提點刑獄司、幹辦公事程宏靖以其先君子龍圖閣學士、廣平郡侯行述抵某乞銘。某宣和乙巳冬在上庠、適醜虜圍京城、詔求願使太原者、人莫敢往、公奮然請行。某聞其風而壯之、願爲公執鞭而不可得。今獲書公之盛德懿範、其榮多矣、其又奚辭。謹撫行述、紀其世、叙其文行、以識其壙。公諱瑀、字伯宇、系出高陽、黎爲祝融、至周有伯符啓封於程、後以爲氏。暨伯某父、爲宣王大司馬。晉大興時、元譚持節行新安太守、代還、百姓遮道請留、下詔褒諭。卒、元帝賜其子孫田宅於新安之歙縣、遂居黃墩。侯景之亂、靈洗糾合鄉里、保黟、歙有功、仕陳官至司空。太建中論佐命功、詔配食武帝廟庭。其後散徙、居浮

梁程山者、於公爲十世祖。高祖延珠有至行、喪親、廬墓三年、鄉先生書其事於碣。是生曾祖諱仲卿、家法益修謹。兄弟五人、旣降喪、共爨而居者餘二十稔。王父諱禦、好倜儻、仗節立義、不輕然諾。喜交當世賢豪、如尙書彭公汝礪、度支金公君卿皆雅故。樂施與、緩急叩門、必稱所欲而後已。用是家益寔、而居之甚安。鄉里稱爲長者。刻意儒學、詩文最工。部書梅公執禮嘗見篇什、歎其詞致清婉。皇考拊純誠寡欲、通諸經、尤深於易。舉進士不售、則高蹈丘園。晚以公故封承議郎、累贈宣奉大夫、尙書左丞、石林葉公夢得銘其墓。皇妣金氏、即度支公之孫、累贈太淑人。先是王父以季女妻同邑臧氏、久而未字。王父念之、及公之生、乃命金淑人舉以嗣其姑。故公初爲臧氏。其文行曰、公在齠髫、志氣不群、少長續文、諸老先生歛衽敬服。公慨然抱命世想、益自潛心經術、冬不爐、夏不扇、歌聲出若金



儒藏

石人比之范希文云。崇寧三舍法行、貢入黌序、由上舍擢天下第一。徽宗皇帝開設學校、文治煇然。公於是時挾藝與四海英髦爭長雄、每試得雋、聲聞籍甚。上舍揭榜、是日徽宗適幸五嶽觀、亟遣中使宣問大魁爲誰。中使還奏、即去年校定第一者、徽宗大喜。釋褐授承事郎、太學博士、時政和六年也。宣和元年轉宣教郎、二年授提舉京兆府等路學事、借五品服。陛辭、徽宗遽曰、卿不須行、除卿館職。公因論乞試教官、不用兩學爲格、次論遇祀事乞先以定儀揭示有司、除秘書省校書郎。四年轉奉議郎。丁臧氏父母憂、服除、除尙書兵部員外郎、轉承議郎。七年、高麗使回、充送伴使。徽宗面諭、朕厚遇遠人、所至供億有不如法、當奏劾。公次南京、副使劉士元欲奏府中滅裂、公曰、未見有滅裂處、若驟按之、恐州縣望風、增大事體、倉卒間公私不勝其敝。士元以爲然。先是人使往來淮浙、類起丁

夫輓船、縣卒千人、或水溢、多溺死者。浸淫上聞、有詔禁止、而提舉人船王珣不悅、畫別敕許遇風不順、或水澀、趁潮起夫牽輓。中書舍人孫公傅封還、徽宗大怒、以散官安置。給事中許公翰駁奏責傅太重、落職宮觀。及公渡淮、所過復如往日、即諭縣令、已有御筆禁止、淮民不遵守、何耶。令曰、漕提舉約束俱爾、其敢違乎。遂約士元列奏、士元畏珣、不敢涉筆。公獨銜以聞、俄報所列漕及令皆放罷、取勘、中外始知天子愛民。是時封駁久廢、方置講議司、討論裕國富民之政、孫許一時名流、相繼論駁、士大夫交慶。及公奏至、不謀而同、公議浩然歸重。使還陛對、遂奏云、高麗使人往返淮浙、起夫騷擾。昨來曾得御筆禁止、比至淮浙、親見州縣違戾、已按劾聞奏。而王珣以臣異議、勢必妄有奏陳、願陛下垂察。徽宗曰、只爲擾民不便。珣挾門使王通勢、必欲危以法、果誣奏公所至宴飲、專務沽譽、敢違



御筆按劾州縣乞賜斥責。送淮南提舉常平司體量。珣竟坐誣罔。是秋引法歸本宗。冬金虜陷燕山。嫚書既至。朝廷議和。且求願使太原者。時北虜入一軍在燕山。二太子幹黎勃主之。一軍在太原。相國粘罕主之。公率同僚入乞文字。惟朝廷所使。衆斷斷不可。乃獨抗疏請行。遂借給事中奉使河東。或以咎公。公厲色曰。當朝廷危急之秋。苟利國家。雖捐軀不計也。將行。會欽宗皇帝登極。虜聞傳位。相顧失色。且謂契丹昨來事急。乃內忌太子得人。心遽自戕滅。今中國如此。事未可量。遂有講和意。及虜騎將至河上。王師焚橋不戰。而北京城大震。密議南狩。右丞李公綱持堅守之說。中夜奪其議。黎明御翠華門。宣諭厲兵城守。衆心少定。是夕虜使來邀大臣議事。詔右丞李稅。右司郎中鄭望之往。既議金繒之數。且許割三鎮地。有旨。假公戶部侍郎。河東路幹當公事。時秦檜亦假禮部侍郎往。

河中。初皆未知朝廷遣使之意。及見少宰吳敏。敏曰。此行也。實割中山府路地界。公與檜各入奏云。臣等但願奉使講和。未嘗請割地。今和議已定。而割地則自有主議之人。不報。即見宰相申前說。敏見拒甚力。遂行。綱時在御營司。專主戰守。方與官屬措置起兵尾擊。見公。悵然顧曰。勉之。公曰。苟右丞之計成。某輩又何足惜。夜至虜營。無所繫屬。樞密路公允迪以坐氈假公席地而卧。遲明上馬北去。暮則張幕藉草野宿。越數日。糧糒告竭。僅分甌粥。既渡黃河。憩於沙上。公顧謂同行曰。虜未全渡。間得數萬騎掩擊。首尾不相救。可以雪圍城之耻矣。給事沈公晦曰。公將置身何地。公曰。王師苟有功。我輩豈復爲身也。將至中山。虜命一軍與公俱。既至城下。諸帥已先得朝廷密諭。俾勿割地。城守甚嚴。虜使王訥來至城下。遙語。復不能下。遂與俱至燕山而還。時靖康元年四月也。中朝諸公聞公

南歸、舉笏相慶、謂非唐儉輩可比。既至京師、對於崇政殿、欽宗曰、國事艱難、極知卿奮不顧身、慰勞備悉。問虜情何如、公對以二太子者雖未易測、然屢云、既許我三鎮、而一城一縣全未割、如九月事不了、再領兵南去。臣度其意、似欲聊得數州以爲名而歸。粘罕持軍尤暴悍、非二太子比。因乞奏修塘漿、飭土兵、增莫州戍。又奏金虜所恃者馬、今當修武備、爲險阻、使不得馳突、始可與較勝負。欽宗曰、卿料虜人今冬來否。公曰、臣謂必來。朝廷以臣爲張皇、然臣不敢保其不來。陛下第力爲戰守之計、庶幾彼不得肆。登極覃恩、轉朝奉郎、至是有旨、特轉三官、三辭不允、除右正言。入謝曰、臣備員兵部、慚未圖報、豈謂誤恩、擢實諫垣、大懼無以稱職。欽宗曰、但知無不言、便是稱職。公自是苟有所見、盡言無諱。嘗言、興衰撥亂之君、不可復循持盈守成之法。方今盈盛之業、既虧、衰亂之形已見、凡偏

而不起之處、當力救而急拯之。故賢在所急用、而佞在所急去、利在所急興、而害在所急除、安在所急圖、而危在所急避。當今急務、一切解弛、而股肱大臣玩歲愒日、莫肯以身任天下之事。欲慕祖宗而法術無追、欲斥閹宦而寵任益堅、欲鋤奸惡則薄示典刑、欲汰謬濫則苟容僥倖。兼聽而不能得其言、委任而不能責其效。苟且之習復成、黨與之私浸廣。以調兵則失於不熟講、以儲粟則失於不早計。輕出號令而不憚紛更、耻言財利而不憂匱乏。愛民利物之吏未盡序、死綏斬級之士未盡錄。潰潰若此、而強敵撓邊、長驅之志未艾、上下偃然安之。自以爲能革前日之弊、臣恐前車既覆、而後車復不戒也。臣望陛下發揮英斷、磨礪臣鄰、毋務苟且、毋樂因循。如臣所陳、最時病之大者、悉取而更張之、則中興有漸、而興衰撥亂可以埒美古人矣。欽宗曰、朕非不知、但恐慮有未盡、決意行之、必



有所失。公曰：天下之事故當如此，然謀之既審，慮之既熟，而優柔不斷，實隳事政。又上疏言：昔唐魏徵曰：君所以明兼聽也。所以暗偏信也。陛下兼聽之道雖不廢，而偏信之私尚不免。何以言之？廟堂之上所言公，公言之。所言私，王者不受私也。比來宰執進對留身者，無日無之，以爲公則同列自當共論，以爲機事不可不密，則在位孰爲不當與聞者？深恐喋喋多端，足以亂陛下之聰。乞明詔宰執各竭己見，互相可否，務歸至當，然後俱退，無復留身，庶免偏信之惑。欽宗曰：近日頗甚，當降出文字。又曰：近日差李綱兩路宣撫，外議如何？公對曰：外議固以爲宜，然李綱緣前與大臣議論不同，聞命之日，再三辭免，蓋慮中外不相應。今既統軍北去，須賴聖明任之勿疑。欽宗曰：在外軍事如有所聞，卿一一奏來。公既退，乃奏：朝廷近賜粘罕書，頗加責誚。其人剛戾狠愎，志在必得太原，然頓兵累月

而城不下，氣亦稍沮。若以甘言啗之，恐或可解。昨聞遣使遺賂與幹黎勃，意彼必有厚薄之恨。今復以書責誚，適足以鼓其怒，宜少易書詞。又謂州縣募軍，有司急於及額，往往捕捉平民，抑勒刺填，遂致行旅斷絕，居民驚散。乞申明戒諭，若抑勒刺填而人品年甲不應者，並行斥責。又湖南洞兵未嘗遠離鄉土，若一例調發，恐近則鳥竄鼠伏，連結蠻獠，別致生事；遠則在路剽劫，流爲盜賊。乞行寢罷。又京畿保甲幾五萬人，合而教之郊外，暴露日久，因致失業。乞止令逐縣訓練，乃會集郊外，教閱旬日，則復歸之，以俟緩急期會。又論江浙用兵，所費浩穰，人戶入粟輸金，命有司按實補官可矣。託爲上書可採，效用盡心，並理選限，依官戶法，未見其可。且民間出於情願者既少，官司必至科配，託勸誘之名，爲科配之實，所得不廣，而所害者大臣竊爲陛下不取。閩部額外貢茶，漕臣趙岍掌內藥局

不爲受進、畫旨施行。公論、岼執政大臣、不能持正格物、乃敢以此嘗陛下。昔漢文卻千里馬、孝和庸主也、猶能勅大臣不受龍眼荔枝之獻。陛下縱不能比德漢文、安可有愧孝和、願斥岼、勿使衆口騰議。欽宗曰、朕不嗜此物、以備國信所用耳。公曰、陛下儉德、天下共知、此雖微事、但恐即位之始、此隙一開、後必滋甚。如國信所用、恐亦自有定額。時臺諫章疏付中書、多沮抑不行、或稽留不下。公上疏論、宰執所行是、臺諫何所復言。有所言、則正與爲敵。臣聞君猶心也、宰執猶股肱、臺諫猶耳目。任耳目以廣視聽、將以運用股肱。今股肱反蔽耳目、陛下將誰與爲治乎。臣聞眞宗時、嘗詔諭諫官御史、各令舉職、仍令中書置籍記其言、事行與不行、歲終具奏。蓋非特稽考所言當否、因以知其人、亦以防壅蔽之患。伏望陛下特賜舉行、仍於廣內創制臺諫章疏總目、聽政之暇、雍容觀覽、不惟裨補治

道、因考其事、有當行而輒稽留未進呈者、督之執政。庶幾股肱耳目之任、不至偏廢、而治功可望。又論、臨御以來、搜求疏遠讜直之士、布在臺諫、虛以聽納、是誠有意祖宗之治矣。然陛下喜受人言、而未可謂善聽言、喜受人諫、而未可謂善納諫。聽言納諫云者、必深思而熟計之。當理則行、不俟旋踵。若受而不能用、與不受同、實無益也。欽宗嘉納。余應求、陳公輔忤執政意、相繼去國。公論、應求、公輔踪跡孤外、志操凜然。陛下擢爲臺諫、士大夫方慶言路得人、應求等亦感激奮勵、知無不言。公道少申、邪人側目。一旦論事稍涉嫌疑、而大臣已有擠陷之者、臣恐自此直言之士不安其職。欽宗曰、二人相與爲黨、向日伏闕、蓋二人唱之。公曰、伏闕數千人、二臣時爲館職、恐不能鼓倡。欽宗曰、耿南仲親見。公曰、臣聞方士庶伏闕、二人入局、爲衆要留。南仲宣諭聖旨之時、卻得公輔轉諭衆人。欽宗曰、



南仲殊不如此說。公曰：陛下旣以南仲之言爲然，便當以鼓倡伏闕罷斥，不當因其言事指爲觀望。且南仲以其人爲有此事，當其初除諫官，不奏白，何也？給事中王雲使虜歸，言王訥意望朝廷遣三使至燕山，幹黎勃所，然後使人導之見其主及粘罕，大則不及歲賂，小則不須禮物，惟約使人密至。又云朝廷三遣蠟書至余都，悉爲粘罕所得，欲敗和議。朝廷疑其不實，猶豫久不決。公上疏乞遣使，且言：和議成則利歸於幹黎勃，否則功歸於粘罕。余都之事有無未可知，萬一有之，而其勢果盛，金虜奮自小國，強兵力戰，臣服諸虜，殄滅契丹。余都果能崛起，恐一二年間未能興復。今我疆土自與金虜爲鄰，而余都乃在雲中之北，舍強而就弱，棄近而就遠，背正道而從詭計，失王者御四夷之體。又蠟書旣爲粘罕所得，往結余都者達否未可知，乃先絕幹黎勃主和之意，計亦左矣。就使余都之

約已固，彼果起事，我能興兵出塞，與之協力乎？兵圍我重鎮，累月竭力不能解，乃欲出塞共謀人之國，雖三尺童子亦知其不能矣。莫若審酌利害，早遣使命，庶無噬臍之悔。至於防秋之計，雖和議已定，亦不可弛。又論：李彌大爲宣撫大臣，自當與之和議，授成算以出。彌大詣都堂旣不得見，乃僕僕然日候伺於諸臣之門，未聞付以統戎大事。行次大名，雖有旨改命，而勝捷軍處置失所，果致敗事。至於一行官吏兵馬虛費錢糧，不知其幾矣。今獨罪彌大可乎？王雲使燕山，得金虜請和語言，入塞七日，疾馳至京師，正以金虜約使人以七月上旬至彼。陛下命宰執求可使者，義當朝受命而夕擇人，俾有司爲治裝兼程而往。今半月矣，乃始得一人，鄧紹密而北去，又未有日。稽之衆論，僉謂徐處仁、吳敏、唐恪政事不振，陛下深惟社稷安危，盡賜斥免，別選英賢共圖大計，庶克康濟。又言：陛下持苟

且之術、行姑息之政、以節用則浮侈尙多、以愛民則凋敝未息。官冗而不知澄、兵驕而不知制、名曰斥逐邪佞、而多方庇護。名曰愛惜名器、而不謹差除。凡若此者、遽數之不能盡。其至急者、宦官反側、將爲變於內而不知殺其勢。民庶困耗、將爲寇於外而不知結其心。臣未知諸臣同朝奏事、與留身造膝之言、亦嘗及此乎。欽宗雖嘉納、而遣使授書、不能悉如公所論、和議亦向敗矣。他日進見、又言、四方萬里之遠、所恃者監司。臣觀見任與差下人、尙多不才、乞精選省曹、臺察、卿監中忠直強明之人、分洊所部、庶使遠邇均被實惠。蔡京父子、童貫、朱勔罪大責輕、公累疏乞大正典刑。又言燕瑛蠹民膏脂、以事權幸、不當典河陽。呂源輕佻、恐致生事、不宜帥桂州。聶昌人質最下、不宜尹開封。宋瑛妄言上皇忿怒、而已解釋、乞付有司考核。又言、曾誠納賂宰相、起自廢斥、方元若專事請謁、秘書兩

監、安用此流。欽宗曰、燕瑛誠無所用、呂源踪跡已不佳、更要生事、安可作帥。宋瑛朕知其小人、方元若昨權立螭、輒戰灼不能立。公曰、此亦足以知其所養。又言、何執中、余深乞詔太常別定謚^③。授深散官、竄之蜀徼。又言、相州之北有漳河、眞定之南有滹沱河、積水雖深、遇冬淺澀、上流可作堰閘、尙有緩急、亦控扼之一端。又嘗歷數漢唐宦官之禍、今不當俾之參預外事、累數百言。凡再上章乞補外、不允。會侍御史李公光言星變、欽宗問曰、卿見之否。朕宮人數疾瞻視、及問徐處仁、悉言不見。公曰、臣雖未嘗見、然或以爲有當禳。臣聞災異之來、要在正厥事、修厥德、願陛下勿問有無、第察事之正否、德之修未、自然上天昭鑑、變異可消。初、公再論蔡京等罪、欽宗曰、只爲吳敏力庇護他。公曰、陛下旣已察見、便當親賜處分。欽宗曰、當即批出。後數日、事寢、公又入奏、略及面諭之意、敏遂奏公漏楊



前語。欽宗不以爲罪、密勅近臣宣諭、且曰、程某在諫垣甚宣力。至是又謂公曰、李光如何。公曰、臺端之任、剛正有守、衆以爲宜。欽宗曰、只有文字論朱勔、卻黨蔽蔡京。公曰、臣觀光非黨京者、當是見臣等已有章疏、及朝廷已有行遣、不復論列。欽宗曰、須卿做取文字來。公曰、臣當^④躬稟聖訓、然臣於光昔爲朋友、陛下或全臣私義、乞宣諭其他臺諫。由是忤旨。越數日、除屯田郎官。又數日、有旨與遠小監當、遂添差監漳州鹽稅。公居言責五十有四日而罷。光堯太上皇帝即位、除司封員外郎。明年、轉朝散大夫、遷光祿少卿。第進士廷策、改國子司業。聞淑人感末疾、丐外祠、主管亳州明道宮。紹興元年、召赴行在所。入對、上疏曰、金虜肆亂、於今七稔。陛下踐祚、自南都遷維揚、自維揚遷會稽、惟奔播畏避、此豈虜真不可敵哉。顧吾不敢與之敵耳。宜及今預設方略、保護江浙、伺間承便、長驅直擣。此

而不爲、後時之悔、可勝言哉。臣敢畫十事、仰干宸聽。一曰勵志氣。夫紂百克而卒無後、漢高屢敗而終有天下、蓋勝負兵家常事。金虜志驕氣盈、已有可敗之理。中國軍摧勢蹙、非無可爲之時。願陛下念二帝播遷之耻、勵志以殄虜、則功業之成、庶乎可待。二曰躬節儉。昔勾踐困於吳、苦心焦思、卧薪嘗膽、身自耕作、與百姓同勞苦、卒滅夫差、而雪會稽之耻。衛爲狄所滅、東徙渡河、文公大布之衣、大帛之冠、初年戎車三十乘、季年乃三百乘。詩人歌之。望陛下俯酌二君之跡、躬自黽勉、惟戰士是恤、則臣下化服、事功可圖矣。三曰訪賢才。昔宣王承厲王之後、興衰撥亂、卒爲中興之君。詩人推明其所以成功、則曰任賢使能而已。今陛下所與圖事者、不過宰執、次則臺諫侍從、臣恐尙有困於散地、沉於下僚、望加意搜訪、或召見、或任使。若各當其任、天下事不足爲矣。四曰求將帥。夫光武所以續

既絕之緒者、推寇鄧之勳。肅宗所以平安、史之亂者、稱李郭之功。今一二大帥、位高金多、顧募參養、緩急非所倚。臣恐偏裨行伍、未必無奇才異能、願廣加搜拔。士大夫有知兵而尚氣節者、尤宜參用。五曰申紀律。昔秦師過周北門、而免胄超乘、王孫滿知其必敗。子重問晉國之勇、欒鍼謂好以衆整。故兵未接刃而逆知勝負者、觀其軍行整與不整耳。比年以來、師無紀律、或望風而潰散、或逗撓而不知期會、虜掠子女、焚蕩廬舍、此弊不除、何以捍敵。伏願明勅一二大帥、使躬親懲創、以勸率諸將。又廣布耳目、察訪自今行事有紀、勇於破敵而戒於擾人者、特加旌賞、庶革前習。六曰治財賦。今日急務、莫先於治兵、莫急於兵食。然自軍興以來、理財之政不修、日以困乏、乞詔有司、修廢弊、損浮靡、使貨食豐羨。七曰廣召募。夫秦之未併六國也、六國困於秦兵之強、然卒亡秦者亦六國、乃知人無

不可用、顧訓練何如耳。今淮甸以北、金虜蹂躪、江南荆湖、寇盜殘破。伏願飭諸州軍、廣行召募、精加訓練、亦足以抗諸帥偏握重兵之勢。八曰治舟師。夫三江五湖之利、吳越之所必爭、齊楚不能以取勝、彼利在騎、吾利在舟。況金虜形隔勢絕、又非齊楚之比。然頃者南渡、我莫之抗。及其北歸、韓世忠邀之中流、遷延歲月、反用周瑜之所以破曹操者、全軍北去。蓋彼多算而我算嘗不足、是未嘗自治之過也。今既駐蹕會稽、西則常潤江口、東則台、明海道、而江南密爲唇齒。上流沿江、皆宜以時措置。九曰謹命令。夫去兵去食、而信不可一日無、故民未知信、子犯以爲未可用。頃年駐蹕維揚、衆知夫未可復東也。一日下東還之詔、識者重嘆。伏願繼今謹於出令、期於必信、庶幾民聽不惑。十曰責事實。昔孝宣之治、本於綜名實。西晉之敗、由於尚浮虛。國家積弊、既緣名實貿亂、浮虛日朦、又濟以誕



謾非掠名欺衆、則擇利以謀身、非便文自營、則倚法以削民。願陛下鑑晉之所以亡、漢之所以興、大變習俗、庶事功可成。抑臣嘗考夷狄雖自古爲中國患、而盛衰未嘗不相因。故太王避狄、而文王致昆夷之駝。漢高厄平城、而武帝窮漠北之師。陛下脫身重圍、崎嶇河朔、握圖履籍、曆數有歸、天心眷佑、亦可卜矣。願思寄託之重、審危殆之機、歷考古今之變、屈群策以立非常之功、天下幸甚。又言、臣聞君子安不忘危。去年金虜偶不南渡、今劇賊李成勢稍衰弱、臣愚過計、深懼危苦之言不達於聖聰、或者玩日苟安、不虞禍發。幸陛下深思遠慮、夙夜以定、傾扶危勵志、庶禍亂可弭。太上方欲擢用公、而任事之臣議論不合、乃力丐外補。遂除直秘閣、提點江東刑獄。踰年、除太常少卿、入覲進言曰、臣聞三代之得天下也以仁、其失天下也以不仁。臣竊考聖朝自太祖皇帝揖遜而履帝位、世世相

授以仁、不雜他術。德澤滲漉之久、故比歲夷虜寇盜蹂踐焚劫、生民亡聊、亦已極矣。然厥心歸戴、未之或改。陛下監觀治道、灼見根本、故比年詔令數下、專務寬恤、海內幸甚。然臣竊慮軍旅未休、輸餉方急、州縣常賦不能供億、勢必至於科擾。陛下雖欲辦行寬恤以仁斯民、恐未能上副聖意。望明詔宰執、俾求通練財計之人、相與講究利病、省節浮費、使國用贏衍、倉卒不致科斂、庶有實惠孚於四方。又言、臣聞學校不修、詩人興刺、子衿之詩是也。臣竊見比年以來、舉人鮮以學業爲事、既深可憂、而一命以上、或才質之美、往年得爲教官、頗患無缺以處之、行在學館、局務闕又加少。竊懼中人之性、不得長養成就、而因循汨沒者爲多。他日當更乏才。望聖慈深以人才爲念、特詔州置教官一員、使專務教導、不但已入官者得以成就、而韋布之士知所向慕。又言、臣嘗典獄江東、詣獄閱牒、案牘

訊問囚徒、已量事實、責限結絕、破械釋繫、脫於囹圄者百有餘人。復檢眊諸獄囚、病而不醫、死而不殮者不少、甚失哀矜庶獄之意。除具奏施行外、竊慮四方囚繫、似此甚多、望降詔誨飭、俾司獄之吏、各大書揭榜、寘之廳事、庶幾遵守法令、上稱好生之德。上曰、士大夫稱卿、中外如一。即日拜給事中、賜三品服。嘗言、治天下之道、必自學始。竊惟聖質高明、決事之暇、躬親國史。然人君之學、不在章句、當考治亂之迹、賢否之辨、而其要又在於正心誠意。又言、夷狄之患、未有甚於今日。然物極則反、願與大臣力圖恢復。上曰、畏首畏尾、身其餘幾。前年金虜過江、官軍接戰、彼亦甚多損傷、自此可以使人向前。公曰、但不退避、則兩敵相當、未必不勝。況曲直之理、昭然可見。頃之兼侍講、入謝、進言曰、臣聞以一人之微、臨億兆之衆、其萬幾之繁、已不勝應。至若外有夷狄、內有寇攘、其難百倍於無事之

時、疑若日不暇給。然文王有密人之不共、而帝乃曰、無然畔援、無然歆羨。則其意在於正心。光武當漢道之中微、崎嶇兵馬、而手未嘗釋卷、則其意在於務學。蓋心正則有以格天下之非、務學則有以考天下之理、此操至約而施至博之道也。陛下天資已有日躋之盛、望仰思祖宗寄託之重、俯念群黎欣戴之誠、廣覽博觀、使忠邪賢否事物之變、昭昭乎胸中、而又加意於正心誠意之學、則聖德日新、事功日起矣。又言、臣聞不畏多難而畏無難、故有國家者或無難以亡、多難以興。夏有后羿之變、而少康成其功。周有懿王之厄、而宣王定其業。國家日者禍故不可勝言。兩年金虜不果南渡、比日寇攘亦向衰息、而將驕卒惰、民困財殫、固未可言平定中原之日。然志不素立、則因循苟且、將無時而可爲。伏望陛下萬幾之暇、博覽少康、宣王之事、思所以申憤而雪耻者、詔大臣以捐省末務、日爲



恢復之策、則中興之功、庶其有濟。又言、今日諸將官高而不可使、兵衆而不可分、有警必不能奮不顧身。竊慮其偏裨、或有可搜拔任用者、伏望陛下降旨、令諸大將依頃日侍從薦舉指揮、各舉數人、陛下即加銓別、稍分所轄之兵。遇有警急、則酌事勢而遣行、庶兵不偏重、而偏裨之能者得以自見。又言、金虜狼貪虎噬、未有畔岸、而兩年不敢南牧者、關陝之兵牽制之也。比者捷書來上、深若可喜。然臣方以爲憂慮、其不得志於彼、將逞憤於此。望陛下建藩維於淮南、設控扼於江上、而大治舟師、以防越軼。然後相時料敵、爲恢復中原計。居亡何、求對便殿、進言曰、竊以中否之禍、無世無之。或侵以衰微、則周平王、或隨以隆昌、則漢光武。今日之事、欲異乎周之衰微、而庶幾漢之隆昌、是在陛下而已。然籌帷幄者、未有出人之略、爲將帥者、又無捐軀之志、則日復一日、人情更益怯懦弛懈、無復

奮發。願陛下考光武躬臨戰陣之事、以作勵謀臣猛將、則抗敵而立國隆昌之漸、可立致矣。又言、自黠虜作禍、於今八年、未見恢復才效、而日有寇至之慮。此誠諸臣不才之過。其見任使者、既未見豪傑穎出之人、而屏遠服沉下僚、又未有所簡拔、則相與因循苟且、深爲可惜。望陛下上焉思委任賢能、駕馭英雄、推誠盡禮之道、次焉思策驚磨鈍、棄瑕錄善、破朋壞黨之術、使壞材瑋器、位顯任重、而寸長尺短、悉爲我用、則功效可卜。若必守常轍而求異功、規近效而圖遠略、非臣所敢知也。又言、臣伏睹政和間、嘗置局裕民、宣政間、置司講議、皆紓急救弊之舉、意非不善。一則奪於柄臣、隨命即罷。一則毛舉細務、徒費日用。此無他、權要無以市恩、近倖無以竊寵、冗食濫員、無以侵耗太倉、其實有利於國、無害於民、而小人皆不便也。或以爲拂人心、或以爲傷國體、興訛造訕、乘間投隙、故主其事

者亦將搖於不任受怨之說、不免徇尋常之見、持苟且之論、惡在紓急救弊哉。修政局之建、其目曰省費裕國、強兵息民、是在今日、已爲後時。頃者陛下發明詔、命官吏采衆言、又詔條具在內諸司、閱兩月而未有施行、道途籍籍以減省爲難。竊慮小人之言浸漬搖惑、聖意一移、則天下事無可爲者。伏望陛下照之以不惑、斷之以不撓、使必如明詔、則所謂中興政事、此其基也。又言、國家自播遷以來、祀事極爲簡略、雖禮視時而隆殺、不得不爾、然宗廟之享、係在陛下。顧累朝御容、寄寓遠方、迎致實將、而裸將不親。望詔禮官取孟享之儀、酌時度義、略其大而致其實、以時設位、陛下躬行獻享、命下酌之、而有司不果施行。公再言、臣恭讀祖宗故事、見仁宗謂輔臣曰、朕朝夕奉三聖神御於禁中、未之敢怠。又見唐李絳等因奏事、言祭祀天地、薦享宗廟、禮器敝惡、憲宗聳然曰、朕雖以故事祀天

地、享宗廟、不得親行、令宰臣攝事、每至其日、朕未嘗不夜半即起、沐浴盥櫛、肅恭以至明、過時方息。即飭有司、修飾器物、務令豐潔。謹具奏呈、仰乞酌用。又言、竊見三衙之兵單弱、而缺額不補、五軍所統雖多、招懷撫納之流、目今雖未有他故、然李捧、崔增輩各將其徒、張俊、王燮等元無兵機、則控馭之制已大疏略。今欲使三衙之兵漸統舊額、五軍所統、隨宜易置、散群壞黨、新舊參錯。庶禁衛增壯、而招懷撫納之流、控馭得所、不致有意外之虞。今呂頤浩奉廟謨以出征、如李捧、崔增輩便可俾隸戎行。上曰、得處分。因曰、頤浩熟於軍事、令總諸將外禦、秦檜在朝廷、庶內外相應。公曰、內外相應最爲至急、宣王命吉甫北伐、而是詩乃言張仲孝友、蓋非張仲在內、則吉甫不能成功。上曰、秦檜誠實、只爲太執。公曰、士大夫操修不美者至多、如求機警能順旨者、極不難得、但恐不誠實、終不可倚。上



曰此輩亦何所用。朕以至公涖天下、見其可用則用之。公曰、涖天下者莫大於至公、帝王之德所以配天地者以此。上曰、更要仁要明。公曰、三者雖異、其實一體。惟公然後能明、惟公然後能仁。願陛下以至公爲先。又言、衛多君子、吳季札以爲未有患。晉多君子、季武子以爲未可媿。欲知國家治亂興衰之端、當觀其賢才多少。今侍從僅十許人、自卿監以至館職、建炎間裁定員缺、傷於太少、時屬艱難、正宜招致英傑、共圖康濟。望博訪妙策、搜奇拔穎、使侍從官不致多缺、詔增置卿監以下員。庶拔十得五、一旦有事、無乏才之歎。又言、漢光武親臨戰陣、將士用命、是以中興漢室。上曰、朕方欲措置江上軍、將定壘、即單騎往按視撫勞、亦欲作勵士氣。公曰、累年金虜入寇、悉望風逃遁、陛下能屈萬乘、則士氣自振矣。公既居瑣闥、以章奏自任、抗論無所阿避。會除李邦彥僉書樞密院、公論邦彥五

罪、凡三疏、不報。委以次官書牘行下。公乃乞罷所職、除兵部侍郎、不拜。抗章言、臣蒙陛下厚恩、擢實省闥、比者輒有駁奏、事既不回、義宜去位。兼臣二親年老、臣病不能侍、是君親之誼、兩未盡也。上感其言、親書章尾、優畀。職名、擇善地以便其私。遂除龍圖閣待制、知信州。侍御史江公躋、左司諫方公孟卿爭上疏曰、程某有兄弟可以養、黃門職典出納、顧不留以自助、甚爲朝廷惜之。上批付右僕射秦檜、復除給事中、且宣諭上意。參政翟公汝文曰、給事觀上委曲如此、安可復辭。入謝。上曰、給事之設、政要駁異、豈在雷同。朕以卿再三求去、勉徇所請、然深不欲卿去、故再有此授除。公再拜謝。既出、特賜象笏、示隆眷也。南渡後、內藏不復有所積、歲撥左藏庫錢帛萬數充之。至是、復令支撥、兌供頗夥。公言、內藏之建、蓋深藏厚蓄、小欲助有司經費、大欲有事戎虜。其至仁遠慮、則欲警急可以取辦、

不至橫索於民。故眞宗宣諭^⑦群臣、謂所貯金帛備經國之用、非自奉也。顧外廷不知耳。神宗皇帝賦詩^⑧則曰、每懷怵惕心、妄意遵遺烈。顧予不武資、何日獻戎捷。累朝以來、三司缺乏、則假于^⑨內庫、或累年不能償、即命蠲除、其事蓋可考也。南渡以來、內藏不復有所積、故歲撥左藏庫錢帛數萬、已不爲少。陛下宣諭臣僚、亦有躬行節儉之言、然以臣所見、今歲始交秋、而左藏歲供之數已足。近日復令兌借緡帛、不識所費何至若是。望陛下俯憂時事之艱難、仰觀祖宗之志慮、踐節儉之言、恤供輸之困、使四方之民、均知盛德。是時都督之建、頗合衆情、朝廷繼遣沿海制置、外論洶洶。公言、臣觀今日退避之計多、防守之計少、如是則人心搖奪。自古兵交、勝負繫曲直、非必繫強弱。金虜之強、衆所共知、然實負天下之至曲。願陛下專以征伐責將帥、裕民理財責宰執、而宸心孜孜、務修厥德、上合天

心、下協民情、則金虜之強、可以坐視其弱。上曰、惟德動天、顧朕涼薄、有所不能。公曰、臣觀孟子所云、有能有不能、有爲有不爲、則力之所可能者、有爲有不爲耳。以陛下天資高明、博觀羣籍、凡古之帝王、有德則興、無德則亡者、皆無逃聖鑑矣。強勉行之、必無所不能。上曰、卿可謂責難於君者。久之、復申前請。御批中出、除職名與郡、以便溫清。再議、復除前職名知信州矣。給事中胡公安國、中書舍人劉公一止^⑩連八疏論公、早以文行知名於時、忠信可以備獻納、正直可以司風憲、出爲守臣、則布宣德澤、位正一國、留在朝列、則嘉言正論、上沃聖聰、所利溥矣。爲瑀私計、孝子之志固切於養親、爲陛下計、保國之基莫先於得士。有旨前降指揮更不施行、於是復留。太常寺定奉使高麗給賜、乞準元豐例。上欲加惠遠人、詔復增益。公言、禮儀隆殺、當視時宜。賜予厚薄、當觀民力。今所給賜、視元豐已



爲過厚。況復增益，尤非所宜。舊制，右武大夫非特旨不轉。劉光世保舉王德、張亨等過江擊賊，有旨轉行。公言：「右武大夫係昔日西上閣門使，元豐間止於十四員，今不知幾倍。若人臣皆得挾法陳請，則回授之制殆爲虛設。況光世所乞已十二員，冒濫甚矣。」閩賊范汝爲既平，朝廷以密院人吏劉希房等十九人有勞，各轉一官資。公言：「將士冒矢石於外，人吏受恩賞於內，理非是。」方欲作士氣，以立武功，僥倖之弊，豈可承襲。臨安府營繕，上自侍從，近則中貴、外及僚屬，下至胥吏，被賞有差。公言：「移蹕營繕，官吏職也，苟無曠闕，何功之有。皆乞寢罷。」廖元忠爲忠義隊首，父子供應民兵錢糧，與賊戰，擒殺四十四人，但補下班祇應。公言：「推賞太薄，恐後無以勸勵。」是時上方勵精稽古，留神經學。一日，從容與公論左氏春秋，窮究指歸。且曰：「胡安國近取政論極好。」公曰：「安國經行素高，兼達治體。朱

震亦深此學。上乃召用。繼又訪人才於公，因薦徐俯、曾開、程俱、范仲淹、趙思誠、蕭振，皆一時名流。五月，詔侍從條具己見，凡可以省費裕國、強兵息民者，朕無憚改作。公上疏，以爲：「國家遭虜寇之禍，今茲九年，政事束於條例，難於改作。譬如人家，昔嘗富貴，中更破蕩，今方以漸葺治，而費用尙循富實之規。然國勢危殆，至於今日，亦衆人之所共憂。倘使費省而國裕，兵強而民息，則國家安寧長久之利，亦衆人之所共享。今日一切鑄罷，亦復何辭。乃條具當時急務：一曰，內侍之制，比舊歲裁減之外，今尙有一百八十餘員，臣願以其半爲定額，姑去三分之一，有缺勿補。二曰，三省察院人吏三百餘人，月費錢二萬五千緡，米五百餘石，而復省檢正與機速編修檢討等房堂廚、密院東廚、客司等人各有窠額，下至大程官，亦復二百人，皆可減半。三省密院鑄減已定，然後取省臺寺監員數，量事煩簡，

悉議減罷。只如御史臺人吏知班共一百六十五人、蓋可減三之二。其在外州縣乞委監司條畫減放。三曰、閣門^⑤。自知閣下迨祗候三十餘人、乞減三之一。四曰、後苑一切工役、不切於事宜、和末年已議減省、靖康初因悉罷廢矣。欲乞以事歸工部、示人將有恢復之圖、不當安於此地。所有修內一司、並乞廢罷。五曰、應有實廢而名存如龍圖等閣、睿思殿庫官吏之類、如親賢宅、四方館、舍省、都亭驛、駝坊、牛羊司、大醫局、東西作坊之類、乞并歸所轄本曹。六曰、伏睹祖宗神^⑥御歲時祭享、未免薄略、而益王與唐公長國主影前所破食料、添廚、知客、從人等、多仍用舊制、欲乞減罷。七曰、曾任宰執及武臣遙團以上宮觀差遣、多事之時、不任事責、坐糜厚祿、頗爲無藝、乞與減半、以次官乞支三分之二。八曰、州縣添差官、乞減見任官請給人從之半、仍免治事。九曰、常平不必復立一司、只乞別差提刑

司幹辦官一員、專管常平職事、仍以曾任知縣及通判人充。十曰、州縣酒務、自來皆知所得不償所費、乞酌度州縣大小、召人買撲、則省官吏請給、免民戶折納糯米、其利不鮮。十一曰、金虜之長在騎、今平廣原野、欲爭勝則當用車。大江長淮、欲控扼則當用舟。今來舟車皆未嘗講究。臣略計一車一舟之所值、適與一馬等。苟舟車精備、則動必萬全、乞講究製造。十二曰、諸軍之兵、蓋患其不多、然亦不少矣。簡其疲弱而訓練作勵之、固可以轉弱爲強。惟三衙之兵與諸州禁軍、皆額缺不補、則在內禁衛單寡、不可不慮。在外則備禦全無、每一郡有警、環郡拱視、惴惴然奔竄之不暇、豈及議救援哉。乞各措置招募。十三曰、請諸步弓手統於縣尉、鎮塞有土兵統於巡檢、一州則有兵馬都監、兩縣則有都巡、一路則有提刑。乞委諸州、各選募弓兵、使充舊額、委提刑察巡尉及都監、都巡之疲懦者奏



罷之、選擇曾經戰陣、實有武藝者辟差。無事之時、各訓練弓兵、或有警、提刑將都巡、都巡將都監、都監將巡尉、自足以逐捕捍禦、不至專遣王師。十四日、汾^⑤江及淮甸、荆湖盜賊殘破去處、多有荒棄田地、乞募人爲兵分授之、使耕殖爲糧、免復仰食縣官。歲久、人必各自爲守其宅。如因土風以頒巡社之制、換度牒以免僞造之罪、賣官田以助軍需之廣、杜豪民猾吏侵盜之虐、定役法以免催稅賠納之苦、革官吏差替納賂之奸、其說甚備悉剴切、上契聖心。自公之駁邦彥也、時相追仇甚深、密以後省封駁紛紜奪主柄之說動上。一日私薦席益、即取旨趨召、即招後省官相見、出御批與之、同僚相顧默然。公曰、席益爲人、相公豈不知、何必引用。即入疏論益。後數日、公爲臺章論罷、提舉亳州明道宮。時起居郎張公燾、舍人劉公一止、中書胡公世將、左右司員外郎林公待聘、樓公照、侍御史江公

躋、司諫吳公表臣皆在逐中。四年、復徽猷閣待制、知撫州。州當要衝、酬酢叢繁、帑庫單匱。歲仍饑饉、崇仁、宜黃寇盜並起、歷時不能擒制。公至則招材勇士、料兵重賞、未幾、賊黨悉平。且命屬縣勸誘豪右、損價廣糶、四境由是安集。旱禱必雨、歲不火祲。以二親懷歸故里、丐祠。章再上、得提舉江州太平觀。六年、丁太淑人憂。明年、丁宣奉公憂。服除、轉朝議大夫、以前職名知嚴州。未行、改知宣州。金虜將南侵、公浚隄增陴、治甲兵、豐廩儲、隱然爲江左重。及虜敗北、堅辭郡事、復奉祠。十二年春、召赴行在。是時和議已成、公欲激勵上意、使強於爲治。入見、首叙臣遠去闕廷十有一年、金虜兵再南侵、陛下隨機應變、親授諸將方略、順昌之功、尤爲奇偉。獨念太上俯憂生民、甘心屈己、力主和議、卒使強悍革心、迄從聖欲、此豈常情所能測度。更願陛下不以今日爲愈於昔時、謂可以少休、猶復加強勉焉。

董仲舒^①謂天欲扶持而安全之事在強勉非虛言也。上再三嘉納。拜兵部侍郎兼侍讀。賜爵鄱陽縣開國男。食邑三百戶。復上疏云。頃年強虜侵軼江淮。無不如志^②。非陛下明於料敵。審於知己。隨事制宜。投機應變。則事之出於意外。恐未可勝言也。今虜氣得志驕。窮奢極侈。骨肉屠戮。寇仇環起。連年旱乾。赤地千里。人不聊生。我於此時深思遠慮。足食足兵。以俟其釁。安可不汲汲也。今日祖宗之故地未復。父兄之深仇未雪。豈得遂爲休兵偃武計哉。臣願陛下勵志而已。後數日。又言。人君上承天而下理人。動作云爲當^③仰觀天意。俯察人情。今日天意人情。灼然可見。宜乘茲盛際。勵有爲之志。卒非常之功。上曰。前此固不得已。今日足可措置。景靈宮朝獻後。公因進見。言土木之功。勞人費財。營造之過。禍敗隨之。如近日景靈於外殿之後。誠有不可已。臣願此外一切禁止。竊觀自古中興之君。

莫盛於周宣。而不能無過。故詩人箴而不已。遂有規。規而不已。遂有誨。誨而不已。遂有刺。以此見居成功爲難。上再三首肯之。公復曰。凡詩美宣王無幾。而考室考叔之章。即不言美而實美之。臣舊疑此二事無足美者。近讀劉向傳。見其所謂更爲儉宮室小寢廟。始悟詩人之意。語未卒。上曰。劉向在宗室中至好。公曰。豈惟宗室中。即群臣中亦不易得。向忠於朝廷。其淵源蓋自經術中來。陛下觀其引經陳義。雖後世不復多見。上於是歷舉向引經義數處。公曰。凡向所陳。可爲萬世龜鑑。願陛下每思其言。爲益不鮮。上改容嘉納。講讀官舊皆有講義以進。中間爲侍讀者因陋就寡。但書故事進讀。不復約文申義。發明旨意。公乃即所讀隨事深切著明之。後嘗入侍。從容語次。上曰。近年侍讀不進講義。得卿每事敷陳。甚善。公曰。講義固不必進。然但不明而退。則備員已甚。臣是以敢致區區。上曰。



嘗讀三朝寶訓、至眞宗訪通經義者於李至。公曰、當時至所稱惟崔頤正一人、蓋通經之士至爲難得。陛下留心經術、臣等末學、不足以望彷彿。然私憂過計、自科舉復用詞賦、後生工於剽掇、苟取科第。今治經比詩賦才十之一、恐數年之後、無復有通經者、宜斟酌兩科進士多少、特加抑揚、使經術不至廢弛、乃長育人才之道。秦檜謂公曰、上宣諭伯寓在經筵、嘗說兩科習經者少、當如何措置。公曰、欲使不偏廢、莫若經義詩賦合爲一。遂付禮部施行。資善堂翊善闕、上欲除公、以久在告未果。及面諭除授之意、遂就職。進爵子、增邑五百戶。又嘗讀眞宗獎擢劉鍇、公因言、世祿之家、鮮克由禮、功臣之世、賢者之類、不可棄遺。眞宗覽鍇所上、不獨嘉鍇之能、亦以勸勵士大夫之後、用心可謂至遠。陛下嘉惠多士、崇建太學、蓋甚盛德、而選試教養國子之法、未聞討論。願稽有虞成周之志、以詔有

司。復進疏論、治亂安危、相爲反復。今雖愈於昔年、然金虜入寇、未嘗一大創艾、嘗有輕我意。虎狼之心、豈或饜滿、求釁背盟、近則數年、遠則一二十年、不敢保其必不來也。今吾所用之兵、近更數年、遠更一二十年、壯者老、老者死。願預爲久遠之計、增多而益寡、使兵日浸強、列屯向敵、凜乎不敢遽犯。若乃民力困乏、未有甚於此時者、陛下雖屢戒切、州縣不得科歛、而歲有防秋、軍興之費、急於星火、供億曷嘗不出於民。是宜省費節用、敦本抑末、常賦之外、一毫不取於民、使民力日益厚、則邦本固、兵益強、虜即有窺伺之心、亦將潛消陰沮。是乃和好久長之策。上曰、且做十年。公再拜曰、十年之說、願陛下念茲、朝夕不忘。又嘗因論眞宗時事、公謂符瑞固不可謂無、然以爲出於天、則所以奉天者、莫要於德。如惑方士道流之說、崇飾宮觀、廣致禱祠、恐不足以當天意。上曰、天書等事、偶出一時、寶

訓自不須記、正所謂書而不法。未幾轉中奉大夫、試兵部尙書兼侍讀、翊善。上眷禮雖厚、公與端揆議論背馳、乃力乞奉祠、遂除龍圖閣學士、知信州。陛辭、遣中使特賜御書眞草千字文、象笏、犀帶。是時執政侍從皆未之有、中外歆羨。上饒坑冶、堙廢歲久、提點韓球久試圖功、妄言寶貨興廢、不問山谷有無、廣爲虎落儲胥、嚴示厲禁樵牧、大棘衆庶熬苦之。且明諭州縣、按舊籍坑戶以歲計所負官課責償於其家、至有子孫易業數世、而繫累淹延、毀其家而償逋未足、有司莫敢辨曲直、民不堪命。聞公之來、詣府列訴、公躬爲審核釐正、條白於上、球之積憾、刺於骨髓矣。歲甲子夏、大水壞城郭、屬邑發洪幾千所、敗民田廬、漂溺不可救。公具奏水災異常及寬恤事、曰、請於朝。時宰方詠歌太平、惡言災異、閱所奏、請顧同列曰、堯之洪水、不至如是。公聞之、曰、時不可爲矣。遂稱疾丐祠、提舉江州太

平觀十六年、轉中大夫、進爵伯、加食邑八百戶。十九年再任、遷大中大夫、進封廣平郡開國侯、加邑三百。又以郊恩加食邑三百、爲一千四百戶、實封一百戶。或云陸升之訐前參知政事李公光私撰野史、其子孟堅見知棘寺、承柄臣風旨、鍛鍊論報、謂公不合與李公通書問、寄衣帛、降授朝議大夫。二十二年正月、以疾致其事、授左中奉大夫。辛亥薨、享年六十有六。遺表聞、特贈左通奉大夫。其子曰宏靖、以其年十二月返葬於程山之左。久之、塋側檻泉鬻沸、用風水家說、以乾道丙戌改卜於龍潭之東五里白南鄉松林寺之右。母夫人沈氏實合葬焉。子三人、長曰宏雅、未冠卒。次曰宏濟、通直郎、監建康府榷貨務都茶場、卒於官。季則宏靖。女四人、長適故文林郎、監鎮江府榷貨務門臧栢、仲適奉議郎、通判南安軍胡瑛、次適奉議郎、新權知汀州汪賡、幼適進士臧栢。孫八人、曰有功、宣義郎、



新通判秀州。曰有孚、承奉郎、廣州增城縣丞。曰有元、有章、有尙、有大有、有淪、有嘉。公識趣超詣、下筆析理、妙處不傳。肄業成均、試不自見論、明大智、觀遠近、故大司成馮公謂非深於楞嚴者不能進此。至論記策、則曰詞致大似碑碣。自少至老未嘗一日釋卷、夜分乃寐。博極群書、故其文閱深雅健、粹然自成一家。既沒、其纂述有論語說四卷、論語集解十卷、周禮儀十卷、尙書說一卷、諫垣論疏、奏議各四卷、黃門忠嘉經筵講讀、三朝對語各五卷、資善堂口義二卷、飽山集六十卷、野叟談古、兩漢素隱、唐傳摘奇、詩話雜誌各一編。惟公所學根於至正、所養全乎剛大、於富貴貧賤利害得喪、一不以累其心、故進退惟道是視。筮仕學省、道家者流林靈素翻譯道書、雜以俚語嘲謔、朝野翕然信服。大司成李公邦彥率官寮生徒晨往聽講、公拂然拒之。蔡佃爲司業、一日謂公曰、何不謁太師。太師極相

喜、嘗云、俞、李之後、大魁久寘、便當以立螭處之。公唯唯遜謝、終不一詣。在諫省中臺、論思獻納、務以責難爲恭、而正國體、救民瘼、辨賢不肖、別白是非、必反覆爲天子盡言之。治郡必舉大綱、略苛細、鎮以簡靜、而矜拊百姓、常務聚所欲而去所惡。崇禮教官、嚴月試季考、親第其高下、承學之士翕然向風。臨川宣城適當朝廷多故、兵征四方、調役旁午。公應變纖悉有條理、軍無乏給、而下亦不告病。奉養廉約、不視故府、廚傳雖菲、而過客使意無不稱。嘗有大將接武至郡、燕享禮行、物薄而誠至、客亦感激。公帑主吏按前比白、供太守家人飲食、張御、公曰、太守竊厚祿、家已溫飽。公帑有法、太守且不妄費、況其私自給乎。一切卻絕。宣城產蜜蜂、珍滋、爲權門苞苴之計、殘物厲民舊矣。公下車禁采捕、而中朝貴人移書持錢十萬請於公、報曰、屬已出教禁止、承命不果。廣信罷歸、韓球憾之、未已、行

部留郡繩治。他日、虞兵與右曹掾史必欲得公當官及子弟諸不法事、百計撝拾、竟無纖芥可以詆傷。識者於是知公絜矩之道、不特行於朝著、達於州郡、而所以刑於家者、凜凜在古人中矣。公登法從二十年、三領州麾、所至未及書考而去、立朝期有五月、餘皆奉祠里居。卜築龍潭之場、據溪山之會、極登臨之勝、建閣其下、名曰飽山。直北數步、復敞東閣、積書萬卷、名曰澄懷。臨流結亭、取元次山漫浪之趣、並三吾而概之以漫、名曰漫吾。循牆修竹數千挺茂、松間出名花嘉木、蔭樾左右。親友相過、則酌酒賦詩、彈琴弈棋、絕口不談時事。賓禮賢師、程督子姪、口講指授、夙夜不倦。間有屬計偕取科第、而公所以責厲者、乃曰、讀書修己、任重道遠。君子務知遠者大者、汝等勿以應舉覓官爲厭足之道。一日、復命侍前、出馬文淵戒兄子書示之、曰、吾亦欲汝曹以是書書紳。又出東坡惠州寄其子

門戶各努力、先期畢租稅之詩以示之、且曰、東坡訓子猶致意於租稅、況汝等耶。自號愚翁、嘗自作傳、大概云、翁嗜學而不能總其會、慕古而不得其要。短於曲折、或又以爲直。昧於趨向、或又以爲介。中無他腸、不疑人之欺己、或又以爲誠。不喜與人校、或又以爲長者。一切苟且、未嘗精思、已而知悔。後又復然。知其爲病而不能改、可謂愚矣。晚知見譽者過實、欲痛刮磨以補過、終不見效。乃以愚自名、以蓋不虞之譽。蓋厚於責己而薄於責人、勇於爲善而廉於取名、公之至也。首推蔭及臧氏弟、仕至爲郎、所以圖報鞠育者、毫髮無憾。既登八座、當任子、先以予同產弟、次於孤姪、然後及其息。官所不能及者、則爲經紀生事甚厚。奉家廟嚴、春秋二祭、簿正儀物、豐儉適中、以爲可繼可傳之法。公簡易端諒、不殖產、田園所入、僅供伏臘。嘗有以良田求售者、故人參知政事張公燾聞之、貸白金一巨



篋公瞿然曰、人生粗了目前足矣、何至苦求贏餘。即命歸其金。其敬賢下士、汲汲惟恐不及。人有片善、不啻若自其己出。襟府清明、其平如水。借或深情厚貌、矯飾求售、公雖了見其肺肝、而遇之以誠、不惡而嚴、彼亦往往悔悟、深自愧訟。平生予人薦牘、未嘗專一介之使與夫假寵姻故以行者。於寒門下僚、尤加推挽、期於必濟。至於韋布生或袖詩賦書、挾舉子業、卒然通謁、倒屣以迎、即所爲文相與切摩、商論是非、一時名教有所倚賴云。公酷嗜論語、研精殫思、隨所見疏於冊。練塘洪先生與祖早以是書從公、難疑辨惑者二十年、晚得公所說、即爲序冠其首。有曰、養孝弟之本厚、明忠恕之不二、感發於孔子之一射、流涕於周公之四言。凡若此類、皆古今學者所不能到、而考諸行事、若合符節。有浩然之氣、有仁者之勇、今之古人也。公云亡、其書盛行、尙書郎魏安行將漕京西、鋟板流傳。或

以示檜、檜顧門下士曰、伯寓乃著書相謗、後世信其言爲是、而議我爲何人、洪、魏何至作序鋟板耶。乃令言者論劾洪、魏、褫官南謫。臺符下京西、搜書與板焚燬、而公之子若孫名在仕牒者、廢錮不調。復謀所以擠程氏者、而檜亡矣。初、公被疾、踰月勢革、晨起草遺奏以畀門下士、故吏部侍郎余時言、俾上之、其略云、念昔侍於經筵、嘗屢陳其臆說、伏願陛下念祖宗付託之重、副生民愛戴之勤、寶惜寸陰、圖迴長策、益勵嘗膽之志、勿忘在莒之艱。咏周孔之圖書、措諸行事。復文武之境土、播以聲詩。已而與客對雪奕碁、誦莊子逍遙賦絕句、其末章句云、爐煙一炷明窗下、讀盡南華第一篇。蓋絕筆也。又爲書具言喪葬始末、毋得效俚俗浮靡。至於孝友恭儉、則諄諄誨飭、曰、能如是、可以保家、否則身名俱敗。徐顧左右曰、去上元不遠矣。趣命將柩於中堂、期至而逝。孔子稱大臣以道事君、不可則

止子夏言君子有三變望之儼然即之也溫聽其言也厲公實有焉銘曰

氣大以剛塞乎天淵孟軻浩然正諧韶濩勁沮金石退之渾然折檻撓鱗旋乾轉坤諫草凜然由我者吾不我者天全名爛然有子有孫益熾而昌蓋繩繩然鑽石墉辭與山不磨公論曰然

胡銓撰《胡澹庵先生文集》卷二三

校記

①太建：原作「天建」，據《陳書》卷一〇《程靈洗傳》改。按，太建，陳宣帝年號。

②幹黎勃：「幹」原作「幹」，按宋代史籍多作「幹離不」，「幹」乃「幹」之誤，徑改。下同。

③諡：原作「謚」，據《新安文獻志》卷七八改。又，此句《新安文獻志》作「又論何執中、余深往時奴事蔡京，欺君誤國，乞追執中王爵，詔太常別定諡。」

④當：原作「嘗」，據右引改。

⑤眠：原作「眠」，據文意改。下文「檢眠諸獄囚」同。

⑥異：原作「異」，據《新安文獻志》卷七八改。

⑦論：原作「論」，據右引改。

⑧皇帝賦詩：原作「揭號」，據右引改。

⑨于：原作「餘」，據右引改。

⑩一止：原作「正」，據右引改。

⑪擊：原作「繫」，據文意改。

⑫范仲：疑是「范冲」之誤。

⑬門：原作「間」，據文意改。

⑭神：原無，據文意補。

⑮汾：疑當作「沿」。

⑯止：原作「正」，徑改。

⑰董仲舒：原作「董仲書」，徑改。

⑱志：原作「制」，據文意改。

⑲當：原作「嘗」，據文意改。

⑳來：原作「然」，據《新安文獻志》卷七八改。

㉑稱：原作「轉」，據右引改。

㉒二十二年：原作「三十二年」，據右引改。按《宋史·高

宗紀》七、八，紹興二十年程瑀因李光事謫降。二十四

年，洪興祖坐爲程瑀作《論語講解序》，觸怒秦檜，送

昭州編管，是時程瑀已逝世。故「三十二年」顯誤。

㉓都：原作「郎」，據右引改。

㉔郎：原作「事」，據右引改。

㉕又爲：原作「令」，據右引改。

㉖「否則」句原無，據右引補。



儒藏

宋儒碑傳集 卷九三

宋儒碑傳集卷九十四

王居正 梁觀國 鄭剛中

故左朝散郎徽猷閣待制提舉江州太平

興國宮江都縣開國子^①食邑五百戶致

仕贈左通議大夫王公行狀

曾祖汝能、故任尚書都官郎中、贈尚書工部侍郎。妣蔣氏、贈清源郡太君。母氏、贈雲安郡太君。查氏、贈滎陽郡太君。祖寶臣、故任殿中丞、贈左正議大夫。妣周氏、贈吳興郡太君。父幾、故任朝散大夫、尚書主客員外郎、贈左金紫光祿大夫。妣曾氏、贈魯郡夫人。吳氏、贈建安郡夫人。公諱居正、字剛中。其上世故蜀人。王師之開蜀、孟昶舉其族朝京師、昶祖悉官昶故臣、公之高祖與焉。道維揚、樂其土風、因徙名數揚之江都。自曾大父至、皇考傳三世、皆有列於朝、名蹟班班在士大夫間。公生十六年而孤、太夫人春秋高、一以家事倚公辦、而耆學益力、

兼晝夜不息、嶄然見頭角。去游太學、太學諸公聞聲爭交驩。初、熙寧中、王荆公安石以新義惑天下、其後章、蔡更用事、槩以王氏說律天下士、盡名老師宿儒之緒言餘論爲曲學、學輒擯斥。當是時、內外校官非三經義、字說不登几案、他書雖世通行者、或不能舉其篇秩。公勉以親命、屈意場屋、心獨非之、未嘗肯作新進士語、留落不耦餘十年。黨友鑄說公、盍少自貶。公嘆曰、此天窮我、非人爲也。一第自有時、心之是非可改邪。久之、建安黃公齊爲大司成、得公所程試、驟許以王佐才、婁置前列。明年大比、黃公同知貢舉、欲擢公文首選、以風示多士。共事者議不咸、奏名猶在第二、賜上舍出身、是歲宣和三年也。解褐未幾、服太夫人喪、築室墓左、疏食水飲盡三年、里人始識古喪禮。免喪、調饒州安仁縣丞、荆南府府學教授。大名、鎮江兩帥交牒辟公教授府學、皆無所就。太上皇帝即位、詔部刺



吏二千石雜舉所知、以禮勸駕。公家居維揚、部使者上公名、應詔書、公謝卻之。郡遣別駕從數十騎踵門強起公、公卧不應。改徽州州學教授、未赴、召命兩下、辭疾不前。丞相高平范公宗尹、公同年進士也、爲上言公直諒孝友、當今無輩、於是復有旨趣召甚急。公至行在所、與范公相勞苦、且曰、始與公言云何。時危如此、公位宰相、不亟出所學、拔元元塗炭中、尙誰待。某避寇、崎嶇陽羨山谷間、分死溝壑、勉出見公、一道此意耳。范公矍然失席曰、宗尹知罪矣。賜對便殿、公奏、昔人有言、君以爲難、易將至矣。今日之事、朝廷皆曰難、則當有易爲之理。然國勢日益弱、敵氣日益驕、何耶。蓋昔人於所謂難、則強勉以爲之、今以爲難而不復有所爲、以待天意之自回、強虜之自斃也。臣觀宣和之末、有識之士固已袖手竊嘆、以爲難而不可爲者十五六。及至於靖康、則陛下以爲與宣和孰難。靖康之末、

以爲難而不可爲者十八九。至於建炎、則陛下以爲與靖康孰難。由此言之、今日雖難於前日、安知他日不難於今日也。蓋宣和以爲難、故有靖康之禍。靖康以爲難、故有今日之憂。今而亦云、則臣有所不忍聞矣。且條仁宗聖訓十事以獻、上甚悅。明日、諭宰相曰、如王某人材、歲月間得一人亦幸矣。改承奉郎、太常博士。紹興元年、除禮部員外郎。上將宗祀明堂、有司疑於嚴父之文、議不時定。詔用皇祐故事、合祭天地、並配祖宗。公立議曰、古之帝王非肇造區夏者、皆無配天之祭。聖宋崛起、非有始封之祖。太祖則周之后稷、配祭於郊者也。太宗則周之文王、配祭于明堂者也。皇祐宗祀、固宜以太祖、太宗配。當時蓋拘嚴父之說、故配帝并登眞宗。其後英宗朝、孫抃請專配以近考、司馬光、呂誨爭、以爲絀祖進父。神宗皇帝亦謂周公宗祀在成王之世、成王以文王爲祖、則明堂非以考配明矣。

今主上紹統、自眞宗至於神宗均爲祖廟、獨躋則患無名、並配則同祫饗、請合祭昊天、上帝、皇地祇於明堂、奉太祖、太宗配。詔禮部議是。隆祐太后升遐、討論冊禮。公言、國朝追冊母后、皆由前日未及尊稱。太后蚤儷宸極、蒙垢紹聖、退處道宮。按元符三年五月復太后爲元祐皇后、詔書、徽宗皇帝受命、欽聖獻肅皇后復豕婦之意明甚。崇寧初、權臣悖禮、以卑廢尊、是太后隆名已正於元符而不在於靖康變故之日也。謂宜專用元符詔書、明指姦臣沮格之意、告天地宗廟。乃不果冊。撫州守言甘露降、圖以聞。公請卻其圖、勿內。臺臣繼公劾守、奪其州。間一歲、進太常少卿、兼修政局參議官、起居郎。上方鄉規諫、公次前世聽納事爲集諫十五卷、以開廣上意。詔以時務徧訪羣臣、公獻疏數千言、其論省費尤詳。曰、宋興一百七十三年矣、自朝廷至四方百司庶府朝夕之所行、蓋一百七十三年

彌文之事也。今天下幅裂、海內鼎沸、陛下所居曰行宮、所至曰行在、而於一日二日少駐蹕之頃、以數路數十州土地之所出、欲盡爲向者一百七十年之事、不忍暫有所廢革。臣竊以今日爲能奉行祖宗之故事則可、謂之知時變則不可也。夫不知隨時以省事、而乃欲隨事以省費、故今日之事例有減半之說、究其實未始不重費而徒示人以弱。臣請以一事而言之。國初輿地之廣、人材之衆、歲放進士不過數十。近者陛下親策士于庭、釋褐命官近四五百人、此其費亦大矣。然御試之日、臣備員考官、遇夜、有司給燭半挺曰、此省費也。嗚呼、其省費之術亦已拙矣。他事大氏類此。臣願詔大臣、計百事之費而論定之。若曰興衰撥亂之事也、則爲之。禦寇備敵之事也、則爲之。任賢使能、救恤百姓之事也、則爲之。不在此等而涉秋毫之費者、一切姑置勿論、則費省國裕矣。疏奏、識者許其剴



切。以右文殿修撰知婺州。州貢羅舊制歲財萬疋。崇寧後希進者增其數以市恩。至五倍。民力大屈。建炎中。詔蠲其二萬八千。著爲定制。閱四歲。主計者格前詔。建白責歲輸。一切視崇寧之舊。公三上章。未報。遣僚屬詣政事堂言狀。大臣方持其議。計司督趣。郵傳旁午。公置其檄不行。掾吏震栗。交謁更諫。公曰。②吾願身坐之。不以累諸君也。呼吏爲文書付曹曰。即有譴諸君。盍以此自解。公復手疏五。不可以聞。上感悟。亟如公請。免符下。里愉戶懌。驩若更生。異時公歸。自永嘉塗出婺。空一郡之郭東。迎父老拜車下。曰。公去八年。吾州免二十三萬緡矣。轉運使移州。共御鑪炭。下其式。膚理非若胡桃。鵲鴿不中程。公報之曰。炭之期限則諾。彼民以炭自業者。率居深山窮谷中。安知所謂胡桃文。鵲鴿色耶。上方躬簡儉。③以新改風俗。臣下顧以浮侈敗之。不可。他日還朝。從容爲上誦其語。上曰。朕服御

膳羞。未嘗問精粗。況附火取溫煖而已。豈較炭之文色耶。嚴地陋。仰給鄰壤。歲漕婺粟以贍之。舟楫卒徒資用皆嚴主辦。起皇祐訖建炎。以爲常。嚴人輒請令婺旁縣民家載粟致之。嚴紓輓運勞。公曰。民賦已重。加以道里費。是兩也。且未有籍婺而輸嚴者。言於朝。復其故。徙知饒州。未至郡。以太常少卿召。發半道。除起居舍人。數月。除中書舍人。兼史館修撰。秩左通直郎。服三品。大將張俊戍江上。遣卒至彭澤縣。卒故縣吏也。負俊勢侵辱其令。令郭彥參械之獄。俊怒。訴於上。詔爲罷彥參。公言彥參不畏強禦。無罪。俊又陳有田在諸郡。丐免征徭。公言。兵興以來。士大夫及勳戚之家。科敷與編戶等。蓋欲寬民力。均有無。使貴賤上下。同力一心。共濟國事。況將相之臣。乃不能體此乎。除目有自中出者。公言。近習請託。進擬不自朝廷。所繫不輕。因錄皇祐詔書以進。上皆嘉納。其餘救弊裨闕。所還制

勅甚衆。如論平江檢撈官吏不當劾、和州新被兵、宜除其貢絹、事多施行。遷兵部侍郎兼直學士院。公頓首辭曰、臣愚不足以兼二事、願盡力佐司馬。竟不拜直院之命。北邊解嚴、詔百官各以疆事對。公力言防江之備不可撤、上采其策。公一意憂國、出入禁門、以人主爲知己、排權倚貴、亡所避、同列皆嚴憚公、出其下。車駕之親征也、公實扈從。次平江、羽檄狎至、柄臣或進退保計。上顧曰、如王某必不肯爲。其爲上所敬如此。眷禮日加、且將授以政。異意者皆側目視公。公畏讒之就、連拜章請郡、上不得已、除徽猷閣直學士、知饒州。入辭、上諭以即大用。復曰、台州陳橐治郡有迹、吾難其繼者、無以易卿。遂改命知台州。言者以危語中公、上記其忠、纔下、除徽猷閣待制。至郡未幾、提舉江州太平觀、屏居枯蒼者三年、上念公未嘗置。公弟駕部郎居修以職事對、上曰、卿兄某今安在、行大用矣。中書

舍人劉大中侍上論制誥、上曰、如王某極得詞臣體。侍御史蕭振論守令賢否、上舉公守婺日免貢羅、御爐炭事曰、守臣愛惜百姓皆如此、朕復何憂。廷中皆意公且復用。起知溫州。始秦丞相之參知政事也、甚善公、間而論天下事、意銳甚。既爲相、所言皆不讎。公疾其詭、言于上曰、檜嘗語臣、中國之人惟當著衣噉飯、共圖中興。時臣心服其言、謂有志於中興者要當如此。又自謂使檜爲相、數月必有以驚動天下。今施設乃止於是。願陛下以臣所聞問檜、使行其平昔之言。秦丞相慚怒、前好盡矣。及是秦丞相專國、公自知不爲所容、在溫半年、亟以目疾請祠、歸陽羨避謗深居。時事一不掛口。客至、清坐竟日、談訂經史而已。書祠官之考十有二、游心事外人莫能窺其際。秦丞相晚節權益張、尤畏惡善類、大誅譴以立威、嶺海間纍繫無虛郡、雖公闔門託疾、猶奪徽猷閣待制。公等視榮辱、晏如

也。紹興二十一年十月二十八日，以疾終于里第，享年六十有五。累官左朝散郎、爵江都縣開國子、食邑五百戶。明年夏五月甲申，葬于常州宜興縣清泉鄉孫墓村楊塘塢。公沒之年，秦丞相薨，太上皇親攬萬幾，甄闢淑慝，還公故職，以直前謾，且詔予一子官。用子登朝，贈左通議大夫。公氣節高亮，儀觀豐碩，聲音滿堂。其學根極六藝，深醇閎肆，以崇是闢，非爲己任。自其少年，已不爲王氏說所傾動，慨然欲黜其不臧，以覺世迷。於是稽參雋艾，鈎索聖蘊，摧新學詖淫邪遁之辭，迎筆披靡，雖老於王氏學者，莫能自解。龜山楊先生時與公會毗陵，出所著三經義辨示公，曰：「吾猶舉其端以告學者而已，欲鬢櫛而毫緝之，未遑也，非子莫成吾志者。」公愈益感厲，首尾十載，迄以成書，爲毛詩辨學二十卷、尚書辨學十三卷、周禮辨學五卷、辨學外集一卷。靖康建炎以來，朝廷懲創王氏邪說之禍，罷

配享，仆坐像，更科舉法，置春秋博士弟子員，國論略定。然餘朋遺黨，合力詆沮，所以搖正道者萬端。賴太上皇持之堅，旣不得逞，則陰挾故習，候伺間隙，識者懼焉。會故相韓儀公忠彥請謚，公時贊奉，嘗引儀公熙寧初闢近臣坐講之請以定謚，且謂：「自是君尊臣卑，猶天地定位，不可改易。雖淫辭曲說，厚誣天下，謂天子有北面之儀，君臣有送賓之義，天下卒莫之信，實有大功於名教，宜謚曰文禮。」盡發王氏之謬，以警在列，讀者皆竦。而韓氏子乃以故事未有以禮義謚者，竭宰相求易，宰相以謂公公不爲改。其在兵部，以事請對，上因及王安石新學爲士大夫心術之害。公進曰：「臣側聞陛下深惡安石之學久矣，不識聖心灼見其弊安在，敢請。」上曰：「安石之學，雜以霸道，取商鞅富國強兵。今日之禍，人徒知蔡京、王黼之罪，而不知天下之亂生於安石。」公對曰：「禍亂之源，誠如聖訓。然安石所學，



得罪於萬世者、不止於此。爲上陳安石訓釋經義、無父無君一二事。上作色曰、是豈不害名教。孟子所謂邪說者、正謂是矣。於是請以辨學爲獻。上許之。公序上語、繫於辨學書首。先時名公卿斥王氏者輩出、猶不能辟。至公上辨學、而楊先生三經義、辨亦列于秘府。二書相經緯、孔孟之本指始明。士皆回心向道、如水赴壑。天下遂不復宗王氏。蓋太上皇帝表章聖學之功、而公與龜山先生諸賢之助也。公他所著書、有春秋本義十二卷、論語感發十卷、孟子疑難十四卷、文集十卷、西垣集五卷、兵民條例一卷。公奉祿入門、班昆弟、字孤幼無留者。兄居安蚤世、差擇良士、以其女歸之。郊祀、任弟居厚以官。逮公亡、季子猶布衣云。娶馬氏、贈碩人。二子、曰復、右承議郎、通判臨安府。曰從、右承事郎、湖州長興縣丞。五女、長適右朝奉郎、幹辦行在諸司糧料院仲飡。次適右文林郎、保寧軍節度推官韓

亢、次適將仕郎傅公本、次適左從政郎、信州玉山縣丞孫璉、次適右承奉郎朱𠮟。孫男五人、曰椿、榴、枏、植、棠。孫女一人、尚幼。公位禁從、當書于史、碑于隧、謹撰次爵里、族系、壽年、行治上太史氏、副在私家、以俟立言君子。謹狀。

呂祖謙撰 《東萊呂太史文集》卷九

進士梁君墓誌銘

番禺詎京師盈三千里、吉行三月而後至中州。淑氣旣界嶺而不南、故南粵之地多山少田、草木鬱翳、生聚稀闊、而嵐氛瘴毒興焉。凡震於物產者、其形色臭味例之華土、得彷彿耳。人生其間、所稟不能獨厚、況聲教遐遠乎。幸而有穎秀之質、乃無措紳先生明道德之歸、以啓覺於人、又無高蹈潛夫含章隱耀、相與薰陶浸灌、以輔成其美、則由中材而淪胥不振者、夫豈少哉。若梁君觀國、所謂豪傑特立之士歟。觀國君名、其字賓卿。本隴右人、五季



南徙遂爲番禺人。賓卿始業儒、挺挺屹屹、如孤松立石。凡再預州薦、輒報聞罷。年益壯長、退而取經書熟復誦之、浩然嘆曰、嗟夫、聖賢垂教、乃使人譁於口吻、誕於紙筆、小而干澤、大而迷國、此荆舒公用以盲瞶天下者、可守而弗變耶。哀所作科舉文、畀諸火、勵志求道、沉浸醲郁、殊途百慮、一歸於正、資之深、持之久、確乎其不可奪也。嘗謂學而畔道、皆由異端惑之、乃力排老佛二氏、窮其指歸、摘其蠱禍、若言若行若事、必折以正理、食息語默、未嘗忘也。爲奏疏兩通、各萬言、走私僮謁諸天子、願屏絕二氏、勿俾無父無君之術侵紊人紀。會所在道梗、阻於上聞。時爲文章、亦不及它故、一以攘斥二氏爲機杼、且作勸諭一篇、鋟板廣播之。見斯人陷溺者、不啻如沉疴伏疾之切其體也。有賓客來、必探其微、知其在溺中、則不復發口、或竟歸掩關而卧。晚節見溺者益衆、化之難入、亦不復對客、曰、閱

百人未得一二、何以見爲。前後分閫仗節者衆矣、迄無知者。其州之人第私竊姍毀之曰、彼其愚歟。抑有狂易病歟。紹興壬戌歲、退居衡山之陽、辱賓卿貽書致雜文一編、凡數十首、蓋因其友高登以知予之有志乎鄒魯而無趨於竺乾也。其文豪勁該辯、或勸或戒、率不苟作、予用是信人生不繫方所、但賦受不與邪氣值、則襟懷定自拔倫。每爲知交論人物、輒稱而揚之曰、豈意嶺海間有奇士如梁觀國者乎。後三年乃聞其死、爲齋咨太息、且弔吾道之不幸。賓卿得年五十九、死之時十六年四月八日也。數子皆夭、其遺文存者有歸正集二十卷、議蘇文五卷、駁其羽翼異端者。編正喪禮十五卷、以革用道士僧者。壺教十五卷、付其女弟、爲女師訓。閭巷童女、以守禮法、勿徇俗溺也。死之逾月、其友人陳元忠率門人約古禮葬之。賓卿所與遊獨高、陳二子耳。二子、閩人也。予旣憫賓卿篤信好

古守死善道、恐其泯滅而無傳、訪其平生、而得其本末如此、爲叙而銘之。予不識二子、且聞高遠宦、而陳居番禺也、遂以授使鑱石而瘞諸其墓前、因廣其趣曰、士之大致有三、志於道德者、功名非所慕、志於功名、富貴利達非所羨、求富貴利達而已矣、則亦無所不至矣。而此三致又各有二端、謂富貴之義與不義、功名之正與不正、道德之純全與不純全也。彼異端之所謂道、蓋非純全者也。然其說誇張侈大、而有關鍵鈎紐能操切人、入明夷之左腹、其似是而非、若不可不注意、蓋相去毫忽耳。高明修潔之資、亟於上達者、以仲尼大訓爲迂且淺、遂甘心於彼、服其服、食其食、一循其圈襪、深入其奧窔矣、而考其行事、乃自置於彝倫之外、形猶毀之、況其心乎。由此觀之、賓卿之賢、豈不過人遠甚。使獲親有道、其所進立必不止是、是又可重惜者。銘曰、

扶正有要、絕惡有機。非造道者、伊孰能之。昔在昌黎、逮乎六一。皇極是扶、老佛是斥。其言雖長、彼徒自昌。滔滔橫流、塊土莫當。豈不可當、必兩君子。一言折之、利心怖死。利誘人貪、死脅人疑。千經萬論、卒歸於私。君子教行、雲披日耀。操以驗彼、情無遁照。邪火雖燼、邪焰已消。亦且鼓鐘、莫榮其彫。卓哉梁生、生在遐域。無師可親、探諸方冊。得匪朋來、聞而知歟。否則安能、篤信弗渝。大布之衣、藜羹糗饌。其中沛然、孰爲卿相。厄窮已矣、雖莫之嗟。士而死道、君何歉耶。越山峨峨、下莫潮汐。與君令名、俱久無極。

胡寅撰 《斐然集》卷二六

宋故資政殿學士鄭公墓誌銘

故資政殿學士東陽鄭公、紹興閒宣撫四川、留蜀門者六年。承朝廷新與金和之後、外飭邊備、內御將帥、上接士大夫、辨其賢不肖而采用其長、下撫



五十六州之民、無有遠邇皆便安之、道路歌謠如出一口。故相秦檜忌其能、誣致其罪、罪獄遣酷吏鍛鍊之、竟竄嶺外以沒、縉紳憤歎而蜀人思之。至今檜死、朝廷知其冤、追復元官職、其故良嗣以二十四年十月五日始克葬公於東陽鄉招福之原。後二十七年、良嗣以書抵耕曰、先公名節在朝、勲績在蜀、子蜀人、蓋知先公之詳者、乃今墓道之碑未立、子其圖之。耕以不能文辭、不獲命、則退考其家傳而次第其本末云、公諱剛中、字亨仲、其先閩人、五代末避亂浙東、散居婺之金華與衢之西安。金華之祖百藥生三子、克從、克允、克明。克從之子詳仕至中散大夫、公克允之曾孫也。大父諮累貢禮部不第。父卞亦八上、晚用累舉恩調醴陵令、致仕、終於承事郎、以公貴、累贈中奉大夫。公自幼秀穎、嗜讀書、不肯逐群兒嬉聚。既長、容貌偉然、器度磊落、博聞彊識、詞采煥發。丁中奉公憂、家徒四壁

立、母盛氏夫人賢而嚴、爲躬桑苧、以濟其須、公亦感激奮厲、益用力於學。與群進士試有司、必居首選。如是者數矣。至春官輒不利。繼丁母夫人憂、公年亦駸駸四十、簞瓢屢空、而氣終不少挫。識者期其遠到。紹興二年廷對、擢第三人、賜進士及第、授左文林郎、溫州軍事判官。溫名郡、太守率用顯人、每與公商疑事、決滯獄、輒中理。郡政一以付公。會歲旱荒、公徒行閭巷間、籍饑民、窮日夜不倦。或欲責富民出米以給、公曰、固也、然行之無法、則游手往往脅持譟競、反以生事。不若歛富民米、償以常平錢、官自給之。用公策、全活甚衆、貧富皆賴焉。六年召赴行在所、未至、除詳定一司勅令所刪定官、賜對便殿、所陳皆當世要務、光堯深器之。改宣議郎、除樞密院編修官。七年、兼權太常博士。將有事於明堂、前一日當享太廟、或謂方行徽宗三年之喪、未宜以吉禮見宗廟、公獻議曰、陛下以萬幾之

繁奪罔極之哀、坐朝起居如平時矣、方將親御戎輅以圖恢復、何獨至於見宗廟而曰未可。三年之喪、陛下行之內庭、不以爲朝廷之禮也。景德閒、明德太后之喪、未嘗廢享、臣以爲當如故事。從之。八年、兼權尙書右司員外郎。嘗因面對、奏曰、寬仁者人主之道、持法者臣下之職。今有司皆不肯任怨、苛察之聲漸歸諸上、姑息之恩各歛諸己、此豈善風俗持久之道乎。帝嘉納之。時大駕自建康將移臨安、公又奏曰、使朝廷謀慮足以料敵、賞罰足以使人、雖走一函之書、可以驅三軍於水火、孰謂舍建康而不可以制勝。使關防失計、外侮可入、則一馬朝渡、暮即東南、臨安庸足恃乎。臣願陛下旣遷之後、勿以爲安、上下一心、不置中原於度外、乃可。不然、臣恐不能無後日之悔。詞旨剴切、聞者悚然。會大臣主和議、金使在廷、中外□懼。又奏曰、犬方齧人、豈可無因而自己。虎方得肉、必不無故而舍

之。今敵人一旦欲與我和、還我已失之地、歸我已棄之民、是不可信也。然彼開我以好言、示我以善意、亦何辭而峻絕之乎。正當虛心、守以正中、至當之道而已。除尙書考功員外郎、號能舉職。除監察御史、未舉、除殿中侍御史、抗疏條奏和議利害、尤詳、大抵以尊主威、察敵情爲本、語皆驚人。樞密院編修官胡銓上書、言不當與金和、歷詆建議者、至欲斬秦檜。帝怒、罪將不測、而銓母老甚、人莫敢言、公力爲申救。禮部侍郎曾開亦以異議罷去。奏曰、方今金使遠來、計議未定、愛君憂國之心、魂夜悸、謂禍福之幾、皆在乎此、衆智交陳、群策並入、其區區之心、豈有他意、願陛下優容之。其愛護善類如此。九年、除宗正少卿、改秘書少監。金人歸我中原故地、樞密樓公絕江踰淮、道京入洛、以至關陝、其所經歷、存問故老、褒表忠義、與夫敵情曲折、山川形要、悉以上聞。章奏一出、公手歸朝、又面奏保京、



陝之策。尋除權尙書禮部侍郎、轉通直郎兼詳定一司勅令。十年、轉奉議郎、以明堂恩封滎陽縣開國男、除試尙書禮部侍郎兼權刑部侍郎。奉上太皇后冊寶、宰臣當攝太尉行事、公謂太尉秦官、不雅馴、宜改爲少師。至論獄事、反復精密、必歸於無冤而後已。十一年、除寶文閣直學士、樞密都承旨。金人叛盟、朝廷將用兵、公奏曰、陛下震發沈潛、布昭聖武、檄書一行、萬物吐氣、然黠敵多計、善爲妖祥、稍覺失利、便以甘言相怵、陛下能持斷然之意否乎。已而果再與金和。韓世忠、張俊、岳飛各以宣撫使握兵於外、一日命爲樞臣而收其權、公爲宰相言曰、此策信美矣、然利害得失常相倚伏、遇事更變、則激而復起、當周思熟計、益善其後。因畫七事皆施行之。進寶文閣學士、以本職出爲川陝宣諭使、且與金人分畫西北地界。金遣烏陵贊謨、孟浩二人至境、必欲得鐵山。公問之習邊事者、皆曰、

無鐵山則無蜀矣。公與反復論辨、卒屈之、又得商州、秦州地十之西五、凡可以屏蔽全蜀者皆在焉。始公將越境與北官議事、父老數百遮馬前諫曰、引之入、乃萬全。今往就之、得無意外慮邪。公曰、吾計之審矣。引之入、彼坐於吾家而不去、執之則爲國生事、縱之則重傷國威、固莫若出也。縱有他、不過殺一使者耳。衆歎曰、公勇過賁育矣。除端明殿學士、川陝宣撫副使、後去陝字、專領四川云。轉朝奉郎、遇太母回鑾恩、轉朝散郎、進爵子。十三年、磨勘轉朝請郎、遇郊恩進爵伯。十五年、除資政殿學士、十六年、除朝奉大夫、遇郊恩進爵郡侯。公自議畫界時、固已聳動群聽、逮專閫寄、號令肅然、旌旗爲之改色。邊軍十萬衆皆西人、勁悍吳璘、楊政、郭浩俱爲都統制分領之、權勢相引而政尤黠。公嘗欲移屯一軍、政意不欲、謂公曰、公必欲移此軍、奈楊政不肯何。公正色折之曰、某蒙主上委寄、偶與

諸君相臨、君欲以身試法邪。政恐懼、下階推謝、公命之坐、曰、君能知過甚善、吾胸中即快然矣。自是三大將拱手側足、奉命惟謹、訖公之去、不敢桀。公持紀律嚴、而濟之以恩、事細大必察、而行之以簡、推誠盡公、人人說服、不獨畏其威而已。蜀自軍興以來、橫歛百出、民不聊生、講和之後、當有以休息之、而供億不少損。公每慮一旦有警、誅求無藝、民益不堪、於是畢精極思、求兵民可以兩足者而力行之。首奏移司益昌、以便餽運、繼修營田之政、嘗於治所築亭、榜以思耕、而爲之記、其略曰、嘉陵江水之險、以灘名者殆百、米舟相銜、遇石而碎、與汨俱入者皆蜀人之脂膏也。今塞卒十萬、皆橐弓卷甲而卧、吾誠能借其餘力、雜耕關外、率以平歲計之、得粟一鍾、即減漕粟三鍾之力、度足支五歲、則可以請於天子、時貸農租矣。然公行之皆有條序、課之以程、分之以利、勤者必賞、怠者必罰、愈久而

愈信、故軍樂從、訖有成效。蜀有紙幣、患無錢以權之、公請益昌置監、鑄小鐵錢、至今通行。凡六年間、爲民減科數至七百萬緡、而備邊金穀亦數千萬計。蜀人方倚以爲長城、而奇禍作矣。十九年、以秦事出蜀、至武昌、有旨罷使落職、提舉江州太平興國宮、桂陽監居住。明年、責授濠州團練副使、復州安置。仍興獄于九江、連逮甚衆、吹毛百端、無所得、竟以嫁怨朝廷爲名、坐之、移封州安置。初、檜使人諭公以金三萬兩進、公嘆曰、此言何爲至於我哉。今日講和、正爲他時恢復計、要當息民儲備爲先。卒不進、檜已不說。會金人欲取燕北人之在我者、公每每爲檜言不可遣、而檜悉遣之。蜀門有義勝一軍、其首領李謹等十四人皆梟勇、亦在遣中、以此自危、相結謀叛、事覺。公察其情雖可矜、而縱之必生患、乃先斬以聞。檜滋不說、積前後忿怨、且知公材器決不爲己下、遂極力擠之。公至封、處之怡



然窮大易六十四卦之旨而爲之說、手寫華嚴經、閒以詩文自娛、留封六年、無幾微怨懟之意見於詞色。俄寢疾、索紙筆書兩頌、脩然而逝、實二十四年五月二十三也。公蓋以是日生、其始終之際亦異哉。享年六十有七。未幾復官職。後以良嗣遇郊恩贈宣奉大夫。公娶石氏、累贈永寧郡太夫人、有賢行、始能安公之貧、中能相公富貴、未能經紀其患難。方禍之作、良嗣亦就逮、謫柳州、夫人往來封、柳閒、調護甚至。公死、獨任後事、以喪歸葬、皆夫人力也。後公二十四年卒。公二男子、良顯早卒、次即良嗣、今爲朝散郎、直徽猷閣、權知揚州、主管淮東安撫司公事。二女子、長適新權知柳州邢晦、次適故吏部侍郎章服。孫男女一十一人、男曰樞孫、宣教郎。曰莊孫、承事郎。曰正孫、通仕郎。曰季孫、將仕郎。女適迪郎功詹密、進士俞恪、將仕郎李耆嶽、進士蔣處和、餘在室。曾孫男女亦一十一人、男曰伯

衍、將仕郎。伯謙、伯源舉進士。餘皆幼。公平生著文甚多、遭禍散落、所傳於世者有北山集三十卷、周易窺餘十五卷、經史專音五卷、良嗣訪尋未已也。公天資英傑、而養之者厚、發爲文章、渾渾如江河、而措諸事業者、光明俊偉如此、非閒世異人而能爾哉。向使得極其用、益大所施設、則其正君經國之方、開物成務之略、當不止是而已。故士君子之論皆爲時惜、而不獨爲公惜也。然彼陷之者能阨其身、而不能掩其名、能屈之於一時、乃所以伸之於萬代。異時權位烜赫、可以生殺人者、今皆與草木俱腐、人至羞稱之、而聞公之風者、歛衽敬慕、不敢少貶焉、其所得不既多矣乎。歲丁卯、耕以進士赴類省試于益昌、適遇公行、嘗爲三百許言以送公、至以諸葛武侯、韋南康爲公比、而論者不以爲過、此蓋非耕之言也。蜀父老之言也。銘曰、維古聖賢、養氣浩然。自孟軻沒、蓋失其傳。士餒厥

中見利則遷。或少沮之、惴慄以顛。英英鄭公、才雄氣全。其峻如山、其沈如淵。虛明內融、果銳直前。入爲名卿、論事回天。出總元戎、于蕃于宣。帝惠西人、命公撫邊。公旣厥心、振弊舉偏。悍將挫氣、疲忙息肩。迺實迺倉、迺營迺田。孰嘖孰呻、橫賦汝蠲。孰蝨賊汝、以鉏以鑄。西人愛之、語必曲拳。彼相何人、醜正怙權。橫加詆誣、冤犴逮連。投之瘴海、塊處拘攣。公甘若飴、抗節益堅。百世望軻、蓋庶幾焉。雲際天開、白璧洗滌。尊官顯名、追榮九泉。巋然其丘、東陽之阡。其不泯者、何千萬年。

何耕撰 《北山文集》卷末

鄭忠愍公傳

鄭剛中、登進士甲榜、累官監察御史、遷殿中侍御史。剛中由秦檜薦、檜主和議、剛中不敢言、移宗正少卿、請去、不許、改祕書少監。金歸侵疆、檜遣剛中爲宣諭司參謀官。及還、除禮部侍郎、爲川陝宣諭

使、諭諸將罷兵。尋充陝西分畫地界使。金使烏陵贊謨入境、欲盡取階、成、岷、鳳、秦、商六州。剛中不從。欲姑取商、秦、於大散關立界。又堅不從。繼除川陝宣撫副使、兀朮遣人力求和尙原。剛中恐敗和好、乃割秦、商之半、棄和尚原以與金。剛中治蜀、頗有方略。宣撫司舊在綿、閬、聞、及胡世將就居河池、饋餉不繼。剛中奏乞移司利州、自是省費百萬。常欲移屯一軍、大將楊政不從。呼政語曰、剛中雖書生、不畏死。聲色俱厲、政懼聽命。都統每入謁、必庭參、然後就坐。吳玠陞檢校少師、來謝、語閹吏、乞講鈞敵之禮。剛中曰、少師雖尊、猶都統制耳。倘變常禮、是廢軍容。行禮如故。奏蠲四川雜征、又請減成都府路對羅及宣撫司激賞錢。於階、成二州營田、抵秦州界、凡三千餘頃、歲收十八萬斛。請弛夔路酒禁、復利州錢監爲紹興監。皆從之。秦檜怒剛中在蜀專擅、特置四川財賦總領官、以趙不棄爲之、不



儒藏

宋儒碑傳集 卷九四

隸宣撫司。剛中怒，由是有隙。檜陽召不棄歸，因召剛中。剛中語人曰：「孤危之迹，獨賴上知之耳。」檜聞愈怒，遂罷責桂陽軍居住，再責濠州團練副使，復州安置，再徙封州卒。

《國史》本傳 《北山文集》卷末

校記

①「子」字原脫，據正文所述官爵補。

②曰：原作「白」，據四庫本《東萊集》改。

③儉：原作「檢」，據右引改。

④願：原作「廟」，據右引改。

⑤按秦檜卒於紹興二十五年，此句「之」字當作「四」字，或「年」上脫「四」字。

⑥郎：原作「領」，據文意改。

宋儒碑傳集卷九十五

汪勃 滕庾 程克俊 趙子晝

歐陽應求 常同 錢觀復

故樞密參政汪公墓誌銘

乾道七年四月十二日、簽書樞密院事兼權參知政事汪公勃薨、年八十四。十月己酉、葬會昌鄉蜀里北莊村。嘉定十三年、曾孫綱以墓上之銘來請。公字彥及、徽州黟人。年十八、州薦士稱首。試辟龐大學、鋒銳明^①。敏同舍畏伏、尊以宿舊、垂三十年。紹興三年、類省試饒州。二年、登進士第。主嚴州建德簿、池州建德丞。京口置沿江安撫、辟爲屬。十三年、除太常寺主簿。高宗厭戎馬久、思壹休息、既定和親、罷諸將兵、而名士大夫、皆謂父兄讎未報、兵未當罷。上患之、擇耆艾質厚不與趙、張同好惡者居紀綱地^②、共持國論。公自御史臺檢法官爲監察御史、奏事殿中、上方書孝經、公奏顯仁后歸、孝之大

也。請刊石、摹以賜羣臣諸生、示天下子道。又言、新學初建、科場適開、萬方趨嚮於是乎。卜學者不粹、然一出於孔氏、而以專門曲學亂之、可乎。上曰、此所以正人心也。詔有司、凡私意臆說盡黜之。大理少卿朱斐對上、指大理寺爲詔獄、公論斐不自知職業何事、不學無識、竟罷斐。蔡攸家人至行在、公歷陳靖康禍變、臣子不忍聞。上讀疏悲憤、亟命臨安還之所貶州。京子孫不用赦令內徙。進侍御史、言、陛下近以各郡土俗利害、隨宜增損、裕養民力、其節目甚多、給舍條上矣。宜令監司以方鏤之、徧下州縣、使百姓戶曉、而劾其稽違者。由是上益以公爲知大體。明治道、擢授諫議大夫、兼侍講、押班。趙轍憑寵作勢、妄占人廬舍、公奏斥之外。上曰、逐一內侍而其類皆竦、人知畏矣。愈奇公、可大用也。遷御史中丞。十八年、遂以端明殿學士副密院事。段拂罷、兼攝東府事。自秦檜志得惡、同列偪己、始



廢序遷之制。甫簽署或參知、已逐去、俄復竄謫。公上所屬任、非檜引者、每造前傾接、愈拂旋首、下殿目送、必與檜鈞禮。檜瞬息間喻意、相縻歲餘、未有以逞。公顧檜忤忍、欲有所建白、答上恩遇、常沮塞不得間、則歎息曰、此豈伴食處哉。及賜檜犀帶、忽問、樞密有否。使者言、帶二、一賜樞密。檜憮然曰、上果厚汪樞哉。彌不平。公亦慨然曰、吾可以去矣。即告上、陛下幸哀臣母老病、得退就田里。上雅知公爲檜發也、重慰薦、以舊職食宮觀祿。終檜在、不敢動搖公者、上力也。檜死、起知湖州。廉儉至骨、不費公使一物、內屏燭跋、撚紙代燎。政以慈愛爲主、勸兩訟勿爭、詞致殷重、其人感悅、合掌結歡而散。嘗上相語、莫激惱這佛。將老、上終始念公、超秩三等制曰、爲民借留。葉義問、故人也、有隱憾、上章毀詆、奪學士。孝宗初、特詔復與、言者未已、命再格。又詔復龍圖閣、而公已薨、遂追復焉。蓋當檜亡後、一時

黨援、剗薙焚汰、不啻草莽。獨公老成重德、人無異詞、雖爲義問排毀、公者、後亦卒自悔恨。而二宗眷眷於公如此。嗟夫、是非賢否之實、豈終不可定哉。汪氏望於黃陂、世序甚遠、然未有仕者。公始贈曾祖昌齡太子少保、祖惟立少傅。父才貴太子太師。在饒州也、張琪兵突黟縣、家遁潰、不相知。母舒氏陷賊、幾不脫。寇退、邑落死走十三四、而公奏名以歸、長幼各聚、數里內無一亡失。鄉人驚異曰、是公素孝謹、天殆活之。旣貴、封舒氏延康郡、逮西府之養云。贈其配曰祝氏高平、曰唐氏南昌、皆郡夫人。四子、作礪、湖北提刑。作舟、監行在都茶場。作霖、京西安撫司幹官。作父、清江丞。孫十一人、義和、侍御史。義榮、大理丞。義端、徽猷閣待制。義質、蘄春簿。義的、太學內舍生。義路、義處、義方、義實、義善、義準、曾孫綱、直秘閣、浙東提刑。紀、贛縣丞。統、通判楚州。紘、監平江府贍軍庫。絳、知龍陽縣。緝、知永興縣。綬、知

豐城縣。繹通判安豐軍。公誠篤款款盡。自少至老。不欺無妄。尤簡樸。安同異。行疇壠中。農坐桑語。爾汝如一人。歲侵。倒廩下其直。巨姓皆曰。樞密尙減價。我何敢求贏。故市糴常平。夥人亦以爲佛也。公在時。諸孫已取高第。後侍從相踵。至綱三世。卓然異材。宜於內外善類合一。追述祖德。銷熄誣謾。太史公所謂忠信行道以奉主上。世家之流也。不止銘墓而已。銘曰。

治古君臣。與道合離。卜用一相。至公匪私。舜命伯禹。稷契參之。迹不存家。心國是毘。翼翼高宗。進臣以恭。獨我偃我。爾無尙同。斷斷汪公。輔君以忠。臣豈不比。曰君是從。事往論移。羣訕一聲。雖與檜異。難於自明。惟兩聖人。深照厥誠。始黜終復。生冤死榮。墳彼北莊。其下靡刻。蜀笄仍存。翁仲猶默。碑銘新特。綱也念德。碑堅有泐。銘堅無惑。十二月日。

葉適撰 《水心文集》卷二四

權太常少卿贈銀青光祿大夫滕公庾神道碑

睢陽滕子濟。子端爲兒童時。俱負雋聲。逾冠同登崇寧五年進士第。相繼中詞學兼茂科。政和宣和中。先後入秘書省爲正字。爲著作佐郎。他人方附麗權門。躡取顯宦。二公獨恂恂自守。滯留儒館。泊如也。光堯皇帝中。興於南京。首用鄉閭之望。子濟旣由太常少卿登壇盛禮。仍草告天肆眚之文。子端旋以博士討論典故。蓋其踐歷往往同時。亦或相代。人號衣冠盛事。會宰相惡陳東。歐陽澈之訐直。加以大辟。子端即上疏申救。且移書相府。復欲面詆之。爲同舍郎扞止。義槩籍籍搢紳間。已而從幸廣陵。子濟由左史遷中書舍人。子端亦爲郎文昌省。攝容臺事。駸駸進用矣。是歲十二月十八日。子端遽以疾卒。不二年。子濟遂自諫大夫入翰林。登樞府。故君子於子端尤太息焉。壽才四十二。明



年長子瑾挈柩南渡、旋窆於婺州金華縣北山俱
眠之原。至淳熙四年、瑾守通州、其弟琛守舒州、書
來言曰、先人蚤世、於今五十年、賴遺訓餘澤、兄弟
分守兩淮、銀印青綬、追爵三品。惟是墓道有碑而
詞未刻、死且不瞑、敢以爲請。某舊嘗讀公之文、又
聞救東、澈事、欣慕其高節、且於二守嘗同朝同僚、
其何可辭。乃序而銘之。公諱庾、字子端、世居應天
府宋城縣。曾祖衛尉寺丞堯臣、贈太子少保、妣晉
安郡夫人王氏、信安郡夫人陳氏。祖宣德郎公綽、
贈太子少傅、妣魏郡夫人張氏、魯郡夫人鄭氏。父
左朝請大夫、知鄂州友、贈太子少師、妣蜀郡夫人
常氏。公少力學、年十二爲文、瘞死禽、磨瓦書之、題
曰爵王墓碑。自是盃酒嬉笑率寓於文、見者驚異。
初仕爲將仕郎、蔡州新息尉、民號清和縣尉。秩滿、
陞通仕郎、調陳州商水丞。既中科目、循文林郎、爲
九域圖志所編修官、改宣教郎。徽宗幸秘書省、轉

奉議郎、歷承議郎、除正字。九域志成、轉朝奉郎。駕
再幸省、轉朝散郎、遂佐著作、進朝請郎。丁內外艱。
建炎初元起爲太常博士、轉朝奉大夫、擢都官員
外郎。時庶事草創、賞功補副尉者不可計、是非混
淆。公謂興復大業在信賞必罰、今吏以微文沮所
當得而以賕謝予其不當得、何以鼓天下忠義之
氣。又帖給吏手多假託權勢取之、因轉售於人、冒
濫滋甚。於是隨事爬梳聞諸朝、嚴其籍。轉朝散大
夫、兼權太常少卿。初、李丞相綱素善公、其論救東
澈也、當路頗以爲憾、久稍諒其無他、委看定四方
封事。公晝夜省閱、凡可行者差次潤色、類以奉御。
欲裨助初政、憊心疲精、失食飲節、坐是致疾。吏祁
儼乘時爲姦、公力疾案治之。無何、長貳佑儼、咎之
而已。公嘆曰、吾爲郎、治一吏不見信、況敢望協心
爲國乎。天下事略可見矣。因忽忽不樂、以至於沒。
搢紳嗟惜。公天資明敏、恢宏自信、爲文章立成、下

至書算藝術、見輒能之。惟於仕進不汲汲、在館閣踰八年、非旅進不至政府、日鈔異書以廣見聞。少師公與弟比登儒科、坐上書入元祐黨、晚御諸子甚嚴。公朝服受教、責略無惰容、修身謹行、惟恐貽親憂。同父昆弟姊妹十五人、極其友愛。初娶常氏、諫議大夫安民女、追封信安郡夫人。再娶路氏、寶文閣直學士昌衡女、追封咸寧郡夫人。五子三女、皆路出。璫璆早亡。次通州。次瑞。未仕。季舒州也。長女適右迪功郎馮揆、次適左奉議郎駱仲舉、餘不及嫁。孫男七人、仲通、仲容、仲雍、仲山、仲忱、仲恂、仲宦。仲容、迪功郎、福州懷安縣主簿。孫女四人、長適迪功郎、新鎮江府司法參軍呂祖恕、餘尚幼。銘曰、赫赫祥光、龍飛宋都。離離雁行、漸於鄉閭。可用爲儀、匪直其羽。亦有忠言、以驚該輔。伯兮先登、秉國事樞。季止郎潛、命也何居。天之於人、報有先後。不於其身、必蕃厥胄。是生良子、剖符相望。追爵三品、

密章未央。公文可傳、公行可紀。詩以聲之、公爲不死。

周必大撰 《省齋文稿》卷二九

光祿大夫諡章靖程公克俊家傳

公諱克俊、字元籲、姓程氏。其先本梁將軍忠壯公、靈洗之後、自歛之黃墩徙浮梁之景德鎮。曾祖諱居吉、贈少保。祖諱世顯、贈少傅。父諱達、贈太師。母朱氏、封和國夫人。太師登政和二年進士、不樂仕、授徒里中、遠近來者至不能容。乃建鄉校、立宣聖祠、朔望春秋奠謁、習爲禮容、相師成俗。有易解十卷、論孟解十卷、五經解題二十卷、學者號九龍先生。公生而碩偉、儀容俊彥、太師賢而器之、授以易學、博極羣書、綴文警拔。徽宗新舍法、以經術取士。公應詔入太學、月餘試有司、屢中殊選、聲譽藹然。出諸士右。宣和六年、策進士于庭、擢居甲科。批卷末云、實學該博、士林傳以爲寵。初調湖州理曹、除



興慶院教授、遷太學博士、權太學正、授紹慶軍節度判官、改勅令所刪定官、除國子監丞、尋授尙書駕部員外郎、歷工、兵、吏部司勳員外郎、丁外艱、哀毀盡禮、服闋、大參沈公薦之、召對、極口論天下事、宸聽嘉納之、擢起居舍人、兼左右司稱職、拜起居郎、中書舍人、兼侍講、權直學士院、唐末、五代之際、淮有堰曰瓦梁、百餘年來、廢壞不存、公奉旨往視、沿徐河而上、物色之、里老得遺址於眞州東北、會于滁、又北至於濠、入于和、綿亘四州、內可固圍、外可禦鄰敵、金湯之勢屹然、凡堰之利病、條奏甚悉、上覽之、尤知公爲有用也、公侍經筵、陳說古今要務、退而未嘗與人言、謹慎周密、類如此、擢給事中、直學士院、時鄱學宮在城東、中更兵燹、或請於朝爲墓地、有旨可其奏、公封還制書、學得不徙、南渡以來、大將怙恩僭賞旁午、公不畏強禦、每每裁抑、至於論舉減民租、輕稅歛、朝奏夕下、凡國家之事、

利害纖悉、知無不言、專以杞僥倖、詆權貴爲先、中外憚之、會金師與劉錡戰於順昌、稍有懲艾、遣蕭殷瞻求和、公草裁制書、誓約明審、金主讀其文、以爲信不可渝、是時朝廷大典詔冊號令皆出公手、知紹興十二年貢舉、考博學宏詞科、得洪遵、沈介、洪适、以所試制詞進讀、上曰、是洪皓子邪、父在遠、能自立、此忠義報也、遂以遵爲秘書省正字、介、适並爲敕令所刪定官、自中興以來、詞科登選即入館、自是科始、上初在潛邸、留心載籍、問安視膳之暇、手不釋卷、公兼資善堂翊善、一以道德文章輔承、凡有詢問、隨所剖析、至如今古治亂之跡、必反覆言之、以相磨礱浸灌、故學之功茂焉、入翰林爲學士、十三年冬、拜端明殿學士、簽書樞密院事、權參知政事、同提舉編修玉牒所、漢州布衣陳靖獻中興統論于朝、公率同列五人薦靖請官之、以來讜言、詔補靖右迪功郎、言者屢請復太學以養人

才上以戎未暇。公曰：東晉設學於鼎沸之中。今兵漸息，興學正其時也。乃詔太學養士，權於臨安府措置增展。時母和國夫人七十有六矣，紺髮明眸，就養二府。公自政事退，事奉承顏愉悅，縉紳榮之。欲置公相位前席，曰：朕得卿數人，可致太平矣。公以疾力辭機政。章三上，得旨提舉臨安府洞霄宮。踰年丁內艱，執喪盡禮，詔賜嚴報院爲香火。太上更化，賓延故老，屢詔起，知建康數月，改知湖州。未幾，召赴行在奏事，辭不獲。既至國門，中貴傳宣延勞，賜茶藥、衣帶、鞍馬。登時引對內殿，太上勞問久之。公丐去，上曰：朕欲卿以身助朕。翊日拜參知政事。夙夜憂勤，振舉朝綱，中外翕然稱之。數月以疾不能朝，乃上章曰：臣蒙厚恩，待罪政事，重有負薪之憂，常恐負先朝無以報塞，願乞骸骨。上手劄報曰：卿暫以微恙遽露封章，力祈祠館，勉爲朕留。保養至和。竚期勿藥，屢遣大官致餐，御醫診疾，駟使

臨問相踵。公請辭不已，乃拜資政殿學士，仍提舉臨安府洞霄宮以歸。公曰：人生如吳蠶，老當作繭。乃自爲壽藏於和國夫人塋之溪陽。踰年薨，享年六十有九。訃聞，上震悼不已，奉御禮葬下寶石。公抱經綸之才，受知眞主，勵相國家，稱爲中興碩輔。故其薨也，士大夫聞之，莫不嗟嘆。公平居下士，推轂後進，創立義莊，以贍宗姻之貧乏者。自顯位，施恩褒外，凡得入仕者二十二人。公入仕，不歷州縣，凡二十九遷官，至參知政事，又凡八遷至中奉大夫，贈官至銀青光祿大夫，職名至資政殿學士，爵至鄱陽郡開國侯，食邑至一千七百戶。淳熙九年，謚章靖。有文集五十卷，內外制集二十卷，易通解十卷。公娶朱氏，累封普寧郡夫人。卒，年六十有五，葬和國夫人墓右。子男六人：湜，承事郎，浙西安撫使司幹辦公事；早卒。洸，右朝奉郎，通判潭州軍事。濤，右朝奉郎，湖北路提舉司幹辦公事。洵，右宣教

郎秀州青龍監稅。淑、沈俱承事郎。未銓。

無名氏撰《家乘》《新安文獻志》卷九四

宋故徽猷閣直學士左中奉大夫致仕常

山縣開國伯食邑九百戶贈左通奉大

夫趙公墓誌銘

公諱子晝，字叔問。五世祖德昭封於燕，是爲燕懿王。子曰惟和，永清軍節度觀察留後，安定郡公。公之高祖也。曾祖諱從審，寧海軍節度觀察留後，宣城^④郡公。祖諱世禕，鎮海軍節度觀察留後，北海郡公。父諱令僉，中亮大夫，榮州防禦使，累贈少保。母王氏，封定國夫人。叔問幼則端厚，警敏，秀穎特異。中亮愛之甚，稍長，於讀書如嗜欲。中亮藏書三萬卷，號書窟。叔問日肄習其間，沈涵薰浹，不捨晝夜。中亮遇大禮任子，當及叔問，顧而曰：「是兒能自致，何以此爲？」取楷笏予之，因捨公而任其次。初入南京國子監，於經籍固之貫穿便習，視當時場屋之

文，意以謂殆可不學而能。每較藝試闈，日未中，文已就，徜徉笑謔，若不經意者。及榜名，屢出諸生上。年未冠，遂中大觀元年進士第，爲宗子第一。起家授承奉郎，簽書大名府判官廳公事。魏固大府，賓幕僚史時宴飲相追逐，叔問常以事辭。公退，手未嘗釋卷。歷佐二留守。許特進將莊重，謹繩墨，大器重之。後尹梁資政子美爲治，強敏任威，一路畏讐，僚屬唯唯進退。叔問恂恂少年耳，獨能因事白其已甚者，尹或捨己意而行其說。秩滿，調湖州司錄事，代歸，持所生母心喪三年。調憲州通判。宣和元年，差充詳定九域圖志所編修官。會書局例罷，除知澤州。未赴，改知密州。召對，爲刑部員外郎。自元豐新官制初除，令鑠爲郎，久無繼者，至是始除。叔問，族屬榮之。未幾，丁中亮憂。中亮居家剛嚴有常度，叔問自幼及壯，在親側，目未嘗忤視。雖盛夏，冠帶終日，出入虞侍，時溫清，視膳羞，朝夕左右，便便



儒藏

宋儒碑傳集 卷九五

唯謹、蓋聞聞侃侃、盡色養之驩焉。中亮以其敦樸、常曰、是質實兒、竟自佳。其於兄弟篤友愛、鞠其孤、猶己子、宦學婚嫁、皆身任之、無失其時者。於親故、咸有恩意。靖康虜寇大入、自宋流寓淮浙、道丁母夫人憂、間關南渡、竄伏信安山中。建炎四年、車駕駐蹕會稽、詔以吏部員外郎召、俄遷左司員外郎。時范丞相當國、叔問舉職不懈、裨益居多、遷太常少卿。艱難以來、有司文籍散已、典禮或闕。公學既通博、隨事討論、稽參古今、綿繇草創、禮無違者。會禮部侍郎闕、除權官、上以公爲可、遂以命之。明年、除徽猷閣待制、樞密都承旨。宗室任三省密院從官、實自公始、人以爲宜。又明年、遷兵部侍郎。紹興三年冬、虜使李永壽、王詡來、上命公館伴。時虜使久不至、至是虜情叵測、人以館客爲難。叔問自廷勞燕好、至於贈賄、彌縫應對、無不得宜。虜使卒入見、成禮而去。其在朝廷恬曠靖共、無所適莫、思不

出位、從容以和。踰年、請外補、以徽猷閣直學士知秀州。明年、移知平江府。其爲治安靜不擾、循理去甚、不爲赫赫名。久之、懇請祠宮、以兵部侍郎召至行在。力申前請、遂以舊職提舉江州太平觀。寓止衢州。凡七年、未嘗有留滯之歎。自言慕司馬微^⑤之爲人、若所謂入獸不亂群、舍者與之爭席、蓋優爲之。得寬閑之地、城南之郊、爲池亭林圃、間與交舊游息其閒、浩浩然若將終身而不厭者。晨起、誦六經、率若干卷。又身教子姪、講論經史、日有常課。間則報謝賓客、不以寒暑風雨高下易其度也。十二年夏四月、以疾告老、遷左中奉大夫致仕。壬辰、以不起聞、享年五十四。詔贈左通奉大夫。交游皆失聲相弔。余初識叔問、吳興一面定交、今三十年、情好彌厚、終始如一。觀其剛而不亢、通而不流、不爲利回、行己有耻、至於廣覽強記、直諒多聞、蓋余之益友也。其文敏而粹、其家集而藏之、得二十卷。於



游藝往往精諸書法尤爲識者所推篆籀楷隸皆力追古人。至訓詁形聲之末與夫禮樂度數名物之微莫不審其是而知其說也。其孤將以七月己酉葬公西安縣道泰鄉甘泉之原厥既得卜其孤號踊請銘於俱。余惟叔問之交友知舊其名位文詞足以聳動一時而傳信於後者爲不少盍請銘於彼而俱是求不可。其孤叩頭見要曰先友之久而厚莫先丈人知先人平生又詳况遠日既迫儻辭引曰將不及事無以掩諸幽以沒先人之美而重不孝之罪泣血固請。余義不得終辭則叙其治行而繫以銘。公配郡氏封碩人。三男長曰伯賜右承務郎提點坑冶鑄錢司檢踏官。次曰伯昂右承務郎。幼曰伯量。二女長嫁右修職郎監臨江軍贍軍酒庫馮作次已嫁而歸。銘曰

太支惟四仲封於燕純嘏有衍流光邈綿五世彌昌允藝且賢惟叔問甫奮由厥躬抗志厲行光享

有終驥墮地走蘭茁而芳絕出群輩鳳翔高岡瑞此王室家庭之慶垂髫就傅束髮試吏至於艾耆出守入侍靖共明哲純美無類進斯匪懈退以求志風流江左術業洙泗胡不百年益用於世向歆七略間平六藝庶幾有成斧藻皇治甘泉之幽盤鬱森邃藏之孔安遺祉嗣裔

程俱撰《北山小集》卷三三

歐陽先生墓誌銘

某外姪歐陽哀乞其父銘且以某族子國學生箕狀來言曰先生諱應求字仲俊姓歐陽氏世爲廬陵永和人其族譜有文忠公之世次在曾大父諒大父震皆鏹迹丘園父景先少篤學警敏年十五賦諸葛管蕭之亞有司動色以爲得宿學及見乃年少由是知名其兄景仁亦聲動場屋兩人皆早慧鄉譽藹然每與計偕而卒不偶晚得衡之耒陽尉以沒而其兄亦終於宣之太平簿歐陽之居永

和者登第踵武而貢於太常者相望也。鄉曲號爲儒林名族。而此兩人汨振乃爾。衆爲稱屈。先生有賢父兄。而又弱不好弄。夙悟少成。於書無所不觀。尤深於易。早舉進士。以母老不行。建炎間。嘗類試漕臺。一出不合。即退居。開門授徒。且學且養。無復進取意。與其徒道堯舜孔子正心誠意修身齊家爲可用之說。夷猶陋巷中。蕭然藜藿。自以爲天下至樂也。學者心服而誠尊之。鄉人無少長咸稱之曰先生。天性孝友。初娶劉氏。一子方齏。母夫人胡氏以其適孫。尤鍾愛。起居必偕。偶天閼。先生往視之。坦坦施施。割情忍愛。以安母意。未幾盜作。先生奉板輿避地里之薌城山。一日寇至。同避者悉先去。謂必不免。先生逡巡負親涉江。亦免於難。張氏姊寡無子。一女尙幼。貲頗饒。衆爲覬之。先生悉力全度。迨其長。擇人嫁之。盡授其業。親友或有負。即窘甚。不切切人自不忍欺。先生容貌魁梧。頎然而

長三尺童子與接。亦低眉拱手。可近而不可狎。操履堅正。於朋友義而信。居鄉敬老慈幼。怒無厲色。目不闕要人門。足不染訟堦塵。厚性寬中。犯而不校。非僻亦無自而至。常著書課子。每曰。人強爲善。尙或罹禍。況爲惡乎。善而罹禍。正猶秋蘭之厭風霜。雖若槁矣。而芳不輟於歲時。惡或徼福。亦猶朝菌之蒙雨露。即苟榮矣。而質不能於晦朔。吾寧爲善而罹禍。可爲惡而徼福乎。其言切理類此。喜吟詩。字畫遒勁。雖造次不作行草。自號樗叟。君子謂先生不應辟召。似徐孺子。頽乎處順似黃叔度。至耄期稱道不衰。似及門於孔氏。殆未可游夏輩也。卒於隆興二年三月辛丑。享年七十有六。以其年七月壬辰葬於縣之膏澤鄉桃花原先塋之右。繼室解氏。一男曰哀。好學有立。蓋申鮮虞之傳摯云。四女。長歸箕從弟昌容。次適羅鎮。彭允成。季在室。孫男某。孫女某。皆幼。先生之葬易歲矣。而銘未刻。



儒藏

宋儒碑傳集 卷九五

重惟積行之君子、不幸不見用於世、至抱其業以卒而世之君子樂道人之善者、又無從揭而揚之、則生者有愧、而死者長遺恨於無窮、輒次其事以授其子、使告後世達者。銘曰、
嗚呼樛叟、世突梯以生、叟戛戛也。箝結以取容、叟耿耿也。嫉披附炎、獨凜凜也。忠信以干城、非僻無以入也。自謂空言、實活國之藥也。我識其藏、視神未四尺無愧色也。

胡銓撰 《胡澹庵先生文集》卷二六

御史中丞常公墓誌銘

御史中丞常公既葬、後十有三年、其孤裕使其弟秩以公之世次、官封、功行來中都、泣請于應辰曰、孤裕等不天、惟先君子以直道事主上、盡言無隱、名節聞天下。不幸先君子無祿即世、冢上之木拱矣、而隧碑未立、茲惟缺典、私心慙焉。子其爲我叙先君子光烈、以信於遠、而先君子之死爲不亡、而

孤裕等不孝之罪、或得以少追。應辰作而曰、噫、先正猶日月也、非惡筆所能繪畫、追惟風采、起敬不忘。其闢熙豐之邪說也、如關申、商、尊元祐之正論也、如尊周、孔。故呂本中行公之詞有曰、排斥異端、回狂瀾于既倒、維持正論、發潛德之幽光。而張九成撰公之志有曰、言路既開、臺諫增重、異端既黜、六經大明。世以爲名言。應辰復何所容其喙。秩請不已、應辰閱其誠而且哀、曰、敢不惟命。試掇其尤者識之。謹按常氏自鼻祖先相黃帝、闕後曰季、曰惠、曰林、曰爽、班班見於史傳、不絕。至唐而袁相代宗。唐末其孫宥仕於蜀、世爲邛之鶴山人。國朝尙書工部侍郎諱元者、于公爲高祖。尙書屯田郎中諱溥者、于公爲曾祖。大中大夫諱某者、于公爲祖。監察御史、特贈右諫議大夫、累贈光祿大夫諱安民者、于公爲父。光祿在哲宗朝爲御史、論章惇如王鳳、亂漢。林甫亂唐、論蔡京姦足以惑衆、辯足以

飾非巧足以移奪人主之視聽力足以顛倒天下之是非。惇京比而讒之入元祐黨籍貧不能歸乃徙於陳公其仲子也諱同字子正生而豐下穎悟不羣七歲侍光祿公謫滁滁多山水名公卿詩賦記文題刻殆徧公一過輒能默誦翰林學士曾公肇時爲郡守見而異之曾公嘗與客論近世君子小人公前揖曰涑水君子之魁金陵小人之首曾公喜謂光祿曰它日挺挺有父風未可量也十二歲光祿授以六經之學再三覆講無一字誤尤長于周禮六典圖其儀物驗諸制度不差一日光祿公詔之曰吾老矣汝其務求師乎吾同年有元城劉先生同里有宛丘張先生當世偉人也汝欲學義理當師元城欲學文章當師宛丘于是公兩師之二先生高以評曰政和八年賜上舍及第靖康初上以大元帥置東南道都總管司差充專管機宜文字建炎二年扈蹕南渡除知大宗正丞蒞職

廣右四年召赴行在紹興二年知柳州又再召三年入見首奏今日之患宰相之權太重將帥之任太專凡六事累千百言悉請更革以彊國勢除殿中侍御史才十閱月彈擊八十人其間宰相執政四侍從十六郎官寺監官十三監司帥守二十六庶官十五大將六臺綱大振中外肅然四年除起居郎中書舍人兼史館修撰朝廷命令有不允公論者輒言之坐是忤時宰意以集英殿修撰知衢州五年請祠以徽猷閣待制提舉江州太平觀六年除禮部侍郎七年除御史中丞奏疏凡五十上所論皆小人然所薦趙鼎王庶李彌遜梁汝嘉劉岑張致遠胡寅張九成魏玘晁謙之陳正同孫道夫徐度朱松張祁黃鰲李霖閻丘昕施廷臣張絢張戒許忻吳彥章等率又舉之口而不筆之書何者退小人公則任怨于己進君子公則歸恩于君也八年秦檜向子諲請與金和潘良貴請戰公慮



敵詐和、獨請善備、且奏曰、檜自金歸、受其大帥所傳密諭、陰爲金地、願陛下察其姦。臣嘗論其兄梓、今又論檜、臣與檜初無怨隙、獨爲國事爾。上命侍從同議、子諲堅執講和之說、良貴大叱之、交爭於上前。上驚、欲抵良貴罪。及公奏事、上意子諲戶侍之除、公所薦、必助子諲也。因顧問。公乃曰、前日以其才可貳版曹而薦之、今日之事則不然。子諲請和而附檜、曲在子諲、良貴請戰而忤檜、直在良貴。上不悅、因丐補外、以顯謨閣直學士知湖州。子諲、良貴俱罷。當是時、趙鼎在廟堂、則奏曰、常某、良貴誠得罪、不宜因子諲而出之。張致遠在給舍、則奏曰、不應以一子諲失二佳士。張九成在講筵、則奏曰、若以子諲之故逐右史、又逐中司、非所以愛子諲。在內如黃鰲、則詒書於公曰、無將大車之詩、大夫悔將小人也。其一章曰、無將大車、祇自填兮、其二章曰、維塵冥冥、其三章曰、維塵離兮、以言君子

之將小人、其初則自取洿浼以致病、稍盛則能蔽掩、使不得光明之道、其卒也壅塞而自重其累、才則薦之而佞則斥之、於中丞乎何悔。在外如葛立方、則又詒書于公曰、昔朱雲論張禹罪、成帝欲刑之、則辛慶忌死爭、王章直言、成帝欲戮之、則梅福申救。劉毅以晉武比漢桓、靈、則鄒湛寬廣帝意、陽城論裴延齡不宜相、則張萬福揖衆稱賀。數子非有言責、猶自奮若是、況爲聖主耳目之官、以古之正臣自任者乎。身雖暫退、而忠節德義滋進矣。蓋檜專主和、子諲專附檜、良貴廷叱子諲將得罪、公先論子諲以救良貴、及草章論檜而公已罷、故諸賢皆惜公之去。當時公論、其不可掩如此。九年、促召、不就。請祠、得提舉江州太平觀。貧無立錫地、又徙于秀之海鹽縣精舍居焉。歷祠祿三任、至十三年、凡三召、又不就。檜嘗遣其客謂公曰、人望所繫、莫如公、願幡然一出、毋持前論、當以參知政事處

公。公語其客曰、前日之不附是、今日之附非也。吾寧老死丘園、豈忍上負天子、下負所學耶。檜益憾。十九年十二月十二日、以疾薨于海鹽之寓舍、享年六十、積官至左朝議大夫、河內郡開國侯、食邑一千七百戶、實封一百戶。天下學士咸歎惜之。二十年十月、葬於平江府吳縣長山鄉金山之原。公晚年自號虛閒居士、有古律詩、表啓、詞疏、外制、劄狀、書序、題跋、傳記、碑銘二十卷、名曰虛閒集、奏議十卷、烏臺日記三卷、多閒錄一卷。公自六經而下、凡子史百氏、天文地理、陰陽律呂、兵法字書、無不通達。雖多事之秋、筆不停綴。今藏書數千卷、大半手澤也。又嘗親校柳文、創刻于柳、校蘇子由古史及編宛丘張先生集、併刊于衢、以淑後學。其記衢之學、必推明孫明復、石守道、胡翼之、李泰伯、邵堯夫、程正叔之道、俾諸生有所矜式。湖之郡博士吳元美能以翼之學規迪湖人、則力薦于上。公前後

三典名郡、其政必以儒飾、皆爲立生祠焉。公爲人凝重端方、邃夷鯁亮、明而不察、直而不訐、嚴而不苛、仁以庇民、智以利物、勇以興利除害。論事人主前、亶亶不倦。如乞減月椿、免拆民居等事、咸以爲便、乞減鹽法、留宿遷縣降附等事、活人以千萬計。信乎有德者必有言也。初娶太子少師滕公友之女、累贈大寧郡夫人。後娶大中大夫方公元脩之女、累封文安郡夫人。男八人、裕、奉義郎、新通判武岡軍。裡、朝散郎、新通判湖州。樟、奉議郎、知江州德化縣。衿、承奉郎、知紹興府蕭山縣丞。裨、承務郎、早世。祿、承奉郎、新知宣州寧固縣丞。袞、承奉郎、監潭州南嶽廟。衿、承奉郎。女二人、適蘇玘、方導、皆名父之子、將通籍。孫男十人、叔孫、御孫、季孫、濬孫、昌孫、顥孫、盈孫、漢孫、詵孫、林孫。孫女四人、尙幼。初公與康與之並鄰居、與之以里中子弟謁公于湖、以養母爲請、公創一檢察御書之員、月調緡錢三萬、俾



奉甘旨、與之乃不以爲養。公聞之愀然、因採取數月、徑致其母。與之怏怏、去而之平江、求一妓女于知府事周三畏。而通判蘇師德、公亞壻也、知公絕與之止而勿與。與之望公及二君、廼告于檜曰、常某死、三畏屬師德爲文祭之、有曰姦臣在位、公棄而死。檜爲之震怒、命中丞俞堯弼劾三畏鑄職、命提舉浙西茶鹽公事王珣鞠師德與其子玘于獄。且遣吏卒夜圍公家、似若捕囚辟。公夫人與裕等惴息待罪、迄無之、僅脫虎口。然檜猶切齒、將族裕等干祿、因以羅織、裕等終檜之世不敢調。檜亡之明年、公以左中奉大夫致仕、以左通奉大夫追贈之。命方繼下、後以諸子遇恩、累贈至特進。嗚呼、嚮非天祐正人、不其殆哉。應辰昔備員策府、嘗因轉對及和議、曰上下相蒙、深爲可憂、而檜亦以爲忤己、擯之去國。公時爲中執法、不因晚出、嘉其臭味之同、繇是受知非一日矣。應辰亦以檜亡之明年、

蒙恩召對、累遷至于邇列、而裕以發明公之事業見委、秩又來請汲汲、檜亡矣、可以銘矣。銘曰、

常氏鴻牒、代有顯人。粵黃迨唐、二相秉鈞。委質皇朝、再世御史。皇極之扶、是父是子。元祐分察、斥惇與京。紹興執法、斥檜姦朋。人不敢言、而忠而讜。嶽嶠枋臣、竟誣以黨。惟明天子、鑒父子忠。其亡斯閔、其存斯容。父子盛德之驗、人懷死羞、公罔遺憾。太湖之濬、長山之顏。山高水深、妥靈其間。凡百君子、仰止嘉則。刻詩于碑、備太史擇。

汪應辰撰 《文定集》卷二〇

宋故左朝散郎賜緋魚袋錢君墓誌銘

君諱觀復、字知原、平江常熟人、於吳越王錢氏爲疏屬。忠肅王舉圖入朝、君奕世爲士、不與恩澤侯之列、獨賜田在常熟之李墓、因家焉。後徙居邑中。曾祖訓、祖仁貴、隱德不仕。父衍、累贈右朝議大夫。君天資穎異、自少小知務學。一日大書穀梁子成

童不就師之語于門、朝議公驚喜、招延名士教之、讀書製文、度越流輩。年十七當赴舉、會祖母李氏將葬、君不就赴以歸。或勉之、則曰、祖母恩我厚矣、今不與執事、後悔何及。是夕、夢有告以歲若干當登科、自是益自信、不以毫髮非正干定命。由郡學陞辟雍。政和九年、以行藝^⑧兩優釋褐、賜上舍及第、授將仕郎、調越州諸暨縣主簿。已而用釋褐第三名、特恩改授從事郎、溫州府學教授。溫號多士、君風勵程督、學者知勸。歲終、以教悉溢額、循文林郎。終更^⑨過瑞安、巨寇方臘猖獗、道梗不通。縣令王公濟、君素所厚也、往贊之、講畫備禦、悉自君出。公濟信之不疑。時旁郡邑皆焚剽、流民歸瑞安、相屬於道。或議驅出境、君曰、孰爲善境。驅之適資寇。並海有洲、徒流者數十輩居焉、載糧就廩、絕其航渡。頃之、流民自獻其能、鍛冶兵械一新。又募鎗杖手之趨捷果悍、素有稱者用之。賊沮敗、不敢犯境。公濟

推君功第一。君不自言輒止。次調湖州司戶曹事。郡守治尙嚴察、吏陰拱以觀、不一啓口論當否。事有愆於情法者、君獨力爭、初不謂然。已而悔服。同郡富人朱姓、望名者、以附麗得官、驟致通顯。其力足以福禍人、內外搢紳咸畏之。以君登巍科、爲時聞人、願以女歸君。君不答。同舍謂君盍俯就之、當得美仕爲親榮。君曰、吁、是何言歟。吾雖貧、持菽水奉親、親樂也。有如假託非類以進、豈吾親意也哉。苟如子言、適取辱、何榮之有。聞者譴之。至是報罷、莫測其由。或曰、此朱氏力也。久之、調楚州司戶曹事。到官七月、丁朝議公喪。君生理不給、旣服喪歸、益困。時郡縣計民稅輸錢、官自貿絹取贏、資甚厚。縣尹憐君貧、願以千緡歸君輸、俾自收其贏。君懼然謝之、固窮如初。服除、調衢州軍事判官。虜騎犯江浙、衢當路衝、君白郡守、縱民老弱畢出戶、留一丁、不留與留而殘弱不堪任者罪如軍法。其後卒



徒欲乘時爲變、顧城中金帛子女、無可冀獲、乃止。以勞循儒林郎、秩滿、再除衢州州學教授。未赴、丁繼母恭人范氏憂。服除、改左通直郎、除國子監丞、尋改充諸生宮大小學教授。滿歲、相繼除太常丞、秘書郎、尚書戶部員外郎。君仕州縣久、諳練庶事、居省戶若素習、吏不敢欺、聲名赫然。意且用矣、俄以言罷、主管臺州崇道觀。前後八年、起知廣德軍。始至、訪民利害、立罷行之。地居高陸、歲上供、民輸建平倉、由湖轉江入丹陽、閘以達行在、所道回遠、復加斂爲貲費、號水腳錢。君亟請於朝、寄廩湖之四安、相距纔五十里、民不病勞、循運河至國門、不過五日、費減大半。或謂地產竹木、官吏失譏察、逸稅籍甚多、君以細民肩荷手持、冀十百以活妻子、其忍扼取之、且懼開端爲後患。雨暘小愆、齋禱於神、致禮甚恭、雖歷旬月無倦色。至民俗用巫覡語、屠割埋瘞、不合典常、卜非神意者、悉命禁絕。歲饑、

議發常平倉、部使者屢抑君、君手書諭屬邑振廩濟民、且曰、民命在朝夕、吾能不獨任擅發之責乎。旱益甚、境內田十損八九、復請於朝、願盡捐歲租以活一方、後卒如君言。大抵君爲政、以愛利百姓爲心、惟恐弗及。苟利民、力行之、不顧己私、類若此。君在郡、憂勞成疾、比滿秩歸、增劇、以紹興二十四年十一月十二日終於家之正寢、享年六十有五。累官至左朝散郎、賜五品服。娶徐氏、故吏部尚書鐸之女、封安人。男四人、曰俟、左迪功郎、新紹興府山陰縣尉。曰佃、左從政郎、池州州學教授。曰似、曰佃、學進士。佃後一歲以哀毀卒。女二人、長適右迪功郎、監潭州合、同茶場陳大年、次適左宣教郎、新筠州州學教授徐廷獻。諸孤以二十二年正月辛酉葬君于縣虞山之南、距大父塋五百弓。君有志節、執義堅固、不曲意求合、以希薦引。平居簡重、臨危健決、智略橫出、皆契事機。事親孝謹、求所以順

適其意者不少懈。初、朝議公嘗稱債於人至三百萬、晚歲貲產耗、無以償、憂見於色。君竊詣予錢家、以己名就易券、別示必償、朝議意乃安。其後予錢家更兵火、子孫散亡、契驗不存。君躬儉勤、抑損妄費、生理稍葺。他日持六十萬錢歸郡人朱氏、朱氏以不聞父祖遺言拒弗受。君曰、若不聞、如吾知之何。既而次第訪尋、遍償之、不負一錢。人有急扣門、不以事爲解。尤不喜修怨、嘗有說君者、加謗譏甚至、君弗校。異時其家凋零、子若孫來歸、率報禮之、未嘗及前事。嘗自謂出仕久、狃習世故、失其性真、及奉祠累年、意泊如也。惟老學不衰、無頃刻廢書。或探內典、究死生性命之說、自號正靜居士、且名其所居之堂、以諭諸子甚篤。故俟、佀遊太學爲名士、試選屢優、朋類斂衽、知不敵、相繼登第、鄉里榮之以爲君操履之報。君邃于經、溢於文辭、尤喜爲詩、有文集十五卷、論語解二十卷藏於家。前葬四

月、長子俟以余與君有一日之雅、稔君出處、細書造門、以銘見屬、辭情懇迫。余老病、神意昏耗、屢謝不能。俟曰、先君治命、且吾母朝夕冀也。其忍辭。銘曰、君少之時敏而文、勵且勤、以發厥身。仕更閱、志剛決、以昌其業。任不過尙書郎、官不登上大夫、有蘊未輸。孰使然歟、命也。吁。

劉一止撰 《荅溪集》卷五一

校記

①明：原作「涉」，據《新安文獻志》卷八一改。

②居紀綱地：原作「佐佑執政」，據右引改。

③惑：右引作「忒」。

④「城」字原脫，據《宋史》卷二四四《宗室傳》一補。

又「寧海軍」，《宗室傳》作「寧國郡」。

⑤司馬徽：原作「司馬微」，據四庫本《北山集》改。司

馬徽，三國名士。

⑥諸：疑當作「詣」。

⑦「郡」字疑誤，或是「邵」字。

⑧藝：原作「葬」，據清抄本《苕溪集》改。

⑨更：原作「吏」，據右引改。

⑩侯：原作「侯」，據《重修琴川志》卷八《錢觀復傳》

改。下同。

⑪合：原作「令」，據清抄本《苕溪集》改。



藏 齋

宋儒碑傳集卷九十六

宋之才 袁溉 歐陽澈 劉勉之 張闡

張燾 吳方慶

宋侍郎之才行狀

曾祖珏妣戴氏。祖楚妣鍾氏。父道元以公贈右中大夫。妣林氏。贈令人。公諱之才字庭佐溫州平陽人。其先世有潛德。公幼莊重。樂與賢己者處。羅陽俗舊淳固。先中大始哀書教公問學。迨其官達。士子爲彬彬焉。政和八年。公第進士。調貴池主簿。改教授京兆府學。恥自銜爲干謁。知己者少。積十八年不遷。故右丞忠簡許公力推挽之。召試館職。除秘書省正字。踰年改京秩。時講戰議未決。黨論紛起。公截然中立。亡所附麗。又五閱歲。稍遷校書郎。歷考功員外郎。國子司業。權吏部侍郎。爲大金生辰使。歸報。太上皇帝喜曰。宋某姓名稱矣。亟將晉用。屬公以冢子及夫人氏之喪。固求閒佚。加敷文

閣待制。提舉江州太平興國宮。當時朝士多以罪行。惟公力自引去。士夫歆艷。祖道傾一時。鄉居十年。翛然忘官宦意。徜徉田里。或不知其侍從之臣。起知泉州。州人便安其廉簡。富民有罪繫獄。中旨釋之。而公不貰。繼以尙書命至。公曰。吾守臣也。不敢抗朝廷之命。敕乃出。囚而老。民吏聞公引疾。則競走浮屠祠禳禱。借留于神。移知衢州。不拜。因得以宮觀歸。不五年間。四乞骸骨。紹興三十一年。遂以朝奉大夫致仕。今上登極。覃轉朝散大夫。乾道二年七月戊辰。以疾卒于正寢。享年七十有七。贈左中散大夫。累封平陽縣伯。食三百戶。娶會稽王氏。贈開府錫之孫。故朝奉大夫璵之子。封令人。子四人。長男中甫及長女皆先公卒。次女歸右從政郎。後處州麗水縣丞趙良臣。男直甫。右承奉郎。後房俞氏出也。有自次文五十卷。曰雲海弊帚。雲海公之居士號也。家有雲海後集。二餘錄。詞林合如



干卷。公雅有至性。初太令人將葬而雨。壙中水溢。憂之一夕而髭髮變。立朝尙持大體。不潔潔以取名。未嘗輕易發言。言之必有當也。方北鄙未定。公因轉對。請擇威望重臣。經理淮甸。與諸大將維持攻守。以固吾圉。泊南北講解。則請不忘警戒。振淹滯。養民力。收兵柄。固基圖。爲持久計。又勵聖學。以自強不息。乞詔四方知愛民意。皆切時病。中事機。其論財計。謂當量入爲出。以節用愛民。論任使。則請度人所宜。用其所長。論海劫。則欲責任土豪。而屬統于沿海之制帥。言皆簡而理當。所請置書太學。班在仕者。通家雜坐之禁。裨益風教。此其意度不淺。紹興七年。詔書以秋旱。許中外上封事。公奏疏。謂當以實應天。去六弊。修四事。其六弊。曰民力凋瘵。曰守令非人。曰吏員猥冗。曰功實不覈。曰賞罰未明。曰將士驕惰。四事。曰上游淮南宜置帥。安集。曰盡人事以待天時。曰立事者必有成謀。又當

持之以固。曰人君當有立志。至誠可以感天。又論。進言者患不能盡。聽言者患不能擇。是非并進。惟虛心公聽。乃能擇之。漢張釋之言便宜。孝文帝曰。卑之無甚高論。令今可行也。臣不敢爲甚高之論。願陛下無忽而聽從之。晚與時相論及大儒。相謂大儒不可多用。公知其意。證曰。大儒患不多。有多何患。時相色動。公即請祠以歸。觀公救時告后之言。可以知其操心持己之所在。即其言少見施用。豈苟然而已哉。公之歸卧于家。憂國之心未始替也。常曰。吾老。不能爲國家陳力。每一念之。則申旦不寐。蓋其學深自養。常超然獨得。志有所定。單見莫之識也。律身端謹。曾不矜持于外。其當官稱是。立不易方。而爲名德所尙。于時鮮所偶合。故其屏處多于在仕之年。邑子請教于門。人人各厭所欲。善士資其矜式。自謂得師。晚年築室瑞安縣之峴山。于周奧原。自爲壽藏。制素衣一稱。曰。吾終必

以是祿。先此一歲、自言明歲當死。疾浸、屏去藥餌。曰、吾心中無一事矣。誦伊川先生克己之詩以歿。遺戒毋侈吾墓、毋建宇築闕、終始一槩、死生不易其介焉。直甫卜以歲十二月壬子戌大葬、走書屬某紀公行實。惟公偉望碩德、爲時名臣、鄉閭老成、于今爲最。某年視公上下、知公尤悉、大懼風誼闕逸、何以典刑後生、勉書以待賢者之銘、且備史官采擇、雖文多累句、于公無愧辭云。謹狀。

薛季宣撰 《艮齋先生薛常州浪語集》卷三四

袁先生傳

袁先生諱漑、字道潔、汝陰人也。嘗舉進士免貢、避地州西山中。建炎初、集鄉民爲保聚、與金人及羣劫抗、屢克。其衆謀奉先生爲主、先生逃于金房山谷間。王金州彥即其廬見之、先生衣不掩脛、與相應答。王就先生學李靖兵法、先生謝不告。王怒、欲脅取其學、先生轉徙山南。時進士類試宣撫司、其

年會失陝右、取士以百數、而應者過百人、或勸之就試求官、先生曰、官不可苟求也。移居富順監。先生初從二程先生學、聞蜀薛先生名、富順鄰家薛翁以賣香自給、其子晨以香出、父則掩關待之、子莫而歸、因不復事、鄰里莫詳其趨步。先生疑其薛先生也、具刺謁之、薛翁慢罵不應、先生固已疑之矣。間日再往、又不得前。于是積日屢造其門、薛翁喜而見之、先生與之語、不對。再見、談古今百氏、又不得一言。三見、縱論六經、薛翁才有喜色、曰、子學已博、然寡要。夫經所以載道、而言所以明道、何以多爲。先生曰、如先生言、吾心將以會道爾。薛翁擊節稱善、因以所學授之。居月餘、勸先生出關、薛翁因亦遁去。先生自聞薛先生道、所爲益純粹近古。其出關至夏口、岳開府飛必欲延至幕下、先生一見而出、不辭而行。語所知曰、岳公武人、而泥古幕府、無圓機之士、難乎免矣。未幾而及難、先生因家



荊州、往來夷陵、秭歸諸郡、與士夫言必稱善、悅其旨意、然後和之、循循然、人知其厚德君子也。孫秘閣汝翼帥荊渚、延先生至府舍、俄先生告去、過表弟虞于公安、以書寄謝、孫曰、概不出此旬矣、公于概厚、恨不能爲公一言。病革、二聖寺僧問于床下、先生曰、佛家以死生爲一大事、誰謂當蹈其常。因戲作釋氏言示之曰、非吾事也。棄之而歿、時年七十。寺僧爲之斂葬。無男、二女子尙少。公安勗令詔爲嫁之。先生學自六經百氏、下至博弈小數、方術兵書、無所不通、誦習其言、略皆上口。于易禮說尤邃、未嘗輕以示人。樂善孜孜、蓋天性然也。自將家下峽、其饘粥蓋不繼、家書祭器、間關常以自隨。貧居以小學教授童蒙、其生父以妾爲配、先生即曰謝去。與王樞密庶故善、王家有伊洛遺書、先生欲傳未能、俄而王歿、先生不遠千里、從其諸子傳錄書畢遽行。會羅織獄興、掩捕王氏家人、賓客幾傳

之死。先生居夷陵郡郭、一旦徙家舟中、其夕夷陵災、首焚先生居處。紹興癸酉歲、先生在江陵得疾如中風、四支不仁殆甚、人爲憂慮。先生曰、此無傷也。遷居村舍、踰月而愈。或問之醫道、先生以古語告曰、所謂存神與氣、氣與神會、自然周流、本無偏滯者、我能身行之耳。由是荊人頗神其事。初靖康後、天下兵荒甫起、先生家爲汝陰盛族、嘗有客過其舍、先生察其狀貌有異、白諸父曰、客、姦人也、徙家人避之。是夜、客以寇來、遂與鄉社義兵鬪死。後衆欲據前山爲保、先生爭之、不聽、獨將妻子聚保山後、已而前山果沒、金人大至、欲以萬衆攻山後、營、先生塢中兵不滿千、召其衆計曰、虜則勢盛、吾知數術、保以一箭破之。其夕、虜砦山阿、先生使數十人各執鼓燧如四山伏、約虜軍譟擾、燔山擊鼓爲應。有談經客愚甚、先生激使爲虜裝、竊虜號、入宿虜酋帳下、以二矢授曰、夜中發矢而竄。客如先

生計、恆怯僅能發箭、虜營驚亂、顧見火光並起、鼓聲四合、因潰、自相攻殺數百人、爲不敢復至。有潰兵虜掠過營下、先生伏數十鼓、持礮木道旁俟、因據險拒卻之。賊還、以夜中過伏所、礮木亂下、鼓聲震天、賊遂大崩、擒殺大半。先生文武才用、大略多此類、疏其大者于篇。

甌浦薛某曰、走述袁先生傳、觀其從薛隱君學、師弟子授受相予之際、何其嚴且約也。俗薄久矣、聖人之學不可復見、走于先生焉取焉。初、外舅秘閣鎮荊州、走爲書寫機宜文字、嘗得于先生授教、其所以爲誘進者甚博。嘗侍先生觀弈、能爲負棋、易實數子、以弱爲強、時弈者亦善于棋、拱手稱歎。外舅強先生弈、則曰、先人嘗以弈爲廢事、所不忍違。又嘗聞先生言、蓋嘗以所學纂一文字、凡四類曰、理、曰義、曰事、其一今忘之矣。走從問義理之辨、先生曰、學者當自求之、他人之言善、非吾有。走請終

身誦服斯語。已歸、而聞先生訃、求其書不復得。嗚呼、若先生者、可謂君子儒矣。言行文章、皆足爲世楷式、百不施一、卒以窮死、哀哉。

薛季宣撰 《艮齋先生薛常州浪語集》卷三二

歐陽修撰墓表

紹興四年春、天子念陳東、歐陽徹死非其罪、詔俱贈承事郎、且官其親屬、未足以稱悔往之意。於是加朝奉郎、秘閣修撰、告于徹之第、又錄其後二人、賜田十頃、以撫其家。制書百餘言、至謂爾不幸、不失爲忠。唯余八年于茲、一食三嘆。嗚呼、禹湯罪己之辭、何以加此。是時名世方爲正字、待罪史館、同舍有熟陳君者、歐陽君獨昧平生、且不詳何許人。名世應之曰、同郡奇男子也。年少美鬚眉、善談世事、其胸中耿耿果如此。後半年、名世丁內艱、歸聞郡太守奉詔擇美田畀歐陽氏。明年、朝廷任其弟衡迪功郎、子飛黃、婿黃怙皆將仕郎。衡調袁州司



戶參軍。母羅夫人命爲君度葬地於邑之長安鄉龍源。即賜田開塚塋也。九年二月壬申。招魂葬衣冠墓而墳之。使來乞言以表君。名世於君聞見實詳且久。爲叙其事書之。君字德明。七世祖俊仕南唐李氏。開寶中謝病歸老于家。自吉州廬陵徙居撫州崇仁。曾大父詔。大父恕。父兪。皆不仕。君生于丁丑。死於丁未。享年三十一。妻陳氏。長子飛英。皆前卒。君尙氣。大言慷慨不少屈。而憂國憫時。出于天性。靖康初。應制條弊政五十餘事。事數百言。爲三巨軸。廐置卒謝不能舉。州將爲選力士荷擔以行。會虜大入。要盟城下而去。君聞。輒語人曰。我能口伐金戎。強於百萬之師。願殺身以安社稷。有如上不見信。請質二子一女於朝。身使窮廬。馭親王以歸。鄉人每笑其狂。止之不可。乃徒步間關。走行在所。上即位南都。遂伏闕上封奏。極詆用事大臣。時上初臨御。痛兩宮蒙塵。未甚親決庶政。中外封

奏。或委大臣裁處。大臣惡其言。以他事誣奏誅之。蓋建炎元年八月二十日也。君旣誅。天下不以爲是。上深察其冤。再加贈恤。且正誤朝者罪。人謂君身雖不幸。而歿享殊榮。蓋前古未有。厥初儻少徐之。先以忠義自結人主。而後薦其所聞。則天子睿明。猶將旌君以躬殉於國。顧寧有是事耶。雖然。自古及今。無敢以生死廢君臣之義。昔鄖公鬬辛有云。君命天也。若死天命。斯言誠可以垂法後世。今君以危言觸權近。不沒元身。而天子追悼哀矜。無所不至。其子孫復能侈上賜以圖襄事。彰人主不吝之名。示後人忠義之勸。君可謂死而不朽者。大書深刻。以表於隧。夫誰曰不宜。乃繫之以辭曰。疇昔胡塵暗大梁。兩宮鑾輅征龍荒。大明出海升扶桑。秋氛蓬勃猶飛揚。賤臣懷憤輕死亡。籲號伏闕陳封章。要拯天步恢皇綱。耻同汙俗隨低昂。云胡姦佞加斧鉞。不容曳組朝明光。九重追悼深不

忘溫詔丁寧頒十行。天子罪己如禹湯、便蕃異禮褒忠良。論譔華袞資官郎、賜田任子榮其鄉。龍源佳城新君堂、儒官命服爰歸藏。巴川泚泚山蒼蒼、上恩山高兼水長。貽爾子孫後其昌、昔聞鬪氏今歐陽。

鄧名世撰 清抄本《歐陽修撰集》卷七

聘士劉公先生墓表

先生姓劉氏、建州崇安縣五夫里之白水人。其曾大父諱滋、起身農畝、以進士高第仕至尙書職方郎中、累贈開府儀同三司、吏部尙書。大父諱照、朝請郎。再世皆有清德、中歲即休官退處、以大耄終。父諱元振、始不仕、然亦以馴行稱。先生諱勉之、字致中、自幼強學、日誦數千言。耳目所接、一過不復忘。其爲文肆筆而成、滂沛閎闊、凌厲頓挫、儕輩少能及之。踰冠、以鄉舉詣太學。時蔡京用事、方禁士毋得挾元祐書、制師生收司連坐法、犯者罪至流

徙。名爲一道德者、而寔以鉗天下之口。先生心獨知其非是、陰訪伊洛程氏之傳、得其書藏去。深夜同舍生皆熟寐、乃始探篋解袞、下帷然膏、潛抄而默誦之。聞涪陵譙公天授嘗從程夫子遊、兼邃易學、適以事至京師、即往扣焉、盡得其學之本末。既而遂厭科舉之業、一日、棄錄牒、揖諸生而歸。道南都、見元城劉忠定公。過毗陵、見龜山楊文靖公、皆請業焉。而劉公尤奇其材、留語數十日、告以平生行己立朝大節、以至方外之學、它人所不及聞者、無不傾盡。先生拜受其言、精思力行、朝夕不怠。久而若有得焉、則疇昔所聞一言之善、融會貫通、皆爲己用。而其踐履日以莊篤。與籍溪胡公原仲、屏山劉公彥冲兩先生友善、日以講論切磋爲事。其於當世之務、若不屑焉、而論說區處、鉅細顯微、皆有條理。亂後故山室廬荒頓、乃即建陽近郊蕭屯別墅、結草爲堂、讀書其中、力耕稼以自給。澹若無



求於世。而一時賢士大夫莫不注心高仰之。中書舍人呂公居仁知之尤深。嘗以小詩問訊。有老大多材。十年堅坐之句。世傳以爲實錄。是時國家南渡幾十年。謀復中原以摠宿憤。而未有一定之計。方且寤寐俊傑。與圖事功。呂公乃與同列曾公天游。李公似之。張公子猷三數人者。共列其行誼志業。以聞於朝。特詔詣闕。將行。屏山先生爲作招劍之文以祝之。其卒之亂曰。寶劍徠。奉君王。撫四夷。定八荒。時乎時。毋深藏。其所望於先生者蓋如此。既至。會秦丞相檜已顓國枋。爲其事非己出。不能平。時又方決屈己和戎之策。惡聞天下正論。意山林之士不顧利害。敢盡言觸忌諱。尤不欲使見天子。談當世事。第令策試後省。給札俾上其對。先生知道不易行。即日謝病歸。杜門高卧十餘年。造養益熟。名聞益尊。故相趙忠簡公出鎮南州。道出里門。紆轡入謁。坐語移日。彌加歎重。然其去未幾。即

遭讒竄海外以沒。同時知先生者亦皆廢錮不復用。於是先生竟不及一試於用而卒于家。享年五十有九。有志之志莫不哀之。紹興十九年二月十日也。先生學本爲己。而才周世用。臨事財處不動聲氣。平居嚴敬自持。若不可犯。而接物之際。恂恂和悅。色笑可親。其臨財廉。一介不妄取。少時婦家富而無子。謀盡以貲產歸女氏。既謝不納。又擇其宗屬之賢者舉而畀之。使奉其先祀。其與人交誠信懇惻。同里胡公明仲侍郎蚤出爲季父後。不自知其本親。鄉人多竊議之。而莫以告。先生獨爲移書。具陳本末。所以然者。胡公感其言。爲數歸省。恩禮略備。議以少息。熹之先君子蚤與先生遊相好。將沒。深以後事爲寄。且戒熹往學焉。及棄諸孤。先生慨然爲經理其家事。而教誨熹如子姪。既又以其息女歸之。親舊羈貧。收恤扶助亦皆曲盡恩意。學子造門。隨其材品。爲說聖賢教學門戶。以及前

言往行之懿終日娓娓無倦色。自壯至老如一日也。娶連氏無子以從兄之子思溫爲後。二女子其長歸于我次適朝奉郎范念德。思溫亦無子又以從弟之子澧後之。建州於今爲建寧府先生墓在草堂涉溪西北七里所羣玉鄉三桂里之學士原其葬時不及銘逮今且五十年後生之及見先生者日加少熹懼其益久而遂將無所考也乃追記其世家學行之最而伐石以表焉。慶元戊午正月己亥朔旦門人朝奉大夫致仕朱熹述。

朱熹撰 《晦庵先生朱文公文集》卷九〇

龍圖閣學士左通奉大夫致仕贈少師諡

忠簡張公闡神道碑

紹興元年二月丙戌詔以多難未弭人才爲急其復秘書省置官屬。當是時高宗方馬上治天下乃肇復文館收召名勝儲以待用君子是以知中興之必可冀也。時范丞相宗尹實當國而秦丞相檜

初拜參知政事。逮十年春秦雖專國政然以與聞初議猶未敢盡非其人。維永嘉張忠簡公以端醇修潔用給事中林待聘薦召對召試入省。凡五年同僚或自臺察驟用或由著作爲左右史其下亦不失尙書郎而相國兄梓子燿又相繼爲之長。他人附麗不暇公獨介然其間。秦知公久次喜論事一日微諷公謂當入臺。公迎拒之坐是報罷閑廢十有五年了無愠色。秦薨公亦不求知於人。二十九年始以御史臺薦爲檢法官班序更出正字下恂恂百僚底人爲公太息。會對便殿論事鯁挺擢吏部員外郎。壽皇初開建王府高選講讀官朝論舉屬公遂改禮部郎中兼贊讀而直講則史丞相浩也。三十二年六月己巳王爲皇太子升少宗正兼右諭德。俄內禪攝貳冬卿未幾直講大用公雍容從臣之末泊如也。隆興初元落權守歲中進長本部上方銳意恢復而在廷議論不一公每陳正



心誠意、修政事、攘夷狄之說、上亦虛懷聽納、每事咨訪、使公少卑之、執政可立致、會江淮都督府結局、和議已成、公堅求去、上不能奪、自壯至老、大節蓋如此、可謂始終全德矣、公諱闡、字大猷、溫州永嘉縣人、曾祖恭祖、積父、贈中奉大夫、忱、皆積善樂施、公幼夢人大書闡字曰、以是名爾、中奉異之力、勉公學、未冠、由舍選貢京師、中宣和六年進士第、調嚴州兵曹掾、兼治右獄、州將欲戮土豪、付公鞫之、公謂罪不至死、卒請如律、人嘉其有守、建炎登極、循修職郎、丁父憂、紹興改元免喪、以從政郎爲處州州學^③教授、參政李公回帥江西、辟置幕中、四年、參政席公益帥湖南、又辟公幹辦公事、洞庭群盜熾張、公畫策造戰船、訓水軍、賊勢以衰、諸司交薦、改秩吏部、引歲月失通理沮之、公求監南嶽廟、以歸、連教授鄂州、台州、既賜對、首言金人歸我關中、願固守以蔽巴蜀、圖中原、次論監司郡守舉官

之弊、又乞嚴禁遏糴、濟江浙水患、皆契上意、命試學士院、遂除秘書省正字、輪對論三事、其一請廣人才、任將相、練士卒、則徽宗梓宮可還、母后淵聖可歸、毋專屈己和戎、使權不在我、二曰、臣比自溫歷處、婺、浹、旬、再值雨雹、麥秀者偃、桑萌者落、盍恐懼修省、以召和氣、其三論官冗、曰、兵火後縣不滿千戶、設官乃十餘人、州不滿萬戶、而官至百餘人、場務及兵官率十員、無學校而設教官、無軍士而置將領、駐泊鈐轄之屬及員外置者不在焉、昔漢光武併省四百餘縣、吏員十置其一、唐憲宗用李吉甫言、省冗員八百、吏千四百、漢、唐中興、宜以爲法、上獎諭曰、非卿不聞此、在職滿歲、改左宣教郎、十二年、遷校書郎、兼益王府教授、公自以儲才之地、無力可陳、惟國家大利害、可因事納忠、時諸大將恃功邀爵賞、有過則姑息、又兵布於外、而禁衛單寡、公上疏極論之、厥後稍進退諸將、召諸道兵

補三衙闕額、往往符公言。明年以秘書郎兼國史院檢討官、請通好高麗、西夏、訶北虜之勢、明詔大臣、廣求人才。上皆嘉納。又明年、駕幸秘書新省、例遷一官、自是免去。踰年、主管台州崇道觀、秩滿、添差通判泉州。代還、改衢州、未上省罷。二十五年冬、上躬覽萬機、起提舉兩浙路市舶。居二年、乃爲臺屬、升郎闈、入王府、稍嚮於用。三十一年四月、御批兩傷蠶麥、盜賊間發、令侍從臺諫條具消弭之術。公適輪對、謂講和以來、竭民力奉驕虜、人不堪命。強遣中原歸正人、怨恨日深。監司郡守不按法貪贓、州縣被害。放積欠有名無實、二稅先期追擾、商賈苦於重征。能革數弊、災異消、盜賊弭矣。又言、完顏亮積粟聚兵、意在南寇、乞守要害、防海道、巴蜀淮襄不可無良將、督視不可無大帥。上曰、卿言深中、時病、惟遣歸正人、誓書所載、卿未知爾。已而、亮果遣使持嫚書來、朝廷始爲戰守備、略如公策。八月、遷將作監。是冬、虜騎臨江、公因轉對、請增沿江戍兵、大修諸郡之備。濟師京西、淮東、牽制虜軍。明年夏、進宗正少卿。壽皇登極、擢權工部侍郎兼侍講、賜服金紫、以隨龍恩遷七官、遂轉左通議大夫。入謝言、將以敗爲捷、冒受爵秩。諸州廂禁軍因覃霈鼓譟希厚賞、不可不正其罪。上爲次第施行。虜亮死、新主復求和、朝廷議再遣使。詔略曰、敵人索舊禮、從之則不忍屈、不從邊患未已。納中原歸正之人、東南力不能給、否則絕向化之心。宰執侍從臺諫、其詳議以聞。公言、選將練兵、名分可正、江淮授田、遺民可招。臺諫數百言。是冬、給札侍從臺諫。條具時務。公上十事、一曰強國勢、二曰革苟且、三曰重臺諫、四曰明賞罰、五曰信號令、六曰抑奔競、七曰嚴軍政、八曰戢貪吏、九曰節財用、十曰禁科歛。當是時、應詔數十人、惟公與國子司業王十朋指陳實事、斥言權倖、無所回隱。明日、上召兩人對



內殿大加稱賞、賜酒饌、面授御書各一軸。隆興元年正月、徵拜工部侍郎。公奏、臣去冬乞守禦兩淮、陛下謂立春行之、夏秋畢備、今其時矣。面陳三策、移都督府於維揚、增修淮上城郭、優恤山水寨民兵及死事之家以勸來者。上曰、今江淮事盡付張浚、朕倚之爲長城。會督府請受蕭琦等降、上召^⑥問公、公疾不能入、奏請受其降。俄報王師收靈壁、虹縣、公慮大將李顯忠、邵宏淵深入無援、奏乞益兵殿後。已而王師果失利、衆論歸罪於戰。公奏、陛下出師受降是也、諸將違節度且無援而敗、當矯前失、安可遽沮銳氣。上命益御前器甲付諸軍、親札勞張公、軍聲復振。時數易臺諫、公力言之。會太白晝見、詔近臣條闕政。公謂、比年災異數見。去秋七月、溫、台颶風壞廬舍以萬計、二浙飛蝗蔽野。今歲夏秋雨淫水溢、米值翔湧、太陽薄蝕、星緯復爾、當思應以實不以文。乃者言路輕易、出令不謹、君子

未進、小人未退、給札條弊政而無所更革、臧否監司守臣而無所升黜。文具如此、致變固宜。至如近則荆襄江淮守禦缺然、遠則蜀道連歲出師凋瘵已甚。陛下方馳騁毬馬、日引狼子野心之人周旋禁籞、垂象安得不再三示儆耶。疏入、上召公以擊毬非朕所好、邊陲未靖、朕欲便習鞍馬耳。公因言、眞宗、仁宗增置諫員、今纔一二人、非所以廣聰明。上曰、臺諫好名、如某人但欲得直聲而去。公曰、唐德宗疑姜公輔爲賣直、陸贄切諫、願陛下深以爲鑑。上再三嘉^⑦獎。虜復求成、上與公議。公曰、彼欲和畏我耶。愛我耶。直款我耳。力陳六害不可許。上曰、朕意亦然、姑隨宜應之。上又記公賣直之語、謂胡銓亦及此、朕非拒諫者、辨是非耳。公曰、聖度當如天、奈何與臣下爭名。上忻然曰、卿言是也。頃之、除權工部尚書、兼侍讀。十一月、宰執奏、今秋金國副元帥紇石列志寧以書論通好、朝廷遣使臣盧仲

賢報之。所論三大事正。國書歲幣如數皆定不疑。惟唐鄧海泗未決。將遣王之望、龍大淵通問。而衆言紛紛不已。乞以當和與否。遣使與否。禮數後先。疆土取與。大詢侍從臺諫。擇其善者從之。詔於後省限一日集議。於是吏部尙書凌景夏、戶部尙書韓仲通、權吏部侍郎余時言、刑部侍郎路彬同一議。禮部侍郎黃中、兵部侍郎金安節同一議。侍御史周操、右正言陳良翰爲一議。給事中錢周材、起居舍人馬騏爲一議。起居郎胡銓、監察御史尹穡、閻安中各自言之。其說人人不同。公獨謂不與四川乃可通和。議論先定乃可遣使。今彼爲客。我爲主。我以仁義撫天下。彼以殘酷虐吾民。觀虜勢已衰。何必先示以弱。朝論譴之。初。上用眞宗故事。命經筵官二員遞宿學士院。朝夕宣召。商榷古今。咨訪政事。公入對尤數。知無不言。屢引病丐閑。上曰。朕所以知外事皆賴尙書。相從久。忍言去耶。二年

四月。公請益力。上不得已。除顯謨閣直學士。提舉江州太平興國宮。陛辭。上問所欲言。公奏。許和則忘祖宗之讐。棄四郡失中原之心。遣歸正人傷忠義之氣。惟陛下毋忘老臣平昔之言。其指時事尤諄切。上曰。卿姑暫還鄉。秋涼復召卿矣。加賜金犀帶。特許佩魚。公既退。賦詩云。八請犯天顏。今朝出漢關。渾如倦飛鳥。日暮傍巢還。到家踰月而病。以龍圖閣學士、左通政大夫致仕。七月二十六日薨。訃聞。特贈端明殿學士。恩數視簽書樞密院。賻銀絹二百匹兩。享年七十有四。乾道元年十一月十四日。葬本縣建牙鄉瞿溪之原中奉公墓側。初。公素樂其山水。將歸老焉。葬從公志也。淳熙十年。特賜諡忠簡。累贈少師。娶盧氏。先公八年卒。贈越國夫人。四子。伯桂。國學生。早死。仲梓。朝奉大夫。新知通州。叔椿。朝散大夫。江西轉運判官。季樗。朝請郎。主管建寧府武夷山冲佑觀。一女。嫁奉議郎。兩浙



儒藏

轉運司主管文字盧珉。孫炳、承議郎、新權通判平江府。燁、宣義郎、充兩浙西路安撫司幹辦公事。燦、通仕郎。燧、承奉郎、新監。建康府戶部大軍庫門。熿、文林郎、新福州羅源縣主簿。餘未命名。孫女二人、迪功郎、新監行在省倉中界吳瑾、從事郎、新臨江軍判官潘檜、其壻也。曾孫垓、修職郎、福州長溪縣主簿。次尙幼。公莊重出於天性、誠信濟以學力。在王邸、讀資治通鑑、至修身治國、必反復誦說、壽皇每嘉納之、暇日賜札和詩、恩意綢繆。人謂公必輔初政、而公歸志浩然、善類迄今以爲恨。平生行事、悉筆於冊、五十餘年不少廢。文體粹然、詩尤清遠、鄉人子弟多求公紀其父兄行實。諸子類成文集若干卷、藩邸聖德事迹十卷、經筵講議故事若干篇、奏議若干卷、並藏於家。公之爲臺法也、某與館職間遇公朝士之家、公徑趨下坐、客頗不安。予謂公郎秘書越二十年、乃館中先進、當序齒如例、衆

以爲允。公初貳冬官、某忝起居郎、追班從駕、密踵公武、情好孚洽。今轉運君以書來、諗云、先君道同志、合惟王公十朋、胡忠簡公銓。王公嘗爲行狀、許志墓而不果、胡公亦下世、成遺志者惟執事耳。某不敢辭、乃爲銘曰、煌煌精金、百煉不變。矯矯勁松、歲寒乃見。有美張公、積善自躬。正直靖共、一其初終。紹興盛際、公在館閣。尊厥德性、恥要人爵。龍躍於淵、翼之天飛。政路砥如、公背而馳。上知公誠、士服公識。信道而行、何徇何激。官非不崇、壽非不隆。用有未盡、人思無窮。三溪釣徒、公昔自謂。樂哉斯丘、尙愜公志。

周必大撰 《平園續稿》卷二二

資政殿大學士左太中大夫參知政事贈

太師張忠定公燾神道碑

乾道二年四月旦、資政殿大學士、左太中大夫致仕張公薨於饒州德興縣之里第、是歲十二月甲

申葬本縣鑄印臺先塋之側。其子既類行實聞于朝。謂某嘗以文學掾事公于昇。謁銘詩揭墓道。義不得辭。按張氏世家德興。唐宰相文瓘之後。子孫散居縣之諸鄉。衣冠不絕。國朝多以進士入官。公曾祖諱潛。通直郎致仕。贈太子少保。妣壽安縣君葉氏。贈清河郡夫人。始居吳園。長沙王芮故里也。祖諱磐。袁州萬載縣主簿。贈太子少師。妣長興縣君程氏。贈通義郡夫人。父諱根。元豐五年進士。將改京秩。以近大禮。亟欲升朝。推恩祖父母。遂致其仕。歸養四親。年方三十一。久之。近臣交薦。賜對再仕。終秘閣修撰。淮南轉運副使。文行俱高。世號吳園先生。公貴。贈太師。妣南華郡君黃氏。尚書右丞履之女。贈秦國夫人。公諱燾。字子公。幼莊重嗜書。右丞喜曰。是兒骨聳神清。他日必貴。將命以官。會薨。諸舅承先志。奏補太廟齋郎。公猶卬角。學愈力。入成均。升上舍。政和八年廷試。問五運六氣。公對

數千言。極論陰陽消長。天人精祲。與夫財成輔相之道。天子嘉之。親擢第三。授文林郎。辟雍學錄。宣和元年。遷太學博士。三年。丁內外艱。服除。再爲博士。充南省檢點試卷官。北虜入寇。靖康改元之正月。李綱以執政爲親征行營使。守禦京城。辟兼機幕。遷秘書省正字。四月。解嚴。特改宣教郎。自列綱妻弟。求補外。時權要親戚多在朝。嫉之。坐以越職言事。送吏部。明年。高宗登極。改元建炎。例復行營。及宣撫司官屬之責降者。以公通判常州。改湖州。賜緋衣銀魚。二年。詔班巡社法于東南。聽民自備器械。結隊伍。公條不便者十六事。卒罷之。三年。苗傅等謀逆。臨安。公適攝郡丞。募兵三千入援。乘輿反正。論勤王功。特轉一官。四月。大赦。求直言。公上疏曰。陛下踐位于傾危中。繼遭叛逆。號令不能動人心。政事不能壓人望。卑詞厚禮。祈還二聖。未有以動感敵情。豈胸中之誠未修乎。又言。賢不肖雜



進大臣惟親舊是用。虜方陵犯、乃欲議和。淮寇縱橫、乃欲實粟。京師疏繆如此、而侍從不言、臺諫不論、其職安在。又言、巡幸所至、未免營繕。越棲會稽、似不如是。疏入不報。請主管台州崇道觀。紹興二年春、駕自越回臨安、宰相呂頤浩薦公、召對論三事。其一曰、天下之病極矣、醫國者未見治效。願定國事、以某事爲本、某事爲末、某事可因、某事可革。規模既立、以次行之。其二曰、昔之致禍、由縉紳以僥倖相師、世俗以侈靡相夸、官府賄賂公行、將帥優蹇自肆、州縣誅求無藝、百僚偷惰廢弛、今皆有之。其三曰、陛下欲整軍、而求一樞臣不可得。欲理財賦、登銓曹、而吏戶部長貳每難其人。古不借賢於異代、在陛下加之意而已。除尙書司封員外郎。再輪對論^④。及聖學、上有取法唐太宗之語。公曰、陛下誠欲取法、必用賢納諫。今所謂房、杜、王、魏、誰乎。且太宗英武、百戰百勝、乃者手詔明言、扞夷狄、援

中原、而實圖退避之計、何也。又請早定國論、詞甚剴切。于是眞修政司講求治要、命宰相提舉、自公發之。五月、詔在內職事官、在外監司守令及曾任郡守郎官以上者各述所見。公因極言時事、乞復置御營司、分諸將爲六軍、令大臣大將爲使副、各典一軍、以收兵權。舉淮南之地分置征鎮、使自戰自守。又乞躬行實德、以率百官。皆他人未嘗言者。六月、擢起居舍人、奏欲知敵情、莫如厚設爵賞、廣募間探、事皆預備、毋蹈往昔維揚之失。尋詔都督府及^⑤沿江諸將如公言。是秋、上欲用舊^⑥相朱勝非代秦右相檜、先以侍讀召^⑦。而給事中程瑀、中書舍人胡世將執不可。劉一止爲左史、公爲右史、次當書行、亦謂不可。又命左司林待聘、右司樓炤攝承、皆辭。六人并以宮觀罷。五年、宗祀赦、復直顯謨閣、積階左朝散郎。六年秋、再以起居郎召。入謝、上曰、久不見卿、殊渴嘉言。公力論風俗久壞、必盡掃

而更張之。又言二史職廢、乞用唐制、群臣奏對、史官侍傍、事必記、言必書。一日、宰執更互留身、公曰、公事公言。今五六執政人各進說、殆非同寅協恭之義。暫權給事中、改兼外制。七年二月、真拜中書舍人、賜服金紫。公感激上知、政事闕失盡言無隱。金陵宮室未備、置修內司、命宦者王鑑領之。鑑請聖祖殿基營私第、部曲多占民居、其使臣儲毅託名御莊、冒占腴田、大爲奸利。會有訴者、按驗得實、止鑄毅官。公曰、此與宣和間李彥西城所公田何異。毅不足道、鑑實使之。上爲逐鑑、仍罷御莊。言者論司農少卿樊賓、屯田員外郎王弗提領營田擾民無益、以其事歸帥漕、而召賓、弗還朝。公繳奏、二人皆罷。都督府修造建康城、期會迫促、又以軍儲不足、夏稅正絹每匹折錢八緡。公言行宮甫畢、不宜復興大役、民力已困、折變何以堪之。詔罷築城、而折帛減二千、至今以爲例。張丞相浚兄滉自蜀

來、旣除職與郡、又賜出身。公與張公同年相善、勸其力辭。張公迫母命難之。公即繳奏、竟寢。觀望者乃指公論他事異同、罷爲提舉台州崇道觀。公不以兵部尙書呂祉代劉光世統軍合肥爲然。至是酈瓊殺祉、率全軍數萬人北去。上記公言、加集英殿修撰。八年四月、召拜兵部侍郎。公奏、臣屢言規模先定、乃可爲國。遷都大事也、期年之間方進臨安、復退還浙。輔弼重任也、一紀之間下命相之制者十有四、進退執政無慮二十餘人。規模安在。上曰、非不欲立規模、正緣宰輔數易耳。六月兼權吏部尙書。十一月又兼史館修撰。去冬、虜廢劉豫、使來議和、秦丞相再相主之、朝論藉藉。公請詢可否於衆、上乃令侍從臺諫即日條奏。公上疏數百言、大概謂天方佑宋、當自治以需天時、屈膝事人、非臣所知。又率侍從極陳失計、嘗面折中丞勾龍如淵曰、達觀其所舉、君昔薦七人、後皆北面張邦昌。



今囁嚅附會、墮虜計中、他日必背君親矣。監察御史施廷臣擢侍御史、太府寺丞莫將賜出身、超拜起居郎、皆上書迎合者。翻黃下吏部、公執奏曰、故事遷除未有如此之驟。力詆兩人、引疾卧家。秦素厚公、命樓炤問疾、許直翰苑。公曰、今日進退在我、遷官則在他人、某惟有去耳。秦語人曰、張子公守正、官職不能動也。徽猷閣待制黎確贈官、前參政李回退復職官、公謂確等事僞楚而爲之用、并乞追奪。其攝銓曹、遇事不苟如此。是冬和議成、復河南、陝西境土。九年正月、上以祖宗陵寢久淪異域、詔公同光山軍節度使、開府儀同三司、判大宗正事、士猗修奉灑掃、賜銀絹有差。以二月己巳陛辭、自武昌、信陽入蔡、穎、五月丙戌至永安軍。戊子朝謁諸陵、庚寅修奉畢、辛卯由鄭歷汴、宋、宿、泗、淮南以歸。六月入對、公奏、頻年陵下石澗涸竭、使至而水流如故。上驚異。久之、又陳使事十餘條。如謂劉

豫初廢、人情洶洶、而我斥堠不明、坐失機會。謂鄺瓊部伍皆西陲勁兵、今在河南、尚可收用。新疆賦租已蠲、而使命絡繹、推恩支費、猶用兵興時例、願加裁損、非甚不得已、勿遣使、以寬民力。上悉嘉納。七月、除權吏部尚書、首論官冗、半年間授宮觀、嶽廟九百餘員、坐糜廩祿、虛理資考。方議革銓選之弊、會四川制置使胡世將升川、陝宣撫副使、成都謀帥、上語宰相、張某高明練達、和正有守、可寬西顧。但朕惜其去耳。臺評朝論亦謂當留、公力請行。九月、除寶文閣學士、知成都府、特製金帶以賜。初加佩魚、宰相以官制爲言而止。公奏、蜀困征徭、臣當宣布德意、寬一路之民。上曰、豈惟本路、凡四川寬恤、悉以付卿。又奏、主和者撻懶也。今爲其姪兀朮所戕、勢必渝平。乞道京洛關陝、謁世將於河池、共議邊計。至則謂世將、諸軍今戍陝西、饋餉雖寬、如緩急何。宜斂兵備蜀口。仍丐錢五百萬緡爲儲

淀、世將皆奏行之。公以十年春至益，與世將尺牘交馳，講畫素定。是夏，虜果叛，盟窺蜀。吳璘及楊政、郭浩大破之，俘獲萬計。其後公除西府，蜀人唐文若草制云：「保蜀之功，著龜先見。蓋謂此也。」十一年，詔世將納契丹降人。公曰：「蜀地狹，安能容？且不鑑前朝常勝軍乎？」世將奏寢其事。蜀自用兵，和預買匹布折估錢二引，民已病之。至是，轉運司迫餉軍，增至三道，成都一路總七十四萬一千有奇。公言：「昨降度牒二千，稱提前引，數適相當，願以此代輸。」從之。初，公開府，適承歲旱，大發積粟以賑饑民，撫存黎雅番部，禁戢貪吏，開修渠堰，蠲落江田稅，決遣獄訟，修文翁舊學，時與諸生講論經旨，葺諸葛武侯廟、杜少陵草堂，新張乖崖祠，政無不舉。蜀人大悅。屢請代，不聽。十三年冬，始命提舉江州太平觀。時舊人往往以異同得罪，公家居絕口不言世事，取吳園先生遺編數百卷，手自抄定。又追先志，

斥俸餘爲義莊，贍宗族，自號雲山老人。二十五年冬，秦丞相薨，舊人在者皆起，上首以公帥鄉部，兼行宮留守司公事。明年二月至金陵，積歲負內庫錢帛鉅萬，公悉奏免。池有義子與父爭訟，守昏飭繫父，連年不決。公請移廷尉，黜其守。居二年，政成化洽，進端明殿學士，考課累轉左中奉大夫。二十九年夏，召赴行在。公奏：「虜主遷都，和好難保。惟陛下儆戒無虞，自反求治。」上喜曰：「久不聞卿議論，良沃朕心。」是夕，公腹疾暴作，亟請休致。上大驚，用前執政禮，除公提舉萬壽觀，兼侍讀。公再移疾，給寬假還鄉。數月疾平，連有旨趣覲。公奏：「兩郡王名分宜早定。」上曰：「朕懷此久矣，人所難言。」開春當議典禮。公頓首謝。時風俗侈靡，財用匱乏。公勸上止北貨之貿易，省非時之賜予，罷土木，減冗吏，躬行節儉，民自富足。上嘉獎再三。公遂言：「甲庫萃工巧以蕩上心，酤良醞以奪官課，教坊員數日增，俸給賜



賫耗蠹不貲。上曰、卿可謂責難於君。明日罷甲庫諸局、以酒庫歸有司、減樂工數百人、正除吏部尙書、侍讀如故。虜使施宜生來賀三十年正旦、命公館伴。宜生閩人、公以首丘桑梓語動之、宜生雅敬公、頗漏虜情。公乞早爲之備。會疾復作、力求納祿、詞極哀切。上命湯丞相思退留公。公請不已、轉左中大夫、加資政殿學士致仕、特給眞俸。公方去、即降詔立皇子云。明年冬、起公再帥江東。完顏亮已深入、人情凶懼、公不敢辭。亮死、虜復求和、詔沿江帥守條具進討恢復計。人人馳志幽燕、公獨乞持重養威、觀釁而動。已而、諸將追躡果無功。尋以張忠獻公代公、命公奏事。公言、前日邊遽、義當強起、今憊不能支矣。復提舉江州太平興國宮。三十二年六月、孝宗受禪、御札召公、道除同知樞密院事。公懇辭、又遣子埏入辭。上命中使賫手筆趨朝、許乘車至宮門、給扶登殿、問爲治之要。公曰、內治乃

可外攘。今天下弊事至衆、中外望治、願如祖宗及太上紹興二年五月手詔、命百執事赴都省給札條具。上大喜、御批略云、覽燾所奏、犁然有契於衷。其令侍從臺諫集都堂、賜以筆札、取當今弊事悉意以聞、退各於其聽治之所、盡率其屬、諭以朕意、極言毋隱。於是士大夫平日欲言不能自達者、纖悉聞矣。上皆親閱、標識急務、付公看詳、公請擇可行行之。覃恩轉左太中大夫。隆興元年三月、遷參知政事。公以老病不拜。臺諫交章留公、上還公奏、且命宰相諭旨云、朕不敢煩公以政、姑爲朝廷重可也。公辭益堅。上亦察其實病、遂除資政大學士、提舉萬壽觀、兼侍讀、恩數視政府。公援紹興末例、謁告將理、上乃許之。及家、固求致仕、詔從其請。後二年而薨、享年七十五、贈宣奉大夫、諡忠定、爵自德興縣男累封鄱陽郡開國公、食邑通三千五百戶、食實封三百戶、後以子遇恩累贈太師。娶程氏、



忠則不欺、公則不私。明則不疑、正則不訥。堂堂張公、具美在茲。學識卓然、氣節隨之。時有難易、心忘險夷。遇事極言、見義勇爲。如璧如珪、表裏無疵。如著如龜、計策無遺。獨立近班、國之表儀。久任兩鎮、民之父師。紹興季年、大政方咨。公曰憊矣、祈哀以辭。孝宗纂承、元老來思。美疢益侵、壯猷莫施。位豈不高、人嘆辰遲。壽豈不遐、人望期頤。四朝遺直、千載清規。相彼先塋、山川逶迤。公所自上、是祔是宜。斲石刻辭、以永厥垂。

周必大撰 《平園續稿》卷二

吳方慶先生行狀

方慶字少琳、廼構之長子也。父任雷州刑曹、道遠不赴。後贈承仕郎。母葉氏、贈孺人。繼母魏氏、封太孺人。齡齟穎悟、敏秀超群。篤行好學、博涉經傳、尤深於詩書。政和五年、升貢太學內舍。宣和三年、何渙榜登科。臺檄公昭武考試、公試李綱三卷批云

此子必能爲國了事、擢爲解首。調吉州永昌尉、以父憂去、服除。會建州震鄰、奉養繼母、不赴銓集者數年。李綱相、首召公參議。公欲不起、宗族強乃行。至、則綱相七十日而罷、授福州司戶而歸。再陞從仕郎、知松溪縣、爲邑僻陋、民不知教、其俗悍而好鬪。公以禮化之、皆感悟自革、脩崇學校、舉善而教。不能、士類多所成就、弦誦之聲溢境。歲飢、公乃開倉賑給、躬親督察、老幼沐均平之惠、一境得全。有崇先者、潛結兇黨、欲煽爲變、期夜半竊發。公廉得其情、前期警戒、賊計不知所出、束手就擒。事定、人始知之。獄具、白於郡。郡將疾其能、一切釋放。公力爭之、志不可回。士大夫聞之、莫不浩歎。後范汝爲復起、果皆其黨、則郡將之過也。朝廷言事者以是多公。秩滿還鄉、時李綱卒、公不復有仕志、慨然有慕淵明松菊之興。謝事於朝、奏牘在道、公故人見之、遂尼之不克上。得調遂安軍節度推官、監司交

薦之、公略不屑意。壬申、得遂掛冠之請、以通直郎致仕、賜五品服。太夫人在堂、會天子有事於南郊、恩書之寵、賁及存亡、鄉閭榮之。公既得謝、優游舊隱、結廬號曰眞佚、終日嘯咏其間、爲終焉之計。逸居五年、乃卒、享年六十有九。天性曠達、恂恂愷悌、不爲崖岸、斬絕之行、是非不涉于口、喜慍不形于色、善與人交、始終如一、未嘗忤物、沉默進退、介然自守。方知命之年、遂有告老之意。或謂之曰、公血氣方剛、事業未究、奚去之果。公曰、鵬鷖逍遙、各適其道。平生仕宦、未嘗有毫釐營進之心。卒遂所請、怡情崖壑、養逸丘樊、徜徉于閭里、以觴詠自娛、其古逸民之風歟。公娶張氏、繼娶沙陽鄧氏、枌櫚先生之妹、皆賜孺人。妹婿延平李侗、狀公行事如此。

李侗撰 《李延平先生集》卷一

校記

①「老」上疑脫「請」或「丐」一類字。

②紆：宋浙江刊本《晦庵先生文集》作「紆」。

③處州州學：原作「處州學」，據明祁氏淡生堂抄本《周文忠公集》補。

④放：原作「於」，據右引改。

⑤「其詳」至「臺諫」凡三十六字原脫，據右引補。其中

「給札」原作「給禮」，據《宋史》卷三八一《張闡傳》改。

⑥召：原作「詔」，據傳增湘校道光刻本《廬陵周益國文忠公集》改。

⑦嘉：原作「加」，據明祁氏淡生堂抄本《周文忠公集》改。

⑧正：原作「止」，據右引改。

⑨侍郎：原脫，據右引補。

⑩必：原作「不」，據右引改。



儒藏

⑪監：原脫，據右引補。

⑫諱：原脫，據傳增湘校道光刻本《廬陵周益國文忠公集》補。

⑬郎：原脫，據四庫本《文忠集》補。

⑭論：原脫，據傳增湘校道光刻本《廬陵周益國文忠公集》補。

⑮及：原作「各」，據右引改。

⑯舊：原作「右」，據右引改。

⑰召：原作「詔」，據右引改。

⑱上：原作「尙」，據四庫本《文忠集》改。

⑲涸：原作「渴」，據傳增湘校道光刻本《廬陵周益國文忠公集》改。

⑳恩：原作「命」，據右引改。

宋儒碑傳集卷九十七

李侗 譚知古 林孝謹 劉安禮

金安節

延平先生李公行狀

先生諱侗、字愿中、姓李氏、南劍州劍浦人。曾祖諱幹、屯田郎中致仕、贈金紫光祿大夫。妣清源郡太夫人朱氏。祖諱纁、朝散大夫、贈中奉大夫。妣永嘉郡太君胡氏。咸寧郡太君朱氏。父諱渙、朝奉郎、贈右朝議大夫。妣太恭人饒氏。先生朝議公之季子也。生有異稟、幼而穎悟。少長、孝友謹篤。朝議公太恭人特所鍾愛。既冠、遊鄉校、有聲稱。已而聞郡人羅仲素先生得河洛之學於龜山楊文靖公之門、遂往學焉。羅公清介絕俗、雖里人鮮克知之。見先生從遊受業、或頗非笑。先生若不聞、從之累年、受春秋、中庸、語、孟之說、從容潛玩、有會於心、盡得其所傳之奧。羅公少然可、亟稱許焉。於是退而屏居

山田、結茅水竹之間、謝絕世故、餘四十年、簞瓢屢空、怡然自適。中間郡將學官聞其名而招致之、或遣子弟從遊受學、州郡士子有以矜式焉。晚以二子舉進士、試吏旁郡、更請迎養。先生不得已爲一行、自建安如鉛山、訪外家兄弟於昭武、過其門弟子故人于武夷潭溪之上、徜徉而歸。會閩帥玉山汪公以書禮車乘來迎、蓋將相與講所疑焉。先生因往見之。至之日疾作、遂卒于府治之館舍。是年七十有一矣。隆興元年十月十有五、日也。汪公爲遣參議官王君伯序、觀察推官謝公倣、護喪事、躬視棺斂、禮意喪具無不周悉。居數日、諸子畢至、遂以喪歸。先生娶同郡吳氏、子男三人、友直、左修、職郎、信州鉛山縣尉。信甫、左修職郎、建寧府建安縣主簿。友聞、未仕。女一人、早亡。孫男四人、女八人、皆幼。初、龜山先生唱道東南、士之遊其門者甚衆。然語其潛思力行、任重詣極如羅公、蓋一人而已。先



生既從之學、講誦之餘、危^②坐終日、以驗夫喜怒哀樂未發之前氣象爲如何、而求^③所謂中者。若是者蓋^④久之、而知天下之大本真^⑤有在乎是也。蓋天下之理無不由是而出、既得其本、則凡出於此者、雖品節萬殊、曲折萬變、莫不該攝洞貫、以次融釋而各有條理、如川流脈絡之不可亂。大而天地之所以高厚、細而品彙之所以化育、以至於經訓之微言、日用之小物、折之于此、無一不得其衷焉。由是操存益固、涵養益熟、精明純一、觸處洞然、泛應曲酬、發必中節。故其事親誠孝、左右無違。仲兄性剛多忤、先生事之致誠盡敬、更得其驩心焉。閨門內外夷愉肅穆、若無人聲、而衆事自理。與族婣舊故恩意篤厚、久而不忘。生事素薄、然處之有道、量入爲出、賓祭謹飭、租賦必爲鄰里先。親戚或貧不能婚嫁、爲之經理、節衣食以振助之。與鄉人處、食飲言笑、終日油油如也。年長者事之盡禮、少者賤

者接之各盡其道、以故鄉黨^⑥愛敬、暴悍化服。其接後學、答問窮晝夜不倦、隨人淺深、誘之各不同、而要以反身自得、而可以入於聖賢之域。故其言曰、學問之道不在多言、但嘿坐澄心、體認天理、若見雖一毫私欲之發、亦退聽矣。久久用力於此、庶幾漸明、講學始有力耳。又嘗曰、學者之病在於未有灑然冰解凍釋處、縱有力持守、不過苟免、顯然悔尤而已。若此者、恐未足道也。又嘗曰、今人之學與古人異、如孔門諸子、羣居終日、交相切磨、又得夫子爲之依歸、日用之間、觀感而化者多矣。恐於融釋而洒^⑦落處、非言說所及也。不然、子貢何以言夫子之言性與天道不可得而聞也耶。嘗以黃太史之稱濂溪周夫子胸中灑落、如光風霽月云者爲善形容有道者氣象、嘗諷誦之而顧謂學者曰、存此於胸中、庶幾遇事廓然而義理少進矣。其語中庸曰、聖門之傳是書、其所以開悟後學、無遺策矣。

然所謂喜怒哀樂未發謂之中者、又一篇之指要也。若徒記誦而已、則亦奚以爲哉。必也體之於身、實見是理、若顏子之嘆、卓然見其爲一物而不違乎心目之間也、然後擴充而往、無所不通、則庶乎其可以言中庸矣。其語春秋曰、春秋一事各是發明一例、如觀山水、徒步而形勢不同、不可拘以一法。然所以難言者、蓋以常人之心推測聖人、未到聖人灑然處、豈能無失耶。其於語、孟他經無不貫達、苟有疑問、答之必極其趣、然語之而不惰者、或寡矣。蓋嘗曰、讀書者知其所言莫非吾事、而即吾身以求之、則凡聖賢所至而吾所未至者、皆可勉而進矣。若直以文字求之、悅其詞義以資誦說、其不爲玩物喪志者幾希。以故未嘗爲講解文書、然其辨析精微、毫釐畢察。嘗語問者曰、講學切在深潛縝密、然後氣味深長、蹊徑不差。若概以理一而不察乎其分之殊、此學者所以流於疑似亂真之

說而不自知也。其開端示人、大要類此。先生資稟勁特、氣節豪邁而充養完粹、無復圭角精純之氣達於面目。色溫言厲、神定氣和、語默動靜端詳閑泰、自然之中若有成法。平居恂恂、於事若無甚可否。及其酬酢事變、斷以義理、則有截然不可犯者。早歲聞道、即棄場屋、超然遠引、若無意於當世。然憂時論事、感激動人。其語治道、必以明天理、正人心、崇節義、厲廉恥爲先、本末備具、可舉而行、非特空言而已。異端之學無所入於其心、然一聞其說、則知其詖淫邪遁之所以然者。蓋辨之於錙銖眇忽之間、而儒釋之邪正分矣。熹先君子吏部府君亦從羅公問學、與先生爲同門友、雅敬重焉。嘗與沙縣鄧迪天啓語及先生、鄧曰、愿中如冰壺秋月、瑩徹無瑕、非吾曹所及。先君子深以爲知言、亟稱道之。其後熹獲從先生遊、每一去而復來、則所聞必益超絕。蓋其上達不已、日新如此。嗚呼、若先生

之道德純備、學術通明、求之當世、殆絕倫比。然不求知於世、而亦未嘗輕以語人、故上之人既莫之知、而學者亦莫之識、是以進不獲施之於時、退未及傳之於後、而先生方且玩其所安樂者於畎畝之中、悠然不知老之將至。蓋所謂依乎中庸、遯世不見知而不悔者、先生庶幾焉。比年以來、學者始益親敬^①、而方伯連帥之賢者又樂聞其道而邀致之、其意豈徒然哉。不幸天喪斯文、而先生歿矣、龜山之所聞於程夫子而授之羅公者、至是而不得其傳矣。嗚呼痛哉。諸孤方謀窀穸之事、謂熹承學之久、宜知先生之蘊、使其事以請銘於作者、將勒諸幽堂、以告後世知德者、有以考焉。熹愚不肖、蒙被教育不爲不久、聽其言、觀其行而服膺焉、不爲不詳、然未能有以得其遠者大者、故悉取凡聞見所及一二書之。詞若繁而不敢殺者、蓋有待於筆削云耳。謹狀。年月日、門人具位狀。

朱熹撰 《晦庵先生朱文公文集》卷九七

延平李先生墓誌銘

先生諱侗、字愿中、姓李氏、南劍州劍浦人。曾祖幹、屯田郎中致仕、贈金紫光祿大夫。妣清源郡太夫人朱氏。祖纁、朝散大夫、贈中奉大夫。妣永嘉郡太君胡氏。咸寧郡太君朱氏。父渙、朝奉郎、贈右朝議大夫。妣太恭人饒氏。先生幼警悟、既冠、游鄉校、有聲。已而聞郡人羅仲素先生得河洛之學于龜山楊文靖公之門、遂往學焉。受春秋、中庸、語、孟之說、不事科舉。屏居山田、結茅水竹之間、自適者餘四十年。其始學也、默坐澄心、以驗夫喜怒哀樂未發之前氣象爲何如。若是者蓋久之、而知天下之大、本真在乎是也。蓋天下之理、無不由是而出、既得其本、則凡出于此者、雖品節萬殊、曲折萬變、莫不該攝洞貫。以次融釋、各有條理、如川流脈絡之不可亂。大而天地之所以高厚、細而品彙之所以



儒藏

化育、以至經訓之微言、日用之小物、折之于此、無一不得其衷焉。由是操存益固、涵養益熟、汎應曲酬、發必中節。其事親從兄、有人所難能者、閨門內外、怡愉肅穆、若無人聲、而衆事自理。與族姻舊故、恩意篤厚、久而不忘。鄉黨愛敬、悍暴化服。其接後學、答問不倦、隨其氣質、誘之各不同、而要以反身自得、而可以入于聖賢之域。嘗謂讀書者、當知其言莫非吾事、而即吾身以求之、則凡聖賢所至而吾所未至者、皆可勉而至矣。若直以文字求之、悅其詞義、以資誦說、其不爲玩物喪志也幾希。以故未嘗爲講解文字、而其辯析精微、尤謹于毫釐之間、以爲千里之謬、必自此始。蓋先生資稟勁特、氣節高邁、而充養粹厚、無復圭角、精純之氣、達于面目、色溫言厲、神定氣和、語默動靜、端詳閒泰、自然之中、若有成法。異端之學、無所入于其中、然一聞其說、則知其詖淫邪遁之所以然者。雖超然遠引、

若無意于當世、而憂時論事、感激動人。其語治道、必以明天理、正人心、崇節義、厲廉恥爲先、本末備具、可舉而行、非特崇空言而已。娶同郡吳氏。子男三人、友直、左修職郎、信州鉛山縣尉。信甫、左修職郎、建寧府建安縣主簿。友文、未仕。女一人、早亡。孫男四人、孫女八人、皆幼。先生以隆興元年十月壬申卒于福唐府治之館舍、年七十有一。其門人左迪功郎、武學博士朱熹、元晦狀先生之行如此。元晦之爲人也、審于擇善、嚴于衛道、遺佚貧困而不懈、以外物易其所守之錙銖。其師事先生、久益不懈、以爲每一見、則所聞必益超絕、蓋其上達不已、日新如此也。某守福唐、聞先生之言、行于元晦爲詳。他日移書屈致、先生不余鄙、惠然肯臨、竊庶幾聞所未聞焉。至之日、方坐語、忽疾作、頃之已不救矣。其孤護喪以歸、將以二年八月庚申葬于所居山之左、而以銘見屬。某于先生雖不獲從容扣請、以

畢其所欲見之志。而其慕向之誠。非苟然者。且元晦之賢。某所畏也。銘曰。

學以爲己。己則安在。嗟世之人。以外爲內。挾策讀書。無異博塞。先生之學。有原有委。端居靜慮。以究天理。是中澹然。塵垢不止。眞積力久。道乃在我。大本既立。施無不可。世莫之知。老于布衣。獨使一鄉化爲善良。我爲銘詩。以俟君子。有欲求之。其攷諸此。

汪應辰撰 《文定集》卷二二

右承事郎譚君墓誌銘

旃蒙大荒落之歲。東北敵女眞內侮。越明年。靖康改元。月哉生明。黑幟環都邑。先是五日。禮部侍郎譚公世勣。跪白其父曰。國方有難。大人朝不坐。燕不與。宜歸舊隱。世勣弗克從。從大人者。有元孫知古。時知古侍旁。兩不忍違。涕泣未即承命。侍郎顧謂之曰。俾爾代我子職。吾得一意王事。汝之孝不

既移乎。忱念勉之。母感知古又涕泣逡巡而後行。未幾。女眞得貨解圍去。知古至京師。省覲。少留。侍郎曰。敵禍方滋。吾不可以此時爲私謀。既屬汝以王父之重。汝能紓其憂而燕其老。是吾有子而汝王父有孫。吾計端審。汝其行矣。君遂復歸。明年敵再入。克汴。植僞主。侍郎死之。君聞訃。氣殆絕而息。奔喪護柩。奉終事。哀過於禮。自是不離王父大夫公之側。雖大夫公喪。賢子年益老。辟寇歷險。而氣體無傷疾。不異侍郎在時。於是族黨鄉里及賢士大夫。卿咸以孝子順孫稱君。君諱知古。字邦鑑。世爲潭州善化人。母令人黃氏。君幼而穎敏。讀書過目即不忘。大夫侍郎慮其太雋。每戒以謹朴。習以重厚。君乃韜才而敦行。刻意古學。尤熟於易。至歷代史。無不該貫。凡興亡治亂。必深考其致。又博知本朝故實。爲文詞。專宗西漢書。早遊鄉校。與計偕。尋預國學選。再試於春官。報聞。遂罷進取。用延賞



補承務郎、重遠親膝、亦久不調官、前後免父母喪。前右丞許公翰、前簽書樞密院折公彥質及其他貴要人使至潭者、往往欲論薦於朝、君以大夫公悼齒、迄不就。嘗攝藤之鐔津令、辟潭之衡山丞、及辟湖南帥屬、君從之。御史明橐宣諭廣東、使旨甚重、引君爲屬、君辭之、皆以便養也。其在潭幕日、值朝旨鬻荒田、久而不售、君條陳其故、白帥曰、兵旱之後、無上戶、無見緡錢、無耕傭牛、此百姓所以不能售也。不願買、必至於抑配、立近限、必至於鞭笞、經界不明、必至於訟訴、輸直有欠、必至於逃移。此官司所以未可鬻也。其言甚詳、其意則以鬻田非大體而不欲斥言之。帥謝君祖信具上其不便、事遂寢。安撫司治帖武岡犯邊徭、君例被賞、不肯用、曰、以人命易官、可乎。帥卒、君即丐罷、優游大夫公左右。仁風謹化、薰陶遠邇、舟車上下於昭潭者、望譚氏鬱然如漢萬石之家、非有賢父祖、良子孫

而然歟。建炎元年、主上登極、覃恩文武官進一階、君曰、吾聞喪雖在赦令後、而吾父死在赦令前、不可冒此恩。以年勞官至右承事郎。紹興十三年夏四月、感疾卒、其日丁亥、得年五十有一。大夫公哭之屢慟、其叔大父贊讀哀之以詩曰、事余如事祖、然後人又知君之能廣孝也。君外樂易而中耿介、處衆如不能言、聞人之惡如未嘗知。詩與文皆過人、遠甚而不以自名。其弈也、隨敵爲高下、無求勝之心、或旁觀人局、乃若未解。平生敦信義、憎諂諛、尙廉孫、周匱乏、不登權門、修竿牘之贄。予嘗問君於佛學何如、君曰、吾欲取其徒平日所口者、不越百十門、使舍此而問答、則其術窮矣。少之日嘗爲同學所輕、君不之校、唯務自修、其人後反愧君、交遊克終。有傲狠不恭於君者、友而惻之、間以誨語、無匿憾焉。有文集三十卷。娶彭氏、繼室以曹氏、再以田氏。子男子三人、長式祖、將仕郎。次述祖、企祖。

女二人、長女未嫁而卒、次適右迪功郎趙伯辨。孫男二人、曰仁、曰伊。是年九月庚申、式祖等葬君於昭潭南十里。予與君再世從遊、申以婚姻之好、知君詳矣。式祖持君之叔父世卿所狀君行治來謁銘。世卿固賢士、言不以私溢、與予所知合、予安得辭。乃爲之銘、銘曰、

清文裕學、百行始年、纔逾艾位、又痺。或者且貴善罔紀、然則天於子厚矣。荷塘之山、汭源迤、君魄是藏、祖所履。銘以昭德、無泐毀、勿替引之繫孫子。

胡寅撰 《斐然集》卷二六

朴軒處士埋銘

衣冠行僞、師法不傳、本真一失、蕩然莫返。吾郡有石門丈人者、如冰玉潔異、不受塵泥、倦游東還、十年不出戶、遠近學者皆歸之。某在髫髻時、鄰人父兄能道說石門寢處食飲之節、年更長、得一見處士朴軒、且與言、日中不能去。吾嘗聞處士走百里、

從石門游、於其所好、終身不易。初來石門、所與俱學者以次拜、先生矍然離席、至處士獨拜床下、先生初不令止。處士於莆田爲林氏諱孝謹、字彥信、自唐邵州刺史而下、更十世曰昭度、實生故閩清縣尉曰嗣宗、即其大父。閩清生考君諱圭、弗克壽。處士幼而孤、事其母無所欺。牆門雜果有先熟者、母所未嘗食、雖掇拾滿戶下、不令兒曹輒食之。伯仲早歿、善視稚弱、其力甚至。以寬厚長者之言、引鑿疏決、使之爲通才。由進士第曰觀、蓋其仲之子也。初娶陳氏、後娶龔氏、俱爲聞家。有子二人、曰復、曰蒙、質厚強學。一女習浮屠法。紹興二十有五年、年六十二矣、九月辛未、以疾卒。未死數日、曰、吾旦暮人耳、所欲見龐公故編。又謂所親者曰、吾當自力、吾淹病數月、無一夕惡夢。處士與客語、澀訥若不足、人或一見之、鄙慢之色、機獲之心、至是都盡。晏處一室、於其弟爲同好。出入佛老、窮竟旨歸。繫



辭、論語、中庸、大學、有所謂曉然不可亂者、叩之而
聲應、索之而圓轉。其於師友、所由來如是也。世所
傳管寧遇惡風、幾覆舟、謂我嘗一朝科頭、三晨晏
起、過必在是也。處士疏食、飲水三十餘年、雞未鳴
而起、每至夜卧、不脫巾、疾既甚、捉衽束帶如他日。
乃悟管寧應有是語。去禪止一月、徹殯、以來歲葬
於縣之平洋村。其子復嘗學於林某、因泣道、遠日
既得卜、將託之文辭。噫、仁人哉。所欲自埋晦、來者
無述焉、歔歔三歎而爲之銘。其辭曰、嗚呼斯人也、
終然宇宙而無愧者。爾髮髮兮、謂我悶悶兮、去之
五百歲、其人若存兮。

林光朝撰 《艾軒先生文集》卷九

從弟元素墓銘

元素、予叔父第二子也。宣和癸卯、以鄉薦赴試禮
部。甲辰三月、不幸卒於京師。建炎改元十二月庚
申、葬於其縣仙桂鄉方潭院之西。從兄徽猷閣待

制某臨送山原爲之銘曰、

吾兄元承有弟元素、安禮其名、宣義其父。兄官河
東、元素實從、左右是依、問學從容。群書博觀、繼以
編纂、口誦心記、浹洽貫穿。覃思既精、吐爲英華、爰
列薦書、士友以傾。宣和辛丑、睦寇嘯聚、浸淫鄉邦、
官吏恐懼。劉公士英、糾合義兵、除器峙糧、分部扞
城。元素忠勇、長揖守帥、贊以方略、佐其大計。群盜
果至、城堅叵當、林松伯高、記之甚詳。元素倜儻、篤
於風義、赴人急難、不顧其己。惟鮑商霖、病於京師、
詞候闕然、獨往視之。歸得寒病、遂不可治、嗚呼哀
哉。鄉喪善士、家失令子。人之云亡、邦國殄瘁、我在
壽陽。聞訃震驚、使加數年、學就業成、升於王朝、爲
國俊英、今也已矣。言之涕零。荆溪方潭、山水奇秀、
爾父伯叔、環葬前後、元素從之、實志之舊。建炎改
元、歲在丁未。維丑之月、窀穸是事。早婚於吳、中道
不偶、以仲氏子、昭孫爲後。享年幾何、三十有一、白

首偏親、追念曷畢。仲氏孝友、厚其送終、拊視幼孤、實與己同。我作銘詩、以問其藏、於乎萬年、泉室有光。

劉安上撰 《劉給諫集》卷四

宋故敷文閣學士中奉大夫致仕休寧縣

開國子食邑五百戶累贈開府儀同三

司少保諡忠肅金公安節家傳

先公諱安節、字彥亨。其先京兆人、唐末徙歙之休寧、遂爲縣人。曾祖諱仁用、妣蘇氏。祖諱應辰、妣洪氏。父諱裕、贈通議大夫。妣朱氏、贈太淑人。先公生而穎悟、日記千言、識趣不凡、容止莊肅。家貧、刻意務學、太淑人躬紡績以給資用。少長、遊校舍、聲譽益振、操行益勵、貫通經史、尤精於易、學者多宗之。著易解以遺後人。葛司成勝仲自禮部郎宰鄉邑、一見、期以遠到。以沈公晦榜登第、時宣和六年也。初任洪州新建簿、秩滿、范丞相宗尹引爲刪定官。

當紹興初、法令散佚、方命修次、同僚以先公通練博洽、凡一切文法、悉以委之。書成、會廣中得舊本、與所修若合符節。改宣義郎。舊例、改秩多即遷、而先公獨滯故官。謝祖信遷寺丞、見宰相曰、金刪定改官在衆人之前、以不事請謁、無爲言者、祖信不敢先之。五年、召見、奏對稱旨。太上皇曰、金安節好秀才、若加涵養、有用之才也。除司農丞。或問公知召命否、今侍郎張致遠爲中司時所薦、合往謝之。公曰、彼爲朝廷薦人、豈私我哉。竟不往。渡江之初、首論軍興以來國用歲廣、言利者日益繁、然皆瑣碎培克、無益於國。古者取民不過租賦、自漢而下、其法益密、其取益細、至于今、不可以有加矣。儻欲增之、是直爲國斂怨。爲今之計、獨有推行營田之制、以省邊地轉輸、命郡邑守令禁游惰、招流亡、興瀦澤陂池之利、以備水旱、使民務本力農、以廣播植、庶幾田野闢而穀粟多、緩急有以供公上之求。



儒藏

而無咨怨是爲長久之策。又論人臣事君所當先者國事不可以自營。所當勉者職業不可以自安。況今國步未平、四郊多壘、正臣子忘身盡瘁、共濟艱難之日、苟惟利祿是圖而不耻節義之不立、宴安是懷而不憂政事之不修、將何所賴哉。臣願陛下詔股肱耳目之司、察其趨向、考其勤惰、有能憂國忘家、服勤無怠者、不惜顯擢。其或懷私偷安、無益於治者、亟加汰黜。庶幾羣臣竭誠盡力、仰副陛下憂勤圖治之意。言皆剴切。六年夏、遷倉部郎官。明年五月、駕幸金陵、而先公留不預行。朝廷別除郎符、遂乞解職、時以國子監丞處之。以親老辭歸。是月、復召赴行在所、既對稱旨、除監察御史。建言、四方知朝廷之有人、而無敢不服者、以慮無遺筭、動無過舉故也。倘或謀謨不臧、舉措失當、使衆庶至於竊議、強悍得以輕視、非以示四方也。陛下臨御以來、推誠用人、視古無媿、而棟榦或撓、莫克勝

任、皆由自用。夫區區之智而無以揆天下之事、是以察理不明、定計不審、屢舉而屢不當也。夫國家建輔弼之臣、置諸左右、非苟取充位而已。今天下多事、正馳驚不定之時、臣愚欲望陛下斷自宸衷、衆建大臣而使均任其責、庶幾分職率屬而不至於專權、同寅協恭而不至於備位。可否相濟、謀無不獲、動皆適當、克成厥勳、以彰朝廷之有人、而折衝於萬里之外矣。又謂勝敵莫先於自治。欲自治則選將以訓兵、擇吏以安民、卹費以豐財、誠當世之急務。夫兵所以驕、以將非其人、愛而不能令、厚而不能使也。欲選將則當戒姑息而取其能撫御者。民所以困、以吏非其人、依勢作威、倚法以削也。欲擇吏則當黜貪暴而取其有惠愛者。至於卹費則禁浮靡、除冗蠹、公私之費、無所不當卹也。然後蓄力養威、待時而動、戰必勝、攻必克矣。何敵之足慮哉。又奏、法行於世、不能無弊、惟知其弊而救之、



則弊者可使復治。苟坐視而弗卹，則其害愈甚，治不可冀也。今天下皆知官冗之爲患，而歲遇大禮，復推恩數百人。近因臣僚請奏，遂詔侍從討論，蓋知其弊而求所以救之之術也。迄今累月，未聞有所施行，得非大臣不肯任怨如議者之所言，故雖知之而終不可行乎？夫拂百姓以從己之欲，於天下實無所利，則其人足以斂怨，而其怨不可以不恤。若據天下之公議，而去其所同患，恐非所以致怨。雖有無知而不悅者，亦不足恤矣。臣願陛下申命從臣，亟加討論。自宰執侍從以及庶官，皆爲之限，通前後奏補，以至致仕遺表恩澤，各不得過幾員數。如此，庶幾少合人情。雖未能盡去官冗之弊，亦可以少損矣。一時公卿大夫，雖有不樂，而識者韙之。越兩月，遷殿中侍御史。時此職久虛，既拜命，帝謂曰：「此朕親擢，以卿忠亮備見奏文，可宜安職。」時秦丞相再用，方得君，權勢薰灼，無敢忤拂。進其

兄梓知台州。先公連章論其僥冒，謂始以校尉而換文學，繼以文學而直赴殿試，自改官以至後來差除，皆非其所當得。依恃權門，惟意所欲，豈復知朝廷有公道，搢紳有公議乎？上雖曲意勉從，自是大忤權相。繼丁太淑人憂，居喪盡哀，三年不入私室，鄉閭稱其孝。服闋，主管台州崇道觀。秦氏勢益盛，中外側目。先公既與不合，不復通問。或謂少宜下氣，彼能爲人患。先公曰：「得失窮通有命，又安可失其素守？凡三奉祠，皆援赦以請。俸入不繼，處之自若。故擯棄者十有八年。權相死，天子厲精庶事，凡前時直言被抑者，相繼召用。閱月，起知嚴州。兩降旨趣行。至，則以五事奏上。如平民間租稅折價，蠲私逋利息過取，均船戶差撥之令，限軍兵借請之制，與夫裁削錢監官吏冗費，奏上，悉蒙采納。凡諸縣科買之例，羨餘之獻，一切罷去。在郡一年，俸餘之積，並不納宅，寄藏於庫，登附版籍。至今父老

皆能言之。除浙西提點刑獄。被命出決淹獄。每行。得訟牒數百。閉閣秉燭。平心閱之。多得其情。民以不冤。一路肅然。先公久處閒廢。起爲守憲。例冊上供甚厚。並卻之。雖廚傳什器。帷帳籃輿之屬。一無留者。曰。此有司之物。於私家何用。有旨召見。除大理少卿。首論獄情之不能無失者。以姦猾之吏附勢徇利。有以蔽之也。附勢則觀望而權豪勝。徇利則貪墨而賄賂行。伯州犁之上下其手。以勢也。羊舌鮒之黷貨無厭。以利也。而況於胥徒乎。故治獄莫先於治吏。吏姦治而聰明可悉。忠愛可致。欲望聖斷。申飭守臣。虔奉詔條。獄必親慮。率僚屬以正。駁胥吏以嚴。察其姦猾。首斥去之。俾觀望意絕。賄賂不行。斷獄得情。人無冤濫。以仰副陛下哀矜之意。時獲僞造鹽引者。中書必欲置之死。公力爭之。以爲造成已十餘年。鹽官之合追逮者多顯貴。亡歿幾半。且案問自首無死法。因得減等。兩浙轉運

使遣其屬王悅道鞠仁。和令王績獄。不以實。遂付大理。先公以勘者不實。當究問。悅道。即醫師王繼先之子也。有寵於權貴。屢因人丐免。先公必欲正其罪。又論刑者所以弼教。非言治者所當先也。舜命稷播百穀。契敷五教。而從命臯陶明刑以弼之。可謂得本末先後之序矣。夫郡守。縣令。民之師帥。今乃獨以簿書錢穀爲急。至於風俗之淳漓。民情之美惡。皆無與於己事。部刺觀風者。亦徒以其供輸及期。文書如式。不爲其下所訟則已。化民成俗之方。未嘗過而問焉。民未臻於恥格。宜也。乞明飭監司。守令。不必專用法令。苟有可贊教化者。無大小必行。庶幾先民未犯而格之。尋以圉空。有詔獎諭。二十九年四月。徙宗正卿。是年冬。命接伴金國賀正旦使。時經國恤。猶繫黑帶。至淮中流。北使施宜生遲疑不肯進。先公令告之。曰。以日易月。乃太后遺詔。皇帝孝慕。以未卒哭。尙素服。在臣等亦當



然。宜生曰、前者使至北、我朝以其告哀謝、不欲用樂。今宜生以賀使來、奈何不以吉禮見待。先公又答之曰、前次哀謝使雖在服制中、爲趨上國、不敢繫黑帶。今安節等在本朝界內、義得有所伸、不當援此爲比。往反數四、其語始塞。明年春、再充送伴。至楚州、北副使耶律翼僉徒登岸、欲解騎巡檢王松馬、松不敢與、遂曳以見翼、翼怒、輒笞松。先公遣人語翼、設或松等有過、只合牒送本所斷遣、豈得肆行鞭撻。詞色頗厲。乃舍之。時先公官朝散大夫、朝廷恐因是生事、致起釁端、坐降兩官、而移其事對境。及樞密葉義問使北、金主說當時耶律翼奪馬事曰、若翼以公文索馬不得、猶爲可諉、輒自取致競、又行妄箠王松、其曲在我、已鞭翼二百令自效。金某非其罪、還曰、可詳奏知。至七月、先公復原官。至是、回翔卿寺者凡四年。有言其獨立無援者、帝曰、朕亦知之、已有所處。八月、遷禮部侍郎。謝曰、

帝面諭曰、卿久合作從官。明年、遷侍講。九月、遷給事中。上諭大臣曰、朕熟知其人老成、且極正當、必不沽激以求虛名。歲當宗祀、其夏已聞淵聖之喪、乃奏言、宗廟皆當以大臣攝事。時議者不然之。殿院杜莘老言事不合、乞出、除遂寧府。先公封還之。上使宰臣宣諭以莘老所言不實。先公奏曰、臺諫所言因內侍、恐虧政體。久之、聖意亦解。邊報頗急、軍務繁興、先公首以進取、招納、備守三策進。謂、去歲海陵興師、侵犯淮甸、兵威方熾、遽爾北還、雖可爲慶、而未可恃也。蓋天道善應、其所傾覆、常因乎人。今中原之地皆吾土也、有機會可取、如之何不取。中原之民皆吾民也、有機會可招、如之何不招。然觀自昔英雄之君、削平禍亂、未嘗不先固根本而後征討、以致寧一者。如漢祖之關中、光武之河內是也。由是言之、備守者、進取招納之本也。備守既固、以之進取、則兵勢益壯、而易以成功。以之招

納則人知所恃而樂於從命、不可不蚤圖也。自古備邊之道、代有不同、莫如我太祖皇帝淵謀睿略、最爲盡善。蓋其要惟在於擇人而久任、故操術甚簡而收功甚博。軍市之租、並賜諸將、不問出入、故無拘制而不乏於用。以之養士、則足以得死力。以之用間、則足以得敵情。其任之久者、或至三十四年、少者猶不減十餘年、故皆得以盡其才。當是時、削平僭僞、命將出師、殆無虛歲、迄於天下大定、不知有疆場之憂。今淮甸之地、控制邊隅、今猶昔也。如欲爲備禦之計、願詔大臣遴選智謀勇果、有志功名之士、毋間文武、毋拘品秩、付以一州、責其自守。凡土地之所出、財賦之所入、悉以與之、俾得自用。雖上供之數、一無問焉。如治陣隍、繕器械、犒士卒、募間諜之類、皆得便宜從事。其事關國體者、然後以聞。朝廷爲裁其可否而施行之、仍諭以久任之意、使咸知未遽更代、則必悉其心力、不爲苟且

之計矣。聞劉豫爲金所執、先公上言、鄰國之情、難以遙度、當申嚴守禦、以固吾疆陲。多遣間諜、以招彼攜貳。通好之使、未可遽遣。順動之計、更宜緩圖。使民心不搖、軍聽無惑、養威持重、徐觀其變、然後起而圖之、則定計審而臨機速、舉無遺策矣。楊存中往淮南西路采訪事宜、欲廢廬州并管下四縣、以附舒州、徙和州於東關、改和州爲歷陽縣、而合肥、歷陽二縣并升軍額、各差兵將屯戍。先公上言、朝廷欲併省移易州縣之意、大要不過有三、一曰專據形勢要害以禦侮、二曰參酌遠近道里以便民、三曰減罷官吏浮費以足用。今據存中等所申、欲以廬州一郡四縣之地附益舒州、則是舍形勢而就僻陋、如備禦何。欲舉廬州一郡四縣之人供輸帥府、則是舍近便而趨艱遠、如綏撫何。今兩淮經兵火之後、城郭室廬焚毀、戶口牛畜散亡、見雖招集、猶未復業。帥司欲行措置、茫如捕風。今遽移



郡置堡、創建官府、豈無騷動。謂之省費得乎。即此三者、無一可行。然參酌事宜、權衡輕重、緩急先後、當有次第。爲今之策、莫若以戍兵爲首、屯田次之、修築城堡以控要害又次之。蓋州郡無兵不可爲守、百姓無兵不能安業。如廬之合肥、和之濡須、皆昔人控扼孔道。魏明帝嘗云、先帝東置合肥、南守襄陽、西固祁山、賊來輒破於三城之下。而孫權築濡須塢、累攻不克、守將如甘寧等、亦能以寡制衆、蓋形勢之險、攻守百倍。豈有昔人得之可以成功、我今有之而反自棄之。非良策也。欲望朝廷特於沿江量遣將卒一二萬人分屯二州、使壁壘相望、足爲沿淮一帶聲勢、然後廣開屯田、使兵民雜耕、仍修築東西關之險以備固守。況濡須、巢湖之水、上接店埠、下抵江口、可通漕運、則二州之戍兵與其就食沿江、初無少異、而卷舒之間、成效相遠矣。隆興初、金布色忠義遺三省樞密院書論和議、畫

定四事、其一、叔姪通書之式。二、割唐、鄧、海、泗之地。三、歲幣金銀絹之數。四、叛亡俘獲之人。有旨、令侍從臺諫於後省集議。先公條奏、今日之勢、非惟中國在於速和、而北朝亦未嘗不欲和也。近北使之來、書詞雖嫚、而卒章情狀略可見矣。然又懼我測其來意、而有輕之之心也、故倡爲大言、邀索舊禮。儻若直情徑行、而不示以開納之意、則邊備未固、國力方匱、亟與之戰、能無殆乎。若因其咫尺之書、遽爲之屈、安知不乘我之怯、繼以難從之請。不與則廢前功、與之其何以爲國。爲今之計、北朝欲和、理難拒絕、當權時之宜、與之通好、以休兵息民。但講好之後、益當選將練兵、蓄威養銳、大修軍政、以爲後圖。且謂既許通好、則使命不得不通。但我所欲者、削去舊禮。彼雖肯從、猶有未盡。如世稱姪國、國號不加大字、及用再拜二字、考之祖宗與大遼書問儀式、亦有不同、皆合議定、令得允當。海、泗、唐、

鄧爲兩淮襄漢屏蔽、恐絕中原士民歸嚮。必不得已、寧於歲幣少增其數、以厭其貪求。但修奉陵寢、迎護梓宮、當在所先、宜於國書中首及二事。然陵寢地居河南、今欲其以地歸我、未必肯從。謂宜議定還境地、每因遣使入國、恭往陵寢朝謁。是時、廷臣各有建議、而主說不一。至十二月、湯相思退奏、請遣王之望、龍大淵等通問、發行在所。明年正月、金復書、大略言、四州係本朝內地、不當言議外、其餘事非帥府所當可否。上不欲報、而湯相固請答之。進呈、上以書詞示弱、卻不用。繼而布色忠義以未如所欲爲詞、遂與志寧分兵南下、自清河渡淮、守將魏勝戰死。上聞有金師、乃命湯相都督江淮兵馬、仍詔荆襄、川陝嚴爲邊備。湯不行、而臺臣奏乞置獄、取不肯撤備及棄地者、劾其罪。庶和議決成。於是太學生張觀、宋鼎、葛用中等七十二人伏闕上書、乞斬三姦臣、而用胡銓、金安節、虞允文、龔

茂良等協謀同心、以定大計。時有白劄子、欲車駕幸金陵。有旨合議同奏、先公奏曰、竊惟建康江山險固、從昔以爲帝王之都。蓋以南控楚越、西連巴蜀、北接中原、最爲形勝。今將圖維經略、指揮號令、固宜駐蹕於此。然兩淮師旅之後、藩籬未立、自昔所以壯根本而固形勢者、一切未備。宗廟宮室、官舍城壁、倉廩營壘、皆非倉卒所能辦集。民思拯救、如在焚溺。宜頒詔令、以建康、臨安猶唐之東西都。今雖暫還臨安、自此當往來巡幸。仍詔有司按求吳晉以來城壘舊迹、以次營造、以俟駐蹕。庶可慰遠邇之望、成宏濟之功。時淫雨爲沴、有傷蠶麥。詔從臣陳弭災之術。先公奏曰、陰陽之氣、行乎天地之間、慘舒爲寒燠、濕燥爲雨暘、氣均則和、氣偏則冷。雖云天運有數、實與人事相符。聖人居泰則裁成輔相、以保其和、遇災則恐懼修省、以求其應、用能導迎善氣、變災爲祥。至於卿士之列、郡邑之間、



刑罰失中、賦役不平。貪夫侵蝕、以傷民財。暴吏肆虐、以戕民命。有一於此、皆致災之由也。在內令風憲之臣彈劾、在外令廉察之官按發、俾官曹清肅、民無冤濫、則和氣可召而災害不生矣。是時、邊境寧謐、上下恬熙、上圖治甚切、乃賜臣下筆札、令取當今弊事、悉意以聞。遂奏、聖王之治天下、若天地覆載、日月照臨、一視同仁、初無偏係。而小智苟得、惟務殖私、不顧公議、妄有干請。儻遂其欲、實蠹大猷。仁宗皇帝、闢公正之路、杜邪枉之門、特詔禁絕內降、仰中書樞密院并所承受官司、毋得施行。敢以貨賂結托貴近者、令諫官御史劾奏。陛下躬攬權綱、靡容侵撓、而貴近循習、未盡革心。尙事僥求、乞從中出。若不嚴行抑絕、慮啓倖門。欲望特降指揮、溥加戒敕。敢有違戾、並置嚴科。庶知警懼。又言、聚人曰財、理財曰義。義者、天下之制也。以義爲主、而斟酌損益、使得其宜、則人情允愜、事皆可行。比

者獻計之臣、以邊境未寧、師旅費廣、多以財賦爲言、或欲收天下田、或欲收諸郡公使、或欲罷宮廟差遣、或欲貸豪戶緡錢、以至括道宮佛祠贍給之餘、減見任待闕寄祿之俸。苟細者或傷國體、太甚者或拂人情、徒爲紛紛而終於不可行矣。果何補於邦計哉。臣聞仁祖寶元二年、賈昌朝上書、乞取景德以來、迄於景祐凡百用度、靡有鉅細、校其出入之數、約以祖宗舊制、其有不急皆罷省之。詔以樞密直學士張若谷、右諫議大夫任中師、右司諫韓琦與三司詳所奏、定奪裁省以聞。琦言、欲減省浮費、莫如自宮掖始。請令三司取從前內侍省并御藥院內東門司先朝及今來賜予支費之目、比附酌中、皆從減省、無名者一切罷之。今多事之時、減省之計、實爲先務。欲望聖明稽寶元詔旨、命官詳校。凡百浮費、無問鉅細、一切罷去。庶幾蠹弊悉除、邦計浸阜。仰副陛下崇儉國本之意。時朝廷集

議奏上太上皇帝、太上皇后尊號、先公奏曰、臣之事君、子之事父、所以崇報推美之心、豈有窮已。然自堯舜三代以來、能盡事君、事親之道爲天下萬世臣子之法者、一本於禮而已。禮之所有、不敢以不盡。禮之所無、雖毫髮不敢有加焉。謹按三皇稱皇、五帝稱帝。既已兼三皇五帝爲之名、而天下之父則曰太上皇帝、尊之至也。唐明皇不考於義、乃以皇帝爲循常之稱、遂加以開元聖文神武之號。違禮悖義、先儒固已非之。逮神宗皇帝始毅然不受、遂爲萬世法。自是累朝遵奉、以爲故事、子孫所宜世守而勿失也。臣願陛下事親之孝、無一不合於禮、而太上皇之盛德全美、益昭著於天下。惟聖慈裁鑑之。隆興初、臣寮奏乞將改秩關陞薦章權行寢罷、朝廷集議施行。先公言、法弊則廢法、法不弊而人自弊之、則其責在人。本朝自太祖以來、患州縣幕職、丞簿尉之官繆濫者多、故內自翰林學

士、外至監司長史、皆許薦舉升改。中間惟歲月久近、員數多寡、時有損益、而薦舉之制則未嘗廢。今若患其奔競而寢罷之、何異因噎而廢食。甚不可也。欲救斯弊、莫若必行連坐之法。然犯人事覺、舉主臨時陳首、欲以徼幸免罪。是立法雖嚴而行法太恕。此致弊之大者。宜遵用舊制、不許自首、量其輕重、削秩停任。仍按大中祥符詔、如年終無舉官狀、即具奏聞、當行責罰。庶幾併革不舉之弊、而無變古之譏矣。時有詔起楊存中爲江淮荆襄宣撫使、遂奏云、比者陛下視師江潯、號令一新、天下方注目以觀、傾耳以聽。凡所擢用、悉宜得人。況欲盡護羣雄、兼領數路、大柄所寄、尤當審圖。國家安危、在茲一舉。夫欲成天下之大功、當有以服豪傑之心、慰遠邇之望。存中已施之效、不待臣等具陳。頃以權勢太盛、人言藉藉、陛下曲示保全、俾解軍政、實仁聖始終之遇、人臣莫大之幸也。今復授以此



任事權益重、豈惟無以慰海宇之情、恐非所以全之也。上曰、若不肯書詔、當具誰可爲者。會劉寶、王權叙用、先公復奏云、此二人得罪之由、並以久持兵柄、積有大戾。寶則貪恠刻剝、黷亂軍政。權則庸懦喪師、幾至誤國。頃以臣僚論列、罪狀顯著。太上皇帝奪寶節旄、投之散地。權則貸命除名、永不收叙。中外聞之、莫不欣快。今陛下初登大寶、正當大明賞罰、激勵將士、乃首以貪黷刻剝、喪師誤國之人、實之軍伍、示以復用。臣不知兩淮將士聞之、何以激勵。且謂朝廷初政威令如此、豈不相視解體。甚失陛下修政治兵、圖復境土之意也。孝宗皇帝臨御之初、首詔講讀官宿學士院、燕見咨訪甚悉。時先公啓陳、皆切治體、如嚴用例之弊、革內降之恩、去浮冗之費、曾任三衙管軍大將、總領鈐轄者、使各舉將才、限一月奏聞。堂除差遺、宜省歸吏部、許長吏辟除。益清中書之務、非統兵戰守官、不得

援請眞俸。其蔭補文武官、宜各依本色、毋令求奏文資、妨右武之義。臣僚得致仕遺表恩降、不宜許奏異姓、使得與高貲爲市。平生素疾倖冒、職或遇之、未嘗少置。又嘗進言廣薦舉、嚴賞罰。文臣轉行、奉直、朝議、不許用賞磨勘。武臣自觀察、承宣、節度使、太尉、開府、不許越次超遷、及作一官轉行。至於久任將帥、以謹邊防、推行營田、以省轉輸、務本力農、以廣播植、凡見之施行者、皆所建明也。李唐卿始因禁中作過、降充祗應內品、雖大赦、永不收叙、仍不得充入內省。准指揮、並與叙復元官、除落過名、不理遺闕。先公執奏、李唐卿昔之被罪如此、其嚴今之蒙恩如此、其渥未詳其故。成王之告君陳、有曰、商民在辟、予曰辟、爾惟勿辟。予曰宥、爾惟勿宥。惟厥中。夫中者、無過不及之名、非但施諸行法、宥過而已。欲望睿斷、將李唐卿元犯指揮更賜詳酌施行。又論王繼先罪惡積稔、不應用赦恩從便。

成彥忠以遙郡刺史、不應以日前恩賞併轉兩官。李珂係潛邸舊人、曩以上書補官、資格甚卑、不應驟除編修、恐虧大體。凡權勢顯貴有申請不合條令者、必論奏無所避。上嘗對大臣稱其誠實。一日、因奏事罷、上面勞曰、近日都不見卿繳駁。有所見、但繳進、朕無不聽。上初在建邸、龍大淵、曾覲爲內知客、遭遇恩寵。後即位、授大淵樞密副都承旨、曾覲帶御器械。劉公度時爲諫議大夫、累疏論大淵等憑恃恩遇、變亂是非、且云、毋使替御干預樞筦。詔大淵除知閣門事、覲權知閣門。臺諫相繼論列、奏入不出、聖意未回、宰相逆知先公必以爲言、乃因鄉人之在朝列者私以語之曰、儻書行此、或暫在告、即在政府之除。先公首卻不納、亟論奏、謂舜稱堯、有曰稽于衆、舍己從人。夫堯以如神之智、其臣莫及、猶不恃乎己而樂從乎人、況進退臣工、豈係細事、何必拂諫諍之忠言、戢天下之公議乎。臣

於大淵、覲功過初不詳知、但見搢紳士民莫不指目、又聞臺諫相繼有言。今大淵罷都承旨、覲罷帶御器械、並以閣門處之。論職事則舍劇而就閒、論班次則皆超遷矣。反因紛紛擢實此地、議者謂陛下自即位以來、凡臺諫有所彈奏、雖兩府如葉義問、大將如成閔、以至侍從要官、欲罷則罷、欲貶則貶、一付公論、略無適莫。獨於二人乃爲之遷就諱避、殆非堯稽于衆、舍己從人之義也。臣等若奉明詔、則臣等負中外之謗。大臣若不開陳、則大臣負中外之責。陛下若不俯從、則恐中外紛紛未止也。上怒、謂金某扇動羣議、命宰臣宣示御札、諭以太上時、小事不敢如此。乃抗章自劾、益以職守所在、思效其愚、伏望聖度兼容、或未忍遽加誅戮、即乞重行竄責、以明邦憲、以警官常。兩得旨、無罪可待。越日、乃降出給舍繳章。有旨、給舍未知功過、臺諫只是防微、罷劇就閒、已允公議、尙茲繳回、可特



依。張魏公趨朝、語於衆曰、金給事眞金石底人、不可干以私。力薦先公可爲執政。時以論列曾、龍事、正忤上意、不果遷。未幾、拜兵部侍郎。先公久欲去位、至是或以爲非遷、勸其決去。曰、若爾乃躁也。事君之義、不當如是。越數月、乃丐祠。凡四上、皆降詔不允。執政者亦爲之言、乃以敷文閣直學士提舉太平興國宮。時胡澹菴銓居後省、亟行繳奏。臣聞書曰、圖任舊人共政。詩曰、雖無老成人、尙有典刑。金某太上之舊人、而陛下之老成也。臣嘗兩奉聖訓、決不令其去位。臣竊喜抃、謂陛下納諫之誠、遠追堯舜。貪賢之美、不減湯武。臣退而書之、以爲萬世美談。玉音在耳、忽除金某職名宮觀。臣實未喻。陛下直以金某年當致仕、遂聽其請。以漢張蒼七十餘不當爲柱下史、唐張柬之八十不當爲宰相。況國朝富弼、文彥博皆八十餘、尙不聽其去。金某齒髮未凋、筋力尙健、究心職事、愈於丁年、憂國之

心不在衆後、豈可遽令引去。陛下留之經筵、亦何不可。如臣等輩、不及金某遠甚。金某引去、臣輩胡顏。伏望聖慈、追寢成命。上從所奏。繼而先公又伸前請。上曰、前日以卿請不已、姑勉從耳。後有繳留、雅合朕意。臺諫亦來留卿。卿其安職。隆興二年正月、除吏部侍郎兼權尙書。識鑑精明、流品一清。首論銓曹用例之弊、謂聖制以道立法、頒之有司、考驗稽決、悉有定制。但推行之際、或有未合條令、難以拘文、則當爲之申明。事體相類、可援爲比、則宜許之用例。所謂例者、非有所增損而爲是贅文也。推原法意而使歸於全備耳。閱時浸久、類例猥多、居官者不能盡察、爲吏者得以爲市、宜其滋弊、不可勝言。比年以來、吏員衆多、而闕不足以處之。雖朝廷除授、不能不使之待次、而士夫亦資之、無敢缺望、以員多闕少、其勢固然也。或遇遷改事故、則後來皆得次第之任、雖躁進者不容越次以爭先。

恬靜者亦不憂及期而見奪。故既得一闕、則安心以待之。近或不然、每遇遷改事故、別差人衝替、使未嘗待次者遽得見闕、而先授者卻令改替、仕進者始不安其分矣。聖明深知其故、特降指揮、應在外堂除者、若待闕人內事故闕、並不許著人承填。蓋以玉音示下、使不得容私於其間也。臣愚欲乞應在外堂除去處、如見任及待次入別省差遣者、亦依事故闕、令已授人次第之任。庶幾授受之際、悉歸至公、人無覬覦、各安其分。四月、除吏部尙書。時議者欲鑄鐵錢、與銅錢並使。乃奏云、鐵錢之議、本爲銅寶之乏而設。今廉按之司、監掌之吏、不得其人、竭膽水之利而求羨以規賞、剝銅戶之直而侵漁以規利、所得銅寶、頗虧舊額。是銅之乏、乃官吏之弊、非錢法之弊也。官吏有弊而未革、錢法無弊而欲更、乃謀鑄鐵以爲錢、是豈理財之良策。說者乃謂祖宗朝常用銅鐵中半矣、殊不知因唐末

五代之亂、無所取銅、或鑄以鐵、故國初因之、莫遑遽革。厥後知民間不便、乃令專用銅錢。則銅鐵中半、非得已而不已也。今欲鑄鐵錢、施之沿邊沿海、將以救銅錢出塞越海之弊、誠恐銅錢蓄於有力之家、秘於窖藏之室、未易盡收。此雖益重其法、以禁其往、彼必倍增其直以募其來。是驅銅錢以富塞外之人、而使吾民忍窮宿怨以用鐵錢也。豈有拂民之情、奪民之利、以資姦豪而不失其心者乎。凡所論奏、忠誠激切、不惜盡言。自是、請謝事益力。章屢上、不允。且頒詔俾安厥職。抗章七上、辭情懇至、不可遂留。詔以敷文閣學士轉一官致仕。賜對衣、金帶、鞍馬。時去郊祀不遠、特許奏薦不降等恩。澤與其姪承受。及陛辭之日、上曰、卿且暫歸、旦夕復召卿。目送久之。見其官服止繫帶、復命之回、從容問勞曰、卿尙未佩魚、特以金帶賜卿。去都之日、自從官而下、送者數百人、皆相與歎羨、以爲中興



以來、全名高節、鮮有其比。道傍觀者如堵、皆言、可惜此老子去。其爲時所重如此。上復謂宰相曰、金某丐去、可諷諭之。旦晚當再召用。先公既歸、未幾、太學生許衍等百餘人伏闕上書、乞召用、及從官臺諫以爲請者相繼不絕。在法、致仕尙請俸給之半。公獨一無所取、生理蕭然、所入不繼、僅有伯祖通奉義撥之田以給家食。退居凡七載、恬靜自處、無異於韋布時。暇日、則杖履自隨、涉近郊、徜徉於葆真山下、超然自適。每對客曰、臣之事君、當致其身。今既謝事、則此身方爲我有。家居不事杯酌。或親故厚善者過訪、清談盡日、以貧自樂、出處不渝。至乾道七年正月二十有一日、以疾終于正寢、了然不昧、如悟道者。此皆平時學力所到。享年七十有七、官至中奉大夫。遺表聞、贈通奉大夫、爵休寧縣開國子、食邑五百戶。累贈開府儀同三司、少保、諡曰忠肅。淑人張氏、後先公八月奄棄、累贈和國

夫人。子二人、長備、文林郎、四川總所幹辦公事。次侃、朝請大夫、通判揚州。女二人、長適宣教郎汪擇善、次適迪功郎汪潢。孫四人、簾、朝請大夫、通判瑞州。箴、承直郎、泉州檢踏官。毅、通直郎、吉州太和縣丞。簡、文林郎、廣東市舶監官。乾道八年春、奉遺命、與夫人張氏合葬于縣南葆真山祖塋之左。葬之日、家無贏資、遂鬻所賜金帶以奉襄事。先公天性樂易、襟度坦夷、凡所論事、根本教化、尤爲得體。與兄相友愛、略無間言。比郊恩、奏兄之子僊。所居屋廬、僅蔽風雨。獨喜誦書、多至夜分。年雖高、而益精明。或問其故、先公曰、平生不喜言禪、又不善導引、但少思獨宿耳。與人交、開心見誠、喜慍不形於色、被容接者、深以爲榮。人或負己、亦不與較。所居雜委巷中、嘗有顯者戒謁、久無應門、徐自屏間受刺而出、就欺僕使傳茗器。其人退而悅服。西蜀人士有過者云、吾鄉至以比司馬公。里有或爲過舉者、

必曰、金夫子無乃聞之。輒縮朒不敢爲。後進尊其德行、爲立生祠於縣庠。其正色立朝、不事詭隨、職守所在、必有建明。至於君德之闕遺、時事之得失、人所不敢言者、必盡言無隱。嘗曰、自昔士大夫始進、多務迎合、稍如意則患得患失、不復能副前言、以此爲人主厭棄、未有委富貴、潔去就而見輕於時者也。蓋其持論素定、故自小官則號恬退、曾不以富貴易其所守。每於楊前論事、則忠直鯁亮、毅然有不可奪者。其在瑣闥、封駁尤多。嘗面薦晁公武、龔茂良可爲臺諫、率皆稱職。又薦汪龍溪藻、程顯學邁可備論思之列、後皆爲時名臣。又薦汪龍學勃可備親民、程龍圖大昌可備文學。凡薦引人才、主公議、陰爲獎拔、未嘗示恩於人、以故人多不知。始攝郎曹、爲當軸者所抑。及居副端、有疏其短者、卻之不受。晦菴朱文公有書答汪伯虞云、尙書金公先友也。熹頃歲嘗獲晉拜於臨安、俯仰十有

七載。三復來誨、若復得望見其衣冠而聞其警效者、起敬起慕甚矣。爲當世所推重如此。有文集三十卷藏于家、奏議十卷、表疏一帙、周易解僅存。惜乎餘文散落諸父家、未能裒集歸一。又恐歷時浸遠、後之子孫不知先公遺事、遂泯沒而無聞、謹叙錄其始末、以爲家傳云。

金文剛撰 《新安文獻志》卷七三

校記

- ①公倣：宋淳熙刊本《晦庵先生朱文公文集》作「君防」。
- ②危：右引作「兀」。
- ③右引「求」下有「其」字。
- ④蓋：右引作「既」。
- ⑤眞：右引作「者其」。
- ⑥黨：原作「人」，據右引改。
- ⑦洒：原作「脫」，據右引改。
- ⑧苟：右引作「學者」。
- ⑨恂恂：右引作「簡淡」。
- ⑩敬：原缺，據右引補。
- ⑪「年月日」以下原缺，據右引補。
- ⑫尹：原作「開」，據《宋史》卷三八六《金安節傳》改。
- ⑬興：原作「與」，據文意改。
- ⑭杜莘老：原作「杜莘老」，據《宋史》卷三八六《金安節傳》、卷三八七《杜莘老傳》改。下同。

⑮三十四年：似當作「三十四年」。



儒藏

[General Information]

书名=儒藏 史部 儒林碑传四

作者=杨仕文，舒大刚主编

页数=701

SS号=12315578

DX号=000007486219

出版日期=2005. 05

出版社=四川大学出版社